



YISASINI KAMA VAYA

Agarabi New Testament

Contents

MATIUNI KAMA VAYA	1
MAKINI KAMA VAYA INO	71
RUKUNI KAMA VAYA INO	113
YONINI KAMA VAYA INO	186
BAYA VAREN ORIN BANTA (Aposeri) KAYO MA YÓKEIN BAYA INO	236
PORI MA ROMÚ KEKÁ UVAMAN AMEIN BOMPON MINO	299
PORI MA ESÉ ARAÍEN KORINÍ NANIN BANTA UVAMAN AMEIN BOMPON MINO	330
PORI MA KAN DÁDASIÉN KORINÍ NANIN BANTA UVAMAN AMEIN BOMPON MINO	358
PORI MA KARESÍÁ NANIN BANTA UVAMAN AMEIN BOMPON MINO	376
PORI MA EFESASÍ NANIN BANTA UVAMAN AMEIN BOMPON MINO	387
PORI MA FIRIPAÍ NANIN BANTA UVAMAN AMEIN BOMPON MINO	397
PORI MA KOROSÍ NANIN BANTA UVAMAN AMEIN BOMPON MINO	405
PORI MA ESÉ ARAÍEN TESARONIKÁ NANIN BANTA MA UVAMAN AMEIN BOMPON MINO	413
PORI MA KAN DÁDASIÉN TESARONIKÁ NANIN BANTA UVAMAN AMEIN BOMPON MINO	420
PORI MA ESÉ ARAÍEN TIMOTIN UVAMAN AMEIN BOMPON MINO	424
PORI MA KAN DÁDASIÉN TIMOTIN UVAMAN AMEIN BOMPON MINO	433
PORI MA TAITASIN UVAMAN AMEIN BOMPON MINO	439
PORI MA FIRIMONIN UVAMAN AMEIN BOMPON MINO	443
IBURU KEKÁ MA UVAMAN AMEIN BOMPON MINO	445
YEMISI MA UVANTEIN BOMPON MINO	468
PITA MA ESÉ ARAÍEN UVANTEIN BOMPON MINO	476
PITA MA KAN DÁDASIÉN UVANTEIN BOMPON MINO	485
YONI MA ESÉ ARAÍEN UVANTEIN BOMPON MINO	490
YONI MA KAN DÁDASIÉN UVANTEIN BOMPON MINO	498
YONI MA KANÚ MANAUSÍEN UVANTEIN BOMPON MINO	500
YUTI MA UVANTEIN BOMPON MINO	502
AÚPÁ BARÉEIN BAYA MA SIAN DÁKÓ UKHEIN BOMPON MINO	505

YISASINI KAMA VAYA

The New Testament in the Agarabi language of Papua New Guinea

Nupela Testamen long tokples Agarabi long Niugini

Language: Agarabi

Provided by: Wycliffe Bible Translators

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2010 The Bible Society of Papua New Guinea

This translation is made available to you under the terms of the Creative Commons Attribution-No Derivatives license 4.0. You may share and redistribute this Bible translation or excerpts from it in any format, provided that:

You include the above copyright information.

You do not make any derivative works that change any of the actual words or punctuation of the Scriptures.

Pictures included with Scriptures and other documents are licensed just for use with those Scriptures and documents. For other uses, please contact the respective copyright owners.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.
3f1e4187-f6c7-510d-9325-541e441dd83b
ISBN: 978-1-5313-0014-2

MATIUNI KAMA VAYA

(Matiu)

Matiuni Kama Vaya Ma Uvanteí Pákenai Afova Vaya Ino

Ma vompon ma uvantein banta ino.

Yisas Karaisini Kama Vaya ma varen orin banta (aposeri) Matiunon uvanten mino. Beni ena ví Revi ino.

Uvarein orana ino.

AD eiti (80) ráké eiti-faipi (85) fin mi ma vompon uvanten minon ten kokhon afova vanta kayo ano inikhen mifo inká ena kéká ano AD sikisti (60) ráké seventi (70) fin minon ten inikhen mino.

Ma vompon ma uvantein baru ino.

Parestaini san ma Kantasí Ukhein Bara e ma siyaimpin mino.

Ma vompon ma uvaman amikhein kéká ino.

Yutan anan kékái uvaman amiyáken betimpin ma monó nanin banta vain mi moéken tiamikhen mino.

Nái ana vará ma vompon uvanten nafino.

Yutan kayoi anafu aráompin ma sakanampa vaya siáden ma varará nanin banta ma aya uren evaránen avi-

rano van ma Tiyarafenu ano aní ukharé ein mai vantan Yisasi vákan mi véin mamán dákó uren Kin ne sinten mino.

Yisasin Anafu Aráo

(Ruku 3:23-38)

1 Yisas Karaisi maen Abaraamun nú Kin Devitin nú anan pintéi afoká ukhan mi ma ven anafuyan aví ino.^a

² Abaraamu maen Aisakin kain baren Aisaki ano Yekopun kaúdan Yekopu ano Yudan má be afá aváeyan má kaen mino.

³ Yuda maen Peresin nú Seran nú afóe ifo mÍkan iyampon anóe maen Tamari ino. Peresi ano Esonin kain baren Esoni ano Ramun kaen mino.^b

⁴ Ramu ano Aminadapin kain baren Aminadapi ano Nasonin kaúdan Nasoni ano Sarmonin kaen mino.

^{5c} Sarmoni maen Boasin afóe ifo ve anóe maen Reapi ino. Boasi maen Obetin afóe ifo ve anóe maen Ruti ino. Obeti ano Yesin kaúdan,

⁶ inká Yesi ano Kin Devitin kaen mino. Deviti maen Soromonin afoén bákan be anóe maen Uraiyan aná ma varé ein nanin mino.^d

⁷ Soromoni ano Reoboamin kain baren Reoboami ano Abiyan kaúdan Abiya ano Asan kaen mino.

⁸ Asa ano Yeosafatin kain baren Yeosafati ano Yeoramín kaúdan Yeorami ano Usaiyan kaen mino.

⁹ Usaiya ano Yotamun kain baren Yotamu ano Easin kaúdan Easi ano Esékaiyan kaen mino.

¹⁰ Esékaiya ano Manasen kain baren Manase ano Amonin kaúdan Amoni* ano Yosaiyan mo khauran,

*1:10 Amonini ena ví Amosi ino. 1Ki 3:14 fin ná onano.

^a1:1 Esé 22:18; 1Kr 17:11 ^b1:3 Esé 38:29-30; Rut 4:18-22

^c1:5 Rut 4:13-17 ^d1:6 2Sa 12:24

¹¹ einká Yosaiya ano Yekonaiyan[†] má be afá kayo vá kauran mi Babironí barafá karavusi e fáken oren mino.

¹² fKaravusi e fáken moran mai oyampáké Yekonaiya ano Seatierin kaúdan Seantieri ano Serubaberin kaen mino.

¹³ Serubaberi ano Abiudin kain baren Abiudi ano Eriakimin kaúdan Eriakimi ano Asorin kaen mino.

¹⁴ Asori ano Sadókin kain baren Sadóki ano Akimin kaúdan Akimi ano Eriutin kaen mino.

¹⁵ Eriuti ano Eriasarin kain baren Eriasari ano Matanin kaúdan Matani ano Yekopun kaúdan maen,

¹⁶ inká Yekopu ano Marian avafu Yosepin kaen mino. Maria anoi Tiyarafenu ano ma aní ukhein banta e sen ma ariyain banta Yisasin kaen mino.

¹⁷ Máan tukhan Abaraamun táké Devitimpin onóben Devitin táké Babironí ma karavusi fáken o varé ein damú onóben mai ráké Tiyarafenu ano ma aní ukhein banta Yisasintá ma o khanaí ukhein mai fotini (14) afóeyan mi mai aúbaná me yákó urú ukhen mino.

**Tiyarafenu Ano Ma Aní Ukhein
Banta Yisasi Ma Ve Anóe
Ano Kaein Baya Ino**

(Ruku 2:1-7)

¹⁸ Máan tukhan Tiyarafenu ano ma aní ukhein banta Yisasin ma ve anóe ano kaein mai máan mi ukhen mino. Be anóe Maria maen Yosepin amiran bákan ínainpáké iman amintéin Kantá Aunan mano véin arápin iyampon báuantan baréin Yosepi iniren afová en mino.^g

¹⁹ Afová uren mai van be avafu Yosepi maen puntákein banta váken banasi avorá Marian ída ayave ameno van aúpáké bei inimpin mai ma véin iman ameno van iyaré ein ífá ono van en mino.

²⁰ Máan inin béi variyan baré íkan Bafani enisori ano véi vaintá kaimpin dákó uven temí, “Devitin anin Yosepi oe, éin ma Marian iman ameno van iyain ída vá ífá ono. Para vara seyo, mai ma véin amúpin báken ma yákó ono van iyain iyampon mai Kantá Aunani ákona anon mai yaná afoká ukhen mino. ²¹ Béi afon iyampon mi kainten mifo Yisasin[‡] ne se vá ben aví teno. Para vara seyo, véi anon bei vanasi ume fintena aya uren evaránen aviranten mino.”^h

²² Mai yanasinta ma yákó ein manon pura sen Bafan mano ma sakhanampa vanta finté uaren ma máa sikharé ein mi kanaíen mino. ²³ “Mana arinta ano amúbasí uven mana afon iyampon kaúdantin maen Imanuerin ne sinten mino.”
Ais 7:14

Mai víi ana maen Tiyarafenu setin má ban mino.

²⁴ Mai khain ma Yosepi ódaren maen orun mantaven mai ma Bafani enisori ano ma véin tiamein ánain bákuren Marian o aviren me ve anasí en mino. ²⁵ Be anasí ma ukhan maen béi ída ven má manafin baranton nentá bákan baren mana afon iyampon kaúdan béi ano Yisasi ne sen aví ten mino.ⁱ

**Ofu Ma Afova Varan Banta Kayo Ano
Ma Ena Vara Fáké Erein Baya Ino**

2 Yudiá barafin ma Eroti kiní ukhein damú Betariamú barufá Maria ano Yisasin kain bákan áau e uní páké manáa

[†]1:11 Yekoniani ena ví Yeoiakini ino. 2Ki 24:6 fin ná onano.

[‡]1:21 Yisasin bí maen mai veni ana máan mi ukhen mino. Bafan mano vanasi aya intene ma siyain baya ino.

^e1:11 2Ki 22:1–24:15; 2Kr 36:10; Yer 27:20

^f1:12 Esr 3:2

^g1:18 Ruk 1:27, 35

^h1:21 Ruk 1:31; 2:21

ⁱ1:25 Ruk 2:21

afova vanta kéká ano Yerusaremí barurá eriven ²máa sen inaemí, “Mana iyampon ma Yutan kayoi kin afoká ukhein mai intefasá ban nafino. Tetí ankan áau e uní páké onékun béin ma aníin ofu édaví ódaréi ventá monó teno van eriyá tiféuno.”^j

³Máa sen ina íkan Erotin má minó Yerusaremí barurá ma varé ein nanin banta vá ano mai vava iníden maen kokhon ineine en oreraen mino. ⁴Máan tiyákan Eroti ano vanasii monó ánon banta vá man baya ma afová ukhein banta kayo vá aran e átaru uvin betí ankan inaemí, “Mai ma Tiyarafenu ano ma aní ukhein banta inte varurasá afoká intéin ná sakhanampa vanta kayo ano sikharen nafino.” ⁵Máa síkan betí ankan evaránen béin tiamemí, “Béi Betariamú barurái Yudiá barafá afoká inten ne,” sikharen mino. Para vara seyo, sakhanampa vanta ano máa sen Tiyarafenui vompon dókifin uvantaren mino,

⁶“Yudiá bara fintena varu Betariamú oe,

Yudiá barafin ma aví bain baru kayoi oyampá éi ída va ono.

Mai fara vara seyo, éin pinté mana ánon banta e afoká uven maen

béi anon tenti Isareri nanin bantai yafisiní inten mino.”^k *Mai 5:2*

⁷Máa sen tiamin Eroti iníden áau e uní páké ma afova vanta kéká erikhá ein aúpáké aran béi vaintá erikan mai ofu ma afoká ein damusan betí ankampin avovéen ina uven afova varen mino.

⁸Afová uven betí ankan tiantan Betariamú oriyákan temí, “Tiretí ankan ore vá mai iyampon nan mo kamaeya yosire ma véin ódante vá ovaráne séin me sisimesirá ten má dere oresá mo ventá monó teno.”

⁹Máa síkan betí ankan kini vava iníden mairá me ampen oriyen maen mai ma áau e uní páké ma onein ofu ano vetin an uanten oriyaren mai iyampon ma vain namun amontá o kharemen mino. ¹⁰O kharemíkan betí ankan mai ofu oniyáken moéken amusin en mino.

¹¹Máan turen mai afova vanta kéká ano mai namumpin un pében onákan mai iyampon mano ve anóe Marian má baréin betí ankan mun aron kan durafúden barará mátimen mai iyampontá monó tiren betí unan máden oté uven kori vá kama auna iyain uveri vá irafin ma sádan kama aunka iyain uveri vá máden mai iyampon amusin amen mino.¹ ¹²Amiren bakháin Tiyarafenu ano kaimpin betí ankan tiamen ída vá evaráne Eroti vaintá orono síkan betí ankan iniren mai aa me ífá uven ena aa sáké betí varufá oren mino.

Yosepin Má Be Aná Akhá Bá Ma Isipí Barafá Karan Orein Baya Ino

¹³Afova vanta kayo ma orivíkan maen Bafani enisori ano kaimpin Yosepin avorá afoká uven máa semí, “E mantaveya iyampon má be anóen má aviare Isipí karan ore o varé esí ma séi siamenuna yamusá ovaráneya ereno. Mai fara vara seyo, Eroti ano mai iyampon dosiré arono van iyan mino.” ¹⁴Máa siran Yosepi e mantaaren iyampon má be anóen má aviaren mai inuran mana Isipí oren mino. ¹⁵O van baren Eroti ma fúbíkan Bafan mano ma sakhanampa vanta oo ráké uaren tiyáken, “Isipíkena se sanin aré uno,” ma sikhá ein baya fura sen afoká en mino. *Ose 11:1*

¹⁶Eroti ma afová en áau e uní páké afova vanta kéká ano semi mákasen mino siren moéken aranan en mino. Máan turen afova vanta kéká ano ma siamiyan ofu ma afoká oné tiferuna mai

kan oranan orikhen mino ma sikhá ein nan bei aruvin banta kayo siantan Betariamú baru akhempá ma kákan baru vá tító baru vá ma vain pimpá oriyáken kan orana aránaópá ma vain ain iyampon kayo máa minó aruan puren mino.

¹⁷Minó ma yanasinta ma afoká ein mai Tiyarafenu anon sakhanampa vanta Yeremaiyan pinté uaren máa sikhareín mino:

¹⁸“Ífí baya Ramá barufin inékun ifisana yariyan kákan arun bariyá iné uno.

Resori maen be akhafana van arunaná bariyan ará kusiantan baya ma siyain ída inen mino.

Para va ino, minó iyampon mi fúan kí-pakhan mino.”^m *Yer 31:15*

Yosepi Ma Ve Aná Akhá Bá Evaránen Nasaretí Barurá Orein Baya Ino

¹⁹Eroti ma fúbin maen Bafani enisori ano kaimpin Yosepin avorá Isipí afoká uven máa sen ²⁰béin tiamemí, “Éi e mantaveya iyampon má be anóen má aviare evaráne Isarerí barafá orono. Mai iyampon ma aruan puro no van iyaré ein banta kayo inka furen mino.”

²¹Máa síkan Yosepi esé ana e manten iyampon má be anóen má avíaren evaránen Isarerí barafá oren mino. ²²Oriven iníkan Erotin anin Arkerausi ano ve afóeni varu varen Yudiá kayoi kiní ukheimpin Yosepi mai akhempá orin nan péden mai ma ena khaimpin Tiyarafenu ano véin tiamikhá einí en Kariri varafá oren mino. ²³Orein mano Nasaretí barurá o varen mino. Máan ma ein manon sakhanampa vanta kayo ano ma siyáken béin nan Nasaretí banta ino sen aranten mino ma sikhá ein pura sen afoká en mino.ⁿ

Monó Non Péantan Banta Yoni Ano Ma Yisasini Aa Uvídén Puntáantein Baya Ino

(*Maki 1:2-8; Ruku 3:1-18; Yoni 1:19-28*)

3Maí damú Yudiá barafá banta ída van kámápin monó non péantan banta Yoni afoká uven banasi monó baya máa sen tiamemí, ²“Tiretí ankan ará baerano. Inaru yafisin inka ádé erikhen mino.”³ Sakhanampa vanta Aisaiyan oorá Tiyarafenu ano Yonin nan mi máa sikharen mino,

“Banta ida van kámá bara fáké mana vanta ano oovaren máa siyan mino,

‘Bafani aa uvídeya veni aa funtáantano.” *Ais 40:3*

⁴Yoni véi kameri ayo fóké uvaran au anamun uren kao au fóké amú anan uren báken panon má bonkampun anu vá niyaren mino.^p ⁵Yerusaremíke nanin banta vá Yudiá bara fáke nanin banta vá minó Yodaní non akhen páke nanin banta vá ano vanta ída van kámá barafá Yonini vaya ineno van ore ore en mino. ⁶Oriven mo vetí ankani ume sian páman urákan Yoni ano Yodaní nompin monó non péanten mino. ⁷Yoni ma monó non péantiyan onákan Farasisi kayo vá Sadyusi kayo vá mairá eríkan betí ankan máa sen tiamemí, “Tiretí ankan namu osafáe akhafanan banan Tiyarafenui arananá uman mano siretimpin ereno van iyan mifo mai van iye anó tiamikhayá mai uman pinté karan orono van iya fono.^q ⁸Máan tiya ompo siretí ankan ma fura seya ará baédanteya mai siretí ankani avúavá pókesá aní oro. ⁹rTéi siretí ankan tiamé umpo siretí ída vá Abaraamu nan tetin tinafu ino se vá ineno. Tiyarafenu ano kanaíen ma onámaná kayo sintin Abaraamun

^m2:18 Esé 35:19 ⁿ2:23 Ais 11:1; 53:2; Ruk 2:39; Yon 1:45 ^o3:2 Mat 4:17; Mak 1:15 ^p3:4 2Ki 1:8 ^q3:7 Mat 12:34; 23:33 ^r3:9 Yon 8:33, 39; Rom 4:12

anavasiní inten mino. ^{10s}Minó daa ma ída aran iran nain tíkaré irafin karú dano van mai yaa kayo anafin tantume fe van mino.

^{11t}“Téi ma siretí ankan nompó péanti-yarúna mai siretin nan inka ará baéken mino siré aní iyá umpo sen toyampá ma eriyain bantai ákona ano senti ákona esantakhá téi ída kanaí é ben arantan anamun ayufirí ukhé uno. Béi anon Kantá Aunan má ira vá póké péantanten mino. ¹²Béin ayampin bakhari in danka van mino. Bei uviti namumpin bakhari iyan uviti áitan mápin kaiyáken ída kípan irafin áitan taman kaurinten mino.”

Yoni Ano Ma Yisasin Monó Non Péantein Baya Ino

(*Maki 1:9-11; Ruku 3:21-22*)

¹³Yoni ma vaya siyákan maen Yisasi Karirifá me ampiren Yoni ano véin monó non péantano van Yodení non arufá oren mino. ¹⁴Oríkan Yoni ano véin ayópá ono van temí, “Éi ano ma séi monó non pét-intaren mifo éi fará téi varunafá eriya fono.”

¹⁵Máa síkan Yisasi evaránen béin tiamemí, “Ída ifo séi ma siyarunaí ma éi esin mi Tiyarafenu ano ma erasan nan ma funtákein avúavá barano ma sikhá ein baya ano mo kanaí inten mino.” Síkan Yoni iniren beni vaya vákuren monó non péanten mino.

^{16u}Yisasin ma monó non péantá-dan non pinté ainen e ayoren avafá ma ódiyain má inaru ona yivin béi oniyain má Tiyarafenui Aunan mano mana kukhofá nun avúaváká ten béi vaípa eren mino. ^{17v}Eriyain má inaru fáké mana oova ano máa semí, “Mai sen tanin mino. Téi ven nan moéké tinunu

ukhé te sú káká ben nan moéké timusin iyá uno.”

Ban Anon Mano Ma Yisasin Akhenóka Ein Baya Ino

(*Maki 1:12-13; Ruku 4:1-13*)

4^wMáa siran Ban Anon mano Yisasin akhenóka ino van Kantá Aunan mano mai rákena yo aviren banta ída van kámá barafá oren mino. ^{2x}Aviren mo khain báken foti (40) inuran má bayan má dunan auraren baréin arafan puren mino. ³Arafan nan iyan baré íkan béin ma akhenókain banta ano enóben béin máa sen tiamemí, “Éi ma fura se Tiyarafenu Anin ma vanteya sesin ma onámaná kayo ano veretí ino.”

⁴Máa síkan Yisasi evaránen tiamemí, “Tiyarafenui vompon dókifin máa sen baya uvanten mino, ‘Banasi ano yunantá ana ída kanaíen para van oriyan ban aunan baranten mifo Tiyarafenu oo fenté ma kuviyain baya ánain ma vákurinten mai fara van oriyan ban aunan baranten mino.’” *Diu 8:3*

⁵Máa síkan Ban Anon mano véin do aviren kantasí ukhein baru Yerusaremí oren mo kákan monó namun amonta suron mantaanten mino. ⁶Mo mantantáden Ban Anon mano véin máa sen tiamemí, “Éi Tiyarafenu Anin ma vanteya káuse aravono. Para vara seyo, Tiyarafenui vompon dókifin máa sikhén mino:

“Béi ano vei enisori kayo siantantin éintá dafíben betí ankan ayan do uvídantiya

mairá káusesin ída mana onámaná ano arantan aru finten mino.” *Íbo 91:11-12*

⁷Yisasi evaránen béin tiamemí, “Tiyarafenui vompon dókifin enadá máa

^s3:10 Mat 7:19; Ruk 13:6-9 ^t3:11 Yon 1:26-27, 33; Apo 1:5

^u3:16 Yon 1:32 ^v3:17 Íbo 2:7; Ais 42:1; Mat 12:18; 17:5; Ruk 9:35

^w4:1 Ibu 2:18; 4:15 ^x4:2 Eks 34:28

sikhen mino, ‘Éi ída vá ei Bafan Tiyarafenun akhenóka uan onano.’” *Diu 6:16*

⁸Máa siran Ban Anon mano véin evaránen do aviren mana yan bain anu yontá mun kaúdaren ma varará ma ákona vara kayofin ma ara ara kama yanasinta vain anfen mino. ⁹Aní uren béi máa sen Yisasin tiamemí, “Éi ma aron durafúdeya matime sentá ma monó tiresí maé ma ma oniyaona yanasintá minó éin amenté uno.”

¹⁰Máa síkan Yisasi evaránen béin tiamemí, “Ban Anon noe, sífó ono. Tiyarafenui vompon dóki ano máa sikhen mino, ‘Ei Bafan Tiyarafenu veyáká aránaópá bákeya ventá ana vá monó teno.’” *Diu 6:13*

¹¹Máa síkan Ban Anon mano me ifá en orivin enisori kayo ano eriven ben me ayaen mino.

Yisasi Ma Karirifá Monó Doran Mo Araí Ein Baya Ino

(Maki 1:14-15; Ruku 4:14-15)

¹²YArugin banta kayo ano ma Yonin pákaan karivusifin kain baya ma Yisasi iníden béi evaránen Karirifá oren mino.

¹³Nasaretí barurá manáa yamú o varen mairá me ifá uren Seburunin má Naf-tarin mái varafin ma Karirí non anki-nafá bain baru Kapeniamú o varen mino.

¹⁴Yisasi ma mai avúavá barein mai Tiyarafenu ano ma sakhanampa vanta Aisaiyan oorá máa sikharé ein mi fura sen afoká en mino,

¹⁵“Seburuni vá Naftari vái varafin ma vain nanin banta vá

Karirí non akhempá ma orikhein aayana vá Yodan non arufá ma vain nanin banta vá

maen mai ena anan nanin bantan Kariri varafin baren mino.

¹⁶Mai kayo ano kákan títipafin baré íkan

kákan oon inka khan onen mino.

Purin mano ma sítípa uádan duntein barafin baré ein nanin bantafin inka kakhán afoká en mino.” *Ais 9:1-2*

¹⁷Yisasi aráien monó baya vanasi siamemí, “Tiretí ankan ará baerano. Para vara seyo, inaru yafisin ádé anantá erinten mino.”

Yisasi Ma Araí En Kamí Kamí Eyo Iyampon Kayo Arein Baya Ino

(Maki 1:16-20; Ruku 5:1-11)

¹⁸Maná damú Saimonin nan ma Pitan ne siyain banta vá be afá Endurun má ano noyana arin dorarí iyain bákan base karúdiyáin Yisasi Kariri non ankinafá oriyaren onen mino. ¹⁹Ódaren Yisasi vékanan máa sen tiamemí, “Tirékanan taréa noyana vaseí iya ompo sen má eresí banasi ma aviran aní uantano.” ²⁰Máa siyain má ana vékanan base unan me ampiren béin dakhafen oren mino.

²¹Yisasi mai ráké oriyan onákan Yemisin nú Yonin nú anavasan botifin kumanten be afóe Sebetin má base avové iyá íkan békanan má aren mino.

²²Ariyain má anan békanan mai voti vá betí afóen má me ampiren Yisasin bákuren oren mino.

Yisasi Ma Aí Nanin Banta Ayofein Baya Ino

(Ruku 6:17-19)

²³Yisasi Kariri varafin oriyáken betí ankani monó átaru namumpin un pében monó baya vanasi siamiyáken inká Tiyarafenui yafisin pintena kama vaya sian dáko iyan aí ma vá ein nanin banta ayofiyau ma namu ukhá ein puntá antiyan en mino. ²⁴Máan tiyákan beni vaya ano minó Siriai varafá orera íkan minó nanin banta ano ara ara namu aí ma vákan ai san iyá ein má namu aunan

^y4:12 Mat 14:3; Mak 6:17; Ruk 3:19-20

^a4:23 Mat 9:35; Mak 1:39; Apo 10:38

^z4:17 Mat 3:2; 19:27

^b4:24 Mak 6:55

ma varé ein kayo vá auvayaní ma iyá ein kayo vá ai ayan ma fukaré ein kayo vá aviren eríkan Yisasi minó evaránen ay-ofiyan kama uanten mino. ²⁵ ^cKariri vara fáke nanin banta vá Dekoporisíke nanin banta vá^f Yerusaremíke nanin banta vá Yudiá bara fáke nanin banta vá Yodení non ufáke nanin banta kayo vá ano véin bákuren noren mino.

**Yisasi Ma Vanasi Ano Avu Vá
Uman Má Ma Varan Nain
Afova Amein Baya Ino
(Ruku 6:20-23)**

5 Maná damú Yisasi onákan kokhon nanin banta átaru iyaimpin béi me onen anuí ukhein akhempá kena un kumamin bei eyo iyampon kayo ano véi vaintá eren mino. ² Enóbin béi araífen betí ankan afova veya amiyan temí,
³ ^d“Tiyarafenu van ma aiyain kayo vá amusin ino
fara vara seyo inaru yafisin baru vetí ankan nina ino.
⁴ ^eArunanápin ma vain kayo ano vá amusin ino
fara vara seyo Tiyarafenu ano ará kusiantanten mino.
⁵ ^fBe au ma vararasí uren bain kayo ano vá amusin ino
fara vara seyo Tiyarafenu ano auyen bara vetí ankan aminten mino.
⁶ ^gPuntakein avúava san ma aiyantin ma arafan nan iyain kayo ano vá amusin ino
fara vara seyo Tiyarafenu ano kanaí uantanten mino.
⁷ Ena nanin banta van ma arunan uantiyain kayo ano vá amusin ino
fara vara seyo Tiyarafenu ano vei arunaná betin aní inten mino.

⁸ Ará ano ma avusese ukhein kayo ano vá amusin ino
fara vara seyo vetí ankan Tiyarafenu onanten mino.

⁹ Aruve asiveimpin ma kusin avúavá pákaren bain kayo ano vá amusin ino
fara vara seyo vetí ankan nan Tiyarafenu akhafana ino sen aranten mino.

¹⁰ ^hpuntákein avúava san ma uman amiyantin ná mai kayo ano amusin ino
fara vara seyo inaru yafisin baru vetí ankan nina ino.

¹¹ ⁱ“Ten tínain ma sivákuriyasín ma ódaren mai van ma vanasi ano namu veya siren namu uanten ara ara kampun bayafó ma augin kuráden tiyanti mai vará amusin ono. ¹² ^jPara vara seyo, inarufá turetí kákan miyan ave ukhen mifo siretin ará ano kama ukhantiya vá moékeya amusin ná ono. Tiretin ma aan uantein erikhá ein sakhanampa vanta kayo aurá ma namu uantaká ein avúavái afoká inten mino.”

**Yisasi Siyáken Banasi Ano Un Má
Kakhan Má An Mi Yakhen Mino
(Maki 9:50; Ruku 14:34-35)**

¹³ Yisasi evaránen temí, “Tiretí ankan un ma einí ukha ono. Uni ase ma kí-pavinti mai un intesá uresin ná evaránen ase inten nafino. Máan tukhein un ída veni ase vanti fase karúdaresin mai yaró onóbe enóbein manan ban mino.

¹⁴ ^k“Mana kákan baru ma ída aúpasín anu yontá báe iyain an deya siretí ma varai kakhan mono. ¹⁵ ^lBanasi ano ída oon uruan kurafin kuferé iyan mifo sakhókái uruan kain báken mápin ma vain nanin banta kakhaanté iyan mino.

^f4:25 Dekopori sin bí ma vain mai tiyan míkan kákan baru en tikhen mino.

^c4:25 Mak 3:7-8 ^d5:3 Ais 57:15 ^e5:4 Ais 61:2-3; Rev 7:17

^f5:5 Íbo 37:11 ^g5:6 Ais 55:1-2 ^h5:10 1Pi 3:14 ⁱ5:11 1Pi 4:14 ^j5:12 2Kr 36:16; Apo 7:52 ^k5:14 Yon 8:12; 9:5 ^l5:15 Mak 4:21; Ruk 8:16; 11:33

¹⁶mMáan mana eya vá tiretí ankan oon áesin ná banasi avorá panu siyantín ná tiretí kama avúavasá oniyáken inarufá bain Afóen avisá daní ino.

**Yisasi Ma Man Baya Kayo
Kanaí Ono Van Erein Baya Ino**

¹⁷n^aÍda vá teya man baya vá sakanampa vanta kayoi vava vá do varanton mi sen nan eren mino se ineno. Téi ída ma vava kayo yo maman karúdano van eré umpo yorékun mai vava kayo ano mo kanaí suron ino van mi eré uno. ¹⁸oTéi fura siré tiretí ankan tiamé uno inainpáké inaru vá bara vá kípanten mifo man baya fintena sitó bompon ná uvantá inten nafi inká tító kasá usikhá inten nafi ída aiyoran para vantín mi minó mai ma uvantá ein daná afoká inten mino. ¹⁹pMáan tukhen mifo mana vanta ano ma man baya kayo finte sitó máa yurafúden ena nanin banta afova amintín ma vetí ankan mai ánain bákuriyaré intín maen inaru yafisimpín títókái ven aví amintén mino. Máan tintén mifo mana vanta ano ma minó man baya ánain bákuriyan ma minó nanin banta van mai ánain bákurino van ma afova amiyaren maen mai vanta ano inaru yafisimpín kákan bí barantén mino. ²⁰Máan tukháí séi siretí ankan tiamiyá uno. Tiretí ma ída Tiyarafenui anunu ánain ma vákuresin ma siretíí funtákein avúavá ano ma man baya ma afová ukhein banta kayo vá Farasisi kayo vái funtákein avúavá

ma ída esantakhá intiya siretí ankan ída kanaíeya inaru yafisimpín oferan nono.

Banta Aruan Purin Baya Ino

(Ruku 12:57-59)

²¹“Mosesini man baya ma anafu aráon amikhá ein mano sikhén mino, ‘Ída vá banta aruan purono. Banta ma aruan purin nain mano vá kópin ná orino sikhaya siretí ankan inka inikha ono. *Eks 20:13; Diu 5:17*

²²qMáan tukháí séi siretí ankan tiamé umpo vá mumunan afá aváen má ma aran kanti asivúdanona vanta ano kópin ná orono. Máan mana e mana vanta ano ma ve afá aváen nan ánon ída vain banta ono^s ma sin nain mai Kanisorii** ánon banta anon kó tiantantén mifo mana vanta ano ma ena van óen banta ono sintén ira kiyán umán baren berai siyan purin barurasá orino.

²³r“Mai van mi Tiyarafenun ma íkun uan ameno van ma on karánará uádatá o mantave e afá aváe ano ma éin má asivuká inain baya ma ovare me ininte vá, ²⁴ei íkun uan amin daná mairá me khaúde vá esé ana ore mo mai vava afá aváen má puntáde vá ovaráne me íkun uan ameno.

²⁵“Éin kó tiantan banta ano ma aviren kó barufá ma kó tiantano van oriyan-tiya aine vá ayanafá béin má mai vava funtarano. Ída ma aine funtaresin maen kó inin banta ayampín ma éin kaintín kó inin banta ano aruvín banta ayampín kaintín aruvín banta ano éin karavusifín aviren mo khaintén mino. ²⁶Téi fura siré

§5:22 *Ánon ída vain banta ono* Aramaiki vava finté ma *Raka* e siyain mai veni ana máan mi ukhén mino. Mana vanta ano ma ena vanta van aran nan uaren ma namu vava sen asiyain baya ino.

**5:22 *Kanisorii* e ma siyain mai Kiriki vava finté *Senhedrini* en tiyan min. Mat 10:17; 26:59; Mak 14:55; Apo 4:15; 5:33; 6:15; 7:1; 22:30; 23:1, 6, 15, 20, 28; 24:20, 21 fin ná dere onano.

m5:16 Efe 5:8-9; 1Pi 2:12 n5:17 Rom 3:31 o5:18 Ruk 16:17; 21:33

p5:19 Yem 2:10 q5:22 1Yn 3:15 r5:23 Mak 11:25

éin tiamiyá uno. Éi karavusi namumpin para vákeyai mai ma éin aví tiantein kó miyan máa miyaní uan kípan nono.

Ena Nanin Banta Vá Ma Vanasíin Baya Ino

²⁷ “Tiretí ankan pefái ída vá ena aná ba safi ena avafun ma safi vá e vare vare e nono síka inikha ono. *Eks 20:14; Diu 5:18*
²⁸ Máan tukhen mifo séi siretí ankan tiamé uno. Mana vanta ano ma mana nanin ódaren ma ineinefin aran nanteya mai vanta ano e aúpin inka ven má bare umeí e ono. ²⁹ Máan tukhen mifo ayan kurompáke auu ano ma éin e yarifaan umefin ma kaintiya mai auu vá do vían karúdano. Mana vukhafa ma yo síkaan karúdaresin ma minó bukhafa ída karúdantin ma ira khiyan uman baren berai siyan purin barufin ma karúdantin orin manan kanaí inten mino. ³⁰ Inká éin ayan kurompá ano ma e yarifaan umefin ma kaintiya vá mai yáman ná do síkaan karúdano. Mana vukhafa ma yo síkaan karúdaresin ma minó en au ída ira kiyan uman baren berai siyan purin barufin orin manan kanaí inten mino.

Anasi Ma Ifá Uantan Avúavá Baya Ino

³¹ ^u “Mana vanta ano ma ve aná tiantano vará béin ifá uantan bompon uvaman béin amiren ná tiantano,’ sen pefá Mosesini man baya ano sikha inikha ono. *Diu 24:1-4*

³² ^v Inikha ompo séi siretí ankan tiamiyá uno. Mana vanta ano ma ve aná ano ída ena vanta vá noré intin ma véi mai nanin ma siantanten mai vanta ano man bayan durafuren mai nanin nan ena vanta vá e vare vare en non bí aminten mino. Máan turantin pasen mana vanta ano ma véin má ábasuf

inten maen ída vá ena aná bá e vare vare en nono ma sikhein man bayai yurafurinten mino.

Ayan Ma Vefió In Baya Ino

³³ ^w “Mosesini ena man baya ma anafu aráon amikhein tiretí ankan inikha ono. ‘Pura ódino ma sire ayan befió uranteya mai vaya ída vá durafuriyákeya mai yaná puntáde vá Bafan avorá barano.’
³⁴ ^x Máan tukháí séi siretí ankan tiamiyá umpo ída vá mana vayará ma ákona ono van inarufá ódino sireya ayan befió ono. Mai fara vara seyo, Tiyarafenui kumanin kin karái inaru van mino. ³⁵ ^y Tiretí ankan ída vá mana vayará ákona ono van bara aví teno. Mai fara vara seyo, Tiyarafenui arantan kain kará ino. Tiretí ankan ída vá mana vayará ákona ono van Yerusaremí aví teno. Mai fara vara seyo, Kákan Kini varu ino. ³⁶ Máan tukhen mifo éi ída vá mana vayará ákona ono van e ánon aví teno. Mai fara vara seyo, éi ída kanaíeya ánon do maman efanteni safi sókonteni safi in nono. ³⁷ Tiretí ankan ná eyo ana seya vá ída ino ana seya vá inompo manáa vaya ma mairá mo asotúin maen Ban Anon pintéi eriyen mino.

Evaránen Anona In Avúavá Baya Ino

(*Ruku 6:29-30*)

³⁸ ^w “Mana vanta ano ma auu anka-man dufúkinti vá ben auu ankaman dufúkono. Inká aveantun ankaman dufúkanti vá ben aveantun ankaman dufúkano,’ sen Mosesini man baya ano fefá tikhaya inikha ono. *Eks 21:24; Riv 24:20; Diu 19:21*

³⁹ Máa sikhen mifo séi siretí ankan tiamiyá uno. Mana vanta ano ma siretí ankan namu avúavasí uantantiya siretí

^s5:29 Mat 18:9; Mak 9:47 ^t5:30 Mat 18:8; Mak 9:43 ^u5:31 Mak 10:4

^v5:32 1Ko 7:10-11 ^w5:33 Riv 19:12; Nam 30:2; Diu 23:21

^x5:34 Ais 66:1; Mat 23:22; Yem 5:12 ^y5:35 Íbo 48:2; Ais 66:1

ída vá béin evaráneya namu avúavasí uantano. Mana vanta ano ma mana ufáke ápa ankádanti vá ena ufáke ápa yo vaédesin ná ankan mino. ⁴⁰Inká mana vanta ano eni au anamun kó tiré barano van ma intiya vá ei ayá au anamun masá béin ameno. ⁴¹Mana vanta ano ma éin nan ona siya uan manáa ayáká mo simeno ma sinti vá ei enavá ayáká mo asotú ure vá aya uan mo ameno. ⁴²Mana vanta ano ma éi vaonafá mana yana san inantinti mae véin amiyáke inká mana vanta ano ma mana yana san éi vaonafá ma simikharéesi anona evarané ameno ma sin nain banta ída vá oyan ameno.

Tiretíi Namuro Ma Avábá Uantan Baya Ino

(Ruku 6:27-28, 32-36)

⁴³“Mosesini man baya ano ‘E arona avábá ureya vá’ ei namuro ída vá avábá ono sikhaya siretí ankan pefá inikha ono. Riv 19:18

⁴⁴“Máa sikhen mifo séi siretí ankan tiamiyá uno. Ei namuro avábá ureya vá^{††} éin aren asen ono van ma yakhafin nain kékasá Tiyarafenun amúkuan ameno. ⁴⁵Máan ma inte mae siretí ankan Afóe ma inarufá báken áau yan ma namu nanin banta vá kama nanin banta vá amaniná ma kiyain má inká á dákan ma funtákein nanin banta vá ída funtákein nanin banta amaniná bá ma yan eriyain akhafanái inono. ⁴⁶Tiretí ankan ma avábá iyan nain kéká ana ma avábá inteya mai intéa miyan ná barante fono. Ídá takisi varan banta kayo vá dere máan té iyan nafino. ⁴⁷Tiretí ankan ma e afá aváeyan mana ma avábá iyanteya mai éi intéa avúavasá ena avorá mo

variya fono. Monó ída inin kayo vá ano yeren ídá manaí avúavasí é iyan nafino. ⁴⁸“Para vara seyo, siretí ankan Afóe ma inarufá báken puntáken bainisá ukhe funtákein nanin banta vá bano.

Ona I Van Nanin Banta Ma Amin Avúavá Baya Ino

6^b“Tiretí ankan dafian ná ákona ure ída vá tiretí kama avúava sinta vanasi ano onano van betin avorá aní ono. Tiretí ankan ma máan tinte mae siretí Afóe ma inarurá baipáke ná ída kanaíe miyan baran nono.

²“Éi ma ona ída van nanin banta ma manáa yaná ameno van ma inteya ída vá manáa kéká an deya kampun baya sire ída mai ánain dakhafin banasi ano ma amo sino van tiantan oriyan ma monó átaru namumpin nafi ayanafa safi ma ufen aseini ono. Téi fura siré tiretin tiamiyá uno. Mai vanta kayo ano inká minó miyan baren mino. ³Máan té iyan mifo éi ma ona i van nanin banta kayo ma aya inteya vá en ayan kuron mano ma variyain daná ída vá ayan ópá ano áesin afová ino. ⁴Máan tesin maen eni ayain mano umefá bantín e Afóe ma inarufá báken aú páke ma variyain danasinta ma oné iyain mano éin miyan aminten mino.

Dunan Auraren Ma Amúkin Avúavá Pákana Vaya Ino

(Ruku 11:2-4)

⁵“Inká tiretí ankan ma amúkinteya ída vá au khákan banta kéká ano ma vaya siren ída mai ánain dakhafé iyain an deya vá banasi ano onano van monó átaru namumpin nafi aayanafa

^{††}5:44 Manáa ínaimpá uvarein bompon enavá baya asotú en máa sikhen mino: *éin má namu uantan nain kayo vá avábá uantiya inká aranan ma uantiyan nain kayo vará kama uantano.*

²5:44 Eks 23:4-5; Ruk 23:34; Apo 7:60; Rom 12:14, 20

^a5:48 Riv 19:2; Diu 18:13 ^b6:1 Mat 23:5 ^c6:5 Mat 23:5; Ruk 18:10-14

safi mantaveya amúkono. Téi fura siré tiretin tiamiyá uno. Mai kéká ano vetíi minó miyan inka varen mino. ⁶Manten mifo siretí ankan ma amúkono van ma inteya vá ei karafarampin un pébe ona munkure vá aúpa bain Afóe váipasá amúkono. Máan tesin maen aúpa bariyain danasinta ma oniyain Afóe ano éin miyan aminten mino. ⁷Inká monó ida inin nan ma afokhampin bain kayo ano ma Tiyarafenu ano inino van muno siren ma ayáká amúké iyainí ida vá ono. ⁸Tiretí ida vá betí ankan an dano fara vara seyo siretí Afóe ano intéa yanasará inanteno van iya fo, mai véi fe afová ukhen mino.

⁹“Máan tukhen mifo siretí ankan ná máan amúkirisá ono.

“Tetin Tifóe inarufá baona en aví kantasá bano.

¹⁰Éini yafisin ná erino.

Inarurá ma éin oo yayiyainí erá teti má barará éin oo yayiono.

¹¹Má damú kena yunan éi setin timeno.

¹²Éi setinti ume ampesirá

inká tétin má dere máan manaé enai ume ampiantano.

¹³Inká éi ida vá tétin akhenókafin tivire ore vá

Ban Anon ayan pinte vá tétin do sivían ka ono.††

¹⁴iPara vara seyo, ena nanin banta ano ma siretí ankan umeí uantádantí ma vetíi ume ampiantanteya mai siretí Afóe ma inarufá bain mano siretíi ume vá ampiantanten mino. ¹⁵Máan tukhen

mifo siretí ankan ma ena nanin bantai ume ma ida ampiantesin maen tiretí Afóe ano siretíi ume vá ida ampiantanten mino.

¹⁶j“Tiretí ankan ma yunan aurare amúkiyante vá ena nanin banta ano onano van ida vá au khákan banta kéká ano veya siren ma ida mai ánain dakhafiyain ma yunan auraren arunan en noiní ono. Téi fura siré tiretí ankan tiamé uno. Mai kéká ano vetíi minó miyan inka varen mino. ¹⁷Máan tukhen mifo éi ma yunan aurare amúkiyante auná tesé ure vá ánontá uveri vana ono. ¹⁸Máan tesin ná minó nanin banta kayo ano ida afová intin ná e Afóe ma aúpa bain mai ano ana vá afová iyan inká minó daná ma aúpa bariyain daná ma afová iyain Afóe anon eni miyan aminten mino.

Moní Bá Ona Vá Ma Kaiyan Ban Baya Ino

(Ruku 12:33-34)

¹⁹k“Tiretí ankan ida vá bara rákena kama yanasinta ma antan danú ano niyan ma karokharon ariyan ma inká umoyan banta ano varákuren bariyaimpin tiretíi kama ona kaiya vá bano. ²⁰lIda vá máan tin nampo mai ma ida antan danú nan ma karokharon iran ma inká umoyan banta ano varákuren baré iyain mai inarufasá tiretíi kama ona vá kaono. ²¹Para vara seyo, éini kama ona ma vain mai varurái eni ineine vá aú amafon má banten mino.

††6:13 áa *namu yaná pinte vá tétin do sivían ka ono*. Manáa ínaimpá ma uvarein bompompin ena veya asotú en máa sikhen mino, *Máan tukhein nan mi yafisin má ákona vá kákan bí bá enina van para oriyán banten mino*. Pura.

^d6:7 1Ki 18:26-29 ^e6:8 Mat 6:32 ^f6:10 Ruk 22:42

^g6:12 Mat 6:14-15; 18:21-35 ^h6:13 Ruk 22:40; Yem 1:13; Yon 17:15; 2Te 3:3; 2Ti 4:18 ⁱ6:14 Mak 11:25-26 ^j6:16 Ais 58:5-9 ^k6:19 Yem 5:1-3

^l6:20 Mat 19:21; Ruk 18:22

**Auu Ma Vain Mai Au
Vukhafai On Mino**

(Ruku 11:34-36)

²²“Auu ma vain mai aui on mifo éin auu ma kama ukhantin maen éin au fimpá kahkan mano víkakhen banten mino. ²³Bíkanten mifo éin auu ma namu ukhantin mai minó éin aufimpá títipá inten mino. Mai oon ma éin aufin títipá ukhantin maen eni minó bukhafa ano moéken títipá en kumayusí inten mino.

Kankan Ayafai Yorari In Baya Ino

(Ruku 16:13)

²⁴“Ída mana vanta ano kanaíen kankanan ayafai yorari inten mino. Máan ma inten maen mana ayafa oman kaumpan uantáden ena ayafa avábá uanten inká manai oo yaiyen ena oofá átakharé uantanten mino. Máan tukhanti siretí ankan ída kanaíeya Tiyarafenu vá moní báí yoran bantaí inono.

Kokhon Ineine Ma In Baya Ino

(Ruku 12:22-31)

²⁵m“Máan tukhein nan mi séi siretí ankan tiamiyá uno. Ída vá tireti ma váke yunan má non má ma nanona van e inian moreya inká auí daná ma aurá inona van kokhon ineine ono. Aunan ma váka vaona anó dunan ma naren ban esantakhan ná inká au vukhafa ma váka vaona anó auí daná ma uren ban esantakhen nafino. ²⁶nTiretí ankan ayompin ma vain nun kayo vá onano. Betí ankan ída yunan doren unafen uan mápin kaé iyan mifo siretí ankan Afóe ma inarufá bain manon betin dunan amé iyan mino.

Tiretí ankan ídá mai nun kayo esantakhé unó té inikhe fono. ²⁷Máan tukhen mifo siretí ankan pinté mana ano ma kamaé bano van ma kokhon ineine inten maen mai ano kanaisá ená bei van manáa vá mo asotú inten nafino.

²⁸“Máan tukhen mifo siretí ankan pará auí dana san kokhon ineine iya rafono. Tiretí ankan paravan kayo ma ampantein ná onano. Betí ankani yoran ída vákan auí daná ina ída amué iyan mino. ²⁹oMáan té iyan mifo séi siretí ankan tiamé uno. Pefá Kin Soromoni ano minó buí daná amu uren iyaren mifo veni auí daná kayo ano faravan kayo ma kiyain má ída manaí ukharen mino. ³⁰Mai ma sare ampantaré intin inuran ma síkaren ira saran nain káta mai Tiyarafenu ano kamaen auí uanté iyain mifo sító mumunan má baona nanin banta oe, véi ídá kanaíen ná tiretin auí uantanten nafino. ³¹Máan tukhanti náí yunan má non masá naré báké intéa vúí danasá onte rafuno se siretí ankan ída vá kokhon ineine iya vá bano. ³²pPara vara seyo, afokhampin ma vain nanin banta kayo ano mai yanasinta van dosé iyan mifo siretí ankan Afóe ma inarufá bain mano siretin nan mai yanasintan barano van iya ono sen pefái afová ukhen mino. ³³qMáan tukhen mifo esé daná Tiyarafenui yafisin má beni funtákein avúavá bá dosiresin ná mai yanasinta yere minó tiretin amino. ³⁴Máan tukhen mifo vá inurantena yana san ída vá tiretí ankan kokhon ineine ono, fara vara seyo inun damú ano veyan inurantena van ineine inten mifo mana mana yamúpin bei uman barú barú ukhen mino.

Banasii Avúavá Ma Yaimin Baya Ino

(Ruku 6:37-38, 41-42)

7^r“Tiretí ankan ída vá ena nanin bantai avúavá daimono. Para vara seyo, Tiyarafenu ano siretin má deren máan manaen daiminten mino. ²^sTiretí ankan ma ena nanin banta yaimiyá inona mai avúaváká anan Tiyarafenu ano siretin daiminten mino. Tiretí ankan inte avúavákasá ena nanin banta yaimiyá inte fo mai avúaváká anan ten Tiyarafenu ano siretin daiminten mino.

³“Éi fará e afá aváen auufen ma sitó daa antan bain oniyá bákeyá e auufen ma yaa khaéádan bain nan ída iniya fono. ⁴Daa khaéádan maen auufen bantiya éi mai intesá eyá e afá aváen nan tifá tiváe oe, en auu fentena yaa antan do manantano van muno sinte fono. ⁵Éi vaya ma sire ída mai ánain dakhafin banta ompo vá e auufen ma yaa khaéáadan bain nare vá do máde vá auu kamaeya óde vá e afá aváen auu fentena yaa antan do manantano.

⁶“Tiretí ankan ída vá Tiyarafenu ma siantádantin kantasí ukhan nain daná maman iyan kayo ameno. Amesin naren mai iyan kayo ano vaéaren tiretin untaranten mino. Tiretí kama ukhein ankaroro kayo arantampó dasamin nafa ída vá pon kayo karúdaan ameno.

Amúkin Avúavá Pákena Vaya Ino

(Ruku 11:9-13)

⁷^t“Tiretí ankan amúkipó ma inantiya vasin maen Tiyarafenu ano aminten mino. Dosiya ma vare mae oman afoká inono. Onará ma ankamiya vasin maen ona yiantanten mino. ⁸^uPara vara seyo,

amúkipó ma inan ma sé iyain nanin banta ano minó daná baré iyan mino. Mana vanta ano ma mana yana san ma yosiyaren mai yaná oné iyan mino. Mana vanta ano ma onará ma ankamiyá intin maen Tiyarafenu ano véin ona yiantanten mino.

⁹“Mana iyampon mano ma siretin pinte mana afóe vaonafá ma yáun nan ma inantinti mae iye anó onámaná man aminte fono. ¹⁰Inká noyana van ma inantinti mae namu osafáé e akhá aminte fono. ¹¹^vTiretí afóeyan mano ma namu avúavá bariyákeya ma e akhafana kama yanasinta ma amin mai afová ukheya ma amé iyaonaí anan en tiretí Afóe ma inarufá bain mano ventá ma amúkipó inantin nain nanin banta moéken kama yanasintan aminten mino. ¹²^wMáan tinten mifo ena nanin banta ano inte avúava sintá tiretin uantano vará anunu iyante fo mai avúava sinta ana vá betin uantano. Mai avúava sinta maen mai man baya vá sakhanampa vanta kayo vái ana vaya ino.

Kákan Ona Vá Titó Ona Vápin Ma Oferan Baya Ino

(Ruku 13:24)

¹³“Tiretí ankan tító onafin ná umperano. Para vara seyo, o afeyoran barufá ma orikhein ona kákan mi vákan maifá ma orikhein aa kákan ban kasaen orirí ukhan mi kokhon nanin banta ano mai aa anan bákuren oriyan mino. ¹⁴Máan tukhen mifo aun baran barufá ma orin ona sitói vákan mai varufá ma orin aa sitosí ukhan maen manáa nanin banta ano anan mai aa yosiren óden oriyan mino.

^r7:1 Rom 2:1; 1Ko 4:5; Yem 4:11-12 ^s7:2 Mak 4:24

^t7:7 Mak 11:24; Yon 14:13; 15:7; 16:23-24 ^v7:8 1Yn 3:22; 5:14-15

^w7:11 Yem 1:17 ^u7:12 Mat 22:39-40; Ruk 6:31; Rom 13:8-10

Da a Ana Vá Beni Aran Máí Vaya Ino
(Ruku 6:43-44; 13:25-27)

¹⁵ x“Kampun sakhanampa vanta kayo vará tiretí ankan dafian ná ákona ono. Sipi sipi ayo unan kafina uren erinten mifo aúpin afá iyan kayo víkakhen mino. ¹⁶ yMáan tukhein tiretí ankan betin avúavá ano ma aran imá dan nain mi ódeya afováin nompo kaná ayankun anan tákena uvaini aran kúdená inká avi kháta kayo rákena fíki aran kúden ná inten nafino. ¹⁷ Máan manan en mi kama yaa ana kayo ano kama aran máan imádé iyan mifo namu yaa ana kayo ano namu aran máan imádé iyan mino. ¹⁸ Kama yaa ana ano ída namu aran iran maen inká namu yaa ana ano ída kama aran iran é iyan mino. ¹⁹ zÍda ma kama aran iran nain daa ana kayo síkaren ira saman kaurinten mino. ²⁰ aMáan tukhan-tiya vetí ma aran imádan naintái afová eya onan nono.

²¹ b“Téin nan ma Bafan noe, Bafan noe, sen tariyain nanin banta kayo minó ano va inaru yafisimpin oferanten naino. Ída ifo inarufá ma vain Tifóeni vaya ánain ma yakhafin nain nanin banta kayo ano anan inaru yafisimpin oferanten mino. ²² Tiyarafenu ano ma vanasi yaimin nain damú kokhon nanin banta ano se nan ‘Bafan noe, Bafan noe, setí ankan en avíká sakhanampaíin dorarí iyáké inká en avíká ana namu aunan do siantiyá maé inka kokhon enará ukhein danasinta maman afoká iyaré uno,’ sinten mino. ²³ cMáan ma sintí maé téi fun-tádé evaráné betin tiamenté uno, ‘Tiretí ankan namu avúavá baran nanin banta kayon banái séi ída siretin afová ukhé umpo sífó oro.’

Kama Afova Vain Banta Vá Ída
Kama Afova Vain Banta Vá
Ano Ma Má Uvaran Baya Ino

(Ruku 6:47-49)

²⁴ “Máan tukhein nan mi senti vaya iniren ma mai ánain dakhafin nain nanin banta anon kama afova vain banta ano ma kákan onámaná daró ma má uvareiní iyan mino. ²⁵ Uvantaré íkan á bá uva vá uáken anon non taven mai má avékan maen kákan onámaná daró uvantaréin pasen ída mai namun baráken mino. ²⁶ Máan ten mifo senti vaya ma iniren ída mai vaya ánain ma yakhafin nain nanin banta ano mai ída afova vanta ano ma eyurá ma ve amá uvareiní iyan mino. ²⁷ Uvantaré íkan á bá uva vá uáken anon non taven mai má avékan baráken eraven mino.”

²⁸ Yisasi ma mai vaya kayo siamiran maen minó nanin banta ano véi ma afova amiyain baya kayo van takhaen oreraen mino. ²⁹ dMai fara va ino vetíi man baya ma afová ukhein banta kéká ano ma afova amiyainisa en naifo mana aví bain banta ano ma afova amiyainíi en mino.

Amon Dana Aí Bain Banta
Ma Yisasi Ayofein Baya Ino

(Maki 1:40-44; Ruku 5:12-14)

8 Yisasi ma anuyon me ampiren ar-avíkan maen kokhon nanin banta ano ven ánain dakhafen araven mino. ² Araviyain má mana amon dana aí bain banta ano Yisasi vaintá eren me aron kanan durafúden mátimen temí, “Bafan noe, éi ma anunu iyante séin tu sesé us-intesí evaráné kama ono.”

³ Maa síkan Yisasi ayan dan orin mai vanta au aruviyan temí, “Evaránen en

^x7:15 Mat 24:24; Apo 20:29; 2Pi 2:1 ^y7:16 Kar 5:19-22; Yem 3:12

^z7:19 Mat 3:10; Ruk 3:9; Yon 15:6 ^a7:20 Mat 12:33

^b7:21 Ruk 6:46; Yem 1:25 ^c7:23 Íbo 6:8; 2Ti 2:19 ^d7:29 Mak 1:22; Ruk 4:32

au avuse en kama ino van téi sinunu iyá uno.” Siyain má manádá amon dana aí kípán maen mai vanta au evaránen kamaen mino. ⁴eKama uantáden Yisasi véin máa sen tiamemí, “Éi ída vá ma ma en au kama uanteruna vaya mana vanta siameno. Oreyá vá monó doran banta vaintá oresin ná éin avové en onano. Pefá ma Mosesini man baya ano ma síkhá einí eya vá Tiyarafenu ma íkun uan amin danasinta máde susu seya amusin amesin ná minó nanin banta ano óden inka veni aí kípakhan mino sino.”

**Mana Antareti (100) Aruvin
Banta Kayoi Ayafa Vanta Ano
Ma Mumunan Ein Baya Ino**

(Ruku 7:1-10)

⁵Yisasi ma Kapeniamú barufin o uniyain má mana antareti (100) aruvin banta kayoi ayafa vanta ano véi vaintá eriven béin ayaino van ínan en in-aemí, ⁶“Bafan noe, senti yoran banta aí ayan púkan kákan aí iyan berai siyáken bakhen manan bá uno.”

⁷Máa síkan Yisasi véin tiamemí, “Téi oré mo ayofanté uno.”

⁸Máa sin aruvin banta kayoi ayafa ano Yisasin evaránen tiamemí, “Bafan noe, séi ída kama vanta varuna éi ída kanaíeya sen timá orin nompo vaya ana sesin ná tenti yoran banta evará-nen asefa ino. ⁹Mai séi farava máa siya rauno sesi ayafa vanta kayoi aránaópái séi vákun maen inká tenti aránaópái manáa aruvin banta kayo vái mana van ma orono ma sékun oriya maé inká ena van ma ereno sékun maen eré iyan mino. Inká tesi yoran banta van ma ma yorarái ono ma sékun mai yorarái é iyan mino.”

¹⁰Máa síkan Yisasi mai vaya iniren anú duren mai ma ven dakhafen noré

ein nanin banta máa sen tiamemí, “Téi fura siré tiretí ankan tiamiyá uno. Téi onékun ma vantaí mumunan má manafí ukhein banta Isarerii varafin ída mana van mino. ¹¹fMáan tukháí séi siretí ankan tiamiyá uno, Áau e unipá bá orun perápá bá ma vain bara fintena nanin banta kayo finté^q kokhon mano inaru yafisimpin ere ere uven maen maifin ma omasí inaimpin Abaraamu, Aisaki, Yekopun ankan má manafin kumamen dunan nanten mino. ¹²gNanten mifo Tiyarafenu ano ma vei yafisimpin bano van ma fe iyáantákáin nain nanin banta yo siantantin títipa ukhein barufin o váken berai siyan aveantuntá inkekípiyan ífí danten mino.”

¹³Máa siren aruvin banta kayoi ayafa vanta siamemí, “Éi ma mumunan eon-aíen mai yaná afoká inten mifo orono.” Máan ma siyain áaurá anai mai yoran bantai aí daná kípén mino.

**Yisasi Ma Pitan Aná
Anóen Ayofein Baya Ino**

(Maki 1:29-31; Ruku 4:38-39)

¹⁴Yisasi ma Pitan amápin un pében onákan maen Pitan aná anóen aí uaren aufá ira kharo iyan takhópin bakhen baren mino. ¹⁵Bakhen baré íkan Yisasi ven ayan bana fákiyain má mai aí daná kípavin e mantaaren beni yunan taren mino.

**Yisasi Ma Kokhon Nanin
Banta Ayofein Baya Ino**

(Maki 1:32-34; Ruku 4:40-41)

¹⁶Mai inúpá kokhon nanin banta ano namu aunan ma vain kéká aviren Yisasi vaípa ere ere íkan mai aunan kéká do siantian inká aí daná ma vá ein kayo minó ayofen mino. ¹⁷Máan ma

^q8:11 Mai kayo ena anan nanin banta ino.

^e8:4 Riv 14:1-32; Mat 9:30; Ruk 17:14

^f8:11 Ruk 13:29

^g8:12 Mat 22:13; 25:30; Ruk 13:28

ein manon sakhanampa vanta Aisaiyan pinté uaren Tiyarafenu ano sikhan mino. “Béi anon tetisi ara ara sí daná kípasing-táden tetin kama usintanten mino,” ma síkhá ein mi fura sen afoká en mino. *Ais 53:4*

Yisasin Ánain Dakhafiyain Nan Ma Uman Baran Baya Ino

(Ruku 9:57-60)

¹⁸ Yisasi ma onákan kokhon nanin banta ano véin aúban den iyen eúkiyaimpin bei eyo iyampon kayo siamemí, “Eri non e khádé ena ufá ódó tifano.” ¹⁹ Maa síkan mana man baya ma afová ukhein banta ano eriven Yisasin tiamemí, “Aru soe, éi ma orinonafá téi en dakhafé nonté uno.”

²⁰ ^h Maa síkan Yisasi evaránen béin tiamemí, “Afá iyan kayoi ain bákan maen inká nun kayoi nan bákan ukhen mifo Banta Anin^{§§} mano ma ánon kaurer baran nain beni kanú ída van mino.”

²¹ ⁱ Maa síkan maen eyo iyampon kayo finté mana ano maa sen Yisasin tiamemí, “Bafan noe, áesirá te sífoen nare mo masí urerá ono.”

²² Maa síkan Yisasi véin tiamemí, “Áin púkein banta kayo ano furin banta masí iyantiya éi sen dakhafono.”

Yisasi Ma Kákan Uva Yo Siantein Baya Ino

(Maki 4:35-41; Ruku 8:22-25)

²³ Maa siren Yisasi votifin un kumanin bei eyo iyampon kayo ano yakhafen óden mino. ²⁴ ^j Ódiven non aúbaná oriyain má anú deinien kákan uva íkan non karantó uaren boti yarararí iyan mifo Yisasi fara aun bakharen mino. ²⁵ Bakharé íkan bei eyo iyampon kayo

ano véin mo avoriyan avádóden temí, “Bafan noe, Bafan noe, non ufurirí iyá tiféumpo setin tiya ono.”

²⁶ ^k Maa síkan béi evaránen betí ankan tiamemí, “Titó mumunan má baona vanta kéka soe! Pará akhokho van iyara fono.” Maa siren béi e mantaaren uva vá non má ákonaen asiyain má púkekhaven ída kayan mino.

²⁷ Maa tiyain má betí ankan takha iyan kokhon ineine en orera iyan beraran inaemí, “Ma inté ukhein bantá bákan ná uva vá non má ano véin oo yaiyiyan nafino.”

Namu Aunan Bá Ein Bantá Kanan Pinte Ma Yisasi Yo Siantein Baya Ino

(Maki 5:1-17; Ruku 8:26-37)

²⁸ Yisasi Karirí non e kháden ena ufá Kadará kayoi varafin óden mino.* Ódiyain má namu aunan kayo ma vain bantá kanan mano ven má e fóken mino. Maí kanan banta ano afasién non banta masí ukhein pimpá baren nóken aran má ukhan maen banasi ano féden mai aasá ída oriyaren mino. ²⁹ ^l Maa tiyá íkan mÍkanan mano avádóden oovaren temí, “Éi Tiyarafenu Anin mompo, náisá ono vará damú ída afoká ukhayá tetin namu ono van eriya fono.”

³⁰ Maa ma siyákan maen manáa nentá pon kayo iyukhen báken dunan niyaren mino. ³¹ Niyán bákan namu aunan kayo ano Yisasin ínanen inaemí, “Tetí ankan ma sisintante vá áesirá mesan pon kayo aúpin ná oferá tifano.”

³² Maa síkan Yisasi evaránen betin tiamemí, “Tiretí ankan orono,” siyain má namu aunan kayo ano mai kanan banta me ampiren pon kayo aúpin o fébÍkan mai fon kayo ano sava uaren

§§8:20 Yisasi ma Banta Anin ne ma sikhein mai Yisasi veyan nan mino.

*8:28 Manáa vompon *Kerké barafin* maa sen ena vompon *Kerá barafin* maa sen mino.

^h8:20 ²Ko 8:9 ⁱ8:21 ¹Ki 19:20 ^j8:24 ^Íbo 4:8 ^k8:26 ^Íbo 89:9; Mat 14:31

^l8:29 Mak 1:24; Ruk 4:41

kákan ayafin o káusiven non ufuren puren mino. ³³Máan tiyain má pontá ma yafíká ein banta kéká ano kákan barufá karan oren mo minó nanin banta mai ma afoká ein daná baya siamiyáken namu aunan kayo ma vá ein bantá kanampin ma afoká ein baya vá dere siamen mino. ³⁴Tiamíkan iniren mai varu finté minó nanin banta ano Yisasin onano van eren mino. E oniyáken betí vara me ampiren ena akhempá orino van ínanen tianten mino.

Ai Ayan Púká Ein Banta Ma Yisasi Ayofein Baya Ino

(Maki 2:1-12; Ruku 5:17-26)

9^mYisasi mana votifin un kumamen Karirí non e kháden bei varufá oren mino. ²Oriyain má manáa vanta kayo ano ai ayan púkein banta kúkútafin bavín daiyen eríkan Yisasi ma vetí ankani mumunan ódaren mai aí banta máa sen tiamemí, “Tanin noe, eni ume ampianté umpo vá en ará ano ákonaen ná bano.”

³Máa síkan maifin manáa man baya ma afová ukhein banta kéká ma varé ein mano mai vaya iniren betiyan ten oreraemí, “Ma vanta ano Tiyarafenui varun bariyan ume ampiantiyan mino.”

⁴ⁿMáa sen iniyan Yisasi vetí ankaní ineinefin afová uren temí, “Pará tiretí ankan aúpin namu ineine maman ayuman iya rafono. ⁵Inte vaya ma seruna anó teso sikhén nafino. ‘Eni ume ampianté uno’ ma seruna ano fino áa éi ‘e mantave orono’ ma seruna ano fino. ⁶^oMáan tukhen mifo sireti sá afová ono Banta Animpin ákona vákan mi ma varará ume kayo ampiantiyan mino.” Máa siren mai ma ai ayan

púkein banta van temí, “Mantaveya ei kúkúta mamare ei varufá orono.” ⁷Máa siyain má mai vanta ano e mantaaren bei varufá oren mino. ⁸Oríkan banasi ano ódaren akhokho van uren máan ákona ma varará banta ma amé iyain nan Tiyarafenu aví daníen mino.

Yisasi Ma Matiun Arein Baya Ino

(Maki 2:13-17; Ruku 5:27-32)

⁹Mairá Yisasi me ampiren oriyaren o onákan Matiun ne sin banta ano sakisi varan namumpin kumantaré íkan Yisasi véin tiamemí, “Éi ere sen tivákurono.” Síkan Matiu e mantaaren ben avákuren oren mino.

¹⁰Yisasi ma Matiun amápin o khumanten dunan niyákan maen kokhon takisi varan banta kéká bá ume nanin banta kayo vá ano maifin ódiven Yisasi má bei eyo iyampon kayo vá manafin kumamen dunan nen mino. ¹¹^pNiyákan Farasisi kéká ano ódaren aranan iyáken beni eyo iyampon kayorá inaemí, “Pará tiretí ankani arú ano sakisi varan banta kéká bá ume vanta kayo vá manafin kumamen dunan niyan nafino.”

¹²Máa siyákan Yisasi mai vaya iniren máa semí, “Aí ma ída vain nanin banta kayo ano ída ayofan banta vaípa oré iyan mifo aí ma vain nanin banta ano anan ayofan banta vaípa oré iyan mino.

¹³^qMa vaya ma Tiyarafenui vompon dókifin ma vain pintena vá tiretí ankan ore vá o afova varano. ‘Ena ma arunan uantan nan mi siranakhén mifo íkun ma uan amin nan ída ino.’ *Ose 6:6*

Téi funtákein kéká arano vara ererauno, umeí ma en noin kayon arano van mi erikhé uno.”

**Dunan Ma Aurá Pákena Van
Ma Yisasin Inaein Baya Ino**
(Maki 2:18-22; Ruku 5:33-39)

¹⁴Maná damú Yonini eyo iyampon kayo ano Yisasi vaintá eriven béin in-
aemí, “Farasisi kéká bá tetí ankan má
ano yunan turé iyá umpo fará eni eyo
iyampon kayo ano ída yunan auriyan
nafino.”

¹⁵Máa sen ina íkan Yisasi evaránen
betí ankan tiamemí, “Anasi ma iman
ameno van iyantin ma mai vanta ano
ma vei kéká bá para vantin maen mai
vetí ankan náí vará béin arunan uantant-
ten nafino. Maná damusí intin ma anasi
iman ameno van iyain banta ma aviren
orivintin maen maí damúí vetí ankan
dunan auranten mino.

¹⁶“Ída mana ano auyen davaráe ma
kafááadan póké peyante au anamun ma
yakakheimpin mo yamparen amué iyan
mino. Para vara seyo, auyen davaráe
kafááadan ma feyante au anamuntá mo
yamparen amu urantin baren maen
ayen davaráe ano yarifantín tampí
tiaren mai au anamun kákantá eyáken
orera inten mino. ¹⁷Ída mana vanta ano
feyante memé au unampin auyen uvaini
anu vanaé iyan mino. Peyantefin ma
vanarantin maen paútiaren uvaini anu
varará banaen eravintin mai memé au
unan namu inten mino. Máan tukhan
mí auyen memé au unampin ma auyen
uvaini anu vanaran maen mí míkanan
kamaen báe iyan mino.”

**Yisasi Ma Fúká Ein Arinta
Avían Mantén Ma Aí Nanin
Ayofen Ma Ein Baya Ino**

(Maki 5:22-43; Ruku 8:41-56)

¹⁸Yisasi ma Yonini eyo iyampon kayo
vá baya siyákan maen mana átaru na-
muntá ánoní ukhein banta ano véi
vaintá me aron kanan durafúden máti-
men temí, “Te siraun taréa furí umpo éi
ereya mo ayan ben aurá kaesin evará-
nen aunan baren mantano.” ¹⁹Máa síkan
Yisasi e mantaaren béin dakhafen oríkan
bei eyo iyampon kayo vá ano yere oren
mino.

²⁰Oriyákan mana nanin maen tiran-
tan kan orun kádan (12) oranará biyon
aí daná mantein baré íkan mai nanin
mano ádé eriven Yisasini ayá au ana-
mun áton aruven mino. ²¹Aruviyan mai
nanin mano veyan nan temí, “Beni au
anamun ma aruvékun maen tenti sí daná
kípanten mino.”

²²Máa siren aruviyain má Yisasi yo
vaéan mai nanin oniyáken temí, “Tiraun
noe, eni mumunan manon eni aí kípaa-
nten mifo en ará ano vá ákonaen bano.”
Máan ma siyain má anan mai nanini
viyon aí daná kípén mino.

²³Máan turen mairá Yisasi oren monó
átaru namuntá ma ánoní ukhein banta
amápin o onákan banasi ano kuní iyaren
mino.† ²⁴Máan tiyákan Yisasi semí,
“Tiretí ankan báe entavoro. Mai arinta
ída fúken paran aun bakhen mino.” Máa
síkan minó ano venan inten oreraen
mino. ²⁵Mai nanin banta ma yo siantan
barufá eravuvín maen Yisasi mápin un
pében mai arinta ayan bana ma fakaaran
orun mantén mino. ²⁶Mai ma Yisasi
varein avúavá baya ano mai varafin
minó akhempá oreraen mino.

†9:23 Yisasi ma yorun baré ein barufá ma vanta fúbin maen okhakhan mí asiyan ifi
diyan mino.

**Auu Yufúkukhá ein Bantá Kan Má
Ida Vaya Siyá ein Banta Vá
Ma Yisasi Ayofein Baya Ino**

²⁷Yisasi ma mai varu me ampiren oríkan maen auu yufúkukhein bantá kan mano oyampá dakhafen oriyán oovararen máa semí, “Devitin Anin noe, verasan nan arunan usintano.”

²⁸Máa sen oriyákan mai ma véi vain namumpin un pébin mai ma auu yufúkukhein bantá kan mano mai namumpin béi vaintá unóbin Yisasi vékanan máa sen inaemí, “Tenan tirékan auu kama urantí onano vará mumunan iya fono,” síkan békanan evaránen béin tiamemí, “Eyo Bafan noe, berasan mumunan iyá uno.”

²⁹Máa síkan békanan auurá ayan kaúden temí, “Tiré kan ma sentá mumunan eonarái mai yaná kanaíen afoká inten mino.” ³⁰“Máa siyain má míkanan evaránen auu mábíkan Yisasi ákonaen airon ananí uanten temí, “Ma ma siré kampin ma afoká ein daná ída vá áesin mana vanta ano afová ino.” ³¹Máa siran maen maí kan banta ano oren Yisasi ma varein avúavá baya mai varafin ma minó akhempá ma vain nanin bantafin mai veya siádan oreraen mino.

³²Maí kan banta ano ma Yisasin me ampiren oriyain má namu aunan mano oorá iyákan ída veya siyain banta vanasi ano aviren béi vaintá eren mino. ³³Eríkan Yisasi ma mai namu aunan do siantádan maen mai vanta ano veya síkan banasi ano sakha iyáken temí, “Pefá ída Isarerii varafin máan daná afoká in ontaren mino.”

³⁴“Máa sen orera iyan maen Farasisi kéká ano semí, “Namu aunani ánon

bantai ákonarái véi namu aunan do siantiyán mino.”

**Manáa Yoran Bantan Ban
Mino Ma Sein Baya Ino**

³⁵xMinó kákan barufimpa safi sitó barufimpa safi Yisasi oriyáken betíi monó átaru namun kayofin Tiyarafenui yafisin pintena kama veya kayo siamiyáken ara ara aí daná kayo ayofen oren mino. ³⁶yMáan ten oriyáken kokhon nanin banta kayo onákan sipisipirá dafisin banta ída vákan ma asuse en aminofin nóken ma ayain banta van dosen noíní iyákan mai van Yisasi vetí ankan nan arunan uanten mino. ³⁷zArunan uantáden bei eyo iyampon kayo siamemí, “Kokhon dunan karakhan mifo mai yunan ma yuyasin kéká tanáan ban mino. ³⁸Máan tukhen mifo vá dunan afóe vaipasá amúke inantesin ná béi kokhon doran banta siantantin bei yunan karápin oriven ná beni yunan duyáan átaru ino.”

**Tirantan Kan Orun Kádan
(12) Eyo Iyampon Kayo Ma
Yisasi Aní Ein Baya Ino**

(Maki 3:13-19; Ruku 6:12-16)

10^aTirantan kan orun kádan (12) eyo iyampon Yisasi araren namu aunan kayo ma yo siantan má ara aí daná ma ayofan ákona vá amen mino.

²Mai máa sirantan kan orun kádan (12) baya varen orin banta kéká aví máan mi ukhen mino. Esé aráien Saimonin nan ma Pita ne siyain má inká ben afá Enduru má inká Sebetin anin kanan Yemisin nú Yonin nú anavasan má inká ³Firipin má Bataromiun má Tomasin má takisi varan banta Matiun má inká Arafiasin anin Yemisin nú Tadiusin nú

[†]9:27 Mat 20:29-34 ^u9:30 Mat 8:4 ^v9:33 Mak 2:12 ^w9:34 Mat 12:24; Mak 3:22; Ruk 11:15 ^x9:35 Mat 4:23; Mak 1:39 ^y9:36 Nam 27:17; 1Ki 22:17; Sek 10:2; Mat 14:14; Mak 6:34 ^z9:37 Ruk 10:2 ^a10:1 Mak 6:7; Ruk 9:1

bá ⁴Serotin anan banta Saimonin má inká ínaimpá ma Yisasin avían namuro ayampin amin nain banta Yudas Iskariotin³ má ino.

Yisasi Vei Eyo Iyampom Kayo Siantan Ma Monó Dorantá Orera Ein Baya Ino

(*Maki 6:7-13; Ruku 9:1-5*)

⁵Yisasi mai máa sirantan kan orun ká-dan (12) banta siantan oriyákan afova vaya kayo máa sen tiamemí, “Tiretí ankan ída vá ena anan banta kékápin ore vá inká Sameriá kayoi varufimpá bá ída vá orera ono. ⁶bIsareri kékái sipisipi kayo ma afeyókein mai kayofin mana vá orono. ⁷cTiretí ankan ma oriyáke mae vá máan ná teno, ‘Inaru yafisin inka ádé erikhen mino.’ ⁸Tiretí ankan oreya vá aí banta mo ayofesin evaránen asefa intiya vá, púkáin nain ayanóan mantiyáke vá, amon dana aí ma fákakhan nain kama uantiya vá, banasifin ma namu aunan baréin nain do siantiya vá ono. Ma ákona ída miyan bákaya faran tiretí ankan bare ompo vá mai ída miyan bantiya fara vá banasi aya ono. ⁹dTiretí ankan ída vá kori fi siriva fi kopa moni safi vá amú anan unampin bá ureya vare orono. ¹⁰eTiretí ankan ma oriya mae ída vá unan bareya inká ída vá ena au anamun má arantan anamun má ayonta vá bare vá orono. Mai ma mo yorarí uantanona nanin banta ano vá éin dunan má minó daná bá amino.

¹¹“Tiretí ankan ma mana kákan barufin nafi sitó barufin nafi ma orivinte mae funtákein banta van mairá dosireya mai vanta amasá bareya mai varu me ampeno. ¹²fTiretí ankan ma mai vanta amápin un pébinteya mai

namumpin ma van nain nanin banta máan ná te siameno, ‘Tiretin má ará kusin banten mino.’ ¹³Máa sesin ma mai namun pinte nanin banta ano ma amusin iyan ma siretí ankan aviranti mae vá tiretíí avu vaya áesin ná betin má bano. Banten mifo siretin ma ída amusin iyan ma avirantiya vá tiretíí ará kusiantan baya áesin ná ovaránen tiretimpin erino. ¹⁴gMana ano ma siretí ankan ída aviren be amápin oren ma siretíí vaya inin nan ma afonkarí intiya ma mai varu me ampinte vá arantantáke kayosá betin avorá me fúpá tian karú desin ná afová en ná Tiyarafenu ano setin uman timinten mino sino. ¹⁵hTéi fura siré tiretí ankan tiamiyá uno. Tiyarafenu ano ma vanasi yaimono van inikhein damú ma afoká intin Sodomu varu vá Komora varu vá ané ma afoká ukhá ein mai uman moéken esantakhein uman mi mai varu kayo finte nanin banta ané afoká inten mino.

Ara Ara Uman Ma Afoká Inaí Páke Amaan Tikhein Baya Ino

(*Maki 13:9-13; Ruku 21:12-17*)

¹⁶i“Máan tintéíí séi siretí ankan afá iyan ofen ma sipisipi kayo siantan or-einíí é umpo vá osafáe an de vá bempáké barará tonanempe vá oriyákeya kukhofá nun mano ma fúkekhaven noinisá ono.

¹⁷j“Manáa vanta kéká kasá dafian ákona ono. Tiretin avían Kanisori kay-orá mo kaintin kó tiantáden betíí monó átaru namun kayofin tiretin dafiyó ankaminten mino. ¹⁸Téintá ma mumunan iyaona van mai kéká ano siretin avían kamanin kayo vá kin kéká bá

³10:4 Yudas Iskarioti e ma siyain mai *Iskariotí baru ráke vantan* ban mino.

^b10:6 Yer 50:6 ^c10:7 Mat 3:2; 4:17; Ruk 10:9, 11 ^d10:9 Ruk 10:4

^e10:10 Ruk 10:7; 1Ko 9:14 ^f10:12 Ruk 10:5-6

^g10:14 Ruk 10:10-12; Apo 13:51 ^h10:15 Mat 11:24; Yut 7

ⁱ10:16 Ruk 10:3; Rom 16:19 ^j10:17 Mak 13:9-11; Ruk 12:11-12; 21:12-15

avorá kaintiya mairái vetin má ena anan nanin banta kayo avorá báí kama vaya sian dákó inono. ¹⁹Máan tesin ma siretin avían kópin ma kaintiya inte vayá tente rafuno sireya ída vá anomé ineno. Mai áaurá anan Tiyarafenu ano mai ma sinona vaya ineine amintiya sinono. ²⁰^kMai fara vara seyo, siretiyantá ída vayan sin nompó siretí Afóeni Aunan manon tiretin oo ráké uaren baya sinten mino.

²¹^l“Be afá aváe ano e mantaaren be afá aváen avían namuro ayampin kaintin aruan purintin maen be afóe ano e mantaaren be akhá mai avúavasí ana uantantín maen inká iyamporinta ano e mantaaren be anóe afóen namuroí uantáden arintin purino van avían namuro ayampin kainten mino. ²²Téin tiví ma siretimpin banti ma séin bákuriyanona van mi minó banta kéká ano siretí ankan ará namu uantanten mifo iye anó mantaan ákona ukhen baré intin ná ma varai kípán damú afoká inten nafi Tiyarafenu ano mai nanin banta kayon evaránen aviranten mino. ²³Tiretí ankan ma mana varu fintena nanin banta ano ma inian namu uantanti mae ena varu fasá karan orono. Téi fura siré tiretin tiamé uno. Isarerii varafin ma vain baru kayofin ída yóan kípakhesin mi Banta Anin erinten mino.

²⁴^m“Sikhuru iyampon mano vei arú ída esantakhan inká doran banta ano vei ayafa ída esantakhan ukhé iyan mino. ²⁵ⁿSikhuru iyampon mano ma vei arú bá mun manáí intin ma inká doran banta ano ma vei ayafa vanta vá mun manáí intin maen mai anan kanaí inten mino. Má afóen nan ma namu aunani ánon banta Beseburi e ma sen ariyain mai veni

kéká bá deren moéken namu ví aranten mino.

Namuro Kayo Van Ma Ída Feran Baya Ino

(Ruku 12:4-7)

²⁶^o“Banta kéká ano ma siretí ankan uman ameno van ma intiya sireti ída vá akhokho van ono. Aúpá ma ana yamuan kain bain danasinta ano yákó intin inká aúpá baya kayo vanasi ano afová inten mino. ²⁷Téi ma inuran pinté ma siamenuna vaya vá tiretí ankan kakhakhein tasá teno. Tiretí ankan átarempin ma kafaya finté ma siamin nain baya vá má amontasá un mantaveya vá oovare vanasi siameno. ²⁸^pBanta kéká ano ma yante vukhafa aruan purin nan ída vá tiretí ankan perano. Beti ída kanaíen aú bá aruan purinten mifo Tiyarafenu veyá vará perano. Béi anon kanaíen aú bá dan bukhafa vá mai ma ira kiyan uman baren beraí siyan purin barufin taman kaurinten mino. ²⁹Mana monípó tító nun kanan miyaní ino van kaé iyan mifo siretí ankan Afóe ano mai nun kayo kamaen dafisiyáken mai fintena mana ída áintin barará eravino van anunu ukhen mino. ³⁰Máan tukhan mi Tiyarafenu ano siretí ankan ánon do yankáan kípáren minó afova suron ukhen mino. ³¹^qMáan tukhaya siretí ankan tító nun kayo esantakha ompo ída vá akhokho van ono.

Yisasini Vaya Sin Nan Ma Ída Ayave In Baya Ino

(Ruku 12:8-9)

³²“Mana vanta ano ma e manten banasi siamen ma séi veni kéká uno ma sintí maé mai sen má deren béin nan tesi kéká ino sé Tifóe ma inarufá bain

^k10:20 Yon 14:26 ^l10:21 Mai 7:6; Mat 10:35; Mak 13:12; Ruk 21:16 ^m10:24 Ruk 6:40; Yon 13:16; 15:20 ⁿ10:25 Mat 9:34; 12:24; Mak 3:22; Ruk 11:15
^o10:26 Mak 4:22; Ruk 8:17 ^p10:28 Rom 8:31; Yem 4:12 ^q10:31 Mat 6:26

tiamenté uno. ³³ Tiamenté umpo mana vanta ano ma e manten banasi siamen ma séi ída veni kéká uno ma sintí maé mai sen má deren béin nan ída sesi kéká ino sé Tifóe ma inarufá bain tiamenté uno.

**Yisasin Ma Móeken
Anunu In Baya Ino**

(Ruku 12:51-53; 14:26-27)

³⁴ “Ma varará aruvin kusiantan mi sen nan baren eren mino seya siretí ankan ída vá ineno. Téi vaenatin baré eré uno.

³⁵ Para vara seyo, namuroíin avúavá afoká ino van mi séi eré uno.

“Banta ano e mantaaren be afóen namuroí intin,

be araun mano e mantaaren be anóen namuroí intin,

be anafú ano e mantaaren anasi anafú namuroí uantantin

³⁶ inká mana vanta ano e mantaaren baéden bei kéká bá namuroi inten mino.’ *Mai 7:6*

³⁷ “Mana vanta ano ma ve anóe afóen nan ma moéken anunun ma sen nan ma ída moéken anunu inain mai ano ída kanaíen ten bákurinten mino. Inká mana vanta ano ma ve anin nafi ve araun nafi moéken anunun ma sen nan ma ída moéken anunu inain mai ano ída kanaíen ten bákurinten mino. ³⁸ Máan tinten mifo iye anó ída vei yaa unkamádan mamaren ná ten tínain dakhafinten nafi mai ano ída kanaíen ten bákurinten mino. ³⁹ Bei aunan ma ákonaen pákakhá inain nanin bantai aunan o afeyoranten mifo sen nan ma iniren bei aunan ma ampín nain nanin banta ano

fara van oriyan ban aunan o varanten mino.

**Ena Vanta Ma Aya Iyain Kéká Ano
Ma Inarufá Kákan Miyan
Baran Nain Baya Ino**

(Maki 9:41)

⁴⁰ “Tiretí ankan ma avíden ma avábá inain mai vanta ano séin mi sivíden kama inten mino. Téin ma siviran nain banta ano mai ma séin tisintá erikheruna Sifóen mi aviranten mino. ⁴¹ Máan tinten mifo mana vanta ano ma mana sakanampa vanta aya iran muno ma siren aviren be amápin mo kaúden dafisinten maen mai ma Tiyarafenu ano sakanampa vanta amiyain miyan mi mai vanta ano varanten mino. Inká mana vanta ano ma mana funtákein banta aya ono van ma avían be amá mo kaúden ma yafisinten maen mai ma funtákein banta kayo ano ma varé iyain miyan mi mai vanta ano varanten mino.

⁴² “Mana vanta ano sen naro siren ma senti eyo iyampon kayo finte mana aví ída vain doran banta ma kápifin iyon non dáan aminten maen mai séi fura siré tiretin tiamiyá uno. Mai vantai miyan ída afeyoranten mino.”

**Monó Non Péantan Banta Yonin
Nú Yisasin Núi Vaya Ino**

(Ruku 7:18-35)

11 Yisasi ma sirantan kan orun kádan (12) eyo iyampon kayo ma vaya siamiren maen mai varu me ampiren Kariri varafin ma vain baru kayo fimpá nóken banasi afova amiyán Tiyarafenui kama vaya vetin tiamen mino.

^{¶10:38} Bei yaa unkamádan ma varani ana máan mi ukhein mino. Yisasin ánain bákurintá ma uman baran mino.

^{¶10:33} Mak 8:38; Ruk 9:26; 2Ti 2:12

^{¶10:38} Mat 16:24-25; Mak 8:34-35; Ruk 9:23-24; 17:33; Yon 12:25

^{¶10:40} Mak 9:37; Ruk 10:16; Yon 13:20

²Yoni ma karavusifin baren ma Ti-yarafenu ano aní ukhein banta ano ma minó dorarí iyain baya iniren bei eyo iyampon kayo van máa sen Yisasin mo ina ino van tiamemí, ³“Éi fura sé mai ma Ti-yarafenu ano ma aní ukhá ma avé ukhá erúna vanta fono. Áa ena vanta eriyain nará tetí ankan ave ótífan nuno.”

⁴Máa síkan Yisasi evaránen betí ankan tiamemí, “Tiretí ankan ma ma oniyáke ineona vaya vá evaráne ore mo Yonin tiameno: ⁵^uAuu ma yufúkukhá ein kayo ano evaránen onákan inká arantan ma namu ukhá ein kayo ano e manten orin maen amon dana aí ma vá ein kayo au evaránen kama íkan inká átaren ma kontá ein kayo ano evaránen baya kamaen iníkan maen púká ein kayo ano evaránen e mantákan inká ona ma ída vain nanin banta ano kama vaya inin en mino. ⁶Téin ma soniyantin ma vetíi mumunan ída eravukhan nain kayon Ti-yarafenu ano moékan amusin aminten mino.”

⁷Yonini eyo iyampon kayo ma orivíkan Yisasi máa sen Yonin nan banasi siamemí, “Tiretí ankan inté ukhein bantá onano vará banta ída van kámá barafá oriyaré fono. Béi ída ákona van ura ano ma kaya einísá iyayá onano van oriyare fono. ⁸Áa náinasá onano vará oriyare fono. Mana vanta ano kama ukhein auí danasá uren bákayá tiretí ankan onano van oniyare fono. Ída ino. Kama auí daná ma ukhein banta kayo ano kin amápin mi váé iyan mino. ⁹Máan té iyan mifo mai fará tiretí ankan oriyare fono. Mana sakhanampa vanta onantasá oriyare fono. Mai fura ino. Téi siretí ankan tiamé uno, mai sakhanampa vanta ano minó sakhanampa vanta esantakhen

mino. ¹⁰^vMai vanta van mi Ti-yarafenu vompon dóki ano máa sikharen mino, “Téi mana vanta siantékun éin an uanten oren

eni aa mo uvisinten mino. *Mar 3:1*

¹¹Téi fura siré tiretí ankan tiamé uno. Monó non péantan banta Yoni ano minó ma varará ma afoká ukhá ein banta kayo esantakhen mifo inaru yafisimpin ma sitosí ukháin nain manon Yonin esantan-ten mino. ¹²^wMonó non péantan banta Yoni ma kama vaya siyan monó non péantiyaré ein táké ma eren ma saréa varunarái ákona mumunan iyain kéká ano inaru yafisimpin ainen orono van iyákan kokhon banta ano Ti-yarafenui yafisin namuroí uantiyan mino. ¹³Para vara seyo, minó sakhanampa vanta kayoi vaya vá man baya vá ano ma afoká inten ne ma sikhare ein danas-inta ano Yonintái me kanaíen mino.

¹⁴^xTiretí ankan mai van ma mumunan iyanteya mai ma Ti-yarafenui vompon dóki ano ma sakhanampa vanta Iraiyan an dakhein banta van ma erinten ne ma sikhá ein mai Yonin nan mi sikharen mino. ¹⁵Átaren ma van nain kayo ano vá inino.

¹⁶“Ma ma saréa ma vain nanin banta van náí yanákasá tiádante rafuno. Iyampon kayo ano ma átaru varurá kumanten ma ena iyampon kayo máa sen areiní iyan mino.

¹⁷“Tetí ankan í dano van okhakhan asékuya ompo siretí ankan ída í de ono. Arunan ná baran í déku ompo siretí ankan ída arunaná mádeya iff de ono.’

¹⁸Mai fara vara seyo, Yoni ma eriven maen dunan má uvaini non má auraren ída niyákan minó ano siyáken béimpin namu aunan ban mino siyaren mino.

^u11:5 Ais 35:5-6; 61:1 ^v11:10 Ruk 1:76 ^w11:12 Ruk 16:16

^x11:14 Mak 4:5; Mat 17:10-13; Mak 9:11-13

¹⁹yMáa siyaréin ma Banta Anin eriven ma yunan má non má nákan maen minó ano sen, ‘Onano, yunan má uvaini non má béi kokhon niyáken béi tákisi varan banta kéká bá ume vanta kayo vái arona ino.’ Máa siyan mifo Tiyarafenui vaya ánain ma vákuró tifanuna van mi veti afová en pura vayan tiyaren ne sinten mino.”

**Ída Ma Ará Baeran Nain Baru
Kayo Ano Ma Kákan Uman
Baran Nain Baya Ino**

(Ruku 10:13-15)

²⁰Manáa varufin Yisasi kokhon enará ukhein danasinta yáko urákan mai varu fintena nanin banta ano ída ará baeriyaimpin Yisasi mai varu finte nanin banta máa sen asemí, ²¹z“Korasiníke nanin banta vá Betsaidake nanin banta va soe, siretí kákan uman uron mi varan nono. Mana vanta ano Taiya vá Saidoni vái varufin oriven máan avúavá daná afoká intin baren betí ankan pefái ará baéden koyan buí daná uren dun akhempá kumanten betíi ume van arunaná baran nainten mino. ²²Máan tukháí séi siretí ankan tiamé uno. Tiyarafenu ano ma vanasi yaimono van ma aní ukhein damú ma siretimpin afoká inain uman mano Taiya vá Saidoni varu kampin ma afoká ein uman mano esantaren tiretimpin afoká inten mino. ²³aTireti Kapeniamú kéká soe, Tiyarafenu ano siretin avirantí inarufá ódinte fono. Ída ino. Tiretí ankan purin nanin bantai varufin námen uron mi aravin nono. Aravin nompo mana vanta ano Sodomú barurá oriven téi ma siretin aúbaná afoká iyaruna yanasinta afoká

en baréinti Sodomú baru fara van nainten mino. ²⁴bMáan tukháí séi siretí ankan tiamé uno. Tiyarafenu ano ma vanasi yaimono van ma aní ukhein damú ma siretimpin afoká inain uman mano Sodomu varufin ma afoká ein uman esantaren tiretimpin afoká inten mino.

**Yisasi Ma Ve Afóen Tusu
Sianten Amúkein Baya Ino**

(Ruku 10:21-22)

²⁵cMaí damú ana Yisasi máa semí, “Tifóe oe, éi inaru vá bara vái Bafan mi van ná ein amo sé uno. Mai fara vara seyo, kama ineine vá afova vá bain banta kayo ano onan nain nan ma aúpasí ukhareya ma iyampon arará kayo an dakhein banta kayo ma aníeona van mi susu sé uno. ²⁶Pura ino. Tifóe oe, éi ei kama anunu máan dakhafeya máan te ono. Pura.”

²⁷dMáa sen amúkuren banasi siamemí, “Te Sifóe ano inka minó daná ten tiyampin kaen mifo mana vanta ano ída ve Anin afová ukhan be Afóe ano anan afová ukhen mino. Inká ída mana vanta ano ve Afóen afová ukhen mifo ve Anin mano ma ve Afóen aní ono van aní ukhein nanin banta kayo vá be Anin má ano anan afová ukhen mino.

²⁸e“Uman ma variya nan ma avesara iyain kayo ano vá téi varunafá eresí avíkan ameno. ²⁹Tiretí ankan ten pintena ma afova mamareya vá tenti vaya aránaopa sá bano. Mai fara vara seyo, séi sirá kusen barará orin avúavá baran bantan baruna sen pinten nan avíkan baran nono. ³⁰fMai fara vara seyo, ma vaya ma siretí ankan tiamiyaruna vá inká barano

^y11:19 Mat 9:14

^z11:21 Ais 23; Isi 26:1–28:26; Yoe 3:4-8; Amo 1:9-10; Sek 9:2-4

^a11:23 Esé 19:24-28; Ais 14:13-15 ^b11:24 Mat 10:15; Ruk 10:12

^c11:25 1Ko 1:26-29 ^d11:27 Mat 28:18; Yon 1:18; 3:35; 10:15; 17:2

^e11:28 Yer 31:25 ^f11:30 1Yn 5:3

van ma amiyaruna uman má ano seso sikhen mino.

**Yisasi Ma Veyan Nan Sabatii
Bafan Munno Sein Baya Ino**

(Maki 2:23-28; Ruku 6:1-5)

12 ⁸Mana Sabati yamú Yisasi má bei eyo iyampon kayo vá úfti yunampin oriyaré íkan bei eyo iyampon kayo arafan puríkan úfti ankáden aú puníden nen mino. ^{2h}Niyákan Farasisi kéká ano ódaren Yisasin tiamemí, “Onano Sabati yamú baran nan airo ananí ukhein danái eni eyo iyampon kayo ano variyan mino.”

³ⁱMáa síkan Yisasi evaránen betí ankan tiamemí, “Pefá ma Deviti ma vei kéká bá arafan puríkan ma mantaré ein baya vompon pintena siretí ídá dankáke fono. ^{4j}Deviti ma Tiyarafenu amápin un pében ma ven avorá bereti khauren airo ananí uran ban ma monó doran banta kayo ano ana vá nano sikhá ein ma un máden bei kéká bá nein mino. ^{5k}Monó doran banta kayo ano Sabati yamú ma monó namumpin doriyá ein mai are ukhein damúí vetí ankan doriyan ída uman bariyaren mifo siretí ankan ídá man bayai vompon dókifin dankáke fono. ^{6l}Téi siretí ankan tiamiyá uno. Monó namun ma esantakhein daná ano mafin ban mino. ^{7m}Tiyarafenui vompon dóki ano ma sen ‘Ena ma arunan uanttan nan mi siranakhen mifo íkun ma uan amin nan ída ino,’ *Ose 6:6* ma sikhein baya kayoi ana ma siretí ankan afová ukhanteya aau ma ída vain nanin banta ída namu ví amin nono. ⁸Para vara seyo, Sabati yamúká ma yafisin ákona Tiyarafenu ano Banta Anin mi amikhen mino.”

**Yisasi Ma Mana Ayan Púkein Banta
Ma Sabati Yamú Ayofein Baya Ino**

(Maki 3:1-6; Ruku 6:6-11)

⁹Yisasi mairá me ampiren oren mai varui monó átaru namumpin ódikan ¹⁰ⁿmafin mana ayan davénakhein banta varé íkan Farasisi kéká ano Yisasini aau ana yosiren kó tiantano van inaemí, “Sabati yamú tetí ankan kanaisá erá aí banta ayofá tifante rafuno.”

^{11o}Máa sen ina íkan Yisasi vetin tiamemí, “Tiretin pinté mana vanta ano ma mana sipisipi yesin baren ma Sabati yamú masípin o áduvinti ídá mai finte orun avían kainte fono. ¹²Banta anon moéken sipisipi esantakhein pasé Sabati yamú kasaé aya ó tifanté uno.”

¹³Máa siren béi mai vanta siamemí, “E ayan darurono,” síkan mai vanta ano ve ayan daruriyain má mai ayan evaránen kama uaren ena ufake ayan má manái en mino. ^{14p}Máan tíkan mai Farasisi kayo ano ódaren e khuyen manápá o iyuven Yisasin ma aruan purin nain aa van dosen mino.

**Yisasi Maen Tiyarafenu Ano
Aní Ukhein Doran Banta Ino**

¹⁵Mai ma Farasisi kéká ano véin uman ameno van iyain baya ma Yisasi afová uren mai varu me ampiren oríkan kokhon nanin banta kayo ano véin bákuren oríkan aí ma vain nanin banta minó ayofaan tádein ^{16q}beyan nan ída ena siamino van mai nanin banta airo ananí uantten mino. ¹⁷Yisasi ma mai avúavasí ein manon sakhanampa vanta Aisaiyan oo ráké uaren ma Tiyarafenu ano siádan baré ein mi kanaíen mino. ^{18r}Máan mi sikhán mino,

⁸12:1 Diu 23:25 ^h12:2 Eks 20:10 ⁱ12:3 1Sa 21:1-6 ^j12:4 Riv 24:5-9

^k12:5 Nam 28:9-10 ^l12:6 Mat 12:41-42 ^m12:7 Mat 9:13

ⁿ12:10 Ruk 14:3 ^o12:11 Ruk 14:5 ^p12:14 Yon 5:16

^q12:16 Mat 8:4; Mak 3:12 ^r12:18 Mat 3:17

“Ma senti yoran banta séi ma aní ukheruna ino.

Téi ven nan moéké tinunu iyá kun ten tirá pin ká kan timusin édaviyan mino.

Téi sesi saunan bempin kaékun puntá kein avú avá baya varará nanin bantafin tiaminten mino.

¹⁹ Béi í da aran má avádó den baya sen aruven inten mino.

Banasifin béi ará kusin má bempáké baya sinten mino.

²⁰ Banasi ano ma ura an den iyarí ukhá in nain béi í da iyanten mino.

Inká oon ma yusimono van ein an ma yakhá in nain nanin banta véi í da funtiminten mino.

Béi yoren oriyan maen puntá kein avú avá mo maman dá kó inten mino.

²¹ Minó barará nanin banta ano ventá mumunan uven béi ayaino van ave inten mino. *Ais 42:1-4*

Yisasi má Beseburi Máí Vaya Ino

(Maki 3:20-30; Ruku 11:14-23; 12:10)

²² Maí damú mana namu aunan mano fákakhan auu yufú kuvin í da vaya siyain banta aviren Yisasi vaintá erí kan mai vanta ano oniyan baya siyan ino van Yisasi mai vanta ayofen mino. ²³ Máan tí kan minó nanin banta ano sakhaen orera iyá ken inaemí, “Ma vanta Devitin Anin ná banten nafino.”[§]

²⁴ ^s Máa sen oreraen mifo Farasisi kayo ano ma mai vaya iniren betí ankan máa semí, “Ma vanta ano minó namu aunan kayoi á non bantai** á konarái namu aunan kayo yo siantiyán mino.”

²⁵ Máa siyá kan Yisasi vetí ankani ineinefin afová uren betin tiamemí, “Mana vara ano ma aú ban aif uren maná pá ké kábintin ena fáké kábintin uven ma aruvinten maen mai vara namu inten mino. Inká mana varu finte safi mana má pinte safi ma aú ban daí den aruvinten maen mai varu fi mai ma safi í da á konaen banten mino. ²⁶ Máan tukhantin Ban Anon mano ma e mantaaren Ban Anon ma yo siantanten maen mai veyan mi aú ban daiminten mifo inté uren ná beni yafisin á kona ano fara vanten nafino. ²⁷ Inká namu aunan kayoi á non bantai á konará ma namu aunan kayo yo siantiyá kun maen mai iye anó tiretí kéká á kona amin ná namu aunan kayo yo siantiyán nafino. Máan tukhantin tiretí kéká anon tireti ma seona vayará aní iyan tiren nan í da funtá ka ono sinten mino. ²⁸ ^t Máan tukhen mifo sé in ma Tiyarafenui Aunan mano siyaintí ma namu aunan do siantiyá ku maeya mai siretí ankan afová inono, Tiyarafenui yafisin á kona fefá i siretimpin e van mino.

²⁹ “Inká intesá uren ná mana á kona vanta amá pin mana vanta ano un pé ben ná beni ona varanten nafino. Mai á kona vantai ona ma varano sinten maen á kona anan pó ké nare vé in damuá daren mi ven amá pintena yanasinta minó baranten mino.

³⁰ ^u “Té in ma namuroí usintiyain nanin banta mai í da sen tirona ino. Inká té in ma í da siyaen banasi avían á taru iyain mai nanin banta anon banasi intanin orera iyan mino. ³¹ ^v Máan tukhá i sé i siretí ankan tiamiyá uno. Minó ume vá oyampá baya ma sinona vá Tiyarafenu ano

§**12:23** Tiyarafenu ano ma aní ukhein banta Devitin anan pinté i afoká inten mino ma sikhá ein nan Yutan kayo ano mumunan ukharen mino.

****12:24** Kiriki vaya finté mai vanta aví Beseburi ne siyan mino. Matiu 12:27 dere maná ukhen mino.

^s**12:24** Mat 9:34; 10:25 ^t**12:28** Apo 10:38; 1Yn 3:8

^u**12:30** Mak 9:40; Ruk 9:50 ^v**12:31** Ibu 6:4-6

ampiantanten mifo Kantá Aunan nan ma oyampá baya sinona mai ume Ti-yarafenu ano ída kanaíen ampiantanten mino. ³² Mana nanin banta ano ma Banta Anin ma oyampá baya sinona ume Ti-yarafenu ano ampiantanten mifo Kantá Aunan ma oyampá baya sinona ume saréa fi ínaimpa safi Ti-yarafenu ano ída uron mi ampiantanten mino.

Daa Aran Ma Iran Naintá Ma Mai Yaa Oman Afová In Baya Ino

(Ruku 6:43-45)

³³ w“Máan tinten mifo kama yafisirí ma inona yaa ana anon kama aran imá-dantin inká namu yafisirí ma inona yaa ana anon namu aran imádanten mino. Para vara seyo, inté ukhein daa aná ban nafi mai veni aran ma imádan naintái afová inono. ³⁴ xTiretí ankan namu os-afáe akhafana ompo, inté uákeyá namu avúavá ma aúpin bain kéká ano kama vaya sen novara fono. Aúpin ma vain avúavá máan oofente kuvé iyan mino. ³⁵ Kama vanta arápin ma kokhon kama ineine kayo víkakhán ma vain manon kama avúavá baré iyan mifo inká namu vanta arápin ma kokhon namu ineine kayo víkakhán ma vain manon namu avúavá baré iyan mino. ³⁶ Máan tukháí siretí ankan tiamé uno. Ti-yarafenu ano ma vanasi yaimin nain damúí vanasi ano ma ída funtákein baya ma siyáin nain tian dákó inten mino. ³⁷ Para vara seyo, Ti-yarafenu ano eni vaya kayorá anan kama vaya siyare ono sen inká ída funtákein baya siyare ono sen daiminten mino.”

Yonan Amaniná Ma Afoká Ukhá Ein Nan Ma Yisasi Sein Baya Ino

(Maki 8:11-12; Ruku 11:29-32)

³⁸ yMáa sirákan manáa man baya ma afová ukhein banta kayo vá Farasisi kéká bá ano máa sen Yisasin tiamemí, “Aru soe, setí ankan ma éin nan Ti-yarafenui yorarí iyan mino sen ma inino sinte mae éi mana enará ukhein daná anésirá oná tifano.”

³⁹ zMáa síkan Yisasi vetí ankan evará-nen tiamemí, “Taréa ma vain mai namu avúavá baran nanin banta vá Ti-yarafenu rá ída ákonaen monó tin nanin banta vá báken ena ena yamú betí aní dana san manan ina iyan mifo vetí ankan ída kanaíen mana aní daná onanten mino. Sakhanampa vanta Yona ma aní ukhein mai aní daná anan betí onanten mino. ⁴⁰ aPara vara seyo, Yona ma kanú manaú bayan má inuran má ma kákan noyana arápin ma varé einí en Banta Anin mano kanú manaú bayan má inuran má bara aúpin banten mino. ⁴¹ bMáan tinten mifo Ti-yarafenu ano ma vanasi yaimin nain damú Ninivéke vanta kayo ano mairá e mantaven maen ma ma saréa vain nanin bantai namu avúavá tian afoká inten mino. Para vara seyo, Yona ma mo vaya sin maen minó Ninivéke nanin banta ano vaya iníden ará baeren mifo siretin aúbanápin mana Yonan esantakhein daná ano e vákaya ída ará baeriya ono. ⁴² cTi-yarafenu ano ma vanasi yaimin nain damú mana sautíke Kuinin mano mairá e mantaven maen ma ma saréa vain nanin bantai namu avúavá tian afoká inten mino. Mai farava ino mai Kuini ano vara akhempa suron mi varen Soromonini kama afova vaya ineno van erein mifo

^w12:33 Mat 7:16-20 ^x12:34 Mat 3:7; 15:18; Ruk 3:7; 6:45

^y12:38 Mat 16:1; Ruk 11:16; Yon 6:30 ^z12:39 Mat 16:4; Mak 8:12

^a12:40 Yna 1:17 ^b12:41 Yna 3:5 ^c12:42 1Ki 10:1-10

mana Soromonin esantakhein daná ano e van mino.

**Namu Aunan Kayo Ano Ma Evaránen
Banta Aúpin Oriyain Baya Ino**

(Ruku 11:24-26)

⁴³“Namu aunan mano ma mana vanta me ampíren ma vanta i van kámá barafá nóken bei avíkan baru van dos-intin ma ída mana kama afokhan bantin maen, ⁴⁴béi máa sinten mino, ‘Téi ma fefá báeruna namumpin evaráné oronté uno,’ siren o onantín maen mai namumpin ída mana yaná bantin mai namun bakhari uren aúf uádantín banten mino. ⁴⁵^dMáan tukhantín maen béi evaránen oren dan manápá ifo afápá kan un kádan namu uron ukhein namu aunan o avíaren mai namumpin o vantín maen mai vanta ano fefá ma namu avúavá ma variyá ein esantaren moéken namu uró inten mino. Mai ma einí ukhein avúavá anan taréa ma vaona nanin bantafín afoká inten mino.”

**Yisasín Anóen má Be Afá
Kayo Vái Vaya Ino**

(Maki 3:31-35; Ruku 8:19-21)

⁴⁶Yisasi ma mai nanin bantafín para vaya siyan bákan maen be anóen má afá kayo vá ano véin má baya seno van barurá e mantakhen ave ukharen mino. ⁴⁷Ave ukhan mana vanta ano Yisasín mun tiamemí, “E anóen má e afá kayo vá ano en má baya seno van barurá e ave ukhen mino.”^{††}

⁴⁸Máa síkan Yisasi evaránen mai vanta siamemí, “Iye anó te sinóe van ná inká inte kékasá ten tifá tiváeyan ban nafino.” ⁴⁹Máa siren bei eyo iyampon kayo aníen eúkiyan temí, “Onano. Ma se sinóen má te sífá tiváeyan mái van mino. ⁵⁰^ePara vara seyo, inarufá ma vain

Tifóeni anunu ánain ma yakhafiyain mai nanin banta anon ten tifá tiváe, siyofi, sinóe van mino.”

**Danayun Ma Fafasin Bantará Ma
Ovaéádein Baya Ino**

(Maki 4:1-9; Ruku 8:4-8)

13Maí damú ana Yisasi má pinté ekhuven non akharun akhempá o khumanen mino. ²^fKumantaré íkan kokhon nanin banta ano véi vaintá e iyiyaimpin béi e manten botifín un kumamin banasi ano eyurá manten mino. ³Mantakhan Yisasi kokhon baya o vaédiyan betín tiamemí, “Ineno. Mana vanta ano yunan barafín danayun mo fafaseno van oren mino. ⁴Mo fafasen oriyákan maen manáa aasá eravíkan nun kayo ano e aídén nen mino. ⁵Inká manáa yanayun on daró eravuaren bara asamana ukhan ainen e ampamen mino. ⁶Ampamen mifo vara ída amákó ukhan amun ída kain námen aravukharéin á kan maen mai yanayun kafuren puren mino. ⁷Inká manáa yanayun ayankun namampin eravukharen e ampamíkan ayankun naman mano úkuan dararen mino. ⁸Inká manáa yanayun mano kama varafín eravukharen e ampamaren aran iren mino. Manáa ano mana antareti (100) iran manáa ano sikhisti (60) iran manáa ano teti (30) iran en mino. ⁹Átaren ma van nain kayo vá inino.”

**Yisasi Ma Ovaeran Baya Fákena
Ma Sian Amá Ein Baya Ino**

(Maki 4:10-12; Ruku 8:9-10)

¹⁰Ínainpáké bei eyo iyampon kayo ano Yisasi vaintá eriven máa sen inaemí, “Pará éi vaya ovaédiyá banasi siamiya fono.”

¹¹Máa síkan Yisasi evaránen betí ankan tiamemí, “Inaru yafisín pintenai

^{††}12:47 Manáa vompon dókifín ída ma vesi (12:47) van mino.

^d12:45 2Pi 2:20 ^e12:50 Rom 8:29 ^f13:2 Ruk 5:1-3

aúpá baya ana ma afováin Tiyarafenu ano inka siretin amikhen mifo vetí ankan ída amikhen mino. ^{12g}Tiyarafenui vaya iniren ma kamaen dafisin nain nanin bantai Tiyarafenu ano moékan afova aminten mifo ída ma kamaen dafisin nain nanin banta fintena fefá ma mantáin nain afova vá inan do varanten mino. ¹³Ma anarái ovaédé ana vaya siyá uno:

“Auu ano oniyán mifo vetí ankan ída mana yaná onanten mino.

Átarempó iniyán mifo vetí ankan ída vaya iniren afová inten mino.

^{14h}Mai ma nanin banta ano sakhanampa vanta Aisaiyani vayan pura sen afoká iyan mino. Béi máa sikharen mino,

“Tiretí ankan kokhon dádá baya inin nompo ída mai vayai ana afová inono.

Tiretí ankan kokhon dádá onan nompo ída kanaíeya mana yaná oman afová inono.

¹⁵Para vara seyo, mai nanin bantai aú ona inka munkin

átaren konin maen baya ída inen

amúkuven oriyan mifo

auu máben onen

átarempó baya inen

inká áukaké afová uren

aú baeren baré intí

kasaé betin ayofanté eruna ren mino.’ *Ais 6:9-10*

¹⁶ⁱMáan tukhen mifo siretin auu ano ma kasaen minó daná onan ma átaren mano ma vaya iniyain nará tiretí ankan amusin ná ono. ¹⁷Téi fura siré tiretí ankan tiamé uno. Pefá sakhanampa vanta kayo vá puntákein banta kayo vá ano ma ma saréa oniyaona yanasinta onano van iyaren mifo vetí ída ontaren mino. Inká ma ma saréa ma siretí ankan ma

iniyaona vaya kayo ineno van ukharen mifo vetí ankan ída inikharen mino.

Danayun Pafasí Pákenai Ovaeran Baya Ma Sian Amá Ein Baya Ino

(*Maki 4:13-20; Ruku 8:11-15*)

¹⁸“Banta ano ma yunan barafin ma yanayun pafasintá ma sian baereruna vayai ana vá ineno. ¹⁹Banasi ano ma inaru yafisini kama vaya ma iniren ma ída mai vayai ana ma afová iyain mai yanayun ma aasá eraveiníí íkan mi Ban Anon mano eriven Tiyarafenui kama vaya ma aúká pafasirein ainen do varé iyan mino. ²⁰“On daró ma vain barafin ma eravein danayun kayo mai vanasi ano ma vaya iniren ma mai vaya ainen mamaren ma amusin einíí ukhen mino. ²¹Máan tukhan maen ída arú kain orera uvin amun dan námen aravukharéin mi Tiyarafenui vayará ma ara ara uman ma erin maen ainen eraven ankamé iyan mino. ^{22j}Ayankun namampin ma eravein danayun kayo mai vanasi ano ma vaya iniren ma vara ráke yanasinta vá inká moni san ma in mai avúavá danasinta vá anon Tiyarafenui vaya yaramádan ída aran iré iyan mino. ²³Máan té iyan mifo kama varafin ma eravein danayun kayo mai vanasi ano ma vaya iniren mai vayai ana ma afová iyain manon mai mana antaretí (100) aran imádan inká manáa ano sikhisti (60) aran imádan inká manáa ano teti (30) aran imádan é iyan mino.”

Namu Kátará Ma Ovaéádan Baya Ino

²⁴Yisasi ena vaya máa sen betí ankan tian baéan amen mino. “Inaru yafisin mai máan mi ukhen mino. Mana vanta ano kama uviti ayun bei yunan barafin doren mino. ²⁵Dóden e vakhan maen

^g13:12 Mat 25:29; Mak 4:25; Ruk 8:18; 19:26

^h13:14 Yon 12:40; Apo 28:26-27 ⁱ13:16 Ruk 10:23-24

^j13:22 Ruk 12:16-21; 1Ti 6:9-10, 17

beni namuro ano inuran eriven namu káta ayun me mai vanta ano ma uviti yó-dampin pafasiren oren mino. ²⁶ Orikharé íkan uviti e ampamíkan maen inká mai namu káta vá deren e ampamen mino.

²⁷ “Ampantá íkan doran banta kayo ano eriven dunan afóen máa sen tiamemí, ‘Kákan banta oe, éi kama uviti ayun mi ei yunan barafin pafaseona ifo inté eipasá namu káta maifin pótikhen nafino.’

²⁸ “Máa síkan béi vetí ankan tiamemí, ‘Mana namuro anon mai avúavasí ukhen mino.’

“Máa síkan doran banta kayo ano véin inaemí, ‘Tetí ankan nan mai namu káta kayo oman daruren manará átaru ino vará anunu iya fono.’

²⁹ “Máa síkan béi vetin tiamemí, ‘Ída ino. Namu káta yariyá inonafá uviti vá dere yari nona van muno. ³⁰ Míkanan ma áesin manafin pótikharé intin ma yunan duyasin damusí ma inain mai anon kama ukhen mino. Pótikharé intin ma yuyasin damusí ma intí maé mai yorari ma inain banta kayo séi máa sé tiamenté uno, ‘Namu káta kayo nare vá ira saran átaru ure ana yamuádare vá inká uviti átaru ure vá tenti yunan kain namumpin bare mo khaono.’”

Mastati Arantá Ma Ovaéádan Baya Ino

(Maki 4:30-32; Ruku 13:18-19)

³¹ Yisasi ena ovaeran baya máa sen betí ankan tiamemí, “Mastati e sin daa aran ma einí inaru yafisin mano ukhen mino. Mana vanta ano mastati aran máden bei yunan barafin doren mino. ³² Mastati aú maen ída ena yunan aú kayo an den kákaní ukhen mifo sitó aúí vaé iyan mino. Dunan bara finté ma véi e fotiaren maen minó dunan ana esantaren dan mi ódivin nun kayo ano mai yaa ayantá e yomané iyan mino.”

Yisirá Ma Ovaéádan Baya Ino

(Ruku 13:20-21)

³³ Máa siren Yisasi evaránen ena vaya ovaéden betí ankan tiamemí, “Inaru yafisin mai yisi an mi yakhen mino. Mana nanin mano ma yisi máden kokhon paravampin kakhufaren upí uran ma ínaimpáké mai faravan mano kákantá pamiyainí ukhen mino.”

Yisasi Ma Ovaeran Baya Kayo Fóké Ana Vanasi Siamein Baya Ino

(Maki 4:33-34)

³⁴ Minó baya ma Yisasi ano vanasi siamiyaré ein maen mai ovaédiyan manan tiamiyán mifo véi ída mana vaya funtáden tiamiyaren mino.

³⁵ Mai avúavasí ma ein mai fefá mana sakhanampa vanta oo ráké uaren máa sikharen mino,

“Téi vaya ovaédiyá anan tiretin tiamenté uno.

Pefa suron ma ma vara afoká ein táké ma eriyán baren ma ma sare vaonará ma aúpá baré ein baya máan téi senté uno,” ma sikhare ein mi fura sen afoká en mino. *Íbo 78:2*

Namu Kátai Ovaeran Baya Ma Yisasi Sian Amá Ein Baya Ino

³⁶ Mairá Yisasi vanasi me ampiren mápin orivíkan beni eyo iyampon kayo ano véi vaintá onóben temí, “Kaná éi mai namu káta ma yunampin ampantá eini ana setin tisimesí inéfante rafuno.”

³⁷ Máa síkan Yisasi evaránen betí ankan tiamemí, “Kama uviti ayun ma yorein banta maen mai Banta Anin mino. ³⁸ Dunan bara maen mai ma vara ino. Inká kama uviti ayun maen mai inaru yafisin pintena nanin banta ino. Namu káta maen mai Ban Anoni vanasi ino. ³⁹ Mai ma namu káta ayun ma fafasiyain namuro maen mai Ban Anon mino. Dunan ma yuyasin damú maen

mai ma vara ma kípán nain damú ino. Inká dunan duyasín banta kayo maen vai enisori kayo ino.

⁴⁰k“Banta kayo ano ma namu káta átaru uren ma irafin taman kaureiní ma vara ma kípán nain damú inten mino. ⁴¹lBanta Anin mano vei enisori kayo siantantin maen beni inaru yafisin pintena uméi ino van ma vanasi akhenóka iyá ein dasasinta vá namu avúavá ma varyiá ein nanin banta vá do siantanten mino. ⁴²mDo siantáden maen mai kéká kákan irafin karúdan o váken kákantá berai siyan aveantuntá inkeki piyan banten mino. ⁴³nMáan tiyantín maen puntákein nanin banta ano áau ma kheiní vetí Afóeni yafisimpin inten mino. Átaren ma van nain kayo ano vá inino.”

**Aúpá Ma Kama Ona Vain
Má Ankaroro Vasan
Ma Sian Baéádan Baya Ino**

⁴⁴Yisasi evaránen máa semí, “Mana varafin kokhon kori aúpá baré íkan ma mana vanta ano oneiní inaru yafisin ukhen mino. Ódaren kákan amusin uren ainen evaránen orein mano vei minó dasasinta mo sarí uren moní mamaren mai vara e miyaníen mino.”

⁴⁵Yisasi evaránen máa semí, “Ona kokhon bain banta ano ma kama ankaroro kayo van ma yosiyainí inaru yafisin ukhen mino. ⁴⁶Dosen noren ma mana kama uron ukhein ankaroro váin ma o ódaren maen bei minó ona mo sarí uren moní mamaren mai ankaroro o miyaníen mino.”

**Noyana Arin Base Unantá
Ma Sian Baéádan Baya Ino**

⁴⁷Máa siren Yisasi ena ovaeran baya semí, “Base unan ma non akharumpin

karúdan aravuvín ma ara ara noyana ma fákiyainí inaru yafisin ukhen mino. ⁴⁸Mai vase unan ma karúdan noyana kayo víkavin maen noyana arin banta kayo ano orun darifaan akhempá kaúden ma kumanten kama noyana máa aían unan kayofin kauren namu noyana kayo karúde iyan mino. ⁴⁹Ínaimpá ma vara ma kípán nain damú máan manan inten mino. Enisori kayo ano eriven maen kama nanin bantafin ma namu nanin banta kayo ma vain do airanten mino. ⁵⁰oDo aíden maen karúdan kákan ira kiyaimpin o váken kákantá berai siyan aveantuntá inkeki piyan banten mino.”

⁵¹Máa siren Yisasi vei eyo iyampon kayo inaemí, “Ma ma ovaeran baya kayo ma siamerunai ana inká afová e rafono,” síkan betí ankan “eyo” sen mino.

⁵²Máa síkan béi vetí ankan tiamemí, “Máan tukhan mi man baya ma afová ukhein banta kayo ano ma inaru yafisin pintena vaya ma afova amiyain kéká ano kákan namun afóen an mi yakhen ona kain karafarampin un pében maen auyen afova vá peyante afova vá ma kama ukhein baren eré iyan mino.”

**Nasaretí Nanin Banta Ano Ma
Yisasin Oyan Amein Baya Ino**

(Maki 6:1-6; Ruku 4:16-30)

⁵³Yisasi ma mai vaya kayo ovaédiyan tiamíden maen mai varu me ampiren ⁵⁴pbei varu anará oren mino. Oriven betí monó átaru namumpin ódiven aráfen Tiyaarafenui vaya vanasi siamiyákan beni vaya iniren takhaen oreraen temí, “Ma vanta ano ma afova vá enará ukhein daná ákona ma mamán afokáin má inte fáken ná manten

^k13:40 Yon 15:6 ^l13:41 Mat 24:31; 25:31; Mak 13:27 ^m13:42 Mat 8:12
ⁿ13:43 Dan 12:3 ^o13:50 Mat 13:42; Ruk 13:28 ^p13:54 Yon 7:15

nafino. ⁵⁵qBéi mana má uvaran banta anin mi vá tetí afová ukhé uno. Be anóe Marian bákán inká be afá kéká Yemisi, Yosepi, Saimoni, Yudasí siren mino. ⁵⁶Inká minó ben ayofín náí setin má bain mifo inte fákená béi mai ákona manten nafino siren takhaiyan kokhon ineine en mino.” ⁵⁷rMáa siren béin ará namu uantiyan maen Yisási vetí ankan tiamemí, “Sakhanampa vanta aví minó barufá ban mifo veni varu anará bá ben amápin má ída ven aví ban mino.”

⁵⁸Máa siren béintá ída mumunan iyaimpin mai varurá ída kokhon enará ukhein daná afoká en mino.

Yonin Anuran Ma Síkein Baya Ino

(Maki 6:14-29; Ruku 3:19-20; 9:7-9)

14 Maí damú kamanini ánon banta Eroti ano^{††} Yisási ma yoriyain avúavá baya kayo inen mino. ²Iniren bei yoran banta kayo máa sen tiamemí, “Monó non péantan banta Yonin purin pinté e mantakhan mai van mi enará ukhein ákona yaná anon béimpin doriyan mino.”

³⁻⁴sPefá Eroti ano ve afá Firipin aná Erodiasin mamaran ma Yoni ano Erotin nan ten ma éi Tiyarafenui man bayan durafure mai nanin bare ono ma sein nan mi Yonin pákaren ayan nan kuan kar-avusifin kaen mino. ⁵Eroti ano Yonin aruan purono van ukharen mifo mai véi mana sakhanampa vanta ino sen banasi ano afová ukhan mai van mi vetí nan periyaren mino.

⁶Máan tiyá íkan Erotin ma ve anóe khaein damú afoká íkan kákan dunan táden niyan iyukhein aúbaná Erodiasin araun mano mo yanisí íkan Eroti kákan amusin uaren ⁷béi e manten mai arinta máa sen iyáan ten temí, “Ódino

fura sé uno éi náí yanasará inantinte fono séi fara amenté uno.” ⁸Máa síkan be anóe Erodiasí ano véin ákona ineine amirákan mai arinta ano mo Erotin in-ae mí, “Monó non péantan banta Yonin ánon tíkaan mana yókifin kaúdeya vare me simeno.” ⁹Máa síkan Kin mano mai vaya iníkan ben ará uman den mifo minó banta ma ven má kumanten dunan niyan ma mai kayo avorá ma fura ódino siren ma iyáantákaré ein nan ayave varana e siren bei aruvín banta kayo van mai arinta ano ma seiní ono sen mino. ¹⁰Máa siren mana aruvín banta siantan kar-avusifin oren mo síkan Yonin amen tíken mino. ¹¹Tíkaren mana yókifin ben ánon kauren mai arinta mo amíkan baren be anóen mo amen mino. ¹²Máan turákan Yonini eyo iyampon kayo ano ven au e yaiyen mo masí uren Yisasin mo siamen mino.

Yisási Ma Yan Manápá Tauseni (5,000) Vanta Yunan Amein Baya Ino

(Maki 6:31-44; Ruku 9:10-17; Yoni 6:1-13)

¹³Yonin ma aruan purin baya Yisási iníden mai varu me ampiren aúpáké botifin ódiven banta ída van kámá barafá bei eyo iyampon kayo vá ana orivín maen minó nanin banta ano mai ma Yisási orikheípá afová en iniren betíi varu me ampíriyan barará maifá ana ore ore en mino. ¹⁴Yisasin ma voti ano mo kaúdan maen béi onákan kokhon nanin banta kayo iyukheimpin betin nan arunan uren betíi aí kayo ayofaanten mino.

¹⁵Máan ten oriyákan inúpasí in eyo iyampon kayo ano Yisási vaintá eriven máa sen tiamemí, “Ma vanta ída van kámá barafái vá íkan inka yuniríen mifo

††14:1 Ma Eroti maen Yisasin ma araráká ma arono van ein Erotin anin mino.

q13:55 Yon 6:42 r13:57 Yon 4:44 s14:3-4 Riv 18:16; 20:21; Ruk 3:19-20

t14:5 Mat 21:26

vanasi siantesin ádé ma vain baru kayo fimpá oriven ná betiyan dunan miyaní ino.”

¹⁶Máa síkan Yisasi evaránen bei eyo iyampon kayo siamemí, “Betí ankan áesin bantiya siretí ano vá betin dunan amesin ná nano.”

¹⁷Máa síkan betí ankan evaránen béin tiamemí, “Tetí ankan dan manápá bereti vá kankanan noyana vá anan dáké tiféuno.”

¹⁸Máa síkan béi semí, “Mai vereti kayo vá noyana vá bare mará me simeno.” ¹⁹^uMáa siren banasi van káta yaró kumaneno síkan kumamin béi mai yan manápá bereti vá noyaná kanan má mamaren inarufá kakháben Tiyarafenu susu siantáden kisiren bei eyo iyampon kayo amíkan máden banasi amen oreraen mino. ²⁰Banasi ano mai vereti kayo vá noyana kayo vá nákan amú kuriyaimpin bei eyo iyampon kayo ano antan o éke e éke uren tiyan míkan mifo sirantan kan orun kádan (12) unan bíken mino. ²¹Anasi iyampon ída yankafen mifo vanta máa ma yankafein mai yan manápá tauseni (5,000) anon nen mino.

Yisasi Ma Non Daró Orein Baya Ino

(Maki 6:45-52; Yoni 6:16-21)

²²Mai oyampáké ana Yisasi vei eyo iyampon kayo nare síkan botifin un kumamen betí ankan non e kháden ena ufá oriyákan béi fara váken banasi siantan oreraen mino. ²³^vTiantan ma orera uvíkan maen béi amúkono van beyaká anufá óden un bákan inuranien mino. ²⁴Bei eyo iyampon kayo ma or-ein boti ano nenta suron orivin maen auu fáké kákan uva uaren non karantó en mai voti e máden dómeron en mino.

²⁵Máan ten oriyan kakhano van iyákan Yisasi vetí ankan baípa non

akharun daró oren mino. ²⁶^wBei eyo iyampon kayo ano Yisasin onákan non daró ma orin maen ban mi eriyen mino siren akhokho van báden oreraen mino.

²⁷Báden orera iyain má Yisasi ainen betí ankan tiamemí, “Téi umpo siretí ankan ída vá akhokho van iyáke ará kuse vá bano.”

²⁸Máa síkan Pita evaránen béin tiamemí, “Bafan noe, éi ma vanteya mai séin tesirá non daró éi vaonafá orono.”

²⁹Máa síkan Yisasi semí, “Ereno.” Siyain má Pita voti finté erafuven Yisasin kakháaren non daró oren mino. ³⁰Oriyan onákan uva ano ákonaen non karantó eimpin akhokho van iyáken araíen nompin orun periyan oovaren temí, “Bafan noe, siya ono.”

³¹^xMáa siyain má ana Yisasi ayan dan orin Pitan pákaaren máa sen tiamemí, “Tító mumunan má baona vanta oe! Pará éi ída mumunan e fonó.”

³²Máa siren míkan ma votifin un kumaniyain má uva kípen mino. ³³Kípiyain má mai ma votifin kumantaré ein kéká ano Yisasin aví daníen temí, “Pura uron tireya éi Tiyarafenun Anin mono.”

Yisasi Ma Kenesaretíke Kokhon Nanin Banta Ayofein Baya Ino

(Maki 6:53-56)

³⁴Máa siren Yisasin má bei eyo iyampon kayo vá non e kháden oriaren maen Kenesaretí akhempá óden mino. ³⁵Ódiyain má mai akhen páke vanta kayo ano Yisasin afová en óden baya yan orera íkan minó baru fáke nanin banta ano aí kéká aviren béi vaintá eren mino. ³⁶^yEriven maen Yisasin ínanen inaemí, “Áesin aí kayo ano eni au anamun áton mana aruvino,” siran beni au anamun

^u14:19 Mat 15:35-39; Mak 8:6-10 ^v14:23 Ruk 6:12; 9:28

^w14:26 Ruk 24:37 ^x14:31 Mat 8:26; Mak 4:39 ^y14:36 Mat 9:20-21

áton ma aruvein kayo ano asefaen or-
eraen mino.

**Banasi Ma Maman Avusese
Iyain Danasinta Fákena Van
Ma Yisasi Siamein Baya Ino**

(Maki 7:1-13)

15 Mairá Yerusaremíké manáa Fara-
sisi kéká bá man baya ma afová
ukhein banta kayo vá ano Yisasi vaintá
eriven máa sen béin inaemí, ²“Pará eni
eyo iyampon kayo ano sinafu siráoni
avúavá durafuren ná dunan ma nanovan
ayan nare ída sesé iyan nafino.”

³Máa síkan Yisasi vetí ankan evaránen
tiamemí, “Mai fará tiretí ankan anafu
aráoni avúavá ánain mana vákuriyayá
Tiyarafenui man baya yurafuriya rafono.

⁴Para vara seyo, Tiyarafenui vompon
dókifin máa sikhen mino, ‘Anóe afóeni
aránaopa sá ore vá betin oo vá daiyono.’
Eks 20:12; Diu 5:16

Inká ‘Be anóe afóen ma ankayantin nain
mano vá purino.’ *Eks 21:17; Riv 20:9*

⁵Máa sikhen mifo inká tiretí ankan
máa seya vanasi afova améiya ono,
Banta ano ma ve anóe afóen ma moní
ameno van inain mano kasaen Tiyarafe-
nun amiren maen be anoifon máa sen
tiaminten mino. En ma ameno seruna
moní Tiyarafenui mi amé uno. ⁶Máan
ma iyain mai avúavá anon e anóe afóen
oo vá daiyono sen Tiyarafenu ano ma
sikhein bayan durafúdeya siretí anafu
aráoni avúavá ánain manan bákuriya
ono. ⁷Tiretí ankan Tiyarafenui vava ana
sireya ída mai ánain dakhafin banta kéká
ompo sakhanampa vanta Aisaiya ano
siretí ankani avúava san ma siádan baré
ein mai fura uron mi sikharen mino.

⁸“Ma nanin banta kayo ano oo máa
fókéi sen tiví daní iyan

mifo vetí ankani ará bá ineine vá ano
nenta suron mi van mino.

⁹Betí ankan dan bukhafafói séin monó
tisintiyáken

barará bantai ineine máa fói vanasi
afova amiyan mino.” *Ais 29:13*

**Banasi Ma Maman Painí Íyai Pákena
Van Ma Yisasi Sein Baya Ino**

(Maki 7:14-23)

¹⁰Yisasi vanasi aran béi vaintá eríkan
máa sen betin tiamemí, “Kamae inire vá
ovare me ineno. ¹¹“Nái yaná anó banta
oofen ódiaren ná aúpin aravé iyan nafi
mai ano ída véin maman painié iyan
mifo náí yaná anó aú pinté édaaren ná
oo fenté kuvé iyan nafi mai anon béin
maman painié iyan mino.”

¹²Ínainpáké eyo iyampon kayo ano
Yisasi vaintá eriven béin máa sen in-
aemí, “Éi afová ukhen nan ná Farasisi
kéká ano ma ma vava kayo iniren aran
dosé iyan nafino.”

¹³Máa síkan Yisasi evaránen tiamemí,
“Inarufá bain Tifóe ano ma ída yókaré
inain dunan mai veyantái minó arú bá
darinten mino.”[¶] ¹⁴^aAuu yufúkukhein
banta kayo ano ma auu yufúkukhein
banta ma aa aníen orinten maen minó
ano masípin o ádinten mino. Betí
ankan auu yufúkukhein kékái váken auu
yufúkukhein kayo aa aní ono van mifo
vetin mo ampeno.

¹⁵Máa síkan Pita semí, “Mai ma
ovaeran baya ma seona vava ana setin
tisimesí ineno.

¹⁶Yisasi evaránen betin inaemí, “Ma
ma ovaéadan baya ana siretin má dere
ídá afová iya vae. ¹⁷Minó daná oofen
ma naáden nan arápin aravuaeren mi
masípin esanten oré iyan mifo siretí
ankan ídá mai yaná afová ukhe fono.

¹⁸Máan tukhen mifo vanta oo fenté

[¶]**15:13** Mai ma arú bá darinten ne sikhein dunan maen mai Farasisi kéká ino.

^z**15:11** Mat 12:34 ^a**15:14** Ruk 6:39; Rom 2:19

ma kuvé iyain mai anon aú bá ineine vá pinté édiyan pasen mi vanta man painí é iyan mino. ¹⁹Banta aú pinté namu ineine kayo vá banta aruan purin má ena ana safi avafun nafi ma varen non avúavá bá pamúku avúavá bá umoyan avúavá bá kópin ma kampun tin má inká ena nanin banta ma namu veya sen asiyain mái khuvé iyan mino. ²⁰Minó mai avúava sinta anon Tiya rafenu avorá banta maman painí é iyan mifo ayan ída seséin ma yunan pákaren niyain mai ano va vanta fainí é iyan naino. Ída ino.”

Ena Anan Pinte Nanin Mano Ma Yisasintá Mumunan Ein Baya Ino

(Maki 7:24-30)

²¹Yisasi mai varu me ampiren Taiya vá Saidoni vái varafá oren mino. ²²Oríkan mana Kenaní anan pinte nanin maifá bain baré íkan béi Yisasi vaintá eriven oovararen temí, “Bafan, Devitin Anin noe, se siraun namu aunan mano fákakhan kákan berai siyan bá umpo sen nan arunan usintano.”

²³Máa síkan Yisasi ída evaránen mana veya siyaimpin bei eyo iyampon kayo ano véi vaintá eriven béin ákon-aen tiamemí, “Ma nanin mano ínanen oovaren eriyen ban mifo siantan orino.”

²⁴^bMáa síkan béi evaránen mai nanin tiamemí, “Isareri kékái sipisipi kayo ma afeyokein nan manan Tiya rafenu ano séin tisintá erikhé uno.”

²⁵Máa siyain má mai nanin mano Yisasini ádé eriven me aron kanan durafúden barafin mátimen temí, “Bafan noe, éi sen tiya ono.”

²⁶Máa síkan Yisasi véin evaránen tiamemí, “Iyampon kayoi yunan ma máden betíi iyan kayo ma karúdaan amin mai ída funtáken mino.”

²⁷Máa síkan mai nanin mano semí, “Bafan noe, éi fura siya ompo iyan kayo ano vetí afóeni sakhó aránaópá ma yunan antan eravein kasaen né iyan mino.”

²⁸Yisasi mai veya iniren evaránen tiamemí, “Anasi oe, éi ákona mumunan mái vaona éi ma afoká ino van ma iyaona mai yaná afoká inten mino.” Máan ma siyain áaurá anan mai nanin araun e asefaen mino.

Yisasi Ma Kokhon Nanin Banta Ayofein Baya Ino

²⁹Máa siren Yisasi mai varu me ampiren Kariri non akhempá oriyan baren mana anu avapá un kumanen mino.

³⁰Un kumantan kokhon nanin banta ano véi vaipá eriyáken ai ayan púká ein nafi auu yufúkukhá ein nafi ai ayan ma namu ukhá ein nafi ída ma veya siyá ein nafi inká ena aí daná ma vá ein kayo vá minó aviren mo ven arantampin aseren orera uran mai kéká ayofen mino.

³¹^cAyofiyan maen minó nanin banta ano onákan ída ma veya siyá ein kayo ano veya síkan ai ayan ma namu ukharé ein kayo evaránen puntarákan arantan ma namu ukharé ein mano e manten oríkan auu ma yufúkukharé ein kayo evaránen onákan iyaimpin banasi ano sakharen kokhon ineine en orera iyáken Isareri kékái Ayarafenun aví daníen mino.

Yisasi Ma Kamí Kamí Tauseni (4000) Vanta Yunan Amein Baya Ino

(Maki 8:1-10)

³²^dDaní iyákan Yisasi vei eyo iyampon kayo aran eríkan máa sen tiamemí, “Ma nanin banta maen dunan ída nan kanú manaú damúí sen má baká betin nan tirunan iyá umpo arafan bantí ma siantan oriyaren ayanafá auu entave entave intin eraven ankaminten mino.”

^b15:24 Mat 10:6 ^c15:31 Mak 7:37 ^d15:32 Mat 14:14

³³Máa síkan eyo iyampon kayo ano véin tiamemí, “Ma vanta ída van kámá barafá ifo inte fáken ná minó ano kanaíen ma naren bereti kayo máderá máan nanin banta amenté tiferafuno.”

³⁴Máa síkan Yisasi evaránen betí ankan inaémi, “Nái máa veretí tiretí ankan dáke fono.”

Máa sen ina íkan betí ankan temí, “Dan manápá ifo afápá kan un kádan bereti vá manáa sitó noyana kayo vái van mino.”

³⁵Máa síkan Yisasi mai nanin banta van barará kumaneno síkan kumanen mino. ³⁶Kumamíkan béi mai yan manápá ifo afápá kan un kádan bereti vá noyana kayo vá máden Tiyarafenu susu siantáden kisiren bei eyo iyampon kayo amíkan máden banasi amen oreraen mino. ³⁷Amíkan minó nanin banta ano nákan amú kuriyaimpin eyo iyampon kayo ano antan o éke e éken uan dan manápá ifo afápá kan un kádan unan báen mino. ³⁸Mai yunan ma nein mai kamí kamí tauseni (4,000) vanta ifo anasi iyampon ída yankafen mino. ³⁹Narákan Yisasi mai nanin banta siantan orivin maen botifin un kumamen Makhadaní akhempá oren mino.

Farasisi Kayo Ano Ma Yisasin Nan Inaru Fáke Avúavá Aní Intin Onano Van Ein Baya Ino

(Maki 8:11-13; Ruku 12:54-56)

16 ^eFarasisi kayo vá Sadyusi kéká bá ano Yisasi vaintá eriven béin akhenóka uan onano van inaru fáke mana aní daná aní intí onano van béin inaeen mino.

²Ina íkan Yisasi evaránen betí ankan máa sen tiamemí,^{§§} “Inupasí íkan ma ayontá ma nararé íka maeyan inuran afe inten mino séiya ono. ³Inká ákurá ma onen nan ma sókon konan ma yampa maeya saréa uva intin á danten minon téiya ono. Ayontá ma afoká ein avúavá tiretí ankan ódeyan dáide afová éiya ompo saréa ma afoká iyain danasinta siretí ída yaimiya ono.” ⁴^fTaréa ma vain mai namu avúavá baran nanin banta vá Tiyarafenurá ída ákonaen monó tin nanin bantan báken ena ena aní daná aní intí onano van manan iyan ban mifo vetí ankan ída kanaíen mana aní daná onanten mino. Aní daná ma mana vetí onan nain mai sakhanampa vanta Yonani aní daná ana ino,” siren Yisasi vetin me ampiren oren mino.

Farasisi Kayo Vá Sadyusi Kéká Báí Yisi Fákena Vaya Ino

(Maki 8:14-21)

⁵Yisasi vei eyo iyampon kayo vá non akharun ekháden ena ufá oriyákan beni eyo iyampon kayo ano á úden ída vereti varen mino. ⁶^gOriven Yisasi máa sen betí ankan tiamemí, “Farasisi kayo vá Sadyusi kéká báí yisi vará daffan ná ákona ono.”

⁷Máa síkan beni eyo iyampon kayo ano vetiyan máa sen oreraemí, “Tetí ankan ma ída vereti varé erikheruna van mí véi mai vaya sen mino.”

⁸Betí ankan ma siyain baya Yisasi afová uren máa sen betin tiamemí, “Titó mumunan bain kéka soe, fará tiretí ma vereti ída manteona van baya siya rafono. ⁹^hTiretí ankan ídá afová ukhe fono. Dan manápá tauseni (5,000) vanta

§§**16:2** Manáa fefá ma uvantaré ein bompon dókifin ves 2 vá 3 vá ída varen mino.

***16:3** Yisasi ma enará ukhein daná ma variyain betí ída oman afová uren mumunan en mino.

^e**16:1** Mat 12:38; Ruk 11:16 ^f**16:4** Mat 12:39; Ruk 11:29 ^g**16:6** Ruk 12:1

^h**16:9** Mat 14:17-21

ano ma yan manápá bereti nara maeya antan dunan náí máa unan ná bíke fonó. ^{10j}Inká dan manápá ifo afápá kan un kádan bereti ma kamí kamí tauseni (4,000) vanta ano ma nara maeya antan dunan náí máa unan ná bike fonó. ¹¹Téi ída vereti van tiamiyá umpo fará tiretí ída afová iya rafono. Farasisi kayo vá Sadyusi kéká báí yisirá daffan ákona ono van mi séi siamiyá uno.” ¹²Máa síkan betí ankan iniren afová uren temí, “Béi ída veretifin ma kain yisi van tiyan mifo mai Farasisi kayo vá Sadyusi kéká báí kampun afova ma amiyain bayará daffben bano van mi siyan mino.”

**Pita Ma Yisasi Nan Tiyarafenu
Ano Ma Aní Ukhein Banta
Ono Ma Sein Baya Ino**

(Maki 8:27-30; Ruku 9:18-21)

¹³Yisasi ma Sisariá Piripai kayoi varafin ma oriven maen máa sen bei eyo iyampon kayorá inaemí, “Banta Anin nan banasi ano iye inó ten iniyan nafino.”

^{14j}Máa síkan betí ankan temí, “Manáa ano éi nan monó non péantan banta Yoni ino sin maen ena kéká ano Iraiya ino siyákan inká manáa ano sakhanampa vanta Yeremaiya fi áa mana ena sakhanampa vantafin banten mino siyan mino.”

¹⁵Máa síkan Yisasi vetí ankan inaemí, “Mai siretí ankan te nan iye inó té iniya rafono.”

^{16k}Máa síkan Saimon Pita evaránen temí, “Tiyarafenu ano ma aní ukhein bantan éi váke ayun para van oriyan ma vain Tiyarafenu Anin mono.”

^{17l}Máa síkan Yisasi evaránen béin tiamemí, “Yonin anin Saimoni oe, éi

amusin ná ono éin ída mana varará banta ano ma vaya aníen mifo inarurá ma sen Tifóe vain manon aní uanten mino. ^{18m}Aní uantákái séi máa sé éin tiamé uno. Éi Pitan† ban ná mai onámaná darói sesi vanasi ma mumunan iyain kéká o éke e éke uré átaru uan kaúdékun mai ma furin nanin banta ma o iyiyain barui ákona ano ída kanaíen mai kéká esantaren maman bararasí inten mino. ¹⁹ⁿInaru yafisin pintena ki kayo séi minó éin amenté umpo éi ná yanasá ma varará pákaan ákona intefo mai inarurá bá pákaan ákona inten mino. Pákaan ákona inten mifo éi ma ma varará ampinona yanasintan mai inarurá bá ampiantanten mino.” ²⁰Máa siren Yisasi veyan nan Tiyarafenu ano ma aní ukhein banta ino sen ena nanin banta ída siamino van bei eyo iyampon kayo airo ananí uanten mino.

**Yisasi Ma Veyan Púaren E Mantan
Nain Nan Ma Sein Baya Ino**

(Maki 8:31–9:1; Ruku 9:22-27)

²¹Mai ráké ma Yisasi e mantan Yerusalemí orintin ma ven aurá afoká inain daná máa vei eyo iyampon kayo siamen mino. Ánon banta kéká bá monó ánon banta kayo vá man baya ma afová ukhein banta kayo vá ayampin ma orintin béin pákaren namu arirí uren kamanini aruvin banta kéká ayampin kaintin aruan púdantin ma kanú manaú damusí intin maen evaránen aunan baren e mantanten mino.

²²Pita mai vaya iniren Yisasin aviren akhempá moren béin ákonaen asemí, “Bafan noe, Tiyarafenu ano ída vá áintin ma yaná ano en aurá afoká ino.”

†**16:18** Pitan nan *onámaná* ino sen mino.

^j**16:10** Mat 15:34-38 ^j**16:14** Mat 14:1-2; Mak 6:14-15; Ruk 9:7-8

^k**16:16** Yon 6:69 ^l**16:17** Kar 1:15-16 ^m**16:18** Yon 1:42; Efe 2:20

ⁿ**16:19** Mat 18:18; Yon 20:23

²³Máa síkan Yisasi yo vaéaren Pitán nan temí, “Ban Anon noe, soyampá entavono. Éi senti aan iyariya ono. Éi ída Tiyarafenui ineine ánain dakhafiya ompo varará bantai ineine ánain mi yakhafiya ono.”

²⁴^oMáa siren Yisasi vei eyo iyampon kayo máa sen tiamemí, “Mana vanta ano ma sen tínain bákurono ma sinten ná bei anunu ampintin barará erafuvintin ná bei yaa unkamádan mamaren ná ten tínain bákurino. ²⁵^pMai fara vara seyo, mana vanta ano ma vei aunan pákaan ákona ukharé intin maen mai veni aunan o afeyoranten mifo mana vanta ano ma se nan iniren ma vei aunan ampiádákaren maen mai ano vei aunan evaránen baranten mino. ²⁶^qMana vanta ano ma minó ma vara ráke yanasinta ana ma variyá intin ma veni aunan ma o afeyorantin maen intesá uren ná mai minó danasinta ano véin aya inten nafino. Intéa yaná pókesá banta ano evaránen bei aunan miyaní inten nafino. ²⁷^rPara vara seyo, Banta Anin mano ma ve Afóeni kákan kakhan má bei enisori kayo vá ma erin nain maí damúí vanasi ano ma variyá inona avúaváká ten mi yaíden mana mana miyan aminten mino. ²⁸Téi fura siré tiretí ankan tiamé uno. Ma ma saréa ma mantakheona kéká pinté ída manáa ano fúkesin mi Banta Anin mano kin an daven erinti onan nono.”

**Yisasini Minó Bukhafa Ma
Enará Ein Baya Ino**

(Maki 9:2-13; Ruku 9:28-36)

17 Dan manápá ifo afápá mana un kádan damú orivíkan Yisasi ano Pitán má Yemisin nú Yonin nú anavasan

má avíaren mana ayá anurá un baren mino. ²⁵Un baren betí ankan onákan Yisasin au ano enará iyain má ben auná ano áau ma kheiní íkan beni aúí daná ano efanten uron en mino. ³Máan tiyain má Mosesin nú Iraiya nú ano mairá afoká uven Yisasin má baya siyákan betí onen mino.

⁴Ódaren Pita máa sen Yisasin tiamemí, “Bafan noe, setí ankan ma mará banuna mai kama ukhen mifo éi iniresirá iyon baran namun kanú manaú téi uvarano. Mana en nina vantín mana Mosesin nina vantín inká ena Iraiyan nina vantín ino.”

⁵^tPita ma fara vaya siyákan maen mana fanu sikhein konan mano vetí ankan úkuan daran má darákan mai konan pinté mana vaya ano máa semí, “Ma sen Tanin mino. Téi ve nan moeké tinunu iyá uno. Téi venan timusin iyá uno. Ben avaya vá ineno!”

⁶Mai vaya ma vetí ankan iníden akhokho van iyan barará baven auná bara finén mino. ⁷Máan tiyákan Yisasi vetíí ádé eriven au aruviyáken temí, “Tiretí ankan ída vá akhokho van eya orun mantano.” ⁸Máa síkan betí ankan orun mantaven onákan Yisasi má ída mana ano van beya ana varen mino.

⁹Betí ankan ma anuyon me ampiren eriyákan maen Yisasi ákonaen betín tiamemí, “Ma yaná ma siretí ankan oneona mai ída vá mana nanin banta siamikhessin ná Banta Anin ma van oriyán ma fúaren purín pinté e mantavintí vá tiameno.”

¹⁰^uMáa síkan eyo iyampon kayo ano véin inaemí, “Paraé tiren ná man baya ma afová ukhein banta kayo ano Iraiyan nare vá erivintín ná ino sé iyan nafino.”

^o16:24 Mat 10:38; Ruk 14:27

^p16:25 Mat 10:39; Ruk 17:33; Yon 12:25

Pro 24:12; Mat 25:31; Rom 2:6; Rev 22:12

Íbo 2:7; Ais 42:1; Mat 3:17; Mak 1:11; Ruk 3:22

^q16:26 Mat 4:8-9

^r16:27 Íbo 62:12;

^s17:2 2Pi 1:16-18

^t17:5 Diu 18:15;

^u17:10 Mar 4:5

¹¹Máa sen ina íkan béi evaránen temí, “Mai fura vaya ino. Iraiya eriven minó daná evaránen puntáádanten mino. ¹²vPuntáádanten mifo séi siretin tiamé uno. Iraiya fefái erikhan minó nanin banta ano ída véin afová en pasen betí anunu ánain dakhafen béin aurá ara ara namu avúavasíen mino. Máan avúavá anan Banta Anin aurá inten mino.” ¹³wYisasi ma máa siyákan maen betí ankan afová en monó non péantan banta Yoni van mi siyan mantino sen inen mino.

**Namu Aunan Bá Ein Iyampon
Ma Yisasi Ayofein Baya Ino**

(Maki 9:14-29; Ruku 9:37-42)

¹⁴Betí ankan ma vanasi vaintá erákan maen mana vanta ano Yisasi vaintá me aron kanan durafúden mátimen temí, ¹⁵“Bafan noe, éi sen tanin nan arunan uantano. Béi auyayaní uaren kokhon damú irafin kákiyan non ádiyan iyá uno. ¹⁶Ei eyo iyampon kayo vaípa avían morékun maen betí ankan ída kanaíen béin ayofaríen mino.”

¹⁷Máa síkan Yisasi evaránen tiamemí, “Tiretí ankan ída mumunan ukheona nanin bantan banan mi siretíí ineine vá avúavá bá ída funtáken mino. Nái máa yamusá téi siretin má para vante rafuno. Nái máa yádasá téi siretíí uman evaráné bariyá bante rafuno. Mai iyampon avire séi varunará ereno.” ¹⁸Máa síkan mai iyampon avían meran Yisasi mai namu aunan ákonaen asiyain má me ampiren orivíkan beni aí kípen mino.

¹⁹xMáan turákan ínainpáké beni eyo iyampon kayo ano ana aúpáké béi vaintá

eriven inaemí, “Pará tetí ankan ída kanaíé namu aunan do siantiya rafuno.” ²⁰⁻²¹yMáa síkan béi evaránen betí ankan tiamemí, “Tiretíí mumunan tító máan bákayai ída kanaí iya ono. Téi fura siré tiretin tiamiyá uno. Para vara seyo, siretíí mumunan mano ma mastati yaa aran aú an den ma sító suron ma vantiya mai siretí kanaíeya ma anuyon nan ma mesapá e afáne orono ma sesin maen orinten mino. Máan tiyasin maen mana yaná ano siretimpin ída kanaíen uman danten mino.”[‡]

**Yisasi Veyan Ma Fúaren E
Mantan Nain Nan Ma Kan
Dádasí En Tein Baya Ino**

(Maki 9:30-32; Ruku 9:43-45)

²²zBetí ankan ma Karirí barafá o átaru uvin maen Yisasi máa sen betin tiamemí, “Banta Anin avían namuro kayo ayampin aminten mino. ²³Amirantín ma véin arintin púkaren maen kanú manaú damusí ma intin e mantanten mino,” síkan eyo iyampon kayo ano mai vaya iniren arunan en oreraen mino.

**Kákan Monó Namun Ayain
Moní Ma Karúdan Baya Ino**

²⁴aÍnainpáké Yisinin má bei eyo iyampon kayo vá ano Kapeníamú barurá onóbíkan monó namun ma ayain moní ma varan banta kéká ano eren me Pitan máa sen inaemí, “Tiretíí arú ano kákan monó namun ma ayain moní amé iyan nafino.”

²⁵Máa sen ina íkan Pita evaránen temí, “Eyo amé iyan mino.” Máa siren ma Pita mápin un pében ída vaya sikhhan

[‡]17:20-21 Manáa vompon dókifin ena vaya ves 21 fin máa sen asotú ukhen mino: *Máan namu aunan mano ída fara orinten mifo yunan ma auraren amúkin manan oré iyan mino.*

v17:12 Mat 11:14 w17:13 Ruk 1:17 x17:19 Mat 10:1

y17:20-21 Mat 21:21; Mak 11:23; Ruk 17:6; 1Ko 13:2 z17:22 Mat 16:21

a17:24 Eks 30:13; 38:26

maen Yisasin nare véin inaemí, “Saimoni oe, éi inte é teyá iniya fono. Ma vara ráke kin kayo ano ara sákisi iyen pinten ná baré iyan nafino. Betíi kéká pinten ná baré iyan nafi áa ena kéká pinten ná baré iyan nafino.”

²⁶Máa sen ina íkan Pita evaránen temí, “Ena kéká pinten nan baré iyan mino,” síkan Yisasi véin tiamemí, “Máan tukhan mi vetíi kéká ano ída vetíi sákisi amé iyan mino. ²⁷Máan té iyan mifo vetin aran amétifa nampo araveya vá morun non akharumpin úku karúdeya esé ma arinona noyana oo yavódeya vá mai oofentena ma onanona monisá bareya kákan monó namun ma ayain ná erasantina mun ameno,” síkan mai ma seiní uren bare mun amen mino.

Inaru Yafisimpin Iyé Kákaní Inten Nafino Ma Sen Ina Ein Baya Ino

(Maki 9:33-37; Ruku 9:46-48)

18^bMaí damú eyo iyampon kayo ano Yisasi vaintá eriven máa sen inaemí, “Inaru yafisimpin iyé kákaní inten nafino.”

²Máa síkan Yisasi mana arará iyampon aran eríkan betin aúbaná avían manten mino. ^{3c}Avían mantaren máa semí, “Téi fura siré tiretin tiamiyá uno. Tiretí ma ída evaráne arará iyampon kayo an ma yanteya mai ída kanafeya inaru yafisimpin orin nono. ⁴Máan tukhantín mi iye anó beyan maman bararasí uren ná ma iyampon arará an ma yiyaré inain manon inaru yafisimpin kákaní inten mino.

^{5d}“Inká iyé ten nan iniren ná mana máan tukhein iyampon arará aya inten nafi mai sen mi siya inten mino.

Umeíin Avúava San Ma Yafíken Ban Baya Ino

(Maki 9:42-48; Ruku 17:1-2)

⁶Máan tinten mifo ma iyampon arará kayo finté mana ano ma sentá mumunan ukharé intin ma mana vanta ano ma vetin maman umefin kaintin ma eraven ankantaré intin ínainpá mai vanta moékan uman baran nafo véin amepin ná kákan konkamú onámaná kureya vá un nompin karúdan námen aravunen ná non ufuren purino.

⁷“Intéa vanta anó ena kayo e yarifaa umefin kain ná eraven ankamiyan nafi mai kayo ano kákan uman uron mi varanten mino. Mai namu avúavá afoká inten mifo iyen banta fintesá mai yaná afoká inten nafi mai anon kákan uman uron baranten mino. ^{8e}Éin ayan arantan mano ma e yarifaan umefin ma kaintiya vá mai yo síkareya karúdan ná orino. Mana ayan má mana arantan má ana ma varéintiya mai ída furin ayun ma van oriyan ban aunan baran nono. Míkanan ayan má arantan má ma vantiya ma umeí ukharé inte mae mai ída kípan irafin mi karúdanti orin nono. ⁹Éin auu ano ma e yarifaan umefin ma kaintiya vá mai auu yo vían karúdan ná orino. Mana auu ana ma varéintiya mai ída furin ayun ma van oriyan ban aunan baran nono. Míkanan auu ma vantiya ma umeí ukharé inte mae mai ma íra khiyan ma uman baren berai siyan purin barufin mi karúdanti aravin nono.

^{10-11f}“Ma arará^g kayo fintena siretí ankan oman tító danasí inampo yafían ná ákona ono. Inaru fáké betíi enisori

^g18:10-11 Arara se ma sikhein mai varará kusen ban ma ída auu varan mumunan iyain kayo fi áa arará iyampon kayo varafin tikhen mino.

^b18:1 Ruk 22:24 ^c18:3 Mat 19:14; Mak 10:15; Ruk 18:17 ^d18:5 Mat 10:40; Ruk 10:16; Yon 13:20 ^e18:8 Mat 5:29-30 ^f18:10-11 Ibu 1:14

kayo ano ena ena inarufá ma vain Tifóen avorái váé iyan mino.[§]

**Sipisipi Afeyorantá
Ma Sian Báédan Baya Ino**

(Ruku 15:3-7)

¹²“Tiretí ankan inte esá té iniya ra-fono. Mana vanta ano ma mana antareti sipisipi yakaré intin mai fintena ma mana afeyóbintin maen mai van ídá dos-inten nafino. Ídá nainti naini (99) me khaintin anurá bantín ná mai mana sipisipi ma afeyókein nan dosinten nafino.

¹³Dosiren ma avíaren mai mana sipisipi van ma amusin inain manon nainti naini (99) sipisipi ma ída afeyoran para vain nan ma amusin inain esantanten mino.

¹⁴Máan manan en tiretí Afóe ma inarufá bain mano ma arará kayo fintena ída mana afeyorano van inikhen mino.

**Mumunan Ayofi Afá Aváeyan Mano
Ma Umeí Uantádanti Ma
Funtaran Nona Fákena Vaya Ino**

¹⁵g“Mumunan ayofi afá aváe ano ma en nina yaná ma aúí uran tiya vá éi vempákesá béin o avíde vá beni namu avúava san tiamíde aúpasá tirékan puntarano. Puntaresin ma eni vaya ma véi ininti mae vá mai éi ei mumunan afá aváen mi evaráne avire ono. ¹⁶hAviran nampo véi ma eni vaya ídá ininti mae vá “mana vanta fi kan banta fi avíareya oresin ná kan mano fi kanú manaú ano fi vá mai vaya mo iníden puntarano.” *Diu 19:15*

¹⁷Máan tesi ma véi ída vetíi vaya ma inintiya vá mumunan nanin banta siamesin ná mai vaya iniren puntarano.

Puntarantin ma ída inintiya vá mai véin maman ída mumunan bain banta kayo vá takisi varan banta kéká bá an dakhen mino vá tire onano.

¹⁸i“Téi fura siré tiretí ankan tiamé uno. Inte yanasá ma varará pákaan ákona intefo mai inarurá bá pákaan ákona inten mifo éi ma ma varará ampinona yanasintan mai inarurá bá ampiantanten mino.”

¹⁹j“Téi evaráne tiretin tiamé uno. Ma varará ma kan mano ma mana yaná barano van ma ará manafiní ureya ma amúkesin maen te Sifóe ma inarufá bain mano siré kanan aminten mino. ²⁰Para vara seyo, kan nafi kanú manaú ano fi ma sen tivíká ma átaru intí maé mai séi vetin aúban banté uno.”

**Ída Ena Van Arunan Uantan
Doran Bantai Avúavá Baya Ino**

²¹Mairá Pita eriven Yisasin máa sen inaemí, “Bafan noe, sífá tiváe ano ma aúí usintádanti maé mai náí máa yádasá béin tirá amente rafuno. Dan manápá ífo afápá kan un kádan dádasa fino.”

²²kMáa síkan Yisasi evaránen béin tiamemí, “Téi ída seveni yáda se sé éin tiamikhé uno seventi taims seveni (70 x 7)** yáda sen tikhé uno.††

²³“Máan tukhein nan mi mana kin pintena ma vei yoran banta kéká ano ma manáa moní mantáin ma evaránen barano van ma funtaré iyainíi inaru yafisin ukhen mino. ²⁴Tiyan míkan miri-
oni moní ma mantaré ein banta nare funtarano van béi vaintá aviren eren mino. ²⁵Meran mai vanta ano ída kanaíen mai moní evaránen amiyaimpin kin mano

§**18:10-11** Manáa Tiyarafenui vompon dókifin ves 11 asotú en máa sikhen mino: *Afeyóká ein kayo yosiré avirano van mi Banta Anin mano erikhen mino.*

****18:22** Áa seventi seven

††**18:22** Seventi taims seveni mai ena ena yamusá ume ampiente oriya vano.

§**18:15** Ruk 17:3; Kar 6:1 ^h**18:16** Yon 8:17 ⁱ**18:18** Mat 16:19; Yon 20:23

‡**18:19** Mak 11:24; Yon 15:7 ^k**18:22** Ruk 17:4

vei yoran banta siamemí, ‘Ma vanta vá be aná akhá bá bei minó danasinta vá sarí uresin miyaní uaranti vá tesi moní máa ovaráne simeno.’

²⁶“Mai yoran banta ano ma mai vaya iniren kin arantampin mo aron kan durafúden mátimen ínanen inaemí, ‘Éi se nan arunan usintádeya sive ukhesirá éin pinte ma mantáeruna moní máa evaráne anona ameno.’ ²⁷Máa síkan mai kin mano vei yoran banta van arunan uantáden ifáin oren mino.

²⁸“Ifá uantádan mai yoran banta ano e khuven barufá aravuken onákan bei mana yoran banta eríkan ben amen bana oo fákaan ákona uaren máa sen tiamemí, ‘Éi ma sen pinte mantaré eona moní máa anona aine simeno.’

²⁹“Máa síkan bei mana yoran banta ano mai vaya iniren aron kan durafúden mátimen ínanen inaemí, ‘Éi se nan arunan usintádeya sive ukhesirá éin pinte ma mantáeruna moní máa evaráne anona ameno.’

³⁰“Máa síkan maen mai vanta ano ída inin na vei mana yoran banta aviren mo karavusifin kaurantin báken bei moní evaránen anona amino van karavusifin mo khaen mino. ³¹Minó bei mana yoran banta kéká ano véi ma varein avúavá ódaren kákantá ará namu uren mai vaya kin mo siamen mino.

³²“Mo siamíkan kin mano mai yoran banta aran eríkan máa sen béin tiamemí, ‘Éi namu yoran banta ono. Éi ínane séi vaípa inaen ná maéi éi ma mantaré eona moní máa mo ifá uanté uno. ³³Téi ma en nan tirunan uanterunaí eya éi fará ei mana yoran banta van ída arunan uante fono.’ ³⁴¹Máa síkan kin mano aran má tíkan karavusirá ma yafisin banta kéká ano mai yoran banta e fáken mo khaintin báken béin pinte ma mantaré

ein moní máa anona evaránen amino van en mino.

³⁵^m“Tiretí ankan ma mununan afá aváeyan má ayó má báí ume ma ída fura seya aúkáké ampianiyaré esin maen te Sifóe ma inarufá bain mano mai avúavasi anan tiretin uantanten mino.”

Ábasu Ma Yurafurin Avúavá In Baya Ino

(Maki 10:1-12; Ruku 16:18)

19 Yisasi ma mai vaya kayo sian kípáren Karirí bara me ampiren e manten Yodení non e kháden Yudiá barafá oren mino. ²Oríkan kokhon nanin banta ano ven bákuren orin maifin ma aí bá ein kéká ayofen mino.

³Ayofiyákan Farasisi kéká ano Yisasi vaintá eriven béin mákáan onano van betí ankan máa sen ben inaemí, “Éi inte esá té iniya fono. Man baya ano kanaé tikhan ná banta ano vei anunurá be aná tiantanten nafino.”

⁴ⁿMáa síkan Yisasi evaránen betin tiamemí, “Tiyarafenu ano esé araiintá ma vanta vá anasi vá ma uvantá ein tiretí ankan ídá bompon dókifin dankádé afová ukhe fono. ⁵^oMai van mi vanta ano ve anóe afóen me ampiren be aná bá o súpá en mana vukhafái é iyan mino.’ *Esé 2:24*

⁶Máan tukhein nan mi míkánan ída kanaí ukhen mifo mana vukhafái ukhen mino. Mai van mi Tiyarafenu ano ma vékan maman túpá uran nain banta ano ída yurafurinten mino.”

⁷^pMáa síkan Farasisi kéká ano véin evaránen inaemí, “Pará Mosesini man baya ano sen ná banta ano vá bompon uvaman e aná amídeya vá tiantano sikhén nafino.”

⁸Máa síkan Yisasi evaránen betí ankan tiamemí, “Tireti aú avétan in kékái

¹18:34 Mat 5:25-26 ^m18:35 Mat 6:15; Mak 11:25; Efe 4:32; Kor 3:13

ⁿ19:4 Esé 1:27; 5:2 ^o19:5 Efe 5:31 ^p19:7 Diu 24:1-4; Mat 5:31

vanan mi Mosesi kana ino sikhaya anasi siantiyare ompo esé araíntá ída mai avúavá baren mino. ⁹ Téi siretí ankan tiamiyá uno. Mana vanta aná ano ma ída ena vanta yarifen non nain ma véin tiantáden ma ena nanin baranten maen mai vanta ano ena ana safi avafun nafi ma vare non avúavái varen mino.”

¹⁰ Maa síkan eyo iyampon kayo ano mai vaya iniren Yisasin tiamemí, “Tiyarafenu ma esé araíntá ma sikhá ein baya ánain dakhafin ma uman dakhantin maen mai vanasi ano ída vá ábusuí ino.”

¹¹ Yisasi evaránen betí ankan máa sen tiamemí, “Ída minó ano ma vaya kanaíen ininten mifo Tiyarafenu ano ma manáa nanin banta ákona amikhein mai kayo ano anan mai vaya ánain dakhafinten mino. ¹² Para vara seyo, manáa iyampon avankan namu ukhein kaé iyan mino. Inká manáa vanta ano avankan do visiyan maen inká manáa ano inaru yafisin pintena yorarí ono van anasi varan airo ananí uren báé iyan mino. Máan tukhen mifo vanta ano ma ma vaya kanaíen ma inin nain mano vá mai ánain dakhafino.”

Yisasi Ma Arará Iyampon Arintan Avu Uantein Baya Ino

(Maki 10:13-16; Ruku 18:15-17)

¹³ Maa sirákan Yisasi ayan ánontá kaúden amúkuantano van banasi ano arará iyampon arinta aviren eríkan maen eyo iyampon kayo ano vetí ankan ákonaen asen mino.

¹⁴ rAsiyaimpin Yisasi máa semí, “Tiretí ankan áesin ná arará iyampon arinta se vaípa erino. Tiretí ída vá betin ayópá ono inaru yafisin mai arará iyampon arinta kayo an ma yákein nanin banta ina ino.” ¹⁵ Maa siren iyampon arinta ánontá

ma véi ayan kaúden avu uantáden maen mai varu me ampiren oren mino.

Kokhon Ona Ma Vain Pumara Vantai Vaya Ino

(Maki 10:17-31; Ruku 18:18-30)

¹⁶ Oríkan mana vanta ano Yisasi vaintá eriven temí, “Aru soe, séi inte avúavasá kama urerá ayun ma fara van oriyan ban aunan barante rafuno.”

¹⁷ sMaa síkan Yisasi evaránen béin tiamemí, “Pará kama avúava sinta van téin ina iya fono. Tiyarafenu veyáká anan kama ukhen mifo éi ma ayun para van oriyan ban aunan ma varano sinte vá Tiyarafenui man baya kayo ánain ná dakhafono.”

¹⁸ Maa síkan mai vanta ano Yisasin in-aemí, “Inte man baya kayo vará éi siya fono.”

Síkan Yisasi evaránen béin tiamemí, “Máan ma sikhein man baya kayo van mi siyá uno.

‘Tiretí ankan ída vá ena nanin banta aruan purono.’

‘E ábasu ano ída vá ena ana safi avafun nafi vare nono.’

‘Tiretí ída vá umoyan barano.’

‘Tiretí ída vá kampun tireya ena nanin banta kó tiantano.’

¹⁹ ‘Tiretí ankan anóe afóeni aránaopa sá oreya vetin oo vá daiyono.’ *Eks 20:12-16; Diu 5:16-20*

Inká ‘eyan nan ma anunu iyaonaíe vá ena van anunu ono.’” *Riv 19:18*

²⁰ Maa síkan mai fumara ano semí, “Téi minó mai man baya kayo ánain dakhafiyá umpo mai ena inte man baya ánain ná dakhafonte rafuno.”

²¹ Maa síkan Yisasi evaránen béin tiamemí, “Éi ma funtákeiní uron ma ono vará minó ei ona mo sarí ure vá ona ma ída van nanin banta vá mai moní ameno. Éi ma máan tinteya enina

inarurá kokhon kama yana suron banten mifo éi ere sen bákurono.”

²²Máa síkan mai fumara ano kokhon ona yákaren pasen mai veya iniren anomé inivaen ifá en oren mino.

²³Orivíkan Yisasi vei eyo iyampon kayo máa sen tiamemí, “Téi fura siré tiretin tiamé uno. Kokhon ona ma vain banta kayo ano ma inaru yafisimpin ma orin mai uman dakhen mino. ²⁴Téi enádá bá evaráné tiretin tiamenté uno. Kameri ano ma ufi aimpin ma ódin mai uman dakhen mifo kokhon ona ma yákein kéká ano ma Tiyarafenui yafisin barufin ma ódin mai moéken uman mi yakhen mino.”

²⁵Máa síkan eyo iyampon kayo ano mai veya iniren anúden oreraen temí, “Máan ma ukhantín maen mai iye ná Tiyarafenu ano kanaíen aviranten nafino.”

²⁶Máa síkan Yisasi vetin auufen kakháben temí, “Minó banta ano ída kanaí inten mifo Tiyarafenu ano veyáká anan kanaíen minó danasí inten mino.”

²⁷Máa síkan Pita evaránen temí, “Ineno minó daná teti me ampíré éin bákuriyá umpo mai setí ankan ena náí yanasá bará tifante rafuno.”

²⁸Máa síkan Yisasi evaránen betin tiamemí, “Téi fura siré tiamiyá uno. Ínainpá ma minó daná ma auyení uvintín maen Banta Anín mano ma kákan bí mamaren bei kin karáká ma kumanín nain damúí sen tínain ma vákure nóinona vanta kéká ano sirantan kan orun kádan (12) kama ukhein kini karáká kumameya sirantan kan orun kádan (12) Isarerí anantá dafisin nono. ²⁹Inte kéká anó ten tivi san iniren ná be ama safí afá aváen nafi ayofín nafi ve anóe afóen nafi^{‡‡} inká be akhafana fi yunan ana fi ma me ampikharéin nain

kéká anon ena antareti yádá bá (100) máden inká ayun ma fara van oriyán ban aunan má baranten mino. ³⁰vBaranten mifo saréa ma esé an ma vain kayo ano ínainí intín maen anona ínain ma vain kéká ano un aní inten mino.

Uvaini Yunan Anafin Ma Yoran Banta Kékáká Ma Ovaéádan Baya Ino

20 “Para vara seyo, inaru yafisin mai máan mi ukhen mino. Mana vanta ano vei uvaini yuna anafin dorano van banta kayo avirano van pe ákurá e manten oren mino. ²Mai vanta kayo van maná damúke na miyan amenté uno síkan kana ino sin betín tiantan uvaini yunampin dorantá oren mino.

³“Nain kiroki inafá mai kákan banta ano oriyaren o onákan banasi ma átaruiyain barurá manáa vanta kéká ano fara mantakhen baren mino. ⁴Mantakharé íkan béi máa sen betín tiamemí, “Tiretí ankan má dere oreya senti uvaini yunan anafin mo yoriyaréesí maé puntádé miyan amenté uno. ⁵Máa sin mai kéká orivíkan mai kákan banta ano vayan bero vá inúpá kanú manaú áaurá bá evaránen máan mana en mino. ⁶Inúpáké dan manápá áaurá béi oriyaren o onákan manáa vanta kayo fara mantakhen baré íkan béi máa sen betí ankan inaemí, ‘Náisá ukhayá ma áau ayá ayá pasavi mantakhé ba rafono.’

⁷“Máa síkan betí ankan evaránen béin tiamemí, ‘Mana vanta ano ída setín dorán timikhái vá tiféuno.’

“Máa síkan mai kákan banta ano vetín tiamemí, ‘Tiretín má dere oreya senti uvaini yunan anafin mo yorano.’

⁸w“Máa siran doriyaréin ma inúpasí íkan maen mai uvaini yunan anan afóe ano vei yorantá ma ayafaí ukhein banta

‡‡19:29 Manáa vompompin anóen narafi áa vanta aná barafín tikhen mino.

^t19:26 Yop 42:2 ^u19:28 Mat 25:31; Ruk 22:30; Rev 3:21

^v19:30 Mat 20:16; Ruk 13:30 ^w20:8 Riv 19:13; Diu 24:15

máa sen tiamemí, ‘Taréa ínaimpáké ma me yorein kéká nare vá arái eya miyan ame ore ore vá esé ma me yorein kéká tasore ínaimpasá mo ameno.’

⁹“Inúpáké dan manápá áaurá ma me yorein kéká ano nare eriven maná damúkáke miyan puntáden mana yanka mádú mádú en mino. ¹⁰Mamaran pe ákurá ma me aráfen dorein banta kéká ano eriven tetí ankan kokhon moní i varanté uno siren iyaren mifo vetin má dere funtáden manaí ukhein miyan manan baren mino. ¹¹Mai moní ma máden ódaren maen dunan afóen máa sen kouánten mino, ¹²‘Tare ínaimpa suron ma erein banta kéká ano mana áaurá me yódayai setin má manaí miyan amiya ompo seti fe ákura suron mi me ákonaé doriyákon kákan á tikhakhen mino.’

¹³“Máa síkan dunan ana afóe ano mai vaya iniren mai yoran banta kéká pintena mana vanta evaránen tiamemí, ‘Tirona oe, séi ída namu iyá uno. Esé dorano van ma iyan ná ma maná damúkáke miyan nan ina éku mae ídá kana ino sikhare fono. ¹⁴Ei miyan mamareya orono. Tesi sinunurái ínaimpá ma erein banta kayo vá manaí miyan amiya uno. ¹⁵Mai sesina yaná ifo ídá tesi sinunurá tesi moní daimonte rafuno. Téi ma ma vanta kayo kama avúavá uantiyaruna vará éi ará namu uantiya fono.’

¹⁶“Máan tukhanti mi ínain ma vain kéká ano esé un aní intin maen esé ma aní ukhein kayo ano ínainí inten mino.

**Yisasi Veyan Ma Fúaren E Mantan
Nain Nan Ma Kanú Manaú
Dádasí En Tein Baya Ino**

(*Maki 10:32-34; Ruku 18:31-33*)

¹⁷Yisasi ma Yerusaremí ódiyáken maen tiyan míkan mifo sirantan kan orun kádan (12) bei eyo iyampon máa

aviren mo áupá kaúden betí ankan máa sen tiamemí, ¹⁸⁻¹⁹y“Taréa setí ankan ma Yerusaremí ódé tifékun maen manáa kéká ano Banta Anin avían monó ánon banta kéká bá man baya ma afová ukhein banta kayo vá ayampin ma amintin maen béin aruan purino van monó namuntá ma yafíkein kéká ano ena anan banta kéká ayampin aminten mino. Máan turantin béin máká maákká uren intiren dafiyopó ankáden daa unkamádantá arintin púkaren kanú manaú damusí ma intin evaránen e mantanten mino.”

**Yonin Nú Yemisin Nú Anóe Ano Ma
Yisasin Mana Inaein Baya Ino**

(*Maki 10:35-45*)

²⁰Ínaimpáké Sebetin anin kanan Yemisin nú Yonin nú anóe ano vékan má Yisasi vaintá eriven me aron kan durafúden mátimiyen be anin kan nan Yisasi arunan uren ayaino van inaein mino.

²¹z“Máa síkan Yisasi véin inaemí, “Éi náí nasará iya fono.”

Síkan mai nanin mano Yisasin tiamemí, “Ei yafisimpin kaná áesin ten tanin kanan mano en ayan kurompá mana ano kumanintin ná ayan ópá mana ano kumanintin inten nafino.”

²²a“Máa síkan Yisasi mai vaya iniren evaránen tiamemí, “Tiretí ankan ma séin ina iyaona yaná ída afová ukha ono. Téi ma varanuna uman kanaisá é tiretí ankan má barante rafono.”

Máa síkan béin evaránen tiamemí, “Berasan kanaí é baranté uno.”

²³Máa síkan Yisasi vékanan tiamemí, “Pura ino. Tiré kanan ten ma varanuna uman baran nompo iye anó ten tiyan kurompá kumanintin ná tiyan ópá kumanintin ná inten nafi mai ída sen tina

*20:16 Mat 19:30; Mak 10:31 y20:18-19 Mat 16:21; 17:22-23

z20:21 Mat 19:28; Ruk 22:30 a20:22 Mat 26:39; Yon 18:11

yaná bain iyáantanté uno. Mai kará ma vain mai ma Sífóe ano ma aní ukhein kéká inan puntáádan ban mino.”

²⁴ Be anavasan mano ma Yisasin inaein baya van tiyan míkan eyo iyampon kayo ano iniren békan anan uanten mino. ²⁵ ^bMáan tiyákan Yisasi vetin arákan be vaintá erivin máa semí, “Tiretí ankan afová ukha ono. Ena anan nanin banta kayoi kin kéká bá kákan banta kayo vá ano vei kékáká ída kama yafisirí iyáken maen betíi vaya ánain bákurino van duvun en arirí é iyan mino. ²⁶ ^cMáan té iyan mifo siretimpin ída vá mai avúavá bano. Tiretin pinté iye anó kákan bantaí ono van inten nafi mai ano vá tiretíi yoran bantaí intin ná ²⁷ inká iye anó esesí ono van inten nafi mai ano vá tiretíi ída miyan ban doran bantaisá ino. ²⁸ ^dMáan manan en mi Banta Anin ma erikhein mai vanta ano ven ayain dorarí ino vara erikhen naifo véi ano vetin ayaen bei aunan betin amiré kokhon nanin banta evaráné miyaní ono van mino.”

**Auu Yufúkukhein Bantá Kanan
Auu Ma Kama Ein Baya Ino**

(Maki 10:46-52; Ruku 18:35-43)

²⁹ Yisasin má bei eyo iyampon kayo vá ma Yerikó baru me ampiren oriyain má kokhon nanin banta ano Yisasin bákuren oren mino. ³⁰ Oriyákan kankanan auu yufúkukhein bantá kanan mano aa akhempá kumantaren iníkan Yisasin nan eriyán mino siyaimpin avádóden oovararen temí, “Bafan noe, Devitin Anin mompo verasan nan arunan usintano!”

³¹ Máa sen oovarákan banasi ano iniren míkan nan baya fákano síkan mifo míkanan mano moéken avádóden oovararen temí, “Bafan noe, Devitin

Anin mompo verasan nan arunan usintano!”

³² Máa síkan Yisasi mairá o mantaven míkan nan araaren inaemí, “Téi náisá tiré kanan uantano vará iya fono.”

³³ Máa síkan míkanan mano evaránen béin tiamemí, “Bafan noe, verasan tuu marano van muno.”

³⁴ Máa síkan Yisasi vékan nan arunan uren auu aruviyain má manadá auu kama uvin auu máben oniyáken Yisasin bákuren oren mino.

**Yisasi Ma Kin An Daven
Yerusaremí Ódein Baya Ino**

(Maki 11:1-11; Ruku

19:28-40; Yoni 12:12-19)

21 Yisasin má bei eyo iyampon kayo vá oriyaren Yerusaremí áde Orifí anurá Betfasí barurá o unen mino. O unaven Yisasi vei eyo iyampon kanan tianten ² temí, “Tiré kanan mesan barurá oresin ma mana donkin ma ayan nan kuran tin arará bá ma van nain ná ayan nan utúde vá míkanan avire se varunarásá ereno. ³ Eresin ma mana ano ma manáa vaya ma sinti vá tiré kanan máa ná teno, ‘Míkani yoran Bafampin ban mino’ ma sesin maen ainen mi siantanti avire erin nono.”

⁴ Máan ma ein manon pefá ma sakkanampa vanta oo ráké uaren ma máa sikhá ein mi kanaíen mino.

⁵ “Saioní nanin banta siameno.

‘Onano. Tiretí ankani kin mi eriyán mino.

Béi mana donkin ané kumamen aví ída van banta an daven eriyán mino.

Béi maen mana ané ída kumantá ein donkin amaniná kumamen eriyán mino.” *Sek 9:9*

⁶ Eyo iyampon kanan mano oren mai ma Yisasi siameiní mo en mino. ⁷ Máan turen mai donkin kan aviren meran betíi

ayá au anamun daváden arará donkin ané kaúdan Yisasi mai yaró kumamen mino. ⁸Kumamen oriyákan kokhon nanin banta ano au anamun daváden aasá uvisen orin inká manáa ano yaa ayan tikariyan uvisen orin en mino. ⁹Máan tiyákan kokhon nanin banta ano Yisasin aufá orin oyampá erin iyáken máa sen oovaremí,

“Devitin Anin avisá daní ino!”[¶]

“Bafan aviká ma eriyain banta vá avu uantano!” *Íbo 118:25-26*

“Dan uron ma vain Tiyarafenu avisá daní ono!”

¹⁰Yisasi ma Yerusaremí barufin ódiyain má banasi ano anúden oreraen máa sen inaemí, “Ma vanta iye fino.”

¹¹Máa sen ina íkan mai ma oriyaré ein nanin banta ano semí, “Kariri varafá ma vain baru Nasaretíke sakhanampa vanta Yisasi ino.”

**Yisasi Ma Kákan Monó Namun Pinte
Ma Mínó Daná Sariin Banta
Kayo Yo Siantein Baya Ino**

*(Maki 11:15-19; Ruku
19:45-48; Yoni 2:13-22)*

¹²Yisasi monó dafufin un pében ona ma sarí iyá ein banta kayo sianten mino. Moní ma arun miyan ma nun kayo yáken sarí iyaré ein takhó bá kará kayo vá béi vanaan karúdan oreraen mino.

¹³Banaan karúdiyáken máa sen betin tiamemí, “Tiyarafenui vompon dóki ano máa sikhen mino, ‘Banta ano séin tima san amúkin namun nen tinten’ *Ats 56:7* mifo siretí maman ‘umoyan banta kéká amasíi’ iya rono. *Yer 7:11*

¹⁴Máan turen Yisasi kákan monó namumpin bákan auu yufúkukhein kéká bá arantan ma namu ukhein kayo vá ano véi vaintá eríkan kama uanten mino.

¹⁵Máan tiyákan monó ánon banta kéká

bá man baya ma afová ukhein banta kayo vá ano mai ma véi enará ukhein danasinta ma variyain oniyákan mai monó dafu finté iyamporinta kayo ano máa sen oovariyamí, “Devitin Anin avisá daní ino!” Máa síkan betí ankan ará namuen mino.

¹⁶Ará namu iyáken Yisasin inaemí, “Ma iyamporinta ma siyain baya inká iniya nan nafino.”

Síkan Yisasi evaránen betin tiamemí, “Eyo séi iniyá umpo ‘minó arará iyamporinta anon éin avi daní é iyan ne’ *Íbo 8:2*

ma sikhein baya siretí ankan ídá Tiyarafenui vompon dóki fintena yankáke rafono.” ¹⁷Máa siren béi Yerusaremí bá betin má me ampíren mai inuran Betaní barurá o varen mino.

**Yisasi Ma Fiki Yaa Ana Asin
Ma Kafurein Baya Ino**
(Maki 11:12-14, 20-24)

¹⁸Pe ákura suron Yisasi e mantaaren Yerusaremí evaránen oriyá íkan arafan puren mino. ¹⁹Arafan puríkan béi onan mana fiki yaa ana aa akhempá baré íkan ádé oriven mai anafin onákan ída mana aran iren mifo anaa ana variyain baré íkan béi mai fiki yaa ana van temí, “Éi ída vá enádá bá aran irano!” Máa siyain má mai yaa ainen kafuren mino.

²⁰Kafuriyain má eyo iyampon kayo ano ódaren takhaen oreraen temí, “Inte uáken ná ma fiki anaa ainen kafuren nafino.”

²¹^eMáa sen ina íkan Yisasi evaránen betin tiamemí, “Téi fura siré tiretí ankan tiamiyá uno. Tireti ma ída kan ineine in ma fura seya mumunan uron ma inteya ma fiki yará ma eruna avúavá ana ída varan nompo ma anuyon nan ma e afáne un nompin orono ma sesin maen kasaen

[¶]**21:9** Iburu vaya finte ‘*Osana*’ ma sikhein mai ‘*avisá daní ino.*’

^e**21:21** Mat 17:20; Ruk 17:6; Yon 14:12; 1Ko 13:2

tiretí ma sinonáí inten mino. ²²fTiretí ankan ma mumunan iya amúkinte mae mai ma varano van amúkin nona yaná baran nono.

**Yisasini Ákona Van Ma Monó Átaru
Namuntá Ma Ánoni Ukhein Banta
Kéká Ano Ma Inaein Baya Ino**

(Maki 11:27-33; Ruku 20:1-8)

²³Yisasi ma monó namuni yafufin un pében monó baya siamiyákan maen monó ánon banta kéká bá Isareri kayoi ánon banta kayo vá ano Yisasi vaintá eriven máa sen béin inaemí, “Éi inte ákona fosá mai yanasinta variyákeya inká iye anó éin mai yorarí ono siren ná mai ákona amikhen nafino.”

²⁴Máa sen ina íkan Yisasi evará-nen betin tiamemí, “Tiretin má dere mana inain ina urékuya ma funtáde sisimiresí maéi mai ma yorarí ino van ma simikhein ákona ana siamenté uno. ²⁵Banasi ma monó non péantan mai ákona Yoni inte fákená mantaren nafino. Mai ákona maen Ti yarafenu fintesá erikharen nafi áa varará banta fintesá erikharen nafino.”

Máa síkan betíyan ten inen emí, “Mai setí ma ‘Ti yarafenu finté erikhen mino’ ma sékun maen mai véi máa sen tetin ina inten mino, ‘Mai fará Yonini vayará ída mumunan iya fono.’ ²⁶gMáa sinten mifo mai setí ma ‘varará banta fintéi erikhen mino’ ma sékun maen mai Yoni mana sakhanampa vantán bákan minó ano afová ukhein mifo seti vanasi vará perá tifano.”

²⁷Máa siren betí ankan evaránen Yisasin tiamemí, “Tetí ankan ída afová ukhé tiféuno.”

Síkan Yisasi vetin tiamemí, “Mai séin má dere iye anó ákona simikhará doriya rafu mai siretin ída siamenté uno.”

**Kan Anavasantá Ma
Ovaéadan Baya Ino**

²⁸Máa siren “tireti inte inin ná iniya rafono” sen inaemí, “Mana vanta ano ain iyampon kanan dákaren esékena iyampon mo máa sen tiamemí, ‘Tanin noe, saréa uvaini yunampin ná mo yorano.’”

²⁹“Máa síkan mai iyampon mano semí, ‘Tifon kiyá uno,’ siren ineine uvákon den ínaimpáké oren mino.

³⁰“Máa siran be afóe ano ena iyampon baintá onóben mai ma sein baya ana mo síkan mai iyampon mano ‘eyo oronté uno’ siren ída oren mino.

³¹“Mai iyampon kanan pinté iye anó be afóen oo yayien nafino.”

Síkan betí ankan temí, “Eséke ano ino.”

Máa síkan Yisasi vetin tiamemí, “Téi fura siré tiretin tiamiyá uno. Takisi varan banta kayo vá pamúku nanin arinta vá ano naren tiretin esanten Ti yarafenui yafisimpin oferanten mino. ³²hMai fara vara seyo, Yoni siretimpin afoká uven puntákein avúavá tiretin aní iya siretí ída ventá mumunan e ompo takisi varan banta kayo vá pamúku nanin arinta vá ano anan bentá mumunan en mino. Tiretí ankan mai ódare ompo ída ará baédeya ventá mumunan e ono.

**Uvaini Yunan Anaará Ma Namu
Yafisirí in Banta Kéká Pákena
Ma Sian Baéadan Baya Ino**

(Maki 12:1-12; Ruku 20:9-19)

³³i“Ena ovaeran baya ifo vá tiretí ankan ná ineno. Mana vanta ano uvaini yunan dóden dafuí uren maen uvaini afu kúduren ma yasáden anu kasin nain masí maifin uáden inká dunan anará ma yafisin nain mana yan bain na-

^f21:22 Mat 7:7-11; 18:19 ^g21:26 Mat 14:5 ^h21:32 Ruk 3:12; 7:29-30

ⁱ21:33 Ais 5:1-2

mun uvamá daren nentá bain barufá orono van iyáken manáa vanta kéká ano yafiantano van mai yunan anan me vetin ayampin kaen mino.”³⁴ O varé íkan uvaini aran kúdin damusí íkan maifin ma yoriyain banta kayo vaípákana uvaini aran ma kúduádan o varano van bei yoran banta kéká tiantan oren mino.

³⁵“Oríkan maen mai yunampin ma yoriyaré ein banta kayo ano mai yoran banta kéká dakhádan orera iyákan mana fákaren ankamen ena aruan puren inká ena onámaná ankamádan puren mino.

³⁶Máan turan mai yunan ana afóe ano evaránen pe ma siantan orikhá ein esantaren kokhon doran banta siantan oríkan maen mai yunampin ma yoriyaré ein kayo ano mai ma fefá ma ukharé ein avúavá ana mai yoran banta kayo amaniná kaen mino. ³⁷Máan mana iyaimpin ‘te sanin avayan ininten mino’ siren dunan afóe ano ínaimpáké be anin tiantan mai kéká baípa oren mino.

³⁸“Oríkan maen mai yunampin ma yoran banta kayo ano ve anin ódaren betiyan máa sen oreraemí, ‘Ma vanta anon minó be afóen nina yanasinta varanten mifo erí tifé béin aruan púdé benina yanasinta vará tifano.’ ³⁹kMáa siren betí ankan béin pákaren mai yunan dafu fintena yarifen akhempá morúden aruan puren mino.

⁴⁰“Máan ten mifo siretí ankan inte esá té iniya rafono. Ínaimpá mai uvaini yunan afóe ma eriven maen mai yunampin ma yoriyá ein banta kayo amaniná inte yaná avúavasá kainten nafino.”

⁴¹Máa síkan betí ankan béin tiamemí, “Mai ma namu avúavá barein banta kayo me aruan púden maen uvaini aran ma kúdin damú ma erintin ma kúduren bariyan ma véi siran nain máa

uvaini aran ma kanaíen béin ameren kéká ayampin mi mai yunan ana kainten mino.”

⁴²lMáa síkan Yisasi vetin tiamemí, “Tiretí ankan ídá Tiyarafenui vompon dókifin ma ma vaya vain mai yankáke fono. Mai vaya máan mi sikhen mino, “Má uvaran banta kayo ano ma yo maman karúdein onámaná ano maman má dádaimpin mana ákona onámanasí ukhen mino.

Mai Bafan mánon máan turan mai anon tetin tivorá kama ukhen mino.” *Íbo 118:22-23*

⁴³“Máan tukháí séi siretin tiamiyá uno. Tiyarafenu ano siretí ankan ayan pintena vei yafisin baru e yafiaren maen maifin ma kamaen aran iran nain nanin bantan aminten mino. ⁴⁴Banta ano ma mai onámaná daró ma erave ankaminona ano kisikhasi inono. Inká mai onámaná ano ma mana vanta amaniná ma eravinten ankaman tafin tafin uádanten mino.”^{§§}

⁴⁵Yisasi ma yunan anará namu yafisirí in banta kayorá ma sian baerein baya van monó ánon banta kéká bá Farasisi kayo vá ano setin nan mi siyan mino sen afovaen mino. ⁴⁶Afová uren betí ankan Yisinin pákano van en mifo vanasi ano Yisasi nan sakhanampa vanta ino sen iniyákan mai van betí ankan banasi van péden ifá en mino.

Anasíí In Omáká Ma Ovaéádan Baya Ino

(Ruku 14:15-24)

22 Yisasi ena vaya máa sen tian baéan betin amemí, ²“Inaru yafisin máan mi ukhen mino. Mana kin mano ma ve anin anasi iman ameno van iyákan ma kákan dunan tariyainíi ukhen mino. ³Tarano van ma iyáken

§§21:44 Manáa feanten bompon dókifin mai vesi ída van mino.

¡21:38 Mat 27:18 k21:39 Ibu 13:12 l21:42 Rom 9:33; 1Pi 2:6-8

maen mai ma fefá arakhá ein kéká ano mai omáká eriven dunan nano van bei yoran banta kéká tiantan mo siamíkan ifá en oreraen mino.

⁴“Máa siyaimpin béi evaránen manáa kokhon doran banta siantan oriyákan tiamemí, ‘Mai ma fefá arakheruna kayo vá tiameno. Téi afon kao kayo vá kákan aino víkakhein tafúna kayo vá inka aruré tamadé umpo eriven ná ma anasií in omáká ma samáderuna yunan ná nano sen mino vá te siameno.’

⁵“Doran banta kéká ano mo máa sen tiamíkan maen mai kayo ano ída inen mino. Mana ano me ifá en bei yunampá oríkan inká ena ano me ifá en bei moní dorantá orin en mino. ⁶mMáan tíkan manáa ano mai kini yoran banta kéká pákaren namu arirí uren aruan puren mino. ⁷Aruan púdeimpin kin mano aran karen bei aruvin banta kéká tiantan mai ma vei yoran banta kéká arein banta kayo mo aruan minó kípáren betíi varu saman kauren mino.

⁸“Taman kaúdan kin mano vei yoran banta kayo máa sen tiamemí, ‘Anasií in dunan inka samádan ban mifo mai sarampin erino van ma areruna kéká ano inian kaumpan uren pasen ída eren ⁹mifo siretí ankan oriveya aayana fáke ma onanona nanin banta avire eresin ná anasií in dunan me nano.’ ¹⁰Máa síkan doran banta kayo ano ayanafá orera uven kama nanin banta vá namu nanin banta vá iyanuan meran mai namu e víkaven mai yunan nen mino.

¹¹“Niyákan kin mano vanasi ma e iyukhein onano van mai namun un pében onákan mana vanta ano anasií in damú ma uren oriyain buí daná ída ukharen mino. ¹²Ída ukharé íkan kin mano véin inaemí, ‘Tirona oe, náísá iyá

éi ída anasií in damú ma iyain buí daná ureyá e va fonó.’ Máa síkan mai vanta ano ída vaya sen mino.

¹³n“Ída vaya siyaimpin kin mano máa sen doran banta kayo siamemí, ‘Tiretí ankan béin ayan arantantá damureya karúdan títipafin o váken iffí diyan aveantuntá inkekípiyan bano.’

¹⁴“Para vara seyo, kokhon nanin bantan Tiyarafenu ano arakhen mifo manáan aní ukhein mino.

Kamanin Ma Takisi Amin Baya Ino

(Maki 12:13-17; Ruku 20:20-26)

¹⁵oMáa siyaimpin Yisasin mákádantin manáa ída funtákein baya sirantí beni vayará kó tiantano van Farasisi kayo ano o átaru uven baya sen inen en mino.

¹⁶Betí ankan betíi eyo iyampon kayo vá manáa Erotini anan banta kéká bá tiantan Yisasi vaípa oriven mo máa semí, “Aru soe, setí ankan afová ukhékuya éi fura vaya ana sin banta ono. Éi fura sikhein baya fóké anan Tiyarafenui avúavá baya sian banasi amé iya ono. Aví bain banta fi ída aví bain banta fi éi minó manaí ukhein baya anan ída feran tiamé iya ono. ¹⁷Máan té iya ompo ei ineine setin tisimeno. Sisan ma sakisi amin mai kama ukhen nafino áa ída fino.”

¹⁸Máa síkan Yisasi vetí ankani ineinefin pe afová ukhen temí, “Tiretíi vaya ana siren ída mai vaya ánain dakhafin banta kéká ompo fará tiretí ten mákáan oniya rafono. ¹⁹Takisi ma amé iyaona mai moní mana aní onano.” Síkan betí ankan mana moní baren béin me amen mino. ²⁰Amirákan Yisasi vetí ankan máa sen inaemí, “Ma iyen aman má iyen aví basá ban nafino.”

²¹pMáa síkan betí ankan evaránen temí, “Sisan nina ino.”

Síkan béi vetin tiamemí, “Sisan nina yanasá Sisan ame vá inká Tiyarafenu ina yanasá Tiyarafenun ná ameno.”

²²Máa síkan betí ankan mai vaya iniren kokhon ineine uvákon béin me ampiren oren mino.

**Púkaren Ma E Mantaven
Ábasuí Inain Baya Ino**

(*Maki 12:18-27; Ruku 20:27-40*)

²³Maí damú ana Sadyusi kéká ano Yisasi vaintá eren mino. Mai kéká ano furin banta van ída evaránen e mantanten ne siyain bákán máa sen betí Yisasin inaemí, ²⁴r“Aru soe, Mosesi máa sen tetin tisimikhen mino. Mana vanta ano ma anasi mantaren ída iyampon kainton ma fúbintin maen ná ben afá aváe ano vá mai nanin máden ná mai vanta avíkasá iyampon kauantantin ná ben aví ída vá kípáno. ²⁵Máa síkhan mi fefá tetimpin dan manápá ifo afápá kan un kádan anavádano varen esékéna ano anasi mantaren ída iyampon kain na fúbín be afá ano mai nanin baren mino. ²⁶Mantaren mai ven ánain tena vanta ano ída iyampon kainton púbíkan mai rákena vanta ano mai nanin mana mantaren púbín e máan ten oriyan minó dan manápá ifo afápá kan un kádan anavádano anon mai mana nanin manan mantaren mino. ²⁷Mantaren minó banta ano fúbíkan ínainpáké mai nanin dere furen mino. ²⁸Máan tukharen mifo ínainpá ma furin banta ma evaránen e mantan nain damú mai nanin mano yan manápá ifo afápá kan un kádan anavádano mantaren mifo mai véi iyen anasá banten nafino.”

²⁹Máa síkan Yisasi evaránen betin tiamemí, “Tiretí ankan Tiyarafenui vompon dókifin ma vain baya vá beni ákona

vá ída afová ukheyan baya asuse iya rono. ³⁰Purin banta kéká ma evaránen e mantan nain damú mai nanin banta kéká ano ída ábasuí inten mifo inaruráke enisori kayo an manan den orera inten mino. ³¹Máan tinten mifo furin bantai e mantan nan ma siyaona vayará téi siretin inaintó uno. Tiyarafenu ano ma siretin nan máa síkhein baya ídá dankáke rafono. ³²s“Téi Abaraamun má Aisakin má Yekopun mái Ayarafenu uno.’ *Eks 3:6*

Béi ída furin nanin bantai Ayarafenu ifo ayun ma fara vain nanin bantai Ayarafenu ino.”

³³Máa síkan banasi ano veni vaya iniren takhaen oreraen mino.

**Moéken Kákání Ma Ukhein
Man Baya Fákena Vaya Ino**

(*Maki 12:28-31; Ruku 10:25-28*)

³⁴Yisasi ma mai vaya sein nan Sadyusi kéká ano ída vaya siyaimpin Farasisi kayo ano mai vaya iniren betiyan o átaru en mino. ³⁵Betí aúbaná mana man baya ma afová ukhein banta varen Yisasin akhenóka uan onen máa semí,

³⁶“Aru soe, intéa man baya anó minó man baya esantaren ná esesí ukhen nafino.” ³⁷Máa síkan Yisasi evaránen temí, “Ei Bafan Tiyarafenun ná e aú amafon má ei ineinefó basá anunu ono.’ *Diu 6:5*

³⁸Ma esé ma araíen kákani suron ukhein man baya ino. ³⁹Mairá ben oyampá ma ven má manaí ukhein man baya máan mí ukhen mino. ‘Eyan nan ma anunu iyaonaié vá ena van anunu ono.’ *Riv 19:18*

⁴⁰“Ma man bayá kanan manon mai minó man baya vá sakhanampa vanta kayoi vaya vái ana uron mi van mino.”

Tiyarafenu Ano Ma Aní Ukhein Banta Mai Iyen Anin Nafino

(Maki 12:35-37; Ruku 20:41-44)

⁴¹ Farasisi kayo ma átaru ukhein baré íkan maen Yisasi vetin inaemí, ⁴² u“Tiyarafenu ano ma aní ukhein banta van tiretí inte esá teyá iniya rafono. Mai véi iyen anin nafino.”

Máa síkan betí ankan evaránen temí, “Devitin anin mino.”

⁴³ Máa síkan Yisasi vetin inaemí, “Mai intesá ukhan ná Kantá Aunan mano in-eine Devitin amin ná mai vanta van Bafan ne sen nafino. Deviti máa sikhén mino,

⁴⁴ v“Bafan mano senti Bafan máa sen tiamemí,

“Éi sen tiyan kurompá kumantesirá eni namuro maman

en aránaópá kaúdéku vá ono.” *Íbo 110:1*

⁴⁵ Mai vanta van ma Deviti Bafan ne sikhén tiya mai siretíi intesá eyá ben nan Devitin Anin ne sinte fono.” ⁴⁶ Máa sirákan mana ano ída anona evaránen Yisasini vava siamin nainí eimpin péden mai ráké betí ankan ída mana yana san béin ineen mino.

Yisasi Ma Farasisi Kayo Van Amaan Baya Sein Mino

(Maki 12:38-39; Ruku 11:43, 46; 20:45-46)

23 Máa sen inauren mairá Yisasi vei eyo iyampon kayo vá banasi vá tiamen temí, ² “Man baya ma afová ukhein banta kéká bá Farasisi kayo vá anon Mosesi ma iyá einien mi man baya vaéan tiretin amiyan mino. ³ wMáan tukhanti vá minó baya ma veti siamin nain inire vá mai ánain ná dakha-fono. Dakhafin nompo vetí ankan ma

variyaín avúavá ída vá barano. Kokhon baya veti siren ída mai vava kayo ánain dakhafé iyan mino. ⁴ Betí ankan mana uman dakhein bayafó banasi siamin mai uman baren oriyan mifo vetí ída mana yáman máafó mai kayo e aya é iyan mino.

⁵ x“Banasi ano onano van mi minó daná betí ankan baré iyan mino. Kákan amúkin ana ayafentá damuren inká anan kayo vetíi ayá au anamun átonotá damiyan é iyan mino. ⁶ Kákan omá dunan ma sariyan ma átaruimpin betí ankan esé an kará ana variyáken inká monó átaru namun kayofin ina esé avorú karáká anan kumanin kayo ino. ⁷ Minó daná ma kain miyaní in barurá banasi ano vayan mino siyantín inká aru soe sen arano van mi vetí ankan anunu iyan mino.

⁸ “Máan tiyan mifo siretin nan banasi ano ída vá aru soe sino. Para vara seyo, siretíi Kákan manan bákayan tireti minó ano mana nanin banta an mi yakha rono. ⁹ Ma varará ída vá mana vanta van tiretí ankan mano sífóe oe seno. Mana Afóe anan beyaká inarufá ban mino. ¹⁰ Minó ano ída vá éin nan aru soe sino. Para vara seyo, Tiyarafenu ano ma aní ukhein banta anan tiretíi arú ban mino. ¹¹ yTiretí ankani ánon banta ano vá tiretíi yoran bantai sá ino. ¹² zMai fara vara seyo, ve aví ma yaní inain banta aví barará eravintín maen inká be aví ma vararasí inain banta ano kákan bí baranten mino.”

Yisasi Ma Farasisi Kayo Asein Baya Ino

(Maki 12:40; Ruku 11:39-52; 20:47)

¹³⁻¹⁴ Yisasi evaránen máa semí, “Tiretí Farasisi kayo vá man baya ma afová

^u22:42 Yon 7:42 ^v22:44 Mat 26:64 ^w23:3 Mar 2:7-8 ^x23:5 Eks 13:9; Nam 15:38-39; Diu 6:8; Mat 6:1 ^y23:11 Mat 20:26; Mak 9:35; Ruk 22:26

^z23:12 Yop 22:29; Pro 29:23; Ruk 14:11; 18:14

ukheona vanta kéká ba soe, vaya ma sireya ída mai ánain dakhafé iya ono! Inaru yafisini ona munkiya vákeya siretiyantá ída maifin oferiya ono. Bana si ano ma maifin oferano van ma iya mae vetin ída áen nan oferiyain mai siretí kákan uman uron mi varan nono.*

¹⁵“Man baya ma afová ukheona vanta kayo vá Farasisi kéká ba soe, kákan uman uron mi varan nono! Tiretí vaya ma sire ída mai ánain dakhafé iya ono. Tiretí ankan ma varará bá un nompin má ma noreya ma mana vanta o avían tiretimpin kauren nan ma siretin an davi mae véin maman aron ída van ma ira kiyan uman baren berai siyan purin baru finte vanta an daádiya ono. Tiretí ankan manon béin avíáde nan mi véi moéken tiretin esantaren namu avúavá bariyan mino.

¹⁶a“Tiretí ankan auu yufúkukhein kéká anon banta aa aní uantano van iyaona sireti kákan uman uron mi varan nono. Tiretí ankan máa sé iya ono. ‘Banta ano ma Tiyarafenu amáká ma o siaren asíká ayan befió uren ma fura ódino siren té iyain mai sitó daná ifo Tiyarafenu amápin ma vain korirá ma o siaren ma asíká ayan befió ma uranten ná mai ma véi siran nainisá ino.’

¹⁷Tiretí ankan auu yufúkukha óen banta kéká soe! Inte yaná anó kákan daná ban nafino. Kori anó kákaní ukhen nafi áa kákan monó namun manó kori maman kantasí ukhen nafino. Tiretí ankan afová ukha ono kákan monó namun mai anon kákaní ukhan mai Tiyarafenu inan ban mino. ¹⁸Tiretí ankan máa sé iya ono. Mana ano ma íkun uan amin onámaná

ma karánará ukheintá ma o siaren asíká ayan befió é iyain mai sitó daná ifo íkun uan amino van ma amiyain danasintará ma o siaren asíká ayan befió uranten ná mai ma véi siran nainisá ino. ¹⁹Tiretí ankan auu yufúkukhein banta kéká soe! Inte yaná anó kákan daná ban nafino. Íkun ma uan amin danasinta anó kákaní ukhen nafi áa íkun ma uan amin onámaná ma karánará ukhein manó mai ma íkun uan amin danasinta maman kantasí ukhen nafino. Tiretí ankan afová ukha ono yunan ma íkun uan amin kará daró ma vain mai anon kákaní ukhan mai Tiyarafenu ina ino. ²⁰Máan tukhan mi mana ano ma íkun uan amin onámaná ma karánará ukheintá ma o siaren asíká ayan befió é iyan, mai anon íkun ma uan amin kará bá mai yaró ma íkun uan amin danasinta ma vaintái vei vaya sian ákonaé iyan mino. ²¹Máan té iyan mifo mana ano ma Tiyarafenu amáká ma o siaren ma asíká ayan befió é iyain mai anon Tiyarafenu vá ben amáká báí vei vaya sian ákonaé iyan mino. ²²b“Mana ano ma inaru van o siaren ma asíká ayan befió é iyan mai anon Tiyarafenui kumanin karái vákan mairá béi kumantan mi vei vaya sian ákonaé iyan mino.

²³c“Máan tiyan mifo siretí ankan man baya ma afová ukheona vanta kayo vá Farasisi kéká bá ano vaya ma sireya ída mai ánain dakhafin kékái vaona kákan uman uron mi varan nono. Tiretí ankan dunan ana fintena yanasinta siyan míkan pintan daídeya mana masiman Tiyarafenu améiya ompo man bayafin ma moéken kákaní ukhein man baya máan tiretí ampikha ono. Mai ma fun-

***23:13-14** Manáa Tiyarafenui vompon dókifin manáa vaya ma asotú ukhein mai vaya vesi 14 fin ban mino: ¹⁴ *Man baya ma afová ukheona kéká bá Farasisi kayo vá ano kákan uman uron mi varan nono. Mai fara vara seyoy, siretí ankan ída ayave váka varé nanin kayo mo mákáde vetin nina yanasinta varyáke maeya inká kampun te ayáká amúké iya rono.*

^a**23:16** Mat 15:14

^b**23:22** Ais 66:1; Mat 5:34

^c**23:23** Riv 27:30; Mai 6:8

tákein avúavá baya máa mai máan mi ukhen mino. Puntákein avúavá póké ma vanta yaimiyain má arunan in má inká Tiyarafenu vá ma súpá ukhen ban má ino. Ma máa man baya anon moéken kákaní ukhen mifo mai máa ánain ná dakhafiyáke ída vá ena man baya kayo vá dere ampeno. ²⁴ Tíretí ankan auu yufúkukhein kékái vákeya sitó danasinta yo aían karúdiya ompo kamerin nankuriya rono.

²⁵ ^d“Máan tiyan mifo sítetí ankan man baya ma afová ukheona vanta kayo vá Farasisi kéká bá ano vava ma sireya ída mai ánain dakhafin kékái vaona kákan uman uron mi varan nono. Tíretí fereti vá kápi vá dantena ana seséin kéká ompo ena ina yaná ma aran nan avúavá bá eyan nan mana ma in avúavá bá ano anan mai aúpin bíkakhen mino. ²⁶ Auu yufúkukhein Farasisi kéka soe! Pereti vá kápi vá aú pinte nare vá tesé uresin ná inainpákesá dantena me avusese ino.

²⁷ ^e“Máan tukhen mifo sítetí ankan man baya ma afová ukheona vanta kayo vá Farasisi kéká bá ano vava ma sireya ída mai ánain dakhafin kékái vaona kákan uman uron mi varan nono. Banta masíká ma efanten peni fédan ma kama ukhan oniyainí ukha rofo masípin ma vanta ayampa kayo vá púta yanasinta vá ma vainí sítetí ukha rono. [†] ²⁸ ^fTíretí ankan má máan mi ukhe va ono. Banta ano sítetin dan bukhafarái ódaren títetin nan puntákein banta kéká ino sen iniyan mifo aúpin kampun avúavá bá man baya yurafurin avúavá bá bíkakhin kéká ono.

²⁹ Yisasi evaránen máa semí, “Tíretí ankan man baya ma afová ukheona vanta kayo vá Farasisi kéká bá ano vava

ma sireya ída mai ánain dakhafin kékái vaona kákan uman uron mi varan nono. Tíretí ankan mano sakhanampa vanta kayoi masí uantádeya inká puntákein kékái masíká kama aú uan kain banta kayo ono. ³⁰ Máan tiya váke sítetí ankan máa séiya ono, ‘Pefá tinafu siráo ma vá ein damú tetin má baré ída kanaíe betin ayaé sakhanampa vanta kayo aruan puronté erunaren mino.’ ³¹ ^g“Máan ma siyaona anon sakhanampa vanta kéká ma aruan púkaré ein mai vanta kayo anavasin mi vá uno seya sítetiyan aní iya ono. ³² Oriveya anafu aráo ano ma namu avúavá arái urein ná mo maman kípano!

³³ ^h“Tíretí ankan namu osafáe akhafana ono! Tiyarafenu ano ma sítetin ma kó tiantáden ma ira kiyan uman baren berai siyan purin baru ma iyántákein mai intesá eyá akhakhante rafono. ³⁴ Máan tukhen mifo vá tíretí ankan ineno. Téi sakhanampa vanta kéká bá kama ineine vain banta kayo vá man baya ma afová ukhein banta kayo vá tiantékun tíretí vaípá erinten mifo sítetí ankan manáa yaa unkamádantá aruan puriya manáa sítetí monó átaru namun kayofin aviáde yafiyó ankamiya mae manáa kéká baru vaintá e yakháan more mere esin orera inten mino. ³⁵ ⁱ“Máan tukhein nan mi mai ma funtákein banta kéká ma Eborin táké arái ure ma are eriya ma Barakian anin Sekaraiyan ma Tiyarafenu amá bá íkun uan amin takhó aúbaná bá ma aruan pureona kékái nare miyan tíretí ankan amanináin erinten mino. ³⁶ Téi fura siré tíretin tiamiyá uno. Mai namu avúavái miyan maen tare ma vaona nanin bantafin mi afoká inten mino.”

[†]23:27 Iburu kayo ma vanta masí é iyain mai on boraádampin mi kaiyain bákan mai on masíká efanten penifó peré iyan mino.

^d23:25 Mak 7:4 ^e23:27 Apo 23:3 ^f23:28 Ruk 16:15 ^g23:31 Apo 7:52

^h23:33 Mat 3:7; 12:34; Ruk 3:7 ⁱ23:35 Esé 4:8; 2Kr 24:20-21

**Yisasi Ma Yerusaremí Baru Van
Arunaná Barein Baya Ino**

(Ruku 13:34-35; 19:41-44)

³⁷Yisasi evaránen temí, “Yerusaremi oe, Yersaremi oe, éi sakhanampa vanta kayo aruan puriya ono. Máan tiyákeya Ti yarafenu ano ma siretimpin tiantan erein banta kéká aruan purono van onámaná ankamiya ompo séi kokhon dádái anasi kokore ano ma ve ayan aránaópá be akhafana avían kaeiní iyáku ompo sretí ankan ída ine ono. ³⁸Jída inen nan Ti yarafenu ano eni kákan monó namun oyan amiran dúken mino. ³⁹Máan tukháí séi sretin tiamiyá uno. Enádá bá tiretí ída sen tonan bare maeya maná damusí intiya ‘Bafan avíká ma eriyain banta vá avábá uantano’ sin nono. *Íbo 118:26*

**Kákan Monó Namun
Ma Varákin Nain Baya Ino**

(Maki 13:1-2; Ruku 21:5-6)

24 Yisasi ma kákan monó baru me ampiren oriyákan maen bei eyo iyampon kayo ano ve vaintá eriven kákan monó namun kayo aní ono van en mino. ^{2k}Máan tíkan béi vetin in aen temí, “Tiretí ankan ma kama namun kayó oniya rafono. Téi fura siré tiretin tiamé uno. Namuro ano me varákuren maen minó onámaná ída áintin ben ané ben ané ukhen banten mifo varakuá-dantin eraven asuse inten mino.”

**Ma Vara Kípan Akhempá Ma Aní
Daná Afokáin Nain Baya Ino**

(Maki 13:3-13; Ruku 21:7-19)

³Yisasi ma Orifí anu yontá kumantá íkan beni eyo iyampon kayo máa ano oriven béin inaemí, “Éi setin tisimeno.

Inte yamusá mai yaná afoká inten nafino. Inte yaná ma afoká intirá teti ankan onesá éin nan inka erintéin ma vara kípan ten mino sente rafuno.”

⁴Máa síkan Yisasi evaránen betin tiamemí, “Banta ano sretin mákasin nafo yafían ná ákona ono. ^{5l}Para vara seyo, kokhon nanin banta ano eriven ten tiví tiaren máa sinten mino. Ti yarafenu ano ma aní ukharé ein bantan téi eré uno siren maen kokhon nanin banta máka sinten mino. ⁶Tiretí ankan inesin aruvin baya vá aruvono van ma siyan nain baya vá mai van tiretí ída vá anú duman duman ono. Mai yanasinta erivintin maen ínainpákéi ma vara ma kípan damú afoká inten mino. ⁷Mana anan banta kéká ano e mantaaren ena anan banta vá aruvintin mana kini kéká ano e mantaaren ena kini kéká bá aruvintin manáa akhempá kákan anan afoká intin maen ma vara kaya intin inten mino. ⁸Máan tinten mifo mai yanasinta ma afoká inain mano mai anasi ano ma araíen inamun nan ineiníi inten mino.

^{9m}“Máan ma intin maen ten naro siren tiretin ará namu uantáden avían namuro ayampin kaintin tiretin aruan purinten mino. ¹⁰Maí damú tentá ma mumunan ukháin nain nanin banta kéká ano vetíi mumunan ampintin erafuvintin beraran anan maran uaren ben avían namuro ayampin kain maran intin ¹¹ⁿinká kampun sakhanampa vanta kayo afoká uven maen banasi máka siantanten mino. ¹²Namu avúavá ano kákaní intin maen kokhon nanin banta ano ena ma ará amin avúavá an pinten mino. ^{13o}An pinten mifo ákonaen ban ma oriyan baréin nain mai nanin bantan ínainpá ma ma vara kípan nain damú Ti yarafenu ano evaránen aviranten mino.

¡23:38 1Ki 9:7-8; Yer 22:5 ^k24:2 Ruk 19:44 ^l24:5 Mat 24:23-24; 1Yn 2:18

^m24:9 Mat 10:22 ⁿ24:11 Mat 24:5, 24; 1Yn 4:1 ^o24:13 Mat 10:22

¹⁴pTiyarafenui yafisin pintena vaya ma varará minó akhempá betí ano siamen orera intin ma minó nanin banta ano inirantín inaimpáke suron mi vara kípan damú erinten mino.

Mana Namu Yana Suron Ma Afoká Inain Baya Ino

(Maki 13:14-23; Ruku 21:20-24)

¹⁵q“Pefá ma sakhanampa vanta Danierin oorá ma sikharé einén Tiyarafenui kantasí ukhein kákan monó namumpin mana namu yana suron afoká uven minó daná máden asuse intiya siretí ankan onan nompo ma vaya ma yankafin nain mano vá mai vayai ana afová ino. ¹⁶Máa ma intin maí damusá Yudiá barafá ma vain nanin banta ano anufá ana vá karan orino. ¹⁷rOrintin maen ná be amá daró ma un baréin nain mano ída vá mana yaná be amá pintena eravuken barano van inino. ¹⁸Máan ma intin maen dunan anafá ma o varé inain mano ída vá evaránen be amá pintena vei ayá au anamun o varano. ¹⁹Amú bá nanin kéká bá iyampon ma nan kuviyan bain nanin kayo vá ano maí damú ma erintin maen kákan uman mi varanten mino. ²⁰Á den iyon in damu safi Sabati yamu safi mai yaná afóka inafó amúkesin ná pasavi yamusá afoká inti vá karan orono. ²¹sPara vara seyo, ma vara ma araién uvarein táké ma eren tare ma e vaona aúban ída máan uman afoká ukharé ein uman mi maí damú afoká inten mifo ída máan uman ínaimpá afoká inten mino. ²²Tiyarafenu ano ma ída máan uman kayoi yamú ma maman asíkaí intin maen minó nanin bantan afeyoranten mifo véi ma fe iyákein

nanin banta van ma ininten maen maí damú maman asíkaí inten mino. ²³tMaí damú ma mana vanta ano ma siretin tiamen ma onano, Tiyarafenu ano ma aní ukharé ein banta masi mafá ban mino áa mesapá ban mino ma sintiya ída vá betíi vayará mumunan ono. ²⁴uPara vara seyo, manáa kampun sakhanampa vanta ano eriven maen máa sinten mino, ‘Tiyarafenu ano ma aní ukharé ein téi mai vantán báké mana sakhanampa vantán bá uno.’ Máa siren maen ara ara aní danasinta vá kákan enará ukhein danasinta vá afoká inten mino. Afoká uren kokhon nanin banta aviren mo asuse iyáken Tiyarafenu ano ma veyan iyákein nanin banta vá dere kasaen kufa uádanten mino. ²⁵Ineno. Mai yanasinta afoká intéii séi siretin pe o útúbé tiamiyá uno.

²⁶v“Tiamé umpo manáa ano ma siretí ankan tiamen ma Tiyarafenu ano ma aní ukhein banta mesapá banta ída van kámápá ban mino ma sintiya ída vá maifá orono. Ma namumpin aúpá ban ne ma sintiya siretí ída vá betíi vayará mumunan ono. ²⁷wTiretí ankan afová ukha ono. Áau e uní páké ma afayuí uaren ma áau orun perápá ma aravé iyain máa uran mi Banta Anin ma erin nain damú intin mi minó nanin banta ano onanten mino. ²⁸xPurin banta kayo au ma asenten bain mai varurái sumpán kayo ano o átarué iyan mino.

Banta Anin Ma Overánen Erin Nain Baya Ino

(Maki 13:24-27; Ruku 21:25-28)

²⁹y“Mai kákan uman kayo ma kípan nain damú anan ‘áau ano sítipa intin

p24:14 Mat 28:19 q24:15 Dan 9:27; 11:31; 12:11 r24:17 Ruk 17:31

s24:21 Dan 12:1 t24:23 Mat 24:5

u24:24 Diu 13:1-3; 2Te 2:8-9; Rev 13:13-14 v24:26 Ruk 17:23-24

w24:27 Mat 24:37-39 x24:28 Ruk 17:37 y24:29 2Pi 3:10; Rev 6:12-13

biyon ída ena vá kantin
 ayon táké minó ofu kayo kararen
 eravintin
 minó ákona yaná ma inarurá báin nain
 mano kayamana inten mino.” *Ais*
13:10; 34:4; Isi 32:7; Yoe 2:10, 31

³⁰z“Maí damú Banta Anini aní daná
 ma ayontá afoká intin mi varará nanin
 banta ano ífí diyáken onantín mi Banta
 Anin mano inaru fáké konan daró bei
 ákona vá kákan kakhán má erinten
 mino. ³¹aEriyáken maen bei enisori kayo
 sintin ufen kákaníen asiyáken ma vara
 minó akhempá oriven beyan ma iyákaré
 ein nanin banta avían átaru inten mino.

**Fiki Yaa Anará Ma Afova
 Varan Baya Ino**

(*Maki 13:28-31; Ruku 21:29-33*)

³²“Tiretí ankan anna rasá afova
 varano. Anna amú ma eyavénan
 maeyan afeen aá kanten mino séiya
 ono. ³³Máan ten ma minó daná afoká
 inti oniya mae vá mai Banta Anin inka
 ádé anantá ereno van onará mantakhen
 mino vá te afová ono. ³⁴bTéi fura siré
 tiretin tiamiyá uno. Ma ma saréa vaona
 nanin banta ano ída fúkesin mi mai
 yanasinta afoká inten mino. ³⁵cInaru
 vá bara vá kípanten mifo senti vaya ída
 uron mi kípanten mino.

**Ída Mana Nanin Banta Ano
 Yisasi Ma Erin Nain Damú Bá
 Áau Vá Afová Ukhen Mino**

(*Maki 13:32-37; Ruku 17:26-30, 34-36*)

³⁶d“Ída mana nanin banta ano maí
 damú bá áau vá afová ukhan inaru
 ráké enisori kéká bá ano ída afováin
 be Anin mano yere ída afová ukhen
 mifo ve Afóe veyáká anan afová ukhen

mino. ³⁷eMai ma Noani yamú aniana
 iyáin ma afoká einí ukhein avúavá anan
 Banta Anin ma ereno van iyantin maen
 afoká inten mino. ³⁸Ída ma á den non
 takhan banasi ano yunan táden non má
 niyáken anasi variyan inká arinta uvi-
 ran maran en oriyain pintéi Noa votifin
 un peren mino. ³⁹fMai yaná ma afoká
 inain betí ankan ída afová ukharéin mi
 kákan á den non taaren banasi ufúan
 kípen mino. Máan tukhein avúavá anan
 Banta Anin ma erin nain damú afoká in-
 ten mino. ⁴⁰Kankan banta ano ma yu-
 nampin baré intin Tiyarafenu ano mana
 avíaren mana ifá inten mino. ⁴¹Kankan
 nanin mano ma vereti uvaran uviti
 yasamiyaré intin maen Tiyarafenu ano
 mana avíaren mana ifá inten mino.

⁴²g“Máan tinten mifo siretíi Bafan ma
 erin nain damú ída afová ukha ompo
 yafíke vá bano! ⁴³hTiretí ankan mai vá
 afová ono. Umoyan banta ano ma inu-
 ran má barákin nain áau ma má afoé ano
 ma afová uren máká ma yafían ákona
 uvintin maen umoyan banta ano ída
 kanaíen mai namun barákuren ódinten
 mino. ⁴⁴Máan tukhen mifo siretí ankan
 ná utare vá bano. Mai fara vara seyo,
 siretí ma ída erinten mino se ininona
 yamú Banta Anin mano erinten mino.

**Kama Yoran Banta Vá Namu
 Yoran Banta Vái Vaya Ino**

(*Ruku 12:42-46*)

⁴⁵“Inte yoran banta anó kama ineine
 vákan kama yorará iyan maen ná bei
 ayafa ano véin maman doran banta kay-
 orá dafisiní uran báken ná dunan daí-
 den amin áauí ma íkan ná mai yoran
 banta kéká daiman amé iyan nafino.
⁴⁶Mai yoran ma kamaen doriyan baré

³24:32 Kriki vaya finté *fiki yaa ana* e sikhen mino.

^z24:30 Dan 7:13; Sek 12:10; Rev 1:7 ^a24:31 1Ko 15:52; 1Te 4:16 ^b24:34 Mat
 16:28 ^c24:35 Mat 5:18 ^d24:36 Apo 1:7; 1Te 5:1-2 ^e24:37 Esé 6:5-8
^f24:39 Esé 7:21-23 ^g24:42 Mat 25:13 ^h24:43 Ruk 12:39-40; Rev 16:15

intin ma vei ayafa ano ma ovaránen e onan nain doran banta ano vá kákan amusin ino. ⁴⁷ⁱTéi fura siré tiretí ankan tiamiyá uno. Ayafa ano mai yoran bantan maman kaintin benina yanasintará dafisinten mino. ⁴⁸Dafisinten mifo namu yoran banta ano maen beyan nan máa sinten mino, ‘Sesi ayafa vanta ano ayákái o van ída ainen ovaránen erinten mino’ siren maen ⁴⁹⁻⁵⁰arona yoran banta kéká ankamiyáken ma inká non naren óen iyain banta kayo vá oriven ma yunan nen non nen iyáken ma vei ayafa van ída erinten mino ma sen inin nain damú erinten mino. ⁵¹Eriven maen mai yoran banta sika sika uren tiantantin baya siren ma ída mai ánain dakhafin banta kéká bá báken ifí diyan aveantuntá inkekí piyan berai siyan banten mino.

Tiyan Míkan Arintará Ma O Sian Baékein Baya Ino

25^j“Maí damú inaru yafisin mano siyan míkan arintai vaya an mi yanten mino. Mana vanta anasi iman amintéin béi eriyákan maen mai arinta kayo ano yaamu on uruaren mai ma anasí ono van iyain arinta amápin o ave inton oren mino. ²Oren mifo yan manápa arintafin ída afova vákan inká dan manápa arintafin afova varen mino. ³Mai ma ída afova vain arinta máa ano karasin ída varanton daamu ana varen oren mino. ⁴Mai ma afova vain arinta máa ano yaamu variyan botorefin karasin banaaren oren mino. ⁵Oríkan mai ma anasi iman ameno van iyain banta ano ída ainen eriyaimpin mai arinta kayo auu nan aííkan auun baren oreraen mino.

⁶“Aun bakharen betí ankan iníkan inuran aúbaná mana vanta ano oovaren

temí, ‘Anasi ma iman amin banta inka eren mifo varufá erafúbe avirano.’

⁷“Máa siyain má minó arinta ano orun mantaven daamu avové en oreraen mino. ⁸Máan tiyákan afova ma ída vain arinta kéká ano afova ma vain arinta kayo máa sen tiamemí, ‘Tetinti yaamu yosimirí iyá umpo manáa karasin timeno.’

⁹“Máa síkan mai ma afova vain arinta kéká ano evaránen betin tiamemí, ‘Ída ino. Ma karasin mano minó tetimpin ída kanáf inten mifo siretí ankan orive vá mai ma karasin kaiyain pimpá dosiriya miyaní ono.’

¹⁰“Máa síkan mai ma afova ída vain arinta kéká ano karasin barano van orivíkan anasi ma iman amin nain banta ano eren mino. Eríkan mai ma útakhá ein arinta máa ano mai vanta vá anasí ono van ma yunan tamádan baré ein namumpin un pébin ona munken mino.

¹¹^k“Munkurákan ínaimpáké ena arinta kéká ano enóben temí, ‘Kákan banta oe, kákan banta oe, setin ona yisintano!’

¹²^l“Máa síkan betin evaránen tiamemí, ‘Téi fura siré tiretin tiamiyá uno. Tiretin ída afová ukhé uno.’

¹³^m“Máan tukhein mifo vá Bafani erin damú bá áau vá tiretí ída afová ukha ompo yaffan ná ákona ono.

Moníká Ma Kamaen Dafisin Nan Ma Sian Baéádan Baya Ino

(Ruku 19:11-27)

¹⁴Máa siren Yisasi evaránen temí, “Mana vanta ano ayá barufá orono van iyáken ma vei yoran banta kayo átaru uren ma veina yanasinta vetin amintin dafisino van ma einí inaru yafisin mano ukhen mino. ¹⁵ⁿMana mana yoran bantai avúavá bá ákona vá béi iniyáken moní daíden mana vanta yan manápa

ⁱ24:47 Mat 25:21, 23 ^j25:1 Ruk 12:35; Rev 19:7 ^k25:11 Ruk 13:25-27

^l25:12 Mat 7:23 ^m25:13 Mat 24:42 ⁿ25:15 Rom 12:6

tauseni (5,000) moní amen inká ena vanta kan tauseni (2,000) moní amen ena vanta mana tauseni (1,000) moní amen uren béi me onen ena varufá oren mino. ¹⁶ Máan turen béi orivíkan mai ma yan manápá tauseni (5,000) moní ma mantaré ein banta ano ainen mai monípó dóáken ena yan manápá tauseni (5,000) veni aman moní o yóáden mino. ¹⁷ Máan tíkan inká kan tauseni (2,000) moní ma mantaré ein banta vá ano mai monípó dóáken ena kan tauseni (2,000) aman moní o yóádan en mino. ¹⁸ Máan ten mifo mana tauseni (1,000) moní ma mantaré ein banta ano ve ayafai moní baren mo varafin úden aúpa masíen mino.

¹⁹ “Mai yoran banta kékái ayafa vanta ano ayáká o varen ínainpáké ovaránen eriven mai ma moní amikharé ein nan puntarano van aran eren mino. ²⁰ Eriven dan manápá tauseni (5,000) moní ma mantaré ein banta ano ma ena yan manápá tauseni (5,000) moní bá ma yóan kova urákaré ein baren meren máa semí, ‘Kákan banta oe, onano. Éi yan manápá tauseni (5,000) moní ma simeonafó téi yódé ena yan manápá tauseni (5,000) vá maman kovaé uno.’

²¹ o “Máa síkan beni ayafa vanta ano véin evaránen tiamemí, ‘Éi kama yoran bantan bákeya mai moníká kama e yafíbeya yoreóna kokhon danáká tékuya yafisin nompo eriveya sen má manafin amusin ono!’

²² “Máa siran kan tauseni (2,000) moní ma mantaré ein banta vá ano yere eriven mai ma ena kan tauseni (2,000) moní bá ma yóan kova urakaré ein baren meren máa semí, ‘Ayafa vanta oe, onano. Éi kan tauseni (2,000) moní ma simeonafó téi yódé ena kan tauseni (2,000) vá maman kovaé uno.’

²³ “Máa síkan beni ayafa vanta ano véin evaránen tiamemí, ‘Éi kama yoran bantan bákeya mai moníká kama e yafíbeya yoreóna kokhon danáká tékuya yafisin nompo eriveya sen má manafin amusin ono.’

²⁴ “Máa siran mana tauseni (1,000) moní ma mantaré ein banta vá ano eriven temí, ‘Ayafa vanta oe, éi ákona vantán bákeya éi ma ída yókaré eona yunan unafiyákeya inká éi ma ída ayun pafasikharé eona yunan duyasiyaona vantán baná téi afová ukhéi ²⁵ e nan pédé eni mana tauseni (1,000) moní barafin mo aúpa masí urakaré umpo ma ei moní ifo onano!’

²⁶ “Máa síkan kákan banta ano evaránen béin tiamemí, ‘Éi avesara yoran banta ompo séi ma ída yokaréeruna yunan ma unafiyáké inká téi ma ída ayun pafasikharéeruna yunan ma yuyasiyáeruna mai máan in banta inó éi siya fono. ²⁷ Máan tiyaruna ifo éi fará tenti moní ída moní ma kain namumpin kaenan baré irá ovarané ma ereruna yamú tesi moní bá aman moní bá bare rafuno.

²⁸ “‘Mai vará mana tauseni (1,000) moní ma mantá ein banta vaípáke vá dafian mai ma siyan míkan tauseni (10,000) moní ma yákein banta vá ameno. ²⁹ pPara vara seyo, kokhon danasinta ma yantin baréin nain nanin bantan móeken aminten mino. Inká ída ma yakáin nain kéká ina mai sanáa ma yaká intin mai vá deren minó baranten mino.’ ³⁰ qMáa siren temí, ‘Mai namu yoran banta karú desain ná barufá títipa ukheimpin orun báken ná íf diyan aveantuntá inkekí piyan bano.’

^o25:21 Mat 24:45-47; Ruk 16:10 ^p25:29 Mat 13:12; Mak 4:25; Ruk 8:18

^q25:30 Mat 8:12; Ruk 13:28

Memé Bá Sipisipi Vaká Ma Sian Baékein Baya Ino

³¹ r⁴ “Banta Anin ma erin nain damú bei kakhan má kantasí ukhein kin karáká kumamen enisori kayo vá erinten mino. ³² s⁵ Kumamen erintin maen enisori kayo ano minó nanin banta o éke e éke uan béi vaintá me átaru urantín sipisipirá dafisin banta ano ma sipisipi yo aíáden memé do aíáden iyainí en kámpintan daiminten mino. ³³ Daíden sipisipi kayo ve ayan kurompá kaen inká memé kayo ve ayan ópá kaen inten mino.

³⁴ “Máan turantín maen kin mano ayan kurompá ma vain nanin banta máa sen tiamintemí, ‘Tifóe ano siretin nan amusin uren avábá ein mai ma vara ma arái ein tákéi inaru yafisimpin tiretin ninan utaan kaúantan baré ein mifo erive vá barano. ³⁵ t⁶ Para vara seyo, séi sirafan bákeya yunan timikhare ono. Téi non nan ékuya non timikhare ono. Téi enafá banta erékuya e amápin e sivían kae ono. ³⁶ Téi suí dana san ékuya simikhare ono. Téin tíiyá bákuya sentá dafíkare ono. Inká téi karavusifin bákuya o sontare ono.’

³⁷ “Máa sintin maen puntákein nanin banta ano evaránen béin máa sen tiamintemí, ‘Bafan noe, inte yamusá éi arafan nan ená dunan amiré non nan ená non amé é tife rafuno. ³⁸ Inte yamusá éi enafá bantá erenará aviré teti simá ore rafuno. Inte yamusá éi aúí dana san enará amikharé tiferafuno. ³⁹ Inte yamusá éin aí iya vayá inká karavusifin bayá ukhenasá tetí ankan o oné tiferafuno.’

⁴⁰ u⁴ “Máa sintin maen kin mano evaránen betin tiamintemí, ‘Téi fura sé tiretin tiamiyá uno. Mai ma sen tifá tiváeyan

ída aví bain kéká ká ma mai yanasinta variyaréeron mai sentái variyare ono.’

⁴¹ v⁴ “Máan ma siren ayan ópá ma varéin nain kéká san kin mano máa sintemí, ‘Afeyoran nanin banta siretí ankan tifó uveya Ban Anon má bei enisori kéká bá ina ma ída kípan ira ma utaádan baré ein maifin ná orono. ⁴² Para vara seyo, séi sirafan bákeya yunan ída simikhare ono. Téi non nan ékuya non ída simikhare ono. Téi enafá banta erékuya e amápin ída e sivían kae ono. ⁴³ Téi suí dana san ékuya ída simikhare ono. Téin tíiyá bákuya sentá ída yafíkare ono. Inká téi karavusifin bákuya ída o sontare ono.’

⁴⁴ “Máan ma sintin maen betí ankan béin evaránen ina intemí, ‘Bafan noe, inte yamusá éi arafan nan eyá non nan eyá enafá bantá ereyá aúí dana san eyá aí iya vayá inká karavusifin bayá ukhenará tetí ankan ída aya é tiferafuno.’

⁴⁵ “Máan ma sintin maen béi evaránen máa sen betin tiamintemí, ‘Téi fura sé tiretin tiamiyá uno. Mai ma sen tifá tiváeyan ída aví bain kéká ká ma ída mai yanasinta variyaré eona mai sentái ída variyare ono.’

⁴⁶ w⁴ “Máa sirantín maen mai nanin banta ano ma namu miyan o varan nain mai ída kípan para van oriyan ma van nain aí danái varanten mifo funtákein nanin banta ano ída kípan para van oriyan ban aunan baranten mino.

Yisasin Arin Aa Van Ma Yosein Baya Ino

(Maki 14:1-2; Ruku
22:1-2; Yoni 11:45-53)

26 Yisasi ma mai vaya kayo sian kípáren maen bei eyo iyampon

^r25:31 Mat 16:27; 19:28 ^s25:32 Isi 34:17; Rev 20:11-13 ^t25:35 Ais 58:7

^u25:40 Pro 19:17; Mat 10:42; Mak 9:41 ^v25:41 Mat 7:23

^w25:46 Dan 12:2; Yon 5:29

kayo máa sen tiamemí, ^{2x}“Tiretí ankan afová ukha ono. Avo Uantan Damú ma afoká inain mai kan damú ana ein mi vetí ankan Banta Anin avían namuro ayampin kaintin béin daa unkamádantá arinten mino.”

³Máan ma siyákan maen monó ánon banta kéká bá banasii ánon banta kéká bá ano mana monó ánon banta kékái ánon banta Kaiafasin amá átaru ukhen

⁴Yisasin ma kampun tiren pákaren aruan purin nain aa van aúpáké ten inen iyaren mino. ⁵Máan tiyáken beti semí, “Banasi ano ódaren aruvin dákó inafó Avo Uantan Damú teti ída vá ma yanasí ó tifano.”

Betaní Barurá Ma Yisasin Ánontá Aunka Uveri Vanaein Baya Ino

(Maki 14:3-9; Yoni 12:1-8)

⁶Betaní amon dana aí bain banta Sai-monin amá Yisasi varé íkan ^{7y}mana nanin mano kama auna iyain uveri kákan miyantá bain mamaren mai namun un pében Yisasi yunan nan takhó akhempá kumanten dunan niyaré íkan auna uveri ánompin mun banaen mino.

⁸Máan tíkan eyo iyampon kayo ano ódaren ará namuen oreraen temí, “Pará béi auna uveri savifá afe iyan nafino. ⁹Ma kama aunka ma iyain uveri anan ma sarí uré moní mádé ona ma ída vain kéká ma ameren mino.”

¹⁰Betí ma siyain baya Yisasi afová uren máa sen tiamemí, “Tiretí ankan pará ma nanin kakhirun ariyá ba rafono. Béi kama avúavasíi usintiyán mino. ^{11z}Ena ena yamúí ona ída van kéká tiretin má banten mifo séi ída siretin má ena ena vanté uno. ¹²Anasi ano ma auna uveri ma sen turá bana iyain mai senti masípin orin mi úta sintiyán mino. ¹³Téi fura siré tiretin tiamiyá uno. Ínainpá

ma kama vaya ma varen minó bara akhempá ma orera intin ma nanin ma varein avúava san tiren ininten mino.”

Yudasi Ma Yisasin Namuro Ayampin Avían Kaono Van Kana Ino Sein Baya Ino

(Maki 14:10-11; Ruku 22:3-6; Yoni 6:70-71)

¹⁴Maí damú tiyan mÍkan mifo sir-antan kan orun kádan (12) eyo iyampon kayo fintena mana Yudas Iskar-iotin ne sin banta ano monó ánon banta kayo vaípa onóben ^{15a}betin máa sen mo inaemí, “Téi ma Yisasin avían amirékuya mae séin náí yanasá timinte rafono.” Máa síkan teti (30) siriva moní dankáan ben amen mino. ¹⁶Amirákan betí ayampin ma Yisasin avían amin nain aa van Yudasi araién dosen mino.

Yisasi Ma Vei Eyo Iyampon Kayo Vá Avo Uantan Dunan Típa Neín Baya Ino

(Maki 14:12-21; Ruku 22:7-14, 21-23; Yoni 13:21-30)

^{17b}Yisi Ída Van Bereti Ma Nan Omá Damú kayoi esé arái in damú eyo iyampon kayo ano Yisasi vaintá eriven máa sen inaemí, “Intefasá mo fun-táádesá tetí Avo Uantan Dunan mo nanté tiferafuno.”

¹⁸Máa síkan Yisasi evaránen betin tiamemí, “Tireti kákan Yerusalemí barufin orive mana vanta ma onante máa se vá mai vanta siameno, “Tesi yamú inka ádé iyái sesi eyo iyampon kayo vá en amápin mo Avo Uantan Dunan naran muno sen arú ano semantino’ vá teno. ¹⁹Máa siran mai ma Yisasi siameiníen beni eyo iyampon kayo ano mo Avo Uantan dunan puntááden mino.

^x26:2 Eks 12:1-27; Mat 20:18

^y26:7 Ruk 7:37-38

^z26:11 Diu 15:11

^a26:15 Sek 11:12; Yon 11:57

^b26:17 Eks 12:14-20

²⁰⁻²¹ Máan turan inúpakesí iyain má tiyan míkan mifo sirantan kan orun ká-dan (12) eyo iyampon kayo vá dunan nan takhoká Yisasi kumamen dunan niyáken temí, “Téi fura siré tiretin tiamiyá uno. Tiretin pinté mana ano sesi namuro ayampin téin tivían kain nono.”

²² Maa síkan minó eyo iyampon kayo ano mai vaya iníden arunan en orera iyáken mana mana ano máa sen Yisasin inaemí, “Bafan noe, ída sen ne sin nono.”

²³ ^cMaa sen orera iyákan béi evará-nen temí, “Ma ma sen má ma ayan kain ma yunan dókifin araviyain mai anon téin namuro ayampin tivían kain-ten mino. ²⁴ Tiyarafenu ano vompon dókifin tikharé einíen Banta Anin mano furinten mifo Banta Anin ma namuro ayampin ma avían amin nain banta ano kákan uman uron mi varanten mino. Be anóe ano véin ída kaen baré intin mai kama inté ein mino.”

²⁵ Mai ma namuro ayampin ma Yisasin kain nain banta Yudasí ano máa sen béin inaemí, “Aru soe, séin nará tiya fono.”

Síkan Yisasi véin tiamemí, “Eyantái se ono.”

Yisasi Ma Vereti Vá Uvaini Vá Bei Eyo Iyampon Kayo Amein Baya Ino

(*Maki 14:22-26; Ruku 22:15-23; 1 Korini 11:23-25*)

²⁶ Betí ankan ma niyákan Yisasi mana vereti orun máden Tiyarafenu susu siantáden kisiren eyo iyampon kayo amiyan temí, “Ma séin tu ifo siretí ankan máde nano.”

²⁷ Niyákan mana uvaini kápi orun máden Tiyarafenu susu siantáden temí, “Tiretí ankan minó ano ma finte vá nano. ²⁸ ^dPara vara seyo, senti nare ma

vanain nain manon minó nanin bantai ume arúantáden tiretin má ma manafin kasen ban^f maman ákona inten mino. ²⁹ Téi siretin tiamiyá uno. Marákéi séi ída uvaini anu nan oriyaré maéi Sifóeni yafisimpin mi siretin má manafin auyen uvaini anu nanté uno.”

³⁰ ^eMaa siran betí ankan mana monó íf daren kákan baru me ampiren Orifí anufá oren mino.

Yisasi Ma Pita Nan Téin Oyan Timin Nono Sein Baya Ino

(*Maki 14:27-31; Ruku 22:31-34; Yoni 13:36-38*)

³¹ ^fOriven Yisasi vei eyo iyampon kayo máa sen tiamemí, “Tare inuran manan minó daná ten turá afoká intiya ma oniyasin mi siretíi mumunan eravinten mino. Mai van Tiyarafenui vompon dókifin máa sikhen mino:

“‘Téi sipisipirá dafisin banta arurékun sipisipi kéká meren asuse en karan orera inten mino.’ *Sek 13:7*

³² ^gMáan tinten mifo séi evaráné e man-taaré tiretin an uanté Karirifá oronté uno.”

³³ Maa síkan Pita evaránen béin tiamemí, “Éin aurá ma mai yaná afoká intin ma vetíi mumunan eravintin ma éin me ampiren karan orera intí maé téi ída uron mi éin me ampenté uno.”

³⁴ ^hMaa síkan Yisasi evaránen béin tiamemí, “Téi fura siré éin tiamiyá uno. Tare inuran manan kokore ída asikhan-tiya kanú manaú dádá ten nan ída afová ukhé uno sin nono.”

³⁵ Maa síkan Pita véin tiamemí, “Ída ino. Téi en má purono van pasé ída éin afová ukhé uno, sé ída uron mi senté

^f26:28 Manáa vompon dókifin máa sikhen mino: *ayen kasen ban*

^c26:23 Íbo 41:9 ^d26:28 Eks 24:8; Yer 31:31-34; Sek 9:11; 1Ko 10:16

^e26:30 Ruk 22:39; Yon 18:1 ^f26:31 Yon 16:32 ^g26:32 Mat 28:7, 16

^h26:34 Mat 26:69-75

uno,” síkan minó eyo iyampon kayo ano máan baya ana sen oreraen mino.

**Yisasi Ma Ketsemaní
Amúkein Baya Ino**

(Maki 14:32-42; Ruku 22:39-46)

³⁶ Yisasin má bei eyo iyampon kayo vá mana Ketsemani se siyain dunan anafin oriven maen betin tiamemí, “Tiretí ankan mará kumante sirá téi mesápá orivé mo simúkono.” ³⁷ Maa siren Pita má Sebetin anin kanan má avíaren oriyáken be au kasiyan avádúan onákan ará uman den ben aufá ída kamaen mino. ³⁸ ⁱMáan tiyáken betin tiamemí, “Téin tirá ma uman diyain mano ádé anantá téin tiruan purirí iyá umpo siretí ankan mará ten má ba vá dafiseno.”

³⁹ Maa siren béi manáa nentá oriven barará o mátimen auná bara finí uren máa sen amúkemí, “Téin Tifóe oe, éi kanaí ma ukhantiya mai kápi sen pinta yo varano van mi séi iyá umpo éi ída vá tenti sinunu yakhafono. Ei anunu ana vá dakhafono.”

⁴⁰ Maa sen amúkuren Yisasi evará-nen kanú manaú eyo iyampon baintá oriven onan auun bakharé íkan Pitan in-aemí, “Ídá mana áau rá ten má dafíke onante rafono. ⁴¹ Akhenókain tiretimpin afoká intiya erave ankamin nampo siretí ankan dafíke vá amúkiya vano. Aú ano mai yana san asese ukhan mifo yan bukhafafin ída ákona van mino.”

⁴² Maa siren béi evaránen oriven máa sen amúkemí, “Tifóe oe, mai kápi ma ída yo vararí intí maé téi nanté umpo mai ei anunu ánain ná bákurono.”

⁴³ Maa sen amúkuren ovaránen bei eyo iyampon kayo vaintá eriven onákan betin auunan ai eimpin auun bakharen

mino. ⁴⁴ Bakhan béi evaránen kanú manaú dádasí en oriven mo mai ma amúkein amúkiri anaen mino.

⁴⁵ Amúkuren béi evaránen eyo iyampon kayo vaintá oriven máa sen betin tiamemí, “Tiretí ankan aun ná bakhé bayá avíkiyá ba rafono. Onano. Ume vanta kayo ayampin ma Banta Anin ma kain nain áauí inka en mino. ⁴⁶ ^jMantá oró tifano. Namuro ayampin ma séin tivían kain nain banta masi inka eriyen mino.”

**Yisasini Namuro Kayo Ano
Ma Véin Pákein Baya Ino**

(Maki 14:43-50; Ruku 22:47-53; Yoni 18:3-12)

⁴⁷ Yisasi mai vaya fara siyákan tiyan míkan mifo sirantan kan orun kádan (12) eyo iyampon kayo finte Yudasin ne sin banta eren mino. Monó ánon banta kéká bá banasii ánon banta kayo vá ano siantan kokhon banta ano sópe vá karápuna vá bariyan uaren béin má eren mino. ⁴⁸ Yudasi ano ma Yisasin aní intin pákan nain nan pefá máa sen tiamikharen mino, “Téi ma mo amónanuna vanta[§] mai Yisasi ifo vá mai vanta vá pákano.” ⁴⁹ Maa sirákaren béi manádá ainen Yisasi vaintá oriven temí, “Aru soe, inuran mino.” Siyan béin amónen mino.

⁵⁰ Dafayoriyain má Yisasi máa sen béin tiamemí, “Tirona oe, éi ma varano van ereona yaná aine varano.”**

Maa siyain má minó banta ano Yisasi vaintá oriven bein páken mino. ⁵¹ ^kPákiyain má mana vanta ano Yisasin má baren tópe orun danúaren mana monó ánon banta kékái ánon bantai yoran banta átaren tíkaan kurú-

[§]26:48 Mai amónan avúavá ma vain mai arona ma kamaen avábá in mino.

**26:50 Mánáa vompon dókifin máa semí, “Tirona oe, para éi mafá ere fono.”

dan barará eraven mino. ⁵²^lEravíkan Yisasi máa sen béin tiamemí, “Ei sópe evaráneya veni anamumpin kuferano. Tópefó ma aruvin banta kéká tópe anon arintin purinten mino. ⁵³Téin nan ída kanaíen Tifóe vaípa ína intin kokhon tauseni enisori kayo siantantín eriven téin tiya inten minó té tiretí iniya rafono. ⁵⁴Téi ma máan tékun maen Tiyarafenui vompon dókifin ma séin turá afoká ino van ma siká ein baya ano ída kanaíen afoká inten mino.

⁵⁵^mMai áaurá ana Yisasi mai vanta kéká máa sen tiamemí, “Téi mana aau vantá bákuyá tiretí ankan téin pákano van tópe vá karápuna vá mamareyá ere rafono. Ena ena yamú ma séi monó dafufin báké banasi monó baya siamiyákeya fará mai rákena séin ída fáke rafono. ⁵⁶Sakhanampa vanta ano ma vompon uvamádan baré ein mai kanái ino van mi mai yanasinta afoká en mino,” Yisasi ma máa sirákan maen minó eyo iyampon kayo ano Yisasin me ampiren karan oreraen mino.

Yisasi Ma Kanisori Kéká Avorá O Mantein Baya Ino

*(Maki 14:53-65; Ruku 22:54-55,
63-71; Yoni 18:13-14, 19-24)*

⁵⁷Yisasi ma fákein banta kayo ano véin aviren monó ánon banta kékái ánon banta Kaiafasin amápin mo khaen mino. Mai namumpin man baya ma afová ukhein banta kayo vá banasii ánon banta kéká bá ano átaru ukharen mino. ⁵⁸Átaru ukhan Pita ano Yisasin bákuren oren mifo ída áde orinton nen táké en oriaren monó ánon banta kékái ánon bantai yafufin ódiven inte yanasá Yisasin aurá afoká inten nafi mai onano van dafisin banta kéká bá un kumanen mino.

⁵⁹Monó ánon banta kayo vá Kanisori kéká bá ano Yisasini mana aau yosiré mai anará béin aruan purono van kam-pun baya sin banta kéká san dosen mino. ⁶⁰Dosiyákan kokhon banta kayo ano eriven kampun baya kayofó ben auhin kurádiyan ten mifo ída mana aau kanaíen tian afoká uren mairá béin aruan purin nainíen mino. Máan tiyákan ínaimpáké kan banta ano eriven ⁶¹ⁿmáa semí, “Ma vanta ano Tiyarafenui kákan monó namun nan ‘téi kasaé barákuré kanú manaú damú ana evaráne uvaranté uno,’ sikharen mino.”

⁶²Máa síkan monó ánon banta kékái ánon banta ano e mantaven Yisasin máa sen inaemí, “Ma ma éin auhin kuráden tiyain baya kayo van éi náiesá tinte fono. Éi ídá mana vaya anona evaráne sinte fono.” ⁶³^oMáa síkan Yisasi ída mana vaya seimpin monó ánon banta kékái ánon banta ano véin tiamemí, “Para ma ayun ban oriyan bain Tiyarafenu avikasá éi fura seya setin tisimeno. Éi Tiyarafenu ano ma aní ukhein bantá bákeyá Ben Anin ná ba fono.”

⁶⁴^pMáa síkan Yisasi evaránen betin tiamemí, “Mai inka eyantái se ompo séi siretin tiamiyá uno. Ínaimpáké Banta Anin mano Minó Ákona Vain Tiyarafenui ayan kurompá kumamen inaru fáke konan daró erintiya onan nono.”

⁶⁵^qMáa siyain má monó ánon banta kékái ánon banta ano anú diyan bei au anamun bararó iyáken temí, “Béi Tiyarafenui varun bariyan mino. Tiretin má inikhen nan mi véi Tiyarafenui varun barein beyantái aau varanten mifo náí vará tetí ankan enádá bá manáa vanta arékun ná béini aau me sian amá inten

^l26:52 Esé 9:6; Rev 13:10 ^m26:55 Ruk 19:47; 21:37 ⁿ26:61 Yon 2:19-21

^o26:63 Ais 53:7; Mat 27:12 ^p26:64 Íbo 110:1; Dan 7:13; Mat 24:30

^q26:65 Mat 9:3; Yon 10:33

nafino. ⁶⁶Ída ino! Tiretí ankan inte esá té iniya rafono.”

Máa síkan betí ankan oovaren temí, “Béimpin aau van mifo vá arin purino!”

⁶⁷ Máa siren Yisasin aufen akhare siyan ayan daná ankamen mino. Inká ena kéká ano ápa ankamiyáken temí, ⁶⁸ “Éi seya Tiyarafenu ano aní ukhein banta uno séiya ompo inte vanta kayo anó éin ankamiyan nafi mai kayo aví éi sakanampafé eya setin tisimeno.”

Pita Ma Yisasin Nan Ída Afová Ukhé Uno Sein Baya Ino

(*Maki 14:66-72; Ruku 22:56-62; Yoni 18:15-18, 25-27*)

⁶⁹ Máan tiyákan mai yafufin Pita kumantaré in mana yoran arinta ano veni áde eriven máa semí, “Kariri fáke vanta Yisasin má éi nore ono.”

⁷⁰ Máa síkan Pita minó banta avorá temí, “Ída ino. Mai ma éi siyaona vaya séi ída afová ukhé uno.”

⁷¹ Máa siren ínaimpáké béi yafu onará oríkan ena yoran arinta ano ven ódaren mairá ma varé ein nanin banta máa sen tiamemí, “Ma vanta maen Nasaretíke Yisasin má baré ein banta ino.”

⁷² Máa síkan Pita evaránen asiká ayan befio uren temí, “Pura ódino! Téi ída mai vanta afová ukhé uno!”

⁷³ Máa siren manáa vákan mairá ádé ma mantakharé ein banta kayo ano Pita vaintá eriven máa sen tiamemí, “Pura seya éi mai kéká pintena vantana banan en amen avaya ano éin inka maman dáko en mino.”

⁷⁴ Máa síkan Pita ákonaen tiyáken, “Téi ída mai vanta afova ukhé umpo séi ma ída fura sékun maen ná Tiyarafenu ano séin uman timino,” ma siyain má ana kókore asen mino. ⁷⁵ Kókore ma asiyain má Yisasi ma síkhá ein baya Pita

ovaren me inen mino, “Kókore ma ída asikhantiya éi kanú manaú dádái sen nan ída afová ukhé uno sin nono.” Pita mai vaya ovaren me iniren barufá aravun kákan ífiden mino.

Monó Ánon Banta Kéká Ano Ma Pairotin Ayampin Yisasin Kaein Baya Ino

(*Maki 15:1; Ruku 23:1-2; Yoni 18:27-32*)

27 Do khakhiyain má pe ákura suron monó ánon banta kéká bá banasii ánon banta kayo vá ano Yisasin ma aruan purin nain baya sian damuáden mino. ² Máan turan ínaimpáké ben ayantá damuren aviren kamanini ayafa vanta Pairotin ayampin mo khaen mino.

Yudasi Ma Veyantá Aren Purein Baya Ino

(*Aposeri 1:18-19*)

³ Namuro ayampin ma Yisasin amein banta Yudasi ano onákan kó tiantáden Yisasin aruan purono van iyaimpin béi arunan iyáken kokhon ineine uvákon mai ma monó ánon banta kéká bá banasii ánon banta kayo vá ano ma teti (30) siriva moní ma amikharé ein evaránen baren betin mo ameno van oren mino. ⁴ Mo amiyáken temí, “Ída mana aau vain bantan téi umeféi siretin ayampin kaé uno.”

Síkan betí evaránen béin tiamemí, “Mai éin nina yaná ifo ída setin tina yaná ino.”

⁵ Máa siyaimpin Yudasi mai siriva moní baren kákan monó namumpin mo karúdaren beyantá mo anan aren mino.

⁶ Monó ánon banta kayo ano mai siriva moní mamaren temí, “Ma moní mai vanta aruan purintáke miyan mifo setí ankan ída vá monó namunpintena moní bá manafiní erá man baya yurafuró

¹26:66 Riv 24:16; Yon 19:7 ²26:67 Ais 50:6; 53:5 ³26:75 Mat 26:34

⁴27:5 Mat 26:14-15; Apo 1:18-19

tifano.”⁷ Maa siren betí ankan baya sian damuaren bara kave ma uvaran banta kayo fintena mana vara miyaní uren mai vara maman enafáke vanta kayoi vanta masí in baraién mino.⁸ Máan turákan mai van mi mai vara aví den Nare Er-avukhein Bara e sikhán mi saréa yere fara máa sen aví tiyan mino.⁹ Máan ma ein manon pefá ma sakhanampa vanta Yeremaiyan oorá ma Tiyarafenu ano siádan baré ein mi fura sen afoká en mino. Béi máan mi sikharen mino: “Is-areri kéká ano mai vanta teti (30) siriva monípói miyaní onté uno siren ma yan baré ein moní vetí ankan baren oren mi¹⁰ Bafan mano ma sisimikhá einíen mi mai monípóké bara kave uvaran banta kayoi vara o miyaníen mino.” *Sek 11:12-13; Yer 19:1-13; 32:6-9*

Yisasi Ma Pairotin Avorá O Mantein Baya Ino

(Maki 15:2-5; Ruku 23:3-5; Yoni 18:33-38)

¹¹ Máan tiyákan kamanini ayafa vanta Pairotin avorá Yisasi o mantavin béin inaemí, “Éi Yutan kayoi kin na fono.”

Síkan Yisasi evaránen tiamemí, “Eyo. Mai inka eyantá te ono.”

¹² Maa síkan monó ánon banta kéká bá banasii ánon banta kayo vá ano kokhon bayafó Yisasin augin kuráden ten mifo véi ída mana vaya anona evaránen ten mino.¹³ Ída mana vaya siyaimpin Pairoti ano evaránen béin inaemí, “Ara ara vaya kayofó ma éin augin kuráden ma vetí ankan tiyain mai éi ídá iniya fono.”¹⁴ Maa síkan Yisasi ída mana vaya anona evaránen Pairotin tiamiyaimpin béi kákantá anomé inen mino.

Pairoti Ano Ma Yutan Kéká Ayampin Yisasin Amein Baya Ino

(Maki 15:6-15; Ruku 23:13-25; Yoni 18:38-19:16)

¹⁵ Ena ena oranará Avo Uantan Dunan ma Nan Damú ma erin maen banasi ano ma aví tein karavusin kamanini ayafa vanta ano útúantan oré iyan mino.¹⁶ Maí damú mana kákan aau vanta Barabasin ne sin karavusifin bákan banasi ano afová ukharen mino.¹⁷ Máan tukharé íkan banasi o átaru uvin Pairoti ano inaemí, “Iyen ná útúantékun ná tireti vaípa orino vará iya rafono. Barabasin nafi áa Tiyarafenu ano ma aní ukhein banta Yisasin nafino.”¹⁸ Mai fara va Pairoti ano máa sen inaen naino. Béi afová ukhan monó ánon banta kéká auuyaniyáken Yisasin ará namu uantiyan kópin aviren erikhan mino.

¹⁹ Maa siren ma véi ma kó inin karáká kumantan maen be aná ano mana vaya máa siádan eremí, “Éi ída vá mai ma aau ída vain banta aurá mana avúavasí ono. Téi sare inuran mana kain ódákékun tirá uman diyá ineine iyá bá uno.”

²⁰ Maa sirákan maen Barabasin ifáesin erinti vá Yisasin aruan purono vá teya Pairotin tiameno siren monó ánon banta kéká bá banasii ánon banta kayo vá ano vanasi arápiníen mino.

²¹ Maa siyákan kamanini ayafa vanta ano vetin inaemí, “Tiretí ankaní anunu ano má kan banta finte inte vantá útúantékun ná orinten nafino.”

Maa síkan minó nanin banta ano oovararen temí, “Barabasi ná útúantano!”

²² Maa síkan Pairoti ano vetin inaemí, “Mai Tiyarafenu ano ma aní ukhein banta Yisasin intesá ino vará iniya rafono.”

Máan ma siyain má minó ano oovararen temí, “Daa unkamádantá béin arono!”

²³ Maa síkan Pairoti ano vetin inaemí, “Para vae. Béi náí auisá ukhen nafino.”

Maa siyan mifo vetí ankan avádóden oovararen temí, “Daa unkamádantá béin arono!”

²⁴ ^xAvádóden oovariyáken Pairotin avaya ída iniríen banasi ano aruvin ádé eimpin béi manáa non dáden betin avorá be ayan tesé uren temí, “Ma vantai nare ano ída sen tiyantá banten mifo mai siretin nina yaná ino.”

²⁵ ^yMaa síkan minó nanin banta ano evaránen oovararen tiamemí, “Béini nare ano áesin ná tetin tina yanasá baren ná tetin tikhafanafin ná bano.”

²⁶ Máan turen Pairoti ano Barabasin útúantan betí baípa oríkan inká aruvin banta kayo van tíkan Yisasin anan dafiyópó ankádan daa unkamádantá arino van betin ayampin amen mino.

Aruvin Banta Kéká Ano Ma Yisasin Máká Máká Ein Baya Ino

(Maki 15:16-20; Yoni 19:2-3)

²⁷ Amíkan kamanini ayafa vantai aruvin banta kéká ano kamanin amápin Yisasin aviren múden minó ano ven mamanan aúban kaúden iyen eúken mino.

²⁸ ^zIyuen beni au anamun do yaváden mana nararé au anamun mamanan uanten mino. ²⁹ Uantáden betí ankan mana ayankun anan máden anouren damuan kini kamamó ma einí uren ben ánotá afu uanten mino. Afu uantáden mana ayonta mamanan ayan kurompá pákaantáden aron kanan durafúden mátimiyán máa sen ben máká maáká iyan temí,

“Yutan kayoi ákona kin noe, en aví daní iyá tiféuno!” ³⁰ ^aMáan turen ben aufen akhare siren mai ma véin ayampin pákaantan baré ein ayonta máden ben ánotá kokhon dáda ankamen mino.

³¹ Betí ankan minó ano véin máká maáká uren mai ma nararé au anamun ma uantákaré ein do yaváden beni au anamun evaránen uantáden daa unkamádantá aruan purono van aviren oren mino.

Daa Unkamádantá Ma Yisasin Arein Baya Ino

(Maki 15:21-32; Ruku 23:26-43; Yoni 19:17-27)

³² Aviren oriyaren Sairiní baru ráke-Saimonin ne sin banta ano aasá eriyá íkan aruvin banta kéká ano ódaren béin duvun íkan Yisasini yaa unkamádan ayaen baren oren mino. ³³ Baren Korkota e ma siyain barurá o unen mino. (Mai ví ma yákein mai Ánon Dampai Varu inon tikhen mino). ³⁴ ^bMairá moren betí ankan aí barasin uvarano van uvaini non máden mana íta yaná bá opé uren Yisasin amíkan béi naan óden mai non ifá en mino. ³⁵ ^cAruvin banta kéká ano Yisasin daa unkamádantá antópó aruren maen beni au anamun barano van mairá kati sen mino. ^{††} ³⁶ Máan turen mairá kumanten bentá dafíken baren mino. ³⁷ Béin ma kó tiantein baya máa ven ánotá bompon uvaman kain baren mino. Mai vaya máa sen uvantaren mino: “MA YUTAN KAYOI KIN YISASI INO.” ³⁸ ^dYisasini ádé umoyan bantá kanan arukharen mino. Mana anon ayan kurompá ma vain daa unkamádantá aren inká ena anon ayan ópá ma vain daa unkamádantá aren ukharen

^{††} **27:35** Manáa Tiyarafenui vompon dókifin ena asotúin baya máa sikhemí, “Betí ma mai au anumuntá ma kati sein manon” pefá ma sakanampa vanta oorá ma síkhá ein bayai kanaíen mino.

^x27:24 Diu 21:6-9

^y27:25 Apo 5:28

^z27:28 Ruk 23:11

^a27:30 Ais 50:6

^b27:34 Íbo 69:21

^c27:35 Íbo 22:18

^d27:38 Ais 53:12

mino. ³⁹eMáan turákan banasi ano ma onóbe enóbe iyáken béin ayanavan baya siyáken maen ánon karú darú iyan ⁴⁰f^temí, “Éi eyantá eyan aya ono. Éi kákan monó namun barákureya kanú manaú damú ana evaráne uvaran banta ono. Éi fura seya Tiyarafenu Anin ma vantea mai yaa unkamádan táké me ampire varará erano.”

⁴¹Monó ánon banta kéká bá man baya ma afová ukhein banta kayo vá banasii ánon banta kéká bá ano yere máan mana sen ayanavan baya semí, ⁴²“Béi ena kayo anan aya iyaren mifo véi ída kanaíen beyan aya iyan mino. Béi Isarerii kin ma vanten maen áesin daa unkamádan me ampiren erantí maéi setí ankan bentá mumunan ó tifantéuno. ⁴³gBéi Tiyarafenu ánon mumunan iyáken mi sen téi Tiyarafenu Anin muno siyaren mifo Tiyarafenu ano ma ven nan ma anunu ukhanten maen áesin mai saréa véin kanaíen aya ino. ⁴⁴Mai ma umoyan bantá kan ma yaa unkamádantá ben má aruran baré ein kanan mano yere vá béin ayanavan baya ana sen mino.

Yisasi Ma Furein Baya Ino

(Maki 15:33-41; Ruku 23:44-49; Yoni 19:28-30)

⁴⁵Bayan aúbanasí íkan ma vara minó dun maren títipa ukhen ban áau eraven kanú manaú áauíen mino. ⁴⁶hKanú manaú áauí írí iyákan Yisasi avádóden ovaraaren máa semí, “Eri, Eri rema sabaktani?” Mai vayai ana máan mi ukhen mino. “Tenti Tiyarafenu oe, senti Tiyarafenu oe, éi fará téin oyan timiya fono.

⁴⁷Manáa vanta ma mairá ádé mantakhá ein kéká ano mai vaya iniren

temí, “Ma vanta ano Iraiyan mi ariyan mantino.”

⁴⁸iMáa siren mana ano savaen oren mófoden ma einí ukhein daná o máden uvainifin kain maifin pébin mana yankará damuren Yisasi nano van kain óden mino. ⁴⁹Kain ma ódiyákan manáa ano semí, “Iraiyan ano véin me aya inain pimpá ifo áúke ódaré ono.”

⁵⁰Yisasi enádá avádóden oovariyain má beni aunan kípan puren mino.

⁵¹jMai áaurá ana kákan monó namumpin ma kuran baré ein davaráe ano yanté kafasen barápá morúden man kaníen mino. Máan tíkan bara khaya iyain má kákan onámaná kayo ma varé ein kauren oreraen mino. ⁵²Máan tiyain má banta masí kayo khayosen oriaren duvavin Tiyarafenui kantasí ukhein nanin bantai ma fefá púkaré ein kéká ano e manten mino. ⁵³Ínaimpáké Yisasi ma evaránen e mantavíkan maen betí ankan masí me ampiren kantasí ukhein baru Yerusaremí afoká íkan kokhon mano vetin onen mino.

⁵⁴Aruvin banta kayoi ayafa vanta vá aruvin banta kéká bá ano Yisasi dáfikaren onákan bara khayain minó danasí iyaimpin moéken kákantá akhokho van uren beti máa semí, “Ma vanta fura sen Tiyarafenu Anin mi varen mino.”

⁵⁵kKokhon nanin kayo ano ma Yisasin aya ono van ma Kariri fáké béin bákuren erikharé ein nanin kayo ano manáa nentá mantakhen oniyen baren mino. ⁵⁶Maifin ma mantakharé ein nanin kéká mai kákan baru Makdaráke Marian má Yemisin nú Yosepin nú anóe Maria má inká Sebeti anin kanan anóen mái varen mino.

^e27:39 Íbo 22:7; 109:25 ^f27:40 Mat 26:61; Yon 2:19 ^g27:43 Íbo 22:8

^h27:46 Íbo 22:1 ⁱ27:48 Íbo 69:21 ^j27:51 Eks 26:31-33; Ibu 10:19-20

^k27:55 Ruk 8:2-3

Yisasin Ma On Aimpin Masí Ein Baya Ino

(Maki 15:42-47; Ruku
23:50-55; Yoni 19:38-42)

⁵⁷Inupasí iyákan Aramatía baru rákena moní banta Yosepin ne sin mano eren mino. Béin má mai mana Yisasini eyo iyampon mi varen mino. ⁵⁸^lBaren mi Yisasin au amintí barano van béi oren mo Pairointá ina íkan Pairoti ano aruvín banta kayo van Yisasin au Yosepin ameno sen mino. ⁵⁹Yosepi ano Yisasin au máden avusese en efanthen ukhein davaráe fóké úke en mino. ⁶⁰^mMai masí Yosepi ano manáa vanta kéká tíkan ompin boraádan baré íkan mai aimpin mo khauren mana kákan onámaná baébaé uan ain oyirá iyáden oren mino. ⁶¹Makdaráke Marian má ena Maria má ano mai masí ádé kumanten oniyán baren mino.

Masíká Ma Aruvín Banta Kéká Dafíkaré ein Baya Ino

⁶²Sabati rákena yaná ma Útavin Damú orivíkan ená damú[‡] monó ánon banta kéká bá Farasisi kayo vá ano Pairotin o onen mino. ⁶³ⁿO ódaren betí ankan máa sen ben tiamemí, “Kákan banta oe, mai kampun banta ano ma fara váken maen kanú manaú damú ma orivintí téi evaráné e mantanté uno ma sikharé ein baya van mi seti ovaré me ineine iyá tiféuno. ⁶⁴Máa sikhan mifo éi sesin ná masí oyirá ákonaen áta urantin ná kanú manaú damú orino. Ída ma máan tesin maen beni eyo iyampon kayo ano ven au e umoyan uaren béi inka evaránen purin pinté e manten mino sintin mai kampun

baya ano fefá ma véi sikharé ein kampun baya esantaren mo kákaní inten mino.”

⁶⁵Máa síkan Pairoti ano evaránen betin tiamemí, “Tiretí ankan aruvín banta kéká tesin ná mai masíká dafisino. Tiretí oreyá vá mai masíká ma ákona ono ma se iniyaona yanasisá mo ono.”

⁶⁶Máa sirákan betí ankan oren mo mai masí oyirá ákonaen áta uren aruvín banta kayo síkan mai masíká dafisen mino.

Yisasi Ma Evaránen E Mantein Baya Ino

(Maki 16:1-8; Ruku
24:1-12; Yoni 20:1-10)

28 Sabati yamú kípavin esé aráí in damú ákura suron áau eunono van iyákan Makdaráke nanin Marian má ena Marian má masíká onano van oren mino.

²Oriyain má manáda kákantá bara khayá íkan Bafani enisori ano inaru me ampiren eraven masí oyi rákena onámaná do vaébaé uan kaúden mai yaró kumantaren mino. ³Kumantan mai enisori aufáke afayu ma fanu seiní iyákan inká beni auí daná ano efanthen uron en mino. ⁴Máan tíkan betí ankan oniyán avinantan nan iyain má mai ákona ano minó aruvín banta kéká do ankaman karúdan barará baren orera uven purin banta kayo an den mino.

⁵Máan tukhan enisori ano maí kan nanin tiamemí, “Tiré kanan ída vá akhokho van ono. Mai ma yaa unkamá-dantá ma arein banta Yisasin nan doseno van mi eriyán ná téi afová ukhé uno. ⁶^oBéi ída mafin ban mino. Pefá ma véi sikaré einíen béi inka e mantakhen mifo véi ma vakharé ein takhópin eriveya

[‡]27:62 Ená damú maen mai Sabati yamú ino.

^l27:58 Diu 21:22-23 ^m27:60 Ais 53:9

ⁿ27:63 Mat 12:40; 16:21; Mak 9:31; 10:33-34; Ruk 9:22; 18:31-33; Yon 2:19-21

^o28:6 Mat 12:40; 16:21

onano. ⁷“dare aine evaráne ore vá beni eyo iyampon kayo vá mo máa se siameno, ‘Béi inka furin pinté evaránen e mantakhein tiretin an uanten Karirifá o vantiya mai fákena o onan noná’ mai vaya siretin tiamintói eré uno.”

⁸Máa síkan míkan nanin mano akhoko van uren ainen masí me ampiren beni eyo iyampon kayo siameno van amusin iyan tavaen oren mino.

Yisasi Ma Mákdaráke Nanin Marian Avorá Dákó Ein Baya Ino

(Maki 16:9-11; Yoni 20:11-18)

⁹Oriyá íkan Yisasi ainen manadá aasá afoká uven temí, “Ákurá ino.” Máa síkan míkan beni ádé oriven ben arantan bana fákaren míkan mano ventá monó tiyan aví daníen mino. ¹⁰^pMonó tirákan Yisasi vékan máa sen tiamemí, “Tiré kanan ída vá akhokho van iyáke ore vá te sífá tiváeyan mo siamesin Karirifá oriven maifá kena vá ten tonano.

Masí Oyirá Ma Yafiká ein Banta Kékái Vaya Ino

¹¹Míkan nanin mano ma oriyaintena arugin banta kéká ma masíká dafíkaré ein pinté manáa ano kákan barufin ódiven mai ma afoká ein baya máa monó ánon banta kéká tiamen mino. ¹²Tiamíkan monó ánon banta kéká bá banasii ánon banta kayo vá ano mai arugin banta kéká kokhon moní amiren ¹³temí, “Mana ano ma siretin inainti maeya máan ná teno, ‘Setí ankan inuran tuun baverunaren beni eyo iyam-

pon kayo ano ven au e umoyan baren oren mino.’ ¹⁴Kamanini ayafa vanta ano ma mai vaya inintí maé tetí ankan mai vaya ven má puntádékuya sireti ída aau varan nono.” ¹⁵Arugin banta kéká ano mai moní mamaren kákan banta kayoi vaya ánain dakhafen mino. Máan tíkan mai vaya ano minó Yutan kayofin orera uvin mai vaya sen eriyaré íkan taréa yere fara mai vaya sé iyan mino.

Yisasi Ma Vei Eyo Iyampon Kayo Ákona Yoran Amein Baya Ino

(Maki 16:14-18; Ruku 24:36-49; Yoni 20:19-23)

¹⁶^qTiyan míkan mifo sirantan mana orun kádan (11) eyo iyampon kayo ano Karirifá oren Yisasi ma veti nan mai anurasá orono ma sikharé ein anurá o unen mino. ¹⁷O unaven ma vetí ankan Yisasin oniyáken bentá monó tiyan aví daníen mifo manáa ano kan ineine iyaren mino. ¹⁸^rMáan tiyákan Yisasi veti vaintá eriven tiamemí, “Inaru ráke yaná bá bara ráke yaná bá dafisino van Tiyarafenu ano minó ákona séin inka simen mino. ¹⁹^sMáan tukhein nará tiretí ankan oriveya vá minó nanin banta man tenti eyo iyamponí ureya vá be Afóen má be Anin má beni Kantá Aunan má avikasá betin monó non péantano. ²⁰Péantáde vá tiretin ma ameruna vaya kayo vá betin afova amiresin ná mai ánain bákurino. Téi fura sé tiretí ankan má ena ena yamú bá oriyá bákun mi yamú mo akhení inten mino.”

^p28:10 Mat 26:32 ^q28:16 Mat 26:32

^r28:18 Yon 13:3; Efe 1:20-22

^s28:19 Mak 16:15-16; Apo 1:8

MAKINI KAMA VAYA INO

(Maki)

Makini Kama Vaya Ma Uvanteí Pákenai Afova Vaya Ino

Ma vompon ma uvantein banta ino.

Yerusaremíke nanin Marian anin Yon Maki Banabasin afóna anon uvanten mino. Porin nú Banabasin nú bá béin esé araíen monó baya varen orin dorarí ukharen mino. Oo siádan baya ano siyáken béi anon Pitan oo vantaí ukhen beni vaya o vaéan banasi amiyaren mino. Máan tiyákan Pita anon ma vompon ma uvaran danasinta véin amikhen minon ten manáa ano inikhen mino.

Uvarein orana ino.

AD sikisti-fo (64) ráké sikisti-fai (65) fin mi uvanten minon ten kokhon afova vanta kayo ano inikhen mino.

Ma vompon ma uvantein baru ino.

Kákan baru Romú ino.

Ma vompon ma uvaman amikhein kéká ino.

Romu kamani ano ma yafikein baru kayofin má ena anan kéká pinté ma monó tiyain kayon uvaman amikhen mino. Peyante monó dóki fintena vaya ma sakhanampaí uádan ma varé ein baya kayo ída kokhon mafin ban maen inká Yutan kékái anafu aráoni avúavá bá inan tian dákó en ukhen mino.

Nái ana vará ma vompon uvanten nafino.

Yisas Karaisi maen minó ákona vain Tiyarafenu Anin mifo ume nanin bantaí miyan ída van doran bantaí uven ma ume fintena aya uren ma miyaní ukhein mi aní ukhen mino.

Mónó Non Péantan Banta Yoni Ano Ma Aa Uvisein Baya Ino

(Matiu 3:1-12; Ruku 3:1-9,
15-17; Yoni 1:19-28)

1 Yisas Karaisi Tiyarafenu Anini kama vaya araí in máan mi ukhen mino. ²Sakhanampa vanta Aisaiyani vompon dókifin Tiyarafenu ano máa sen uvantaren mino,

“Ineno! Téi vaya varen orin banta siantékun éin an uanten oren eni aa mo uvisinten mino!” *Mar 3:1*

³“Kámá barafá mana vanta ano oovaren máa siyan mino,
‘Bafani aa uvíde vá beni aa funtarano.’”
Ais 40:3

⁴^tAisaiya máa sikáin monó non péantan banta Yoni ano kámá barafá afoká uven temí, “Ará baéde non baresin ná Tiyarafenu ano siretíi ume ampiantano.”

⁵Máa síkan Yerusaremí baru fáké bá Yudiá bara fáke nanin banta kayo vá ano Yoni vaintá eriven betíi ume sian páman urákan béi Yodení nompin monó non péanten mino. ⁶^uBéi kameri ayo fóké amú anan uren báken panon má bonkampun anu vá niyaren mino. ⁷^vNiyáken béi máan mi siyaremí, “Ten toyampá ma eriyaini ákona ano senti ákona moéken esantakhen mino. Téi ída funtákeruna ída kanaí é matimé beni arantan anamun anan útufonté uno. ⁸Téi non pokéi féan-

tiyá umpo véi Kantá Aunan pokéi féantanten mino.

**Yoni Ma Yisasin Monó
Non Péantein Baya Ino**

(*Matiu 3:13-17; Ruku 3:21-22*)

⁹Maí damú Yisasi Kariri varafá Nasaretí baru fáké eríkan Yoni ano Yodení nompin béin monó non péanten mino. ¹⁰Péantádan Yisasi non pinté e ayoren édiyan onákan inaru ona yivin kukhofá avúaváká ten Kantá Aunan mano véin ánontá eren mino. ¹¹W^wErákan inaru fáké mana oova ano máa semí, “Éi sen tanin uron mono. Éin nan moeké tinunu ukheruna iyampon mi van ná timusin iyá uno.”

**Ban Anon Mano Ma Yisasin
Akhenóka Ein Baya Ino**

(*Matiu 4:1-11; Ruku 4:1-13*)

¹²Máa siyain má Kantá Aunan mano Yisasin ainen tiantan banta ída van kámá barafá oren mino. ¹³x^xMaifá foti (40) yamú o vákan Ban Anon mano Yisasi eraven ankan mino van akhenóka uan onen mino. Béi kámá barafá afá uraran kayo vá ana vákan enisori kayo ano ventá dafíkaren mino.

**Yisasi Ma Karirifá Monó Doran
Mo Araí Ein Baya Ino**

(*Matiu 4:12-17; Ruku 4:14-15*)

¹⁴y^yEroti ma Yonin karavusifin pákaan kaúdan maen ínaimpáké Yisasi Kariri barafá Tiyarafenui kama vava siamen oren mino. ¹⁵z^zOriyáken temí, “Damú inka afoká íkan Tiyarafenui Yafisin inka ádé e van mino. Ará baéde vá Kama Vayará mumunan ono.”

**Yisasi Ma Araí En Bei Eyo
Iyampon Kayo Avirein Baya Ino**

(*Matiu 4:18-22*)

¹⁶Maná damú Yisasi Kariri non akhempá oriyaren onákan Saimonin má be afá Endurun má noyana van baseí iyaren mino. Mai fara va ino. Betí ankan noyana arin kékái váken baseí iyaren mino. ¹⁷Máan tiyaré íkan Yisasi vetin araren temí, “Ten má eresí aní ékuya noyana ma vaseí iyaonaí ureya vanasi avirano.” ¹⁸Máa síkan békanaan manádá base kayo me ampiyan béin bákuren oren mino.

¹⁹Yisasi ma non akhempá manáa oriyan onákan Sebetin anin kanan Yemisin nú Yonin nú botifin base kayo yókiyan baren mino. ²⁰Dókiyaré íkan békan nan ariyain má betí afóe Sebetin má doran banta kayo vá me ampiren Yisasin bákuren oren mino.

**Yisasi Ma Namu Aunan
Do Siantein Baya Ino**

(*Ruku 4:31-37*)

²¹Betí ankan Kapeniamú barurá o varé íkan Sabati yamú ma afoká íkan maen Yutan nanin bantai monó átaru namumpin Yisasi ódiven monó baya siamen mino. ²²a^aTiamíkan banasi ano iniren takhaen orera iyan temí, “Beni vava ano Yutan kayoi man bava ma afová uhein banta kéká ano ma vava seinisa iyan naino. Ída ino. Pura sikhein ákona vá ma vain banta ano ma seiníi iyan mino.”

²³Máa siyákan namu aunan ma vain banta ano mai monó átaru namumpin baren mino. ²⁴b^bMai vanta ano vádiyan temí, “Nasaretíke vanta Yisasi oe, éi setin namu ono vará ere fono. Tetí ankan

w^w1:11 Íbo 2:7; Ais 42:1; Mat 12:18; Mak 9:7 x^x1:13 Íbo 91:11-13

y^y1:14 Mak 6:17 z^z1:15 Mat 3:2 a^a1:22 Mat 7:28-29 b^b1:24 Mak 5:7

éin afová ukhékuya éi Tiyarafenui Mana Kantasi ukhaona uron mono!”

²⁵Máa síkan Yisasi mai namu aunan nan arankaan táden temí, “E avaya fákare véin pinté entavono!” ²⁶cMáa siyain má namu aunan mano mai vanta máden dómeron uren me ampiren bádiyan oren mino.

²⁷Máan tiyain má mai ma iyukhen oniyaré ein nanin banta ano sakha iyáken betiyan inain maran en temí, “Ma naísá iyan nafino. Ma auyen afovan bákan mai ákona fókéi namu aunan kayo yo siantian mai kéká ano véin oo yaiyiyan mino!” ²⁸dMáan turákan Yisasi ma varein avúavá baya ano ainen Kariri varafá oreraen mino.

Yisasi Ma Pitan Aná Anóen Ayofein Baya Ino

(*Matiu 8:14-15; Ruku 4:38-39*)

²⁹Yisasi ma mai monó átaru namun me ampiren Saimonin nú Enduru nú amapin orin maen Yemisin nú Yonin nú bá béin bákuren oren mino. ³⁰Oríkan betí ankan temí, “Saimonin aná anóen aí iyáken aufá ira kharo iyan bakhen mino” sen Yisasin tiamen mino. ³¹Máa síkan mai nanin ma vakhein ádé ódiven ayan bana fákaaren avían mantiyain má manádá aí kípavin mai nanin mano vetíi yunan taren mino.

Yisasi Ma Kokhon Nanin Banta Ayofein Baya Ino

(*Matiu 8:16-17; Ruku 4:40-41*)

³²Mai inúpa áau ma orun periyain má kokhon aí nanin banta vá namu aunan mano ma fákakhein kéká bá ina Yisasi vaintá aviren ere ere en mino. ³³Máan tiyákan Kapeniamú baru ráke nanin banta ano o vúten Yisasi ma varan nain avúavá onano van onará e átaru

en mino. ³⁴eMáan tuvin ara ara aí ma váein kayo ayofiyáken namu aunan ma fákakhá ein kéká pinte ina yo sianten mino. Máan ten mifo namu aunan kayo ano Yisasi iyé ban nafi mai véin afová ukhan pasen ída áíkan manáa vava sen mino.

Yisasi Ma Karirí Akhempá Monó Dorarí Ein Baya Ino

(*Ruku 4:42-44*)

³⁵fEná damú ída kakhakhan Yisasi fe ákura suron e mantaaren amúkono van banta i van kámá barafá beyaká oren mino. ³⁶Orivíkan ínainpáké Saimonin má manáa kéká bá Yisasin doseno van oren mino. ³⁷Oren ma o oman afoká uren maen temí, “Éin nan minó ano yosiyan mino.”

³⁸Máa síkan Yisasi evaránen betin tiamemí, “Monó baya siameno van mi erikhé umpo eritifé ena varu kayo fimpá orivé maifá ina mo siameno.” ³⁹gMáa siren Kapeniamú me ampíren Karirí barafá ma vain baru kayo fimpá oriven Yutan nanin bantai monó átaru namun kayofin monó baya siamiyáken kokhon nanin banta fintena yere namu aunan kayo yo sianten mino.

Amon Dana Aí Bain Banta Ma Yisasi Ayofein Baya Ino

(*Matiu 8:1-4; Ruku 5:12-16*)

⁴⁰Maná damú amon dana aí bain banta ano véin ayofano van Yisasin arantampin me aron kan durafúden temí, “Éi ma anunu iyanteya senti sí daná tiyofasintan nono.”

⁴¹Máa síkan Yisasi arunan máden ayan dan orin au aruviyan temí, “Eyo, ayofé umpo aí daná kípano.” ⁴²Máa siyain má anan mai amon dana aí manádá kípen mino. ⁴³Kípavin Yisasi

^c1:26 Mak 9:26 ^d1:28 Mat 4:24 ^e1:34 Mak 3:10-12

^f1:35 Mat 14:23; Mak 6:46 ^g1:39 Mat 4:23; 9:35

mai vanta siantan oriyan ákona veya siamemí, ⁴⁴h⁴⁴“Ída vá ena nanin banta ma veya siamiyáke funtáde ore vá monó doran banta aufasá mo aní ono. Máan ture fefá ma Mosesi sikhhan amon dana aí ma vá ein kéká ano ma variyá ein avúavasí eya vá manáa yanasinta vare mo ákonte esin ná banasi ano mai ma aí kipein ná onano.”

⁴⁵Máa síkan mifo mai vanta ano oriven banasi avorá Yisasi ma véin aí ayofein baya mo siamin iniren minó nanin banta ano Yisasi vaintá eren mino. Máan tiyaimpin Yisasi ma minó baru kayo fimpá orono sikhá ein me ifá uren banta ída vain akhempá o vákan minó akhen páke nanin banta ano kasaen be vaintá oren mino.

Ai Ayan Púká Ein Banta Ma Yisasi Ayofein Baya Ino

(Matiu 9:1-8; Ruku 5:17-26)

2 Manáa yamú ma orivíkan Yisasi evaránen Kapeniamú barurá o van mai veya ano ainen mai varufin oreraen mino. ²Orera íkan banasi ano o vúten mai ma váein namun e víkaaren onará ina ída afokhan bákan Yisasi monó baya siamen mino. ³Tiamiyákan kamí kamí banta ano ayan arantan púká ein banta kúkútafin kaúden aviren eren mino. ⁴Eríkan banasi ano víkakhhan ída kanafen Yisasi vaintá aviren orin nainí iyaimpin má nantá ódiven amompin kápóden anan póké kúkútará damuren mai aí banta Yisasi vaintá kain araven mino. ⁵Aravíkan Yisasi ma mai máa vantai mumunan ódaren maen mai ma ayan arantan púká ein banta siamemí, “Te sanin noe, eni ume ampianten mino.”

⁶Máan tiyan maen maifin manáa man baya ma afová ukhein banta kéká ina kumantaren máan ineine en oreraen mí, ⁷“Ma vanta ano fará máa siyan nafino.

Béi Tiyarafenui oyampá baya siyan mino! Mana vanta ano ída kanafen ume ampiantanten mifo Tiyarafenu veyafin mi mai ákona van mino!”

⁸Máan ineine en orera iyákan Yisasi afová uren betin tiamemí, “Ma avúavá ma variyaruna van tiretí ankan pará Tiyarafenui oyampá baya siyan mino sé iniyara fono. ⁹Ayan arantan púká ein banta van inte veya ma seruna anó teso sikhhen nafino. Eni ume ampianté uno ma seruna ano fi áa orun mantave ei kúkúta mamare orono ma seruna ano fino.” ¹⁰Mai avúavá ma variyaruna anon Banta Animpin ma varará ákona vákan ume ampiantian mino sé aní iyá uno.” Máa siren Yisasi mai ma ai ayan púká ein banta van temí, ¹¹Aí daná kípén mifo mantave ei yuvasí mamare varufá orono.” ¹²Máan ma siyain má mai vanta ano orun mantaaren duvasí mamaren mai ma oniyaré ein nanin banta yo éka náka iyáken oren mino. Mai ma iyukhá ein nanin banta ano mai avúavá ma oniyáken, “Máan avúavá tetí ankan pefá ída ontaré eruna yanái afoká en mino!” siyáken Tiyarafenu aví daníen mino.

Yisasi Ma Rivain Ne Sin Banta Arein Baya Ino

(Matiu 9:9-13; Ruku 5:27-32)

¹³Máan turen Yisasi evaránen non akhempá oríkan banasi ano ve vaintá o iyuvín monó baya siamen mino. ¹⁴Tiamíden oriyaren ma Arafusín anin Rivain onákan takisi varan namumpin kumantaréin maen béin ariyan temí, “Tesi eyo iyamponí in nompo ereno.” Síkan béi e mantaaren Yisasin bákuren oren mino.

¹⁵Mai inúpá Rivai ano Yisasin má bei eyo iyampon kayo vá arákan be amápin mo yunan niyan maifin takisi varan banta kéká bá ume nanin banta vá

inan baren mino. Máan avúavá bá bain nanin banta vá dere anon Yisasi ma or-eipá bákuren noren mino. ¹⁶iMai kéká bá ma Yisasi yunan niyákan man baya afová ukhein Farasi khayó ano Yisasini eyo iyampon kayo ina iyan temí, “Para Yisasi sakisi varan banta kayo vá ume nanin banta vá manafin dunan niyan nafino.”

¹⁷Mai ma ina iyain baya ma Yisasi iniyáken betin tiamemí, “Aí ma vain nanin banta ano anan ayofan banta vaípa oré iyan mifo ída ma aí bain nanin banta ano ída ayofan banta vaípa oré iyan mino. Puntákein nanin banta arano vara erikhe raumpo ume nanin banta arano van mi eriké uno.”

Dunan Ma Aurá Pákena Van Ma Yisasin Inaein Baya Ino

(*Matiu 9:14-17; Ruku 5:33-39*)

¹⁸Yonini eyo iyampon kayo vá Farasisi kayo vá ano yunan auraren bákan maná damú manáa nanin banta ano Yisasi vaintá eriven béin inaemí, “Yonini eyo iyampon kayo vá Farasisi kayo vá ano yunan auraren ban mifo fará ei eyo iyampon kayo ano ída yunan auriyan nafino.”

¹⁹Máa sen ina íkan Yisasi evaránen betin tiamemí, “Mana vanta ma anasi iman ameno van iyan maen mai omápin ma arakhá ein kéká ano yunan auré iyan nafino. Anasi iman amin banta vá ma váken ída kanaífen duna auran-ten mino. ²⁰Maná damusí intin anasi iman amin banta ma aviren orivintin maen dunan auran-ten mino.” ²¹Máa siren temí, “Mana vanta ano ída auyen davaráe kafádan póké peyante yavaráe ma yákkheimpin mo yamparen amu

é iyan mino. Auyen davaráe fóké ma yamparen amu urantin o fáke e fáke uaren kákantái yáken orera inten mino.” ²²Inká auyen uvaini anu kháan peyante memé augin ída khaé iyan mino. Peyante memé augin ma auyen uvaini anu khaintin maen paútiaren eravin nain nan mino. Auyen uvaini anu káan auyen memé augin mi khaé iyan mino.”

Yisasi Ma Veyan Nan Sabatii Bafan Muno Sein Baya Ino

(*Matiu 12:1-8; Ruku 6:1-5*)

²³Mana Sabati yamú ma Yisasi má bei eyo iyampon kayo vá arokhú dunampin oriyan maen bei eyo iyampon kayo ano arokhú ankanen oriyaren mino. ²⁴iMáan tiyákan Farasisi kayo ano ódaren Yisasin tiamemí, “Sabati yamú ma arokhú ankaniyain mai ída vá doran barano sikhein damúí vakan man bayan dura-furiyan mino. Mai ída ma máan toren mino.”

²⁵kMáa síkan Yisasi evaránen betin tiamemí, “Deviti má bei kéká bá arafan puríkan ma mantá ein avúavá tiretí ankan bompon dóki finte ídá dankádé afová ukhe fono. ²⁶lAbiata ma monó ánon doran pákakhein damú béi Ti-yarafenui mápin un pében monó ánon doran pákakhein kéká ano ana kantasí ukhein bereti niyain un máden niyáken bei kéká amin nakhen mino. Máan ma ein mai man baya yeren durafunten mino.” ²⁷mMáa siren betin tiamemí, “Banasi aya ino van mi Sabati uvádan ban mifo vanasi ano Sabati aya ono vara uvamádan ban naino. Ída ino. ²⁸Mai van mi Banta Anin mano Sabatii Bafan ban mino.”

ⁱ2:16 Mat 11:19

^j2:24 Diu 23:25

^k2:25 1Sa 21:1-6

^l2:26 Riv 24:5-9

^m2:27 Diu 5:14

Yisasi Ma Mana Ayan Púkein Banta Ma Sabati Yamú Ayofein Baya Ino

(Matiu 12:9-14; Ruku 6:6-11)

3 Ená damú Yisasi evaránen Yutan nanin bantai monó átaru namumpin ódíkan aiayan púkein banta ano maifin baren mino. ²Maí damú Sabati varé íkan Yisasin nan manáa avúavá má-dantí béin augin pákaan kaono van ben ma namuroí uantiyain kéká ano sen inen uaren béintá dafian ákona ukharen mino. ³Máan tukhan Yisasi mai ma aiayan púkein banta siamemí, “Minó avorá mará e mantano.” ⁴Máa siren Yisasi vetin inaemí, “Sabati yamú ma kama avúavá mamantan manó kama ukhen nafi áa namu avúavá ma mamantan manó kama ukhen nafino. Má damú banta aruan puró tifante rafuno áa ayaó tifante rafuno.” Máa síkan betí ankan baya ída sen mino. ⁵Máan tiyaimpin Yisasi onen eúkiyáken betin ará ákona ukhan aran daná máden mai ma aiayan púkein banta van temí, “Ayan antúkano” síkan ayan antúkiyain má evaránen ayan kamaen mino. ⁶Máan tiyain má Fara-sisi kayo ano ainen e manten oren Ero-tini kéká bá mo Yisasin ma aruan purin nain aa van ten inen en mino.

Kokhon Nanin Banta Ano Ma Yisasin Bákuren Orein Baya Ino

(Ruku 6:17-19)

⁷Yisasin má bei eyo iyampon kayo vá ano Karirí non akhempá oríkan kokhon nanin banta ano véin bákuren oren mino. ⁸Yisasi ma varyiain dana san ma vanasi ano inen Yudiáke safi Yerusaremíke safi inká Idumiáke safi Yodení non ufáke safi inká Taiya vá Saidoní akhen páke nanin banta ano fi mai ma

varyiain avúavá onano van ere ere en mino.

⁹Máan tiyan kokhon nanin banta ano eyu akhempá bíkiyákan boti varen erino van Yisasi vei eyo iyampon kayo siamen mino. ¹⁰P^{Maí} damú kokhon nanin banta ayofen mino. Máan ma iyain avúava san af nanin banta ano Yisasin au aruvono van béi vaintá oren mino. ¹¹Q^{Máan} tiyákan namu aunan ma varé ein kayo ano Yisasin ma oniyáken béin anafin o ankamiyan bá diyáken, “Éi Tiyarafenu Anin mono” sen mino. ¹²T^{Máa} ma síkan béi iyé ban nafi ída sian páman ino van Yisasi vetí ankan kákan airo ananí uanten mino.

Tiyan Míkan Mifo Sirantan Kan Orun Kádan (12) Eyo Iyampon Kayo Ma Yisasi Aní Ein Baya Ino

(Matiu 10:1-4; Ruku 6:12-16)

¹³Ínaimpáké Yisasi anurá ódiven bei kékási ma inain banta kayo arákan béi vaintá oren mino. ¹⁴Onóbin tiyan míkan mifo sirantan kan orun kádan (12) banta avíden béi má nóken monó baya varen orino van aposeri kéká ino sen aren mino. ¹⁵Araren namu aunan ma yo siantan ákona vetin amen mino.

¹⁶S^{Ma} sirantan kan orun kádan (12) banta ma avirein kékái aví ino. (Ínaimpáké Pita ne sen ma arein banta) Saimoni ino.

¹⁷T^{Sebetin} anin Yemisin nú be afá Yoni nu san Boanekesi ne sen mino. Mai víi ana maen aafa ma kankaré tiyain anin kanan nen tikhen mino.

¹⁸Inká Enduru ne sen, Firipi ne sen, Batoromu ne sen, Matiu ne sen, Tomasi ne sen, Arafiusin anin Yemisi ne sen, inká Tadiasi ne sen, mana Seroti anan banta van Saimoni ne sen, ¹⁹inká (ínaimpáké ma namuro ayampin avían

³3:4 Ruk 14:3 ⁶3:6 Mat 22:15-16 ¹⁰3:10 Mat 14:36 ¹¹3:11 Ruk 4:41

¹²3:12 Mak 1:34 ¹⁶3:16 Yon 1:42 ¹⁷3:17 Ruk 9:54

amin nain banta van) Yudas Iskariotin^{¶¶} ne sen en mino.

Yisasi Má Beseburin Máí Vaya Ino

(*Matiu 12:24-32; Ruku 11:14-23; 12:10*)

²⁰Ínaimpáké ma Yisasi evaránen béi ma varé ein namumpin ma oríkan kokhon nanin banta ano evaránen o átaru iyákan béi má bei eyo iyampon kayo vá ano ma yunan nan afokhan ída varen mino. ²¹Máan tiyain baya ma Yisasini kéká ano iniren “béin nan óen mi iyan mino” siren aviré barufá orono van eren mino.

²²^uEríkan Yutan kayoi man baya ma afová ukhein kéká ma Yerusaremíké erein kayo ano semí, “Beseburin ne sin namu aunani ánon banta anon béimpin báken mi namu aunan ma yo siantan ákona amiyan mi namu aunan do siantiyán mino.”

²³Máa síkan Yisasi iniren betin aran eríkan baya o vaéden tiamemí, “Ban Anon mano kanaisá ená Ban Anon do siantanten nafino. ²⁴Mana vantai yafisimpin ma yaíden aruvinten maen ída kanaíen ákona ukhen banten mino. ²⁵Inká mana namun pinté ma yaíden beraran aruvinten maen ída kanaíen ákona ukhen banten mino. ²⁶Inká Ban Anon mano ma veraran daiminten maen mai inté en ná mantaan ákona ukhen banten nafino. Ída ino. Máan ma inten ída ayáká banten mifo ainen mo kí-panten mino.” ²⁷Máa siren ena vaya sian baéan amen temí, “Mana vanta ano ída kanaíen ákona vanta amá pinta ódiven beni ona umoyan baranten mino. Béin nare ma anan póké damuan kaúden manan beni minó ona umoyan baranten mino.” ²⁸Máan tukháí siretin pura vayan tiamenté uno. Minó ume

khayo vá Tiyarafenu ma oyampá baya sin ume khayó vá Tiyarafenu ano kasaen ampiantanten mifo, ²⁹Kantá Aunan ma oyampá baya sin ume ana ída kanaíen ampiantanten mino. Mai ume ano fara van oriyán banten mino.”

³⁰Yutan kayoi man baya afova man-tein kéká ano ma Yisasi nan “namu aunan máí va ono” ma sein nan mi mai vaya sen mino.

Yisasini Mana Kékasi

Ma Iyain Baya Ino

(*Matiu 12:46-50; Ruku 8:19-21*)

³¹^vMáa siyákan Yisasin anóen má be afá kayo vá ano véi ma vain namun baintá eren mino. Barurá e iyuvén Yisasin mun tiamintin barufá erantí béin má baya seno van baya yan óden mino. ³²Kokhon nanin banta ano Yisasin mamán aúban den iyukháin manáa vanta ano véin tiamemí, “E anóen má e afá kayo vá ano onano van barurá e iyukhen éin nan ina iyan mino.”

³³Máa síkan Yisasi evaránen inaemí, “Iyé ten tinóe vákan iye néné ten tifá tiváeyan ban nafino.” ³⁴Máa siren mai ma iyukhá ein nanin banta onen eúkiyáken temí, “Ma ma iyukhein nanin banta mai se sinóen má te sífá tiváeyan máí van mino. ³⁵Intéa nanin banta anó Tiyarafenui oo yayiyán nafi mai kéká pura sen te sintun mi van mino.”

Danayun Ma Fafasin Bantará Ma Ovaéádein Baya Ino

(*Matiu 13:1-9; Ruku 8:4-8*)

4^wYisasi evaránen Kariri non akhempá oriven monó baya siyákan kokhon nanin banta ano eyu akhempá o átaru en mino. Átaru iyaimpin botifin un kumamen manáa e afánen o váken

^{¶¶}**3:19** Yudas Iskarioti e ma siyain *Iskariotí baru ráke vantan* ban mino.

^u**3:22** Mat 9:34; 10:25 ^v**3:31** Mak 6:3; Yon 2:12; Apo 1:14

^w**4:1** Mak 3:7-9; Ruk 5:1-3

monó baya siamiyan mino. ^{2x}Máan tiyáken maen minó baya vaédiyáken banasi siamiyain pintena mana o vaeran baya máa semí,

³“Ineno, Mana vanta ano yanayun mo fafa seno van oren mino. ⁴Danayun ma mamaren oriyákan manáa ayun mano aa akhempá eravíkan nun kayo ano mai ma eravein afen nen mino. ⁵Manáa ayun mano manáa vara on daró baré íkan mai yaró eravukharen ainen orun ampamen mino. ⁶Ampantaré in ma áau édaviyain ma kákan á kan maen mai ma ampamein ayun mano ída kokhon bara varéin pasen ainen kafuren mino. ⁷Inká manáa ayun ma ayankun namampin eravukhá ein mano ma e ampamen édavín ayankun naman mano úkuaren mákáká uádan ída aran iren mino. ⁸Manáa ayun mano kama varafin eravukharen mai ano ampamaren kokhon aran iren mino. Manáa ano teti (30) irákan inká manáa ano sikisti (60) iran inká manáa ano mana antareti (100) vá manáa moéken imádan en mino.” ⁹Máa siren Yisasi semí, “Átaren ma van nain kayo áesin ná ma vaya iniren afová ino.”

**Yisasi Ma Ovaeran Baya Fákena
Ma Sian Amá Ein Baya Ino**

(Matiu 13:10-17; Ruku 8:9-10)

¹⁰Ínainmpáké banasi ma orivíkan Yisasin má bei eyo iyampon tiyan míkan mifo sirantan kan orun kádan (12) má manáa nanin banta kayo vá ana váken máa sen Yisasin inaemí, “Éi ma vaéde siya ona vaya kayoi ana mai intesá ukhen nafino.”

¹¹Máa síkan betin evaránen tiamemí, “Tiyarafenui yafisimpin ma aúpá baya vain mi siretin aní iyá umpo vanasi ano ma ída sentá mumunan iyain kayo ano ída kanaíen tian baeran bayai ana afová

inten mino. ^{12y}Mai van mi Tiyarafenui vompon dóki ano máa sikharen mino. “Téi ma variyarúna avúavá betí ankan onanten mifo

ída veni ana afová inten mino.

Tenti vaya vetí ankan ininten mifo

ída kanaíen beni ana afová inten mino.

Máan tiyáken ume finté ída ovaránantin betíi ume ifá uantante mino.” *Ais 6:9-10*

**Danayun Pafasi Pákenai Ovaeran
Baya Ma Sian Amá Ein Baya Ino**

(Matiu 13:18-23; Ruku 8:11-15)

¹³Máa siren Yisasi semí, “Mai vaeran baya ma siretí ankan ída afová inteya mai minó baya ma vaédiyá tiamenunai ana inté ureyá afová inte rafono.” ¹⁴Máa siren betin tiamemí, “Mai yanayun ma fafasein banta ano Tiyarafenui vayan pafa siyan mino. ¹⁵Asá ma manáa yanayun eravein mai Tiyarafenui vaya ma vanasi ano iniran ma Ban Anon mano ainen eriven betin aúkáke yo varé iyan mino. ¹⁶Inká manáa yanayun ma on daró eravein mai vanasi ano ma ainen Tiyarafenui vaya iniren amusin é iyain mino. ¹⁷Máan té iyan mifo vetíi arú ano ída námen aravukhan mi ída ayáká báe iyan mino. Máan tukhan mi Tiyarafenui vaya ma siyaintá ma uman nafi aufi ma erin maen ainen eraven ankamé iyan mino. ¹⁸Manáa yanayun ma ayankun namampin eravein mai Tiyarafenui vaya ma iniyain mino. ^{19z}Iniren ma vara ráke yana san ma in ineine ma erin maen Tiyarafenui vaya me ampiren ainen oré iyan mino. Moní ona van in nafi inká bara ráke yaná kokhon barano van in avúavá anon Tiyarafenui vaya me yaramádan ída aran iré iyan mino. ²⁰Inká kama varafin ma eravein danayun kayoi mai vanasi ano ma Tiyarafenui vaya iniren ma aran iré iyain kékái aní ukhen mino. Manáa ano

teti (30) irákan inká manáa ano sikisti (60) iran inká manáa ano mana antareti (100) vá manáa moéken imádan é iyan mino.”

**Daamu Ma Antúduan Kain Nan
Ma Sian Baékein Baya Ino**

(Ruku 8:16-18)

²¹ ^aYisasi vetí ankan tiamemí, “Mana vanta ano ma yaamu antúduan kurafin ná kuferé iyan nafino. Áa sakhó aránaó pasá kaé iyan nafino. Ída ino. Takhókái kaé iyan mino. ²² ^bMinó daná ma aúpa ma váin nain mai ínaimpáké dákó inten mino. Mana vanta ano ma mana yaná dará dantin báin nain mai yaná ínaimpá afoká inten mino. ²³ Átaren ma vantin ineno van inain mano áesin ná inino.”

²⁴ ^cMáa siren betin tiamemí, “Sireti ma vaya inire mai vayai ana kama e vá afová ono. Tiretí ankan ma ena nanin banta siamesin maen Tiyarafenu ano máan avúaváká anan tiretin má amiren ena vá moéken aminten mino. ²⁵ ^dManáa vantá ano inireya yoran baresin maen Tiyarafenu ano moéken afova aminten mino. Inká manáa vanta ano ma iniren doran ída varantin maen Tiyarafenu ano véin pintena mai ma mantáin nain afova yo varanten mino.

**Danayun Ma E Ampamintá
Ma Sian Baékein Baya Ino**

²⁶ Yisasi evaránen temí, “Tiyarafenui yafisimpin máan mi ukhen mino. Mana vanta ano yunan barafin danayun mo fafasen mino. ²⁷ Pafa siren e váken in-uran má bayan má intesá en ná ban nafi ída afová íkan mai yanayun mano veyantá e ampamen mino. ²⁸ Mana ano ída ayaíkan barai ákonará anan mai yanayun mano e ampamen mino. E ampamaren araíen amun ana ódiaren aran

imádákaren mi ínaimpáké afukhé iyan mino. ²⁹ ^eAfu khakharé íkan ínaimpáké dunan duyasín damusí ma in maen mai vanta ano sope fóké mai yunan duyasé iyan mino.

**Titó Daa Arantá Ma
Sian Baékein Baya Ino**

(Matiu 13:31-32; Ruku 13:18-19)

³⁰ Yisasi evaránen temí, “Téi inté uresá Tiyarafenui Yafisin pintena vaya siamente rafuno. Mai vaya inte yaná kasá tian baerante rafuno. ³¹ Mana Yudia nanin bantai varafá ma mastati e sin daa ma vain mai aran aú an mi yakhen mino. Mai aran aú ano ída ena yaa aran aú an dakhen mifo véi sító aúí van mino. ³² Máan tukhan mi mana vanta ano ma mai aú dódan baren e ampamen kákaní uaren nun kayo ano ma kasaen o yomaniríen ayan dan orera uven konesí é iyan mino.”

³³ Máan baya khayó fókéi vanasi ano ma kasaen afová oren avúaváká Yisasi ano vaya vaédiyan mana siamiyaren mino. ³⁴ Banasifin ma váken mana vaya ída funtáden tiamiyaren mifo minó baya vaédiyan manan tiamiyaren mino. Ínaimpáké bei eyo iyampon kayo vá ana ma váken mi mai vayai ana sian amá uan amiyaren mino.

**Yisasi Ma Kákan Uva
Yo Siantein Baya Ino**

(Matiu 8:23-27; Ruku 8:22-25)

³⁵ Maí damú áau eraven inúpasí íkan Yisasi vetin tiamemí, “Eritifé non e khádé ena ufá oró tifano.” ³⁶ Máa síkan betí ankan mai nanin banta me ampiren Yisasi ma kumantá ein bótifin un kumamen oríkan manáa voti kayo ano vetin dakhafen oren mino. ³⁷ Oriyaré íkan kákan uva uaren non karantó en

^a4:21 Mat 5:15; Ruk 11:33 ^b4:22 Mat 10:26; Ruk 12:2 ^c4:24 Mat 7:2

^d4:25 Mat 13:12; 25:29; Ruk 19:26 ^e4:29 Yoe 3:13; Rev 14:15

botifin avanen ódiaren mai votifin non mano víkaríen mino.

³⁸Máan tiyákan Yisasi mai voti oy-ampáke kanuká ánon kaúden bakharen mino. Bakharé íkan betí ankan beín avoren temí, “Aruso oe! Ádé anantá tetí ankan non ufuró tifanté umpo éi ídá mai van iniya fono.”

³⁹Máa síkan Yisasi e mantaaren uva asiyáken non nan temí, “Kípantiya! Púkekhan!” Máa siyain má uva kípan non mano evaránen púkekhen mino.

⁴⁰Máan turen Yisasi vei eyo iyampon kayo siamemí, “Pará tiretí ankan akhokho van iya fono. Tiretí ankampin mumunan ídá ban nafino.”

⁴¹Máa síkan betí ankan kákantá akhokho van uren betiyan ten oreraen temí, “Ma vanta véi iyé bákan ná uva vá non má ano véin avaya iniyan nafino.”

Yisasi Ma Namu Aunan Bain Banta Ayofein Baya Ino

(Matiu 8:28-34; Ruku 8:26-39)

5 Yisasi má bei eyo iyampon kayo vá ano Kariri non e kháden Kerasá barafá oren mino. ²Yisasi ma voti finté eraviyain má mana namu aunan mano fákakhan óen iyain banta ano vanta ma masí ukheí páké beín onano van eren mino. ³Mai vanta ano vanta ma masí uran bain pimpá baren nókan mana vanta ano véin ída kanaíen ayanan kuvirí ukhan inká seni anan póké dere ída kanaíen kuviyaren mino. ⁴Seni anan póké safi ankati fo safi kokhon damú ayan arantantá damuran mai anan antáden tító tító iyákan ída kanaíen mana vanta ano véin pákaan kaiyaren mino. ⁵Máan tiyáken mai vanta ano inuran má bayan má banta ma masí ukhein pimpa safi inká anuyon kayo fimpa safi nóken bá diyan maen eraven onámaná kayorá be au kaviyaren mino.

⁶Máan tiyaren mai vanta ano manáa nen táké Yisasin óden maen tavaen oren beín aufá mo aron kanan durafúden mátimen mino. ⁷^fMátimen avádóen oovararen temí, “Yisasi oe, Éi Yan Bain Tiyaarafenu Anin mompo séin náisá usintano vará eriya fono. Téin ma ída namu inteya mai Tiyaarafenu aviká purase sisimeno van muno.” ⁸Mai fara va máa sen naino. Yisasi ma siyáken, “Namu aunan mompo mai vanta finté eravono,” ma sein nan mino.

⁹Máa síkan Yisasi mai vanta inaemí, “Éin aví iye fino.”

Síkan béi semí, “Te sivi kokhoná uno. Mai fara vara seyo, setí ankan kokhon kékái vá tíféuno.” ¹⁰Máa siren mai namu aunan kayo ída siantantin mai varu me ampiré nentá orono van ákonaen Yisasi vaípa ínanen inaen mino. ¹¹Máa siyákan mai ádé tító anurá kokhon pon kayo iyukhen dunan niyaren mino. ¹²Máan tiyákan mai namu aunan kayo ano Yisasi vaípa ínanen tiamemí, “Éi sétin tisin-tesí mesan pon kayo aúpin oferá tifano van muno.” ¹³Máa síkan Yisasi kana ino siyain má mai namu aunan kayo ano mai vanta me ampiren oren pon kayo aúpin oferan mino. O fébíkkan kan tauseni (2,000) fon kayo ano savaen mana kákan ayafin aravuaren non akharumpin orun áduven ufuren puren mino.

¹⁴Máan tíkan pontá ma yafisiyaré ein banta kayo ano karan oriyáken kákan baru kayofin má mai akhempá ma vain baru kayofin má mai ma afoká ein baya e siamen oriyákan betiyantá onano van ore ore en mino. ¹⁵Minó nanin banta ano Yisasi vaintá oriven onákan mai ma namu aunan ma fákakhá ein banta ano yavaráe íden kamaen kumantan o óden akhokho van en mino. ¹⁶Máan tíkan ma o onein kayo ano mai ma namu aunan pákakhá ein banta vá pon kayo vá aman-

iná ma afoká ein avúavá baya vanasi me siamen mino. ¹⁷Máa síkan banasi ano iniren Yisasin nan mai vara me ampiren enafá orino van ákonaen baya sen mino.

¹⁸Máa síkan Yisasi ma evaránen botifin ódin maen mai ma fefá namu aunan mano fákakhá ein banta ano véin má orono van ínanen inaen mino. ¹⁹Máa síkan maen Yisasi mai vanta siamemí, “Bafan mano ma arunkaren éin kama uantein nan barufá ore ei kéká mo siameno.” ²⁰Máa síkan mai vanta ano oren mai ma véin aya ein baya Dekaporisí barafá mo sian afokáin minó nanin banta ano kokhon ineine iyáken takhaen oreraen mino.

**Yisasi Ma Fúká Ein Arinta
Avían Mantén Ma Aí Nanin
Ayofen Ma Ein Baya Ino**

(Matiu 9:18-26; Ruku 8:40-56)

²¹Máan turen Yisasi evaránen botifin Karirí non e kháden ena ufa oriven non akhempá o vákan kokhon nanin banta e átaru en mino. ²²Átaru ukhan mana monó namuntá ma ánoní ukhein banta Yairasin ne sin mano eren mino. Béi Yisasin onen ben arantampin e matimen mino. ²³Matimen Yisasin ákonaen inaemí. “Te siraun arará purono van iyá umpo éi kaná ereya véintá mo ayan kaúde ayofesin ná evaránen asefa inten nafino.”

²⁴Máa síkan Yisasi véin avákuren oriyákan kokhon nanin banta ano mákáká uven oren mino. ²⁵Tiyan míkan mifo sirantan kan orun kádan (12) oranará biyon aí daná baren oriyan baré ein nanin má maifin baren mino. ²⁶Mai nanin mano kokhon damú ayofan banta kayo vaípa bei moní mo miyaní uan kíparan mai aí daná ano moéken aí ana iyan ída kípaanten mino. ²⁷Mai nanin mano Yisasini vava ma siamin

iníden maen banasi mákáká ukheimpin oriaren ben oyampáké beni ayá au anamun aruven mino. ²⁸Mai farava máanten naino. “Téi ma siyan máa ma veni au anamuntá kaonté evaráne kama onté uno,” sen iniren mino. ²⁹Máa sen iníden ma aruviyain má manádá ainen beni nare vo íkan béi aváduan onákan mai aí daná kípen mino.

³⁰ḡMáan tikan Yisasi afová in manáa vei ákona oríkan do vaéaren máa sen inaemí, “Iyé tenti su anamun aruven nafino.”

³¹Máa síkan bei eyo iyampon kayo ano máa sen béin tiamemí, “Éi oniyá fono. Kokhon nanin banta anon éin mákáká ukhen mifo éi fará, ‘Iyé tén tu anamun tiruviyan nafino,’ siya fono.”

³²Máa siyákan maen Yisasi vei au anamun ma aruvein onano van onen eúken mino. ³³Máan tikan mai nanin mano ve aurá ma afoká ein dana san pé den avinantan má Yisasi vaintá aron kánan mo yurafúden matimen be aurá ma afoká ein dana san tiamen mino. ³⁴ᵀTian míkan Yisasi véin evaránen tiamemí, “Tiraun noe, Éini mumunan manon eni aí kípaanten mifo ará kusin masá orono.”

³⁵Yisasi ma fara vava siyákan maen monó átaru namuntá ma ánoní ukhein banta Yairasin amá pinté manáa vanta kayo ano eren me véin máa sen tiamemí, “Éin araun inka furen mifo ída vá enádá arú uman ameno.”

³⁶Máa siyákan mai vava Yisasi ída avové en inin nan monó átaru namuntá ma anoní ukhein banta máa sen tiamemí, “Éi ída vá akhokho van iyáke mumunan mana vá ono.” ³⁷Máa siren béi minó nanin banta ayópá uren Pitan má Yemisin má be afá aváe Yonin má mai máa ano anan Yisasin má oren mino. ³⁸Monó átaru namuntá

ma ánoní ukhein banta Yairasin amá barurá ma vetí ankan orivin maen Yisasi onákan kokhon nanin banta ano sisuvo siyáken kákantá ifí diyaren mino. ³⁹Máan tiyákan Yisasi maifin un pében betin máa sen tiamemí, “Para siretí ankan ifí diyákeyá kákantá tisuvo siya rafono. Ma arinta arará ída fúken béi faran auun bakhen mino.”

⁴⁰Máa síkan minó nanin banta ano véin nan intíkan béi mai nanin banta yo siantan barufá arafuvíkan mai arinta anóe afóen má bei eyo iyampon kanú manaú bá avíaren mai arinta ma kain bain karafarampin un peren mino. ⁴¹ⁱUm pében mai arinta ayan bana fakáaren máa semí, “Tarita kumi,” Mai yayai ana máan mi sikhen mino. “Titó arinta oe, séi éin tiamé umpo éi e mantano.” ⁴²Máa siyain má mai arinta arará ano manádá ainen e mantaaren oren mino. (Mai arintai orana sirantan kan orun kádan (12) mi varen mino.) Oríkan mai namumpin ma varé ein nanin banta ano ódaren kákantá anúden oreraen mino. ⁴³Máan tíkan mai ma afoká in onein dana san ena nanin banta ída siamino van Yisasi ákonaen betin tiamíden mai arinta arará ana yunan amino van tiamen mino.

Nasaretí Nanin Banta Ano Ma Yisasin Oyan Amein Baya Ino

(*Matiu 13:53-56; Ruku 4:16-30*)

6 Yisasi mai varu me ampíren bei eyo iyampon kayo vá bei varu anará Nasaretí oren mino. ²^jO varen Sabati yamú Yisasi monó átaru namumpin ódiven Tiyarafenui vaya vanasi siamiyákan iniren kokhon mano anúden oreraen temí, “Ai! Inte fákená ma vanta ano mai ákona vá afova vá mamáken ná ma avúavá danasinta afoká iyan nafino.

³Pura sen béi mana má uvaran bantan ban mino. Béi Marian anin mi váken Yemisi, Yosepi, Yudasi, Saimoni siren mai kékái afá aváe ino. Béin ayómái setin má mafin ban mino,” siren béin namu inin mananten mino.

⁴^kMáan tiyákan Yisasi vetin tiamemí, “Sakhanampa vanta aviéna varufá ban mifo vei varu anará bá minó bei mana nare vá be amápin má ída véin aví báe iyan mino.” ⁵Betíí mumunan ída ákona ukhan pasen mi Yisasi mai varurá ída manáa avúavasí ina aí ma vain kéká aurá anan ayan kaúden ayofiyaren mino. ⁶Máan tiyan ma vanasi ano ída mumunan iyain nan Yisasi kokhon ineine en mino.

Yisasi Vei Eyo Iyampon Kayo Siantan Ma Monó Dorantá Orera Ein Baya Ino

(*Matiu 10:5-15; Ruku 9:1-6*)

Máan turen Yisasi mai akhempá ma varé ein baru kayo fimpá oriven monó baya e siamen oren mino. ⁷Máan tiyákan baya varen orino van tiyan míkan mifo sirantan kan orun kádan (12) eyo iyampon kayo araren namu aunan ma yo siantan ákona amíden kaní uriyan tiantan oren mino.

⁸^lTian tiyákan maen Yisasi vetin máa sen tiamemí, “Ída vá mana yaná bare vá ayonta ana vá pákare orono. Ída vá dunan nafi unan nafi inká moní safi ída vá maman unampin bádo ono. ⁹Tiretí ankan arantan anamun máa vá ure orin nompo ída vá ena au anamun má marmare orono. ¹⁰Tiretí ankan ma mana varurá orinte mae mana namumpin mana vá bareya ínaimpáké mai varu me ampeno. ¹¹^mMana varurá oresin ma ída avían má naumpin kaen ma inká tiretíí vaya ma ída ininti mae mai varu vá me ampíren vetíí namu vara ma arantantá

ⁱ5:41 Ruk 7:14 ^j6:2 Yon 7:15 ^k6:4 Yon 4:44 ^l6:8 Ruk 10:4-11

^m6:11 Apor 13:51

dampakháin nain ná me fúpá tian karú dano. Mai anon betíi namu avúavá aní intin betiyantá afová inten mino.”

¹²Máa sirákan banasi ano ará baerano van eyo iyampon kayo ano oriyan monó baya e siamen oren mino. ¹³ⁿOriyáken betí ankan namu aunan kayo yo siantiyáken aí ma vain nanin banta aúfá uveri féantan mai kayo ano asefaen mino.

Monó Non Ma Féantan Banta Yoni Ma Furein Baya Ino

(*Matiu 14:1-12; Ruku 3:19-20; 9:7-9*)

¹⁴^oYisasi ma variyain avúavá baya ano minó akhempá orera íkan banasi ano ma mai vaya ana sen orera iyan maen Kin Eroti inen mino. Manáa kéká ano siyáken, “Monó Non Péantan Banta Yoni anon purin pinté evaránen e mantakhan mi enará ukhein ákona ano véimpin doriyan mino.” ¹⁵Máa síkan manáa ano sen, “béi Iraisa ino,” sin inká ena kéká ano sen, “pefá ma vá ein sakhanampa vanta kayo an dakhen mai véi mana sakhanampa vantán ban mino.”

¹⁶Máa síkan Eroti mai vaya kayo iniren temí, “Pefá ma séi anuran tíkeruna vanta Yoni anon purin pinté evaránen e mantakhanten mino.”

¹⁷Mai farava máa sen naino. Eroti ano ve aná Erodiasin amusin ameno van bei aruvin banta kéká tíkan Yonin pákaan karavusifin kain baren mino. Be afá aváe Firipin aná Erodiasin ma véi mantaré ein mai van mi Yonin karavusíí ukharen mino. ¹⁸^pErotin nan ma Yoni ano sen, “Éi e afá aváen aná ma yafeona mai ída kama ukha ono,” ma sein nan mino. ¹⁹Máa ma sikhein nan Erodiasi ano Yonini aran naná máden béin aruan purono van iyaren mifo véimpin ída mai ákona varen mino.

²⁰Máan tiyákan maen Yoni funtáken kantasí ukhein banta vákan Eroti ano véi ma siyain baya kayo van kokhon ineine iyáken béin aya ono van inikharen mino.

²¹Erodiasi ma Yonin arin nain aa van dosiyaré íkan Erotin ma ve anóe ano khaein damú e afoká en mino. Maí damú Eroti kákan dunan tariyáken béi kamanimpin ma ánoní ukhein banta kayo vá aruvin banta kayoi ánon banta vá Kariri fáké ánon banta kéká bá aran e átaru en mino. ²²E átaru ukhan Erodiasin araun mano mai ma iyukheimpin eriven danisífen mino. Danisíí íkan Erotin má mai ma yunan niyará ein kéká bá ano kákan amusin en mino. Máan tíkan Kin Eroti ano mai arinta van temí, “Éi ma sinona mai yaná téi fara amenté uno.” ²³Máa siren Eroti asíká ayan befíyó uren béin tiamemí, “Éi ma sinona yaná téi fara amenté uno. Tesi yafisin nan ma aúban daíde simeno ma sesí mai fara máan tonté uno.”

²⁴Máa síkan mai arinta ano oren be anóentá mo inaemí, “Náinasá inantékun ná Kin mano siminten nafino.” Máa síkan be anóe ano evaránen béin tiamemí, “Monó non péantan banta Yonin ánon nará inan teno.” ²⁵Máa síkan mai arinta ano ainen evaránen Kin baípá o nóben temí, “Monó non péantan banta Yonin ánon mana yókifin kaúde simeno van muno.”

²⁶Máa siyain má Kin mano kákantá ará uman den mifo véi má ma váken dunan niyá ein kayo avorá ma asíká ayan befíyó uren tikhá ein nan iniren ída mai arinta avaya yo yurafuren mino. ²⁷Mai van Yonin ánon mo síkaren baren erino van esé ana mana aruvin banta siantan oren karavusi finte Yonin ánon mo síken mino. ²⁸Tikaren maen Yonin ánon maman dókifin kaúden mai arinta me amíkan baren be anóen mo amen

mino. ²⁹Yonin ma arin baya vei eyo iyampon kayo ano iniren béin au e varen mo masíen mino.

**Yisasi Ma Yan Manápá Tauseni
(5,000) Vanta Yunan Amein Baya Ino**

*(Matiu 14:13-21; Ruku
9:10-17; Yoni 6:1-13)*

³⁰Yisasi ma vei eyo iyampon kayo siantan dorantá orikhá ein mai ovará-nen e átarú uven betí ma yoriyá ein má banasi ma siamiyá ein baya kayo vá béin tiamen mino. ³¹Kokhon nanin banta ano eriven oriven iyákan Yisasi má bei aposeri kayo vá ída yunan narí eimpin Yisasi máa sen betin tiamemí, “Erítífé banta ma ída van naipá o váké tiviká tifano.”

³²Máa siren betí ankan mana voti maren banta ma ida vain afokhantá oren mino. ³³Oríkan kokhon nanin banta ano veti ma oriyain afová uren minó kákan baru ráke nanin banta ano non akhempá tavaen mai ma orin naintá betin nare o varen mino. ³⁴rO varé íkan Yisasi non akhempá oriven mai nanin banta oniyáken sipisipi kayo ano ma ída vetintá dafisin banta vákan iyukhen bainí ukharé íkan kákantá arunan uanten mino. Mai van kokhon danasinta vetin afova amen mino.

³⁵Afova ma amiyan áau eraven inúpasí íkan maen bei eyo iyampon kayo Yisasi vaintá eriven temí, “Banta i van akhempái e varé étífékun mi áau eraven mino. ³⁶Éi vanasi siantesin oriven ná ádé ma van nain baru khayó finte vetíi yunan miyaní ino.”

³⁷Máa síkan Yisasi evaránen betin tiamemí, “Tireti yantasá betin dunan ameno.” Máa síkan betí ankan evaránen

béin tiamemí, “Kankan antareti moní kasá^{§§} bereti o miyaníé betin me amenté tife rafuno.”

³⁸Máa síkan Yisasi vetin tiamemí, “Tiretí ankan náí máa veretí denan ban nafino oriveya onano.” Máa síkan betí ankan o oman afová uren me siamemí, “Dan manápá bereti vá kankanan noyana vái van mino.”

³⁹Máa síkan minó nanin banta sintin kata yaró manafin kumádú ino van betin tiamen mino. ⁴⁰Tiamíkan manafin mana antareti (100) ano kumaniyan inká enafin fifti (50) ano kumaniyan en oreraen mino. ⁴¹Máan tuvíkan Yisasi mai yan manápá bereti vá kankanan noyana vá pákaaren inarufá kakháben mai yunan nan Tiyarafenun tusu sianten mino. Máan turen mai vereti kayo vá noyaná kanan má máden kisikisi uren bei eyo iyampon kayorá dákan mai nanin banta amen oreraen mino. ⁴²Amíkan minó ano kanaíen nen mino. ⁴³Narákan mai yunan antan tiyan míkan mifo sir-antan kan orun kádan (12) unan bíken mino. ⁴⁴Mai yunan ma naran banta máa ma yankafein mai yan manápá tauseni (5,000) ino.

Yisasi Ma Non Daró Orein Baya Ino

(Matiu 14:22-33; Yoni 6:16-21)

⁴⁵Narákan Yisasi ma vanasi siantan orera iyan maen bei eyo iyampon kayo van betin nare ainen botifin káusiven non e kháden Betsaidá akhempá orino van tiamen mino. ⁴⁶!Máan turen mai oyampáké béi amúkono van anufá óden mino.

⁴⁷Inupasi íkan mai voti ano non aúbaná bákan Yisasi veyáká non akhempá para varen mino. ⁴⁸Báken béi

§§6:37 Mai kan antareti moní ma vain mai yan manápá ifo afápá kanú manaú un kádan biyontá ma varyain moní ino.

¶6:30 Ruk 10:17 ¶6:34 Nam 27:17; Mat 9:36 §6:35 Mak 8:1-9

¶6:46 Ruk 5:16

onákan uva ano voti e avékaan more mere iyákan betí ankan ákonaen non intaniyaren mino. Máan tiyákan ma kúkarosíen kakhano van in maen Yisasi non daró oriaren betin esantano van en mino. ⁴⁹uMáan tíkan bei eyo iyampon kayo ano véin onan non daró oríkan betí ankan béin nan ban mi eriyán mino sen iniren báden oreraen mino. ⁵⁰Minó ano véin ódaren kákantá akhokho van iyaimpin Yisasi ainen betin máa sen tiamemí, “Téi umpo ída vá tiretí ankan periya vano.” ⁵¹vMáa siren béi votifin un bákan uva kípavin minó ano sakha iyáken kokhon ineine en mino. ⁵²Yisasi ma vereti kisian ameini avúavái ana vetí ankan ída afová ukharen mino. Mai fara va ino. Betin aú ano ákona ukhan ída mumunan ban mino.

⁵³Betí ankan ma non e kháden Kene-saretí akhempá ódiven maen boti anan kuan kaen mino. ⁵⁴Máan turen ma vetí ankan boti finté eraviyain má banasi ano ainen Yisasin afová en oreraen mino. ⁵⁵Afová uren banasi ano mai akhempá oriviyán aí kéká ma varé ein aviren Yisasi vaintá duvasiká mo khaen oreraen mino. ⁵⁶Mai akhempá tító baru kayo vá kákan baru kayo vá inká akhempá ma vain baru kayo fimpá bá ma Yisasi orin maen banasi ma átaru iyain barurá aí nanin banta ayofano van béi vaintá aviren oriyaren mino. Aí nanin banta ano Yisasin nan ántí beni ayá au anamun áton aruvono van ínan en ina iyaren mino. Aí nanin banta ano ma in-aúden aruvín maen mai kékái aí kípaa-niyaren mino.

**Banasi Ma Maman Avusese
Iyain Danasinta Fákena Van
Ma Yisasi Siamein Baya Ino**

(Matiu 15:1-9)

7 Farasisi kayo vá manáa Yerusalemi fáké man baya ma afová ukhein banta kayo vá Yisasi vaintá e átaru ²wuven onákan manáa Yisasiní eyo iyampon kayo ano Yutan nanin bantai avúavá durafuren ída ayan nare sesé in-ton dunan pákaren nen mino. ³Minó Farasisi kayo vá Yutan kayo vá be anafu aráoni avúavá dakhafen ayan ma ída kamaen tesé ukhen maen ída yunan pákaren né iyan mino. ⁴xBetí ankan ma máketifá noren ma ovaránen eriven ma ída non péken maen mai yunan ída né iyan mino. Kokhon avúavá daná ma vetíi anafu aráopintena ma mantein mai ánain mi yakafen betíi kápi, kura, yóki, takhó tesé é iyan mino. ⁵Máan tiyain mi vakan Farasisi kayo vá man baya ma afová ukhein banta kayo vá Yisasin in-aen temí, “Éini eyo iyampon kayo ano ma ída ve anafu aráoni avúavá dakhafen ayan ída sesé iyain mai intesá ukhen nafino.”

⁶Máa síkan Yisasi vetí ankan evaránen tiamemí, “Tiretí ankan kampun banta kayon banan mi fura sen tiretin nan mi sakhanampa vanta Aisaiya ano máa siren bompon uvamádan baren mino. “Ma vanta kayo ano oo máafói séin tiví daní iyan mifo vetí ankan ará ano nenta suron ban mino.

⁷Betí ankan bantai man baya ma siamiyain mai van mi ‘Tiyarafenui vaya ino’ sé iyan mino. Máan tiyáken betí ankan téinta faran monó máan tiyan mino.’ ⁸Tiretí ankan Tiyarafenui man baya me ífá ureya vantai avúavá máa anan ákona e fákare va ono.” *Ais 29:13*

⁹Mairá Yisasi vetin máa sen tiamemí, “Tiretí anafu aráoni avúavá ánain dakhafono van mi kama aafáke Ti yarafenui man baya yo ékiya ono. ¹⁰Para vara seyo, Mosesi sikhen mino, ‘Éi e anóe afóeni vaya ánain ná dakhafono.’ *Eks 20:12; Diu 5:16* Inká ena vá tiyáken, ‘Mana vanta ano ma ve anóe afóen nan ma namu vaya sin nain ná arintin purino.’ *Eks 21:17; Riv 20:9* ¹¹Purinten mifo siredí máa sé iya ono, ‘Mana vanta ano ma ve anóe afóen ayain moní dákaren békaran tiamé iyan mino, “Téi ma moní Ti yarafenu ameno van derúna ino.”’ ¹²Mai máan ma inten béi ída vá be anóe afóen kama ino. ¹³Tiretí ankan ma anafu aráon pintena vare-ona mai avúavá ánain dakhafiyákeya Ti yarafenui vaya ma kantifin karú dareya siredí ma avúavá daná kokhon mano variya ono.”

Banasi Ma Maman Painí Íyai Pákana Van Ma Yisasi Sein Baya Ino

(*Matiu 15:10-20*)

¹⁴Máa siren evaránen Yisasi vanasi aran erin tiamemí, “Tiretí ankan téinti vaya inere vá afová ono. ¹⁵Mana yaná ma mafá baren banta aúpin ma aravin mai ano ída vanta fainí é iyan mifo vanta aupinté má édan mai yaná kayo ano anan banta fainí é iyan mino. ¹⁶Átaren ma van nain banta ano vá ineno.”

¹⁷Béi ma mai nanin banta me ampiren má naumpin orivíkan bei eyo iyampon kayo mai vaya ma sian baé ádeini anavan béintá inaen mino. ¹⁸Ina íkan béi vetin tiamemí, “Tiretí bá dere ídá inikhe fono. Minó daná ma mafá bare ma vanta aúpin aravin mai ano ída vanta faini é iyan mino. Ída ino! ¹⁹Mai yaná ano ída vanta amafompin oré iyan mino. Mai yaná ano arápin araven arái íkan ara masípin mo karákan aravé iyan mino.”

Ma vaya fókéi Yisasi minó dunanan avusese ukhen ne sen mino.

²⁰Mairá béi máa semí, “Mana yaná ma vanta aúpin varen ma édiyain manon banta maman painí é iyan mino. ²¹Minó daná ma ineine finté afoká é iyain mai yana sinta ino. Minó namu ineine in avúavá, pamúkuí in, umoyan in, banta aruan purin, ²²ábasu yurafurin, ena ina yana san kampun tin, ara ara namu avúavasí in, baya atákaré en kampuntin avúavá bá Ti yarafenu ará namu uanten béin oyampá baya sin avúavá bá baya átakharé uren be au kákaní in avúavá bá óen in avúavá bá ²³minó mai namu avúava sinta anon banta aúpin baren ma éden maen mai anon maman banta fainí é iyan mino.”

Mana Fonisiá Nanin Mano Ma Yisasintá Mumunan Ein Baya Ino

(*Matiu 15:21-28*)

²⁴Yisasi mai varu me ampiren Taiyá barafá e manten oren mino. Oriven béi mana namumpin un pében ída mana vanta ano afová ino van en mifo véi ída kanaíen aúpá baren mino. ²⁵Mana nanin mano véi ma o vain baya iniren be araun namu aunan mano fákakhan baré in mai nanin mano Yisasin arantampin mo aron kanan durafú den matimen mino.

²⁶Siriá barafin Fonisiá kaein Kiriki váken béi Yisasin nan be araun aufin ma namu aunan bain do siantano van tiamen mino. ²⁷Yisasi evaránen béin tiamemí, “Teti iyampon nare vá dunan amékun ná kanaí en nano. Ída vá iyamponi yunan tetí maman iyan oofen karú dá tifano.”

²⁸Máa síkan mai nanin mano evaránen béin tiamemí, “Bafan noe! Pura siya ompo sakhó aránaópá bain iyan kayo ano iyamponi yunan antan ma eravein mi né iyan mino.”

²⁹Máa síkan Yisasi evaránen béin tiamemí, “Éi ma máa seona rá namu aunan mano inka e araun aú pinté me ampiren oren mifo éi evaráne orono.”

³⁰Máa síkan mai nanin mano evaránen be amápin o onákan namu aunan mano ve akhá me ampiren orivíkan béi sakhópin bakhen baren mino.

Yisasi Ma Átaren Kontan Ída Kama En Baya Siyain Banta Ayofein Baya Ino

³¹Mai ráké Yisasi e mantaaren Taiyai vara me ampiren Saidonii vara aúbana oriaren Kariri non akhempá orun nóben Dekaporisi varafá oren mino. ³²Oríkan manáa ano mana átaren kontan ída kamaen baya siyain banta avían Yisasi vaintá meren, “Béin nan ayan kaú antano,” sen mino. ³³Máa síkan Yisasi mai vanta avíaren minó nanin banta me ampiren manáa nentá békan mana oriven mai vanta átarempin Yisasi ayantá akhare siren mai vanta amafintá kaen mino. ³⁴Máan turen Yisasi inarufá kakháben avádóden aunan mamaren mai vantavan Aramaiki vaya finté temí, “Efata.” Mai máan ma semí, “Divono.” ³⁵Máa siyain má mai vanta amafintá ma yampakhen uman diyá ein daná orivin átaren inen baya kamaen ten mino.

³⁶Máan turen Yisasi vetí ankan airo ananí uantá den ída vá ma avúavá baya ena nanin banta siamero. Máa siren béi ákonaen airo ananí urákan betí ankan mai avúavá moéken tian afoká en mino. ³⁷^aMáan tíkan minó ano anúden oreraen temí, “Átaren ma kontaré ein mano kamaen iníkan inká baya ma ída siyaré ein mano vaya síkan Yisasi ma minó avúavá barein mano kamaen mino.”

Yisasi Ma Kamí Kamí Tauseni (4000) Vanta Yunan Amein Baya Ino

(Matiu 15:32-39)

8^bMáan ten nókan maná damú kokhon nanin banta ano Yisasi vaintá átaru ukhan betíi yunan ída vaimpin bei eyo iyampon kayo arákan erin tiamemí, ²“Kanú manaú damú ma nanin banta sen má bákan betíi yunan minó kípavíkan dunan ída van tirun kiyán mino. ³Manáa ano ayá aa sáké erikhein betí ankan ma arafan tiantékun betíi varufá oriyaren ayanafá auu entave entave intin aasá o ankaminten mino.

⁴Máa síkan bei eyo iyampon kayo ano máa sen béin tiamemí, “Ma vanta ída van kámá barafá ifo setí kanaisá erá bereti máderá ma nanin banta amenté tiferafuno.”

⁵Máa síkan Yisasi vetí ankan inaemí, “Tiretí náí máa vereti yáke fono.”

Síkan betí ankan temí, “Dan manápá ifo afápá kan un ká dan mino.” ⁶Síkan mairá béi minó nanin banta van barará kumaneno síkan barará kumamin dan manápá ifo afápá kan un kádan bereti máden Tiyarafenun tusu siantáden kisiren bei eyo iyampon kayorá dákan banasi amen mino. ⁷Bei eyo iyampon kayo ano manáa sító noyana kayo kain baré íkan Yisasi mai máden Tiyarafenun tusu siantáden bei eyo iyampon kayorá dákan betí ankan máden banasi amen mino.

⁸Amíkan minó nanin banta ano kanaíen naran antan o éke e éke uren daa manápá ifo afápá kan un kádan unan bíken mino. ⁹Kamí kamí tauseni (4,000) vanta anon mai yunan narákan Yisasi vetí ankan tiantan oren mino. ¹⁰Orivíkan béi votifin bei eyo iyampon

kayo vá un kumamen Daramanuta varafá oren mino.

Farasisi Kayo Ano Ma Yisasin Nan Inaru Fáke Avúavá Aní Intin Onano Van Ein Baya Ino

(Matiu 16:1-4)

¹¹Maná damú Farasisi kayo ano Yisasin akhenóka uan onono van béi vaintá mana inaru fákena avúavasí í oná tifano sen inaeen mino.

¹²eMáa síkan Yisasi veyan avádúan onan uman diyaimpin temí, “Teréa ma vain nanin banta ano náí vará téin nan mana avúavá aní ino van tiyan nafino. Téi fura siré tiretin tiamé uno. Tiretí ankampin téi mana avúavá daná ída aní onté uno.” ¹³Máa siren béi votifin un kumamen non e kháden ena ufá oren mino.

Erotin Má Farasisi Kayo Vái Yisirá Ma Siádein Baya Ino

(Matiu 16:5-12)

¹⁴Eyo iyampon kayo ano áúden ída vereti varanton oriyákan mana vereti ana votifin baren mino. ¹⁵dYisasi vetí ankan amaan temí, “Tiretí ankan Farasisi kayoi yisi vá Erotini yisi vasará antan ono.”

¹⁶Máa síkan betí ankan Yisasini vaya ída afová ukhen betiyan ten orera emí, “Tetí ankan ída vereti yákékun mai van mi véi sen mino.” ¹⁷eMáa siyákan Yisasi afová uren betin inaemí, “Náí vará tiretí ankan bereti ída yáké uno sé orera iya rafono. Tiretí ankan ída afova vá e ine ukhen nan mi siretin ará ano uman diyen mino. ¹⁸Tiretí ankan auu vákaya ompo ída oniya ono. Tiretí ankan átaren bákaya ompo ída vaya iniya ono. ¹⁹fTéi ma yan manápá bereti ma yan manápá tauseni (5,000) nanin bantafin kisirékun ma mai vereti antan ma fara vá ein

náí máa unan ná bá de fonó. Á unten nafino.”

Síkan betí ankan temí, “Tiyan míkan mifo sirantan kan orun ká dan mino (12).”

²⁰Máa síkan Yisasi vetí ankan inaeen temí, “Ená damú ma séi yan manápá ifo afápá kan un kádan bereti ma kamí kamí tauseni (4,000) bantafin ma kisiré amékun ma minó ano narákan mai antan bereti náí máa unan ná tiretí ankan bíkhe fonó.”

Máa síkan betí ankan temí, “Dan manápá ifo afápá kan un kádan mino.”

²¹Síkan béi vetin tiamemí, “Mai siretí ankan ídá afová ukhe rafono.”

Yisasi Ma Auu Yufúkukhein Banta Ayofein Baya Ino

²²Yisasi vei eyo iyampon kayo vá Bet-saidá oríkan manáa nanin banta ano mana auu yufúkukhein banta avían Yisasi vaintá me khaúden béin nan mai vanta aurá ayan kaono sen mino.

²³Síkan Yisasi mai auu yufúkukhein banta ayan pákaaren mai varu me ampiren aviren oren morun baru akhempá kaúden mai vanta auufen akhare siren be ayan mai vanta aurá kaúden inaeen temí, “Éi kaná manáa yanasinta oniya fonó.”

²⁴Máa síkan mai vanta ano yan auu mááken onen temí, “Eyo, téi vanasi oniyá umpo vetí ankan daa ana kayo ma kayamanaen noini iyan mino.”

²⁵Máa síkan Yisasi evaránen mai vanta auufen ayan kaúan tádan auu kama uvin mai vanta ano kákantá auu mariyáken minó daná kamaen onen mino. ²⁶Máan turen mai vanta Yisasi siantan be amápá oriyákan temí, “Ída vá mai varufin umperano.”

^c8:12 Mat 12:39; Ruk 11:29 ^d8:15 Ruk 12:1 ^e8:17 Mak 6:52

^f8:19 Mak 6:41-44

Pita Ma Yisasi Nan Tiyarafenu Ano Ma Aní Ukhein Banta Ono Sein Baya Ino

(*Matiu 16:13-20; Ruku 9:18-21*)

²⁷ Mai ráké Yisasi vei eyo iyampon kayo vá e manten Sisaria Firipaí baru-fimpá oriyákan ayanafá Yisasi vei eyo iyampon kayorá inaemí, “Minó nanin banta ano séin nan iye inó tiyan nafino.”

²⁸ ^gMáa síkan betí ankan evaránen bein tiamemí, “Manáa nanin banta ano éin nan monó non péantan banta Yoni ino síkan inká ena kéká ano sakhanampa vanta Iraiya ino síkan ena kayo ano mana feyan sakhanampa vanta ino siyan mino.”

²⁹ ^hMáa síkan Yisasi inaemí, “Tiretí iye inó téin nan tiya rafono.”

Síkan Pita evaránen tiamemí, “Éi Karaisi* Tiyarafenu ano ma fefá ma sen minó nanin banta evaráne aviranono ma sikaré ein banta ono.” ³⁰ ⁱMáa sirákan Yisasi vei eyo iyampon kayo airo ananí uanten ten mino. Pura ifo séi Karaisi umpo ída vá mai vaya ena nanin banta siameno.

Yisasi Ma Veyan Púaren E Mantan Nain Baya Sein Mino

(*Matiu 16:21-28; Ruku 9:22-27*)

³¹ Máa siren mairá betí ankan afova amen temí, “Banta Anin mano kákan aí barantin minó ánon banta kayo vá monó ánon banta kéká bá man baya ma afová ukhein banta kayo vá béin oyan amiren béin aruan purinten mino. Aruan púdantin kanú manaú damú orivintin béi evaránen e mantanten mino.” ³² Máa siren Yisasi mai vaya ana afoká amá uan betí ankan amirákan Pita ano véin

do aviren akhempá mo khaúden araíen asen temí, “Mai ma siyaona vaya ída vá teno.”

³³ Máa siyákan Yisasi yovaéan bei eyo iyampon kayo oniyáken Pitan asen temí, “Ban Anon noe. Téin toyampá entavono. Éi ída Tiyarafenui ineine ánanin dakhafiya ono. Ída ino. Éi vantai ineine ánanin mi yakafiya ono.” ³⁴ ^jMairá Yisasi minó nanin banta vá bei eyo iyampon kayo vá arákan béi vaintá eríkan betí ankan tiamemí, “Mana vanta ano ma séin tínain ma vákuroño van beyan maman bararasí urená bei yaa unkamádan mamaren ná téin tínain bákurino.

³⁵ Para vara seyo, mana vanta ano ma vei aunantá ma yafisintin maen mai veni aunan o afeyoranten mifo vanta ano ma séi má tenti kama vaya va san ma iniren bei aunan ampirákaren mai ano evaránen bei aunan baranten mino. ³⁶ Mana vanta ano ma minó ma vara ráke yanasinta ma mamarantin beni aunan ma aiyóbintin minó daná ano intesá ená béin ayainten nafino. ³⁷ Mai náí yaná pókesá banta ano evaránen bei aunan miyaní inten nafino. ³⁸ ^kTaréa ma ume vá nanin banta ma vaimpin ma mana vanta ano ma séin má tenti vaya vasa ma ayave iyá intin maen Banta Anin mano ma ve afóeni kakhán má kantá enisori kayo vá ma ayompin erin nain damú mai vanta van be yeren ayave uantanten mino.

9 ^lYisasi vetí ankan máa sen tiamemí, “Téi fura siré tiretin tiamiyá uno. Ma ma mantakhein pinté manáa ano ída fúkantin mi Tiyarafenui yafasin mano vei ákona vá erintin mi vetí ankan onanten mino.”

***8:29** Kiriki vaya finté *Karaisi* ma sikhein mai *Tiyarafenu* ano ma vei *vanasi* evaránen avirano van ma aní *ukhá* ein banta van mi sikhen mino. Ruk 20:41, 22:67, 23:35; 24:26, 46; 23:35; 24:46; Apo 3:20; 1Yo 5:1; Rev 11:5 fin ná dere onano.

^g**8:28** Mak 6:15 ^h**8:29** Yon 6:68-69 ⁱ**8:30** Mak 9:9

^j**8:34** Mat 10:38-39; Ruk 14:27 ^k**8:38** Mat 10:33 ^l**9:1** Mak 13:30

**Yisasin Au Vukhafá Ma
Enará Ein Baya Ino**

(Matiu 17:1-13; Ruku 9:28-36)

^{2m}Dan manápá ifo afápá mana un ká-dan damú orivíkan Yisasi ano Pitan má Yemisin má Yonin má aviaren mana ayá anurá betí ankan mana un báken Yisasi vetí avorá be au ayúden ena vukafafen mino. ³Béini aúf daná ano oon ma kheíní fkan efanten uron en mino. Ma vara ráké mana ano efanten davaráe sesé urantín ída kanaífen maman máan efanten inten mino. ⁴Máan tiyain má Iraiyan nú Mosesin nú betí ankan baintá afoká uven Yisasin má baya siyákan betí onen mino.

⁵Máan tíkan Pita ódaren Yisasin tiamemí, “Aru soe, setí ankan ma sító namun kanú manaú en nina vá Mosesi nina vá Iraiya nina vá ma uvará tifanuna mai kama ukhen mino.” ⁶Pita kákantá akhokho van iyáken béi ma sin nain baya ída afová ukhan inká Yemisin nú Yonin nú bá dere kákantá akhokho van iyaren mino.

⁷Mairá máan tiyain má konan mano eriaren betí ankan me úkuá darákan mai konan pinté mana oova ano máa semí, “Ma séin tanin uron mino. Béin nan téin moéken tiraniyan mino. Béin avaya vá inero.” ⁸Máa siyain má manádá betí ankan onen eúkin ída ena vanta vákan Yisasi veyáká ana vetin má baren mino. ⁹Betí ankan mai anu me ampiren eriyákan Yisasi vetin airo ananí uanten temí, “Ma yanasinta ma oneona mai siretí ída vá ena vanta sian mikhesin ná Banta Anin ma masí pinté orun mantavinti vá tiameno.” ¹⁰Máa sirákan betí ankan mai veya fákaan ákona uren betiyan mana sen oreraen mino, “Mai ma masí me ampire e mantanté uno ma sikhein mai náí yana sará ten nafino.”

¹¹ⁿBetí ankan Yisasin inaemí, “Pará man baya ma afová ukhein banta kayo ano sen ná peyan sakhanampa vanta Iraiya nare vá erino siyan nafino.”

^{12o}Máa síkan Yisasi evaránen betin tiamemí, “Eyo mai fura ino. Iraiya ovaránen eriven minó daná maman puntaranten mifo feyan sakhanampa vanta kayo ano máa sikhen mino, ‘Banta Anin mano uman baren berai sintin béin oyan aminten mino’ sen pará tikhan nafino. ^{13p}Máa síkhan mifo séi seretin tiamé uno. Iraiya inka fe erikhen mino. Bompon mano ma síkhá einífen betí anunu kípen ara ara avúavá ben amaniná kaen mino.

**Namu Aunan Bá Ein Iyampon
Ma Yisasi Ayofein Baya Ino**

(Matiu 17:14-21; Ruku 9:37-43)

¹⁴Máa siren betí ankan araven eyo iyampon kayo ma varé eintá o uníkan kokhon nanin banta vetin má iyukhan man baya ma afová ukhein banta kayo ano veya fóké betin má aruvein an diyaren mino. ¹⁵Máan tiyan baren mai nanin banta ano onákan Yisasi orin minó ano anúden orera uren tavaen mo véin kamaen mino. ¹⁶Máan turan mairá béi vetin inaemí, “Tiretí ankan náí vará baya fóké man baya ma afová ukhein banta kayo vá aruvein an diya rafono.

¹⁷Máa síkan mai nanin banta aúbanáké mana vanta ano evaránen Yisasin máa sen tiamemí, “Aru soe, séin tanin namu aunan mano véimpin bákan orá iyákái éi vaípa béin aviré eré uno. ¹⁸Kokhon damú mai namu aunan mano ákonaen béin pákaren barará maman asédan bavín oo fenté efanten akhare avanen eravin maen aveantuntá inkékípiyákan béin au ano kafifi sé iyan mino. Máan tiyákái éini eyo iyampon

^m9:2 Apo 3:22; 2Pi 1:17-18 ⁿ9:11 Mar 3:1

^o9:12 Íbo 22:1-18; Ais 53:3; Mar 4:5-6 ^p9:13 Mat 11:14

kayo van mai namu aunan do siantano sékun betí ankan ída kanaíen mino.”

¹⁹Máa síkan iniren Yisasi evaránen banasi siamemí, “Ída mumunan bain nanin banta oe! Nái máa yádasá téi siretin má para vante rafuno. Nái máa yádasá téi siretí uman barante rafuno. Tiretí ankan mai iyampon avire séi ma varunará ereno.” ²⁰Máa síkan betí ankan mai iyampon aviren Yisasi vaintá eriyain má mai namu aunan mano Yisasin onen mai iyampon ainen anka-man karúdan barará baven baé baé íkan efanten akhare oo fenté avanen mino. ²¹Máan tiyain má Yisasi ve afóenta in-aemí, “Nái máa yádasá béi máan tiyan nafino.”

Síkan be afóe semí, “Béi ma araráká ma vá ein táké ino. ²²Kokhon damú mai namu aunan mano véin aruan purono van irafín nafi noppin nafi yauman karú diyan mifo éi kaná tétin nan arunan ureyá tiya inte fono.”

²³qMáa síkan Yisasi véin tiamemí, “Éi ma mumunan inte ya éi kanaíeya minó daná baran nono.”

²⁴Máa siyain má mai iyampon afóe ano evaránen temí, “Téi mumunan ukhé umpo senti mumunan tiyaesin mo ákona ino.”

²⁵Máan tiyákan banasi savaen e átaruin Yisasi ódaren mai namu aunan béi asen temí, “Éi átaren konen oo uman dan aunan noe. Téi éin tianté umpo mai iyampon ampireya entavuveya enádá bá ída vá béimpin oferano.” ²⁶rMáa siyain má mai namu aunan mano avádóden bádiyan mai iyampon máden antú antú iyáken béin me ampiren orivíkan mai iyampon purein an davin minó ano óden temí, “Béi inka furen mino.” ²⁷Máa siyain má Yisasi mai iyampon ayan bana

fákaren orun ayanoran béi e manten mino.

²⁸Mantavíkan Yisasi ínaimpáké má-naumpin oríkan bei eyo iyampon kayo ana váken béin inaemí, “Mai náisá ukhará tetí ankan ída kanaí erá mai namu aunan do sianté tiferafuno.”

²⁹Máa síkan Yisasi evaránen betí ankan tiamemí, “Tireti ma Tiyarafenu vaipá ma kokhon dádá amúkinte maen máan namu aunan kanaíe yo siantan nompo ena aa ída van mino.”

Yisasi Ma Veyan Púaren E Mantan Nain Nan Ma Kan Dádasí En Tein Baya Ino

(Matiu 17:22-23; Ruku 9:43-45)

³⁰sMairá betí ankan mai varu me ampiren Kariri vara aúban oriyáken mana ano ída afová ino van Yisasi inen mino.

³¹tPara va ino. Bei eyo iyampon kayo vei furin afova ameno van mino. Béi semí, “Banta kayo ayampin Banta Anin am-intin béin aruan purinten mino. Aruan púdantin ma kanú manaú damú oriv-intin béi evaránen e mantanten mino.”

³²uMáa síkan betí ankan ída mai vaya afová ukhen béin inain nan peren mino.

Inaru Yafisimpin Iyé Kákaní Inten Nafino Ma Sen Ina Ein Baya Ino

(Matiu 18:1-5; Ruku 9:46-48)

³³Mairá betí ankan Kapeniamú oren mino. Oriven béi ma mápin báken betin inaemí, “Ayanafá tiretí ankan náí vará asive asive iya rafono.” ³⁴Máa síkan bei eyo iyampon kayo ano iyé minóti kákan ban nafino siren ayanafá asiven eriyaren béin ída siamen mino. ³⁵vMaira Yisasi kumamen tiyan míkan mifo sir-antan kan orun kádan (12) eyo iyampon aran eríkan betí ankan tiamemí,

^{99:23} Mat 21:21; Mak 11:23 ^{r9:26} Mak 1:26 ^{s9:30} Yon 7:1

^{t9:31} Mak 8:31; 10:32-34 ^{u9:32} Ruk 9:45

^{v9:35} Mat 20:25-27; Mak 10:43-44; Ruk 22:24-26

“Mana vanta ano ma kákaní ono van minó banta ánaimpá báken ná minói eyo vá bariyan bano.”

³⁶Máa siren Yisasi mana arara iyampon avían betin aúbanapin mantaan táden béin ayan bana fákaren o yafáyóden betí ankan tiamemí, ³⁷w“Iye anó téin nan inireyá mana máan tukhein iyampon arará aya inten nafi mai ano séin mi siya inten mino. Inká iye anó téin tiya inten nafi mai ída séin tiya inten mifo Tifóe ma séin tisintá erikheruna mai véin mi aya inten mino.”

Iyé Ída Setinti Namuroí Inten Nafino, Mai Setin Tirona Ino Ma Sein Baya Ino

(Ruku 9:49-50)

³⁸Yoni véin tiamen temí, “Aru soe, setí ankan onékun mana vanta ano éin avíká-namu aunan do siantiyaren mifo véi ída setí ankan ma manápá noin bantan bakái véin airo ananí uanté uno.”

³⁹Máa síkan Yisasi véin tiamemí, “Tiretí ankan ída vá béin airo anani uantano. Mana vanta ano ma séin tivíká ma mana avúavá daná ma uvariyaen mai vanta ano ída ainen téin nan namu veya sinten mino. ⁴⁰xSetin ma ída namuroí iyain banta mai setin tirona ino. ⁴¹yTéi fura siré tiretin tiamé uno mana ano ma siretin nan Yisasi kéká ino siren ma non dáan amin nain mano fura siren bei miyan baranten mino.

**Umeíin Avúava San
Ma Yafiken Ban Baya Ino**

(Matíu 18:6-9; Ruku 17:1-2)

⁴²“Banta ano ma mana auyen monó kéká ma séintá mumunan ukharé intin

ma vetí ankan pinte ma e avía dantin ma umefin orintin mae vá mai vanta amempin ná kákan onámaná kurená un nompin karúdantin námen aravino. ⁴³⁻⁴⁴zÉin ayan mano ma umefin ma avían kaintiya mai ayan ná tikareya karú dano. Mana ayan mana ma éin baréinti kanaíe éi ída kípán aunan baran nono. Mai kama inten mifo éin ma kankanan ayan ma áesin báken mana ayan mano umeí iyá intin mae ída kípán íra ma kiyán ma uman baren berai siyan purin barufin mi orin nono.† ⁴⁵⁻⁴⁶Éin arantan mano ma umefin ma avían kaintiya mai arantan ná tíkareya karú dano. Mana arantan mana ma éin baréintiya ída kípán aunan kanaíeya varan nono. Mai kama intenmifo éin ma kankanan arantan ma áesin báken mana arantan mano ma umeí iyá inti mae ída kípán íra ma kiyán ma uman baren berai siyan purin barufinmi orin nono.‡ ⁴⁷aÉin auu ano ma umefin ma avían kaintiya mai auu víaná karúdan orino. Mana auu ana ma éin baréinti Tiyarafenui yafisimpin oferan nono. Mai kama inten mifo éi ma kankanan auu ma áesin báken mana auu ano ma umeí iyá inti mae ída kípán íra ma kiyán ma uman baren berai siyan purin barufin mi orin nono.

⁴⁸Mai varufin tító bintókéna kayo ma vetí ankan augin bain mai ída furintin íra ída yusiminten mino. *Ais 66:24*

⁴⁹Tiyarafenu ano minó nanin banta kama ino van ara ara uman betin ané ma kaiyain mano irará ma iyó uren antere-

†9:43-44 Manáa vompon mano ves 44 kaen mino. Mai vesi ano ves 48 vá manaf ukhen mino.

‡9:45-46 Manáa vompon mano ves 46 kaen mino. Mai vesi ano ves 48 vá manaf ukhen mino.

w9:37 Mat 10:40 x9:40 Mat 12:30; Ruk 11:23 y9:41 Mat 10:42

z9:43-44 Mat 5:30 a9:47 Mat 5:29

iní iyan mino.^b ⁵⁰cUn kama yaná ifo veni ase ma kípavintiya siretí ankan náísá uresin ná evaránen ase inten nafino. Éi un ande vá afá aváen má manafin ka-maeya vano.

Ábasu Ma Yurafurin Avúavá Baya Ino

(*Matiu 19:1-12; Ruku 16:18*)

10 Yisasi mai varu me ampiren Yudia varafá oriaren Yodan non e kháden ena ufá oríkan kokhon nanin banta ovaránen béi vaintá e átaru íkan béi ma iyain avúavasíen Tiyarafenui vaya vetí ankan tiamen mino.

²Tiamiyákan Farasisi kayo ano véi vaintá eriven béin akhenókaen temí, “Tetinti man baya ano kanaisá intin ná mana vanta ano ve aná ifá uantanten nafino.”

³Máa síkan Yisasi evaránen betí ankan tiamemí, “Tiretí ankan Mosesi ano intéa man bayá amikhan nafino.”

⁴Máa síkan betí ankan temí, “Banta ano ve ábasu ma yurafurin bompon uvamá daren ná be aná ifá uantanon Mosesi sikharen mino.”

⁵Máa síkan Yisasi evaránen betí ankan tiamemí, “Tiretí ankan átakharé en nan mi Mosesi ma man baya siretin uvaman amikhan mino. ⁶PefáTiyarafenu ma aráfen minó daná ma uvarein damú “béi vanta vá anasi vá uvaren mino.” *Esé 1:27; 5:2*

⁷eMáan tukhan mi vanta ano ve anóe afóen ampiren be aná bá manafin kasukhen mino.^f ⁸Mai vanta vá anasi vá ano mana vukhafaf ukhen mino. *Esé 2:24* ⁹Máan tukhan ma Tiyarafenu ano veyantái vanta vá anasi vá maman kasuantákein mai vanta ano ída yaimin nono.”

¹⁰Máa siran betí ankan ínaimpáké má naumpin oriven Yisasintá bei eyo iyampon kayo ano mai vaya van evaránen inaien mino. ¹¹fInáikan béi vetí ankan tiamemí, “Mana vanta ano ma ve aná ifá uren ma ena nanin ma o varanten mai vanta ano mai nanin má pamúkuíi inten mino. ¹²Inká mana nanin mano ma ve avafun ifá uren ma ena vanta ma o varanten mai nanin mano mai vanta vá pamúkuíi inten mino.”

Yisasi Ma Arará Iyampon Arintan Avu Uantein Baya Ino

(*Matiu 19:13-15; Ruku 18:15-17*)

¹³Manáa ano Yisasin nan ayan ánotá kaú antanovare siren arará iyampon arinta aviren eríkan beni eyo iyampon kayo ano vetí ankan asen mino.

¹⁴Asíkan Yisasi vetí ankan onan aran kiyaimpin temí, “Tiretí ankan áesin arará iyampon arinta séi varunafá erino. Tiyarafenui Yafisin mai kayo ma einí ukhein nanin banta ina ino. ¹⁵gTéi fura siré tiretí ankan tiamiyá uno mana nanin banta ano ma ída arará iyampon arinta anden ma Tiyarafenui Yafisin ída varanteya maifin ída kanafeya oferan nono.” ¹⁶Máa siren mai iyamporinta yafayó diyan ayan ánotá kaúden avu amen mino.

Kokhon Ona Vain Pumarai Vaya Ino

(*Matiu 19:16-30; Ruku 18:18-30*)

¹⁷Mairá Yisasi e manten oríkan mana vanta ano savaen me aron durafúden matimen temí, “Kama aru soe, séi inté ma erá ídakípan aunan barante rafuno.”

¹⁸Máa síkan Yisasi véin tiamemí, “Pará éi séin nan kama e siya fono. Tiyarafenu veyáká anan kama ukhen mino. ¹⁹Man baya éi afová ukha ono.

10:7 Manáa vompompin ída “*be aná bá manafin kasukhen mino*” sikhnen mino.

b9:49 Riv 2:13 **c9:50** Mat 5:13; Ruk 14:34 **d10:4** Diu 24:1-4; Mat 5:31

e10:7 Efe 5:31-33 **f10:11** Mat 5:32 **g10:15** Mat 18:3

‘Ída vá banta aruan purono.’

‘Ída vá ábasu namu ono.’

‘Ída vá umoyan daná barano.’

‘Ída vá ena vanta kampun kó tiantano.’

‘Ída vá kampun tire ena ína yaná barano.’

‘E anoifon aránaó pasá bano.’” *Eks 20:12-17; Diu 5:16-20*

²⁰Máa síkan mai vanta ano Yisasin tiamemí, “Aru soe, séi ma iyampon táké eré tare ma e varúna mai man baya kayo máa minó bákuriyá uno.

²¹Máa síkan Yisasi véin ódaren arunaná máden béin tiamemí, “Éi mana yaná o útúka ompo ei ona minó mo sarí ure vá ona ma ída van nanin banta mai moní ameno. Amiráka mae mai ínaimpáké inaru fáke kama yaná baran nompo eriveya séin tivákurono.”

²²Máa síkan mai vanta ano kokhon ona kaúdakaréin ará ano uman diyaimpin me ampiren oren mino.

²³Orivíkan Yisasi vei eyo iyampon kayo onen eúkiyan temí, “Ona ma kokhon kain ma vain banta ano Ti-yarafenui yafisimpin ída kanaíen oferanten mino. ²⁴Máa síkan bei eyo iyampon kayo mai veya van anúden orera íkan Yisasi evaránen betí ankan tiamemí, “Tikhafana oe, banta ano ma Ti-yarafenui yafisimpin ma oferan mai ákona yoran mino.”[§] ²⁵Kamerí ano ma ufi aimpin ódin mai uman dakhen mifo kokhon ona ma yákein kéká ano ma Ti-yarafenui yafisin barufin ma ódin mai moéken uman mi yakhen mino.

²⁶Máa síkan beni eyo iyampon kayo anú duren betiyan ten orera emí, “Máan ma ukhantin maen mai iye ná Ti-yarafenu ano kanaíen aviranten nafino.”

²⁷Máa síkan Yisasi vetí ankan kakháben temí, “Minó danápin banta

ano ída kanaí inten mifo Ti-yarafenu veyáká anan kanaí inten mino.”

²⁸Máa síkan Pita ano Yisasin mana veya siamemí, “Ineno setí ankan minó daná me ifá uréi éin dakhafiyá uno.”

²⁹Máa síkan Yisasi semí, “Téi fura siré tiretin tiamé uno. Manáa vanta kayo ano ma sen má tenti kama veya va san ma iniren afá aváen má ayofin má anóe afóen má iyampon má dunan ana vá ma me ampikharen maen ³⁰betí ankan ena mana antaretivá (100) baranten mino. Betí ankan ma varará para vantin Ti-yarafenu ano vetí ankan ma fefa mantá ein danasinta esantaren kokhon daná aminten mino. Betí ankan kokhon má bá afá aváen má ayofin má anóe afóen má iyampon má dunan ana vá barantin maen manáa vanta kayo ano vetin namu avúavá uantanten mino. Máan uanti-yaré intin ínaimpá ma yamú afoká intin ída kípán para oriyán ban aunan baranten mino. ³¹^hBaranten mifo aní maen oriyain nanin banta kayo ano ínainí intin ínainí maen oriyain nanin banta kayo ano anona aní inten mino.

**Yisasi Ma Veyan Púaren E Mantan
Nain Nan Ma Kanú Manaú
Dádasí En Tein Baya Ino**

(*Matiu 20:17-19; Ruku 18:31-34*)

³²ⁱMáa siren ínaimpáké betí ankan e manten Yarusaremí ódono van aayana oren mino. Yisasin nare an oríkan beni eyo iyampon kayo ano kokhon ineine iyákan betí ankan ma avákuren noré ein nanin banta ano akhokho van en mino. Máan tíkan Yisasi sirantan kan orun kádan (12) eyo iyampon kayo ádun avían kaúden be ané ma afoká inain baya enádá evaránen tiamen mino. ³³“Yerusaremí ódé tifékun maen mana

§10:24 Manáa vompompin ena veya asotú ukhen mino: “Kokhon ona ma varano van inikhein kéká ano ma Ti-yarafenui yafisimpin ma oferan mai ákona yoran mino.”

^h10:31 Mat 20:16; Ruk 13:30 ⁱ10:32 Mak 8:31; 9:31

vanta ano Banta Anin maman monó ánon banta kayo vá man baya ma afová ukhein banta kayo vá ayampin kaintin béin aruan purono van betí ankan kó tiantanten mino. Béin ída Yutan banta anampin aminten mifo ena anan bantafin mi aminten mino. ³⁴ Amintin maen betí ankan mano véin ayana-van baya sen akhare sen dafiyó ankamen uren béin aruan purinten mino. Aruan púdantin kanú manaú damú orivintin maen béi evaránen e mantanten mino.”

**Yemisin Nú Yonin Nú Ano
Ma Yisasin Inaein Baya Ino**

(Matiu 20:20-28)

³⁵ Maa sirákan Sebetin anin kanan Yemisin nú Yonin nú ano véi vaintá eriven temí, “Aru soe, berasan mana yana san ina urékuya éimai yanasí berasan usintano van muno.”

³⁶ Maa síkan béi evaránen békanan tiamemí, “Tiré kanan téi náí yanasísá uantano vará iya fonó.”

³⁷ Maa síkan béin tiamemí, “Ínaim-páké ma éi ma kákan Kiní uvesí berasan pintena mana ano éin ayan kurompá kumanintin mana ano ayan ópá kumanintí ono van muno.”

³⁸ Maa síkan Yisasi evaránen békanan tiamemí, “Tiré kanan ma séi ma in-aiyaona maí yaná ída siré kanan afová ukhe ono. Téi ma saréa ma nanuna kápifin tiré kanan kanaí neyá inká téi ma feranuna non pereyá inte rafono.”

³⁹ Maa síkan békanan béin tiamemí, “Berasan kanaí onte uo.”

Síkan Yisasi vékanan tiamemí, “Pura ino saréa ma séi ma nanuna kápifin tiré kanan má maifin nan nono. Téi ma feranuna non tiré kanan má peran nono. ⁴⁰ Máan tin nompo séin tiyan kurompá kumanintin tiyan ópá kuman-

intin ma in mai ída sen tina yaná ino. Ti-yarafenu veyantái maí kumanin manáa vanta kayo aminten béi fefái vetin nina funtáadan ban mino.”

⁴¹ Maa síkan tiyan míkan eyo iyampon kayo ano iniren Yemisin nú Yonin nú anan uanten mino. ⁴² Anan uantákan Yisasi vetí ankan arákan béi vaintá eríkan betin tiamemí, “Tiretí ankan afová ukha ono ánon banta kayo ma ída Ti-yarafenu-rá ma mumunan iyain nanin banta kayorá ma yafisé iyain maí vetí ankani ákona vákan mi yafisé iyan mino. ⁴³ Dafisiyan mifo siretí ankampin ída vá ma avúavá bano. Tiretí pinté ma kákaní ma ono van béi vá tiretí yoran banta vá bano. ⁴⁴ Mana ano ma siretí ánon bantaí ma ono van béi vá minói miyan ída van doran banta vá bano. ⁴⁵ Mai fara vara seyo, Banta Anin ma erikhein maí véin ayaen dóantano vará erikhen naino. Ída ino. Béi vanasi ayaen doren be aunan amintin maí ano kokhon nanin banta miyaní uren avirano van mino.”

**Yisasi Ma Auu Yufúkukhein Banta
Auu Kama Uantein Baya Ino**

(Matiu 20:29-34; Ruku 18:35-43)

⁴⁶ Betí ankan Yerikó barurá oren mino. Béi Yerikó me ampiren oríkan bei eyo iyampon kayo vá kokhon nanin banta kayo vá béi oriyákan Timeasin anin Batimeasin auu yufúkukhan aa akhempá kumanten banasi vaipá moni san inantiyaren mino. ⁴⁷ Inantiyaren in-íkan Nasaretké Yisasi eriyen mino síkan béi avádóden oovaren temí, “Devitin anin Yisasi oe, séin nan éi arunan usintano.”

⁴⁸ Maa síkan kokhoná banta ano véin asen temí, “Ei vaya fákano.”

^j10:38 Mak 14:36; Ruk 12:50 ^k10:39 Apo 12:2; Rev 1:9

^l10:42 Ruk 22:25-26 ^m10:43 Mat 23:11; Mak 9:35

Máa síkan mai vanta ano moéken avádóden enádá oovaren temí, “Devitin anin noe, séin nan éi arunan usintano.”

⁴⁹Máa síkan mairá Yisasi o mantaven temí, “Béin aresin erino.”

Síkan betí ankan mai auu yufúkukhein banta araren béin tiamemí, “Éin ará ano vá ákona ino. Éin ariyan mifo e mantano.” ⁵⁰Máa síkan béi vei au anamun me karúdaren e manten Yisasi vaintá oren mino.

⁵¹Oríkan Yisasi véin tiamemí, “Éin náisá téi uantano vará inikhe fono.”

Máa síkan mai auu yufúkukhein banta ano véin tiamemí, “Aru soe, séi evarané onarami iyá uno.”

⁵²ⁿMáa síkan Yisasi véin tiamemí, “Éini mumunan mano éin evaránen kama uanten mifo orono.” Máa siyain má manádá ano ainen béin auu kama uvin oniyáken Yisasin bákuren ayanafá oren mino.

Yisasi Ma Kin An Daven Yerusaremí Ódein Baya Ino

(*Matíu 21:1-11; Ruku
19:28-40; Yoni 12:12-19*)

11 Máan turen Yisasi má bei eyo iyampon kayo vá ano Yerusaremí áde suron oriven Orifí Anuyon áde ma Betfakhé baru vá Betaní baru vá baintá oren mino. ²Oriven mai ráké Yisasi vei eyo iyampon kayo fintena kankanan tianten temí, “Tiré kanan ma mesan barufá oriveya onessin maen mana ano ída ané kumantan nain donkin ayanan kurantin banten mino. Mai vá ayanan utú deya séi varunará bare ereno. ³Eresin ma mana ano ma siré kanan inaen ma ‘fará máan tiya fono’ ma sintiya vá béin ná tiameno, ‘Bafani yoran bákan mi véi sisintá e aviriyarúna veni yoran ma kípantin ainen ovaránen tiantantin erinten mino.’” ⁴Máa síkan

beni eyo iyampon kanan mai varufin oriven onákan aa akhempá mana namun onará ayanan kuran baré íkan míkanan mai donkin ayanan mo útufen mino. ⁵Útufíkan manáa vanta mairá áde mantakharen békanaan inaemí, “Tiré kanan náisá intoyá mai arará donkini ayanan útufiya fono.” ⁶Máa sen ina íkan Yisasi ma vékanaan tiamein baya máa mai kayo siamíkan “Kana ifo avirano” síkan mai donkin békanaan aviren oren mino. ⁷Oren mo Yisasi vaintá mai donkin kaúden békanaan au anamun davá den mai donkin ané uvídan Yisasi mairá kumanen mino. ⁸Kumamen oríkan kokhon nanin banta ano vetíi au anamun davá diyan aasá uvisin manáa ano yaa ayan iyaren uvisíen mino. ⁹Máan tiyákan manáa nanin banta ano auufá orin manáa ano oyampá orin iyáken oovararen temí,

“Bafani avisá daní ono!”

“Bafani avíká ma eriyain avisá daní otifano!” *Íbo 118:25-26*

¹⁰“Ma ma eriyain tétin tinafu Devitini yafisin an dakhein mifo avábasá ino.”

“Tiyarafenui avisá moéke yani suron ono!”

¹¹Máa siyákan Yisasi Yerusaremí o unaven monó namumpin un pében minó daná onen eúkiyan áau eraven inúpasí íkan bei sirantan kan orun kádan (12) eyo iyampon máa vá Betaní oren mino.

Yisasi Ma Fiki Yaa Ana Asin Kafurein Baya Ino

(*Matíu 21:18-19*)

¹²Ená damú Betaní me ampiren eriyá íkan Yisasin arafan puren mino.

¹³^oArafan puriyan eriyaren béi onákan manáa nentá mana ananoni ukhein fiki anaa ampantan béi mai anafin aranan doseno van oren mino. Mai fiki ano ma

aran iran damusí ída ukhan ananon dakhaní ana ukhan mai yaa anafin oriven onákan ída mana aran baren mino. ¹⁴Máan tukheimpin Yisasi mai fiki yaa van temí, “Éini aran mana ano ída vá evaránen nano.” Máa síkan bei eyo iyampon kayo mai vaya inen mino.

**Yisasi Ma Kákan Monó Namun Pinte
Ma Mínó Daná Sarfín Banta
Kayo Yo Siantein Baya Ino**

*(Matiu 21:12-17; Ruku
19:45-48; Yoni 2:13-22)*

¹⁵Betí ankan Yerusaremi oriven Yisasi kákan monó namumpin ódiven maifin ma sarí iyan ma miyaní iyá ein kéká bá inká moní arumiyan ma nun kayo sarí urákan ma miyaní iyá ein takhó bá kumanin má banaan karú diyáken do sianten mino. ¹⁶Banaan karú daren betí ankan ma mínó daná baren kákan monó namumpin ma non airo ananí uanten mino. ¹⁷Uantáden betí ankan tiamemí, “Tiyarafenui vompon dóki ano ída máa síkhen nafino, “Téin timá ma vain mai mínó nanin banta ano vá amúkin namun mino vá teno.” *Ais 56:7*

Máan ná tin nampo ‘siretí ankan mano mai namun maman umoyan banta kayoi aúpá baruí e ono.” *Yer 7:11*

¹⁸^pMáa siyákan monó ánon banta kayo vá man baya ma afová ukhein banta kayo vá ano mai vaya iniren béin ma arin nain avan aráfen dosen mino. Dosiyan mifo mínó nanin banta ano véini vaya van kákantá anúden orera iyan mai van béin nan betí ankan peren mino. ¹⁹Mairá inúpasí íkan Yisasin má

bei eyo iyampon kayo vá Yerusaremi me ampiren oren mino.

Mumunani Ákona Fákena Vaya Ino

(Matiu 21:20-22)

²⁰Ená damú pe ákurá betí ankan ori-yaren onákan mai fiki yaa ana anaa vá arú bá mínó ira khakhan onen mino. ²¹Ódaren Pita mai van ovaren inen temí, “Aru soe, inuran ma ma fiki yaa van ma namu ono ma seona mai inka irakhen mifo onano.” ²²Máa síkan Yisasi evará-nen tiamemí, “Tiyarafenu rasá mumu-nan ono. ²³ᵀTéi fura sé uno. Éi kanaíeya ma anuyon nan teya ‘anuyon noe, e ankábore un nonafin oferano ma’ sesin maen mai ano fara éi ma sinonái inten mifo éi ma ída kankanan ineine vanti ma mumunan ma ukhesin mi Tiyarafenu ano mai yanasí uantanten mino. ²⁴ᵀTiretí ankan ma mana yaná baranton iyáke ma amúkiya mumunan e ma fura mai yaná tetí baranté uno ma sesin mai ma siretí ankan ma varano van muno ma sinona yaná ano afoká inten mino. ²⁵⁻²⁶ᵀInten mifo siretí ankan ma mana vanta ano ma namu uantáká inti mae amúkiya mai vantai ume vá ifá uan-tano. Ifá ma uantesin maen mai siretí afóe ma inarufá bain mano siretí ume ifá uantanten mino.”^{**}

**Yisasini Ákona Van Ma Monó Átaru
Namuntá Ma Ánoni Ukhein Banta
Kéká Ano Ma Inaein Baya Ino**

(Matiu 21:23-27; Ruku 20:1-8)

²⁷Enádá Yisasin má bei eyo iyam-pon kayo vá Yerusaremi oriven béi kákan monó namumpin nókan monó ánon banta kayo vá man baya ma afová

^{**}**11:25-26** Pefa v. 26 ída feyante kama Iburu vompopin baréin ínainpáké bom-pon uvaran banta kayo mai vaya asotú en mino. Ma vaya Matiyu 6:15 vá manái ukhen mino: “Ifá uantanten mifo siretí ankan ma ena vantai ume ma ída ma ifá uan-tesin mai siretí afóe ma inarufá bain mano siretí ume ída ifá uantanten mino.”

ukhein banta kayo vá ánon banta kayo vá ano véi vaintá eren mino. ²⁸Eriven betí ankan béin inaemí, “Éimpin intéa ákoná bayá éi máan tiya fono. Iye ano éin mai ákona amiren ná éin nan mai yorarí ono sikhen nafino.” ²⁹Máa síkan Yisasi evaránen betí ankan tiamemí, “Téi mana yana san tiretí ankan ina onté uno. Inaéku ma ovaráne mai vaya ma séin tisimídesíí mai séi ma manté doriyarúna ákona siretin tiamenté uno. ³⁰Tiyarafenu anó Yonin monó non péantan doran amen nafino áa vanta ano mai yoran amen nafino. Tiretí ovaráne vaya séin tisimeno.” ³¹Máa síkan betiyan ten orera emí, “Teti ma sé Tiyarafenun anon mai yoran Yoni amikhan mino ma sékun mai siretí ankan, ‘Pará ída mairá munan iya rafono,’” sinten mino. ³²Máa sinten mifo setí ma sé, ‘Banta anon mai yoran amikhen mino,’ ma sékun mai ano ída kaná inten mino.” Yoni sakhanampa vanta uron mino sen minó nanin banta ano inikhan mai van mi vetí ankan peren mino. ³³Máa siren betí ankan evaránen Yisinin tiamemí, “Tetí ankan ída afová ukhé tiféuno.” Máa síkan Yisasi vetí ankan tiamemí, “Téininte ákoná bará doriya rafuno. Mai siretin ída siamenté uno.”

**Uvaini Yunan Anaará Ma Namu
Vanta Kéká Ano Ma Yafiká
Eintá Ma Ovaéadan Baya Ino**

(Matiu 21:33-46; Ruku 20:9-19)

12 ¹Yisasi araién baya vaédiyan betin tiamemí, “Mana vanta ano uvaini yunan dóden dafuí uran baré íkan mai vanta ano uvaini ma yasamin nain masí uáden inká dafisin banta amá uvamá den uran baren mino. Baré íkan manáa vanta kayo ano maifin dorarí uré moní barano van íkan mai vanta kayo ayampin me ampiren béi

enafá ayáká oren mino. ²Orikharéin ínainpáké uvaini aran kúdin damusí íkan béi mana vei yoran banta siantan mai ma uvaini yunampin doriyá ein banta kayo vafá oren mino. Mai vanta kayo ano manáa uvaini aran mai yunan pintena véin amino van tiantan oren mino. ³Oríkan betí ankan mai yoran banta fákaren namu arirí uren ída mana yaná amin para siantan oren mino. ⁴Oriyampin mai vanta ano evaránen ena yoran banta siantan oríkan betí ankan mai vanta ánon ankáden béin máden namu uren ayave amen mino. ⁵Máan tiyampin béi mana vei yoran banta siantan oríkan betí ankan mai vanta aruan puren mino. Aruan puriyampin béi kokhoná bei yoran banta kayo siantan oríkan betí ankan manáa ankamiyan manáa aruan puriyan en mino.

⁶Máan turákan béi ma anunu ukhein-mai ve anin mana ana en mino. Mai iyampon típá kípán uron béi siantan mai ma yunampin ma yoriyain banta kayo vafá oríkan béi semí, “Téin tikhái vayan ininten mino.”

⁷Mai yunampin ma yoriyá ein banta kayo ano vetiyan ten orera emí, “Ma vanta anon minó be afóen nina yaná baranten mifo erítifé béin aruan purono. Aruan púdé maé tetí ankan mai yunan dafu varátifano.” ⁸Máa siren betí ankan mai iyampon pákaren aruan púden béin au yaiyó uan mai yunan dafu akhempá mo kharúden mino.

⁹Karúden mifo mai yunan dafu afóe ano intesá inten nafino. Béi eriven maen mai yunan dafufin ma yoriyá ein banta kayo me aruan púden mai yunan dafu e maman ena vanta kayon aminten mino. ¹⁰Tiyarafenui vompon dóki ano ma máa sikhein mai siretí ankan ídá dankáke rafono.

“Má uvaran banta kayo ano ma yo mam karúdein onámaná ano maman má dádaimpin mana ákona onámanasí ukhen mino.

¹¹ Mai Bafan mánon máan turan mai anon tetin tivorá kama ukhen mino.” *Íbo 118:22-23*

¹² Yisasi ma sian baeriyain baya mai vetí ankan nan tiyákan afová uren béin pákano van uvaen banasí van péden me ifá en oren mino.

Kamanin Ma Takisi Amin Baya Ino

(Matiu 22:15-22; Ruku 20:20-26)

¹³ ^vInaimpáké Yisasin mákasino van betí ankan manáa Farasisi kayo vá Erotini vanta kayo vá tiantan Yisasi vaípa eren mino. ¹⁴ Eriven betí ankan béin tiamemí, “Aru soe, setí ankan afová ukhé uno éi fura vaya ana sin banta ono. Éi ída mana vanta van kokhon ineine in banta ono. Minó banta ano manáí ana ukhayai éi Ti yarafenui fura sikhein baya afova amé iya ompo setin tisimeno. Sisan ma takisi amin mai funtákein ná tetí amé tifante rafuno áa ída fino.”

¹⁵ Máa síkan Yisasi vetí ankani kam-pun afová ukhen betin tiamemí, “Tiretí ankan pará téin akhenóka iya rafono. Mana aran moní bareya eresí onano.”

¹⁶ Máa síkan betí ankan mana moní aran maman bein me amíkan betin inaemí, “Ma moníká iyen aunasá baná inká iyen avisá mairá uvanten nafino.”

Máa síkan betí ankan evaránen temí, “Kin Sisan mino.”

¹⁷ ^wSíkan Yisasi vetí ankan evaránen tiamemí, “Sisan nina yaná Sisan ame vá inká Ti yarafenu ina yaná Ti yarafenu vá ameno.”

Síkan betí ankan kákantá anúden mino.

Púkaren Ma E Mantaven Ábasuí Inain Baya Ino

(Matiu 22:23-33; Ruku 20:27-40)

¹⁸ ^xSadyusi kéká ano furin nanin banta van ída e mantanten ne siyain bákan betí ankan Yisasi vaintá eriven béin inaein mino. ¹⁹ ^y“Aru soe, mana vaya Mosesi ano setí ankan nan máa siren bompon uvanten mino. ‘Mana vanta ano ma iyampon ída kainton ma fúbintin ben aná ma fara váintin maen ná béin afá aváe ano vá mai nanin baré mamákená be afá aváen ayaená iyampon kaúantano.’ ²⁰ Dan manápá ifo afápá kan un kádan anavádano varé íkan mai finté esé banta ano nare mana nanin mamákaren ída mana iyampon kainton mai vanta furen mino. ²¹ Púbíkan béin ánaintena vanta ano mai nanin mantaren ída iyampon kaina mai vanta furen mino. ²² Mai nanin minó dan manápá ifo afápá kan un kádan anavádano mádiyan ída iyampon kaina yo fúdú uvíkan mai nanin inaimpáké puren mino. ²³ Máan tukhen mifo ínaimpáké ma furin banta ma evaránen e mantan nain damú mai nanin iyen anasá banten nafino. Mai éi afová ukha ono mai nanin manan minó dan manápá ifo afápá kan un kádan banta ano mantaren mifo éi sétin tisiminte fono.

²⁴ Máa síkan Yisasi evaránen betí ankan tiamemí, “Tirarafenui vaya vá ákona vá tiretí ankan ídá afová ukheyá baya namu iya rafono. ²⁵ Purin nanin banta ma masí pinté ma evaránen e mantan nain damú ída vanasi ano ábasuí inten mifo vetí ankan enisori kayo ma inarufá bain an mi yen banten mino. ²⁶ Banten mifo furin nanin banta ma evaránen e mantan nain baya ma Moseni vompon dókifin ma sító daa anan ma ira kiyani ma Ti yarafenu ano ma Mosen tiamen ma, “Téi Abaraamuni Ayarafenu

uno. Téi Aisakini Ayarafenu uno. Téi Yekopuni Ayarafenu uno,' *Eks 3:2, 6* ma sein mai siretí ankan ídá dankáke rafono. ²⁷ Purin nanin bantai Ayarafenu vaino. Ída ino. Para ma vain nanin bantai Ayarafenu bákaya siretí ankan tavi aaimpin mi oriya rono."

**Moéken Kákaní Ma Ukhein
Man Baya Fákena Vaya Ino**

(*Matiu 22:34-40; Ruku 10:25-28*)

²⁸ Maa siyákan mana man tinbanta ano eriven iníkan betí ankan baya fóké aruviyákan béi inin Yisasi kama vaya fóké evaránen betí ankan tiamiyákan iniren béi Yisasin inaemí, "Intéa man baya anó minó man baya esantaren ná esesí ukhen nafino." ²⁹ Maa síkan Yisasi evaránen béin tiamemí, "Esésí ma ukhein mai ma man baya ino: 'Tiretí ankan Isareri nanin banta oe, setisi Bafan Tiyarafenuveyáká anan Bafan ban mino. ³⁰ Ban mifo vá ei Bafan Tiyarafenu vá ei aú amafon má ei ineine vá ei ákona vasá minó o éke e éke ureya vá anunu ono.' *Diu 6:4-5*

³¹ Mai man baya ánai ma vain man baya mai ma man baya ino. 'Eyan nan ma anunu iyaonaíe vá ena van anunu ono.' Ída ena kákan man baya váken mai ano má kanan man baya esantakhen mino." *Riv 19:18*

³² Maa síkan mai man baya ma afová ukhein banta ano máa sen Yisasin tiamemí, "Aru soe, éini vaya kamaen mino. Pura ino. Tiyarafenu veyákái Bafan ban mino. ³³ Ban mifo seti vá minó tú timafon má minó ineine vá minó ákona vá pókesá béin nan tiran ná tifano. Tetí ankan ma seyana nan ma iyarúna máan ná esá enavan tiran ná tifano. Tetí ankan ma maí kanan man baya ánain ma vákurékun maen mai avúavá anon ira

ma sáden minó akonte iyain má ara ara akonte vá esantakhen mino."

³⁴ Maa síkan Yisasi inin mai vanta ano ma evaránen tein baya van mai mana kama afova vain banta ano ma seiní íkan Yisasi evaránen béin tiamemí, "Éi ída Tiyarafenui yafisimpin nentá ba ono." Maa síkan minó nanin banta kayo ano akhokho van uren Yisasin ída enádá bá mana vaya inaen mino.

**Tiyarafenu Ano Ma Aní Ukhein
Banta Mai Iyen Anin Nafino**

(*Matiu 22:41-46; Ruku 20:41-44*)

³⁵ Yisasi átaru namumpin báken banasi vaya siamiyaren béi semí, "Intesá ukhan ná man baya ma afová ukhein banta kayo ano Karaisi nan Devitin akhá ino siyan nafino." ³⁶ Mai van Kantá Aunan mano Devitin ineine amíkan Deviti veyantá máa semí, "Bafan mano senti Bafan ne máa sen tiamen mino,

"Éi sen tiyan kurompá kumaneno. Ínaimpáké eni namuro kayo séi maman éin aránaópá kaonté uno." ' *Íbo 110:1*

³⁷ Deviti veyantá béin nan Bafan ne sikhén mifo véi intesá urená bei anin bavae."

Maa síkan beni vaya kokhon nanin banta ano amusin iyan inen mino.

**Yisasi Ma Au Khákan In Banta
Kayo Van Ma Sein Baya Ino**

(*Matiu 23:1-36; Ruku 11:37-54; 20:45-47*)

³⁸ Iniyákan Yisasi vanasi afova amen temí, "Tiretí ankan man baya ma afová ukhein banta kayo vará dafiseno. Betí ankan kama ukhein ayá au anamun ma uren orin má átaru varu ráke ma vanasi ano ódaren bayan mino ma sin ma san aranakhén mino. ³⁹ Betí ankan monó átaru namun kayofin banasi avorá

ma kumamen inká kákan dunan nan damú ma esé karáká ana ma kumanin nan mi aranakhen mino. ⁴⁰ Betí ankan baré nanin kayo kampun tiriyan betí ona umoyan iyáken au khákan en ayáká amúké iyan mifo mai kéká anon Ti-yarafenui kópin kákan uman baranten mino.

**Baré Nanin Mano Susu Sin
Moní Ma Karú Dein Baya Ino**

(Ruku 21:1-4)

⁴¹ Maná damú kákan monó namumpin Yisasi moní kain anan ádé kumanten oniyákan banasi ano susu sin moní mai anampin kuferiyákan kokhon moní ma yákein kayo ano kokhon ná moní kuferiyan mino. ⁴² Máan ten kuferiyákan mana ve avafu fúkein baré nanin ída kokhon ona vain mano eren me kankanan tító moní kanan mana ten toeya ma (10t) eini ukhein kuferen mino.

⁴³ ^bKuferiyákan Yisasi vei eyo iyampon kayo aran eríkan betí ankan tiamemí, “Téi fura siré tiretin tiamé uno. Ma ma ona ída van ma ve avafu fúkein baré nanin mano kákan moní kuferen mino. Béi ma átaru namumpin bain anampin ma kuferein moní ano minó nanin banta esanten mino. ⁴⁴ Esanten mifo ona ma yákein nanin banta ano kokhoná dáken mai finténa manáan anafin kufé dan araviyan mifo ma nanin mano ona ída van o útúken mi yunan ma nan nain moní ída antan á inton minói kuferen mino.”

**Kákan Monó Namun
Ma Varákin Nain Baya Ino**

(Matiu 24:1-2; Ruku 21:5-6)

13 Yisasi kákan monó namun me ampiren eriyákan mana vei eyo iyampon mano véin tiamemí, “Aru soe,

onano ma monó namun kákan onámaná kayo vá kama yanasinta vá pókéi uvádan ban mino.”

² ^cMáa síkan Yisasi evaránen béin máa sen tiamemí, “Éi ma kákan má oniyaona mai finténa ída mana onámaná áintin benané benané ukhen banten mino. Ída ino. Minó onámaná barákuan karúdantin barará erafuvintin ída mana onámaná benané benané ukhen banten mino.”

**Ma Vara Kípan Akhempá Ma Aní
Daná Afokáin Nain Baya Ino**

(Matiu 24:3-14; Ruku 21:7-19)

³ Ínaimpáké kákan monó namun e omaren Orifí Anurá Yisasi kumantan Pitán má Yemisin má Yonin má Endurun má betí ana váken betí ankan Yisasin in-aemí, ⁴ “Tetin tisimeno, inte yamusá mai yanasinta afoká inten nafino. Intéa aní daná naré afoká intí teti óde afová erá mai yanasinta inka afoká in ádé en mino sente rafuno.”

⁵ Máa síkan Yisasi vetí ankan tiamemí, “Manáa nanin banta ano siretí ankan maka sinten mifo yaffian ná ákona ono. ⁶ Kokhon banta ano eriven téin tiví taraaren tinten mino séi Ti-yarafenu Anin banasi avirantá ma siantan erikhá ein banta uno siren betí ankan mano kokhon nanin banta máka sinten mino. ⁷ Ínaimpáké tiretí ankan ma aruvin baya vá aruvono van ma siyan nain baya vá ma in-inteya ída vá tiretí ankan anú duman duman ono. Mai yanasinta afoká uvintin mi kípan damútasoren mí erinten mino. ⁸ Mana anan banta ano e manten ena anan banta vá aruvintin inká mana kini kéká ano e manten ena kini kéká bá aruvintin inka manáa akhempá bara kaya intin kákan arafan purinten mino. Mai yanasinta maen anasi ano ma iyampon

kaono van inamunan iniyān ai san aureiní inten mino.

^{9d}Máan mi inten mifo siretí ankan dafían ná ákona ono. Betí ankan mano vetí ánon banta kayorá tiretin kó tiantanten mino. Kó tiantáden betí monó átaru namun kayofin tiretin ankaminten mino. Ankáden betí ankan téin tiví maman bararasí ono van iniyáken kamanin banta kayo vá kin kayo vá avorá mantaan táden duvun intiya séinti veya vetí ankan tiaminono. ¹⁰Ínaimpá mai yanasinta afoká inten mifo kama veya nare vá minó nanin banta siameno. ^{11e}Máan tinten mifo veti ankan ma siretí ankan pákaren ma kópín mo khaintiya sireti ída vá akhokho van eya inte vayá tente rafuno sireya ineine ono. Mai áaurá ma eni ineinefin ma erin nain mai Tiyarafenu anon amen mifo mai veya vá teno.

^{12f}Máan intin be afá aváe ano e mantaren be afá aváen aruan purino van namuro vanta kayo ayampin aminten mino. Amintin be afóe ano e mantaren be akhá aruan purino van namuro vanta kayo ayampin aminten mino. Amintin be akhafana ano e mantaren be anóe afóe aruan purinten mino. ^{13g}Minó banta ano siretin namu uantanten mifo mai farava ino séin tiví tiretimpin bantin mino. Máan tinten mifo éi iye anó ákona iyá inte fono mai kípan damú éin Tiyarafenu ano evaránen aviranten mino.

**Mana Namu Yana Suron Ma
Afoká Inain Baya Ino**

(Matíu 24:15-28; Ruku 21:20-24)

^{14h}Baru ma namu inain mai namu yana suron mi erintiya siretí ankan onan ono. Béin nan ída vano ma sikhá ein

mai varurái mantakhen banten mifo ma veya ma yankafin nain mano kama vá en inino. Máan ma inain damú minó nanin banta ma Yudiá ma vain mano vá anu yonpimpasá karan orino. ¹⁵ⁱMáan ma intin maen má daró ma váin nain banta ano ída vá erafuven má naupin un pében be amá pinte yanasinta varano. ¹⁶Máan ma intin dunampá ma orikháin nain mano ída vá evaránen bei au anamun ovarano. ^{17j}Máan ma intin maí damú amúbá nanin kayo vá arará iyampón ma nan kuviyain nanin kayo va san mi sirunken mino. ¹⁸Amúkesiná mai avúava sinta iyon ma in damú ída vá afoká ino. ^{19k}Maí damú kákan uman mi vanten mifo esé ma Tiyarafenu ano ma aráien inaru vara ma uvarein táké ma eren tare ma varúnará ída máan ukhein uman pefá afoká ukharen mino. Ínaimpá ída máan uman banten mino. ²⁰Bafan mano ma máan damú ída ma maman asíkaí intin maen minó nanin bantan afeyoranten mifo veyan ma fe iyákein nanin banta van ma iniyáken maen maí damú maman asíkaí inten mino. ²¹Máan ma intin maí damú manáa vanta ano siretí ankan tiaminten mino, “Onano masí na Tiyarafenu ano ma aní ukhein banta van mino. Áa mesápá ban mifo onano.” Máan ma sintiya siretí ankan ída vá mai van mumunan ono. ^{22l}Manáa vanta kayo ano eriven kampun ten máa sinten mino, “Téi Tiyarafenu Anin banasi avirano van ma siantan erikhein banta uno. Téi mana sakhanaampa vanta uno,” siren ara ara avúavá daná afoká en ara ara yoran baranten mino. Máan tinten mifo veti ankan ma kanaí inten Tiyarafenu ano ma veyan iyádan bain nanin banta kéká kanaíen kufa uádan-

^d13:9 Mat 10:17-20 ^e13:11 Ruk 12:11-12 ^f13:12 Mat 10:21

^g13:13 Mat 10:22; Yon 15:21 ^h13:14 Dan 9:27; 11:31; 12:11

ⁱ13:15 Ruk 17:31 ^j13:17 Ruk 23:29 ^k13:19 Dan 12:1; Rev 7:14

^l13:22 Rev 13:13

ten mino. ²³Máan tukhen mifo siretí dafíaná ákona ono. Téi minó dana san inka siretin tiamé uno.

**Banta Anin Ma Overánen
Erin Nain Baya Ino**

(*Matiu 24:29-31; Ruku 21:25-28*)

²⁴mMáa siren Yisasi enádá betí ankan tiamemí, “Mai minó uman ma kípavintin “áau ano ída e unintin

biyon mano enádá ída kanten mino.

²⁵Máan tintin inaruráké ofu kayo kararen eravintin

inarurá ma ákona yanasinta vain mano kayamana inten mino.’ *Ais 13:10; 34:4*

²⁶n“Máan ma sin nain maí damú betí ankan onantín mi Banta Anin mano kakhan má ákona vá mamaren ayompin erinten mino. ²⁷oEriven maen maí damú bei enisori kayo siantantín oriven beyan ma iyákaré ein nanin banta avían átaru inten mino. Béi mino inaru vá bara vá ma o útúkein akhen páke yeren aviranten mino.

**Fiki Yaa Anará Ma Afova
Varan Baya Ino**

(*Matiu 24:32-35; Ruku 21:29-33*)

²⁸Ena aní daná ba san Yisasi afova siamemí, “Fiki yaa ana ano sétin afova simé iyan mino. Daa ayan mano ma amun amun in ma auyen amun basen oriyan maen mai inka á kanten mino siya ono. ²⁹Máan manan ukhen mino ínainpá ma siretí ankan onesin ma mai yanasinta afoká inti vá mai inka erikhen onará mantakhen mino vá te afová ono.

³⁰Téi fura siré tiretin tiamé uno. Ma ma saréa ma vain mai nanin banta ída fúkantin mi minó mai yanasinta afoká inten mino. ³¹Máan tintin maen inaru vá bara vá kípanten mifo séinti vaya ída aiyoranten mino.

**Ída Mana Nanin Banta Ano
Yisasi Ma Erin Nain Damú Bá
Áau Vá Afová Ukhen Mino**

(*Matiu 24:36-44*)

³²“Ída mana nanin banta ano mai yamú bá mai áau vá afová ukhen mino. Inarurá bain enisori kéká bá Tiyarafenu Anin má ano yere ída afová ukhen mifo ve Afóe veyáká anan mai yaná afová ukhen mino. ³³Máan tukhen mifo siretí ankan utá are yafíke vá bano. Tiretí ankan ída afová ukha ono inte áau rasá mai afoká inten nafino. ³⁴Mai máan mi ukhen mino. Mana vanta ano ma ve amá me ampíren enafá orono van maen bei yoran banta kayorái veina yaná daíden amé iyan mino. Máan turen maen mi onará ma yafisin banta van kama vá eya yafiseno sé iyan mino.

³⁵p“Máan tukhen mifo siretí ankan dafian ná ákona ono. Tiretí ankan ída afová ukha ono intéa yamusá mai má afóe erinten nafino. Béi inúpákesá erinten nafi áa inuran aúbanasá erinten nafi áa kokore asin pintesá erinten nafi áa ákura sá erinten nafino mai siretí ída afová ukha ono. ³⁶Tiretí ankan auká bakharé esin béi ainen eren e onanten mino. ³⁷Ma ma séi ma siretin tiamerúna mai vaya anan minó tiamé uno, “Tiretí dafíke vá bano.”

**Yisasin Arin Aa Van
Ma Yosein Baya Ino**

(*Matiu 26:1-5; Ruku 22:1-2; Yoni 11:45-53*)

14 Yisi Ída Van Bereti Ma Nan Omá Damú ma afokáin mai kan damú ana ukhan monó ánon banta kayo vá man baya ma afová ukhein banta kayo vá temí, “Intesá urerá tetí Yisasin kam-pun tirerá pákaré béin aruan puró tifante

^m13:24 Yoe 2:10, 31; 3:15; Rev 6:12-13
^o13:27 Mat 13:41 ^p13:35 Ruk 12:38

ⁿ13:26 Rev 1:7

rafuno.” ²Máa siren betí ankan temí, “Mai kantá damú ída vá tetí ankan máan tono mai vanasi ano e manten aruvin afoká inten mino.”

**Betaní Barurá Ma Yisasin Ánontá
Aunka Uveri Vanaein Baya Ino**

(*Matiu 26:6-13; Yoni 12:1-8*)

³ᑎMáan tiyákan Yisasi Betaní barufá oren amon daná aí bain banta Saimonin amá karáká o kumamin mana nanin mano kákan esantakhein moníká bain aukna uveri anan mamaren eriven mai aukna uveri anan me yuvaren Yisasin ánontá banaen mino.

⁴Bana íkan maifin manáa vanta kayo varen aran naná máden betiyan ten oreraen temí, “Pará ma aukna uveri fasavifá afe iyan nafino. ⁵Tetí ankan ma kanú manaú antareti (300) moníká sarí uré ma mai moní mádé ma ona ída van nanin banta ameren mino. Máa siren betí ankan mai nanin asen mino.

⁶Asíkan Yisasi vetí ankan asen temí, “Tiretí ankan mai nanin áduantaro. Nái vará tiretí ankan béin uman amiyara fono. Béi ano séin kama avúavái usintiyán mino. ⁷ᑎOna ída van nanin banta kayo ano ena ena siretin má bantiya aya ono ma sinte aya in nompo séi ída siretin má ena ena vanté uno. ⁸ᑎAnasi ano ma varyain mai yaná inka véi máantin kípen mino. Téin tufá ma véi aukna uveri ma vanaein mai séi ma masípin oronunan úta sinten mino. ⁹Téi fura siré tiretin tiamé uno. Minó bara akhempá ma monó baya ma siamin nain maifimpá deren ma nanin mano ma varein avúavá dana san tiren béin nan ininten mino.”

**Yudasi Ma Yisasin Namuro
Ayampin Avían Kaono Van
Kana Ino Sein Baya Ino**

(*Matiu 26:14-16; Ruku 22:3-6; Yoni 6:70-71*)

¹⁰Maí damú tiyan míkan mifo sirantan kan orun kádan (12) eyo iyampon kayo finte mana Yudas Iskariotin ne sin mano monó ánon banta kayo ayampin Yisasin ameno van oren mino. ¹¹Oren mo síkan betí ankan mai iniren amusin uren béin ma moní miyaní inain iyá antádan Yudasi ma vetí ankan ayampin ma Yisasin amin nain áau vá aa va san araién dosen mino.

**Yisasi Ma Vei Eyo Iyampon
Kayo Vá Avo Uantan Dunan
Típa Nein Baya Ino**

(*Matiu 26:17-25; Ruku 22:7-14, 21-23; Yoni 13:21-30*)

¹²ᑎYisi Ída Van Bereti Ma Nan Omá Damú esé damú afoká en mino. Maí damú betí ankan Avo Uantan dunaní ma in sipisipi ararái aré iyan mino. Yisasiní eyo iyampon kayo ano véin tiamemí, “Intefasá tetí ankan mo avové uré kuyá éi Avo Uantan dunan nante fono.”

¹³Máa síkan eyo iyampon kanan tianta Yerusalemí oriyákan máa sen tiamemí, “Tiré kanan Yerusalemí barufin oresin ma mana vanta ano ma kákan non kave mamaren ma fókanti mai vanta ánain ná bákurono.” ¹⁴Bákure oresin béi ma mana namumpin un perantiya mai namun afóen máa seya vá tiameno, ‘Arú ano semantino senti karafaran intesin ná bain tesi eyo iyampon kayo vá Avo Uantan dunan nante rafuno.’ ¹⁵Tesin maen béi siré kanan mana yan bain kákan karafaran aní inten mino. Maifin dunan ma nan takhó bá kumanin kará

bá pe funtáken mino. Mai karafarampin ná tiré kanan tétisi yunan puntá ádano.”

¹⁶Máa síkan eyo iyampon kanan mai varufin oriven onákan mai ma Yisasi ma vékanan tiameinífen mino. Máan tíkan békanan Avo Uantan dunan ma mo nan nain puntáan kaen mino.

¹⁷Inupáké Yisasi má bei eyo iyampon tirantan kan orun kádan má (12) eren mino. ¹⁸“Mairá betí ankan takhóká kumanten dunan niyákan Yisasi semí, “Téi fura siré tiretin tiamé uno. Tiretin aúbaná pinté mana vanta ano senti namuro kayo ayampin téin aminten mino. Ma ma séin má manafin dunan niyain mano ino.”

¹⁹Máa síkan bei eyo iyampon kayoi ará uman dákan mana mana ano vetí ankan Yisasin araífen inaemí, “Téi funo áa iye fino.”

²⁰Mairá Yisasi vetí ankan tiamemí, “Mai siretí tirantan kan orun kádan (12) kayo aúbaná pintena mana vanta ano ino. Mai vanta ano vereti fákaren dókifin ma séin má manamani kain araviyain mai ano ino. ²¹Mai fura ino vompon mano fefá béin nan tikharé einífen mi Banta Anin purinten mino. Purinten mifo namuro kayo ayampin ma Banta Anin ma amin nain mai vanta van mi kákantá tirun ken mino. Mai séin ma namuro ayampin kain nain banta namu ukhen mifo moéken kama ukhen mino véin ída kaen na ino.”

Yisasi Ma Vereti Vá Uvaini Vá Bei Eyo Iyampon Kayo Amein Baya Ino

(Matiu 26:26-30; Ruku 22:15-23; 1 Korini 11:23-25)

²²Mairá betí ankan dunan niyákan Yisasi mana vereti máden Tiyarafenu

susu siantáden kisiren betí ankan amen temí, “Máde nano. Ma séin tu ino.”

²³Mairá béi uvaini kápi máden Tiyarafenu susu siantáden betí ankan amemí. Amíkan minó ano mai nen mino.

²⁴“Narákan béi vetí ankan tiamemí, “Ma senti nare ano siretin ákona uranti kokhon nanin banta ano Tiyarafenu vá ará manafiní ureya vano van téi vanaé uno. ²⁵Téi fura siré tiretin tiamé uno. Téi ída enádá bá uvaini aran anu nanté umpo maí damusí ma intí Tiyarafenui yafisimpin auyen uvaini anun nanté uno.

²⁶Máa sirákan betí ankan mana monó í daren Orifí Anufá oren mino.

Yisasi Ma Pita Nan Téin Oyan Timin Nono Sein Baya Ino

(Matiu 26:31-35; Ruku 22:31-34; Yoni 13:36-38)

²⁷Mairá Yisasi vetí ankan tiamemí, “Monó bompon mano máa sikhen mino, “Téi sipisipirá dafisin banta aruréken minó sipisipi karan orera inten mino.” *Sek 13:7*

Máa sikhein tiretí mumunan minó asuse en namu inten mino. ²⁸“Téi ma evarané e mantaré ten naren tiretin an uanté Karirifá oronté uno.”

²⁹Máa síkan Pita véin tiamemí, “Minó kayoi mumunan asuse en namu inten mifo senti mumunan ída asuse en namu inten mino.”

³⁰Máa síkan Yisasi véin tiamemí, “Téi fura siré éin tiamé uno. Taréa inuran kokore ída kankanan dádá asikhan tiya éi séin nan kanú manaú dádá ída afová ukhé uno sin nono.”

³¹“Máa síkan Pita enádá ákonaen temí, “Ída ino. Téi éin má manafin puronté uno. Téi éin nan ída afová ukhé uno ída senté uno. Ída uron mino!” Máa

^u14:18 Íbo 41:9

^v14:24 Eks 24:8; Yer 31:31-34; Sek 9:11; 1Ko 10:16; Ibu 9:20

^w14:28 Mat 28:16; Mak 16:7 ^x14:31 Yon 11:16

síkan minó eyo iyampon kayo ano veyan máa sirú en oreraen mino.

**Yisasi Ma Ketsemani
Amúkein Baya Ino**

(*Matiu 26:36-46; Ruku 22:39-46*)

³²YMairá betí ankan oren mana yunan anafin o unen mino. Mai vara aví Ketsemani ino. Mairá oriven Yisasi vei eyo iyampon kayo siamemí, “Téi simúkono van mumpo siretí ankan marasá kumante vá bano.” ³³Máa siren Pita, Yemisi, Yoni siren aviran oriyáken aváduan onákan ará uman dan au ira khen mino. ³⁴zMáan tiyainpin béi vetí ankan tiamemí, “Téin tirá ano kákantá uman dein téi inka furonté uno. Tiretí ankan mará bákeya vá daffian ákona ono.”

³⁵Máa siren béi manáa e afánen oriven barará o vaven amúken mino. Béini anunu ano mai vei furin ma eriyain kanaisá ená béin akhakhanten nafino siren inen mino. ³⁶aIniren béi semí, “O tifóe oe. Éi kana minó danasí in nompó séin pintena ma kápi yovarano van mi iyá umpo mai éi ída vá tenti sinunu ánain dakhafono. Éi ei anunu vá dakhafono.”

³⁷Máa siren béi oren o onákan bei eyo iyampon kayo auun bakharé íkan béi Pitant tiamemí, “Saimoni éi auunábakhe fono. Éi ída ena mana áau vá dafisinte fono. ³⁸Tiretí ankan daffikeya amúkono. Tiretí ankan ma akhenókain daná erinten mino. Para vara seyo, aú ano anunu ukhan mifo yan bukhafa ano avesara iyan mino.”

³⁹Máa siren béi evaránen mo enádá mai ma esé amúkein amúkirí anaen mino. ⁴⁰Amúkuren béi ovaránen bei eyo iyampon kayo e onákan betí ankan au ano kákantá uman dákanaunká bakharen mino. Béin ma evaránen

tiamin nain baya vetí ankan ída afová ukharen mino.

⁴¹Yisasi ovaránen kanú manaú dádasí en eriven betí ankan tiamemí, “Tiretí ankan pará auun bakhe vákeyá avíkiyá ba fono. Mai kana ifo senti áauí inka en mino. Onano Banta Anin inka ume vanta kayo ayampin amen mino. ⁴²Tiretí ankan mantavesí oró tifano. Téin ma vetí ankan ayampin ma amin nain banta inka eren mifo onano.”

**Yisasini Namuro Kayo Ano
Ma Véin Pákein Baya Ino**

(*Matiu 26:47-56; Ruku 22:47-53; Yoni 18:3-12*)

⁴³Yisasi mai vava fara siyákan tiyan míkan mifo sirantan kan orun kádan pintena (12) mana Yudasi eren mino. Kokhon banta kayo ano vaenati variyan dan bariyan uaren béin má eren mino. Monó ánon banta kayo vá man baya ma afová ukhein banta kayo vá ánon banta kayo vá ano vetí ankan tiantan eren mino.

⁴⁴Mai Yisinin ma vetí ankan ayampin ma amin nain banta ano mana aní inain baya vetí ankan tiamikharen mino, “Téi ma mo amónanuna vanta^{††} mai Yisasi ifo vá pákareya vá ákona e yaffbeya avire orono.” ⁴⁵Máa sikharen Yudasi e unen eriaeren ainen Yisasi vaintá oriven temí, “Aru soe!” siyáken béin amónen mino. ⁴⁶Máan tiyain má betí ankan ayan dan orin Yisinin páken mino. ⁴⁷Pákiyain má mai ma véin má ma mantakhá ein kéká pinté mana vanta ano vaenati orun danúaren mana monó ánon bantai yoran banta átaren ankáboren kaven mino.

⁴⁸Kavíkan Yisasi vetí ankan tiamemí, “Tiretí ankan téin pákano vará baenati vá dan má mamareyá mana umoyan banta ma fákano van einí e fono.”

^{††}14:44 Amónan avúavá ma vain mai arona ma kamaen avábá in mino.

⁴⁹ ^bEna ena yamú ma séi siretí ankan má monó namun kumanté afova amiyákeya siretí ída séin páke ompo vompon pinta tena vaya ano vá pura sen afoká ino.”

⁵⁰ ^cMáan tiyain ma minó beni eyo iyampón kayo véin me ampiren karan oreraen mino.

⁵¹ Karan orera iyain má mana fumará ano efanten davaráe minó aurá ukhuren Yisasin avákuren oriyá íkan betí ankan béin páken mino. ⁵² Pákaá-daran béi efanten davaráe me yavaman kaúden au urontá karan oren mino.

Yisasi Ma Kanisori Kéká Avorá Ma O Mantein Baya Ino

(*Matiu 26:57-68; Ruku 22:54-55, 63-71; Yoni 18:13-14, 19-24*)

⁵³ Mairá betí ankan Yisasin aviren monó ánonbanta kékái ánon banta vaintá oríkan minó monó ánon banta kayo váánon banta kayo vá man baya ma afová ukhein banta kayo vá e átaru en mino. ⁵⁴ Pita ano Yisasin bákuren oriyan mifo véi nentá o útúbiyan onen oren mino. Béi mai monó ánon bantai ánon bantai yafufin ódiven piripo kayo vá báken ira kaniyan baren mino.

⁵⁵ Bákan minó monó ánon banta kayo vá minó Kanisori kayo vá ano manáa vanta kayo arákan eriven Yisasi ma varyiá ein avúavá ana me sirú en mino. Betí ankan béini aau ma vantí mairá béin aruan purono siren dosíkan beni aau ída mana varen mino. ⁵⁶ Kokhon banta ano kampun baya fóké béin augin kuráden ten mifo mai vaya kayo ano ída manaíen mino.

⁵⁷ Ída manaí eimpin manáa vanta ano e mantaaren kampun baya fóké Yisasin augin kuráden temí, ⁵⁸ ^d“Tetí ankan in-

ékun béi máa sen mino, ‘Banta ano ma ayampó uvantein monó namun téi varákurékanú manaú damú ananmai monó namun uvaranté umpo mai namun banta ano ayampóké ída uvaranten mino.” ⁵⁹ Máa sen mifo mai kayo ma sein baya vá ano mo asusein ída kanaíen mino.

⁶⁰ Mairá monó ánonbantai ánon banta ano aúban mantaven Yisasin inaemí, “Éi ída mana vaya ovaráne sintó iya fono. Betí ankan ma éin augin kurariyain baya mai intesá ukhen nafino.” ⁶¹ Máa síkan Yisasi ve avaya fákaren kofakhen ída mana vaya evaránen ten mino.

Evaránen monó ánon banta kékái ánon banta ano véin inaemí, “Éi avábá in Tiyarafenu Anin Karaisi fono.”

⁶² Máa síkan Yisasi semí, “Mai séi umpo siretí ankan onesin maen Banta Anin mano minó ákona vain Tiyarafenui ayan kuompá kumamen béi inaru fáke konantá erinten mino.”

⁶³ Máa síkan monó ánonbanta kékái ánon banta ano aran kiyaimpin bei au anamun bararó uren temí, “Tetí ankan ída vá manáa vanta kayo vá arékun beni vaya me sino van ó tifano. ⁶⁴ ^eTiretí ankan inka inen nan béi Tiyarafenu oyampá baya sen mifo siretí inté esá teya iniya rafono.”

Máa síkan minó ano vaya manafin máa sen Yisasin nan temí, “Béimpin aau van mifo véi vá purino.” ⁶⁵ Mairá manáa vanta ano araíen béin aufen akhare siyákan betí ankan béin aunáká davaráe yamuan iyádenankamiyan temí, “Éi sakhanampa vanta omposaréa aví teno iye ano éin ankamiyan nafino.” Máan tiyákan piripo kayo ano véin avíden ankamen mino.

^b14:49 Ruk 19:47; 21:37; Yon 18:20 ^c14:50 Íbo 31:11

^d14:58 Yon 2:19-21 ^e14:64 Riv 24:16; Yon 19:7

**Pita Ma Yisasin Nan Ída Afová
Ukhé Uno Sein Baya Ino**

(*Matiu 26:69-75; Ruku 22:56-62;
Yoni 18:15-18, 25-27*)

⁶⁶Máan tiyákan bararasí ukheintá da-
fufin Pita varé in monóanon banta kékái
ánon bantai yoran arinta ano eren mino.

⁶⁷Eriven mai arinta ano onan Pita ira
kaniyaré íkan mai yoran arinta ano
véin purefure en ódaren temí, “Éi mai
Nasaretíke Yisasin má bare ono.”

⁶⁸Máa síkan Pita ída ino sen mino.
“Téi véin ída afová ukherúna vayan éi
siya ono.” Máa siren béi e manten barufá
ona akhempá aravin mana kokore asen
mino.

⁶⁹Máan turan mai yoran arinta ano
véin ódaren mairá ádé ma mantakhá
ein banta kayo siamemí, “Ma vanta ma
vain mai véi mai kayoi kéká ino.” ⁷⁰Máa
síkan béi evaránen temí, “Ída ino.”

Máa siren bákan manáa ádé ma man-
takhá ein banta kayo ano ínaimpáké
evaránen Pitan nan temí, “Pura ino éi
mai kayoi vanta Kariri fáké ono.”

⁷¹Máa síkan mairá Pita ákona uron en
máa semí, “Pura ódino séi maisiretin ma
siyaona vanta ída uron mi afová ukhé
uno.”

⁷²Máa siyain ma kokore ainen asian
kani iyain má PitaYisasi ano ma véin
tiamein baya ovaren inemí, “Kokore
ída kankanan dádá asíkantiya éi kanú
manáú dádá téin nan ída afová ukhé uno
sin nono.” Mai vaya iniren Pita ífí den
mino.

**Pairoti Ano Ma Yisasini
Vaya Yaimein Baya Ino**

(*Matiu 27:1-2, 11-14; Ruku
23:1-5; Yoni 18:28-38*)

15^fPe ákura suron monó ánon banta
kéká bá ánon banta kayo vá man

baya ma afová ukhein banta kayo vá
minó kanisoro kayo vá manafin baya
siaren Yisasin ayantá damuren aviren
mo Pairotin amen mino.

²Amíkan Pairoti ano véin inaemí, “Éi
Yutan kayoi kin na fono.”

Síkan Yisasi evaránen béin tiamemí,
“Éi mai inka se ono.”

³Máa síkan monó ánon banta kéká
ano véin aufin kokhon baya fóké kurá-
den ten mino. ⁴Tiyákan Pairoti ano
véin evaránen enadá inaen temí, “Éi ídá
anona evaráne mana vaya sinte fono.
Onano vetí ankan náí máa vaya fókésá
éin aufin kurariyan nafino.”

⁵§Síkan Yisasi ídaevaránen anona
vaya siyaimpin Pairoti ano anú duren
kokhon ineine en mino.

**Pairoti Ano Ma Yutan Kéká
Ayampin Yisasin Amein Baya Ino**

(*Matiu 27:15-26; Ruku
23:13-25; Yoni 18:38-19:16*)

⁶Ena ena orana Avo Uantan damú
ma erin kamani ano mana vanta kar-
avusi fintena útuanté iyan mino. Mai
minó nanin banta ano ma útuantano
ma sein mai vantano útuanté iyan mino.

⁷Máan tiyain bákan mana Barabasin ne
sin banta karavusifin baren mino. Béi
manáa vanta kayo vá kaminin má aruvin
duváden manáa vanta aruan púdan mai
vanbetí ankan má karavusí uran baren
mino. ⁸Mairá banasi ano oriven Pairotin
nan pefá ma iyaonaí ono siren oovaren
mino.

⁹Oovarákan Pairoti ano evaránen
betíi vayan anona siamemí, “Tiretí ankani
anunu ano Yutan kayoi kin na ifá ékun
orino van iya rafono.” ¹⁰Mai véi afova
ukhan monóanon banta kéká ano Yisasin
inian namu unantáden kópin aviren
mo kain baren mino. ¹¹^hBákan mai
monóanon banta kéká ano vanasi arápin

^f15:1 Ruk 22:66 ^g15:5 Ais 53:7; Mak 14:61 ^h15:11 Apo 3:13-14

antaran betí ankan Pairoti vaípa oovaren temí, “Barabasin ifá uantan erino Yisasi ída ino,” sen mino.

¹²Máa síkan Pairoti ano enádá evaránen mai nanin bantará inaemí, “Mai siretí ankan ma Yutan kayoi kin mino ma siyaona mai vanta séi náisá béin onte rafuno.”

¹³Síkan betí ankan evaránen oovararen temí, “Béin daa unkamádantá arono.”

¹⁴Síkan Pairoti ano evaránen enádá betin tiamemí, “Paravae náí ausá béi ukhavae.” Máa síkan minó nanin banta ano moéken avádóden oovararen temí, “Béin daa unkamádantá arono.”

¹⁵Máa síkan Pairoti ano vanasi arápin amusin amen Barabasin ifá uantan betí baípa oríkan béi Yisinin aruvin banta kayo ayampin kaíkan anan dafiyópóké nare ankáden daa unkamádantá béin arino van amin aviren oren mino.

Aruvin Banta Kéká Ano Ma Yisinin Máká Máká Ein Baya Ino

(*Matiu 27:27-31; Yoni 19:2-3*)

¹⁶Mairá aruvin banta kayo ano Yisasi aviren kamanini yafufin má naun ódiyáken minó aruvin banta kayo arakan oren mino. ¹⁷Oriven betí ankan kini narare au anamun Yisasi untáden ayankun anan póké mana kini kamamo uváden béin ánontá afú uanten mino. ¹⁸Máan tuantáden betí ankan e mantaven taró uanten máká maáká iyan temí, “Yutan kayoi ákona kin noe, en aví daní iyá tiféuno!” ¹⁹Máa siren betí ankan mana ura yafiyópóké béin ánon ankáden aufen akhare siren aron durafúden matimen

béin kampun amusin uanten mino. ²⁰Máan turen aruvin banta kayo ano véin ayanavan baya siren intiren mai kini narare au anamun do yaváden beni au anamun evaránen uantáden béin daa unkamádantá arono van aviren oren mino.

Daa Unkamádantá Ma Yisinin Arein Baya Ino

(*Matiu 27:32-44; Ruku 23:26-43; Yoni 19:17-27*)

²¹Oríkan Yisasi ída ákona íkan mana Sairini varu fáke vanta Saimoni Arekisanda nú Dufasin nú afóe ano kákan barufá Yerusaremi orono van aasá erikan aruvin banta kayo ano ákonaen duvun íkan béi Yisinin yaa unkamádan ayaen baren oren mino. ²²Mairá betí ankan Yisinin aviren mana Korikhota e sin anurá mo khaen mino. Mai Korikhota e ma siyain beni ana máan mi sikhen mino. “Ánon Dampa Anuen” tikhen mino. ²³Mairá avían mo Yisinin kauren betí ankan uvaini vá aí ma kusiantan non má^{††} opé uren amíkanmaen béi ifá en mino. ²⁴Ífá íkan betí ankan béin daa unkamádantá antópóké aruren beni auí daná daváden betiyan maman kaúden mai auí danáká kati siren ayá nampa ma fákein mano mana yaná mádu en mino.

²⁵Dan manápá ifo afápá kamí kamí un kádan áaurá Yisinin daa unkamádantá aren mino. ²⁶Mai véin ánontá ben ma kó tiantein baya máa siren uvaremí, “Yutan Kayoi Kin Mino.” ²⁷⁻²⁸Máan turen betí ankan umoyan banta kanan má daa unkamádantá aren mino. Mana véin ayan kurompá aren mana ayan ópá aren

††15:23 Ái ma kusiantan non nan mi *Mer* ne siyan mino.

ⁱ15:21 Rom 16:13 ^j15:24 Íbo 22:18

en mino.[¶] ²⁹^kBanasi ano onóbe enóbe iyáken béin ayanavan baya sen máa semí, “Odo! Éi monó namun barákureya kanú manaú damú ana uvaran banta ono. ³⁰Máan tin banta ompo éi eyan ayaeaya yaa unkamádantáké erano.”

³¹Máa siyákan monó ánon banta kéká bá man baya ma afová ukhein banta kayo vá ano yere oyampá baya sen betiyan máa semí, “Béi ena nanin banta ana ayaiyan mifo veyan ída kanaíen béi ayainten mino. ³²Mai Karaisi Isareri kayoi kin mano véi kanaíen daa unkamádan me ampiren erantí teti ankan ódé béintá mumunan otifanté uno.” Máa siyákan mai ma yaa unkamádantá béin má manará ma arukhein bantá kanan má ano yere ven nan oyampá baya sen mino.

Yisasi Ma Furein Baya Ino

(*Matiu 27:45-46; Ruku 23:44-49; Yoni 19:28-30*)

³³Bayan áau siya yavanin dun maren titipá ukhan áau inúpá kanú manausí emí. ³⁴¹Áau sitipá ukhen kanú manausí íkan Yisasi avádóden oovaren máa semí, “Eri, Eri rama sabáktani” Mai máan mi sikhemí, “Tenti Tiyarafenu oe! Tenti Tiyarafenu oe! Éi fará téin me oyan time fonó.”

³⁵Máa síkan manáa vanta kayo mairá ádé mantakharen betí ankan mai iniren temí, “Ineno! Béi feyan sakhanampa vanta Iraiyan mi ariyan mino.”

³⁶^mSiyáken mana vanta ano savaen mómofen ma einí ukhein daná máden uvaini vá íta non má ma úpí urampin daren ura yankará damuren Yisasi nano van amiren mai vanta ano semí, “Ave

ukhesí oná tifano Iraiya ano véin e aví ádantin ná eranten nafino áa ída fino.”

³⁷Máa siyain má Yisasi avádóden bádiyan puren mino.

³⁸Puriyain má kákan monó namumpin makákan davaráe kuran ma varé ein mai veyantá danté kafasen barará morúdan maman kankananién mino. ³⁹Aruvin bantai ánon ayafa ano mairá Yisasini ádé mantakharen béini furin ódaren béi semí, “Pura uron ma vanta Tiyarafenu Anin mino.”

⁴⁰ⁿMáa siyákan manáa nanin kayo nentá mantakhen oniyan baren mino. Mai vetin pintena mana Makdaráke Mariaí inká ena mai Yemisin nú Yosepin nú anóe Maria má ena Saromii. ⁴¹Mai fefá ma Yisinin ma Karirifá ma vákan maen mai nanin kayo ano avákuren nóken béin aya iyaren mino. Mai véin má ma Yerusaremí orein nanin kayo yere mairábaren mino.

Yisinin Ma On Aimpin Masí Ein Baya Ino

(*Matiu 27:57-61; Ruku 23:50-55; Yoni 19:38-42*)

⁴²Inuran Sabati yamú bantéin mai útain damú inúpasén mino. ⁴³Inúpasí íkan Arimatiaké Yosepi ano eren mino. Béi mai mana kama aví bain kanisoro ifo véin má deren Tiyarafenui Yafisin ave ukharen mino. Mairá Yosepi orein ída feranto Pairotin avorá o mantaven Yisinin au varen mo masí ino van béintá inaen mino. ⁴⁴Ina íkan Pairoti ano kokhon ineine uren temí, “Béi inká púken nafino.” Máa siren aruvin bantai ánon ayafa aran erfkan béintá in-

[¶]**15:27-28** Pefá ves 28 ída varéin ínaimpáké mana vanta ano kaemí, *Máan tíkan mai mana monó baya ma vompopin ma vá ein pura sen afoká en mino. Mai vaya máan mi sikhámí, “Béin aau vanta kayo vá manafin e yankaáadanten mino.” (Ais 53:12 fin ná onano).*

^k**15:29** Íbo 22:7; 109:25; Mak 14:58 ¹**15:34** Íbo 22:1 ^m**15:36** Íbo 69:21
ⁿ**15:40** Ruk 8:2-3

aemí, “Yisasi inká púken nafino áa ída fino.”⁴⁵ Mairá béi máa siren aruvin bantai ánon ayafai vaya iniren Yosepin nan kana ifo véin au varano sen mino.

⁴⁶Máa síkan Yosepi efanten davaráe o miyaní uren béin un maman barará aséden mai efanten davaráefin ukhuren béin mo on aimpin kaúden ain oyirá kákan onámanáo vaé baé uan atæen mino. ⁴⁷Kaiyákan Makdaráke Maria nú Yosesin anóe Maria nú intefasá béin kaiyan nafi siren o váken onen mino.

**Yisasi Ma Evaránen
E Mantein Baya Ino**

*(Matíu 28:1-10; Ruku
24:1-12; Yoni 20:1-10)*

16 Sabati yamú kípavíkan Makdaráke Maria má Yemisin anóe Maria má Saromin má kama aunka iyain uveri kayo vetí ankan Yisasin aufá mo féantano van miyaníen mino. ²Esé arái in damú pe ákura suron asaréa áau e unin betí ankan masíká oren mino. ³Oriyáken betiyan ten orera emí, “Iye anó masí oyi rákena onámaná do setin eka sintanten nafino.”

⁴Máa siren onákan mai onámaná ída masí oyirá baren mino. Mai kákan onámaná ifo mana vanta ano fefá do avékakharen mino. ⁵Mai masí aimpin betí ankan ódiven onákan mana fumara ano ayan kuompáayá efanten au anamunuren kumantaré íkan betí ankan ódaren akhokho van en mino.

⁶Akhokho van íkan béi vetí ankan tiamemí, “Tiretí ankan ída vá akhokho van ono. Nasaretíke Yisasin onano van ere ompo véin ma yaa unkamádantá ma antópor arukhá ein mai inka véi fe

e mantakhen mifo onano véin ma kain báeimpin ída van mino. ⁷Tiretí ankan ore vá beni eyo iyampon kayo vá Pita má mo siameno, ‘Béi ma fefá tiretin tiamikhá einíen tiretin an uanten Karir-ífa orikhen mifo mai fákena vá tiretí ankan béin o onano.’”

⁸Máa síkan mai nanin kayo masí ain pinté e khuyen eravuaren anú duman duman en karan oriyáken péden ída mana vanta vá baya sen mino.^{§§}

**Yisasi Ma Mákdaráke Nanin Marian
Avorá Dákó Ein Baya Ino**

(Matíu 28:9-10; Yoni 20:11-18)

⁹Esé arái in damú pe ákura suron Yisasi e mantáaren Makdaráke Marian avorá naren o afoká en mino. Yisasi mai nanin au fintena yan manápá ifo afápá kan un kádan namu aunan kayo yo siantein mino. ¹⁰Maria orein minó Yisasi má ma nóein banta kayo mo siamemí. Mai minó banta kayo ano ará umandan ífí diyan baren mino. ¹¹Baré íkan Maria vetí ankan tiamemí, “Yisasi ída furin para vá téi oné uno.” Síkan betí ankan mai vaya iniren ída mumunan en mino.

**Eyo Iyampon Kan Mano Ma Yisasin
Ayana Fáke Onein Baya Ino**

(Ruku 24:13-35)

¹²Ínaimpáké bei eyo iyampon kanan mano mana aayana oriyaréin Yisasi enará uven békanaan baintá o afoká en mino. ¹³O afoká íkan ódaren békanaan manáa eyo iyampon kayo mo siamíkan betí ankan ída vékanani vaya vá mumunan en mino.

§§16:8 Pefa esé Makini vompoppin ves 9-20 ída varéin ínaimpáke ena vanta ano mai vaya (ves 9-20) uvaman asotú en mino.

°16:7 Mat 26:32; Mak 14:28

**Yisasi Ma Vei Eyo Iyampon Kayo
Avorá Ma Afoká Ein Baya Ino**

(*Matiu 28:16-20; Ruku
24:36-49; Yoni 20:19-23*)

¹⁴^pÍnainpáké tiyan mikan mifo sirantan mana orun kádan (11) eyo iyampon máa ano kumanten duna niyaréin Yisasi vetí ankan baintá afoká uven betí ankampin mamumunan ída vákan ma véi ma e mantein ma onein nanin banta ano ma siamin ma vetí ankan ará uman daren ída mumunan iyain nan béi vetin asen mino.

¹⁵^qMáa siren béi vetí ankan tiamemí, “Tiretí ankan ore vá barará minó akhempasá kama vaya mo vanasi siameno. ¹⁶^rBanta ano ma mumunan uven ma non baran nain mai Tiyarafenu ano evaránen avirantín ben ninaí inten mino. Máan tinten mifo vanta ano ma ída mumunan inain mai ano kópin afeyoranten mino. ¹⁷^sTiyarafenu ano mumunan ma

inain banta kayo ayantá máan avúavá daná afoká inten mino. Téin tivíká betí ankan namu aunan do siantiyáken auyen baya sinten mino. ¹⁸^tBetí ankan ayampó osafáe fákarantín ída untaranten mino. Betí ankan beyantá uvá naren ída furinten mino. Betí ankan banta aurá ma ayan kaintín mai aí bantan ano e asefa inten mino.”

Yisasi Má Inarufá Ódein Baya Ino

(*Ruku 24:50-53; Aposeri 1:9-11*)

¹⁹^uBafan Yisasi ano vetí ankan baya siamirákan Tiyarafenu ano aviran inarufá óden Tiyarafenui ayan kurompá un kumanten mino. ²⁰^vMinó eyo iyampon kayo ano minó akhempá oreraen beni kama vaya mo siamen mino. Bafan mano vetí ankan má manafin doriyáken betíi vayafin ákona amíkan manáa avúavasí ma íkan mai afoká iyaren mino.

^p16:14 1Ko 15:5 ^q16:15 Apo 1:8 ^r16:16 Apo 2:38 ^s16:17 Apo 2:4; 8:7
^t16:18 Ruk 10:19; Apo 28:3-6 ^u16:19 Apo 1:9-11; 2:33-34
^v16:20 Apo 14:3; Ibu 2:3-4

RUKUNI KAMA VAYA INO

(Ruku)

Rukuni Kama Vaya Ma Uvanteí Pákenai Afova Vaya Ino

Ma vompon ma uvantein banta ino.

Ena anan pinte vanta Ruku ayofan banta vákan ma minó ano anunu iyan ma inká Porini kama arona váken ma ven má manápá non ma monó dorarí iyá ein manon ma vompon uvanten mino.

Uvarein orana ino.

AD sikisti-tu (62) fin ma Kama Vaya Varen Orin Banta (Aposeri) Kayoi Yoran Bompon ída uvanten mino. Manáa afova vanta kéká ano siyáken AD fifti-eiti (58) ráké sikisti (60) fin ma Sisareá barurá ma Porin karavusií ukhá ein damúí ma vompon uvantan mino. Máan tukhan mi Yisas Karaisini Kama Vaya vá Baya ma Varen Orin Banta (Aposeri) Kayoi Yoran Avúavá bá bompon ma uvaran danasinta vá maí damú anan ovare evare uan átaru ukhen mino.

Ma vompon ma uvantein baru ino.

Kiriki varafin ma vain baru Ákaia safi áa Sisarea safin uvanten nen ten inikhen mino.

Ma vompon ma uvaman amikhein kéká ino.

Ída afová ukhé tiferuna vanta Tiofi-rasin mifo kákan ineine maen Kiriki

varafin ma vain kéká bá inká ena anan kéká ma monó tiyain kayofin má ino.

Nái ana vará ma vompon uvanten nafino.

Yisasini yoran ma oniyáken afová ukhá ein kéká anon mai yoran nan tian amá ukhen mino.

Rukuni Esé Baya Ino

1 ^wKákan banta Tiofirasi oe. Pefá kokhon banta kayo ano Yisasi ma setin aúbaná afoká uádakaré ein daná baya van uvaman one one iyaren mino. ²Mai yaná avúavá ma afokáin ma on-taré ein banta kayo mai Tiyarafenui yoran banta kayon bákan esé anará ma afokáin ma onein daná bayan uvaman tetin timen mino. ³Máan tukhein nan mi séi yere ayá damú ina uré mai vaya ana kamaé afová uréi ma funtákein bompon uvaman amé uno. ⁴Pefá ma siamikharé ein baya mai fura vaya ino seya yankáde afová ono van mi ma vompon uvaman amé uno.

Yoni Monó Non Péantan Banta Ma Kain Nain Baya Ino

⁵Eroti ma Yudia kayoi kini ukhá ein damú Abiya ma monó ánon bantaí ukhan maen mana monó doran banta Sekaraiyan ne sin banta vákan ben aná Erisabeti Eronini kéká pinte-nan baren mino. ⁶Békanan Tiyarafenu avorá puntáken minó man baya ánain dakhafiyáken Bafan oo yaiyen puntáden Tiyarafenu avorá baren mino. ⁷Békanan ayokhuvini ukharen mifo Erisabeti a naniní ukhan míkanan ída iyampon kaúkaren mino.

⁸Maná damú Sekaraiyani monó ánon banta kéká ano monó namumpin mo yorarí iyákan Sekaraiya má maifin Ti-

yarafenu avorá doriyaren mino. ⁹Maí damú monó doran banta kayo ano yanka iya iya uren asíka vá ayá danka kayo vá ma yanufin nain banta anon mun monó namumpin Tiyarafenu íkun uan aminten mino sirákan* Sekaraiya ano ayá danka yanú dan béin tiantan monó namumpin óden mino. ¹⁰Íkun uantan áaú iyákan kokhon nanin banta ano monó barurá átaru ukhen amúkiyan mino.

¹¹Amúkiyákan Sekaraiya vaintá mana Bafani enisori ano mai ma kama aunka íkun uantan takhó ádé afoká uven ayan kurompá mantakhan mino. ¹²Mantakharéin Sekaraiya mai enisori ma onen anú diyan akhokho van en mino. ¹³Akhokho van íkan mai enisori ano Sekaraiyan máa sen tiamemí, “Ída vá akhokho van ono. Tiyarafenu ano eni amúkin inka inen mino. En aná Erisabeti afon iyampon kainten mifo ven avisá Yoni ne se vá aví dano.” ¹⁴Mai iyampon ma afoká inain damú éin ará ano kama intiya amusin esin maen kokhon nanin banta ano yere moéken amusin intin maen ¹⁵ybéi Bafan auufen kákan bí baranten mino. Be anóen amúpin ma vantin Kantá Áunan mano ven aúpin bíkanten mifo véi ída vá uvaini vá óen non má nano. ¹⁶Béi anon kokhon Isareri nanin banta ará maman baéden evará-nen betí ankani Bafan Tiyarafenu vaípa aviren orinten mino. ¹⁷zBéi Iraiyaní ákona vá avúavá bá mamaren Bafan an uanten oriven maen mo ve akhafana vá be afóeyan má ará maman manafiní uantanten mino. Máan tuantáden maen man baya ma átakharéin kékái ineine maman puntáden kama ineine ma vain kayo an daantanten mino. Béi vanasi maman arakhoku urantin Bafani erin nan ave inten mino.”

¹⁸Síkan Sekaraiya evaránen máa sen enisori siamemí, “Téi intesá uré mainá afoká inten mino siré éini vaya afová onte rafuno. Te síbasu afova nanin bantan bá uno.”

¹⁹aMáa síkan mairá enisori ano máa sen tiamemí, “Téi Kebrieri uno. Téi Tiyarafenu auufen manté iyarunan bákan mi Tiyarafenu anon tisintá ma kama vaya éin tiameno van eré uno. ²⁰Ineno. Tenti vaya ma éi ída mumunan eonafá éin oo uman dantiya éi ída vaya sin basin mi mai yaná afoká inten mino. Beni yamusí ma intin mi senti vaya ano yákó inten mino.”

²¹Minó nanin banta ano Sekaraiya monó namumpin ayáká bákan ave ukhen bavakon kokhon ineine en mino. ²²Ínainpáké monó namun pinté Sekaraiya ekhuven barufá eraven béi ída vaya semí. Máan tíkan betí ankan afová en ten mino. “Mai monó namumpin ben avorá ena yaná afoká ukhan ayampó ana avavé navé iyáken oo uman dan ída vaya siyan mino.”

²³Ínainpáké Sekaraiyani yoran kípan be amá barufá oren mino. ²⁴Orikharé íkan ínainpáké be aná Erisabeti amú basí en mino. Amú basí uven dan manápá biyontá umeraren baren Erisabeti sian páman en mino, ²⁵“Bafan mano séin avábá usinten mino. Mai avábá ano vanasi avorá ten tiyave yo arútinten mino.”

Yisasin Ma Kain Baya Ino

²⁶Erisabetin dan manápá ifo afápá mana un kádan biyon esantavin Tiyarafenu ano enisori Kebrierin tiantan Kariri varafá Nasaretí barufá oren mino. ²⁷bOren mana Kin Devitini anan pintena vanta Yosepin ne sin banta amikharé ein

*1:9 Danka yanufin avúavá mai kati ma siyainíi ukharen mino.

x1:9 Eks 30:7 y1:15 Nam 6:2-3 z1:17 Mar 3:1; 4:5-6; Mat 17:11-13

a1:19 Dan 8:16; 9:21 b1:27 Mat 1:16, 18

arinta Marian ne sin ída mana vanta vá bakharé ein arinta vaípá enisori ano oren mino. ²⁸Mairá Kebrieri véi vaintá onó ben máa semí, “Anasi oe, bayan mino. Bafan mano éin má ban mino. Tiyarafenu ano éin moékentá avu uren éin kama uanten mino.”

²⁹Síkan Maria mai vaya iniren anú duren mai náí vayá ten nafino siren kokhon ineine en mino. ³⁰Máan tíkan mairá enisori ano máa sen Marian tiamemí, “Maria oe, ída vá éi akhokho van ono. Tiyarafenui anunu ano éi má ban mino. ³¹¶Ineno. Éi amúbasí ukhareya mana afon iyampon kain nono. Kaúde vá mai iyampon avisá Yisasi ne vá teno. ³²¶Béi ayafa vanta vantin béi nan Moéken Dan Bain Tiyarafenu Anin mino siyantín Bafan Tiyarafenu ano véin maman be anafu Devitin an den kiní uantanten mino. ³³Kiní uantádantín béi Isareri kékái kin bantín maen beni yafisin doran mano fara van oriyán ban ída kípatén mino.”

³⁴Máa síkan Maria evaránen enisori inaemí, “Intesá uren ná mai ná afoká intéi vae séi ída vanta manté uno.”

³⁵Máa síkan enisori ano evaránen béin tiamemí, “Kantá Aunan mano éimpín erivintín Moéken Dan Bain Tiyarafenui ákona ano éi má banten mino. Máan tukhantín mai iyampon ma ínaimpá kainona ano kantasí ukhein bantan bantín ben nan Tiyarafenu Anin ne sintén mino. ³⁶Afová ukha ono ei kéká pinta na nin Erisabetin nan ma a nanin báken iyampon ída kaintén mino siyan mifo mai saréa véi afovaí uveín pimpá amú basí ukharéin dan manápá ifo afápá mana un kádan biyon orikhein afon iyampon mi kaintén mino. ³⁷¶Para vara seyo, minó danápin Tiyarafenu ano kanaí inten mino.”

³⁸Máa síkan Maria evaránen temí, “Téi fura sé Bafani yoran nanin muno. Éi ma sisimeona mai veni anunu ifo vá maina sá dákó ino,” síkan enisori ano Marian me ampíren oren mino.

Maria Ano Ma Erisabetin Onano Van Beni Varufá Orein Baya Ino

³⁹Manáa yamú orivín Maria e mantén Yudiá barafá anu yompin bain barufín oriven ⁴⁰Sekaraiyan amápin ódivén Erisabetin nan mo vayan ne sen mino. ⁴¹Erisabetin nan ma vayan mino ma sein baya ma Erisabeti iniyain má ana ven amúpin ma vain iyampon mano káusen ódivén eraven iyain má Kantá Aunan mano véin aúpin bíken mino. ⁴²Máan tíkan béi avádóden oovaren temí, “Tiyarafenu ano éin kama uanten mi ena nanin kayo ano ma variyain mai avu moéken esantakhein avun éin amen mino. Máan tukhein mi en amúpin ma vain mai iyampon má ano yere Tiyarafenui avu varen mino. ⁴³Téi iyé bákun ná tenti Bafan anóe ano se varunafá eriyán nafino. ⁴⁴¶Para vara seyo, éi ma sen nan bayan mino sená ma iniyaruna vá anan ten timúpin ma vain iyampon mano amusin iyáken káusen ódivén eraven en mino. ⁴⁵¶Mai ná Bafan mano afoká inten mino siyáke mumunan e ompo mai vará éi amusin nono.”

Mariani Í Ino

⁴⁶¶Máa síkan Maria máa sen ídemí, “Ten tirá ano Bafan aví daní iyan ⁴⁷ten taunan mano moéken Ten Tiyain Tiyarafenu van amusin iyákái ⁴⁸séi veni yoran nanin mi váké paen danái vaken mifo véi sen nan iniren mi séin kamaen tarisari ein mi

^c1:31 Ais 7:14; Mat 1:21-23 ^d1:32 2Sa 7:12, 13, 16; Ais 9:7

^e1:37 Esé 18:14 ^f1:46 1Sa 2:1-10

saréa fi ínainpáke safi vanasi ano sen nan Tiyarafenu ano kákan amusin amikhein nanin mino sinten mino.

⁴⁹Tiyarafenu Minó Ákona Vain mano kákan danasintan ten turá afoká uren ten tiyaen mifo

béin avisá kantasí ino.

⁵⁰^gBeni aránaópá ma orein nanin banta ma avábá uanté iyain mano

sare ma vain nanin banta vá ínainpáke ma afoká inain nanin bantafin má dere máan mana en oriyan bantin

⁵¹^hbéin ayan mano kákan dorarí ukhantín

beyan nan ma kákan muno siren be aví ma yaní iyá inain mai nanin banta yo siantantín orera iyantín

⁵²ⁱákona kin kéká maman bara finí uren aví ma ída vain banta kayo maman daníen mino.

⁵³^jNanante vanante ma iyá ein kayo véi kokhon kama yaná póké kanaí uanten

kama yaná ma kokhon kain baré ein kéká do siantan para oríkan

⁵⁴⁻⁵⁵^kAbaramun má be ana akhá bá ma avábá onté uno síkhá ein baya van béi ovaren me iniyáken

bei Isareri nanin banta ayaen mino.”

⁵⁶Máa sen ídaren béi Erisabetin má kanú manaú biyontá baren me afaen bei varufá oren mino.

Yoni Monó Non Péantan Banta Ma Kain Baya Ino

⁵⁷Erisabetini iyampon kain damú afoká íkan béi afon iyampon kaen mino.

⁵⁸Kaúdákan mana varu ráke nanin banta vá bei kékábá ano Tiyarafenu ma Erisabetin avábá uantein nan iniyáken béin má minó ano amusin en mino.

⁵⁹^lAmusin urákan dan manápá ifo afápá kanú manaú un kádan damú orivíkan mai iyampon au khaviyan be afóen avavaníden Sekaraiya ne seno van aviran eríkan ⁶⁰be anóe ano, “Ída ino. Ben aví Yoni ne vá teno,” semí.

⁶¹Máa síkan minó ano véin tiamemí, “Ída Yonin bí tetimpin bain mino.”

⁶²Máa siren betí ankan ayampó ana avavé nave iyáken be afóentá mai iyampon avi san inaen mino. ⁶³Inákan béi vetí ankan nan mana vompon ma uvaran dóki vare ereno síkan baren meran mairá bompon máa sen uvaremí, “Ma iyampon aví Yoni ino,” sirákan betí ankan anú duren kokhon ineine en mino.

⁶⁴Máan tiyain má Sekaraiya oo saferen baya siyan Tiyarafenu aví daníen mino.

⁶⁵Máan tiyain má beni varu ráke kayo ano mai yaná ma afoká ein ódaren akhokho van uren e siádan Yudiá barafin anufá ma vain barufimpá oreraen mino.

⁶⁶Bafani ákona ano véin má bakan minó nanin banta ano mai vaya iníden anúden orera iyan temí, “Mai iyampon ínainpá interená inten nafino.”

Sekaraiyani Í Ino

⁶⁷Mai iyampon afóe Sekaraiyan aúpin Kantá Aunan mano vikavíkan sakkanampa veya máa sen mino:

⁶⁸^m“Bafan avisá daní ó tifano. Béi Isareri nanin bantai Ayarafenu ino.

Béi ma varará eraven barará nanin banta kama uren ume fintena evaránen avíken mino.

⁶⁹ⁿTetin evaránen tivirano van bei yoran banta Devitini kéká pintena béi mana ákona vanta maman dáko uáden mino.

⁸1:50 Íbo 103:13, 17 ^h1:51 2Sa 22:28 ⁱ1:52 Yop 5:11; 12:19; Íbo 147:6

^j1:53 Íbo 34:10 ^k1:54-55 Esé 17:7; Íbo 98:3; Mai 7:20

^l1:59 Esé 17:12; Riv 12:3; Ruk 2:21 ^m1:68 Íbo 72:18 ⁿ1:69 Íbo 18:2

⁷⁰Pefá ma vei kantasí ukhein sakhanampa vanta kayo oorá ma síkhá einí en mino.

⁷¹^oBéi ma siyáken namuro ayan pintena vá tetin ma ará namu usintiyain kéká ayan pintena vá ma evaráné tivirano van ma síkhá ein mi yákó en mino.

⁷²^pTetin tináuyan arunan uren aya ukharen mino. Pefá ma manafin kasukhen ban kantasí ukhein baya ma veyantá tikharé ein mai van béi ovaren me inen mino.

⁷³^qTetin tinafu Abaraamun avorá ma ayan befiyó uren ódino fura sé uno ma véi síkharé ein danái saréa setimpin afoká en mino.

⁷⁴Ma mai ma véi iyáantan baré ein mino. Béi ano namuro ayan pintena setin tivían ádun kaintí báké

ída feran beni yorará ó tifanté uno.

⁷⁵^rEna ena yamú béin avorá teti kantasí é puntáké ana vá bá tifano.

⁷⁶^sMai van mi se sanin noe, ínaimpá éi nan Moéken Dan Bain Tiyarafenui sakhanampa vanta ino siyantiya

éi ano Bafani an uante oreya aa uvisin nono.

⁷⁷^tBei vanasi evaránen aviran nain afova amiresin

betí ankani ume arúantanten mino.

⁷⁸^uPara vara seyo, Tiyarafenu ano vei sarisarifóí máan tinten mino.

Mai maen Yisasi ano kakhán an den Tiyarafenu vaípké teti vaípa eranten mino.

⁷⁹^vMinó nanin banta ma anukheimpin báken

ma umefin purein an dakhein mai on mano kakhaantantin

ará kusin aintá oró tifanté uno.”

⁸⁰Ínaimpá mai iyampon e anoní íkan Kantá Aunan mano véin aúpin bikhavíkan kámá barafá o van damú afoká íkan e unen Isareri nanin bantafin dáko eren mino.

Yisasin Ma Kaein Baya Ino

(Matu 1:18-25)

2 Sisa Okastasi ano ma Romu kamanini ánon bantaí ma ukhein pimpá Romu kamanin mano ma yaffkein barafin ma vain nanin banta minó avisá bompompin uvarano siren ákona vaya siádan oreraen mino. ²Mai yaná afoká ein mai Kuiriniasi ma Sirian barafin kamaniní ukharé ein damúí esé aráien afoká en mino.† ³Máa siyaiimpin kamani ano aví barano van minó nanin banta ano evaránen betí varu anará oreraen mino.

⁴Orera iyákan Devitini kéká pintena vantan Yosepi maen Kariri varafá Nasaretí barurá baren e manten Devitini varu anará Yudiá barafá Betariamú oriyáken ⁵ben ma varano van tiantan ma váein arinta Maria amúbá baré íkan kamani ano aví barano van avíaren oren mino. ⁶Békanan o varéin Maria inamun nan iniyaiimpin ⁷mianí ma uren baran namun bíkakhén ída afokhan baimpin me khoen kao amápin óden mun esékena afon iyampon kauren davaráe yo úkuren kaoi yunan nan dókifin kaen mino.

Sipisipirá Dafisin Banta Kéká Bá Enisori Kayo Vái Vaya Ino

⁸Mai inuran maen mai varu akhempá manáa sipisipirá dafisin banta kéká ano sipisipirá dafíkaré íkan ⁹Bafani enisori ano veti vaintá eriyain má Bafani kakhán mano vetin eúkuádan akhokho van en

†2:2 Yudiá baru maen Siríá barafin mi van mino.

^o1:71 Íbo 106:10 ^p1:72 Esé 17:7; Íbo 105:8-9 ^q1:73 Esé 22:16-17 ^r1:75 Tai 2:12-14 ^s1:76 Ais 40:3 ^t1:77 Yer 31:34 ^u1:78 Ais 60:1-2 ^v1:79 Ais 9:2

mino. ¹⁰ Akhokho van iyain má enisori ano vetí ankan máa sen tiamemí, “Tiretí ankan ída vá akhokho van ono. Téi kama vava varé tiretin tiameno van mi eré umpo mai kama vava ma minó nanin banta ano ma ininten moéken amusin inten mino. ¹¹ Tare inuran manan Devitini varufin mana nanin mano afon iyampon kaein mai iyampon manon tiretin ayainten mino. Béi Bafan mi vákan Ti yarafenu ano ven nan mi minó nanin banta evará- nen avirante ne sikharen mino. ¹² Máan tukhantiya ma yanákái véin o ódeya afováin nono. O onesin maen davaráe yo úkuren kaoi yunan nan dókifin asédantin banten mino.”

¹³ Máan ma siyain má manádá ainen inaru fáké iyankaforen enisori kéká bá ano mai enisori vaintá afoká uven Ti yarafenu aví daníen máa semí,

¹⁴ w“Dan uró bain Ti yarafenu avisá daní ono.

Be ma aní ukhein nanin banta ano vá ará kusin masá barará bano.”

¹⁵ Máan turen mai enisori kéká ano ma inarufá evaránen ódivíkan maen sipisipirá ma yafisin banta kéká ano vetiyan ten oreraemí, “Eritifé ma ma Bafan mano ma setin tisimein baya ánain dakhafé mai yaná ma Betariamú barufin ma afoká ukhein o onátifano,” siren ¹⁶ betí ankan ainen oriven Yosepin nú Maria nú mo yosiádaren onákan mai iyampon kaoi yunan nan dókifin asédan bakharen mino. ¹⁷ Bakharé íkan betí ankan mai iyampon oniyáken enisori ano ma vetin tiamikhá ein baya sian páman íkan ¹⁸ mai vava ma inein kéká ano kokhon ineine iyan maen ¹⁹ xMaria mai vava kayo inian be aúpin kaúden iniyan baren mino. ²⁰ Máan turen sipisipirá dafisin banta kéká ano evaránen oriyáken mai ma enisori ano siamin iniren ma onein

dana san Ti yarafenu aví daní iyáken amusin uanten mino.

Yisasin Ma Au Kharen Bafan Amein Baya Ino

²¹ yDan manápá ifo afápa kanú manaú un kádan damú orivíkan mai iyampon au khaiyáken pefá ma ve anóen arápin ída afoká ukhan ma enisori ano ve anóen tiamikhá einíen Yisasin bí amen mino.

²² zMosesini man baya ano ma sikhá ein damú afoká íkan Yosepin nú Maria nú ano Bafan avorá avusesein doran dóan kípiyan mai iyampon Bafan mo ameno van békanan Yerusaremí barufá aviren oren mino. ²³ Mai ma orein mai man baya ano máa sikharen mino, “Mana nanin mano ma esékena ain iyampon ma kaúden maen ná mai iyampon Bafan aníen ná eni kéká pinte ino siren ná mai iyampon mo aminó.” *Eks 13:2, 12*

²⁴ Amiyan kankanan kukhofá nun nafi kukhun nafi varen mo íkun uan ameno van Yerusaremí monó namumpin oren mino. *Riv 12:8*

Simioni Ano Ma Yisasin Avu Amein Baya Ino

²⁵ Maí damú mana Simionin ne sin banta Yerusaremí báken mumunampin béi funtákan Kantá Aunan mano ven aúpin bíkakkhan Isareri nanin banta ma ará kusiantáden ma evaránen aviran nain banta onano van ave ukharen mino. ²⁶ Kantá Aunan mano véin pefá tiamemí, “Éi ída furin para vasin mi Bafani vanasi ma evaránen aviran nain banta yáko intiya onan nono.” ²⁷ Bafani man baya ano ma sikheiníen Yosepin nú Maria nú ano Yisasin aviren monó namumpin ódiyákan Kantá Aunan mano Simionin aviren maifin múdan ²⁸ mai iyampon un daumaren Ti yarafenu aví daní iyáken máa semí,

²⁹ “Bafan noe, fefá éi ma siáden nan baré einí eya

ei yoran banta saréa áesin ná ará kusin masá orino.

³⁰ ^aBanasi ma ayaino van ma aní ukhá eona mai inka se suu fóké oné uno.

³¹ Mai minó nanin banta ano onano van utaan kaúkare ono.

³² ^bMai véi mana on mi vain ena anan nanin banta kakhaan táden maen Eni Isareri kéká kákan bí aminten mino.”

³³ Maa síkan mai iyampon nan ma Simioni sein baya van be anóe afóe ano anú diyan kokhon ineine iyákan

³⁴ ^cSimioni vetin avu uantáden mai iyampon anóe Marian máa sen tiamemí, “Tiyarafenu ano ma iyampon nan mi siyan béi anon kokhon Isareri nanin bantai eraven ankamin má ena kokhon Isareri nanin bantai e mantan mái mana aní banta vantin banasi ano véin oyampá baya sinten mino. ³⁵ Maa siyantín béi ano vanasii aúpa ineine maman dákó intin éin dere vaenati ano arápin kéká inten mino.”

**Sakhanampa Nanin Ana Ano
Ma Yisisin Nan Tiyarafenu
Tusu Siantein Baya Ino**

³⁶ Asani anan pinte Fanuerin araun mana sakhanampa nanin Ana varen afovaí ukharen mino. Béi ve avafun má dan manápá ifo afápá kan un kádan oranará baré íkan ³⁷ be avafu fúbin eiti fo (84) oranará baré báken ena ena inuran má bayan má ída monó namun baru me ampiyan maen manáa yamú dunan auraren Tiyarafenu rá amúkiyáken beni yoran pákaren baren mino. ³⁸ Maí damú ana véi má dere vetíi ádé eriven Tiyarafenu susu siantian Yerusaremí nanin banta ma Tiyarafenu ano evaráné aviranté uno sikhana ma afoká intí onano

van ma iyá ein nanin banta kayofin mai iyamponi veya sian dákóen mino.

**Yosepin Má Be Aná Bá Yisasi
Má Ma Evaránen Nasaretí
Barufá Orein Baya Ino**

³⁹ ^dBafani man baya ano ma sikharé einíen Yosepin nú Maria nú ano mai yoran dóan kípáren bei varufá Karirí barafin Nasaretí oren mino. ⁴⁰ O vákan mai iyampon ákona vá e anoní iyákan Tiyarafenui avábá ano ve má bákan kama ineine ano véimpin bíken mino.

**Yisasi Ma Tiyan Míkan Mifo Sirantan
Kan Orun Kádan (12) Oranáí
Uven Ma Yerusaremí Monó
Namumpin O Vá Ein Baya Ino**

⁴¹ ^eMinó oranafin ma Avo Uantan Dunan Nan Damú ma erin maen be anóe afóe Yerusaremí oriyaren mino. ⁴² Tiyan míkan mifo sirantan kan orun kádan (12) oranái Yisasi ukharen betin anóe afóen má anafu aráoni avúavá ánain dakhafen Avo Uantan Dunan Nan Damú oren mino. ⁴³ Orikhá íkan Avo Uantan Dunan ma Nan Damú kípavíkan Yisasi ma Yerusaremí bain ída afová en onanton be anóe afóe evaránen barufá oren mino. ⁴⁴ Oriyáken be anóe afóe ma in ein mano Yisasin nan be arona kayo vái oriyán mino ana siren ída ve nan dosin mana vayan orivíkan ínaimpá be nan mo yose me yose iyan mana varuráké ma orikharé einta safi arona kayora safi me inae inae en mino. ⁴⁵ Békanan dosivaen ída onarí iyaimpin evaránen Yerusaremí mo yoseno van oren mino. ⁴⁶ Békanan dosiyan kanú manaú damú orivíkan béi monó namuni yafufin arú kayo aúbaná kumanten betí ankan ma sein baya iniyáken manáa veya evaránen betimpin inauren iniyán baré íkan o

^a2:30 Ais 52:10; Ruk 3:6; Tai 2:11 ^b2:32 Ais 42:6; 49:6; 52:10 ^c2:34 Ais 8:14; Mat 21:42; 1Pi 2:8 ^d2:39 Mat 2:23 ^e2:41 Eks 12:24-27; 23:14-17; Diu 16:1-8

onen mino. ⁴⁷ Beni vava ma inein banta kéká ano veni afova vá inain baya vá ma evaránen tiyain ma san anúden oreraen mino. ⁴⁸ Békanan ma Yisasin o onen kákantá anú diyáken be anóe máa sen bérin tiamemí, “Tanin noe, éi fará ma avúavá afóe rasan usintenará berasan tirá ano uman diyasá éin nan dosiyare rafuno.”

⁴⁹ Máa síkan bérin evaránen békanan tiamemí, “Pará te nan dosé no vae séi se sífóen[‡] amái vanté umpo ídá tiré kanan afová ukhe fonó.” ⁵⁰ Máa síkan mai ma véi siyain baya ana ída vékanan afová en mino.

⁵¹ ^f Máan turen ben avíaren betí evaránen Nasaretí oren o váken be anóe afóe ma sein baya máa iniren oo yayiyákan inká Yisasi ma sein baya máa ve anóe ano mamanan aúká kaúden pákaan ákon-aen mino. ⁵² ^g Máan tiyáken Yisasi e anoní íkan beni afova ano mo kákaní íkan Tiyarafenu vá minó barará nanin banta vá ano moéken bérin nan anunuen mino.

**Monó Non Péantan Banta
Yoni Ano Ma Yisasini Aa
Uvóden Puntáantein Baya Ino**

(*Matiu 3:1-12; Maki 1:2-8; Yoni 1:19-28*)

3 Sisa Taiberiasi ano ma Romú barafá ma kiní ukhan tiyan míkan mifo sirantan dan manápá orun kádan (15) oranaí ma iyákan inká Pontiasi Pairoti ano Yudiá barafá kamaniní ukhein damú anan Eroti Antipasi ano Karirí barafá kamaniní ukhan ben afá Firipi ano Ituriá bá Taronitisí bara vái yafisiní in mi inká Risianiasi ano Abiriní barafá dafíkan ² ma ukhein damú anan Aanasin nú Kaiafasin nú ano monó ánon

banta kékái ánon bantá kaní ukhan maen Sekaraiyan anin Yoni ano vanta ída van kámá barafá bakan Tiyarafenui vava ano véimpin eren mino. ³ ^h Erivíkan bérin Yodení non akhempá ma vain baru kayo fimpá oriven banasi siamemí, “Ará baédesin Tiyarafenu ano siretí ankani ume ampíantá dantiya vá non barano.”

⁴ Sakhanampa vanta Aisaiya ano máa sen bompon uvantaremí,
“Kámá bara fáké mana vanta ano oovaren máa sinten mino,
‘Bafani aa uvídeya funtarano.

⁵ Masisí ma ukheimpin bara kaesin édavintiya anuyon kayo úan avái eya aa ma koren ukhein mamanan puntareya namu ma ukheimpin kama uresin ná

⁶ Tiyarafenu ano ma evaránen minó nanin banta ma aviran dorarí ma inain mai minó anon onanten mino.”

Ais 40:3-5

⁷ ⁱ Máa siyákan kokhon nanin banta ano Yoni vaintá monó non péantano van eríkan betí ankan máa sen tiamemí, “Eeeee, tiretí ankan namu osafáe akhafana ompo iye anó tiretin afova amikhayá Tiyarafenui aran naná ma siretin amaniná ereno van iyain nan karan orono van iya rafono. ⁸ ^j Tiretí ankan ma fura seya ará baédante vá beni aran ná iran nompo siretí ída vá ‘teti Abaraamun akhafana uno’ seno. Téi siretí ankan tiamé uno. Tiyarafenu ano kanaíen ma onámaná kayo sintin Abaraamun akhafanaí inten mifo ⁹ ^k ída ma kamaen aran iran nain daa ana sikaren ira sarano van Tiyarafenu ano fefá tasume anafin kain ban mino.”

[‡]2:49 Manáa Tiyarafenui vompon dókifin ena asotúin baya máa síkhen mino, “*se sífóeni yoran mi varanté umpo...*”

^f2:51 Ruk 2:19 ^g2:52 1Sa 2:26; Pro 3:4 ^h3:3 Apo 13:24
ⁱ3:7 Mat 12:34; 23:33 ^j3:8 Yon 8:33, 39 ^k3:9 Mat 7:19

¹⁰Máa síkan banasi ano Yonini vaya iniren máa sen béin inaemí, “Mai setí náísá onte rafuno.”

¹¹Máa síkan Yoni evaránen betí ankan tiamemí, “Kankanau au anamun ma yákanona ano ída ma yákan nain ná mana au anamun amesin ná dunan ma yákanona vá dere ano máan mana vá ono.”

¹²^lTakisi varan banta kéká ano yere non barano van erikharen betí máa sen inaemí, “Aru soe, setí intesá ótifante rafuno.”

¹³Máa síkan Yoni evaránen betin tiamemí, “Tiretí ankan ma takisi varyákeya vá kamani ano ma sin nain mai máa ana vá bareya ída vá mairá manáa mo asotú ono.” ¹⁴Máa síkan manáa aruvin banta kéká bá ano yere Yonin inaemí, “Tetí ankan náísá ótifante rafuno.”

Síkan Yoni vetin tiamemí, “Tiretí ankan ída vá banasi namu uante vetí moní máká tire umoyan bareya ída vá betí ankan kampun kó tiantáde moní bare vá kamani ano ma miyan amin nain mai máa moní ana vá amusin iya varano.

¹⁵Máa síkan banasi ano Yonin oniyáken betí ankan kokhon ineine uren be nan mai ma Tiyaarafenu ano ma varará nanin banta evaránen aviranten mino ma sikhare ein mai vanta ino sen inen mino. ¹⁶^mMáan ineine iyákan Yoni evaránen betí ankan máa sen tiamemí, “Téi non máa fóí siretin péantiyá umpo sen toyampá ma eriyaini ákona ano senti ákona moéken esantakhá téi ída funtákeruna ída kanaí é matimé beni arantan anumun anan útufonté umpo véi Kantá Aunan má irafó báí siretin monó non péantanten mino. ¹⁷Kákan poki ma ayampin pákakhein banta an daven béi ereno van iyain ma

eriven maen bei uviti namun pintena aitan má asuí ma ukhein ma yo ínáan karúdaren uviti o éke e éke uren bei uviti namumpin kauren áitan má asuí ma ukhein má ída yusimin irafin taman kaurinten mino.” ¹⁸Yoni ano kokhon baya kayofó banasi ará mantano van Tiyaarafenui kama vaya siamiyaren mino.

Eroti Ano Ma Yonin Karavusifin Kaein Baya Ino

¹⁹ⁿEroti ma kamaniní ukhen maen be aváen aná Erodiasin ma yafein má ena kokhon aauí ma ukhá ein masan Yoni ano vanasifin páman uren asirákan iniren ²⁰Eroti moéken ena vá namu avúavasien Yonin pákaan karavusifin kaen mino.

Yoni Ano Ma Yisasin Monó Non Péantein Baya Ino

(Matiu 3:13-17; Maki 1:9-11)

²¹Kokhon nanin banta ma non bariyákan Yisasin má dere non mamaren amúkiyain má inaru ona yivíkan ²²^oKantá Aunan mano kukhofá nun an daven ámaren Yisasin ánotá e yomaniyain má inaru fáké máa sen oovaren temí, “Éi sen tanin uron mono. Téi éin nan moéké tinunu ukhé éi nan timusin iyá uno.”

Yisasin Anafu Yan Ma Ayun Man En Erikheí Pákena Vaya Ino

(Matiu 1:1-17)

²³^pYisasi ma teti (30) oranaí ma uven bei monó doran arái íkan banasi ano ma inein mano véi nan Yosepin anin mino sen iniyákan

Yosepi mai véi Erin anin mino.

²⁴Eri maen Matatin anin bákan Matati maen Rivain anin bákan

^l3:12 Ruk 7:29 ^m3:16 Apo 13:25 ⁿ3:19 Mat 14:3-4; Mak 6:17-18

^o3:22 Yon 1:32 ^p3:23 Ruk 4:22; Yon 6:42

Rivai maen Merikin anin bákan
 Meriki maen Yanain anin bákan
 Yanai maen Yosepin anin mino.
²⁵ Yosepi maen Matatiasin anin bákan
 Matatiasi maen Amosin anin bákan
 Amosi maen Naumin anin bákan
 Naumi maen Esirin anin bákan
 Esiri maen Nakhain anin mino.
²⁶ Nakhai maen Matin anin bákan
 Mati maen Matatiasin anin bákan
 Matatiasi maen Semenin anin bákan
 Semeni maen Yosekin anin bákan
 Yoseki maen Yodan anin mino.
²⁷ Yoda maen Yoananin anin bákan
 Yoanani maen Resan anin bákan
 Resa maen Serubaberin anin bákan
 Serubaberi maen Siaritierin anin bákan
 Siaritierin maen Nerin anin mino. ²⁸ Neri
 maen Merikin anin bákan
 Meriki maen Adin anin bákan
 Adi maen Kosamun anin bákan
 Kosamu maen Erimadamun anin bákan
 Erimadamu maen Erin anin mino.
²⁹ Eri maen Yosuan anin bákan
 Yosua maen Eriesan anin bákan
 Eriesa maen Yorimin anin bákan
 Yorimi maen Matatin anin bákan
 Matati maen Rivain anin bákan maen
³⁰ Rivai maen Simionin anin bákan
 Simioni maen Yudan anin bákan
 Yuda maen Yosepin anin bákan
 Yosepi maen Yonamin anin bákan
 Yonami maen Eriakimin anin mino.
³¹ Eriakimi maen Mereanin anin bákan
 Mereani maen Menan anin bákan
 Mena maen Matatan anin bákan
 Matata maen Netanin anin bákan
 Netani maen Devitin anin mino.
³² ^qDeviti maen Yesin anin bákan
 Yesi maen Obetin anin bákan
 Obeti maen Boasin anin bákan
 Boasi maen Saromonin anin bákan
 Saromoni maen Nasonin anin mino.
³³ Nasoni maen Aminadapin anin bákan

Aminadapi maen Ramun anin bákan
 Ramu maen Arinin anin bákan
 Arini maen Esaronin anin bákan
 Esaroni maen Peresin anin bákan
 Peresi maen Yudan anin mino.
³⁴ Yuda maen Yekopun anin bákan
 Yekopu maen Aisakin anin bákan
 Aisaki maen Abaraamun anin bákan
 Abaraamu maen Teran anin bákan
 Tera maen Nahon anin mino.
³⁵ Nao maen Serukun anin bákan
 Seruku maen Reun anin bákan
 Reu maen Perekin anin bákan
 Pereki maen Eberin anin bákan
 Eberi maen Seranin anin mino.
³⁶ ^rSerani maen Kainanin anin bákan
 Kainani maen Apaksatin anin bákan
 Apaksati maen Siemin anin bákan
 Siemi maen Noan anin bákan
 Noa maen Ramekin anin mino.
³⁷ Rameki maen Metuseran anin bákan
 Metusera maen Inokin anin bákan
 Inoki maen Yaretin anin bákan
 Yareti maen Maararerin anin bákan
 Maarareri maen Kenanin anin mino.
³⁸ ^sKenani maen Enosin anin bákan
 Enosi maen Setin anin bákan
 Seti maen Adamun anin bákan
 Adamu maen Tiyaarafenu anin mino.

**Ban Anon Mano Ma Yíasin
 Akhenóka Ein Baya Ino**

(*Matiu 4:1-11; Maki 1:12-13*)

4 Yisasi Yodení non me ampiren
 oríkan Kantá Aunan mano véin
 aúpin bíkaaren aviren kámá barafá
 oríkan ²Yisasi foti (40) yamú dunan ída
 nanton arafan bákan Ban Anon mano
 véin akhenóka uan onen mino.

³Ban Anon mano máa sen béin
 tiamemí, “Éi fura se Tiyaarafenu Anin ma
 vanteya ma onámaná tesin ná beretí
 ino.”

⁴Máa síkan Yisasi véin evaránen tiamemí, “Tiyarafenui vompon dóki ano máa sikhen mino, ‘Banasi ano veretirá ana ída fara ayun ban ákona varé iyan mino.’” *Diu 8:3*

⁵Máa síkan Ban Anon mano Yisasin do aviren dan bain anurá mun kaúden minó ákona vara kayo ma ma varará bain anífen mino. ⁶Aní iyáken Ban Anon mano véin máa sen tiamemí, “Ma vara kayo éin amiré éin ákona amé kuyá dafisiyáke kákan bí baran nono. Minó danasinta sen tinan bain téi ma sinunu onunan amenté uno. ⁷Amenté umpo aron durafúde matimeya ma sentá monó tiresí maé mai yanasinta minó éin amenté uno.”

⁸Máa síkan Yisasi evaránen béin tiamemí, “Tiyarafenui vompon dóki ano máa sikhen mino, ‘Ei Bafan Tiyarafenurá ana vá monó tiante vá beya aránaópá ana vá bano.’” *Diu 6:13-14*

⁹Máa síkan Ban Anon mano Yisasin do aviren Yerusaremí monó namun amontá mun kaúden béin máa sen tiamemí, “Éi fura se Tiyarafenu Anin ma vanteya ma má amon táké káuseya aravono. ¹⁰Mai fara vara seyo, Tiyarafenui vompon dóki ano máa sikhen mino, “Béi vei enisori kéká tiantantin éintá daffan ákona inten mino.’

¹¹Ákonaen entá daffben ayan dóki uví dantiya mai yaró aravesin onámaná ano ída arantampin un peranten mino.” *Ibo 91:11-12*

¹²Máa síkan Yisasi evaránen béin tiamemí, “Tiyarafenui vompon dóki ano máa sikhen mino, ‘Éi ída vá ei Bafan Tiyarafenu akhenóka ono.’” *Diu 6:16*

¹³“Ban Anon mano ma Yisasin akhenóka uan kípáren me ifá en orein ená damusan o ave en mino.

Yisasi Ma Karirifá Monó Doran Mo Araí Ein Baya Ino

(Matiu 4:12-17; Maki 1:14-15)

¹⁴Kantá Aunani ákonará Yisasi evaránen Karirí barafá oríkan mai varafin ma vain nanin banta ano véi ma o vain baya iniren afová en oreraen mino. ¹⁵Béi monó átaru namu kayofin ódiven monó baya siamiyákan banasi ano iniren ben aví danífen mino.

Nasaretí Nanin Banta Ano Ma Yisasin Oyan Amein Baya Ino

(Matiu 13:53-58; Maki 6:1-6)

¹⁶Béi ma araraká baren e anoní ukhaein mai Nasaretí barufá orikharen bei avúavá baren Sabati yamú monó átaru namumpin ódiven monó bompon dankafono van orun mantavíkan ¹⁷sakhanampa vanta Aisaiyani vompon dóki varen mo amíkan béi kaváden máa ma sikhein baya yankafen mino.

¹⁸“Minó daná ma ída vain kéká Bafan mano vei kama vava siamino van téin aní uran Beni Kantá Aunan mano sen má ban mino.

Karavusífin ma vain nanin banta siamékun karavusi útufiyantin auu ma yufúkukhein auu kama iyantin ena kéká ano ma vetí ankan maman bararasí uren ma uman amiyain má kípantin ino van mi

téin tisintá eré uno. ¹⁹Bafan mano ma vei vanasi kama inain damú inka afoká en mino sen tian dákó ino van mi véi sen tisintá eré uno.” *Ais 61:1-2*

²⁰Máa siren Yisasi vompon dóki evaránen dádaren mai vompon dókirá ma yafisin banta amiren kumamíkan minó nanin banta ano yovariyáden béin mana urú onen mino. ²¹Oniyákan béi máa sen betí ankan tiamemí, “Tiyarafenui vompon dóki ano ma síkhá ein

bayan tiretin átaren mano inka inin mai yaná taréa afóken mino.”

²²v Maa síkan betí ankan Yisasin aví daní iyáken mai ma kama vaya kayo ma ven oo fenté eriyain nan kokhon ineine en orera iyáken betí máa semí, “Ma vanta Yosepin anin mi vá tetí afová ukhé umpo intesá uren ná ma kama vaya kayo siyan nafino.”

²³Maa síkan Yisasi máa sen tiamemí, “Minó nanin banta ano ma siyain baya ma mádeya mae sireti se nan, ‘Ayofan banta oe, éi eyantá e au kama ono’ seya sisimiyákeya ‘éi ma Kapeniamú ma vareona avúavá ma setí inikheruna mai ei varu anará barano van muno.”

²⁴w Maa siren béi evaránen betí tiamemí, “Téi fura uron mi siré tirétin tiamé umpo mana sakanampa vantai varu rákena nanin banta ano ída ven avaya iné iyan mino. ²⁵x Téi fura siré tiretí ankan tiamé uno fefá Iraiyaní yamú be avafun ná púbíkan kokhon baré nanin kéká bakan inarurá á pákaran kanú manaú orana ifo yan manápá ifo afápá mana un kádan biyontá ída á dákan kákan anan afoká íkan minó barufá arafanan en orera iyákan ²⁶y Tiyarafenu ano Iraiyan ída Isarerí baré kéká baipá tiantan oren mifo véin Serefatí barufá Saidonii varafin mana ve avafu fefá púkein baré nanin baipái siantan oren mino. ²⁷z Máan tukharéin inká ena sakanampa vanta Iraisa ma varé ein damú ana amon dana aí bain kéká Isarerifin kokhon bíkakhá ein pintena mana vanta au ída evaránen kamaen mifo Siriá banta Namanin beyaká anan aya íkan amon dana aí kípen mino.”

²⁸Maa síkan monó átaru namumpin ma varé ein nanin banta kayo ano

mai vaya iniren moéken aran nan en mino. ²⁹Aran nan uaren mai varu anu yontá baré íkan Yisasin do siantan mai varu finté ekhuven aravíkan béin ayafin avékaan karúdano van do yarifen oren mino. ³⁰Darifen oriyain má Yisasi mai nanin banta aúbaná oriaren mai aya oyi ráke me ampiren oren mino.

Yisasi Ma Namu Aunan Do Siantein Baya Ino

(Maki 1:21-28)

³¹Karirí barafá Kapeniamú barurá béi orun baren Sabati yamú monó baya araíen banasi siamen mino. ³²a Tiamiyákan béi ma siyain monó baya ano ákona vá eriyákan minó nanin banta ano iníkan aví bain banta ano ma siyainí iyaimpin minó ano anúden oreraen mino.

³³Maí damú mana namu aunan mano fákakhein banta ano mai monó átaru namumpin un baren avádóden bádiyan máa semí, ³⁴“Nasaretíke Yisasi oe, éi ída vá tétin namu ono! Tetí éin afová ukhé uno. Éi Tiyarafenui mana kanta suron mono.”

³⁵Maa síkan Yisasi mai namu aunan máa sen asemí, “E avaya fakareya mai vanta aú pinté entavono,” síkan namu aunan mano mai nanin banta avorá mai vanta maman barará aséden béin me ampiren oriven ída uman amen mino.

³⁶Máan tíkan minó nanin banta ano anú duren betiyan ten oreraemí, “Aii! Ma náí vayá tiyan nafino. Ákona uron ukhein bayafó béi síkan namu aunan kayo ano ven oo yayien oriyain mino.” ³⁷Máan turákan mai ma Yisasi varein avúavá baya ano ainen minó mai varafin oreraen mino.

v4:22 Ruk 3:23; Yon 6:42 w4:24 Yon 4:44 x4:25 1Ki 17:1, 7

y4:26 1Ki 17:8-16 z4:27 2Ki 5:1-14 a4:32 Mat 7:28-29

**Yisasi Ma Pitan Aná
Anóen Ayofein Baya Ino**

(*Matiu 8:14-15; Maki 1:29-31*)

³⁸ Yisasi mai monó átaru namun me ampiren Saimonin amápin oríkan Saimonin aná anóen aufá irakharo uaren aí uádan bakharéin béin ayaino van betí ankan Yisasin inaen mino. ³⁹ Ina íkan Yisasi ádé o mantaven aí ano mai nanin me ampiren orino van ákonaen baya síkan aí orivin mai nanin mano manáda orun mantaven betíi yunan taren mino.

**Yisasi Ma Kokhon Nanin
Banta Ayofein Baya Ino**

(*Matiu 8:16-17; Maki 1:32-34*)

⁴⁰ Áau ma yo úbafen eravíkan banasi ano ara ara aí ma vain kéká Yisasi vaintá aviren ere ere íkan béi mana mana aurá ayan kaúantádan betí ankan evará-nen kamaen mino. ⁴¹ ^b Máan turen Yisasi namu aunan kayo yo siantan kokhon nanin banta ma me ampiren oriyáken máa sen oovaren mí, “Éi Tiyarafenu Anin mono.” Máa síkan béi vetin asiren baya ída sino van airo ananí uanten mifo mai fara va ino varará nanin banta ma evaránen avirano van ma Tiyarafenu ano aní ukharé ein mai vantán béi vákan betí afová ukhan mino.

**Yisasi Ma Ena Varu Kayo Fimpá
Monó Dorarí Ein Baya Ino**

(*Maki 1:35-39*)

⁴² Pe ákura suron Yisasi mai varu me ampiren mana vanta ída van akhempá oren mino. Orivíkan banasi ano ven nan dosen oren o ódaren betin ída véi me ampiren orino siren ayópá ono van en mino. ⁴³ Ayópá ono van íkan béi máa sen

betin tiamemí, “Téi ena varufimpá basá orivé Tiyarafenui yafisin pintena kama vava minó nanin bantafin tiamino van mí véi sen tisintá erikhé uno.” ⁴⁴ ^c Máa siren Yudiá barafá ma minó barurá bain monó átaru namun kayo fimpá oriven monó baya vanasi siamen mino.

**Yisasi Ma Pitan Nan Base Karú dare
Noyana Fákano Sein Baya Ino**

(*Matiu 4:18-22; Maki 1:16-20*)

⁵ ^d Maná damú Yisasi Kenesaretí non akhempá mantakharé íkan^f kokhon nanin banta ano véi vaintá ere ere uven Tiyarafenui vava siamintin ineno van béin maman aúban kaúden iyen eúken mino. ² Iyen eúkukhan Yisasi mo onákan kankanan noyana arin boti non akhempá bákan mai voti kanampin ma noyana ariyain banta kéká ano vase sesé iyan mino. ³ Máan tiyákan Yisasi mana Saimonini votifin ódiven béin tiamin mai voti avékan manáa nompin orivin mai votifin kumanten monó baya vanasi siamen mino.

⁴ Monó baya sian kípáren ínaimpáké béi Saimonin máa sen tiamemí, “Ma voti vareya mesan non aúbaná oriveya vase karúdesin nompin aravintiya noyana fákano.”

⁵ ^e Máa síkan Saimoni evaránen temí, “Bafan noe, inuran tákéi o vase karúde erékun me kakhá ída mana vá noyana fáké umpo en oo yayiyé base karúdenté uno.”

⁶ Máa siren base karúdarákan noyana ano mai vase víkaaren dákaríen mino. ⁷ Base víkaaren dákarí iyaimpin ena votifin ma varé ein kéká arákan erin mai votifin má noyana yaiman kaúdan miká-

^f5:1 Mai Kenesaretí non má Kariri non má mana non mino. Kan bí ifo mana non mana ino.

^b4:41 Mat 8:29; Mak 3:11-12 ^c4:44 Mat 4:23

^d5:1 Mat 13:1-2; Mak 3:9-10 ^e5:5 Yon 21:3-8

nan boti víkaaren nompin orun peraríen mino.

⁸Saimon Pita ma mai yaná oniyáken maen Yisasin arantampin mo aron kanan durafúden mátimen temí, “Bafan noe, séi ume vanta umpo sen ampíreya orono.” ⁹Máa siren béin má be arona vanta kayo vá ano mai noyana kayo oniyáken moékentá anúden orera íkan ¹⁰Sebetin anin kan Saimoni arona Yemisin nú Yonin nú bá anú diyákan Yisasi máa sen Saimonin tiamemí, “Ída vá akhokho van ono. Tare ráké arái eya éi vanasi avían timin nono.” ¹¹^fMáa siran betí ankan mai voti vá mai yanasinta vá baren non akhempá me khaúden Yisasin bákuren oren mino.

**Amon Dana Aí Bain Banta
Ma Yisasi Ayofein Baya Ino**

(*Matiu 8:1-4; Maki 1:40-45*)

¹²Mana varurá amon dana aí bain banta varen Yisasin onen barará amupáké baven berai semí, “Bafan noe, éi ma anunu iyanteya séin tu kama usintano.”

¹³Máa síkan Yisasi ayan dan orin béin au aruviyan máa sen tiamemí, “Téi sinunu iyá umpo éi kama ono,” síkan mai vantai amon dana aí ma varé ein manáda kípen mino.

¹⁴^gMai vanta ma Yisasi ayofaren maen ákonaen tiamemí, “Ma avúavá ma en aurá afoká ein mai ída vá mana vanta siameno. Mosesi ma sikhá einí eya vá monó doran banta avorá e au mo aní iyákeya vá e aí ma kipein nan Tiyyarafenu íkun uan amesin ná minó nanin banta ano eni aí kípen mino sen afová ino.

¹⁵Máa síkan mifo Yisasi ma yoriyain avúavá baya van e siádan minó barufá ainen orera íkan kokhon nanin banta ano veni vava iniyantin betí ankani aí kí-

paantano van ere ere en mino. ¹⁶Máan tiyákan kokhon damú Yisasi vanasi me ampíren banta ídavan afokhampá amúkono van beyaká oriyaren mino.

**Ai Ayan Púká Ein Banta Ma
Yisasi Ayofein Baya Ino**

(*Matiu 9:1-8; Maki 2:1-12*)

¹⁷Maná damú Yisasi monó baya siamiyákan Karirí bara fáke safi Yudiá bara fáke safi inká Yerusalemí baru fáke safi Farasisi kayo vá man baya ma afova ukhein banta kéká bá kumantákan Bafani ákona ano Yisasimpin bíkavíkan aí nanin banta ayofen mino. ¹⁸Yisasi ayofiyan mápin bákan mana ayan arantan púkein banta kúkútafin kaúden manáa vanta kayo ano veni áde ka ono siren daiyó en eren mino. ¹⁹Mai kúkúta yayió en eríkan banasi víkaaren ída afokhaní ukhan me khoen mai kúkúta yayien má daró ódiven má amon káponaren mai kúkútará anan damuren kain Yisasi vaintá araven mino.

²⁰^hMáan tíkan Yisasi vetí ankani mununan ódaren máa semí, “Tirona oe, eni ume inka ampíanté uno.”

²¹Máa síkan man baya afová ukhein kéká bá Farasisi kayo vá ano vetiyan ten oreraemí, “Ma vanta ano Tiyyarafenui varun bariyan mifo véi iye fino. Ída mana vanta ano kanaíen ume ampíantanten mifo Tiyyarafenu veyafin mí mai ákona van mino.”

²²Máa siyákan Yisasi vetí ankani ineine fe afová iyáken máa sen tiamemí, “Nái vará tiretí mai ineine iyara fono. ²³‘Arantan ayan ma fúkein banta van ma mantaveya ei kúkúta mamare orono’ ma senuna fi áa ‘eni ume ampíanté uno’ ma senuna mai anó teso sikhén nafino. ²⁴ⁱBanta Anin mano ma varará ume ifá

^f5:11 Mat 19:27 ^g5:14 Riv 14:1-32 ^h5:20 Ais 43:25; Ruk 7:48

ⁱ5:24 Yon 5:8

uantan ákona manten mino sireya siretí ankan afová ono van mi séi inikhé uno.”

Máa siren Yisasi máa sen ayan arantan púkein banta siamemí, “Éi e mantaveya ei kúkúta mamare e amápá orono.”²⁵ Máan ma siyain má ana mai nanin banta avorá mai ma ayan arantan púkaré ein banta ano orun mantaven bei yuvasí mamaren Tiyarafenu aví daní iyáken be amápá oren mino.²⁶ Minó nanin banta ano Tiyarafenui ákona ódaren anúden orera iyáken temí, “Taréa ena yanái oné tiféuno,” siren ben aví daníen mino.

Yisasi Ma Rivain Ne Sin Banta Arein Baya Ino

(*Matiu 9:9-13; Maki 2:13-17*)

²⁷ Máan turen Yisasi oriyaren o onákan takisi varan namumpin takisi varan banta Rivain ne sin mano kumantaré íkan béin ódaren máa sen tiamemí, “Ere sen bákurono.”²⁸ Máa síkan Rivai minó daná mairá me ampiren béin bákuren oren mino.

²⁹ Orono van iyáken Rivai ano Yisasin nina kákan dunan tamá daran takisi varan kéká bá ena nanin banta kayo vá ano maifin e átaru uven békanaan má dunan nen mino.³⁰ Niyákan man baya ma afová ukhein banta kéká bá Farasisi kayo vá ano kóiyáken beni eyo iyampon kayo inaemí, “Tiretí ankan pará takisi varan banta kéká bá ume nanin banta kayo vá manafin dunan niyara fono.”

³¹ Máa síkan Yisasi evaránen betin tiamemí, “Aí ma vain nanin banta ano anan ayofan banta vaípa oré iyan mifo aí ma ída vain nanin banta ano ída oré iyan mino.³² Máan tukháí funtákein nanin banta aran novara séi ererauno ume nanin banta arékun ará baerano van mi séi erikhé uno.”

Dunan Ma Aurá Pákena Van Ma Yisasin Inaein Baya Ino

(*Matiu 9:14-17; Maki 2:18-22*)

³³ Máa síkan betí ankan máa sen Yisasin tiamemí, “Kokhon damú Yonini eyo iyampon kayo vá Farasisi kayoi eyo iyampon kéká bá ano yere yunan auraren amúké iyan mifo eni eyo iyampon kayo ano fará ída yunan auranton ná niyan nafino.”

³⁴ Máa síkan Yisasi evaránen betin tiamemí, “Kanaisá ená anasi ma iman amin nain banta ma vei kéká bá para vantin maen beni kéká ano yunan auranten nafino. Ída ino.³⁵ Anasi ma iman amin nain banta ma aviren orivintin maen maí damú veni kéká ano yunan auranten mino.”[§]

³⁶ Máa siren béi ena vaya máa sen tian baé amemí, “Peyante au anamun ma yákvintin mana vanta ano ída auyen davaráe vararó ureya mairá mo yampare amuin nono. Máa ma esin maen ída kanafen o yampaan ákona uven míkanaan ída manái inten mifo mai au anamun kákantá anan e yáken orera inten mino.³⁷ Máan tukhantín mi mana vanta ano ída feyante memé au unampin auyen uvaini anu vanainten mino. Auyen uvaini anu ma feyante memé au unampin ma vanaresin maen maí uvaini anu ano feyante memé au unan dákaaren banaen eravintin mai unan má dere namu inten mino.³⁸ Máan tin nain nan mi auyen uvaini anu auyen memé au unampin mi vanai nono.³⁹ Máan tukhein nan mi feyante uvaini anu ma naren maen ída auyen uvaini anu né iyan mifo mai fara vara seyo feyante uvaini anu ano moéken kama ukhen ne sé iyan mino.”

§5:35 Yisasi maen anasi ma iman amin nain banta ino.

‡5:30 Ruk 15:1-2 †5:34 Yon 3:29

**Yisasi Ma Veyan Nan Sabatii
Bafan Muno Sein Baya Ino**

(*Matiu 12:1-8; Maki 2:23-28*)

6¹Mana Sabati yamú Yisasi uviti yu-nampin nókan bei eyo iyampon kayo ano uviti araní uren ayantá kasekhasu faren aitan do fútian karúdaren niyaren mino. ²^mNiyákan manáa Farasisi kayo ano ódaren betí ankan máa sen tiamemí, “Sabati yamú ma vanta ano ma mai avúavá baran are ukhein mifo fará tiretí ankan bariya fono.”

³ⁿMáa síkan Yisasi evaránen betí ankan tiamemí, “Devitin má bei kéká bá ma arafan nan uaren ma mantaré ein daná tiretí ankan ídá dankádeyá afová ukhera fono. ⁴^oTiyarafenu amá ma Deviti un pében ma monó doran banta kéká ano ana vá nano ma siren Tiyarafenu avorá kain baré ein bereti ma véi un máden bei kéká bá ma nein mai veya sireti ída afová ukhe fono.”

⁵Máa siren Yisasi evaránen betí ankan tiamemí, “Banta Anin béi Sabatii Bafan mino.”

**Yisasi Ma Mana Ayan Púkein Banta
Ma Sabati Yamú Ayofein Baya Ino**

(*Matiu 12:9-14; Maki 3:1-6*)

⁶Ena Sabati yamú Yisasi monó átaru namumpin un pében baya sian banasi amiyákan maifin mana vanta ayan kurompákena fúkein banta vá baren mino. ⁷Yisasi monó baya siamiyákan man baya ma afová ukhein banta kéká bá Farasisi kayo vá ano maifin báken Sabati yamú aí nanin banta ayofantí ódé béin avían kópín ka ono siren aa van dosiyáken béintá dafikaren mino. ⁸Dosiyákan Yisasi vetí ankani ineinefin afová iyáken mai ma ayan púkein banta

van máa sen tiamemí, “Éi vanasi avorá orun mantano,” síkan mai vanta ano orun mantan mino.

⁹Mantavíkan Yisasi vetí ankan tiamemí, “Tiretí inaé umpo kasaerá Sabati yamú banasi kama uantante rafu áa namú uantante rafuno. Banasi aruan puronte rafu áa ayaékun ná para vanten nafino.”

¹⁰Máa siren Yisasi minó nanin banta onen eúkiyáken mai vanta máa sen tiamemí, “E ayan antúkano,” síkan mai vanta ano máan tikan evaránen béin ayan kamaen mino. ¹¹Máan tikan man baya ma afová ukhein banta kayo vá Farasisi kéká bá ano kákantá Yisasi nan aranan iyáken betiyan ten orera emí ma vanta setí ankan náisá ótifante rafuno.

**Tiyan Míkan Mifo Sirantan Kan Orun
Kádan (12) Eyo Iyampon Kayo
Ma Yisasi Aní Ein Baya Ino**

(*Matiu 10:1-4; Maki 3:13-19*)

¹²Maí damú Yisasi amúkono van mana anurá ódiven mai inuran Tiyarafenurá béi amúken oriyan bákan mo kakhen mino. ¹³Kakhan áau édavíkan bei eyo iyampon kayo aran erin tiyan míkan mifo sirantan kan orun kádan (12) banta aní uren betí ankan aposeri ví amen mino. ¹⁴Mana Saimoni varé íkan be nan Pitane sen mino. Máa siren Saimonin afá Enduru ne sen Yemisi ne sen Yoni ne sen Firipi ne sen Batoromiu ne sen ¹⁵Matiu ne sen Tomasi ne sen Yemisi Arifiusin anin ne sen mana Serotí anan banta Saimoni ne sen ¹⁶Yemisin anin Yudasi ne sen inká ínainpáké ma véin ma namuroí iyain banta kayo ayampin ma avían amin nain banta Yudas Iskarioti** ne sen en mino.

**6:16 Yudas Iskarioti e ma siyain *Iskarioti baru ráke vantan* ban mino.

¹6:1 Diu 23:25 ^m6:2 Yon 5:10 ⁿ6:3 1Sa 21:1-6 ^o6:4 Riv 24:5-9

**Yisasi Ma Aí Nanin
Banta Ayofein Baya Ino**

(*Matiu 4:24-25; Maki 3:7-12*)

¹⁷Máan turen Yisasin má bei eyo iyampon kayo vá amempá aravuaren kama ukhein avará ena kokhon bei eyo iyampon kayo vá Yudiá ankina fáke nanin banta vá Yerusaremí bá un non akhempá ma vain barú kan Taiyá bá Saidoni vá ano varéin orun manten mino. ¹⁸Béini vaya iniyantin betí ankani aí ayofaantano van mi erikharéin mi namu aunan mano ma váken ariyá ein nanin banta Yisasi ayofen mino. ¹⁹Máan tiyákan minó nanin banta ano onan béin pinté enará ukhein ákona eriyáken aí nanin banta ayofiyaimpin minó ano ayan dan oríkan ben au aruvono van en mino.

**Yisasi Ma Vanasi Ano Avu Vá
Uman Má Ma Varan Nain
Afova Amein Baya Ino**

(*Matiu 5:1-12*)

²⁰Máan tiyákan Yisasi vei eyo iyampon kayo oniyáken máa semí, “Tiretí minó daná ma ída vain kayo ano amusin na ono.

Tiyarafenui yafisin tiretin nina ino.

²¹^pTaréa ma arafan nan iyaona kayo ano vá amusin ná ono.

Ínainpáké naresin amú kurinten mino.

Taréa ma ífídiya vaona kayo ano vá amusin ono.

Ínainpáké intin ono.

²²^qBanasi ano siretin onantiya ma Banta Anin ma yakhafiyasin maen

betí ankan pura sen tiretin ará namu uantiyáken

namu vaya siyan éin avi san namu ukhen mino siren do ékanten mino.

Máan tintin ma mai yanasinta ma afoká intiya vá tiretí ankan ná amusin ono.

²³“Betí ankan ma máan avúavá ma siretin uantantiya vá tiretí amusin iya vá ará kama uron ono. Para vara seyo, inarufá kákan miyan tiretin ave ukhen mino. Pefá betí ankan anafu aráo ano máan avúavá anan sakhanampa kéká uantákaren mino.

²⁴“Máan tukharen mifo siretí moní nanin banta kéká ano vá dafisenó. Tiretí ará ma kamain daná máa fefái manta ono.

²⁵Taréa ma yunan naren nan ma amúkunta vaona kéká ano vá dafisenó.

Ínainpá arafan nan inono.

Taréa ma intiya vaona kéká ano vá dafisenó.

Ínainpá auufenté ánu eravinten mino.

²⁶Minó nanin banta ano ma siretí ankan aví ma yaní iyantiya vá tiretí dafisenó.

Pefá betí anafu aráo ano kampun sakhanampa kéká manái ukhein avúavá anan bariyaren mino.”

**Tiretí Namuro Ma
Avábá Uantan Baya Ino**

(*Matiu 5:38-48*)

²⁷Máa siren Yisasi semí, “Téinti vaya ma iniyaona nanin banta kayo ano vá tiretí namuro vará ananu iyákeya siretí ankan ma ará namu uantiyain banta kayo vá kama ono. ²⁸Kama iyákeya vá manáa kéká ano ma siretin nan

ma Tiyarafenu ano vá namu uantano ma sintiya vá tiretí ankan Tiyarafenu amúkuan amesin ná betin avu ino. Tiretí ankan Tiyarafenurá amúkesin ná tiretin ma namu uantan nain kékasá avábá ino.

²⁹Máan tiyantín ma manáa kéká ano ma maná páke ápa ankamintiya mae vá tefáke yere vá do véan betí baípasí ono. Manáa kéká ano ma yante afuin ma yafintiya áesin ná námente afuin

má dere o varano. ³⁰Manáa yana san ma vanasi ano éi vaípa ma inantintiya éi kasae vá ameno. Mana ano ma éin nina yaná ma mantaré intiya éi ída vá evaránen amino van ákona eya inanteno. ³¹Máan tiyákeya vá ena nanin banta ano siretin intéa avúavasá uantano vará ukhanten nafi mai avúavá ana vá betin má uantano.

³²“Tiretí ankan ma anunu iyain kéká ana ma anunu inteya iye anó tiretí nan inen ná kama nanin banta ino sinten nafino. Umeí ma iyain kéká ano yeren betin nan ma anunu iyain kéká anunu é iyan mino. ³³Tiretí ankan ma kama avúavá uantiyain kayo ana ma kama avúavá uantan teya iye anó tiretin nan inen ná kama nanin banta ino sinten nafino. Umeí ma iyain kéká bá ano yere manaí ukhein avúavá anan baré iyan mino. ³⁴Betí ankan manoi kanaíen anona ovaráne siminten mino ma sireya amiyaona mai iye anó tiretin nan inen ná kama nanin banta ino sinten nafino. Ume vanta kayo vá ano yeren umeí ma iyain kéká kasaen timinten mino sen afová iyáken amé iyan mino. ³⁵Máan té iyan mifo siretíí namuro vá anunu iyákeya vetin ná kama avúavá uanteyavá tiretin ma ída kanafen anona evaránen amerén ukhein kayo vá ameno. Béin ma ída susu siantiyain kéká bá namu kéká bá deren béi kama é iyan mifo siretí máan tiyare vá kákantá moékakhein miyan ínainpá mamareya vá Dan Bain Tiyarafenu akhasí puraseya ono. ³⁶Tiretí ankan Afóe ano ma vetin nan ma arunan uantiyainí eya vá tiretin má dere vá betin nan arunan uantano.

Banasii Avúavá Ma Yaimin Baya Ino (Matiu 7:1-5)

³⁷s^u“Tiyarafenu ano yere máa mana en tiretíí avúavá bá daiminafo siretí ankan ída vá enai avúavá daídeya vá namu vanta kayo ino siyákeya vetíí ume vá áuantesin ná Tiyarafenu ano siretíí ume áuantano. ³⁸Tiretí ankan ma ena nanin banta amesin maen Tiyarafenu ano siretin má aminten mino. Béi ma avarí inain mai víkaren morun avékaren kaiyantín bíkaaren avanen eraviyantín mi siretin aminten mifo sireti ma avarí iyá inona mai avúaváká anan temi siretin aminten mino.”

³⁹uYisasi máa siren betí ankan mana veya sian baéan amemí, “Kanaisá ená auu yufúkukhein banta ano ena auu yufúkukhein aviren orinten nafino. Ída ifo míkanan mano masípin mana o ádinten mino. ⁴⁰vAfova ma variyain kayo ano ída vei arú esantakhé iyan mifo véi ma kamaen afova ma mamaren mi vei arú bá mun manaí é iyan mino.

⁴¹“Máan té iyan mifo éi fará e afá aváen auufen ma sító kanti vain nan mana oniyákeyá e auufen ma kákan daa khaeádan ma vain nan ída iniya fono. ⁴²Máan tukhen mifo éi fara e afá aváen auufentena sító kanti yo varano van iyákeyá e auufen ma yaa khaeádan mano ma iyákein ídá oniya fono. Éi kampun baya sire ída mai ánain dakhafin nanin banta ono. Esé e auufen ma yaa khaeádan ma vain nare yo kanire vá kama e oniyáke vá e afá aváen auufentena sító kanti khasae vá do varano.”

Daa Ana Vá Beni Aran Máí Vaya Ino (Matiu 7:16-20; 12:33-35)

⁴³Máa siren Yisasi evaránen temí, “Kama yaa ano ída namu aran irákan

inká namu yaa ano ída kama aran iran é iyan mino. ⁴⁴Banasi ano yaa aran naren ódaren kama ukhen nafi namú ukhen nafi siren oman afová é iyan mino. Banasi ano ída ayankun anan kayo rákena fiki aran kúden inká ayankuníen namu ukhein daa kayo rákena ída uvaini aran kúden é iyan mino. ⁴⁵Kama vanta aúpin kokhon kama ineine víkakkan béi kama avúavá baré iyan mifo namu vanta ano ven aúpin namu ineine víkakkan béi namu avúavá baré iyan mino. Máan ineine ma aúpin ma víkakhein mi oo ano sian dákó é iyan mino.”

**Kama Afova Vain Banta Vá Ída
Kama Afova Vain Banta Vá
Ano Ma Má Uvaran Baya Ino**

(Matiu 7:24-27)

⁴⁶wMáa siren Yisasi evaránen temí, “Tiretí ankan pará Bafan noe, Bafan noe, se nan tiyákeyá te ma siamiyaruna vaya ánanin ídá bákuriya rafono. ⁴⁷Máan tiya ompo mana ano ma se varunafá eriven ma senti vaya iniren mai ánanin ma vákurin nain nanin bantai avúavái siretin tiamenté uno. ⁴⁸Mai máan mi ukhen mino. Mana vanta ano ma má uvarano van ma mana kákan onámaná daró masí ufen námen araven morun kaúden ma simenti upí uren maifin kain araven ontá orun ákona uvin ma má uvá dakaréin ma anon non taaren mai má avékan maen mai vanta ano ákona namun uvantaréin ída varáké iyainíi ukhen mino. ⁴⁹Máan tukhen mifo senti vaya ma iniren ma ída mai ánanin bákuriyain nanin banta mai véi mana vanta ano ma ída simentifó ákona inton para varará ana ma uvareiníi ukharéin ma ínaimpáké non taven ma mai má avékan ma ainen barákuaren namu ma einíi ukhen mino.

**Mana Antareti (100) Aruvin
Banta Kayoi Ayafa Vanta Ano
Ma Mumunan Ein Baya Ino**

(Matiu 8:5-13)

7 Yisasi monó baya ma vanasi siamián kípáren Kapeníamú barufin óden mino. ²Ódíkan mai varufin mana antareti (100) aruvin banta kayoi ayafa vanta ano mana vei miyan ída van doran banta van béi anunu iyaré ein banta kákan aí íkan ádé anantá purono van en mino. ³Purono van iyákan aruvin banta kayoi ayafa vanta ano Yisasin nan evan ne sin baya iniren bei miyan ída varan doran banta eman ayofano van Yutan kayoi ánon banta kéká tiantan Béin oman tiamen mino. ⁴Tiantákan betí Yisasi vaintá oriven ákonaen Béin tiamemí, “Aruvin banta kayoi ayafa vanta mai kama vanta ifo éi kanaíeya véin ayain nono. ⁵Tetí Yudiá kéka san béi anunu iyáken tetinti monó átaru namun beyantá uvantintein banta ino.”

⁶Máa síkan Yisasi vetí ankan má mai má ádé oríkan aruvin banta kayoi ayafa vanta ano vei aronará baya siádan Yisasin me siamemí, “Bafan noe, séi ída kama vantán baruna éi ída kanaíeya séin timápin édan nono. ⁷Máan tukháí séi ída kama vantán báké teyantá ída kanaíé éin o onanté umpo vaya máa vá éi se siná tenti miyan ída van doran bantai aí kípáno. ⁸Téi farava máa siya rauno. Tentá manáa vanta kéká ano yafiká betíi aránaópá téi váken maen manáa aruvin banta kayo ano senti aránaópá báká mana van ma orono sékun maen oriká ena van ma ereno sékun maen eré iyan mino. Tesi miyan ída van doran banta van ma ma yorarí ono sékun maen mai yoran baré iyan mino.”

⁹Máa síkan Yisasi mai vaya van anú duren ben ma yakhafen noré ein nanin banta yovéaren máa sen tiamemí, “Is-areri kékápin ma vantai mumunan ma einí ukhein banta ída mana van mino.”

¹⁰Máa sirákan aruvin banta kayoi ayafa ano ma siantan orikhá ein banta kayo ano evaránen oren mápin o onákan mai miyan ída van doran bantai aí kípakhan mino.

Yisasi Ma Varé Nanin Anin Púkaréin Evaránen Avían Mantein Baya Ino

¹¹Ínainpáké Yisasi Naini se sin kákan barufá oríkan bei eyo iyampon kayo vá kokhon nanin banta vá ano véin bákuren oren mino. ¹²Oriaren mai varui yafu ona ádé o mantaven onákan mana varé nanin mano mana iyampon uró ana kain baren mai iyampon púkaré íkan beni kúkúta manáa vanta kayo ano yaiyóen erákan be anóen má kokhon nanin banta ano vákuren eren mino. ¹³Erákan Bafan mano mai nanin ódaren moéken arunan uren máa sen béin tiamemí, “Ída vá ifídano.”

¹⁴Máa siren béi mai ma fúkein banta ma yaiyen oriyá ein ádé o mantaven kúkútará ayan kaíkan mai ma yaiyen eriyá ein kayo ano o mantavíkan Yisasi semí, “Pumara oe, séi éin nan tiyá umpo orun mantano.” ¹⁵^xMáa síkan mai ma fúká ein pumara ano orun mantaan kumamen araíen baya síkan Yisasi evaránen be anóen amen mino.

¹⁶^yAmirákan minó nanin banta ano Tiyarafenui kákan ákona ódaren akhokho van uaren Tiyarafenu aví daní iyáken temí, “Mana sakhanampa vanta inka setí aúbaná afoká ukhan Tiyarafenu ano vei vanasi aya ono van inka e van mino.” ¹⁷Máa siren banasi ano mai ma Yisasi varein avúavá baya e

siádan Yudiá barafin ma vain baru kayo fimpá bá ádé barafá ina vá mai vaya ano oreraen mino.

Monó Non Péantan Banta Yonin Nú Yisasi Núi Vaya Ino

(*Matiu 11:2-19*)

¹⁸Orera íkan Yonini eyo iyampon kayo ano Yisasi ma variyain dana san béin mo siamen mino. ¹⁹^zTiamirákan Yoni vei eyo iyampon kanan araren Bafan baípa tiantiyen temí, “Tiyarafenu ano ma siantantin erino van ma síkhá ein éi mai vanta fono áa ená tetí ankan ave ótifante rafuno,” sen inaino van tianten mino.

²⁰Tiantákan míkanan mano Yisasi vaintá oriven temí, “Éi nan mo inaino siren monó non péantan banta Yoni ano verasan tisintá eré umpo mai ma Tiyarafenu ano siantantin erino van ma siádan baré ein banta fono áa ená ave ótifante rafuno.”

²¹Maí damú Yisasi ara ara aí daná ma varé ein nanin banta ayofiyáken namu aunan mano ma fákakharéin kayo fin-tena yo siantan namu aunan oriyákan auu ma yufúkukharé ein kéká evará-²²^aMáan iyákan Yisasi evaránen Yonini eyo iyampon kanan tiamemí, “Taréa siré kanan náí yanasá oniyá iniyá iya fono mai vá Yonin mo siameno. Auu ma yufúkukhá ein kayo ano evaránen onákan arantan ma namu ukhá ein kéká ano oríkan aufá ma amon dana aí ma varé ein evaránen kama íkan átaren ma kontaré ein kayo ano vaya iníkan pefá ma fúká ein kéká ano orun mantan maen ona ma ída vain kayo ano kama vaya iniyen en mino. ²³Máan tukhein nan mi vanasi ano ma senti yoran ódaren ma mairá ída eraven ankamin nain kayo ano

^x7:15 1Ki 17:23; 2Ki 4:36 ^y7:16 Ruk 1:68

^z7:19 Íbo 40:7; Mar 3:1; Rev 1:8 ^a7:22 Ais 35:5-6; 61:1; Ruk 4:18

vá amusin ino. Mai kéká anon avu varanten mino.”

²⁴Yonini vaya ma varen erikhá ein bantá kanan orivíkan Yisasi Yonin nan banasi máa sen tiamemí, “Tiretí ankan ma vanta ída van kámá barafá ma oriyaré eona mai náí yanasá onano vará oriyare fono. Uva ano mana ópen ná kayaiyayá onano vará oriyare fono. Ída ino. ²⁵Tiretí ankan náiyasá onano vará oriyare fono. Mana vanta ano kama aúf danasá uren bayá onano van oriyare fono. Ída ino. Kama aúf daná ma ukhein banta kéká ano kin amápin mi váé iyan mino. ²⁶^bMáan té iyan mifo siretí ankan nai yanasá onano vará oriyare fono. Tiretí ankan mana sakhanampa vantán onano van mi oriyare ono. Oriyá enái séi siretin tiamé uno. Minó sakhanampa vanta kayo véi ano esantakhen mino. ²⁷Mai vanta van mi Tiyarafenui vompon dóki ano máa sikharen mino, ‘Ineno. Séi mana vanta siantékun tenti vaya varen éin anuanten

eni aa mo uvíantanten mino.’ *Mar 3:1*

²⁸Téi siretí ankan tiamé uno ma vararákena minó banta Yoni ano esantakhen mifo Tiyarafenu ano ma yafíkein barufin ma sitosí ukhen bain banta anon Yonin esantakhen mino.”

²⁹^cMáa síkan betí ankan mai vaya iniren Yonin ayantá ma non mantaré ein nan ovaren me iniyáken takisi varan kéká bá banasi vá ano semí Tiyarafenui avúavá puntáken mino. ³⁰^dMáan tukhan mifo Farasisi kayo vá man baya ma afová ukhein banta kéká bá ano Tiyarafenui kama ineine oyan amen Yoni ma monó non péantiyain ída mantaren mino.

³¹Máa siren Yisasi evaránen temí, “Taréa ma vain nanin bantai avúavá inte yanákasá tiádante rafuno. Betí inté ukhein nanin bantá ban nafino. ³²Betí

ankan maen arará iyampon kayo ano ma varu aúbaná kumanten ma ena iyampon kayo van ma oovariyáken,

“Tiretí ankan nan danisí ono van mi setí ankan okhaxhan asiýákuya

siretí ída amusin danisí e ono.

Ída amusin e ídiyaonafin mi setí ifisana yékuya

siretí ída ifidiyan ná uno.”

³³Máa siren Yisasi evaránen temí, “monó non péantan banta Yoni ano vereti vá uvaini vá ída niyákaya siretí ankan teya véimpin namu aunan mano van mino siyare ono. ³⁴^eMáa siyaré e nan mi Banta Anin mano saréa eriven uvaini vá dunan má niyákaya siretí ankan teya onano sakisi varan banta kayo vá ume vanta kéká báí aronan báken mi kokhon ná dunan má uvaini vá niyáken óen iyan mino siya ono. ³⁵Tiretí ankan máa siya ompo Tiyarafenui afova ma mantein nanin banta ano vetíi afova ano fura yanasí ukhan mi setin aní iyan mino.

Ume Nanin Mano Ma Yisasin Kama Aunka Iyain Uveri Féantein Baya Ino

³⁶Mana Farasisi vanta ano véin má mo yunan nano van Yisasin arákan mai vanta amápin béi yunan nano van o kumanen mino. ³⁷^fO vákan mana namu avúavá baren noin nanin mano mai varurá bain bákan Yisasi nan Farasisi vanta amápin dunan niyan mino síkan mai nanin mano mana on botorefin kama auna iyain uveri mamaren eren mino. ³⁸Eriaren Yisasin ayompá arantan ma vain ádé o mantaven ífí diyán baren mino. Ifí diyákan auufenté ánu kararen Yisasin arantantá arafúbíkan mai nanin mano ve ánon do fóké arúanten mino. Arúan tiyáken kokhon dádá Yisasin arantan amónaren kama auna

^b7:26 Ruk 1:76 ^c7:29 Ruk 3:12 ^d7:30 Mat 21:32 ^e7:34 Ruk 15:2

^f7:37 Mat 26:7; Mak 14:3; Yon 12:3

ma iyain uveri anan máden béin arantantá péanten mino.

³⁹Máan tiyákan Yisasin ma arákan erein Farasisi vanta ano mai nanin ma variyain danasinta ódaren béi máa sen inemí, “Ma vanta fura sen sakhanampa vanta ma varen ma nanin mano ma ventá ayan kaiyain afová iyáken béini avúavá bá dere afová inainten mino. Ma nanin béi ume yaná baren noin nanin mino.”

⁴⁰Mai Farasisi vantai ineine Yisasi afová iyáken máa sen béin tiamemí, “Saimoni oe, séimpin mana vaya váká éin tiamintó uno.”

Máa síkan Saimoni máa semí, “Aru soe, ei vaya seno.”

⁴¹Máa síkan Yisasi semí, “Kankanan banta ano mana vanta vaípákena moní inantiren mantaren anona evaránen ameno van baren mino. Mana vanta ano yan manápá tauseni (5000) moní barákan ena vanta ano yan manápá antareti (500) moní máa ana varen mino. ⁴²MamáKaren míkanan banta ano ída kanaíen anona mai moní evaránen amirí ukheimpin mai vanta ano míkanan ma mantaré ein ifá uanten mifo éi ma iniyaona vekanán pinté intéa vanta anó béin nan moékentá anunu inten nafino.”

⁴³Máa síkan Saimoni evaránen temí, “Mai ma yan manápá tauseni (5000) ma mantaré ein banta ma ifá uantein mano ino,” síkan Yisasi véin tiamemí,

“Mai eni ineine ano mo funtaren mino.”

⁴⁴Máa siren Yisasi yo vaében mai nanin oniyáken Saimonin tiamemí, “Éi ma nanin oniya fono. En amápin erékuya éi ída sirantan teséin non time nan mi ma nanin manoi ve ánufoí sirantan tesé usintáden be ánon dofókéi yo arútinten mino. ⁴⁵En amápin ma yun bákuya éi ída simó nen nan mi ma nanin mano

anan mai ma éderuna ráké ten tirantampin timónen eriyán ban mino. ⁴⁶Éi ída uveri fétinten nan mi ma nanin manon auna uveri varen me sirantantá banaren pétinten mino. ⁴⁷Máan tukháí séi en tiamé uno. Ma nanin ná teti ódesá afová ó tifano véi sen nan moéken anunu iyákan mi Tiyarafenu ano veni kokhon ume arúanten mino. Arúanten mifo sító ume ma variyá inain bantai ume ma arúantá dantin mai vanta ano sító máarái anunu inten mino.”

⁴⁸Máa siren Yisasi mai nanin máa sen tiamemí, “Eni ume kayo inka séi arúanté uno.”

⁴⁹Máa síkan dunan nan takhoká ma ve má kumantá ein banta kayo ano vetiyan ten orera emí, “Ma vanta véi iye uraná báken ná ume yere arúantiyan nafino.”

⁵⁰^gMáa siyákan Yisasi mai nanin tiamemí, “Eni mumunan mano síkaya Tiyarafenu vá taréa kama e va ompo éi ará kusin masá orono.”

Manáa Nanin Mano Ma Yisasin Bákuren Noré Ein Baya Ino

8 Ínainpáké Yisasi kákan baru kayo fimpá bá tító baru kayo fimpá bá nóken Tiyarafenui yafisin baru fintena kama vaya kayo vanasi siamen oriyákan tiyan míkan mifo sirantan kan orun kádan (12) beni eyo iyampon kayo vá ano véin bákuren noren mino. ²^hBákuren nókan pefá ma Yisasi ano ma manáa nanin kéká pintena ma namu aunan kayo ma yo siantiyan ma aí kípaaantiyan ukharé ein nanin kayo ano véin má oriyaren mino. Oriyákan mai kayo fintena mana Mákdara kena Marian ne sin nanin ma yan manápá ifo afápá kan un kádan namu aunan ma véin pintena yo siantákaré ein nanin má dere maifin oriyaren mino. ³Oriyákan maifin Erotin amáká ma yafisin banta Kusan

aná Yoanan má Susanan má inká ena nanin kayo vá ano vákuren oren mino. Mai nanin kayo ano vetí ina yaná póké Yisasin má bei eyo iyampon kayo vá aya iyákan doraríen noren mino.

**Danayun Ma Fafasin Bantará
Ma Sian Baéádein Baya Ino**

(Matiu 13:1-9; Maki 4:1-9)

⁴ Kokhon nanin banta ano minó baru fáké Yisasi vaintá e átaru uvin mana vaya véi sian baéan betí ankan amen mino. ⁵ “Mana vanta ano vei yunan barafin danayun pafaseno van oren mino. Mo fafasiyákan manáa yanayun mano aasá eravíkan banasi ano arantampó me yasamiyan nun kayo ano e aídiyan nan en mino. ⁶ Manáa yanayun mano ompin eravukharen orun ampamaren barai anu ída vákan mai kayo ano ainen kafuren puren mino. ⁷ Manáa yanayun mano ayankun namampin eravukharen orun ampamin ayankun naman mano úkuaren daramáden mino. ⁸ Máan tiyákan manáa yanayun mano kama varafin eravukharen e ampamaren kokhon ná antareti (100) aran iren mino.”

Yisasi máa siren béi oovaren temí, “Áesin ná átaren ma van nain nanin banta ano vá ma vaya inino.”

**Yisasi Ma Ovaeran Baya Fákena
Ma Sian Amá Ein Baya Ino**

(Matiu 13:10-17; Maki 4:10-12)

⁹ Máa síkan beni eyo iyampon kayo ano véi ma ovaeran baya sikheini ana siamino van béin inaen mino. ¹⁰ Inaíkan béi máa sen temí, “Tiyarafenu ano inka aní ukha vei yafisin baru fintena aúpá baya fefá afová ukha ompo ‘ena nanin banta kayo ano ovaeran baya inídaren onano van kokhon dádá

onanten mifo vetí ankan ída mana yaná onanten mino.

Kokhon dádá iniren mai ana vetí ankan ída afová inten mino.” *Ais 6:9-10*

**Danayun Pafasí Pákenai Ovaeran
Baya Ma Sian Amá Ein Baya Ino**

(Matiu 13:18-23; Maki 4:13-20)

¹¹ Máa siren Yisasi evaránen temi, “Mai vaeran bayai ana máan mi ukhen mino. Danayun mai Tiyarafenui vaya ino. ¹² Mai vaya iniren ma vetí ankan mumunan intin Tiyarafenu ano aviran nae siren ma Ban Anon mano ínaimpáké eriven betin aú pintena mai vaya ma yovariyain mai nanin banta anoi yanayun ma aasá eravé iyain an mi yakhen mino. ¹³ Mai vaya ma iniyákan amusin iyan ma variyain kéká ano on daró ma eravukharéin ma arú ída yan araviyainíi ukhen mino. Betí ankan manáa afokhantá anan mumunan iyaréin ma akhenókain damusí ma íkan betí eraven ankamen Tiyarafenu me ampiren oré iyan mino. ¹⁴ Ayankun namampin ma eravein danayuni ana maen mai vaya iniren ma orein kékái vampin uman má minó daná baran má bara rákena amusin má ano mai kéká pákaan ákona uran ída kama aran íré iyain mino. ¹⁵ Máan té iyan mifo kama varafin ma fafasein danayun an ma yakein kéká ará ano kamaen puntákein kéká anon ákonaen báken mi aran iriyan báe iyan mino.

**Oon Ma Uruan Takhóka Kai
Pákena Ovaeran Baya Ino**

(Maki 4:21-25)

¹⁶ ⁱ Máa siren Yisasi ena ovaeran baya vanasi siamemí, “Mana ano ída kanaíen oon uruan takhó aránaópá kaen maen kurafin kuferen é iyan mifo sakhó darói vákan maen mi vanasi ano fanu ma siyain ódaren ódé iyan mino. ¹⁷ ^j Aupá

ma vain danasinta ano ínaimpáké afoká iyantin maen banasi ano ma yarariyá inain danasinta ano ínaimpáké afokasí intin minó nanin banta ano mai yanasinta afová inten mino. ¹⁸^kMáan tukhein nan mi siretí ankan dafian ákona uveya vá kamaeya veya ineno. Manáa nanin banta ano ma manáa afova yákanтин Ti-yarafenu ano manáa vá aminten mifo intéa nanin banta anó mana afova ída yáken ná mai afova van béi inen ná inká yáké uno siren ma veya ída inin nain mai kéká ina Ti-yarafenu ano minó do varanten mino.”

**Yisasin Anóen Má Be Afá
Kayo Vái Vaya Ino**

(*Matiu 12:46-50; Maki 3:31-35*)

¹⁹Maí damú ana Yisasin anóen má be afá kayo vá ano véin onano van eríkan kokhon nanin banta ano víkavin ída afokhaní ukhan beti ída kanaíen beni ádé oriríen mino. ²⁰Máan tiyákan manáa ano Véin tiamemí, “E anóen má e afá kayo vá éin onano van barurá e ave ukhen mino.”

²¹Máa síkan Yisasi evaránen betin tiamemí, “Tiyarafenui veya ma iniren dakhafiyain nanin banta mai séin tinóen má tifá tiváen má ino.”

**Yisasi Ma Kákan Uva
Yo Siantein Baya Ino**

(*Matiu 8:23-27; Maki 4:35-41*)

²²Maná damú Yisasi vei eyo iyampon kayo siamemí, “Eritifé ma non ekháde mesan ufá oró tifano,” siren betí ankan botifin un kumanen oren mino. ²³Oriyákan Yisasi mai votifin auun bakharen mino. Bavíkan mairá kákan uva uaren békon unen non karantó en

mai votifin un bíkaaren ádé anantá bainairí íkan betí umampin oriríen mino.

²⁴Máan tíkan betí ankan Yisasin mo avoriyan temí, “Bafan noe, Bafan noe, setí ankan ádé anantá non ufurirí iyá uno,” síkan béi orun mantaven mai uva vá kákan non ma karantó iyain má kípano van ákonaen asíkan mai uva vá kákan non ma karantó iyá ein má kípaaren ída evaránen kayaen mino. ²⁵Kípavíkan béi máa sen betin inaemí, “Tiretíí mumunan intesá ukhen nafino.”

Máa síkan mai kéká ano akhokho van iyáken beraran ten oreraemí, “Ma vanta iyé báken ná uva vá non má tiamíkan ná béin oo yayiya nafino.”

**Yisasi Ma Namu Aunan Bain
Banta Ayofein Baya Ino**

(*Matiu 8:28-34; Maki 5:1-20*)

²⁶Máan turen Yisasin má bei eyo iyampon kayo vá Karirí non anki-nafá bain Kerasá^{††} barufá oren mino. ²⁷Oriiven mai voti finté ma káusen non akhempá ma araviyain má ana mana namu aunana pákakhein banta ayá damú avápa váken ída mápin barana vanta masí ukhein pimpá ana varen noré ein má o fóken mino. ²⁸O fókavíkan mai vanta ano Yisasin oniyain avádóden bádiyain ben arantan ádé o vaven oovararen máa semí, “Yisasi oe, éi yan bain Ti-yarafenu Anin mompo éi náisá téin into fono. Téin ída vá namu usintano van mi éin tiamiyá uno.” ²⁹Béi farava vádenaino mai vanta namu aunan mano me ampíren orino van Yisasi fefá tiamíkan mino. Kokhon dádá mai vanta ayan arantantá seni ananpoké damuan ákona uren ma kaúdan maen béi mai seni anan bempáké antádan maen namu

^{††}**8:26** Manáa vompompin Kadarenesi e sen inká ena vompompin Kekesenesi e sen ukhen mino. 8:37 dere vá onano.

^k**8:18** Mat 25:29; Ruk 19:26

aunan kayo ano véin do avíadan kámá barufá oriyaren mino.

³⁰Máan tiyaréin Yisasi véin máa sen inaemí, “E aví iye fino,” síkan pefái mai vanta aúpin kokhon namu aunan kayo varé íkan mai vanta ano máa semí, “Ten tiví kokhon ná aruvin banta kayo ino.” ³¹Máa síkan namu aunan kayo ano váden berai síyan Yisasin tiamemí, “Éi ída vá tetí ankan aron ída van masípin tisintano.”

³²Máa siyan mo onákan ayo fákena fon kayo iyukhen dunan niyaré íkan mai namu aunan kayo ano verai síyan ákonaen Yisasin inaemí, “Éi áesirá mesan pon kayo aúpin oferá tifano,” síkan béi “kana ino” siren ifáin oren mino. ³³“Kana ino” síkan namu aunan kayo ano mai vanta me ampiren pon kayo aúpin ofébíkan mai fon kayo ano ayam-paífen tava uaren ayafin araven nompin orun áduven ufuren puren mino.

³⁴Máan tíkan mai fon kayorá ma yafíkaré ein kéká ano mai yaná ma afoká ein ódaren betí ankan karan oriaren mai vaya e siádan ádé ma vain kákan barufin má akhempá ma vain baru kayo fimpá bá dere oreraen mino. ³⁵Mai vaya orera íkan banasi ano iniren mai ma afoká ukhein daná onano siren minó nanin banta ano evúten oriyaren o onákan mai ma namu aunan kayo ano ma me ampiren orein bantai ineine kama uvíkan aúí daná uren Yisasin arantan ádá kumantan betí ankan akhokho van en mino. ³⁶Akhokho van iyákan mai yaná ma afokáin ontaré ein kéká ano eriven intesá ená mai vanta aú pinté namu aunan mano me ampiren orivin ná kamaen nafi mai vaya vanasi siamin inen mino. ³⁷Tiamíkan Karasá baru rákena nanin banta ano Yisasi ma ákona yorarí ukhein nan betí ankan akhokho van uren

betin me ampiren orino van ákonaen tiyaimpin Yisasi votifin káusen ódiven evaránen oren mino.

³⁸Tiantan Yisasi me onen oriyákan mai ma namu aunan ma fákakharé ein banta ano ven má orono siren iyaní íkan béin evaránen tiantiyon máa semi, ³⁹“Éi evaráne ei varufá oriveya vá mai ma Tiyaarafenu ano ma éin ayaen kama uantein baya vá tesin banasi inino,” síkan mai vanta ano vei varufin oriven eúkiyáken Yisasi ano ma véin ayaen kama uantein baya e siamen oren mino.

**Yisasi Ma Fúká Ein Arinta
Avían Mantén Ma Aí Nanin
Ayofen Ma Ein Baya Ino**

(Matiu 9:18-26; Maki 5:21-43)

⁴⁰Yisasi non ekháden ena ufá oríkan banasi ano véi ma oriyain ave ukharen ben onen amusin en mino. ⁴¹Amusin iyákan mana monó átaru namuntá dáíkein ánon banta Yairasin ne sin mano mairá eriven Yisasin arantampin aron kanan mo yurafúden ben má orino van béin ákonaen inaen mino. ⁴²Parava véin inaen naino véi mana arinta anan dan baren tiyan míkan mifo sirantan kan orun kádan (12) oranáí ukharen aí baren ádé anantá purono van iyan mino. Máa sen ina íkan Yisasi ven má orin kokhon nanin banta ano véin dakhafen mákáká suron uven oren mino. ⁴³Oriyákan maifin mana nanin tiyan míkan mifo sirantan kan orun kádan (12) oranará ena ena yamú biyon aí daná bariyákan^{‡‡} mana vanta ano ída kanaíen béin ayofiyaren mino. ⁴⁴Máan tiyaré íkan mai nanin mano Yisasin ayompá oriven ayan dan orin beni ayá au anamun áton aruvíkan manadá beni nare kípen mino.

^{‡‡}8:43 Kokhon bompompin máa sikhemí, ‘Minó bei moní ayofan bantan amian kípakhan mino.’

⁴⁵Máan tíkan Yisasi máa sen inaemí, “Iye anó téin tiruviya fono,” síkan minó nanin banta ano “ída ino” sen orera íkan Pita semí, “Bafan noe, kokhon ná nanin banta anon éin amáden manten eúkukhen mi avékiyan mino.”

⁴⁶Máa síkan Yisasi semí, “Mana ano séin tiruvin mi senti ákona ano sen me ampiren oriyái afová iyá uno.”

⁴⁷Máa síkan mai nanin mano in-íkan avinantan den ída umerarí eimpin Yisasin arantampin mo aron kan durafúden mátimen minó nanin banta avorá pará ben aruvin ná bei aí ainen kípen nafi mai yaná tiamen mino. ⁴⁸¹Máa síkan Yisasi semí, “Tiraun noe, éini mumunan manon éin ayofen mifo ará kusin masá orono.”

⁴⁹Máa siren Yisasi fara veya siyan bákan monó átaru namuni ánon banta Yairasin amá pinté mana vanta ano eren me véin tiamemí, “E araun inka furen mifo éi ída vá enádá bá arú banta uman ameno.”

⁵⁰Máa síkan Yisasi mai veya iniren mai ánon banta evaránen tiamemí, “Éi ída vá akhokho van eya vá mumunan mana vá ono e araun asefa inten mino.”

⁵¹Máa siren Yisasi mai ánon banta amápin ódiyáken Pitan má Yonin má Yemisin má mai arinta anóe afóen má ana avíaren banasi ída áíkan maifin béin má óden mino. ⁵²Ódíkan pefá ma mápin baré ein nanin banta ano mai arinta van arunaná baren ífí diyan baréin Yisasi vetin máa sen tiamemí, “Béi ída fúken paran auun bakhen mifo sireti ída vá ífí daro.”

⁵³Máa síkan betí ankan mai arinta ma fúkein afová ukhen béin nan inten mino. ⁵⁴Intiyákan Yisasi mai arinta ayan pákaaren máa semí, “Tiraun noe, orun mantano.” ⁵⁵Máa síkan mai arinta aunan mano ovaránen béimpin

eríkan ainen orun mantavin mai arinta yunan amino van Yisasi vetin tiamen mino. ⁵⁶Tiamirákan mai arinta anóen má afóen má ano anú duren akhokho van íkan Yisasi vékanan ákon-aen tiamemí, “Tiré kanan ída vá ma yaná ma afoká ein ena nanin banta siameno.”

Yisasi Vei Eyo Iyampon Kayo Siantan Ma Monó Dorantá Orera Ein Baya Ino

(Matiu 10:5-15; Maki 6:7-13)

9 Yisasi vei eyo iyampon kayo sirantan kan orun kádan (12) ma aran eríkan maen namu aunan ma yo siantan má aí nanin banta ma ayofan ákona vá mai kéká amiyáken ²Tiyarafenui yafisin baru fintena veya siamiyáken uren aí nanin banta ayofano van tiantan oren mino. ³^mTiantan oriyákan Yisasi vetin máa sen tiamemí, “Tireti ankan ída vá unan má bereti vá moní bá ayonta vá bare vá inka ída vá kankanan afuin barano. ⁴Mana varurá ma siretí ankan oriveya mana namumpin ma ódinte vá mai namun mana vá bareya mai namuntesá mai varu me ampire orono. ⁵Mana varu rákena nanin banta ano ma siretin ída e avían be amápin kainti vá mai varu ma me ampire oriya vá arantantáke kayó me fúpá tian karúdesin ná banasi afová ená teti namu é uno sino.” ⁶Máa sirákan eyo iyampon kayo ano varufimpá orera uven kama veya siamiyáken minó akhen pákena aí nanin banta ayofen mino.

Eroti Ma Yisasi Iye Fino Van Ma Afová Ono Van Ina Ein Baya Ino

(Matiu 14:1-2; Maki 6:14-16)

⁷ⁿMáan tiyákan manáa vanta kayo ano siyáken, “Yoni evaránen masí pinté orun mantakhen mino,” siyákan Eroti kamanini ánon banta ano Yisasi ma variyain danasinta van iniren kokhon in-

eine iyákan ⁸manáa kéká ano sen pefá ma vá ein mai sakhanampa vanta kéká pintena mana anon orun mantakhen mino síkan manaá kéká ano sen Iraiyan afoká ukhen mino síkan en mino. ⁹Máa síkan Eroti máa semí, “Téi fefái Yonin amen tíkakhé umpo ma vanta iye uron ná bákkan ná banasi ano véi ma ena yaná dorarí iyain baya siyará iniya rafuno.” Máa siren Yisasin onano van en mino.

Yisasi Ma Yan Manápá Tauseni (5,000) Vanta Yunan Amein Baya Ino

(Matiu 14:13-21; Maki 6:30-44; Yoni 6:1-13)

¹⁰Beni eyo iyampon kayo ano ovará-nen eriven betí ankan ma yoren noré ein baya kayo Yisasin tiamiran betin mana yo avíaren ena nanin banta kéká me ampiren Betsaida se sin kákan barufá oren mino. ¹¹Orivíkan kokhon nanin banta ano Yisasi ma orein afová uren béin bákuren orikan amusin iyáken Tiyarafenui yafisin pintena vaya siamin iniyákan aí ma varé ein kayo ayofen mino.

¹²Inúpasi íkan tiyan míkan mifo sir-antan kan orun kádan (12) beni eyo iyampon kayo ano véi vaintá eriven béin máa sen tiamemí, “Ma ma setí baruna akhempá ída mana nanin banta van mifo éi kaná betin tiantesin ná kákan baru kayo fimpá bá tító baru kayo fimpá bá oriven ná betí yunan má baran ma san dosino.”

¹³Máa síkan Yisasi evaránen betí ankan tiamemí, “Tiretí ano vá mai nanin banta yunan ameno,” síkan betí ankan temí, “Dan manápá bereti vá kankan noyana vá anan dékun ban mifo ena vá dunan o miyaní é ma nanin banta me amente rafuno.” ¹⁴Dan manápá tauseni (5000) fumara vanta vákan Yisasi vei eyo iyampon kayo máa sen tiamemí,

“Mai nanin banta siamesin fifti (50) ano me kumádu kumádu ino.” ¹⁵Máa síkan eyo iyampon kayo ano mai ma seiní íkan minó nanin banta ano kumá-nen mino. ¹⁶Kumamíkan Yisasi mai yan manápá bereti vá kankan noyana vá máden inarufá kakháben Tiyarafenui tusu siren mai vereti vá noyana vá kisik-isi uren dákan bei eyo iyampon kayo ano masiman en mino. ¹⁷Masiman íkan minó nanin banta ano kanafen narákan antan dunan ma fara varé ein eyo iyam-pon kayo ano manafin o éke e éke uan átaru uren tiyan míkan mifo sirantan kan orun kádan (12) basiketi unan kayo víken mino.

Pita Ma Yisasi Nan Tiyarafenu Ano Ma Aní Ukhein Banta Ono Sein Baya Ino

(Matiu 16:13-19; Maki 8:27-29)

¹⁸Maná damú Yisasi veyáká amúkiyan bákkan bei eyo iyampon kayo ano véin má baré íkan béi máa sen betin in-aemí, “Téin nan iye inó banasi ano siyan nafino.”

¹⁹PMáa síkan betí ankan evaránen béin tiamemí, “Manáa kéká ano éin nan monó non péantan banta Yoni ino síkan inká manáa kayo ano Iraiya ino síkan inká manáa ano fara sen pefá ma sakhanampa vanta kayo varé ein pinté mana ano orun mantakhen ne siyan mino.”

²⁰qMáa síkan betí ankan béi máa sen inaemí, “Tiretí ankan téin nan mai iye inó tiya rafono.” Síkan Pita evaránen béin tiamemí, “Tiyarafenu ano ma sian damuádiyáken ma sesi vanasi evarané avirano van tiantékun orintene ma sikhare ein mai vantán éi va ono.”

²¹Máa síkan Yisasi vei eyo iyampon kayo van ída vá ena nanin banta siameño siren ákonaen areuanten mino.

²²rMáa siren béi semí, “Banta Anin mano kokhon uman barantin maen ánon banta kayo vá monó ánon banta kéká bá man baya ma afová ukhein banta kéká bá ano véin oyan amiren aruan pú-dantín maen kanú manaú damusí intín béi evaránen orun mantanten mino.”

²³sMáa siren minó eyo iyampon kayo véi máa sen tiamemí, “Mana nanin banta ano ma séin bákurono van anunu iyan-ten bei anunu maman bararasí uren ná ena ena yamú bei marípo yaa mamaren ná téin bákurino. ²⁴tMana nanin banta ano ma ve aunan pákaan ákona intín béini aunan mano o afeyoranten mifo mana nanin banta ano ma séi nan iniren ma ve aunan ampín nain kayoi aunan mano fara kamaen banten mino. ²⁵Banten mifo mana nanin banta ano ma ma vararakena yanasinta varyiáken ma veyan namuen afeyókantín mai yanasinta ano intesá uren ná béin ayainten nafino. ²⁶uMana nanin banta ano ma senti vaya vá téin ma san ma ayave van iyaré esin ma Banta Anin mano ma vei kákan kakhan má be Afóeni kakhan má kantasí ukhein enisori kayoi kakhan má ma inaimpáké erinten maen mai nanin banta van dere véi ayave van uantanten mino. ²⁷Téi fura urá tiré tiretí ankan tiamiyá uno. Mará ma saréa mantakheona kéká pinté manáa ano ída fúken mi Tiyarafenuí yafisin baru onanten mino.”

**Yisasin Au Vukhafá Ma
Enará Ein Baya Ino**

(*Matiu 17:1-13; Maki 9:2-13*)

²⁸Yisasi mai vaya kayo siran dan manápá ifo afápá kanú manaú un kádan damú esantavíkan Pitan má Yonin má Yemisin má avíaren amúkono van mana

anurá óden mino. ²⁹Ódiven amúkiyan baré íkan béin auná enarasí íkan béini ona ano maman efaní iyan moéken panu sen afayu an den mino. ³⁰⁻³¹vMáan tíkan kankanan banta Mosesin nú Iraiya nú dákó iyain má békanan au fáké moéken panu siyákan Yisasin ma Yerusaremí arintín píaren ma ma vara me ampíren orinaí pákena vaya siyaren mino. ³²wMáa siyákan Pitan má ena eyo iyampon kanan má auunan aí iyaimpin betí ankan auká bakharen orun mantaren Yisasini kakhan má kankanan banta vá ano ma mantakhein onen mino. ³³Oniyákan ma míkanan banta ano Yisasin ma me ampíren oriyákan maen Pita ano máa sen Yisasin tiamemí, “Bafan noe, setí ankan ma mará baruna mai kama ukhen mino. Tetí kanaíé kanú manaú iyon baran namun uvádékun mana éin nina vantín mana Mosesin nina vantín mana Iraiyan nina vantín ino.” Pita mai vaya sen mifo veyan náiesá tiya rafuno sen ída afová ukharen mino.

³⁴Pita mai vaya fara siyan bákan mana konan mano vetí ankan me ukuan dararan akhokho van en mino. ³⁵xAkhokho van iyákan mai konan pinte mana oovaren máa semí, “Ma se sanin pefá aní ukheruna ifo véini vaya vá ineno.” ³⁶Mai vaya ma sian kíparákan Yisasi veyáká ana mairá mantakhan betí ankan óden maí damú ma afokáin onein danasinta veti maí damú ana ída ena nanin banta siamen mino.

**Namu Aunan Bá Ein Iyampon
Ma Yisasi Ayofein Baya Ino**

(*Matiu 17:14-21; Maki 9:14-29*)

³⁷Ená damú Yisasin má Pitan má Yemisin má Yoni má ano mai anuyon me ampíren araviyain má kokhon nanin

^r9:22 Ruk 9:44; 18:32-33 ^s9:23 Mat 10:38; Ruk 14:27

^t9:24 Mat 10:39; Ruk 17:33; Yon 12:25 ^u9:26 Mat 10:33; Ruk 12:9

^v9:30-31 Ruk 9:22 ^w9:32 2Pi 1:16-18 ^x9:35 Ruk 3:22

banta ano vetin má efóken mino. ³⁸Mai aúbanáké mana vanta ano oovaren máa semí, “Aru soe, éi kana eriveyá te sanin onante fono. Mai mana iyampon manan téi yékun baren mino. ³⁹Kokhon damú mana namu aunan mano véin aúpin ódivin maen béi namu vá dákan maen mai ano véin máden antu antu íkan efanten akhare ano ven oo fenté eriyákan maen mai namu aunan mano véin au máden namu uren ída ainen me ampiren orin nainí é iyan mino. ⁴⁰Máan tiyáká téi ákonaé berai sé eni eyo iyampon kayo van mai namu aunan do siantano van tiamiyákun mifo vetí ankan ída kanaíen tiantan nainí iyan mino.”

⁴¹Máa síkan Yisasi semí, “Tiretí ída mumunan in nanin banta kayo ompo siretí ineine vá avúavá bá ída funtáken mifo náí máa yamusá téi siretin má bák-erá tiretí uman bariyá bante rafuno.” Máa siren mai vanta van “E anin avire mará ereno,” sen tiamen mino.

⁴²Máa síkan mai iyampon mano ma Yisasini ádé eríkan maen mai namu aunan mano véin karúdan barará aravúbin béin máden antu antu iyain má Yisasi mai namu aunan asíkan mai iyampon mano evaránen kama uvíkan be afóen amen mino.

**Yisasi Veyan Ma Fúaren E
Mantan Nain Nan Ma Kan
Dádasi En Tein Baya Ino**

(Matiu 17:22-23; Maki 9:30-32)

⁴³Máan túkan minó nanin banta ano Tiyarafenui kákan ákona ódaren akhokho van iyáken Yisasi ma variyain dana san kokhon ineine iyákan Yisasi vei eyo iyampon kayo van máa sen tiamemí, ⁴⁴y“Kamaeya vá átaren kaúde

ma vaya ineno. Banta Anin maen mana ano namuro kéká ayampin avian aminten mino.” ⁴⁵zEyo iyampon kayo ano mai vayai ana ída afová en mino. Mai vayai ana ano vetimpin aúpá bákan ída afová iyáken mi mai vaya inain nan betí ankan akhokho van uren ída véin inaen mino.

**Inaru Yafisimpin Iyé Kákaní Inten
Nafino Ma Sen Ina Ein Baya Ino**

(Matiu 18:1-5; Maki 9:33-37)

⁴⁶aManá damú eyo iyampon kayo ano veraran iye anó o esesí inten nafino siren asive asive iyaren mino. ⁴⁷⁻⁴⁸bMáa siyákan Yisasi vetí ankani ineine afová iyáken mana arará iyampon aviren bei ádé me mantaantáden eyo iyampon kayo máa sen tiamemí, “Iye anó téin nan inireyá mana máan tukhein iyampon arará aya inten nafi mai ano séin mi siya inten mino. Inká iye anó téin tiya inten nafi mai ída séin tiya inten mifo Tifóe ma séin tisintá erikheruna mai véin mi aya inten mino. Para vara seyo, siretí ankampin ma aví ída vain nanin banta anon o esesí inten mino.”

**Iyé Ída Setinti Namuroí Inten Nafino
Mai Setin Tirona Ino Ma Sein Baya Ino**

(Maki 9:38-40)

⁴⁹Máa síkan Yisasini vaya Yoni iniren béin evaránen tiamemí, “Bafan noe, setí ankan onékun mana vanta ano éin avíká namu aunan tiantiyáken éin ída vákuren nói setí ankan mano véin are uantano van é uno.”

⁵⁰cMáa síkan Yisasi véin máa sen tiamemí, “Tiretí ankan ída vá béin airo ananí uantano. Tiretin ma ída namuroí iyain kéká ano mai siretin arona ino.”

Sameriá Kéká Ano Ma Yisasin Oyan Amein Baya Ino

⁵¹ Tiyarafenu ano ma Yisasin evaránen avirantin inarufá ódin nain ádé iyákan Yisasi Yerusaremí orono van ákona inin bariyaren mino. ⁵²⁻⁵³ Béi manáa vanta kéká tiantan minó ben nina yána utaono van mana Sameriá bain barurá oríkan mai varu rákena nanin banta kayo ano afová iyáken béi Yerusaremí orono van mino siren betí amápin ída Yisasin e avian kaen mino. ⁵⁴ ^dMáan tÍkan beni eyo iyampon kanan Yemisin nú Yonin nú ano mai ma Sameriá nanin banta ano ma variyain avúavá baya iniren béin máa sen inaemí, “Bafan noe, éi anunu iyan nona vará tetí ankan inarufákena ira arékun ná morun betin ken kaurinten nafino.”^f ⁵⁵ Máa síkan Yisasi yo vaéaren míkanan asiren ⁵⁶ betí ankan ena varufá oren mino.^{§§}

Yisasin Ánain Dakhafiyan Nan Ma Uman Baran Baya Ino

(Matiu 8:19-22)

⁵⁷ Oriyaré íkan aasákena mana vanta ano Yisasin máa sen tiamemí, “Éi ma orinona akhempá téin má bákuré nonté uno.”

⁵⁸ Máa síkan Yisasi evaránen béin tiamemí, “Afá iyan kayo ina vara ain ban maen nun kayo ina nan báé iyan mifo Banta Anin mano ma avíken baran kanú ída van mino.”

⁵⁹ Máa siren Yisasi ena vanta van temí, “Éi ereya séin dakha fono,” síkan mai vanta ano semí, “Bafan noe, éi áesisá te sifóen nare mo masí uresá ono.”

⁶⁰ Máa síkan Yisasi véin máa sen tiamemí, “Áesin purin nanin banta ano vetiyan ná púkein kéká masí iyantiya éi oriveya Tiyarafenui yafisin baru fintena vaya sian dákó ono.”^{*}

⁶¹ ^eMáa síkan ena vanta ano Yisasin máa sen tiamemí, “Bafan noe, séi en bákurono van ukhé umpo éi kaná áesirá tesi kéká mo susu siantádesá ono.”

⁶² Máa síkan Yisasi evaráne véin tiamemí, “Sitia fákaráken ma ena ena yovaébiyan oyampá ma onan nain kéká ano ída kanaíen Tiyarafenui yafisin baru fintena yorarí inten mino.”

Yisasi Ano Ma Seventi-tu (72) Vantan Avían Kaúden Tiantan Orein Baya Ino

10 ^fInaimpáké Bafan mano seventi-tu (72) vanta avíden beyan ma orono van ukhein barufá tiantan béin anuanten kankanan orirú en mino. ² ^gOriyákan mai kéká máa sen tiamemí, “Dunan anafin kokhon ná dunan afukhakhhan mai yunan ma yuyasin banta kayo ída kokhon ban mifo siretí ankan mai yunan ana afóentasá amúkesin ná béi kanaíen doran banta kéká tiantan tiná mai yunan anafin oriven ná duyasino. ³ ^hTiretí ankan orin nompo vá ineno. Téi siretí ankan afá iyan aúbaná ma sipisipi arará kayo ma siantan oreiní

^f9:54 Tiyarafenui manáa vompon dókifin ena asotúin baya máa sikhemí, “Pefá Iraiya máan tukharen mino.”

^{§§}9:56 Tiyarafenui manáa vompon dókifin ena asotúin baya máa sikhemí, *Béi máa semí, “Tiretí ankan intéa aunan niná bafo mai sireti ída afová ukha ompo Banta Anin mano ída vanasi namu ono van eren mifo véi evaránen avirano van mi eren mino.*

^{*}9:60 Manáa afova vanta kayo ano ma iniyain esé purin maen aú iyampompin ma fúkein mino. Mai rákená furin maen dan bukhafa ma fúkein mino.

^d9:54 2Ki 1:9-16 ^e9:61 1Ki 19:20 ^f10:1 Mak 6:7

[§]10:2 Mat 9:37-38; Yon 4:35 ^h10:3 Mat 10:16

é uno. ⁴ⁱTiretí ankan ída vá moní kain unan má ona khain unan má arantan anamun má bare vá oriyáke mae ída vá aasá ma esantanona nanin banta van bayan mino inúpá ino seno.†

⁵“Oriyare ma mana namumpin ma oferante vá esé aráf in baya vá máa seno, ‘Áesin Tiyarafenu ano vá tire antun ná ará kusin amino.’ ⁶Mai namumpin ma mana ará kusin má bain banta ma vantín maen Tiyarafenuí ará kusin mano mai vanta vá bei kéká bápín banten mifo máan banta ma ída vantín maen Tiyarafenuí ará kusin mai vanta vá bei kéká bápín ída vantén mino. ⁷^jTiretí ankan mai namumpin mana vá bákeya mai finté ma amin nain dunan má non má ana vá nano. Para vara seyo, yoriyá ein banta ano miyan baré iyan mifo siretí ankan ída vá ena namumpin e fere khuve ono.

⁸^kMáan tin nompo siretí ankan ma mana kákan barurá ma oresin ma kama iyáken aviren má naumpin ma mo kaúden ma amin nain dunan ná parav á nano. ⁹Tiretí ankan mai varu rákena aí nanin banta kayo ayofiyáke vá Tiyarafenuí yafisin baru inka siretí ankani ádé erikhein mino seya vá betí tiameno. ¹⁰Tiretí ankan ma mana varufin oresin ma mai varuráké kéká ano ma ída e avían mápín ma kaintiya siretí ankan mai varuí aasá o mantaveya vá máa seno, ¹¹^lTiretí ankani varu rákena kayó ano setí ankan tirantantá dampakhein ma yo fúpá tian karúdanuna anon tiretí ankan aní iyáken mai avúavá ma vareona ano umei e ono’ se vá betin tiamiyákeya vá “Tiyarafenuí yafisin baru inka ádé erikhen mifo siretí ankan kama

e vá ineno,’ seya vá betí ankan tiameno. ¹²^mTéi siretí ankan tiamiyá uno. Banasi ma yaimin damú ma Tiyarafenu ano aní ukheintá ma afoká intin mai varu rákena nanin bantai uman mano Sodomú baru rákena nanin bantai uman esantanten mino.

**Ída Ma Ará Baeran Nain Baru
Kayo Ano Ma Kákan Uman
Baran Nain Baya Ino**

(Matíu 11:20-24)

¹³Máa semí, “Korasínfke nanin banta oe, sirun uron mi ke ono. Betsaidáke nanin banta oe, sirun uron mi ke ompo mana vanta ano ma Taiyá bá Saidoní báí varufin ma oriven máan avúavá daná ma mo afoká intin maen betí ankan kanaíen ará baéden arunaná aúí daná uren amon ánompin kakhufaren kumanten betíí ume van arunan inté ein mino. ¹⁴Banté ein mifo Tiyarafenu ano ma vanasi yaiminton ma aní ukhein damú ma yákó intin tiretin amaniná ma afoká inain uman mano Taiya sú Saidoni úpin ma afoká ukhá ein uman moéken esantanten mino. ¹⁵Máan tinten mifo éi Kapeneamú baru oe, éin iye ano avían dan ayontá kainten nafino. Ída mana ano aviranten mifo pefá ma fúkein nanin bantai varufin manan aravin nono.”

¹⁶ⁿMáa siren Yisasi mai seventi-tu (72) vanta siamemí, “Tiretí ankani vaya ma iniyain nanin banta ano séinti vayan iniyain mifo inká tiretí ma oyan amiyain nanin banta ano mai séin mi oyan timiyain mino. Téin ma oyan timiyain nanin banta ano séin ma sisintá ererunan oyan amiyain mino.”

†**10:4** Ma vaya ana máan mi sikhen mí, ayáká ída o mantakhe vá bano aine vá ore yorano.

ⁱ**10:4** Mat 10:7-14; Mak 6:8-11; Ruk 9:3-5 ^j**10:7** 1Ko 9:6-14; 1Ti 5:18

^k**10:8** 1Ko 10:27 ^l**10:11** Apo 13:51; 18:6

^m**10:12** Esé 19:24-25; Mat 10:15; 11:24 ⁿ**10:16** Mat 10:40; Ruk 9:48; Yon 5:23

**Seventi-tu (72) Vanta Ma Yisasi
Siantan Orikhá ein Kéká Ma
Ovaránen Erein Baya Ino**

¹⁷Ínaimpáké seventi-tu (72) vanta ma siantan orikhá ein kéká ano ovaránen amusin iyan eriven me siamemí, “Bafan noe, setí ankan ma éin aví arékun maen namu aunan kayo ano setinti vaya ánain bákuren mino.”

¹⁸°Máa síkan Yisasi vetí ankan evará-nen tiamemí, “Téi onékun Ban Anon mano inaru me ampíren afayuí ma einíen eraven mino. ¹⁹°Ineno. Téi siretí ankan inka ákona amikheruna sireti kanaíeya osafáe kayo vá banta untaran danasinta vá dasádeya siretí ankan kanaíeya siretíí namuro minó ákona esantaresin béi ída kanaíen tisetíí minó daná namu inten mino. ²⁰°Máan tinten mifo siretí ankan ída vá amusin iyáke seya namu aunan mano setin too yayiyian mino seno. Inarufá ma Tiyarafenu ano ma vei vompon dókifin ma siretin aví uvantein nará amusin ono.

²¹Maí damú Kantá Aunan mano Yisasin arápin amusin amíkan béi máa semí, “Tifóe oe, éi ma vara vá inaru vái Bafan bákeya éi ma kama afova vain kéká ma ma yaná aúmanantádeya ma arará iyampon kayo an dakhein kéká ma aní eona van tusu sé uno. Tifóe oe, éi fura sireya e anunun dakhádeya éi máan te ono.

²²r“Te Sifóe ano minó danái sen tiyampin kaúken mino. Mana ano ída ve Anin afová ukhen mifo ve Afóe ano anan afová ukhan mi inká mana ano ída ve Afóen afová ukhen mifo ve Anin mano ma aní ukhein kéká bá be Anin má ano anan béin afova ukhen mino.”

²³Máa siren Yisasi yo vében bei eyo iyampon kayo oniyáken temí, “Tiretí ankan ma oniyaona yanasinta ma onan nain kéká ano vá amusin ino. ²⁴Pefá kokhon ná sakhanampa vanta kayo vá kokhon ná kin kayo vá ano siretí ma saréa oniyaona yana onano van anunu iyaren mifo ída onen mino. Inká tiretí ma iniyaona vaya ineno van anunu iyaren mifo ída inen mino.”

**Sameriá Banta Ano Ma Kama
Avúavá Mantein Pákana Ma
Ovaékein Baya Ino**

²⁵°Mana man baya ma afová ukhein banta ano Yisasin akhenóka uan onano van orun mantaven béin máa sen in-aemí, “Aru soe, séi intesá uresá para van oriyan ban aunan barante rafuno.”

²⁶Máa síkan Yisasi evaránen béin in-aemí, “Man bayafin intéa vayá bákayá dankaféiya fonó.”

²⁷Síkan man baya ma afova ukhein banta ano evaránen temí, “Tiretí ankani aú amafon má ákona vá ineine vá pokesá pura uró tire vá Bafan Tiyarafenu van anunu iyáke vá *Diu 6:5*

eyan nan ma anunu iyaonaíe vá ena van anunu ono.” *Riv 19:18* ²⁸°Máa síkan Yisasi véin tiamemí, “Mai ma seona mai fura se ompo vá mai ma seonai ureya vá para van aunan barano.”

²⁹Máa síkan man baya ma afová ukhein banta ano veyan nan puntákein banta ino sino van Yisasin máa sen in-aemí, “Man baya ano iyen nará tiretíí arona kayo e sikhen nafino.” ³⁰°Máa síkan Yisasi evaránen béin tiamemí, “Mana vanta ano Yerusaremí me ampíren Yerikó barufá araviyaré íkan umoyan banta kayo ano aasá dafíkaren béin pákaren namu arirí uren beni ona

°10:18 Yon 12:31; Rev 12:8-9 P10:19 Íbo 91:13; Mak 16:18

°10:20 Fir 4:3; Rev 3:5 †10:22 Yon 3:35; 10:15

°10:25 Mat 22:35-40; Ruk 18:18 †10:28 Riv 18:5

varen karan orivíkan béi aasá bakhen ádé anantá purono van iyaren mino. ³¹Mái damú ana mana monó doran banta ano mai aasá dakhafen araviyaren onákan mai vanta ano aasá bakhen bákan akhempá o úkuaren esanten oren mino. ³²Orivíkan mana Rivai vanta ano máan mana en mairá oriaren mai vanta e onen akhempá o úkuaren esanten oren mino. ³³Orivíkan mana Sameriá banta ano mai aintá ana araviyaren mai vanta ma vaintá oriven onen moéken arunan uanten mino. ³⁴Mai vanta van arunan uren béin ádé oriven ben ma arurampin uveri féantiyen uvaini vanaan tiyan uren mai namon damuanten mino. Damuantáden bei donkin daró dauman ka íkan kumamin do aviren aasá ma miyaní uren bariyain namumpin mo kaúden kamaen dafisen mino. ³⁵Dafisen bakharen ená damú mai má afóen kankanan siriva moní amiyáken máa sen tiamemí, “Ma vanta vá éi kama e vá dafiseno. Dafisiyáke ma manáa ei moní ma ventá kípárakaréesi ma séi ovaráné erenté maé éin mai máa moní evaráné amenté uno.”

³⁶Máa siren Yisasi ano man baya ma afova ukhein banta inaeen temí, “Éi ma iniyaona mai máa kanú manaú banta kayo finté intéa vanta anó umoyan banta kayo ano ma aruádan baré ein banta van anunu ukharen nafino.”

³⁷Máa síkan mái vanta ano semí, “Mai ma véin nan arunan uren aya ein banta ino,” síkan Yisasi véin tiamemí, “Éi orive vá máa avúavasá barano.”

Mata Nú Maria Nú Amápin Ma Yisasi O Varé Ein Baya Ino

³⁸Máa siren Yisasi má bei eyo iyampon kayo vá oriyaen mana varurá

onóbíkan mai varu ráke mana Matan ne sin nanin mano Yisasin aviren be amápin oren mino. ³⁹Mo orákan mana Matan aun Marian ne sin nanin baren béi Yisasin arantan ádé o kumanten béini vaya iniyaen mino. ⁴⁰Bayá iniyákan Mata veyáká dunan taran tасusasu iyáken kokhon ineine uvaen Yisasi vaintá oriven béin inaemí, “Bafan noe, se sun mano séin me ampiráká teyan dunan tariyá umpo mai van ídá ovaré iniya fono. Béin tiamesin ná téin me siya ino.”

⁴¹Máa síkan Bafan mano evaránen béin tiamemí, “Mata. Mata oe, éi kokhon dana san ineine iya ompo ⁴²vmana yana san mana vá ineno. Maria kama yanái varano van anunu iyain téi ída kanaíé béin ma varano van iyain daná béin areuantanté uno.”

Yisasi Ma Amúkin Afova Amein Baya Ino

(Matíu 6:9-15; 7:7-11)

11 Maná damú Yisasi mana akhempá amúkiyan baren kípáran mana vei eyo iyampon mano máa sen béin tiamemí, “Bafan noe, fefá ma Yoni ano ma vei eyo iyampon kayo ma amúkin afova ma amikharé einí eya éi setin afova simeno.”

²Máa síkan Yisasi evaránen betí ankan máa sen tiamemí, “Tiretí ankan ma amúkinte vá máan ná teno, “Tifóe oe,[‡] en avisá kantasí intin ná

[‡]11:2 Tiyarafenui manáa vompon dókifin ena asotúin baya máa sikhemí, ‘Inarufá baona Sifóe oe, ...’

^u10:39 Yon 11:1; 12:2-3 ^v10:42 Mat 6:33

éini inaru yafisin ná erino.[¶]

³Mana mana yamúkáke yunan ná timeno. ⁴Éi setinti ume vá ampisintano.

Para vara seyo, ena kayo ano ma sétin umeí usintáká ein ampiantéiyá tiféuno.

Éi ída vá áesí tirá mantan akhenókafin oferá tifano.”[§]

⁵Máa siren betí ankan evaránen tiamemí, “Tiretin aúbanáké mana ano ma veí arona varé intin ma mai vanta vaípa inuran aúban oriven ‘kanú manaú bereti anamun timikaréesí anona evarané amenó’ sinten mino. ⁶Para vara seyo, mana sirona ano ayá káké eriyán baren te simá e vaká béin ma amenuna yunan ída vá uno.’

⁷“Máa sin maen mápin ma vain banta ano evaránen tiamemí, ‘Ten má te sikhafana vá bakhékun ona fefái munkukhein téi ída kanaíe e mantavé éin mana yaná amenté umpo ída vá téin uman timeno.’ ⁸Téi siretí ankan tiamé uno, béi ve arona ifo má afóe ano ída kanaíen orun mantaven bereti aminté ein mifó véi ma ínanen onará ankamiyan bain nan mi má afóe ano orun mantaven minó béi ma inantiyaré ein daná máa aminten mino.

⁹Máan tukhein nan mi siretí ankan tiamé uno. Inantesin maen Tiyarafenu ano kanaíen aminten mino. Dosiyaré esin maen Tiyarafenu ano kanaíen aní intiya ona nono. Onará ma ankamiyaré esin Tiyarafenu ano kanaíen ona yiantanten mino. ¹⁰Para vara seyo, iye anó inantéiyá nafi mai anon baré iyan

mino. Iye anó dosé iyan nafi mai ano oman dákó é iyan mino. Onará ma ankamein dianté iyan mino.

¹¹“Tiretí iyampon afóe yan ma vaonafá ma e anin mano** mana noyana van ma inan tintiya éi kaná mana osafáe aminte fono. ¹²Áa éi vaípa ma kokore amú timeno ma sinti mae iyavan ná dauman aminte fono. ¹³Tireti namu vanta kéká báke ompo sireti akhafana ma kama yaná amin ma afová ukhante mae mai Kantá Aunan nan ma inantinona kékái inaru fáké Afóe ano moéken aminten mino.”

**Yisasi Má Namu Aunani Ánon
Banta Van Ma Beseburi E Ma
Siyain Mái Vaya Ino**

(*Matu 12:22-30; Maki 3:20-27*)

¹⁴Mana vantafin namu aunan báken béin oorá iyádan ída vaya sin baré ein Yisasi ano mai namu aunan do siantan orivin mai vanta ano vaya siyákan banasi ano anúden oreraen mino. ¹⁵^wMáan tiyákan manáa kéká ano semí, “Béi namu aunani ánon banta Beseburini ákonarái namu aunan do siantiyán mino.” ¹⁶^xMáa síkan manáa vanta ano inaru fáké aní daná aní ino van Yisasin akhenókaen mino.

¹⁷Máa siyákan Yisasi vetí ineine fefá afová iyáken máa sen tiamemí, “Mana vantaí yafisin aúpin ma aúban daiminten maen mai avúvá ano kákan uman maman dákó intin inka mana namunté ma aúban daimintin maen mai namun mákúken eravinten mino. ¹⁸Máan tinten mifó Ban Anon mano ma veyan

[¶]11:2 Tiyarafenui Manáa vompon dókifin ena asotúin baya máa sikhemí, “...erino. Inarufá ma en anunu yakhafiyainisá ma varará dere ino.

[§]11:4 Tiyarafenui manáa vompon dókifin ena asotúin baya máa sikhemí, ‘Namu yaná pinte vá téin do sivirano’ áa ‘Ban Anon ayan pinte vá téin do sivirano.’

**11:11 Tiyarafenui manáa vompon dókifin mará ena asotúin baya máa sikhemí, mana veretí van ma inan tintiya éi kaná mana onámaná aminte fono. Áa...”

daimintin maen inté ená beni yafisin ákonaen mantanten nafino. Para vara séi máa siya rauno. Tiretí ankan mano siyáke Beseburini ákonarái namu aunan do siantiyán minon tiyan ná uno. ¹⁹Tare ma namu aunani ánon banta avíká ma séi namu aunan do siantiyáku mae mai siretíí ánain ma yakhafin nain kayo ano iyen avíkásá namu aunan kayo yo siantanten nafino. Mai kayo ano vá tiretíí avúavá daimino. ²⁰Máan tinten mifo Tiyarafenui ákonafó ma namu aunan do siantiyáku maen Tiyarafenui yafisin ákona ano inka sirétimpin erikhen mino.

²¹“Mana ákona vanta ano ma aruvin danasinta utaaren ma ve amáká dafíkantin maen ben nina yanasinta kamaen banten mino. ²²^yBanten mifo mana veni ákona esantakhan nain banta ano ma eriven mai vanta vá aruvúden ma véin aruren maen mi veni aruvin danasinta vá ona vá máden béi ma anunu iyain kékái yaiman aminten mino.

²³^z“Éi iye anó téin má ída vante fono mai éi senti namuro ono. Inka éi iye anó téin ída siyaé banasi avían átaru inte fono mai éi anon banasi intan ne sin orera inten mino.

Namu Aunan Kayo Ano Ma Evaránen Banta Aúpín Oriyain Baya Ino

(Matiu 12:43-45)

²⁴“Mana vanta ma namu aunan mano me ampiren kámá barafá oren maen bei avíkan baru van dosen orin ma avíkan baru ma ída van máa sé iyan mino, ‘Evaráne mai ma me ampire ereruna namun oronté uno.’ ²⁵Máa siren o onákan mai namun bakhari uren puntaádan

baren mino. ²⁶Bantin ma ódaren maen béi evaránen oren dan manápá ifo afápá kan un kádan namu aunan kayo vetíí namu avúavá ano veni namu avúavá esantakhein kayo o avían morantin mai namumpin o vanten mino. Pefá mai vanta ano namu ukharen mifo saréa véi moéken namu uron inten mino.”

Inte Kéká Anó Kákan Amusin Baranten Nafino

²⁷^aMai vaya Yisasi siyákan banasi aúbanáké mana nanin mano oovaren temí, “Éin ma kaúden nan amein nanin mano vá amusin ino.”

²⁸Máa síkan béi evaránen temí, “Tiyarafenui vaya ma iniren oo yayien bákuriyain kéká ano vá amusin ino.”

Yisasi Ano Yonan Pin Ma Aní Daná Afoká Ukhá Ein Baya Sen Mino

(Matiu 12:38-42; Maki 8:12)

²⁹^bMáa siyákan banasi e átaru en kokhoní iyain má Yisasi máa sen betin tiamemí, “Tare má damú ma vain nanin banta mai namu nanin banta ino. Enará ukhein avúavá aní intí onano van ina inten mifo vetíí ankan ída kanaíen mana aní daná onanten mino. Mana sakhanampa vanta Yonani aní daná anan betí onanten mino. ³⁰Máan tukhein nan mi Yona maen Ninivé nanin bantai aní danasí ukháintin pasen Banta Anin mano yere sare ma vain nanin bantai aní danasí inten mino. ³¹^cSaotíkena Kuini ano^{††} vanasii yaimin damú ma yákó intin maen e mantaven má damú ma vain nanin bantai avúavá daíden uman aminten mino. Para vara seyo, mai kuini maen bara akhen páké Soromonini kama afova vaya ineno siren eriven in-

^{††}**11:31** Saotíkena Kuini maen mai Seba kékái kuini ino. Taréa mai vara aví Yemeni e sikhen mino.

^y**11:22** Kor 2:15

^z**11:23** Ruk 9:50

^a**11:27** Ruk 1:28, 42, 48

^b**11:29** Mat 16:4

^c**11:31** 1Ki 10:1-10

ein mifo saréa Soromonin esantakhein mano e van mino. ³² ^dNinivé nanin banta ano orun mantaven maen má damú kena nanin bantai avúavá daíden uman aminnten mino. Para vara seyo, Yona ano ma monó baya vetí ankan tiamin maen mai kéká ano ará baeren mifo saréa mana Yonan esantakhein mi eren mino.

**Auu Ma Vain Mai Au
Vukhafai On Mino**

(Matiu 5:15; 6:22-23)

³³ ^e“Ída mana vanta ano yaamu uruan aúpa safi kavefin nafi kaé iyan mifo yan takhókái kain báken panu sen kakhiyan mi maifin ma ódiyain kayo ano kamaen oné iyan mino. ³⁴ Éin auu ma vain mai eni aúfin ma kakhantan on mi van mifo en auu ma kama ukhan maen minó bukhafafin panu sikha vá ompo auu ma namu intin maen mai minó bukhafan títípa inten mino. ³⁵ Máan tinten mifo éin aúpin ma vain kakhán mano sítípa inafó vá daffian ná ákona ono. ³⁶ Máan tukhein nan mi eni minó bukhafa ma fanu sikhantín ma mana akhempá ída sítípa ukhantín maen mai fanu ano en aúfá daamu ma kheíní inten mino.”

**Yisasi Ma Farasisi Kayo Van
Amaan Baya Sein Mino**

*(Matiu 23:1-36; Maki
12:38-40; Ruku 20:45-47)*

³⁷ Yisasi ma vaya sian kíparan maen mana Farasisi vanta ano véin má mo yunan nano van ina íkan mai vanta amápin óden dunan kaúden nan takhóká un kumanen mino. ³⁸ Un kumamen Yisasi ída ayan tesé inton dunan niyákan mai Farasisi ano kokhon ineine en mino.

³⁹ Kokhon ineine iyákan Bafan mano máa sen tiamemí, “Tiretí Farasisi kayo ano kápi vá disi vá dante anan teséiya ompo siretin aúpin ída avarí avúavá

bá namu avúavá báí vikakhen mino. ⁴⁰ Tiretí óen kéká soe! Ídá mai ma yan bukhafa uvarein mano aú bukhafa vá uvanten nafino. ⁴¹ Máan tukhen mifo mai ma disifin bain danasá ona i van nanin banta amesin ná tiretí minó danasinta avusese ukhen bano.

⁴² “Tiretí Farasisi kayo ano vá dafiseno. Tiretí ankan tiyan míkampintan ma yaídeya Tiyarafenu mana masin man ma yunan ana fintena sító daná ma safofin ase amin dana kayo amiya ompo ída véin anunu iyáke namu avúavá anan bariya ompo kama avúavá banasi uantiya vá Tiyarafenu van anunu ono.

⁴³ “Tiretí Farasisi kayo ano vá dafiseno. Tiretí esé an bain kará mádé monó átaru namun kayofin kumaneno van anunú iyákeya átaru varurá banasi ano kama uren amo sino van manan éiya ono.

⁴⁴ “Tiretí ankan dafíke vá bano. Para vara seyo, furin banta kayo ma aúpá barafin masí uran bákan banasi ano ída onanton ma mai yaró onóbe enóbe iyan ma Tiyarafenu avorá painí ein an mi yakharono.”

⁴⁵ Mana man baya ma afová ukhein banta ano mai vaya iníden Yisasín evaránen tiamemí, “Aru soe, éi ma mai vaya seona mai sétin má inan tinkayan te ono.”

⁴⁶ Maa síkan Yisasi evaránen tiamemí, “Tiretí man baya ma afová ukheona vanta kéká basá dafiseno. Tiretí ankan ma afova amiyaona ano vanasi amaniná kákan uman amenan bariya ompo ída mana yáman kaureya ayaiya ono.

⁴⁷ “Tiretí ankan dafiseno. Tiretin anafu yan mano sakhánampa vanta kéká arin púkaréiyai mai masí kayoi siretí úadíya ono. ⁴⁸ Pefá ma siretin anafu aráo ano ma varein danái sare

siretin avúavá ano aní iyan mifo mai kéká ano sakhanampa vanta kayo aruan púdákái siretí ano mai kayoi masí kama iya va ono. ⁴⁹Mai van mi Tiyarafenu ano vei inimpin tiyáken, “Téi sakhanampa vanta kayo vá baya varen orin banta kéká bá tiantékun betí baípa orintin maen manáa kéká aruan puriyáken inká manáa kéká para uman aminten mino.” ⁵⁰Mai anarái ma vara ma arafen uvarein táké ma furen eriyen baré ein sakhanampa vanta kayoi nare miyan ná tare ma vaona nanin banta ano vá barano. ⁵¹Eborin táké arái uren eriyen maen íkun uan amin takhó bá monó namun aúbaná ma Sekaraiyan eman aruan purein mai kékái nare miyan tare ma vaona nanin banta amanináí afoká intéíi séi siretin tiamiyá uno.

⁵²“Tireti man baya ma afová ukheona vanta kéká ano yafíke vá bano. Mai aasá ma ódiyain kayoi aa iyariya vákeya veti ma kamaen afová uren ódono van iyain do maman karúdiya va ompo siretiyantá ída mai aasá ódikha ono.”

⁵³⁻⁵⁴Máa siren Yisasi mairá me ampiren oriyákan Farasisi kayo vá man baya ma afová ukhein kéká bá ano véin nan aran nan uren ara ara yana san ina iyan Yisasin máká dantin béi intéa vayá tintirá béin pákante rafuno siren daffan ákonaen mino.

Amaan Baya Kayo Vá Ará Ákona Uantan Baya Kayo Vá Ino

(Matiu 10:26-27)

12 Máan tiyákan kokhon tauseni nanin banta e átaru en baru víkaaren makaká uven arantan dasamin maran en mino. Máan tiyákan Yisasi vei eyo iyampon kayo nare máa sen

tiamemí, “Tiretí ankan Farasisi kayoi yisi vará daffan ná ákona ono. Beti ma kampun tiren ma mai vaya ánain ma ída yakhafiyain nan mi siyá uno. ^{2f}Máan tukhantin inte yanasá aúpá dará dantin baré inten nafi mai Tiyarafenu ano maman dákó intin maen inká minó aúpá baya vanasi ano kanaíen afova inten mino. ³Máan tukhen mifo minó baya ma siretí ankan dunteimpin ma siyaré esin maen mai vaya minó nanin banta ano karái ininten mino. Minó baya ma siretí ankan ma aúpá mápin ma kafaya sikharé esin maen mai vaya má amon táké oovaren banasi siaminten mino.”

Namuro Kayo Van Ma Ída Feran Baya Ino

(Matiu 10:26-31)

⁴Máa siren Yisasi evaránen tiamemí, “Te sirona kéka soe, séi siretin tiamé uno. Tiretí ída vá dan bukhafa máa ma aruan puré iyain kéka san perano. Ínaimpáké beti ída evaránen kanaíen mana yanasí inten mino. ⁵Máan tukhen mifo iyen nará perante fono mai séi siretin tiamenté uno. Tiyarafenu vará tiretí ankan perano. Tiyarafenu ano ma vanta aruan púden maen béimpin ákona vákan uman baren berai siyan purin barufin karú-danti aravin nompo vá Tiyarafenu van mana vá perano. ⁶Tuenti toya máafó ma yan manápá nun arará máa ma miyaní é iyain tiretí afová ukha ono. Mai nun arará kayo fintena Tiyarafenu ano ída mana áuné iyan mino. ⁷⁸Máan tukhan mi Tiyarafenu ano siretin ánon do minó dan káan kípáren tiretí ankan minó afova suron ukhen mino. Máan tukhen mifo siretí ankan manon kokhon nun arará kayo esantare kákaní ukha ono.

Yisasini Vaya Sin Nan Ma Ída Ayave In Baya Ino

(*Matiu 10:32-33; 12:32; 10:19-20*)

⁸Máa siren Yisasi evaránen temí, “Téi siretí ankan tiamé uno. Mana nanin banta ano ma sen nan beni kékápin bá uno ma sintin maen mai Banta Anin má ano yeren Tiyarafenui enisori kayo avorá bá tiamen ma véi senti kékápin bain nanin banta ino sinten mino. ⁹Máa sinten mifo mana vanta ano ma se nan beni kéká pinte vanta séi ída vá uno ma sintí maé ten má deren Tiyarafenui enisori kéká avorá béi nan ída sentina ino senté uno. ¹⁰Inká banasi ano ma Banta Anin nan ma oyampá baya sinteya mai ume Tiyarafenu ano ampiantanten mifo Kantá Aunan ma oyampá baya sinteya mai ume Tiyarafenu ano ída kanaíen ampiantanten mino.

¹¹^h“Máan tinten mifo vetí ankan ma siretin aviren monó átaru namun kayofin ná orinten nafi áa kamanin kayo vá aví bain banta kéká bá avora safi ma aviren orintiya inte vayá anona evaráné tente rafuno. Máa sireya ída vá perano. ¹²Maí áaurá anan Kantá Aunan manon mai ma vetin evaráne siaminona vaya siretí ankan afova aminten mino.”

Ída Kama Inin Bain Moní Bantai Ovaeran Baya Ino

¹³Máa siyákan mai nanin banta áubanáké mana vanta ano máa sen Yisasin tiamemí, “Aru soe, se siváen tiamésin ná berasan tifóe ma furiyáken me kaúntintein danasinta aúban daíden ná timino.”

¹⁴Máa síkan Yisasi evaránen mai vanta máa inaemí, “Iye ano séi nan tire anavasani ona van daíde vá masiman uan ameno siren ná mai yoran timikhen nafino.” ¹⁵ⁱMáa siren béi

vanasi siamemí, “Tiretí ankan kokhon daná kaúdakeya ena vá moéke varano van inampo mai minó eina yanasintará ída kanaíeya aunan bara nampo yaffaná ákona ono.”

¹⁶Máa siren béi ena vaya vetin tian baéan amemí, “Mana moní bantai yunan anafin kokhon ná dunan aran intaren mino. ¹⁷Máan tukhan mai vanta ano veyan ovaren me ineine emí, “Tesi yunan ma kaonuna namun ída kanaí ukhen mifo séi intesá onte rafuno.”

¹⁸Máa sen iniren mai vanta ano semí, “Téi máan tonté uno. Tesi yunan kain namun kayo minó barákuré evaráné kákan má kayo uvádé maifin tesi uviti aran má minó kama yanasinta vá átaru uan kaonté uno.” ¹⁹Máan ma uré maé teyan nan máan mi senté uno. Téi kokhon oranará ma van kama yanasinta inka kaeruna sivikiyá báké kákan dunan má non má niyáké timusin iyá banté uno.”

²⁰Máa síkan maen Tiyarafenu ano véin tiamemí, “Éi óen banta oe. Sare inuran mana vá purono. Éi ma fúbesin maen iye anó éi ma o éke e éke uan átaru uádeona yanasinta varanten nafino.”

²¹^jMáa siren Yisasi semí, “Kokhon danasinta ma o éke e éke uan átaru iyan bain kékápin mi ma yaná afoká inten mifo Tiyarafenu avorá betí ankan ída ona vain kéká an mi yakhen mino.”

Ída Ma Kokhon Ineine In Baya Ino

(*Matiu 6:25-34*)

²²Máa siren Yisasi vei eyo iyampon kayo máa sen tiamemí, “Máan tukhen ná séi siretin tiamé uno. Tiretí van nan ída vá kokhon ineine ureya máa seno, “Tetí ankan náinasá nante rafuno.” Inká tiretí ankan ída vá tiretí au van kokhon ineine ureya vá máa seno, “Tetí náí suí danasá uré bá tifante rafuno.” ²³Ayun ma fara van aunan mano yunan esan-

takhan maen inká au ano auí daná esantakhen mino. ²⁴Tiretí ankan kame kayo vá onano. Betíi yunan ma yóden duyáden ma má uváden kain ída van mifo Tiyarafenu anon betin dunan amé iyan mino. Tireti vanasi ano Tiyarafenu avorá nun kayo esantakha ono. ²⁵Máan tukhen mifo ayáká bantó uno sire ma kokhon ineine iya vanteya mae kanafená mai inin mano eni van asotú uantante nafino. Ída uron mino. ²⁶Máan tukhanti siretí ankan ma ída kanafeya sító daná ma varanteya faraé tireyá ena kokhon danasinta van ineine iyá ba fono.

²⁷Paravan ma ampantein ná kamaeya vá onano. Betíi yavaráe ída uvaré iyan mifo séi sirétin tiamé uno. Kin Soromonini kama auí daná ano mana faravan má ída manaí ukhen mino. ²⁸Titó mumunan bain nanin banta oe! Afova sá ono. Taréa varé intin inuran tükaren ira saran nain káta ma Tiyarafenu ano auí uantiyantiya mai káta kayo esantaren mi siretin auí daná aminten mifo ²⁹siretí ankan ída vá náí yunan ná nante rafu náí non ná nante rafu sireya kokhon ineine iya vá bano. ³⁰Ída ma mumunan in nanin banta ano kokhon ineine iyáken mai yansinta van dosé iyan mifo siretí Afóe ano inaru fákei mai yanasinta van mi iyaono sen pefái afová ukhen mino. ³¹Máan tukhen mifo veni yafisin baru van ma yosesin maen minó dana san ma iyaona aminten mino.

Moní Bá Ona Vá Ma Kaiyan Ban Baya Ino

(Matíu 6:19-21)

³²“Máan tinten mifo sanáa sipisipi ma vaona ano ída vá perano. Tiretí Afóe ma inarufá bain mano amusin iyáken inaru yafisin tiretin ameno van tikhen mino.

³³^kÁesin ná ena kayo ano en nina yanasinta miyaní uaranti vá mai moní ona ma ída van bain kékasá ameno. Máan ma inteya moní ma kain unan ída ainen dáke iyain mi siretiyantá uvaran nono. Ída manáa yaná afeyorantin umoyan banta ano ída varantin minó daná ída antan danú nan baru inarufasá tiretí ina yanasinta ka ono. ³⁴Máan tukhen mifo siretíi kama yanasinta ma kaesin ban nain barufin mi siretíi kákan inin banten mino.

Daffian Ákona Ukhen Ma Van Baya Ino

³⁵^lMáa siren Yisasi evaránen temí, “Tiretí ankan Tiyarafenui yorariín ona ureya siretíi oon áesin para kiyantiya utaare vá bano. ³⁶Kákan banta ano ma anasíi in omápin orikhan ma ereno van iyákan ma vei yoran banta kéká ano ma véi ma onará me ankamintí ainé ona yiantano van ave einisá tiretí ankan ono. ³⁷Ída auun baranton ma auu sapé ukharé intin ma kákan banta ano ma eren ma e onan nain doran banta kéká ano vá amusin ino. Kákan banta ano veyantái yunan kuvin ona uren betin tintin dunan nan takhóká kumanintin maen dunan kuan aminten mino. ³⁸Máan tinten mifo yo kakhano siren ma araf in kókore ma asiyain áaurá ma kákan mano eriyaren e onantín ma yoran banta kayo ano ma ída auun baran para varé inten amusin ná ino. ³⁹^mMáan tukhein nará tiretí ankan ma yanasá afová ono. Umoyan banta ano ma erin nain áau ma má afóe ano afová uren maen ída ifá intin mai umoyan banta ano ven amá me varákuren un peranten mino. ⁴⁰Banta Anin nan ída erinten mino se siretí ankan ininona yamúí vei erinten mifo sireti utaare vá bano.”

**Kama Yorán Banta Vá Namu
Yorán Banta Vái Vaya Ino**

(Matiu 24:45-51)

⁴¹ Maa síkan Pita evaránen Yisasi in-aemí, “Bafan noe, setin maná mai vaeran baya sisimiya fono áa minó basa fino.”

⁴² Maa sen ina íkan Bafan mano evará-nen tiamemí, “Intéa yafisin banta anó kama ineine vákan ná bei yoran kamaen doriyaré inten nafino. Ayafa ano máan dafisin bantan tíkan bei yoran banta kay-orá dafisiyáken dunan amin áaú ma íkan maen dunan masiman uan doran banta kayo amé iyan mino. ⁴³ Máan dorarí ma iyáin nain doran banta ma vei ayafa ano eren ma eman onan nain mano vá amusin ino. ⁴⁴ ⁿTéi fura siré tiretí ankan tiamé uno. Ayafa vanta ano mai vantán tintin minó ben nina yanáká dafisinten mino. ⁴⁵ Máan tinten mifo mai yoran banta ano ma ve aúpin ovaren ineine iyáken ma sesi ayafa ída ainen erinten mino siren ma araíen be arona yoran nanin banta ma ankamiyáken dunan niyan non nen óen inten mino. ⁴⁶ Máan tiyaré intin ma maná damú mai yoran banta ano ída afová en útakharé inain áaurá ma vei ayafa vanta erinten maen mai yoran banta me aruren tíka síka uren ída ma mumunan in nanin banta vá mana varufin kainten mino.

⁴⁷ ^o“Inká mana yoran banta ano vei ayafa vantái anunu afová ukhen ma ída veni anunu ánain bákuriyáken ma ída utaaren baré intin maen mai yoran banta kokhon dádá ankaminten mino. ⁴⁸ Máan tinten mifo mana yoran banta ano ma ída vei ayafa vantái avúavá afová ukhen ma yafiyó ankamoren avúavá ukharé intin maen mai ayafa vanta ano manáa yádái ankaminten mino. Tiya rafenu ano ma kákan avu amikharé inain nanin

banta vaípákena evaránen ena kéká ayain nan onanten mino. Tiya rafenu ano ma kákan ákona amikharé inain nanin banta vaípákena moéken ma yókaré in-ain ákona van evaránen ina inten mino.”

**Yisasi Ída Kusin Baren Eren
Mifo Vanasi Aúban Daimin
Mi Varen Eren Mino**

(Matiu 10:34-36)

⁴⁹ Maa siren Yisasi evaránen temí, “Téi ma varará ira iniseno van mi ereruna mai ira ano ainen kano van mumpo ída kiyán mino. ⁵⁰ ^pTéi ma uman baré barafin aravonuna non peranté uno. Mai non téi ída fékékun tirá ano uman uron diyá uno. ⁵¹ Téi ma erikheruna van ma vara rákena minó aruvin kípaaantano van mi erikhen minó teyá tiretí ankan iniya rafono. Ída ino. Téi siretí ankan tiamé uno. Banasi aúban dai-mono van mi séi erikhé uno. ⁵² Taréa ráké ma orin nain mai yan manápá antun mano ma mana namumpin baren maen mai antun mano yaíden kankanan mano manápá okhá bintin kanú manaú ano enafá ekhá bintin uven namuroí uantán maran inten mino. ⁵³ ^qMáan ma intin maen be afóe ano ve anin namuroí uantantin be anin mano ve afóen namuroí uantantin inká be anóe ano ve araun namuroí uantantin be araun mano ve anóen namuroí uantantin anasi anafú ano ve anafú namuroí uantantin be anafú ano anasi anafú namuroí uantantin mino.”

**Aní Danasinta Ma Yaíden
Afováin Baya Ino**

(Matiu 16:2-3)

⁵⁴ Maa siren Yisasi kokhon nanin banta máa sen tiamemí, “Áau orun perápá ma konan édavíka mae ainen á

ⁿ12:44 Mat 25:21, 23 ^o12:47 Yem 4:17 ^p12:50 Mak 10:38-39

^q12:53 Mai 7:6

danten mino sen nan maen á dé iyan mino. ⁵⁵Inká tiretí ankan onen nan ma sautíké ákona uva ma eríka maeya kákan á kanten mino ma sen nan maen kákantá á ké iyan mino. ⁵⁶Tireti kampun baya sire ída mai ánain dakhafin nanin banta ono. Minan ayontá bá barará bá ma afoká iyain dasaintai ana yaíden afová éiya ompo náí vará taréa ma afoká iyain dasainta ana ma yaimin avúavá tireti ída afová ukhera fono.

Puntákein Avúavá Pó Ma Ará Manafiní In Baya Ino

(Matíu 5:25-26)

⁵⁷“Pará puntákein avúavá tiretíyan ída yaídeya afova variya fono. ⁵⁸Mana vanta ano ma éin kó tiantano van ma oriyanti vá ben má aayanafasá aine vaya sire siná ará kusintin ná ará manafiní inai fo éi ma ída máan tesin maen éin aviren mo kó banta ayampin kaintin kó banta ano firipo ayampin kaintin piripo ano avían mo karavusi namumpin kaintin mino. ⁵⁹Téi fura siré éin tiamé uno, éi ída karavusi namun pinte aineya erin nampo éin ma miyan aví tiantákaré inain miyan ma sipá karúdaan kípá nona yamúí erin nono.”

Ída Ma Ará Baeranteya Purin Nono

13 Yisasi vei vaya sian kíparan Karirifá ma manáa vanta kayo ano Tiyarafenu íkun uan amiyáin ma Pairotí ano ma vei aruvin banta kéká tiantan ma Kariri vanta kéká ma mo arein mai kayoi nare vá Tiyarafenu ma íkun uan amin tafúnai nare vá ma manafin ópé ein baya mai kéká pinté evaránen Yisasin tiamen mino. ^{2r}Máa síkan Yisasi evaránen betí ankan tiamemí, “Mai Karirí nanin banta kayo ano ma mai uman barein nan tiretí ankan ma iniyaona vetí ano ena Karirí nanin banta

esantaren moéken umeíin kéká inó tiya rafono. ³Ída uron mino. Tiretí ankan ma ída ará baeranteya siretin má deren mai uman bare furin nono. ⁴Siroamí ma ayá ayá namun baré ein mano ma varákuáken eitini (18) vanta yararan ma furein nan ma siretí iniyaona anó Yerusaremí ma vain nanin banta ano ma namu avúavá bariyain esantaren ná bariyaren nafino. ⁵Ída uron mino. Tiretí ankan ma ída ará baeranteya siretin má deren mai uman bare furin nono.”

Fiki Yaa Ana Ma Ída Aran Ireintá Ma Ovaéadan Baya Ino

⁶Máa siren béi mana ovaeran baya siamemí, “Mana vanta ano vei uvaini yunan barafin mana fiki yaa ana yódan baré íkan mai vanta ano aran intein onano van oriyan baren o onákan ída mana aran intaren mino. ^{7s}Máan tukheimpin mai yunan anará ma yafíkein doran banta véi máa sen tiamemí, ‘Kanú manaú oranarái ma fiki yaa ana séi o oné erékun béi fasavifái váken bara anu variyan ban ída mana aran iriyan mifo síkaan karúdana.’

^{8t}Máa síkan mai yoran banta ano véin evaránen tiamemí, ‘Kákan banta oe, mana oanará bá áesin para vantí mai anafin kanan ariyá kao ara kaúan onano. ⁹Máan tékun ma ena oranafin ma aran iranten mai kama inten mifo ída ma aran iranti mae síkaan karúdan nono.”

Yisasi Ano Ma Ayorun Davénakhein Nanin Sabati Yamú Ayofein Baya Ino

¹⁰Mana Sabati yamú Yisasi mana monó átaru namumpin banasi monó baya siamiyaren mino. ¹¹Tiamiyákan eitini (18) oranará mana namu aunan mano fákaan ákona uran bain nanin má dere maifin baren mino. Bákan mai namu aunan mano véin ayorun punkan-

tan ída kanaíen béi funtáden mantiyaren mino. ¹²Máan tiyá íkan Yisasi véin óden aran eríkan máa sen tiamemí, “Éini aí inka séi kípaaaté uno.” ¹³Máa siren be ayan kain orin mai nanin ayorun aru-viyain má ainen puntáben orun mantaaren Ti yarafenu aví daníen mino.

¹⁴ ^uMáan tikan monó átaru namuntá ma ánoní ukhein banta ano Yisasi ma Sabati yamú ayofiyain nan aranan uren máa sen banasi siamemí, “Dan manápá ifo afápá mana un kádan damú yoran damú ban mifo maí damú kayofin ná eresin ayofana ifo ída vá Sabati yamú ereno.”

¹⁵ ^vMáa síkan Bafan mano evaránen béin tiamemí, “Tireti kampun baya sire ída mai ánain dakhafin nanin banta ono. Tiretíi vaya vá avúavá bá ano ída manáf ukhen mino. Sabati yamú tiréti ídá kao vá donkin mái má ona yiantádeyá non nano van anan utúantádeyá avire oréiya rafono. ¹⁶Ma nanin maen Abaraamun araun mi Ban Anon mano eitini (18) oranará pákaádan baren mifo mai ma véin pákaádan baré ein daná ma yo varantó iyaruna mai ídá Sabati yamú barante rafuno.”

¹⁷Máa síkan beni namuro kayo ano ayavevan en mifo vanasi ano mai ma kama yanasinta ma véi varein nan amusin en mino.

Mastati Arantá Ma Ovaéádan Baya Ino

(Matiu 13:31-32; Maki 4:30-32)

¹⁸Máa siren Yisasi evaránen inaemí, “Tiyarafenui yafisin baru ano intéa yaná aná dakhen nafino. Intéa yanákasá tian baerante rafuno. ¹⁹Mai ano mana Mastati yaa aran ma ein an dakhani mi mana vanta ano varen bei yunan barafin mo yódákaréin mai ano e ampamaren kákan

daafí uvíkan ayompin ma noin nun kayo ano mai yaa ayan kayorá mo nan uvaren mino.”

Yisirá Ma Ovaéádan Baya Ino

(Matiu 13:33)

²⁰Máa siren Yisasi evaránen inaemí, “Téi intéa yanákasá Ti yarafenui yafisin baru sian baéádante rafuno. ²¹Mai ano yisi ma ein an dakhani mi mana nanin mano ma máden kokhon paravá bá manafin opé uren ma upí uran maen mai ano mai faravápin oreraen pameiníi ukhen mino.”

Titó Onai Vaya Ino

(Matiu 7:13-14, 21-23)

²²Máa siren Yisasi Yerusalemí aayana oriyáken mai akhempá ma sító baru vá kákan baru kayo vá ma vain pimpá e monó baya siamen oriyaren mino. ²³E siamen oriyákan manáa kéká ano véin máa sen inaemí, “Bafan noe, manáa nanin banta aná Ti yarafenu ano evaránen aviranten nafino.”

Máa síkan béi evaránen betin tiamemí, ²⁴“Ayampa máareya vá tító onafin ódono. Kokhon mano ódono van iyái séi sirétin tiamiyá umpo vetí ída kanaíen ódinten mino. ²⁵ ^wManá damusí ma intin má afóe ano e mantaaren má ona ma munkurantiya siretí ankan barufá e mantaveya verai siyáke onará ankamesin maen béi evaránen tiretin máa sen tiaminten mino, “Tiréti inte fákesá eriya vae. Mai séi ída siretin afová ukhé uno.”

²⁶“Máa ma sintiya siretí ankan evaráne véin máa se siamin nono, “Tetí ankan éin má manafin dunan má non má niyákuya setisi aasá éi oriveya monó baya sisimiya ono.”

²⁷ ^x“Máa sesin maen béi evaránen tinten mino, “Tiretí inte fákena kékasá ere

^u13:14 Eks 20:9-10; Diu 5:13-14 ^v13:15 Ruk 14:5 ^w13:25 Mat 25:10-12

^x13:27 Íbo 6:8

vae. Mai séi ída afová ukhé umpo siretí namu avúavá baran kéká ompo minó ano sífó ono.’

²⁸y^a“Máa ma siren tirétin tiantantiya mai ma uman baren berai sin barufin orun bákeya Tiyarafenui yafisin barufin onesin maen Abaraamun má Aisakin má Yekopun má minó sakhnampa vanta kayo vá ma maifin bantiya siretí ankan kákan ífí diyákeya aveantuntá inkekípa nono. ²⁹z^aMáan ma iyasín maen ma varai áau e uní pákena vá áau orun perá pákena vá saotíke vá notíke nanin banta ano ere ere uven maen Tiyarafenui yafisin barufin ma vain omápin e varu varen kumamen mai yunan nanten mino. ³⁰a^aMáan tukhein nan mi saréa ma ínainí ukhein kéká ano un aní intin maen aní ma ukháin nain kéká ano evaránen ínainí inten mino.”

Yisasi Ma Yerusaremí Baru Van Arunaná Barein Baya Ino

(Matiu 23:37-39)

³¹Maí damú ana manáa Farasisi kéká ano Yisasi vaintá eriven béin máa sen tiamemí, “Eroti ano éin arono van iyan mifo éi ma varu me ampireya ena akhempá orono.”

³²Máa síkan Yisasi evaránen betin tiamemí, “Tiretí ankan oreya mai afá iyan mo máa sevá tiameno, “Taréa vá inuran má téi namu aunan kayo yo siantiyáké maé aí nanin banta kéká ayofanté umpo kanú manaú damusí ma intíi sesi yoran kípanté uno.’ ³³Máan ton-téi saréa vá inuran má ídamú bá téi fara oronté uno. Mai fara vara seyo, sakhnampa vanta ano ída Yerusaremí ankinafá o furinte mifo véi Yerusaremí anan purinten mino.

³⁴Yerusaremi oe, Yerusaremi oe, éi ano sakhnampa vanta kayo arureya Tiyarafenu ano ma éi vaipá tiantein banta kéká onámaná ankádeya iyan ná náimáa yádasá téi enan tirun nan urerá en akhafana o éke e éke uan anasi kókore ano ma ve ayampin deíní iyáku ompo siretí ída anunu iya ono. ³⁵Onano. Tiretí ankani varu saréa ída yafisé toyan amirékun namu ukhen para vanten mino. Téin ída evaráne son nan bareya máa sin nono, ‘Bafan avíká ma eriyain banta vá Tiyarafenu ano avu ino.” *Íbo 118:26*

Yisasi Ma Farasisi Vanta Amá O Varéei Pákena Vaya Ino

14 Mana Sabati yamú Yisasi ano mana Farasisi kayoi ánon banta amá mo yunan niyákan betí ankan mano véintá daffan ákonaen mino. ²Máan tiyákan mana au famin aí bain banta ano maifin béin ádé baren mino. ³b^bBákan Yisasi máa sen Farasisi kéká bá man baya ma afová ukhein kayo vá inaemí, “Sabati yamú kaná aí nanin banta ayofanten nafino áa ída fino.” ⁴Máa síkan betí ankan púkekhaben ída mana vaya siamiyaimpin Yisasi mai vanta au fákaren beni aí kípaaantáden tiantan oren mino.

⁵c^cOrivíkan béi máa sen betí ankan inaemí, “Tiretí ankan pinté mana ano ma mana ain iyampon nafí^{††} burumákao fi ma yaká esin Sabati yamú ma non bain masípin ma áduvintiya éi ída aineya orun darifaádan akhempá édan-ten nafino.” ⁶Máa sen ina íkan betí ankan ída mana vaya sen mino.

††14:5 Manáa vompon dókifin *donkin* ne sikhen mino.

y13:28 Mat 8:11-12

z13:29 Íbo 107:3

a13:30 Mat 19:30

b14:3 Ruk 6:9

c14:5 Mat 12:11; Ruk 13:15

Tiretiyan Ma Maman Bararasí In Baya Ino

⁷Máan tiyákan mai omápin ma erikharé ein kayo onákan dunan nan takhói an karáká ana kumaniyaimpin béi máa sen betin ma vaya ovaéden tiamen mino. ⁸^d“Mana vanta ano ma anasi iran omápin ma éin arantiya ma orinte ída vá esé karáká o khumaneno. Éin esantakhein banta vá deren arakhanten mino. ⁹Máan tukhá esin maen tirekánan ma arein banta ano ma ínaimpáké erintin ei kará ma vanta ameno sintiya éi kákan ayave van iyáke ínaintena karáká o khumanin nono. ¹⁰Máan tinafo vá omáká ma aranti orikhe mae oyampá ma vain karakasá o khumantá esin ná mai omá afóe ano ma onanten maen ‘tirona oe, manteya an bain karáká un kumaneno’ sinti ma un kuman esin maifin ma varé inain kéká ano ma onanti vá kákan bí barano. ¹¹^eBaran nompo ve aví ma maman daní inain kéká Tiyarafenu ano maman bararasí inte mifo ve aví ma maman bararasí in nain kéká Tiyarafenun ano kákan bí aminten mino.”

Éi Ma Anona Ída Ameren Kéká Ma Amí Pákena Vaya Ino

¹²Máa siren dunan me nano van ma ven arein banta máa sen tiamemí, “Éi ma mana omasí iyákeya éi ída vá e arona fi e afá aváe fi e anóe afóeni kéká safi e ádé ma moní nanin banta vain nafi arano. Éi ma arakharé esin maen éin e araan betí ankani omápin kaúden anona evará- nen dunan aminten mino. ¹³Máan tinten mifo éi ma kákan omasí ma inte vá minó daná ma ída van nanin banta vá au ma namu ukhein kayo vá arantan ma namu ukhein kayo vá auu yufúkukhein

kayo vá ana vá arakháesin ¹⁴^fma éin ída evaránen amintiya vá éi amusin ná ono ínaimpá ma funtákein nanin banta ma orun mantan nain damúí Tiyarafenu ano éin evaránen amusin aminten mino.”

Kákan Omáká Ma Ovaeran Baya Ino (Matu 22:1-10)

¹⁵^gMáa síkan mai ma véin má dunan niyaré ein kayo finté mana vanta ano mai vaya iniren máa sen Yisasin tiamemí, “Tiyarafenuí yafisin barufin ma omasí inaimpin ma o khumamen dunan nan nain nanin banta ano vá amusin ino.”

¹⁶Máa síkan Yisasi evaránen béin tiamemí, “Mana vanta ano kákan dunan taranton iyáken mai omápin kokhon nanin bantan aren mino. ¹⁷Arakharen mai ma kákan dunan taran damusín pefá ma arakhá ein nanin banta van inka minó dunan taman úbefaráken ariyan ne sen tiamino van mai vanta ano vei yoran banta siantan oren mino.

¹⁸Oríkan minó nanin banta ano ída ino ana sen orera en mino. Máa siyákan mana vanta ano máa sen tiamemí, “Téi saréa anan mana yunan ana miyaní uádákéi mai o onantó umpo sirun noe, séi ída oronté uno.’

¹⁹Síkan inká ena ano máa semí, “Téi saréan tiyan míkan doran burumákao kéká miyaní uakéi mai kéká mo yóan onano van oriyá umpo sirun noe, séi ída oronté uno.’

²⁰^hSíkan inká ena vá ano máa sen tiamemí, “Taréa uron mi anasi iman timikhein téi ída oronté uno.’

²¹“Máa síkan mai yoran banta ano evaránen bei kákan banta vaintá oriven mai ma vetí ankan téin baya kayo véin tiamíkan kákan aranan uren bei yoran banta máa sen duvun emí, ‘Éi aineya

^d14:8 Pro 25:6-7 ^e14:11 Mat 23:12; Ruk 18:14 ^f14:14 Yon 5:29

^g14:15 Ruk 13:29 ^h14:20 1Ko 7:33

kákan barui kákan aasá bá tító aasá bá oriveya minó daná ma ída vain nanin banta vá arantan ma namu ukhein kéká bá auu ma yufúkukhein kayo vá au ma namu ukhein kéká bá avire vá ereno.'

²²Máa síkan mai yoran banta ano mai ma seiní uren béi evaránen bei kákan banta vaintá oriven béin máa sen tiamemí, 'Kákan banta oe, mai ma éi seonáí urékun má naupin manáa afokhan para van mino.'

²³Síkan kákan banta ano evaránen bei yoran banta siamemí, 'Ten timápin bíkano van mi séi sununuiyá umpo éi kákan baru me ampireya minó kákan aa kayo vá dunan anafimpá bá oriveya éi ma onanona nanin banta siamesin ten timápin erino. ²⁴Téi siretí ankan tiamiyá uno. Mai ma séi fefá ayusikhá eruna kayo finté mana nanin banta ano ída kanaíen tenti omá pinte yunan me nanten mino.'"

Yisasin Ánain Ma Vákurin Mai Ída Sesosikhen Mino

(Matiu 10:37-38)

²⁵Kokhon nanin banta ano Yisasin má oriyá íkan béi yovaéaren betin máa sen tiamemí, ²⁶i" 'Téi váipá ma ereno van inona ano ma e anóe afóen má e aná akhafana vá e afá aváen má ayofin má ei vampin má ma namuroí iyanona ano ída kanaíeya senti eyo iyamponí in nono. ²⁷Inká ei yaa unkamádan ma ída marmareya ma séin tínain ma vákurin nona ano ída kanaíeya senti eyo iyamponí in nono.

²⁸"Tiretí ankan pinte mana ano ma kákan ayá namun ma uvarano van inten maen ná esé béi ídá kumanten ná bei moní kaná bain ná mai namun uvaman kípanté rafuno siren ná daíden afová inten nafino. ²⁹Mai fara vara seyo mai vanta ano ma ída mai yanasinta átaruín

ma varu avantaren simeni upí uren kaen orera uren ma namádan daféden ma mai namun ída uvaman kípan me ifá urantin maen ena nanin banta ano ma oniyáken ída kama ineine vain banta ino siren oyampá baya sen ³⁰máa sintemí, 'Mai vanta ano má uvarano siren uvaman aráí uren ída mai namun uvaman kípen mino.'

³¹"Inká mana kin mano ma ena kin má mo aruvono siren maen ídá béi kumanten ná bei siyan míkan tauseni (10,000) aruvin banta ano kanaisá ená tuenti tauseni (20,000) aruvin banta ma namuro kin mano ma iyanen eriyain má aruvinten nafino siren ná daiminten nafino. ³²Daíden inintin ma ída kanaí ukhantin maen namuro kin ma nentá eriyantin mi vei yoran banta siantantin oren mi namuro kin mo ará kusin baya sen inainten mino.

³³"Máan mana en mi mana ano ma ída ve ina yanasinta ma me ifá inten maen mai ano ída kanaíen tenti eyo iyamponí inten mino.

Yisasi Siyáken Banasi Ano Un An Mí Yakhen Mino

(Matiu 5:13; Maki 9:50)

³⁴"Un maen kama yana ifo veni ase ma kípavinti mae intesá uresin ná evaránen ase inten nafino. ³⁵Mai un maen ída varafin mo kama inti inká ída kanaíeya vurumákao ara vá upí ure varafin kain nompo savifái maman karúdan nono.

"Átaren ma van nain kayo ano vá ineno."

Sipisipi Afeyorantá Ma Sian Baéádan Baya Ino

(Matiu 18:12-14)

15 Takisi varan banta kayo vá ume nanin banta kéká bá ano Yisasini vava ineno van béin áde eyen mino.

²JMáan tíkan Farasisi kayo vá man baya ma afova ukhein kéká bá ano mai van aranan uren máa semí, “Ma vanta ano ume nanin banta kayo anan aroná iyáken betí ankan má anan dunan niyan mino.”

³Máa siyaimpin Yisasi ma vaya ovaéden tiamemí, ⁴k“Tiretí ankan pinté mana ano ma mana antareti (100) sipisipi kaúðakaré intin ma mai finté mana afeyóbintin maen ídá nainti naini (99) sipisipi me kaúden ná mai ma mana sipisipi afeyókein nan e yosen oriyan baren ná o onanten nafino. ⁵O óden maen béi kákan amusin iyáken mai sipisipi yau-man be afuntá kaúden ⁶aviren barufá ma moren maen be arona kayo vá be amá ádé ma vain nanin banta kéká bá e araan manafin átaru uren maen betin máa sen tiaminten mino. ‘Mana sipisipi ma se sina afeyoká ein inka yosé umpo sen má eriveya amusin ítifero.’ ⁷Téi fura siré tiretí ankan tiamiyá uno. Ma ma einí anan en mi nainti naini (99) funtákein nanin banta ano ída ará baeran nan ininten mifo ume nanin banta finté mana ano ma ará baerantin maen inarufá kákan amusin uron mi inten mino.”

Mana Moní Afeyorantá Ma Sian Baéadan Baya Ino

⁸“Mana nanin mano ma siyan míkan aintain moní kaintin baré intin ma mai fintena mana aintain ma afeyóbintin maen béi ídá daamu antúðuren avové en bakhari uren ná dosiren mai aintain baranten nafino. ⁹Béi yosiyen baren ma mai aintain moní dosiaren maen be arona kayo vá be amá ádé ma vain nanin banta kéká bá e araan manafin átaru uren maen betin máa sen tiaminten mino. ‘Tesi mana aintain moní ma afeyókaré ein inka yosé umpo sen má

amusin ono.’ ¹⁰Téi fura siré tiretí ankan tiamiyá uno. Ume nanin banta finté mana ano ma ará baerantin maen Tiyarafenui enisori kayo ano máan manan en mi kákan amusin inten mino.”

Mana Ain Iyampon Ma Afeyorantá Ma Sian Baéadan Baya Ino

¹¹Máa siren Yisasi evaránen temí, “Mana vanta ano kankanan ain iyampon kain baren mino. ¹²Kain baren ínainte iyampon mano ve afóen máa sen tiamemí, “Tifóe oe, minó daná ma séin masiman uantimeno van ma iyá eona yanasinta saréa ana séin timeno van muno,’ síkan be afóe ano vei minó daná míkanampin daimen mino.

¹³“Máan turan ínainte iyampon mano ída ayáká banton minó beina yanasinta mamaren mana nentá bain barafá o váken bei minó moní pa savi yanáká afe en mino. ¹⁴Kíparákan mai varafin kákan anan afoká íkan béimpin ída mana yaná baren mino. ¹⁵Ída vaimpin mai vara fintena vantafin mo yorano van ina íkan mai vanta ano vei fon kayorá dafisino van pon dafufin tiantan oren mino. ¹⁶O vákan mana nanin banta ano ída véin mana yunan amiyaimpin arafan nan uaren pon kayo ano ma niyain basá áftan máden nano van iyaren mino.

¹⁷“Máan tiyáken béi ovaren me ineine iyan máa semí, “Te síføeni yoran banta kayo ano kokhon dunan ban niyákái séi mará kákan tirafan nan iyá bá uno.’ ¹⁸Máan tiyá baruna saréa séi e manté te síføe vaípa evarané orivé maé béin máa sé tiamenté uno, “Tifóe oe, Tiyarafenu vá éin má umeí uanté uno.’ ¹⁹Taréa séi ída kama ukhé umpo éi ída vá e anin ne seya séin tariyáke vá téin maman ná ei mana yoran banta aná dano.’ ²⁰Máa siren béi e manten be afóe vaípa oren mino.

“Béi ma nentá eriyákan ma ve afóe ano véin oniyáken kákan arunan uren tavaen o yafayóden amónen mino.

²¹ “Máan tíkan be anin mano véin máa sen tiamemí, ‘Tifóe oe, Tiyarafenu vá éin má umeí uanté uno. Taréa séi ída kama ukhé umpo éi ída vá e anin ne seya séin tarano.’

²² Máa síkan be afóe ano vei yoran banta kayo araren máa sen tiamemí, ‘Tenti moéken kama ukhein ayá tu anamun aine o vare me uantiyákeya ayampin rini afu uante vá arantampin arantan anamun uante ono. ²³ Uantáde mae inókein burumákao o vare me aruresí tádé niyáké timusin ó tifano. ²⁴ ^mMai fara vara seyo, se sanin mano furein an dakharen mi evará-nen ma manteiníen mino. Béi afeyókaréi evaráné dosé tiféuno.’ Máa siren betí ankan araíen amusin en mino.

²⁵ “Máan tiyákan esékena iyampon mano yunan anafá doren noren má ádé eriven musikí avaya vá danisí ma iyain má inen mino. ²⁶ Iniren mana yoran banta araren máa sen béin inaemí, ‘Mai náisá iyan natino.’ ²⁷ Síkan mai yoran banta ano evaránen béin tiamemí, ‘E afá erikhan mi véi ma ovaránen ma kamaen erein nan mi e afóe ano mana in-ókein burumákao arurákan mi amusin iyan mantino.’

²⁸ “Máa síkan esékena iyampon mano aranan uren maifin ída ódíkan be afóe ano ekhuven barufá eravuvén ará kusin baya véin tiamen mino. ²⁹ Máa síkan béi evaránen be afóen tiamemí, ‘Onano. Ayá oranará téi eni yorará para oé eriyá báké éi ma seona vaya kayo ída mana átakharé iyákuya mae éi ída mana memé arará timen ná te sirona kayo vá timusin iyaré uno.’

³⁰ Máan tiyareyá ma ma éin nina yanasinta ma aasá non nanin arintará

ma mo asuse ein iyampon ma ovaránen mápin ereintái éi amusineya inókein burumákao are ono.’

³¹ “Máa síkan be afóe ano semí, ‘Tanin noe, minó damú éi sen má anan baonan ban mi minó daná ma sentina vain mi éin ninaíi ukhen mino. ³² Máan tukhen mifo saréa erisá tetí ankan timusin ékun ná tétin tirá ano kama ino. Mai fara vara seyo, e afá ano furein an dakharen mi evaránen ma manteiníen mino. Béi afeyokaréi evaráné dosé tiféuno.’”

Anona Ma Evaránen Ameno Van Mantaré Ein Kayo Ma Funtaraein Ayafai Ovaeran Baya Ino

16 Yisasi vei eyo iyampon kayo máa sen tiamemí, “Mana moní banta ano ve ina yanasintará dafisino van mana ayafa yan baré íkan manáa vanta kayo ano moní banta vaípa oriven mo máa sen tiamemí, ‘En nina yanáká má ayafái ukhein banta ano en nina yanasinta máden tavifá asuse iyan mino.’ ² Máa sen tiamirákan moní banta ano ve ina yanáká ma ayafái ukhein banta aran eríkan máa sen inaemí, ‘Éi náisá iyanan ná ena kayo ano me sisimí iniya rafuno. Evaráne orive vá ten tina yanasinta ma fákakhe ona mai máa vompompin uvádeya vá bare me simeno. Éi ída evaráne sen tina yanasintará ayafái inono.’

³ “Máa síkan mai ayafa vanta ano veyan nan máa semí, ‘Téi intesá onte rafuno. Tesi kákan banta ano yoran pinta tena séin do sisintiyán mino. Téimpin bara ápomin ákona ída van inká ena vaípa ma minó daná inantin nan tiyave iyan mino. ⁴ Máan tiyá umpo sesi yoran ma kípanuna yamú ma vanasi ano ma séin e sivían betí amápin kain nain aafákana inka afová é uno.’

⁵“Máa sen iniren mairá mana mana vanta ano ma vei kákan banta vaípa ma anona evaránen amin daná ma mantaré ein kéká arákan béi vaintá erivin mairá mana vanta nare ayafa vanta ano in-aemí, ‘Éi náí máa yanasá tenti kákan banta vaípakena evaráne ameno siré manta fono.’

⁶Máa sen ina íkan mai vanta ano semí, ‘Uveri khave mana antareti (100) máa ino,’ síkan mairá mai ayafa ano siamemí, ‘Mai ma amiyáken ma amikhá ein bompon bare aine e khuman me mai vom-poppin fifti (50) khave máa ino sire uvarano.’

⁷“Ínainpáké ena vanta inaemí, ‘Éi náí máa mantare fono,’ síkan ‘mana antareti (100) máan uviti unan mantaré uno,’ síkan mairá mai ayafa ano siamemí, ‘Mai uviti unan amiyáken ma amikhá ein bompon bare eriveya eiti (80) unan máa ino se uvarano.’

⁸“Máan turan mai moní banta ano namu ayafa ano ma varein avúava san iniren amo sen mino. Para va ino véi kama ineine ma vain banta an mi yaran mino. Ma vara ráke avúavá ma yakhafiyaín nanin banta ano ara ara aa fákéi vetíi yoran bariyan pasen mi kakhantá ma vain nanin banta esantakhen mino. ⁹Máan tukhein nan mi sirétin tiamé uno. Ma varará ma yakeona yanasinta fosá ena nanin banta amiya mai kéká avían tiretí aronái uraká esin ná mai yanasinta ma mo kípan nain damú amusin iyan ná Tiyarafenu ano siretin e avían ayun ma fara van oriyan ban barufin kaino.

¹⁰ⁿ“Mana nanin banta ano ma sító danáká kamaen dafisinten maen mai véi kanaién kákan danáká bá dere yafisinten mino. Inká mana nanin banta ano ma sító danáká ma ída funtákein avúavá ma

inten maen mai véi kákan danáká bá ída funtákein avúavá inten mino. ¹¹Máan tinten mifo siréti ma vara rákena namu moní ma ída kanaíe yafisinte mae mai iye anó pura yana suron amintiyá tiréti yafisinte fono. ¹²Mai van mi siréti ma ída kama e ma ena ina yanáká ma yafisinte mae mai iye anó tiretin nina yana se siren ná amintiyá yafisinte fono.

¹³^o“Mana yoran banta ano ída kanaíen kankanan dafisini aránaópá banten mino. Máan ma inten maen mana van anunu uren ena ará namu uanten maen inká mana avaya inen maen ena avaya oyan aminten mino. Éi ída kanaíe Tiyarafenu vá moní báí aránaópá ban nono.”

Yisasi Ma Tiyarafenui Yafisin Má Man Baya Vá Ma Siamein Baya Ino

¹⁴Máa síkan Farasisi kéká moni san ukhein kayon baren Yisasi ma sein baya iniren béin auná mun uanten mino. ¹⁵^pAuná mun uantiyákan béi máa sen betin tiamemí, “Tiretí ankan nan ena vanta kayo ano funtákein avúavá ana varan banta kéká ino sen inino van in kayo ono. Máan tin kéká ompo Tiyarafenu ano siretí ankan aúpin má ineinefin má aúpa ma vain danasinta fe afová ukhen mino. Banasi ano ma kama uron ukhein daná ino ma sen iné iyain mai yaná ano Tiyarafenu avorá namu uron ukhen mino.

¹⁶^q“Man baya vá sakhanampa vanta kayoi vaya vá ano eriyen baren monó non péantan banta Yonini yamúí me kanaí uvíkan mai rákéi Tiyarafenui yafisin pintena kama vaya sian dáko iyákan kokhon mano maifin umperano van ákona iyan mino. ¹⁷^rInaru vá bara vá tesosen o afeyoranten mifo Ti-

ⁿ16:10 Ruk 19:17-26 ^o16:13 Mat 6:24

^q16:16 Mat 11:12-13 ^r16:17 Mat 5:18

^p16:15 Mat 23:28; Ruk 18:9-14

yarafenui man baya maen tító máa ída afeyoranten mino.

**Umeíin Avúavá Ano Ma Vanasi
Aunan Namu Uanté Iyain Baya Ino**

(Matiu 19:1-12; Maki 10:1-12)

¹⁸Yisasi ena vaya máa sen tiamemí, “Mana vanta ano ma ve aná me ifá en ma ena nanin ma o varanten maen mai vanta ano famúku avúavái inten mino. Inká mana vanta ano ma ifá uantan nanin ma o varanten maen mai vanta vá ano famúku avúavái inten mino.”

**Moní Banta Vá Rasarusin
Mái Vaya Ino**

¹⁹Máa siren Yisasi ena vaya máa sen tiamemí, “Pefá mana moní banta váken mai vanta ano kama uron ukhein nararé au anamun uren báken mai vanta ano kama yunan mana minó damú niyaren mino. ²⁰Máan tiyákan mai moní banta amá onará mana ona ída van namon mana en paerí ukhein banta Rasarusin ne sin aviren mo asemádan báken ²¹mai moní bantai yunan nan takhokáké ma yunan antan karúdan ona ádé ma eravein nano van iyákan iyan kayo ano yere veni namon me arúniyan mino.

²²“Máan tiyaren maná damú ona i van banta fúbíkan enisori kayo ano e aviren Abaraamun má mo kain bákan inká moní banta vá dere fúbin mo masíen mino. ²³Masí uran mai moní banta ano furin nanin bantai varufin aí bá beraifin má báken dan mun onan Abaraamu nenta suron bákan Rasarusi véin má baren mino. ²⁴Bákan mai moní banta ano máa sen oovaremí, “Tifóe Abaraamu oe, éi sen nan arunan ureya Rasarusin tiantesin ná mana ayamú máa non daaren tima fintá me kaú dantin iyon usintano. Para vara seyo, kákan irafin mi vákun tufá ira siriyá uno.’

²⁵“Máa síkan Abaraamu evaránen béin tiamemí, “Tanin noe, ovare vá

me ineno. Éi ma fa vákeya éi kama yanasinta variyan nan maen Rasarusi namu yanasinta mantaren mifo saréa ma varufin béi kamaen kusen bákaya inká éi aí bá beraifin má ba ono. ²⁶Ba ompo ena yaná mai siretin má tetin má aúbaná mana kákan on ban mino. Máan tukhein nan mi ma ufá ma vain kéká ano mai ma vaona ufá orono van inten mifo vetí ída kanaíen orintin maen inká mai u fáké ída kanaíen ma ufá é dantin inten mino.’

²⁷“Máa síkan moní banta ano evaránen béin tiamemí, “Tifóe oe, máan ma ukhantiya éi kanaisá eyá Rasarusin tiantesin ná te sífóen amápin oriven ná ²⁸béi ano se sífá tiváe ma yan manápá bain mo ákonaen tiamintin ná betí avúavá maman puntáden ná ma ma sí bá beraifin má baruna varufin ída vá erino.’

²⁹“Máa síkan Abaraamu evaránen béin tiamemí, ‘Mosesin má sakhanampa vanta kayoi vaya vá betimpin ban mifo áesin ná mai ma sikhein baya vá inino.’

³⁰“Máa síkan mai moní banta ano máa semí, “Tifóe Abaraamu oe, mai ída kanáí inten mifo mana furin banta ano ma masí pinté e manten oren ma vetin mo siamintin ma iniren mai anan betí ará baeranten mino.’

³¹“Máa síkan Abaraamu véin tiamemí, ‘Mosesin má sakhanampa vanta kayoi vaya vá ma ída ininti mae mai ifasá ono. Púkein banta ano yere ma masí pinté e manten betin ma mo siamintin maen mai vaya vá dere ída ininten mino.’”

**Umeíin Avúava San
Ma Yafíken Ban Baya Ino**

(Matiu 18:6-7, 21-22; Maki 9:42)

17 Yisasi vei eyo iyampon kayo máa sen tiamemí, “Ara ara yaná afoká intin banasi ano mai yanáká eraven ankamen umeí inten mifo mai yanasinta ma maman dáko inain nanin banta van mi sirunken mino. ²Máan tiyaré

intin mai vanta ano ma mamá dan nain danáká iyampon arará kayo finté mana ano umeí ukharé intin ínaimpáké béi moékan uman baran nafo véin amempin kákan konkamú onámaná ma kureya karúdesin un nompin aravintin maen mai ano anan kanaí inten mino. ³Máan tinten mifo siretí aurasá dafisenó.

Tirétin afá aváeyan mano ma umeí inti vá béin ákona e siamesin ná bei avúavá maman puntarano. Bei avúavá ma maman puntáden ma ará baeranti vá beni ume ampiantano.”

⁴Béi ma yan manápá ifo afápá kan un kádan dádá ma mana vayában ma umeí uantáden ma inká dan manápá ifo afápá kan un kádan dádá ma véi ovaránen me sirun noe sé uno ma sinti vá beni ume ampiantano.”

Yisasi Ma Mumunan In Avúava San Tiamein Baya Ino

⁵Máa síkan baya varen orin banta kayo ano Bafan máa sen tiamemí, “Éi sétisi mumunan asotú usintessin mo kákaní ino.”

⁶Máa síkan Bafan mano evaránen betin máa sen tiamemí, “Tiretíi mumunan mano ma mastati aran an den ma sító mumunan ma vantí mae kasae mana yaa ana van tiyáke arúbá e yare un nompin o ampan mono ma sesin maen ení vaya ininten mino.”

Yisasi Ma Mana Yoran Bantará O Sian Baéádan Baya Ino

⁷Máa siren Yisasi ena vaya máa sen tiamemí, “Tiretí ankan pinté mana ano ma ei yoran banta siantessin ma mo vará ápomiyá inten nafi sipisipira sá dafisiyaren ná erinten nafi mai kanaisá eyá ‘aine e khumame yunan nano’ sinte fono. ⁸Ída ino. Kákan banta ano vei yoran

banta van máan mi sintemí, “Tenti yunan tamádareya ei kama auí daná ure vá dunan puntádesí ten nare naréku vá éi ínaimpasá nanon,’ tinten mino. ⁹Kákan banta ano kaná bei yoran banta ano ma véin oo yayiein nan tusu siantanten nafino. Ída uron mino. ¹⁰Máan tukhein nan mi siretí ankan ma Tiyarafenu ano amin nain doran ma oo yayie yódenteya máan ná teno, “Téi ída kama yoran bantan bákéi sen ma simikhein doran mi yoré uno,’ vá teno.

Yisasi Ano Ma Siyan Míkan Amon Daná Aí Ma Vain Banta Kéká Ma Ayofein Baya Ino

¹¹Yisasi Yerusaremí orono siren oriyaen Sameríá bara vá Karirí bara vái aifin oren mino. ¹²Oriyaen mana varurá ma oriyain má tiyan míkan banta maen amon dana aí pákakhein kéká ano mai aasá Yisasin má e fóke náke uven nentá e mantaven ¹³avádóden oovaren temí, “Kákan banta Yisasi oe, setin nan arunan usintano.”

¹⁴Máa síkan Yisasi vetí ankan oniyáken máa sen tiamemí, “Tiretí ore vá monó doran banta kékasá tiretí au mo aní ono,” síkan betí ankan oriyákan mai amon dana aí ma varé ein kípen mino.

¹⁵Betí ankan pinté mana vanta ano onákan be au kama iyaimpin béi ovaránen Yisasi vaípa eriyáken oovararen Tiyaarafenu aví daníen mino. ¹⁶Mai vanta ano Yisasi vaintá onóben mo aron durafúden ben arantampin mátimen tusu sianten mino. Mai veí Sameríá banta ino.

¹⁷Tusu siantiyákan mai vanta Yisasi oniyán temí, “Tiyán míkan bantan ayofé uno seruna ifo yan manápá ifo afápá kamí kamí un kádan banta ano intesá uvi fono. ¹⁸Ídá ena vanta vá erin ná ma

[§]17:3 Mat 18:15 [†]17:6 Mat 17:20; 21:21 [¶]17:13 Riv 13:45-46
[¶]17:14 Riv 14:2-3; Mat 8:3-4

ena anan banta ano veyáká aná me Tiyarafenu aví daníen ná tusu siantiyán nafino.”¹⁹ Máa siren Yisasi mai vanta siamemí, “Mante orono. Eni mumunan mano éin ayofen mino.”

**Tiyarafenu Yafisin Ma
Erinaí Pákena Vaya Ino**

(Matíu 24:23-28, 37-41)

²⁰Maná damú Farasisi kéká ano Yisasin máa sen inaemí, “Inte yamusá Tiyarafenui yafisin erinten nafino.” Síkan Yisasi evaránen betin tiamemí, “Tiyarafenui yafisin ma erin nain ída mana aní daná ma afoká einí intin banasi ano auu fóké onanten mino. ²¹Máan tukhantin ída mana nanin banta ano siyáken ‘onano masi mafá bane’ áa ‘mesápá bane’ sinten mino. Para vara seyo, Tiyarafenui yafisin ákona fefái siretimpin ban mino.”

²²Máa siren Yisasi vei eyo iyampon kayo siamemí, “Ínainpá ma yamú afoká inti mae Banta Anin onano van in nompó ída onan nono. ²³wÍda onan nompó vanta kéká ano siamiyan ma ‘orive onano mesápá bane’ áa ‘erive onano masi mafá bane’ sinten mifo ída vá mai vaya ánain dakháan more mere ono. ²⁴Afayuí ma iyain minó ayompin mo fanuse me fanuse iyain bantín mi Banta Anin ma erin nain mai afayu an mí yantín minó nanín banta anon onanten mino. ²⁵Onanten mifo véi kokhon uman nare varen aí o yosintín maen maí damú ma varéin nain nanín banta ano ven oyan aminten mino.

²⁶“Noani yamú ma afoká ukhá ein avúavá an dakhein avúavá anan Banta Anin ma erin nain damú afoká in-

ten mino. ²⁷Noani yamú maen banasi ano omasí iyáken dunan ben amin ben amin iyáken anasi varampin nafi vanta varampin tasu sasú en oriyákan Noa vó-tifin umperiyain má kákan á den non taaren minó daná dararan ufuren puren mino.

²⁸x“Rotini yamú banasi ano máan avúavasí anan en omasí iyáken dunan ben amin ben amin iyáken minó daná miyaní in maran iyan dunan doriyan má uvaren dararen iyaren mino. ²⁹Máan tiyákan mi Roti ma Sodomú baru me ampen oriyain má anan inaru fáké ira vá ira khiyain onámaná bá ano á ma ereinién minó danasinta irakhen kauren mino.

³⁰“Máan tukhein mi vantín Banta Anin ma erin nain damú mai avúavá anan afoká inten mino. ³¹yMaí damú ma mana vanta ano ve amá daró ma un baren maen bei kama yanasinta ma má naumpin baré intín ída vá eravuvén barano van ino. Máan mana ená mana vanta ano ma yunan anafá ovaré inten maen ída vá evaránen mana yaná barano van mápin orino. ³²zRotín aná amaniná ma afoká ukhá ein danasará ovare me ineno. ³³aBe aunan ma fákan nain nanín bantai aunan mano o afeyoranten mifo ve aunan ma ampian kain nain nanín bantai aunan para vanten mino. ³⁴Téi sretí ankan tiamé uno. Banta Anin mano ma erin nain inuran kankanan mano ma mana sakhópin bakharé intín maen Tiyarafenu ano mana aviáren mana ifá inten mino. ³⁵⁻³⁶Máan mana en mi kankanan nanín mano ma uviti yasamiyaré intín maen Tiyarafenu ano mana nanín aviáren mana me ifá inten mino.”¶¶

¶¶17:35-36 Manáa vompon dókifin ena vaya ves 36 fin asotú ukhen mino: ³⁶Kankánan banta ano ma yunan anafín baré intín maen Tiyarafenu mana aviáren mana ifá inten mino.

w17:23 Mak 13:21; Ruk 21:8 x17:28 Esé 18:20; 19:25

y17:31 Mat 24:17-18 z17:32 Esé 19:17, 26 a17:33 Ruk 9:24

³⁷Máa síkan bei eyo iyampon kayo ano mai vaya iniren máa sen Yisasin in-aemí, “Bafan noe, mai yanasinta inte-fasá afoká inten nafino.” Síkan béi evará-nen betin tiamemí, “Purin danasinta au ma asenteintái sumpan kayo ano ákané iyan mino. Máan ma inti afováisá ono Tiyarafenui yaimin damú afoká inten mino.”

Baré Nanin Mano Ma Ínanen Inaein Baya Ino

18^bMáa siren Yisasi vei eyo iyam-pon kayo van ída avesaraan ena ena amúkino van ovaeran baya fóké betin aní iyan tiamemí, ²“Mana varurá mana vaya yaimin banta váken béi ída Tiyarafenu van peren inká banasi oman kaumpan iyaren mino. ³Máan tiyákan mai varufin mana varé nanin báken ena ena yamú mai nanin mano mai ma vaya yaimin banta vaípa oren mo yuvunen máa siyamí, “Tesi namuro ano séin uman timeno van iyá umpo éi siyae mai uman puntátintano.’

⁴Máa siyákan inian aniana iyaren mifo ínaimpáké beyan ovaren me inen temí, “Téi ída Tiyarafenu van periyáké banasi oman kaumpan iyá umpo ⁵ma varé nanin mano ma me yuvunen oren ein nan mi véini uman aya urékun maen béi ma eren oren iyain mai ída sivesara simino van muno.”

⁶Máa siren mairá Bafan mano semí, “Namu yaimin banta ano inte vayá tikhen nafi mai vá tirtí ineno. ⁷Tiyarafenu ano ma veyan iyákein nanin banta ano ma ena ena inuran má bayan má ma ífí den oriyán bantin maen betin ída iyain ná oyan amiyan maná banten

nafino. ⁸Téi siretin tiamé uno. Béi ainen betin ayainten mifo Banta Anin ma er-inten maen mumunan nanin banta ma varará bantin ná e onanten nafino.”

Farasisi Vanta Vá Takisi Varan Banta Vái Ovaeran Baya Ino

⁹Manáa ano ma vetiyan nan tetí puntáké uno siren ma ena kéka san ída funtáken ne ma siyain nan Yisasi ma vaya ovaéden tiamen mino. ¹⁰“Kanká-nan banta ano amúkono van monó namumpin oren mino. Mana maen Farasisi vanta ifo ena takisi varan banta ino. ¹¹Farasisi vanta ano o mantaven beyan nan máa sen amúkemí, “Tiyarafenu oe, séi ída manáa vanta an dé maé umoyan iyá namu avúavasí iyá inká ena vanta aná baré nó maé inká téi ída ma ma sakisi varan banta ma e vain an dakheruna van mi éin tusu siantiyá uno. ¹²“Mana uvikifin kan bayan mi séi yunan turiyáké maé téi ma varé iyaruna yanasinta minó tiyan míkan pintan daídé mana masiman éin amé iyá uno.’

¹³^d“Máa siyákan takisi varan banta ano nentá e mantaven inarufá ída mun auu máan onan mátimen be akorá ankamiyáken máa semí, “Tiyarafenu oe, séi ume vanta umpo arunará usintano.’

¹⁴^eMáa siren Yisasi semí, “Téi siretí ankan tiamé uno. Mai ma sakisi varan banta ma ve amápin orein mai véi Tiyarafenu avorá puntákein bantan oren mifo Farasisi vanta ída ino. Máan tukhantin betiyan ma maman daní in-ain kéká Tiyarafenu ano vetin aví ma-man bara finí inten mifo vetiyan ma vara finí inain kéká Tiyarafenu ano vetin aví maman daní inten mino.”

^b18:1 Kor 4:2; 1Te 5:17 ^c18:12 Ais 58:1-4; Mat 23:23 ^d18:13 Íbo 51:1
^e18:14 Mat 23:12

**Yisasi Ma Arará Iyampon
Arintan Avu Uantein Baya Ino**

(*Matiu 19:13-15; Maki 10:13-16*)

¹⁵ Yisasi avu amino van banasi ano véi vaintá iyampon arará kayo aviren ore ore íkan beni eyo iyampon kayo ano óden mai nanin banta ákonaen asen mino. ¹⁶ Asiyaimpin Yisasi mai iyampon kayo arákan be vaintá erivin máa semí, “Arará iyampon kayoi aa ída vá iyáante áesin ná téi varunafá erino. Para vara seyó, ma kéká an ma yákein nanin bantai nan Tiyarafenui yafisin baru van mino. ¹⁷ ^fTéi fura uron mi sé tiretí ankan tiamé uno. Mana nanin banta ano ma ída ma iyampon arará kayo an den ma Tiyarafenui yafisin baru varanten maen mai kéká ano ída kanaíen mai varufin ódintén mino.”

Kokhon Ona Ma Vain Bantai Vaya Ino

(*Matiu 19:16-30; Maki 10:17-31*)

¹⁸ ^gMana ánon banta ano Yisasin máa sen inaemí, “Kama aru soe, séi intesá urerá para ma ayun ban oriyan ban aunan barante rafuno.”

¹⁹ Máa síkan Yisasi evaránen béin tiamemí, “Pará te nan kama ukha ono siya fono. Ída mana ano kama ukhen mifo Tiyarafenu veya anan kama ukhen mino. ²⁰ Éi man baya kayo afová ukha ono.

‘Ída vá ena ana safi ena avafun nafi vare nono.’

‘Ída vá ena aruan purono.’

‘Ída vá umoyan ono.’

‘Tiretí ankan ída vá ena nanin banta kampun tire kó tiantano.’

‘Tiretí anóe afóen aránaó bákeya vá betin oo yayiyono.’” *Eks 20:12-16; Diu 5:16-20*

²¹ Máa síkan mai ánon banta ano semí, “Téi sirará iyampon tákéi mai man baya kayo minó dakhaké uno.”

²² Máa síkan Yisasi mai vaya iniren mai ánon banta siamemí, “Mana yana san éi fara o afasí ukha ono. E ina yanasinta minó sarí ureya minó daná ma i vain nanin banta ameno. Máan ma inte éi inarufá kama yanasinta khaesin banten mino. Máan ture éi ere sen tínain bákurono.”

²³ Máa síkan mai ánon banta ano kokhon daná dáKaren pasin mai veya iníkan ará uman den mino. ²⁴ Uman den iniyaimpin Yisasi véin oniyáken máa semí, “Moní bá kokhon ona vá ma yan bain kéká ano ma Tiyarafenui yafisin aúpin ma orin uman dakhen mino. ²⁵ Pura ino, kameri ano ma ufi aimpin ma ódin mai uman dakhen mifo kokhon ona ma yákein kéká ano ma Tiyarafenui yafisin barufin ma ódin mai moéken uman mi yakhen mino.”

²⁶ Máa síkan mai veya ma inein kéká ano semí, “Máan ma ukhantin maen mai iye ná Tiyarafenu ano kanaíen aviranten nafino.”

²⁷ Máa sen ina íkan Yisasi semí, “Banta ano ma ída kanaíen bararen daná Tiyarafenu ano kanaíen baranten mino.”

²⁸ Máa síkan Pita véin tiamemí, “Éin ánain bákurono van pefái setisi minó danasinta me ampikhé uno.”

²⁹⁻³⁰ Máa síkan Yisasi máa sen betin tiamemí, “Téi fura siré tiretí ankan tiamiyá uno. Tiyarafenui yafisin baru van ma iniren ma vei varu vá be aná akhafana vá be afá aváe má be anoifon má ma me ampiren ma orin nain kéká ano ma ma varará báken ma yantin ban nain danasinta esantaren moékakhein danasintan Tiyarafenu ano aminten mifo ínainpá ma yamú afoká intin maen ayun

ma fara van oriyan ban aunan baranten mino.”

**Yisasi Veyan Ma Fúaren E Mantan
Nain Nan Ma Kanú Manaú
Dádasí En Tein Baya Ino**

(Matiu 20:17-19; Maki 10:32-34)

³¹^hMáa siren Yisasi vei sirantan kan orun kádan (12) eyo iyampon kayo aviren mo kaúden máa sen tiamemí, “Pefá ma sakhanampa vanta kayo ano ma Banta Anin amaniná afoká inain dana san ma vompon uvamádan ma varé ein taréa Yerusalemí orétífekun maen pura sen afoká inten mino. ³²ⁱAfoká ma intin maen banta kayo ano véin pákaan ena anan nanin banta kéká am-intin mai kéká ano véin máká maáká en oyampá baya siyan dafiyó anká-den auufen akhare siren aruan purinten mino. ³³Púkaren maen kanú manaú damusí intin béi evaránen orun mantanten mino.”

³⁴^jMáa síkan bei eyo iyampon kayo ano mai vayai ana ída uron afová en mino. Mai vaya ana ano aúpá bákan inte vará béi siyan nafi mai vetí ída afová en mino.

**Yisasi Ano Moni San Ma Inantín
Auu Yufúkukhein Banta Auu
Evaránen Kama Uantein Baya Ino**

(Matiu 20:29-34; Maki 10:46-52)

³⁵Yisasi ma Yerikó barurá e unen oriyan maen mana auu yufúkukhein banta ano aa akhempá kumanten banasi vaípá moni san inantiyaren mino. ³⁶Máan tiyaren iníkan banasi ano mai aasá tisuvo sen entaviyaimpin náisá iyan nafino sen inaen mino. ³⁷Ina íkan mai ma oriyá ein kéká ano véin tiamemí, “Nasaretí banta Yisasin entaviyan mino.”

³⁸Máa síkan mai vanta ano mai vaya iniyáken oovaren temí, “Devitin anin Yisasi oe, éi se nan arunan usintano.”

³⁹Máa síkan an ma oriyá ein nanin banta ano mai vanta asiyan temí, “E avaya fákano,” síkan béi moékentá oovaren temí, “Devitin anin noe, séin nan arunan usintano.”

⁴⁰Máa síkan Yisasi o mantaven temí, “Mai vanta avire mará ereno”, síkan aviren ádé meran Yisasi véin inaemí, ⁴¹“Éi sen nan náisá uantano vará iniya fono,” síkan mai vanta ano evaránen temí, “Bafan noe, séi suu mábé onano van muno.”

⁴²Síkan Yisasi véin tiamemí, “Eni mununan manon éin ayofein auu maran nono.” ⁴³Máa siyain má ana mai vanta auu kama uvíkan Yisasin ánain bákuren oriyan Tiyarafenu aví daní iyákan minó nanin banta ano mai ódaren betin má dere Tiyarafenu aví daníen mino.

Sakiasi Sakisi Varan Bantai Vaya Ino

19 Yisasi Yerikó barufin ódiaren mai varu aúbaná orikhein aa yakhafen oren mino. ²Oriyákan mai varufin mana Sakiasin ne sin banta váken béi sakisi varan banta kayoi ánon banta van maen béi kokhon moní kain baren mino. ³Báken Yisasi inté ukhein bantá ban nafino siren béi onanton en mifo véi asíka vanta váken kokhon nanin bantafin ída kanaíen béin onan nainíen mino. ⁴Máan tiyaimpin mai ma Yisasi oriyain aasá béi afová iyáken ainen tavaen orein mano mana fiki yaa ana aa akhempá baré íkan béin onano van maifin óden mino. ⁵Un baré íkan Yisasi mai yaa anafin o mantaven mun oniyáken béin máa sen tiamemí, “Sakiasi oe, éi aine erano saréa anan en amápin téi o vanté uno.” ⁶Máa síkan béi ainen mai yaa ana finté eraven kákan amusin

^h18:31 Ruk 24:44 ⁱ18:32 Ruk 9:22, 44

^j18:34 Mak 9:32

iyáken Yisasin e aviren be amápin oren mino.

⁷kOriyákan kokhon nanin banta ano ódaren betí anan iyan temí, “Béi ume vanta amápin mi oriyán mino.”

⁸lO vákán Sakiasi e mantaven Bafan máa sen tiamemí, “Bafan noe, minó daná ma se sina vain taréan aúban daídé maé ída ma minó daná bain nanin banta kayo amiyáké maé inká intéa nanin banta iná mana yaná kampun tirerá mantaré onte rafu. Mai séi evaráné kamí kamí dádá mairá kaúdé amí dú onté uno.”

⁹mMáa síkan Yisasi véin tiamemí, “Taréa anan Tiyarafenu ano ma e antun aviren mino. Mai fara vara seyo, ma vanta vá dere Abaraamun anin mino.

¹⁰nMai ma afeyóká ein nanin banta kayo yosiré evaráné avirano van mi Banta Anin mano erakhen mino.”

Moní Ma Yafisin Banta Kayoi Ovaeran Baya Ino

(Matiu 25:14-30)

¹¹Máa siyákan banasi ano ovaren me inen maen béi Yerusaremí ádéi oriyain taréa anan Tiyarafenui yafisin baru afoká inten mino sen iniyákan Yisasi mana ovaeran baya siamen mino. ¹²Béi máa semí, “Mana kin anin mano ena varafá orintin béin maman kiní urantí ovaráné erivé bei kékáká dafiseno van oren mino. ¹³Oriyáken bei siyan míkan doran banta aran eríkan mana tausen kina, mana tausen kina (K1,000) uariyan minó máa amiren béi máa sen betin tiamemí, ‘Ma moní póké para yore oriya vasirá téi ovaráné ereno.’

¹⁴“Máa siren orivíkan bei mana varu rákena kayo ano véin inian namu untáden ‘béi ída sétinti kiní ino van muno’ sen mo siamino siren manáa vanta kéká

tiantan mai ma orikhein barufá oren mino.

¹⁵“Máa síkan betíi vaya ída inin mai vanta maman kiní urákan béi ovaránen bei varurá eriven bei yoran banta kayo ma fefá moní amikharé ein kayo van náí máa aman monisá dóáden nafi siren béi onano van betin aren mino.

¹⁶“Máa siren arákan mana vanta ano nare esé eren me máa semí, ‘Kákan banta oe, séi ano eni mana tausen kina fóké tiyan míkan tausen kinan aman moní dóan kaékun ban mino.’

¹⁷o“Máa síkan bei kin mano evaránen béin tiamemí, ‘Éi senti kama yoran bantan bai kama yorarí eono. Éi ma sító danáká ma kama yafisirí eonafá taréa séi ano éin maman kákaní urékuya siyan míkan kákan baru máará dafisin nono.’

¹⁸“Máa sirákan ena yoran banta ano mairá eriven temí, ‘Kákan banta oe, eni tausen kina fóké téi yan manápá tausen kinan aman moní dóan kaékun ban mino.’

¹⁹“Máa síkan kin mano evaránen béin tiamemí, ‘Éi yan manápá kákan barurasá dafiseno.’

²⁰“Máa sirákan ena yoran banta ano mairá eriven temí, ‘Kákan banta oe, masina eni mana tausen kina moní davaráefin úkuré kaékun baré íká baré eré uno. ²¹Para vara seyo, séi ma en oniyaruna éi sinko vanta vákeya inká ena vanta ano ma kain baré ein daná éi kasae variyákeya ena vanta ano ma yoká ein dunan éi kasae unafé iya ono. Máan ma iyaona van mi séi en nan peré uno.’

²²“Máa síkan kin mano evaránen béin tiamemí, ‘Éi namu yoran banta uron mono. En avayarái éin daimonté uno. Éi afová ukhen ná téi sinko vanta váké téi kasaé ena vanta ina yaná bariyá inká ena ano ma yoká ein dunan kasaé o

^k19:7 Ruk 15:2 ^l19:8 Eks 22:1; Nam 5:6-7 ^m19:9 Ruk 13:16; Apo 16:31

ⁿ19:10 Ruk 15:4; Yon 3:17; 1Ti 1:15 ^o19:17 Ruk 16:10

unafiyaré uno. ²³Kasaé o unafiyaruna ifo faraé tireyá tenti moní ída moní ma kain namumpin kaen nan baré irá téi ma ovaráné erivé mai moní ano ma yóádein aman má mai moní bá evare rafuno.’

²⁴“Máa siren mai ma ádé mantakhá ein kayo van temí, ‘Béin pintena mai moní dafireya mai ma siyan míkan tausen kina ma kain bain banta ameno.’

²⁵“Máa síkan betí ankan evaránen béin tiamemí, ‘Kákan banta oe, béi fefá tiyan míkan tausen kina manten mino.’

²⁶p“Máa síkan béi evaránen betin tiamemí, ‘Téi siretí ankan tiamé uno. Kokhon danasinta ma yantin baréin nain nanin bantan móeken aminten mino. Inká ída ma yakáin nain kéká ina mai sanáa ma yaká intin mai vá deren minó baranten mino. ²⁷Máan tinten mifo mai ma senti namuro kayo ano ma séi nan ída vá betí ankani kiní ino van ma sein kéká avireya mará me kaúde sen tivorá arono.’”

Yisasi Ma Kin An Daven Yerusaremí Ódein Baya Ino

(*Matiu 21:1-11; Maki
11:1-11; Yoni 12:12-19*)

²⁸Yisasi mai ovaeran baya siamíden mai oyampáké Yerusaremí ma ódikhen aintá ben nare óden mino. ²⁹Ódiyaren Betfasí baru vá Betaní baru vá ádé bain anu Orifi se sin dontá ódiven bei eyo iyampon kanan tiantiyen temí, ³⁰“Tiré kanan mesan barurá oriveya mai varufin un pébe onesin ma mana ano ída amaniná kumantein donkin ma anan kuádantin banti mai vá útufe ereno. ³¹Máan tesin ma mana ano ma siré kanan ina iyan ma fara mai anan útufiya fono ma sintiya vá Bafan mano veni yoran ban tí uno vá te véin evaráne siameno.”

³²Máa síkan mai ma siantan orein bantá kan mano o onan mai ma Yisasi

siameiní ukharen mino. ³³Máan tukharéin míkanan mai donkin anan útufiyaréin mai donkin afóe ano míkanan máa sen inaemí, “Tiré kanan pará mai donkin anan útufiya rafono.”

³⁴Máa síkan míkanan mano evaránen betin tiamemí, “Bafan mano veni yoran bami sisintá uno.”

³⁵Máa siren mai donkin baren Yisasi vaintá mo kaúden betí au anamun póké mai donkin amaniná uvíden Yisasin ayain mai yaró un kumanen mino. ³⁶Béi mai donkin ané un kumamen oriyákan banasi ano ayá au anamun kayo yavádiyán aasá uvisen oren mino.

³⁷Orifi se sin Anu ma me ampiren araviyain aa ádé béi erivíkan ben ma vákuren noin nanin banta ano véi ma enará ukhein danasinta ma afoká iyan ma oniyará ein nan avádóden oovararen Tiyarafenu aví daní iyáken amusin en mino.

³⁸“Máan tiyáken beti oovaren temí, “Bafan avíká ma erikhein kin ná Tiyarafenu ano avábá ino. *Íbo 118:26* Tiyarafenu ano seti vanasi ará kusin timen mifo véin avisá daní ó tifano.”

³⁹Máa siyákan manáa Farasisi kayo ano mai nanin bantafin baren betí ankan Yisasin máa sen tiamemí, “Aru soe, ei eyo iyampon kayo asesin ída máan baya kayo sino.”

⁴⁰Máa síkan Yisasi evaránen betí ankan máa sen tiamemí, “Téi siretin tiamiyá uno. Ma nanin banta ano ma ve oo fákaren ma ída vaya sintin maen ma onámaná kayo ano kasaen oovararen Tiyarafenu aví daní inten mino.”

Yisasi Ma Yerusaremí Ban Ifí Dein Baya Ino

⁴¹Máa siren béi Yerusaremí ádé oriven mai varu oniyáken ifí daanten mino. ⁴²Ifí daren temí, “Yerusaremi oe,

saréa ma éin ará kusin daná ma varen me amin afová ono van téi inikhé umpo éi mai yaná afová e varé esin Tiyarafenu ano éin ará kusin amin nainten mifo mai yaná ano saréa siretin avorá aúpasí ukhein ída onan nono. ⁴³Ineno. Maná damú afoká intin maen eni namuro kayo ano eni yafu akhempá bara khaen eúkuren maen minó ankinafa yafisinten mino. ⁴⁴ᵀMáan turen maen éin ankaman barakuádanti varafin eravesin éin má e akhafana vá maifin ma váin nain dere vá aruren namu uantanten mino. Máan turantin maen mana onámaná ano ída ena onámaná daró banten mino. Mai farava máan tinten na ino. Tiyarafenu ano ma éin aya ono van ma éi vaípa erein damú éi ída kamaeya afová ukharé esin mino.”

**Yisasi Ma Kákan Monó Namun Pinte
Ma Minó Daná Sariin Banta
Kayo Yo Siantein Baya Ino**

(*Matiu 21:12-17; Maki
11:15-19; Yoni 2:13-22*)

⁴⁵Máa siren Yisasi monó namun da-
fufin ódiven maifin ma sarí iyá ein
danasinta kayo yo maman karúdiyan
tiantan barufá araven mino. ⁴⁶Máan
turen betin tiamemí, “Tiyarafenui vom-
pon dóki ano máan mi sikhemí, “Tenti
má maen mai amúkin namun’ *Ais 56:7*
ne sikhain mifo siretí ano maman
‘umoyan banta kayoi má an diya ono.’
Yer 7:11

⁴⁷ᵀMáan turen béi ena ena yamú monó
namumpin oriven maen monó baya sian
banasi amiyákan monó ánon banta kéká
bá man baya ma afová ukhein banta
kéká bá banasirá ma ánoní ukhein banta
kayo vá ano Yisasin ma aruan purin

aa van dosiyaren mino. ⁴⁸Máan tiyákan
banasi ano ákonaen béini vaya iniyan
pasen béin ma arin aa vetí ankan ída
kanaíen dosen mino.

**Yisasi Ákona Van Ma Monó Átaru
Namuntá Ma Ánoni Ukhein Banta
Kéká Ano Ma Inaein Baya Ino**

(*Matiu 21:23-27; Maki 11:27-33*)

20 Maná damú Yisasi monó namun
dafufin kama vaya sian banasi
amiyákan monó ánon banta kéká bá man
baya ma afová ukhein banta kéká bá ba-
nasii ánon banta kayo vá ano véi vaintá
eren mino.

²Eriven betí ankan máa sen béin
tiamemí, “Éi setin tisimeno. Nái
ákonarasá mai yanásí iya fono. Iye anó
mai ákona éin amikha fono.”

³Máa síkan béi evaránen betí ankan
tiamemí, “Téin má deren tiretin ina onté
umpo anona vá téin tisimeno. ⁴Yoni ma
vanasi monó non péantiyaré ein mai Ti-
yarafenui ákonarasá péantiyan nafi áa
varará bantai ákonara safino.”

⁵Máa síkan betiyan ten orera emí,
“Inaru fáke na ino ma sé tifékun maen
mai fará ída mairá mumunan iya ra-
fono sinten mino. ⁶Inká barará banta
ina ino ma sé tifékun maen banasi ano
Yonin nan sakhanampa vanta ino sen
mumunan ukheintá tetin onámaná tin-
kaminten mino.”

⁷Máa sen iniren betí ankan béin
tiamemí, “Mai ma Yoni mantaré ein
ákona mai setí ída afová ukhé tiféuno.”

⁸Máa síkan Yisasi evaránen betin
tiamemí, “Iye anó ákona séin timikhará
ma yorarí iya rafu, mai séin má dere ída
siretin tiamenté uno.”

**Uvaini Yunan Anaará Ma Namu
Yafisirí in Banta Kéká Pákana
Ma Sian Ovaéadan Baya Ino**

(Matiu 21:33-46; Maki 12:1-12)

⁹Yisasi mana vava máa sen banasi sian baéan amemí, “Mana vanta ano uvaini yunan ana yóadákaren dunan ma yoran banta kayo van mairá dafíken dóden manáa uvaini aran betí miyan do variyan dunan afóen nina khaono siren ena varufá ayáká bano van oren mino. ¹⁰Ovaren uvaini aran ma kúdin damusí fkan maifin ma yafikein kayo ano manáa kúduan amino van béi iniren mana vei yoran banta siantan mai yafisin banta kayo vaipá onóbíkan mai kayo ano mai yoran banta ankáden tiantan ída mana yaná baran na fara evaránen oren mino. ¹¹Oríkan mai yunan ana afóe ano ena yoran banta siantákan betí baipá orin mai kéká ano mai vanta vá dere namu ankamirí uren evaránen tiantan para oren mino. ¹²Oriyaimpin béi kanú manaú dádasí en ena yoran banta vá tiantan oríkan mai kéká ano mai yoran banta namu arirí uren darifen dunan akhempá mo kharúden mino.

¹³“Máan tiyaimpin mai uvaini yunan ana afóe ano semí, ‘Taréa séi intesá onte rafuno. Téi se sanin nan ma sin-unu iyaruna fumara ma siantékun or-intin maen mi vetí ankan kanaífen béin avaya ininten mino.’

¹⁴“Máa siren mai fumara siantan oríkan mai yafisin kéká ano mai fumara oniyen temí, ‘Béi anon be afóeni minó daná baranten mifo eresí béin arékun púbintirá ma yunan ana setiyen bará tifano.’

¹⁵“Máa siren mai yunan ana fintena mai fumara yo yarifen akhempá morúden aruan puren mifo mai yunan ana afóe ano mai yafisin kéká náisá inten

nafino. ¹⁶Béi mai yafisin kéká me aruan púden maen mai yunan ana yafían ena kéká aminten mino.” Máa síkan banasi ano ena kéká ma amein baya iniren temí, “Béi ída vá máan tino.”

¹⁷Máa síkan Yisasi vetin auufen kakháben inaemí, “Tiyarafenui vompon dókifin ma ma vava uvamádan baini ana ano nafesá tikhen nafino.

“Má uvaran banta kayo ano ma yo mamanan karúdein onámaná ano mamanan má dádaimpin mana ákona onámanasí ukhen mino.” *Íbo 118:22*

¹⁸“Máan tukhen mifo minó nanin banta ano ma mai onámaná daró ma eraven ankaminten maen morun ta finen títo títo inten mino. Inká mai onámaná ano ma mana nanin banta ané ma eravinten maen béin dasantan panten mino.”

¹⁹Máa siyákan man baya ma afová ukhein kéká bá monó ánon banta kéká bá ano mai ma ovaeran baya ma véi siyain ovaren me inin betin oyampá baya siyaimpin maí damú ana véin pákano van uvaen banasi van péden ifá en mino.

Kamanin Ma Takisi Amin Baya Ino

(Matiu 22:15-22; Maki 12:13-17)

²⁰Man baya ma afová ukhein kéká bá monó ánon banta kayoi ánon banta kéká bá ano Yisasintá daffan ákona uven manáa afurin banta kayo siantákan mai vanta kayo ano fura sen Yisasini vava iniyan mino sino van kampunífen nóken Yisasi ma manáa vava me avá dantí mai vayará béin pákaan ánon kamanin ayampin kaono siráken afuriyaren mino.

²¹Mai ma afurin kéká ano máa sen béin inaemí, “Aru soe, setí afová ukhé uno. Éi funtákein baya anan banasi siamiyákeya aví bain má ída ma aví bain kayo vá o éke e éke ureya manaí ukhein baya anan tiamiyáke mae fura vayafó anan

Tiyarafenui avúavá tian dákó éiya ono.²² Máan téiya ompo éi ma iniyaona setí kanaisá erá moní Sisan takisi amente rafuno áa ída fino.”

²³Máa síkan betí ankan ma máká tiyain béi afová iyáken betin máa sen tiamemí,²⁴ “Mana moní aní irá onano. Iyen aman manon má aví basá mai moniká ban nafino,” síkan²⁵ betí ankan evaránen temí, “Sisan mino,” síkan béi vetin tiamemí, “Sisan nina yanasintá Sisan ná ame vá inká Tiyarafenu ina yanasá Tiyarafenu ná ameno.”

²⁶Máa síkan betí ankan anú duren mai ma véi vanasifin tein bayará ída kanaíen ben pákarí iyaimpin ída vava sen mino.

Púkaren Ma E Mantaven Ábasuí Inain Baya Ino

(*Matiu 22:23-33; Maki 12:18-27*)

²⁷Sadyusi kayo finté manáa ano sen ma furiyain nanin banta ano ída evaránen orun mantanten ne ma siyain kayo ano Yisasin inaono van béi vaintá eren mino.²⁸ ^wEriven mai kéká ano máa sen béin tiamemí, “Aru soe, Mosesi ano seti sina máa sen bompon dókifin uvantaren mino, ‘Mana vanta ano ma anasi mamákaren ma ída iyampon kain na ma mai vanta ano fúbintin ná be afá aváeyan pinté mana ano vá baré mamáken ná mai nanintá mai ma furein nina iyampon kaúantano.²⁹ Pefá dan manápá ifo afápá kan un kádan anavádano ano varen esékena vanta ano anasi mamaren ída iyampon kain na fara furen mino.³⁰ Fúbin mai rákena ano mai varé mamaren máan mana en mino.³¹ Máan turan kanú manaú banta ano yere mai varé mamaren osaní uvíkan mai máa yan manápá ifo afápá kan un kádan anavádano ano mai varé nanintá ída mana iyampon kain na máa mana en oriyan minó máa ano o furen mino.³² Fúbíkan

mai nanin má dere o furen mino.³³ O furen mifo mai nanin maen dan manápá ifo afápá kan un kádan anavádano anon mantaren mifo ínaimpá ma furin nanin banta ma orun mantan nain damú béi iyen aná suron ná banten nafino.”

³⁴Máa síkan Yisasi evaránen betin tiamemí, “Ma vararái vanasi ano ma ábasuíin ban mino.³⁵ Máan tukhen mifo funtákein nanin banta ma furiyain nan Tiyarafenu ano evaránen orun mantanten ne ma sikhein kayofin ábasuíin ída vanten mino.³⁶ Mai farava ino. Tiyarafenu ano furin pintena vetin orun avían mantarantin maen béin akhafanaí uven ída furinton enisori an daven para vanten mino.³⁷ Mai ma sító daa ana ira khiyákan ma Mosesi ano Bafan araaren ma Éi Abaraamun má Aisakin má Yekopun mái Ayarafenu ono ma sikhein mano furin nanin bantai e mantan mi Mosesi ano setin aní ukhen mino.

Eks 3:6

³⁸Aní ukhen mifo Tiyarafenu maen ída furin nanin bantai Ayarafenu ifo véi maen ayun ma fa vain nanin bantai Ayarafenu bantin mi ven avorá minó nanin banta ano ayun para vanten mino.”

³⁹Man baya ma afová ukhein kayo finté manáa kéká ano mai ma Yisasi sein baya iniren béin máa sen tiamemí, “Aru soe, Éi kama vayan te ono.”⁴⁰ Máa siran banasi ano evaránen béin mana vava inain nan peren mino.

Tiyarafenu Ano Ma Aní Ukhein Banta Mai Iyen Anin Nafino

(*Matiu 22:41-46; Maki 12:35-37*)

⁴¹Máan tiyákan Yisasi máa sen banasi inaemí, “Tiyarafenu ano ma vei vanasi evaránen avirano van ma aní ukhá ein banta van banasi ano faraé tires ná Devitin anin mino siyan nafino.⁴² Deviti

veyantái Í Bompon dókifin tian páman en mi,

“Bafan mano senti Bafan tiamiyáken,

“Ten tiyan kurompá kumantesirá

⁴³eni namuro kayo maman

en aránaópá kaékun ná eni arantan kain karasisá ino.”’ *Íbo 110:1*

⁴⁴Tiretí onano. Deviti veyantái venan Bafan ne sen arakhan mifo mai vanta ano inté uákená ben aniní inten nafino.”

Yisasi Ma Au Khákan In Banta Kayo Van Ma Sein Baya Ino

(Matiu 23:1-6; Maki

12:38-40; Ruku 11:37-54)

⁴⁵Máa siyan minó nanin banta ano Yisasini vaya iniyákan béi vei eyo iyampon kayo máa sen tiamemí, ⁴⁶“Man baya ma afová ukhein banta kayo vará dafiseno. Betí ankan ayá au anamun uren nono van anunu iyáken maen banasii átaru varurá nontin banasi ano kama yamú ino sen amé amé ino van anunu iyáken maen monó átaru namun kayofin má omá dunan ma saran naimpin má betí ankan esé an bain karáká kumaneno van mi anunu é iyan mino. ⁴⁷Betí ankan baré nanin kayo mákáden maen mai nanin kayo amá pintena yanasinta umoyan bariyáken maen kampun ten ayáká amúké iyan mifo uman ma yaimin damú ma afoká intin mai kéká anon moéken uman baranten mino.”

Baré Nanin Mano Susu Sin Moní Ma Karú Dein Baya Ino

(Maki 12:41-44)

21 Yisasi oniyán bakan moní nanin banta ano susu moní monó namumpin ma moní kain bokhise ma vaimpin kaiyaren mino. ²Kaiyákan mana ve avafu fúkan ona ída vain baré

nanin mano kankanan toeya varen mai vokhisefin me kaiyákan béi onen mino.^{§§ 3x}Ódaren máa semí, “Téi fura uron mi siré tiretí ankan tiamiyá uno.

Minó ona vain nanin banta ano ma kaein moní esantaren mi ma ona ída van baré nanin mano khaen mino.

⁴Minó nanin banta ano kokhon ná moní dákaré ein pintena manáa moní yaimen me khaen mifo ma nanin mano ída kanaí ukhen mi veyan ma yunan máden nano van ma fákakharé ein moní minó máai me khaen mino.”

Kákan Monó Namun Ma Varákin Nain Baya Ino

(Matiu 24:1-2; Maki 13:1-2)

⁵Yisasini manáa eyo iyampon kayo ano monó namun ma uvantein ódaren betí mai van máa semí, “Kama on kayo vá kama yanasinta vái Tiyarafenu amíkhan mi kamaen aní uran ban mino,” síkan Yisasi vetin tiamemí, ^{6y}“Taréa ma oniyaona yanasinta ano ínaimpá maná damú afoká intin maen namuro kéká ano minó daná barákuan karúdentin barará ana eravintin maen mana onámaná ída áintin ena onámaná daró banten mino.”

Ma Vara Ma Kípan Akhempá Ma Aní Daná Afoká Inaí Pákena Vaya Ino

(Matiu 24:3-14; Maki 13:3-13)

⁷Máa síkan betí ankan Yisasin inaemí, “Aru soe, inte yamusá mai yaná kayo afoká inten nafino. Inte yaná ma afoká intirá tetí afová erá mai yanasinta inka ádé anantá afoká inten mino sé tifante rafuno.”

⁸Máa síkan Yisasi evaránen betí ankan tiamemí, “Tiretin me kampun tinten mifo yafían ná ákona ono. Mai fara vara seyo, kokhon nanin banta ano eriven maen téin tiví diyán máa sinten mino,

§§21:2 Kiriki vayafin kankanan *repta* en sikhein mino.

*21:3 2Ko 8:12 †21:6 Ruk 19:44

‘Téi ma mai vantan bákun damú inka ádé’ e ne sinten mifo siretí ída vá betin bákuro. ⁹Ínainpáké ma inesin ma kákan aruvin afoká intin ma mana vara ano e manten ena vara vá aruvintin inká mana vara finté ma verara aúban daíden aruvinti maeya siretí ankan ída vá akhokho van ono. Mai yanasinta naren afoká inten mifo ma vara ma kípan damú ída ainen erinten mino.”

¹⁰Máa siren Yisasi evaránen betí ankan tiamemí, “Manáa vara kayo finte kéká ano e manten ena vara kayo finte kéká bá aruvintin maen inká manáa kini yafisin pintena kéká ano e manten ena kini yafisinpintena kéká bá aruvintin inten mino. ¹¹Máan tintin maen ma vara kákantá kaya intin manáa akhempá kákan anan má kákan aí danasinta vá afoká iyantin inká minan ayontá aní daná bá akhokho yanasinta vá afoká inten mino.

¹²“Mai yanasinta ma ída afoká ukhantin maen tiretí ankan pákaren namu arirí inten mino. Betí ano siretin monó átaru namun kayofin kaúden maen baya yaíden aviren mo karavusifin kaiyan maen tiretin aviren kin kayo avorá bá kamanin kayo avorá bá orinten mifo mai fara va ino. Tireti senti eyo iyampon kayon basin pasen mí máan tinten mino. ¹³Máan ma inain manon tiretí ankani aái intiyan betin monó baya siamin nono. ¹⁴“Máan tin nampo sireti ída vá betin ma evaráne siaminona vaya van kokhon ineine ono. ¹⁵aMai fara vara seyo, seyantái siretin puntákein baya vá kama afova vá amiyákun maen tiretíi namuro kayo ano ída kanaíen téi ma amenuna vaya átakharé uren do varanten mino. ¹⁶bTiretí ankan anóe afóen má afá aváeyan má tiretíi kéká bá arona kayo

vá ano yeren tiretin namuro ayampin amintin arintiya siretin pinté manáa ano furin nono. ¹⁷Téin naro siren banasi ano siretin ará namu uantanten mino. ¹⁸Máan tuantanten mifo siretin ánon do finté ída mana ayo farusen eravinten mino. ¹⁹Máan tinten mifo siretí ankan mantaan ákona ukhareya vá ayun ma fara van oriyan ban aunan barano.”

Mana Namu Yana Suron Ma Afoká Inain Baya Ino

(Matu 24:15-21; Maki 13:14-19)

²⁰Máa siren Yisasi evaránen tiamemí, “Tiretí ankan onesin ma aruvin banta kayo ano ma Yerusaremí baru ma iyaren eúkintiya mairasá tiretí afová eya vá inka ádé anantá ma varu namu inten mino vá teno. ²¹Maí damú ma afoká intin ná Yudiá ma vain nanin banta ano vá anufá karan ódintin ná Yerusaremí ma vain kéká ano mai varu me ampiren ena akhempá karan orintin ná Yerusaremí ankinafá ma vain kayo ano ída vá mai varufin ódino. ²²cMai fara vara seyo umeí ma iyá ein kéká ma uman amin damusí ma intin maen Tiyarafenui vompon dókifin ma uvamádan baré ein baya kayo ano fura sen afoká inten mino. ²³Ma varará kákan uman afoká intin Tiyarafenui aranan ná ano mai nanin bantafin afoká inten mifo amúbá nanin kayo vá arará iyampon kayo ma nan kuviyá inain nanin kéká bá ano kákan uman baranten mino.” ²⁴dUman baranten mifo namuro kayo ano me Yerusaremí kéká aruren maen aviren ena vara kayofá mo karavusií inten mino. Máan turantin ena anan banta anon Yerusaremí me aruren ayanavan en oriyantín baren maen Tiyarafenu ano ma vetintá dafisino sikhá inain ma mo

^a21:14 Ruk 12:11-12 ^a21:15 Apo 6:10 ^b21:16 Mat 10:21-22

^c21:22 Yer 5:29; 46:10; Ose 9:7 ^d21:24 Íbo 79:1; Rev 11:2

akheniin damú ma afoká intin mairái mo kanaí inten mino.”

**Tiyarafenu Anin Ma Overánen
Erin Nain Baya Ino**

(*Matiu 24:29-31; Maki 13:24-27*)

²⁵eMáa siren Yisasi evaránen betin tiamemí, “Maí damú ara ara aní daná ano áaura safi viyonta safi ofu kay-ora safi afoká inten mino. Máan tintin maen ma varará minó nanin banta ano un non ma karantó en e man paútin nain avaya ma iniren betí kokhon ineine iyáken berai siya akhokho van inten mino. ²⁶Máan tiyáken maen ma varará ma afoká ono van ma iyain dasasinta van banasi avinantan dantin auu entave entave inten mino. Mai farava ino inaru rákena kákan dasasinta ano kayamana inten mino. ²⁷fMáan tintin maí damú banasi ano onantin Banta Anin mano konan daró bei kákan ákona vá panu vá erinten mino. ²⁸Mai yanasinta ma aráfen afoká inti vá tiretí ankan orun mantaan ákona uve vá anuran duvaserano. Mai fara vara seyo, Tiyarafenu ano ma siretin evaránén aviran damúí ádesí inten mino.”

**Fiki Yaa Anará Ma Afova
Varan Baya Ino**

(*Matiu 24:32-35; Maki 13:28-31*)

²⁹Máa siren Yisasi evaránen ena ovaeran baya vetin tiamemí, “Tiretí ankan fiki yaa ana vá ena yaa ana kayo vasá onano. ³⁰Tiretí ankan onen nan ma auyen ana varen orera íka maeyan tiretí afová eya áken afe inten mino séiya ono. ³¹Máa séiya ompo máa mana eya vá tiretí onesin ma mai yanasinta afoká intiya Tiyarafenui yafisin baru inka ádé eriyen mino vá teno.

³²“Téi fura siré tiretin tiamiyá uno. Má damú kena nanin banta ano ída fúkesin mi ma yanasinta afoká inten mino. ³³Máan tintin maen ma vara vá inaru vá kípanten mifo séinti vaya ída kanaíen kípanten mino.

**Eyo Iyampon Kayo Ano Ma
Yafiken Ban Baya Ino**

³⁴“Máan tinten mifo siretí ankan dafian ná ákona ono. Ena ena yamú óen non nareya óeniya vákeya namu avúavá bá tiretí ma vaona van ma ineine iyasin maen mai avúavá anon tiretin maman bararasí intin Bafani erin mano oyivampin ma areinien manádái afoká inten mino. ³⁵Para vara seyo, oyivan mano ma safúna fáké iyain an den ma vara rákena nanin bantafin maí damú afoká inten mino. ³⁶Minó damú tiretí ankan dafianá ákona ukhevaya vá ena ena Tiyarafenu vaípa amúkiya vasin na ákona amino. Máan tiyare vá mai yanasinta ma afoká inain damú esantareya vá Banta Anin avorá o mantano.”

³⁷Máa siren ena ena yamú Yisasi monó namun dafufin banasi mo monó baya siamiren maen inúpasí ma íkan Orifí se sin anufá un bariyaren mino. ³⁸Máan tiyákan maen minó nanin banta ano véini monó baya ineno van ena ena ákurá orun mantaaren monó namun dafufin eriyaren mino.

**Yisasin Arin Aa Van
Ma Yosein Baya Ino**

(*Matiu 26:1-5, 14-16; Maki 14:1-2, 10-11; Yoni 11:45-53*)

22 Yisi Ída Van Bereti Ma Nan Omá Damu san ma Avo Uantan Damu se ma siyain maí damú afokáin ádé en mino. ²Maí damú afoká ono van iyákan monó ánon banta kéká bá man baya ma

^e21:25 Ais 13:10; Isi 32:7; Yoe 2:31; Rev 6:12-13

^f21:27 Dan 7:13; Mat 26:64; Rev 1:7

afová ukhein kéká bá ano vanasi van periyáken betí ma Yisasin aruan purin nain aa van dosen mino.

**Yudasi Ma Yisasin Namuro
Ayampin Avían Kaono Van
Kana Ino Sein Baya Ino**

*(Matiu 26:14-16; Maki
14:10-11; Yoni 6:70-71)*

³ Dosiyákan tiyan míkan mifo sirantan kan orun kádan (12) eyo iyampon kayo finte Yudasi ne sen ma inká ena ví Isikarioti ne ma sikhein banta aúpin Ban Anon mano un peren mino. ⁴ Un pébíkan béi oren mo monó ánon banta kéká bá monó namuntá ma yafisin kéká bá ayampin ma Yisasin avían amin nain aa van bayaíen mino. ⁵ Bayaí urákan betí ankan amusin uren béin nan moní amenté uno sen mino. ⁶ Maa síkan Yudasi kana ino siren banasi ma ída véin má ma átaru inain damú Yisasin avían betin ayampin kaono van ave iyan aa van dosiyaren mino.

**Yisasi Ma Vei Eyo Iyampon
Kayo Vá Avo Uantan Dunan
Típá Neín Baya Ino**

*(Matiu 26:17-25; Maki
14:12-21; Yoni 13:21-30)*

⁷ Yisi Ma Ída Veretifin Kain Damú afoká íkan betí ankan sipisipi arará aruren niyáken Tiyarafenu ano ma Isareri nanin banta Avo Uantan ma kamaen baré ein nan ovaren me inintéin mi ⁸ Pitan nú Yonin nú Yisasi siantan oriyákan máa sen tiamemí, “Tiré kanan ore vá Avo Uantan Damú kena yunan ná teti sina mo funtáán kaono.”

⁹ Maa síkan békanan béin inaemí, “Interasá mai yanasinta mo funtáádante rafuno.”

¹⁰ Maa sen ina íkan béi evaránen tiamemí, “Tiré kanan kákan Yerusaremí

barufin ódesin ma mana vanta ano ma kákan non kura vá ma efókantiya mai vanta yakhafe vá be ma ódin nain namumpin ná ódono. ¹¹ Mai namun ma ódivinte vá má afóen ná máa se siameno, ‘Arú ano éin nan intesin ná mana karafaran bain ná tesi eyo iyampon kayo vá Tiyarafenu ano ma Isareri nanin banta ma Avo Uantein dunan maifin nante rafuno,’ sen inaeen mantino vá teno. ¹² Maa se ináesin maen béi mana kákan karafaran ma yan bain aní inti maen maifin ná dunan nan takhó bá kumanin kará bá banten mifo maifin ná dunan puntádeya saman ka ono.”

¹³ Maa síkan békanan oriyan o onákan mai ma Yisasin ano seiní ukhan mai yanasinta ódaren Avo Uantan dunan mo sáden puntáan kaen mino.

**Yisasi Ano Ma Bereti Vá Uvaini Vá Bei
Eyo Iyampon Kayo Amein Baya Ino**

*(Matiu 26:26-30; Maki
14:22-26; 1 Korini 11:23-25)*

¹⁴ Dunan nan áauí íkan Yisasi má bei eyo iyampon kayo vá ano yunan kaúden nan takhóká kumanen eúken mino. ¹⁵ Mai sakhóká kumanen eúkuvíkan betí ankan tiamemí, “Ínainpá téi uman baranté umpo Tiyarafenu ano ma Isareri nanin banta ma Avo Uantein dunan nare ma siretin má ma nan nan téi moéké tinunuiyá uno. ¹⁶ Téi siretí ankan tiamé uno. Téi ída evaráné Tiyarafenu Ano Ma Avo Uantein dunan nakhékun mi mai ma siran baré ein daná pura sen Tiyarafenui yafisimpin afoká inten mino.”

¹⁷ Maa siren uvaini non bain kápi máden Tiyarafenu susu siantáden betí ankan tiamemí, “Minó ano mai fintena masiman ure vá nano. ¹⁸ Para vara seyo, saréa fi ínainpáke safi séi ída evaráné

uvaini non nakhékun mi Tiyaarafenui yafisin afoká inten mino.

¹⁹Máan turen mana vereti orun máden Tiyaarafenu susu siantáden temí, “Ma se sui siredí ankan ayaino van amé umpo vá máan mana iyákeya vá te nan inisintano,” siren kisiariyan amen mino.

²⁰Amin narákan uvaini non kápi orun mamaren mai ma ein avúavasí ana en máa semí, “Tiretin aya ino siré ma sesi nare vanaeruna mai ma uvaini kápi anon tiretin má ma kasen ban auyen avúavá aní inten mino.” ²¹^lMáa siren betí ankan tiamemí, “Téin ma sivían namuro ayampin ma kaono van inikhein banta vái ma yunan nan takhóka ten má manafin ban mino. ²²Tiyaarafenu ano ma fefá tikhá einíen Banta Anin mano furinten mifo véin ma avían namuro ayampin kain nain banta vará arunan uantano.”

²³Máa síkan eyo iyampon kayo ano mai vaya iníden betiyan inain maran en orera iyan temí, “Iye anó mai avúavasí inté iná tino.”

**Eyo Iyampon Kayo Ano Ma Iyé
Kákaní Inten Nafino Sen
Asive Asive Ein Baya Ino**

²⁴^jMáa siran beni eyo iyampon kayo ano vetin aúbaná pinté iye anó kákani o inten nafi siren beraran arafen asive asive en mino. ²⁵^kMáa sen orera iyákan Yisasi vetin tiamemí, “Ma varará ma ena anan nanin bantai kin kéká bá aví bain banta kayo vá ano ákonaen banasirá dafisiyáken betin asen aren iyáken maen betiyan nan banasi ayain kayo uno sé iyan mino. ²⁶^lMáan tukhen mifo siredí ankan ída vá máan tiyáke vá tiretimpin ma kákaní ukhein banta ano vá iyampon arará an dantin ná inká tiredí ánoní ma ukhein banta ano vá tiredíi yoran banta

an ná dano. ²⁷^mMáan tukhen mifo iye anó kákaní ukhen nafino. Mai ma kumanten dunan niyain banta ano fi áa mai ma yunan kuan amiyain banta ano fino. Mai ma kumanten ma yunan niyain banta anon kákaní ukhen mifo séi siredí aúbaná doran banta an dakhéi siretina aya iyá uno. ²⁸Akhenókain danasinta ma sempin afoká iya mae siredí ankan ten má bare ono. ²⁹Bare ompo se sífóe ma inaru yafisin téin timeiní ananéi siretin inaru yafisin amé uno. ³⁰ⁿMáan tukhantiya mai yafisimpin tiredí ankan tesi yunan nan takhóka kumame yunan má non má niyáke Kini kará kayorá kumameya sirantan kan orun kádan (12) Isarerri anantá dafíkeya vetin daimin nono.”

**Yisasi Ma Pita Nan Téin Oyan
Timin Nono Sein Baya Ino**

*(Matiu 26:31-35; Maki
14:27-31; Yoni 13:36-38)*

³¹Máa siren Yisasi semí, “Saimoni oe, Saimoni oe, ineno. Uviti yasáden ma antan má asu vá ma yo aireiní en tiredíi mumunan akhenóka uan onano van Ban Anon mano ina ukhen mino. ³²^oMáa sikhén mifo Saimoni oe, éin ayaintin eni mumunan ída eravino van téi fefái simúkukhé umpo éi ma sirun noe sire ma ovaráne erinte vá e afá aváen ná ákona uantano.”

³³Máa síkan Pita evaránen tiamemí, “Bafan noe, éin má karavusifin oré inká en má puré ono van útakhé uno.”

³⁴Máa síkan Yisasi semí, “Pita oe, sare inuran manan kókore ída asikhantiya kanú manáu dádá téi nan ída afová ukhé uno sin nono.”

³⁵^pMáa siren Yisasi vei eyo iyampon kayo inaemí, “Tiretin nan ma sesi yorari

^l22:21 Íbo 41:9; Yon 13:21-22 ^j22:24 Ruk 9:46

^k22:25 Mat 20:25-27; Mak 10:42-45 ^l22:26 Mat 23:11; Mak 9:35 ^m22:27 Yon 13:12-15 ⁿ22:30 Mat 19:28 ^o22:32 Yon 17:15 ^p22:35 Ruk 9:3; 10:4

ono van ma siantéku oriyákeya moní unan má arantan anamun má ona váin unan má ída mamareya ore ono. Ore ompo maí damú tiretí ankan manáa yana san o afasíe fono áa ída fino.”

Síkan, “Ída ino,” sen mino.

³⁶Ída ino ma síkan maen Yisasi vetí ankan tiamemí, “Mai saréa vá moní unan nafi ona váin unan nafi ma van nain banta ano varesin ná baenati ma ída van nain banta ano vá ei iyon au anamun ná mo sarí ure vá maí monípó mana vaenati miyaní ono. ³⁷Para vara seyo, Tiyarafenui vompompin máa síkhan mino, ‘Banasi ano véin oman mana namu vanta an daren maen béin e yankáan ume nanin banta vá kainten mino’ *Ais 53:12* ma síkhá ein mai ano séin timaniná dáko intéfi siretin tiamé uno. Tiyarafenui vompon dókifin ma sen nan tiádan baré ein baya ano inka yáko íríf iyan mino.”

³⁸Máa síkan bei eyo iyampon kayo ano semí, “Bafan noe, setí ankan kankanan baenati yékun ban mifo onano.”

Síkan Yisasi evaránen betin tiamemí, “Mai khanai ino.”

Yisasi Ma Ketsemaní Amúkein Baya Ino

(*Matiu 26:36-46; Maki 14:32-42*)

³⁹Yisasi ma ena ena varé iyain avúavasíen kákan baru me ampíren Orifí anufá oríkan bei eyo iyampon kayo ano vákuren oren mino. ⁴⁰Orifí anuyontá ma o unaven betí ankan máa sen tiamemí, “Ákonae amúkiyare vá akhenókafin ída erave ankamono.” ⁴¹Máa siren Yisasi vetí ankan me ampíren manáa e afá-nen nentá oriven aron mo yuráfúden máa sen amúkemí, ⁴²“Tifóe oe, éi ma ananu iyante vá téin pintena ma uman do varan nompó mai ída vá téinti sinunu

yakhafiyáke vá ei anunu ana vá dakha-fono.” ⁴³Máa síkan inaru fáké mana enisori ano véi vaintá eriven ákona amen mino. ⁴⁴Yisasi ma ovaren me aváduan onan maen aufá uman dákan béi moéken ákonaen amúkiyan béin au fáké imúkan mano nare ma kapí kapí einfen barará eraven mino.* ⁴⁵Béi amúkuan kíparen e manten evaránen bei eyo iyampon kayo vaípa oren o onákan betí arunaná ano auunan ai íkan auun baren orera ukharen mino. ⁴⁶Betí ankan auun bakharé íkan béi mo avoriyan temí, “Akhenókain mano siretí ankampin dáko intiya erave ankamin nampo ída auun bariya váke orun mantave amúkono.”

Yisasini Namuro Kayo Ano Ma Véin Pákein Baya Ino

(*Matiu 26:47-56; Maki 14:43-50; Yoni 18:3-11*)

⁴⁷Yisasi fara vaya siyan maen kokhon nanin banta kéká ano eren mino. Eríkan maifin tiyan míkan mifo sirantan kan orun kádan (12) beni eyo iyampon kayo fintena mana Yudasín ne sin banta ano aní uanten eriaeren Yisasín me amónano[†] van beni ádé eren mino. ⁴⁸Eríkan Yisasi véin máa sen inaemí, “Yudasi oe, éi amónan avúavá pókesá Banta Anin avían namuro ayampin kaono vara fono.”

⁴⁹Máan tiyain má Yisasín má ma varé ein eyo iyampon kayo ano onákan mai yaná afoká iyaimpin betí ankan máa sen Yisasín inaemí, “Bafan noe, éi eyo sinona vará ma kéká tetisi vaenati fóké aronte rafuno.” ⁵⁰Máa síyákan mai finté mana ano vaenati máden monó ánon banta kékái ánon bantai yoran banta ayan kuron pákena átaren do síkaan karúdan barará eraven mino.

*22:44 Manáa feyante vompompin ves 43 vá 44 vá ída varen mino.

†22:47 Mai amónan avúavá ma vain mai arona ma kamaen avábá in mino.

⁵¹ Máan tíkan Yisasi onen temí, “Mai avúavá ifá ano,” siyáken mai vanta átaarentá ayan kaíkan evaránen kamaen mino.

⁵² Máan turen monó ánon banta kéká bá inká monó namuntá ma yafisin kékái ánon banta vá banasii ánon banta kayo vá ma véin pákano van erein kéká máa sen tiamemí, “Mana umoyan bantá pákano vará tiretí ankan baenati vá dan má útaaré ere fono. ⁵³ Ena ena yamú ma séi siretí ankan má monó dafufin bákuya ída siretí ayan tentá kain na varéen nan mi sítípai ákona ano esantan inka siretíí yamusíen mino.”[‡]

**Pita Ma Yisasin Nan Ída Afová
Ukhé Uno Sein Baya Ino**

*(Matiu 26:69-75; Maki 14:66-72;
Yoni 18:15-18, 25-27)*

⁵⁴ Máa siran betí ankan Yisasin do fáken monó ánon banta kékái ánon banta amápin oriyákan Pita má dere vetin oyampá dakhafen manáa nentá oriyaren mino. ⁵⁵ Oren manáa vanta kayo ano mai namun ma vain dafu aúban ira sáden kumanen eúkukhan Pitán má maifin baren mino. ⁵⁶ Bákan mana yoran arinta ano Pitan onan irará kumantan ben ádé eriven purefure en ódaren temí, “Ma vanta vá deren Yisasin má baren mino.”

⁵⁷ Máa síkan Pita umeren temí, “Anasi oe, séi ída uron mi véin afová ukhé uno.”

⁵⁸ Máa siren manáa vákan ena vanta vá ano yere óden temí, “Éin má dere veni kéká pintena vanta ono.” Síkan Pita umeren temí, “Ída ino. Téi ída veni eyo iyampon bá uno.”

⁵⁹ Máa siran mana áau orivíkan ena vanta ano ákonaen temí, “Ma Kariri fáke vantán báken béin má deren ben má baréikái fura siyá uno.”

⁶⁰ Máa síkan Pita evaránen temí, “Banta oe, mai ma éi siyaona vaya séi ída uron mi afová ukhé uno.” Máa siyain má anan kókore asen mino. ⁶¹ Asíkan Bafan mano yo vaéan Pitan oniyain má mai ma Bafan mano ma véin tiamen ma “Sare inuran kókore ma ída asikhantiya éi kanú manaú dádá téin nan ída afová ukhé uno sin nono.” Ma sen Pitan tiamikharé ein baya ovaren me inen mino. ⁶² Iniyáken béi varufá araven morun kákan íff den mino.

**Dafisin Banta Kéká Ano Ma Yisasin
Máká Máká Ein Baya Ino**

(Matiu 26:67-68; Maki 14:65)

⁶³ Máan tiyákan Yisasintá ma yafíká ein banta kayo ano véin máká maákáin baya siyáken ankamen mino. ⁶⁴ Máan tiyáken béin auurá davaráe anan póké damuren ankamiyáken máa sen inaemí, “Éi sakhanampaí eya aví dano iye anó ankamiyan nafino.” ⁶⁵ Máan tiyáken kokhon ída funtákein baya fóké béin asiren ankayanten mino.

**Erotin Nú Pairotin Nú Ano Ma
Yisasin Daimein Baya Ino**

*(Matiu 26:59-66; Maki
14:55-64; Yoni 18:19-24)*

⁶⁶ Do khakhen ákurasí íkan man baya ma afová ukhein banta kéká bá monó ánon banta kéká bá ano manafin e átaru uaren Yisasin do aviren betí uman ma yaimin banta kayo vaintá oren mino. ⁶⁷ Aviren moren betí ankan temí, “Éi mai ma Tiyarafenu ano ma vei vanasi evaránen avirano van ma aní ukhá ein banta ma éi vanteya setin tisimeno.”

Síkan Yisasi evaránen temí, “Tiretí ankan ma siamékuya siretí ída mumunan inoná uno. ⁶⁸ Inká téi ma manáa vaya ma siretí ankan baonafá ma ina

[‡]22:53 Ma sítípa maen mai Ban Anoni avúavá ino.

[¶]22:54 Mak 14:53-54 [†]22:67 Yon 3:12

ékuya siretí ída ovaráne sisiminona van muno. ⁶⁹ Máan tukhantin taréa ráké ma orin nain Banta Anin mano Tiyarafenu ma kákan ákona vaini ayan kuompái kuman inten mino.”

⁷⁰ Máa síkan minó banta kayo ano in-aemí, “Mai éi Tiyarafenu Anin na fono.”

Síkan béi evaránen temí, “Mai inka siretiyantá ten nan pura se ono.”

⁷¹ Máa síkan betí ankan temí, “Inka veyantá be oo fóké mai veya sí inétifer-una ída ena vanta sékun beni avúavá eman tian páman inten mino.”

**Monó Ánon Banta Kéká Ano
Ma Yisasin Pairotin
Ayampin Kaein Baya Ino**

*(Matiu 27:1-2, 11-14; Maki
15:1-5; Yoni 18:28-38)*

23 Máa siren minó banasii ánon banta kayo ano e manten Yisasin do aviren Pairoti vaipá oren mino. ² Mo khauren araíen ben daimiyáken máa semí, “Tetí ankan onékun ma vanta ano setisi vanta anasii avúavá máden asuse uren maen kamanin ma takisi amin dere are usintiyáken inká beyanan Tiyarafenu ano ma vei vanasi evaráné avirano van ma aní ukharé ein kin muno siyaren mino.”

³ Máa síkan Pairoti ano Yisasin inaemí, “Éi Yutan kayoi kin na fono.”

Síkan Yisasi evaránen béin tiamemí, “Eyo mai inka eyantá te ono.” ⁴ Máa síkan Pairoti ano monó ánon banta kéká bá banasi vá máa sen tiamemí, “Ma vanta finte séi ída mana aau yosé uno.”

⁵ Máa síkan betí ákonaen temí, “Béi Karirí arái uren Yudiá ankinafá eúkiyáken banasi ará mantein monó baya o sen eriyen baren mi mará eren mino.”

⁶ Máa síkan Pairoti ano mai veya iniren betí ankan inaemí, “Ma Kariri

fákana vantá fino.” ⁷ ^t Máa sen ina íkan betí ankan eyo siyaimpin maí damú Eroti yere Yerusaremí e varé íkan Pairoti ano afová en béi ma yafikein bara akhen pákena vantán Yisasi van mino siren béi vaipá tiantan oren mino.

⁸ Oriyain má Eroti ma Yisasin oniyan maen pefá beni veya ana iniyáken béi onano van iyaren pasen béi manáa aní danasí intí onano van anunu iyáken kákantá amusin en mino. ⁹ Amusin iyáken béi ano Yisasin kokhon danasinta van inaiyaren mifo véi ída evaránen mana veya véin tiamen mino. ¹⁰ Máan tiyaimpin monó ánon banta kéká bá man baya ma afová ukhein kéká bá ano ádé e mantaven Yisasin ákonaen daimen mino. ¹¹ Daídan Erotin má bei aruvin banta kéká bá ano Yisasin máká maáká uren kini ayá au anamun uantáden evaránen tiantákan Pairoti vaipá oren mino. ¹² Oriyákan Eroti ano fefá Pairotin namuroí uantiyaren maen maí damú ana míkanan evaránen aronaíen mino.

**Pairoti Ano Ma Yutan Kéká
Ayampin Yisasin Amein Baya Ino**

*(Matiu 27:15-26; Maki
15:6-15; Yoni 18:38–19:16)*

¹³ Máan turen mairá Pairoti ano monó ánon banta kéká bá banasii ánon banta kayo vá banasi vá arákan e átaru en mino. ¹⁴ E átaru uvíkan betin máa sen tiamemí, “Tiretí ma vanta avireya se vaintá mere véi ano vanasii avúavá máden asuse iyaren mino sen ná maé tiretin avorá mai ma siyaona yanasinta van ina uré ída mana uman dosé uno. ¹⁵ Máan tékun Eroti má deren máan mana en mi siretí ankan onano van ma vanta ovará- nen tiantan tetí barunafá erikhein mi séi ída kanaíé béi nan purino senté uno.

16-17 Máan tukhein nan mi véin dafiyó anan ankádé tiantékun orinten mino.[¶]

18 Máa síkan minó nanin banta ano mana mani oovararen temí, “Barabasin utúantesin tetimpin eriyantiya mai vanta aruan purono.” 19 Barabasi maen kamanin ma aruvin arái uren banta arin púbíkan mai van béin pákaan karavusifin kain baren mino.

20 Pairoti ano Yisasin utúantantin orino van enádá bá betin inaen mino. 21 Ina iyákan betí ankan para oovariyan báken temí, “Arono, véin daa unkamádantá arono.”

22 Máa sen oovariyaimpin Pairoti ano kanú manaú dádasi en betin tiamemí, “Para vae. Téi ída ma vanta fintena mana uman dosikheruna ída kanaíé béin nan purinten mino senté umpo véi náí yaná auisá ukha vae,” siren béi semí, “Máan tukhein nan mi véin dafiyó ana ankádé tiantékun orinten mino.”

23 Máa síkan Pairoti ano Yisasin daa unkamádantá arino van betí moékentá ákonaen oovariyan béini vaya yararen mino. 24 Máa siyaimpin Pairoti ano vetí ankani vaya ánain dakhafen Yisasi nan purino sen mino. 25 Máa siren betí ankani anunu yakhafen Yisasin betin ayampin amiyáken mai ma kamanin má aruvin arái uren ma vanta aruan púdan ma fakaan karavusií uran baré ein banta utúantan oren mino.

Daa Unkamádantá Ma Yisasin Arein Baya Ino

(*Matiu 27:32-44; Maki 15:21-32; Yoni 19:17-27*)

26 Máan turan aruvin banta kéká ano Yisasin do aviren oriyaré íkan mana Saimonin ne sin Sairiní baru fáke vanta ano Yerusaremí ódono siren eriyaréin mai vanta fákaren duvun íkan Yisasinini yaa unkamádan mamaren ben ánain bákuren oren mino. 27 Oriyákan kokhon nanin banta ano Yisasin bákuriyan manáa nanin kayo ano ifisana yariyan béi nan e ífí den oriyaren mino. 28 Máan ten oriyá íkan Yisasi yo vaében betí ankan tiamemí, “Yerusaremí nanin kéká soe, se nan ída ífí diyákeya sirétiyan má tirití akhafana va san mana vá ífí dano. 29^uPara vara seyo, ínaimpá damú afoká inti mae siretí máa sin nono, ‘Aa nanin kayo ma arápin ída iyampon báin ma inká ída ma iyampon nan kuven ma ukhein kéká ano vá amusin ino.’ 30^vMáa siren maen

‘Kákan anuyon kayo van betí máa sinten mino, “Un kaure setin dararano,” inká tító anuyon kayo van “tetin maman aúpasí ono.” ’ Ose 10:8

31 Máa sinten mifo vanasi ano ma auyen daa ma irafin karúdentin maen ída kamaen kanten mifo kakhein daa ma irafin karúdentin maen ainen mi kanten mino. Máan mana en mi séi funtákeruna vanta ma namu avúavá usintiyaré esin maen Tiyarafenu ano namu nanin banta moékakhein uman mi aminten mino.”[§]

32 Aruvin banta kayo ano ena aau vantá kan Yisasin má arintin purino

[¶]23:16-17 Manáa Tiyarafenui vompon dókifin ves 17 asotúin baya máa sikhén mino. 17 Romu kaminini avúavá ano máan tukhemí, “Isareri nanin banta Avo Uantein Omá Damusá mana karavusi utúantantin ná orino.”

§23:31 Kiriki vaya máa sikhemí, Banasi ano ma auyen daará ma mai avúavá bariyaren maen ira ma kakhein daará intesá inten nafino.

van aviren oren mino. ³³ Aviren Ánon Dampa e siyain dontá o unaven Yisasin aúban kaúden aau vantá kanan pinta mana Yisasini ayan kurompá kaen maen ayan ópá ena vanta khaen uren aren mino. ³⁴ ^wMáan turen aruvin banta kayo ano Yisasini ona varé oreraono van kati siyákan Yisasi máa semí, “Tifóe oe, vetí ankan ída afová ukhen mi mai yaná bariyan mifo vetíi ume vá ampiantano.”**

³⁵ ^xMáa siyákan banasi ano mairá mantakhen oniyan maen ánon banta kéká ano Yisasin así mun uantiyan temí, “Ena nanin banta kayo anan ayaen noren mifo Tiyarafenu ano ma vei vanasi evaránen avirano van ma aní ukhá ein banta ma vanten maen ásin beyantá kanaíen beyan aya ino.”

³⁶ ^yMáa siyákan aruvin banta kayo ano yere eriven béin nan tiren intiyáken íta uvaini amiyan ³⁷ temí, “Éi fura se ma Yutan kayoi kin ma vanteya eyantá eyan aya ono.”

³⁸ Máa siren béin ánotá, “MA YUTAN KAYOI KIN MINO” sikhein bompon uvaman kaen mino. ³⁹ Máan turan aau vantá kan ma arukhá ein pinté mana ano Yisasin máa sen oyampá baya semí, “Éi Tiyarafenu ano ma aní ukhá ein banta ma vanteya eyan aya uare verasan má dere siya ono.”

⁴⁰ Máa síkan ena vanta ano mai vaya iniren mai vanta asiyan temí, “Ma vanta ma variyainí ukhein uman manan e má dere variya ompo éi ídá Tiyarafenu van periya fono. ⁴¹ Erasan ma variyá eruna

avúavákái ma uman bariyá umpo ma vanta ano ída mana aauí ukhen mino.”

⁴² Máa siren béi semí, “Yisasi oe, éi ma ei yafisin aúpin^{††} ma orinona yamusá téi nan inisintano.”

⁴³ Máa síkan Yisasi evaránen béin tiamemí, “Téi fura siré éin tiamiyá uno. Taréa anan téin má inarufá ban nono.”

Yisasi Ma Furein Baya Ino

(*Matiu 27:45-46; Maki*

15:33-41; Yoni 19:28-30)

⁴⁴ Bayan aúbaní iyain má títipa ano ma vara yaranten bákan kanaú manaú áauí iyain má do kakhen mino. ⁴⁵ ^zMáan tiyan maen áauí fanu kípiyain má anan kákan monó namumpin ma kákan davaráe khuran baré ein mano veyantá áubáná kanáaren maman kankananién mino. ⁴⁶ Máan tíkan Yisasi avádóden oovaren temí, “Tifóe oe, se saunan éin ayan arumpin kaé uno,” siyan puren mino.

⁴⁷ Máan tíkan aruvin banta kayoi yafisin banta ano mai yaná ódaren Tiyarafenu aví maman daní iyáken temí, “Pura uron ten ma vanta ída aau van puntákein banta ino.” ⁴⁸ Máa siyákan mai ma ariyain ma onano van e iyukharé ein nanin banta ano mai yanasinta ódaren arunaná pinté evaránen betíi varufá oreraen mino. ⁴⁹ Máan tiyákan Yisasin arona kayo vá béin ma yakhafen Karirí me ampiren erikhá ein nanin kayo vá ano manáa nentá e mantakhen mai yanasinta ma afoká iyain oniyan mino.

**23:34 Mánáa feyante vompompin mai vaya ída van mino.

††23:42 Manáa Tiyarafenui vompon dókifin mará asotúin baya máa sikhemí, *eni kini ákonafó*

^w23:34 Íbo 22:18; Ais 53:12 ^x23:35 Íbo 22:7-8 ^y23:36 Íbo 69:21

^z23:45 Ibu 6:19-20; 10:19-20

Yisasin Ma On Aimpin Masí Ein Baya Ino

(*Matiu 27:57-61; Maki
15:42-47; Yoni 19:38-42*)

⁵⁰Banasii ánon banta kéká pintena mana Yosepin ne sin kamaen puntákein banta varen mino. ⁵¹Béi maen Arimatía se sin Yudiá barafin bain baru ráke vanta váken béi Tiyarafenui yafisin baru van ave ukhen pasen ena ánon banta kayo ano ma Yisasin arono van tiyain baya van ída ará manafiní ukharen mino. ⁵²Máan tukharen mai vanta ano Yisasin au ifá intí barano van Pairoti vaipá mo inaen mino. ⁵³Ina íkan kana ino síkan mai vanta ano Yisasin au un mamádan barará eravíkan efanten davaráe fóké uke uke uren ompin mana masí bo-raádan bákan maifin ída mana vanta khaúkaré ein masípin baren mo khaen mino. ⁵⁴Sabati ráke yanasinta utaren arakhókuin damú baré íkan ádé anantá Sabati ará ono van en mino.

⁵⁵Máan tiyákan Karirí má me ampiren ma Yisasin bákuren erein nanin kayo ano Yisasin au ma masípin kain nain onano van Yosepin bákuren oren mino. ⁵⁶aÓdaren mai nanin kayo ano evaránen betí amápin oriven manáa aunka uveri vá pauran kayo vá utaádaren man baya ano ma sikheinfen Sabati yamú avíken mino.

Yisasi Ma Evaránen E Mantein Baya Ino

(*Matiu 28:1-8; Maki
16:1-8; Yoni 20:1-10*)

24 Santé pe ákura suron anasi kayo ano mai ma kama aunka iyain uveri ma utaádan baré ein mamaren masíká oren mino. ²Betí ankan oren o onákan masí oyirá ma iyádan baré ein onámaná ano e vaébaé en orikharen

mino. ³Máan tukheimpin betí ankan maifin ódiven onákan Yisasin au ída varen mino. ⁴Ída vákan betí ankan mairá mantakhen mai van kokhon ineine iyan baré íkan kankánan banta ano vetin ádé e mantavíkan míkani auí daná kaké moékan afayu ma fanu seinien mino. ⁵Máan tíkan mai nanin kayo ano akhokho van iyáken anuran bara finí íkan mai kanan banta ano máa semí, “Tiretí ankan pará purin banta kayoi varu finté ma evaránen aunan mamaren ma e mantakhein banta van me yosiya rafono. ⁶bBéi fefái aunan mamaren e mantakhen mafin ída van mifo véi ma Karirifá báken ma siretin tiamiyaré ein baya vá ovare me ineno, ⁷Banta Anin ume vanta kayo ayampin amintin ná mai kéká ano véin daa unkamádantá arintin púkaren kanú manaú damusí ma intin ná béi evaránen aunan mamaren e mantano, sen béi siretin tiamikharen mino.” ⁸Máa síkan mai ma véi sikhareé ein baya vetí ankan ovaren me inen mino.

⁹Ovaren me iniren betí ankan masí me ampiren evaránen orein mano mo siyan míkan mifo sirantan mana orun kádan (11) eyo iyampon kayo vá ena nanin banta kéká bá mai ma afoká ein danasinta van tiamen mino. ¹⁰Makdaráke nanin Maria má Yoana má inká Yemisín anóe Maria má ena nanin kayo vá anon masíká orikharen mi mai ma afoká ein danasinta van eyo iyampon kayo me siamen mino. ¹¹Máa síkan eyo iyampon kayo ano vetin nan kampun bayan tiyan mino siren betíi vayará ída mumunan en mino. ¹²Máa síkan Pita e manten tavaen masíká orein maifin o mátimen onákan davaráe kayo ana vaimpin béi evaránen mápin oriyáken mai náisá ukhen nafi siren kokhon ineine en mino.

**Emeasí Ayana Fáke Ma Kankanan
Banta Ano Yisasin Onein Baya Ino**

(Maki 16:12-13)

¹³ Anasi kayo ma masíká oren damú anan kankanan eyo iyampon mano Yerusaremíké tiyan míkan mifo sirantan mana orun kádan (11) kiromitará ma vain baru Emeasí oren mino. ¹⁴ Oriyáken mai ma afoká ukhein danasinta van e sen oriyaren mino. ¹⁵ Míkanan mano mai yanasinta van kokhon baya sen oriyákan Yisasi vékanani ádé afoká uven békan má oren mino. ¹⁶ Oriyákan manáa yaná ano vékanan auurá iyábíkan Yisasi ino sen ída oman afová en mino.

¹⁷ Ída afová íkan béi míkanan máa sen inaemí, “Tiré kanan náí vayá té oriya fono.” Síkan míkanan o mantavin békanan auná ano arunaná bá ma vainíen mino. ¹⁸ Máa sen ina íkan míkanan pinté Kireopasin ne sin banta ano evaránen béin inaemí, “Éi enafákesá erikheyá Yerusaremí barufin ma saréá afoká ukhein danasinta ída afová ukhe fono.”

¹⁹ Máa síkan Yisasi vékanan evaránen inaemí, “Náí yanasinta fino,” síkan békanan evaránen béin tiamemí, “Nasaretíke Yisasin ne sin banta mai véi sakhanampa vanta váken Tiyarafenu avorá bá banasi avorá bá ma vaya seipá ákonaen baya siyáken doriyaré ein banta amaniná ma mai yanasinta afoká ukhein nan mi siyá uno. ²⁰ Tetisi monó ánon banta kéká bá banasii ánon banta kayo vá ano véin kamanin ayampin kaíkan kamanin mano véin nan arintin purino síkan daa unkamádantá béin aren mino. ²¹ cTetí ankan béin nan mumunan iyáké Tiyarafenu ano ma Isareri nanin banta evarané avirano van ma aní ukharé ein banta ino siyá

ékun mi véin arin púbíkan kanú manaú damusí ma iyain má mai ná dákó en mino. ²² Taréa fe ákura suron tetisi kéká pinté manáa nanin kayo ano masíká o onákan ²³ béin au ída vaimpin ovaránen tetí ankan tinú deruna vaya me sisimiyáken enisori kayo onékun mai kayo ano Yisasi nan evaránen aun mamaren e mantakhen mino. ²⁴ dMáa síkan tetí ankan pinté manáa vanta kéká ano masíká oriven mai ma anasi kéká ano ma sein danasinta onen mifo véin ída onen mino.”

²⁵ Máa síkan Yisasi vékanan tiamemí, “Tirékanani ineine ída vákai sakhanampa vanta kayo ano ma minó baya sikharé ein nan ída aine mumunan iya ono. ²⁶ eMai ma Tiyarafenu ano ma vei vanasi evaránen avirano van ma aní ukharé ein banta ano vá uman nare mamaren ná ínaimpákesá Tiyarafenui kakhampin un perano ma sikharé ein tiré kanan ídá afová ukhe fono.” ²⁷ fMáa siren Mosesi ma uvamádan baya ráké nare arái uren minó sakhanampa vanta kayo vá ano ma Tiyarafenui vompon dókifin ma veyan nan tiádan baré ein baya kayo míkanan tiamen mino.

²⁸ Máa sen oriyaren betí kanú manaú ma vano van inikharé ein Emeasi varu ádé ma oríkan maen Yisasi manáa vá orono van en mino. ²⁹ Orono van íkan békanan mano véin ákonaen ayópá iyáken temí, “Ádé anantá áau orun peranton iyain duninten mifo verasan má bano.” Síkan béi míkan má bano van mápin oren mino. ³⁰ Ínaimpáké betí ankan dunan nano van íkan Yisasi míkan má dunan nan takhoká kumamen bereti máden Tiyarafenun tusu siantáden békanan kisian amen mino. ³¹ Máan tiyain má békanan auu sapé tíkan béin afová en oniyain má manádá afeyóbíkan

^c24:21 Ruk 19:11; Apo 1:6

^d24:24 Yon 20:3-10

^e24:26 Ruk 9:22

^f24:27 Íbo 22:1-21; Ais 53

ída onen mino. ³²Ída oniyáken míkanaan ben inain maran iyan temí, “Erasan ma aayanafá eriyákun ma Tiyarafenui vompon pintena ana vaya ma sisimiyákan maen erasan tirá mantiyaren mino.

³³Máa siren míkanaan ainen e manten Yerusaremí oren o onákan tiyan míkkan mifo sirantan mana orun kádan (11) eyo iyampon kayo vá manáa kéká bá iyukhen baren mino. ³⁴^gIyukharen máa sen békanaan tiamemí, “Bafan mano evaránen e mantakharen pura sen Saimonin avorá dákosí ukhen mino.” ³⁵Máa síkan inká békanaan mano aayanafá ma afoká ein danasinta vá inká bereti ma kiseintá ma oman pámanein má betin tiamen mino.

Yisasi Ma Vei Eyo Iyampon Kayo Avorá Ma Afoká Ein Baya Ino

(Matiu 28:16-20; Maki 16:14-18; Yoni 20:19-23)

³⁶Betí ankan mai ma afoká ukhein baya van para siyan baré íkan Yisasi veyantá mai aúbaná e mantaven máa semí, “Ará kusin masá bano.”

³⁷^hMáa síkan betí ankan ma inein mano mana van mi oniyá uno siren anú diyáken akhokho van en oreraen mino. ³⁸Máan tíkan Yisasi vetí ankan máa sen tiamemí, “Pará tiretí ankan anú diyákeyá kokhon ineine iya rafono. ³⁹Téin bá umpo siyan tirantan oniyákeya su siruvúan onano. Téin tu ma oniyaonaíen ban kayo aurá ída amasi vá ayampa vá banten mino.”

⁴⁰Máa siren be ayan arantan betin aníen mino. ⁴¹Ani urákan betí ankan amusin mana iyáken ída mumunan inton kokhon ineine iyaimpin betin inaemí, “Tiretí ída manáa yunan mafin denan ban nafino.” ⁴²Máa síkan iyó uádan noyana manáa maman amíkan ⁴³betí ankan

avorá béi mai noyana máden niyákan onen mino.

⁴⁴ⁱOniyákan béi máa sen tiamemí, “Téi ma siretin má ma fara váké Mosesini man baya vá sakhanampa vanta kayoi vaya vá í bompon má ano ma séin pákena sikhare ein mai minó daná ano vá pura sen afoká ino sé pefái mai yanasinta van tiamikharé uno.”

⁴⁵Máa siren béi Tiyarafenui vompon dóki fintena vaya ana vetí ankan kamaen inino van afova amen mino. ⁴⁶Béi máa sen betí ankan tiamemí, “Tiyarafenui vompon dókifin máan mi siádan baren mino, Tiyarafenu ano ma vei vanasi evaránen avirano van ma aní ukhá ein banta ano vá uman baren píaren ná kanú manaú damusí ma intin ná evaránen masí pinté e mantano. ⁴⁷Béin avisá minó nanin bantafin tiamintin ná ará baerantin Tiyarafenu ano vá betí ume ampiantano. Mai yoran Yerusaremísá arái ino. ⁴⁸^jMáa sikhare ein paseya siretí anon ma ma afokái ma oneona yanasinta vá ena nanin banta mo siameno. ⁴⁹^kTiretí ankan ma fefá te Sifóe ano ma Kantá Aunan ma iyáantákaré ein mai séi siantékun tireti vaípa eranten mifo ma kákan barurá ana vá bare vá ínaimpákesá mai Tiyarafenui ákona vá baran nono.”

Yisasi Má Inarufá Ódein Baya Ino

(Maki 16:19-20; Aposeri 1:9-12)

⁵⁰Yisasi vetí ankan avían Betaní moren ayan daní uren avu uanten mino. ⁵¹Avu uantiyákan Tiyarafenu ano véin aviran betin me ampiren inarufá óden mino. ⁵²Ódivíkan betí ankan aron durafúden bentá monó tiantáden amusin iyáken Yerusaremí evaránen óden mino. ⁵³O váken ena ena vetí ankan monó na-

^g24:34 1Ko 15:4-5 ^h24:37 Mat 14:26 ⁱ24:44 Ruk 9:22

^j24:48 Yon 15:27; Apo 1:8 ^k24:49 Yon 14:16; 15:26; Apo 1:4

mumpin Tiyarafenu aví daní iyan baren
mino.

YONINI KAMA VAYA INO

(Yoni)

Yonini Kama Vaya Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Sebetin anin Yoni ano ino.

Uvarein orana ino.

AD nainti (90) ráké mana antareti (100) fin mi ma vompon uvanten minon ten inikhen mino.

Ma vompon ma uvantein baru ino.

Esiá barafin ma áau orun perápá ma vain kákan baru Efesasí ino. Mai vanta karavusí ono van Aisiní un nompin Pat-mosí musóká tiantan o váken mi Aúpá Baré ein Baya Ma Sian Dákó Ukhein Bompon uvaren mino.

Ma vompon ma uvaman amikhein kéká ino.

Minó Yisasintá ma mumunan iyain kéká ino. Yutan kéká bá Kiriki kayo vá inká Romú nanin banta ma monó tiyán mumunan iyain kéká báí ino.

Nái ana vará ma vompon uvanten nafino.

Ma vompon ma yankafin nain kéká ano Yisasin nan Tiyarafenu Anin mino siren afová ino van mino.

Baya Ano Vantaí Uven Ma Varará Teti Ankan Má Baren Mino

1¹Esé arafen minó daná ída afoká ukhan Baya varen mino. Baya ano Tiyarafenu vá báken mai Vaya ano Tiyarafenu baren mino. ²Esé arafintá Baya ano Tiyarafenu vá baren mino.

³^mTiyarafenu ano véin pinté anan minó daná uvamádan afoká ukhen mifo mana yaná ano veyan táké ída afoká ukhen mino. ⁴ⁿAyun ma fara van oriyan ban aunan béimpin bákan mai aunan manon minó nanin banta oon uruanten mino. ⁵^oMai oon mano sítípañin kiyan bákan maen títpa ano ída véin iyákaren mino.

⁶^pTiyarafenu ano monó non péantan banta Yonin tiantan eren mino. ⁷Mai ma erein béi ano mai ooni vaya sian amá urantin minó nanin banta ano veni vaya iniren mumunan ino van mino. ⁸Mai ooni vaya máa sian amá ono van mi Yoni eren mifo véi ída mai oon mino. ⁹^qMai ma fura sikhein oon mano ma vanasi kakhaantiyain manon ma varará eriyán mino.

¹⁰Tiyarafenu ano véin pinté uaren bara uvantaré íkan béi ma varará e van mifo vanasi ano ída véin oman afová en mino. ¹¹Béi vei vara anará erin mifo vei kéká ano ída véin aviren mino. ¹²Ída aviren mifo véintá ma mumunan ein nanin bantan maman Tiyarafenu akhafanaíen mino. ¹³^rBetí ankan be anóe afóeni narera safi aui anunura safi vantai anunura safi ída Tiyarafenu akhasí ukhen mino. Tiyarafenu

¹1:1 Yon 17:5; 1Yn 1:1-2; Rev 19:13 ^m1:3 1Ko 8:6; Kor 1:16-17; Ibu 1:2

ⁿ1:4 Yon 5:26 ^o1:5 Yon 3:19 ^p1:6 Mat 3:1; Ruk 1:13-17, 76

^q1:9 Yon 8:12 ^r1:13 Yon 2:11; 3:3-6; 1Pi 1:23

ano veyantái vetin maman be akhasí ukhen mino.

¹⁴^sBaya ano vantaí uven ma varará tetin aúbaná baren mino. Tetí ankan inka veni kakhani ákona oné tiféuno. Mai mana iyampon ma ve Afóe ano siantan ma ereini kakhani bakan inka beni sarisari vá puntákein avúavá bá béimpin bíkakhen mino.

¹⁵Mai van mi Yoni máa sen oovaren banasi siamemí, “Ten toyampá ma eriyain banta mai séi ída vákun béi fe vá ein bantan bakan beni ákona ano séin esantakhá ma vanta van mi séi fefá tiritin tiamikharé uno. ¹⁶Mai vantaftin tarisari ano moéken bíkakhái setí ankan ena ena yamú beni avábá bariyá tiféuno. ¹⁷^tPara vara seyo, Mosesin pinté uaren mi Tiyarafenu ano setí ankan man baya simen mifo sarisari vá puntákein avúavá bá mai Tiyarafenu ano ma aní ukhein banta Yisasin pinte nan baré tiféuno. ¹⁸^uÍda mana vanta ano Tiyarafenu onten mifo ve Anin mano anan be Afóen áde baken mai véi Tiyarafenu ban mi ve Afóeni vaya setin tisimen mino.

**Monó Non Péantan Banta
Yoni Ano Ma Yisasini Aa**

Uvídén Puntáantein Baya Ino

(*Matiu 3:1-12; Maki 1:7-8; Ruku 3:15-17*)

¹⁹Yutan nanin bantai anon banta kayo ano monó doran banta kayo vá Rivai kayo[‡] vá tiantákan Yerusaremí me ampiren Yonin mo máa sen inaemí, “Éi Tiyarafenu ano ma aní ukhein banta fono.”

²⁰Máa síkan Yoni mai vaya ída umeren mifo amáká máa sen tiádemí, “Tiyarafenu ano ma aní ukhein banta va uno.”

²¹^vÍda ino síkan betí ankan béin inaemí, “Mai éi sakhanampa vanta Iraiya fono,” síkan “Béi va uno” siyaimpin evaránen inaemí, “Mai éi sakhanampa vanta fono” síkan “Ída ino” sen mino.

²²Máa siyaimpin evaránen béin inaemí, “Mai éi eyan nan iye uno tiya fono. Setin tisimesirá evarané mai ma sisintá erikheruna kayo mo siameno.”

²³Síkan Yoni vetí ankan tiamemí, “Pefá ma sakhanampa vanta Aisaiyan oorá ma sen kámá bara fáké ma oovaren, ‘Bafani aa funtarano’ ma sikhá ein mai séi uno.” *Ais 40:3*

²⁴Máa siyaimpin mai ma Farasisi kéká ano ma siantan erikhá ein kéká ano Yonin máa sen ²⁵inaemí, “Mai éi ma ída Tiyarafenu ano ma aní ukhein banta fo Iraiya fo áa sakhanampa vanta fo ma vanteya mai fará banasi monó non péantiya fono.”

²⁶Máa siyaimpin Yoni evaránen betí ankan tiamemí, “Téi nompói féantiyá umpo sirétin aúbanápin mai mana vanta váka ída afová ukha ono. ²⁷^wTéi ída funtákeruna ída kanafé mai ma sen toyampá eriyain bantai arantan anamun anan útufonté uno.”

²⁸Yodení non ufá mana sító baru Betaní Yoni monó non péantiyákan mi mai yaná afoká en mino.

**Yisasi Maen Tiyarafenui
Arará Sipisipi Ino**

²⁹^xEná damú Yisasi ma Yoni vaintá eríkan ma onen máa semí, “Onano. Mai Tiyarafenui sipisipi arará ino. Ma vara ráke nanin bantai ume ma arúantan mino. ³⁰^yTen toyampá ma eriyain banta mai séi ída vákun béi fe vá ein bantan bakan beni ákona ano séin esantakhe

[‡]**1:19** Rivai e ma siyain maen mai monó doran banta kékái ayain banta kayo ino.

^s**1:14** Fir 2:7 ^t**1:17** Eks 34:28; Rom 6:14

^u**1:18** Eks 33:20; Yon 6:46; 1Ti 6:16 ^v**1:21** Diu 18:15, 18; Mat 11:14

^w**1:27** Yon 1:15 ^x**1:29** Ais 53:6-7; 1Pi 1:18-19 ^y**1:30** Yon 1:15

ne ma séku inikhá eona mai ma vanta van mi sikhareé uno. ³¹Téi ven ída afová é amino ukhéi Tiyarafenu ano ma aní ukhein banta ino sen Isareri nanin banta ano afová ino van mi monó non máan péantiyá uno.”

³² ^zMáa siren Yoni sian dákóen mí, “Téi onékun inaru fáké kukhofá nun avúaváká ten Kantá Aunan mano ven ánotá eren mino. ³³‘Eren mifo séi seyantá bein ída afová ukhékun mi Tiyarafenu ano séin tisintá me vanasi nompó péantiyá uno. Pefá Tiyarafenu ano séin máa sen tisimikharen mino. Onesin ma mana vanta ánotá ma Kantá Aunan ma eran nain mai vanta anon Kantá Aunan póké banasi non peántanten mino.’ ³⁴ ^aMáa sikhareí téi ódaréi Yisasin nan Tiyarafenu Anin mino sé tian amá é uno.”

Yisasi Ma Araí En Bei Eyo Iyampon Kayo Arein Baya Ino

³⁵ Máa sirákaren ená damú Yoni evaránen bei eyo iyampon kanan má mairá o mantakharen mino. ³⁶ ^bMantakharen onan Yisasi entavíkan Yoni semí, “Onano. Mai Tiyarafenui sipisipi arará ino.” ³⁷ Máa síkan mai eyo iyampon kanan mano iniren Yisasin avákuren oren mino. ³⁸ Avákuren oríkan Yisasi yovaéan onen békanan máa sen inaemí, “Nái vará dosiyan tafono” síkan. Békanan evaránen inaen temí, “Aru soe, inte namuná éi vaonafino.”

³⁹ Máa síkan Yisasi evaránen békanan tiamemí, “Tiré kanan eriveya onano,” siren kamí kamí áauí iyákan aviren be ma vain namumpin o vákan e varen dunin baren mino.

⁴⁰ ^cKankanan banta ano ma Yonin avaya ma iniyá ein pinté Saimon Pitan afá aváen Enduru anon Yisasin avákuren oren mino. ⁴¹ O varen ma Yisasin me ampiren maen Enduru ma esé daná barein mai ve afá aváe Saimonin dosiren máa sen tiamemí, “Tetí ankan inka Mesian oné uno.” (Mesia ne ma siyain mai máan mi sikhen mino. Tiyarafenu ano ma aní ukhein banta ino.) ⁴² ^dMáa sen tiamiren Enduru ano Saimonin aviren Yisasi vaintá oríkan Yisasi véin ódaren temí, “Yonin anin Saimoni oe, éi nan ínainpá Sifasin ne sinten mino. Mai aví ana Kiriki vaya finté Pitan nen tikhen mino.”^f

Yisasi Ma Firipin Nú Natanierin Nú Arein Baya Ino

⁴³ Ená damú Yisasi Karirifá orono van iyaren Firipin onen tiamemí, “Éi ere sen tivákurono.” ⁴⁴ Endurun nú Pitan núu varu ana Betsaidái vákan Firipin má dere mai varu ráke vanta ino. ⁴⁵ ^eFiripi ano Natanierin o omáken tiamemí, “Mosesini man bayafin má sakanampa vanta kayoi vompompin má ma sikhá ein mai vanta Yosepin anin Nasaretíké Yisasin baréi setí ankan inka oné tiféuno.”

⁴⁶ Máa síkan Natanieri evaránen béin inaemi, “Nasaretíké kaná mana kama yaná afoká inten nafino.” Síkan Firipi evaránen béin tiamemí, “Erikhe vá onano.”

⁴⁷ Máa siran Yisasi vaintá Natanieri eríkan ódaren temí, “Onano, ma vantafin ída mana kampun baya vá avúavá bá bakan béi Isareri vanta uron mino.”

⁴⁸ Máa síkan Natanieri evaránen Yisasin inaemi, “Éi intesá ureyá

^f1:42 Máí kan bíi ana mai *onámana* sen tikhen mino.

^z1:32 Mat 3:16 ^a1:34 Mat 3:17 ^b1:36 Yon 1:29 ^c1:40 Mat 4:18-20

^d1:42 Mat 16:18 ^e1:45 Diu 18:18; Ais 7:14; 9:6; Yer 23:5; Isi 34:23

téin afová ukhare vae,” síkan Yisasi evaránen béin tiamemí, “Firipi ma ída éin arakhaya fiki yaa anafin baná téi éin ontaré uno.”

⁴⁹ ^fMáa síkan Natanieri evaránen béin tiamemí, “Aru soe, éi Tiyarafenu Anin Isareri kayoi kin mono.”

⁵⁰ Máa síkan Yisasi evaránen béin tiamemí, “Téi fiki yaa ana ráke éin oné uno ma seruna mairasá éi mumunan íya fono. Ínaimpáké mai esantakhein kákan danasintan onan nono.”

⁵¹ ^gMáa siren béin tiamemí, “Téi fura siré tiretí ankan tiamiyá uno. Ínaimpáké tiretí onesin maen inaru ona yivintin Tiyarafenui enisori kayo ano Banta Anintá ódiven eraven inten mino.”

Yisasi Ma Non Maman Uvainíí Ein Baya Ino

2 Kan damú orivíkan Kariri varafin Kaná barurá anasi iran omá bákan maifin Yisasin anóen aran o varen mino.

² Yisasin má bei eyo iyampon kayo vá dere arákan mai omápin o varen mino.

³ O varé íkan uvaini kípavin be anóe ano Yisasin tiamemí, “Uvaini inka kípakhan mino.”

⁴ ^hMáa síkan Yisasi evaráne vein tiamemí, “Tinóe oe, pará téin e saraan maifin kaiya vae. Ída senti yamú erikhá uno.”

⁵ Máa síkan be anóe ano yoran banta kayo siamemí, “Béi ma siamin nain baya ánain ná dakhafe vá mai yaná barano.”

⁶ Yutan kayo ma vetíí monópin ma variyain avúaváká ma non peré iyain bara kave máa yan manápá ifo afápá mana un kádan bákan mai mana mana kavefin mana antareti (100) ritan non báíyan mino.

⁷ Yisasi yoran banta kayo siamemí, “Kave kayofin non dáan bíkano,” síkan

betí ankan non dáan mai kave kayo vikaan kaen mino. ⁸ Bíkarákan Yisasi mai yoran banta kayo siamemí, “Mai fintena manáa non dafeya omá afóen mo ameno.” Síkan betí ankan dafen mo amen mino. ⁹ Amíkan mai ma omaká dafíkáien banta ano mai uvaini máden naan onákan ase iyaimpin mai uvaini inte fáken nafi véi ída avofá ukharen mifo mai ma non dáan me amein kayo ano anan afová ukharen mino. Máan tukhan mai omá afóe ano anasi ma iman amin nain banta araren ¹⁰ béin máa sen tiamemí, “Kama ase ma iyain uvaini naren masiman uran ma minó banta kayo ano ma naran amu aruvin maen mi ínaimpákéi ída ase uvaini amiyain mi éi kama uvaini fara kaúdákareya saréan bare ere ono.”

¹¹ Máan mi en Kariri varafin Kaná barurá Yisasi aráien enará ukhein daná ma afoká ein mai vei kakhan má ákona vá aní uran mai van mi vei eyo iyampon kayo ano ódaren béintá mumunan en mino. ¹² ⁱMáan turan mai oyampáké Yisasi ve anóen má be afá kéká bá bei eyo iyampon kayo vá Kaná baru me ampiren Kapeniamú barurá manáa yamú orun baren mino.

Yisasi Ma Kákan Monó Namun Pinte Ma Minó Daná Sariin Banta Kayo Yo Siantein Baya Ino

(Matíu 21:12-13; Maki

11:15-17; Ruku 19:45-46)

¹³ ^jBaré íkan Yutan nanin bantai Avo Uantan Damú ádé iyaimpin Yisasi Yerusaremí oren mino. ¹⁴ Oriven onákan monó dafufin kao vá sipisipi vá kukhofá nun kayo vá sarí iyákan inká moní ma arumin kayo ano karáká kumanian kumantan mino. ¹⁵ Máan tiyákan Yisasi mana ákona anan máden

^f1:49 Mat 14:33; 16:16; Mak 3:11 ^g1:51 Esé 28:12 ^h2:4 Yon 7:30; 8:20

ⁱ2:12 Mat 4:13 ^j2:13 Eks 12:1-27

unen unaren mai anan dafiyó póké mai ma monó dafufin ma yan baré ein kao vá sipisipi kayo vá ankamen intaniyáken moní ma arumiyá ein kayo vá dere vanaan karúdaren minó tiantan barufá araven mino. ¹⁶Araviyain má dovaéaren kukhofá nun kayo ma yáken sarí iyá ein banta kayo siamemí, “Mai yanasinta mamare orono. Ída vá Tifóen amá minó daná kaúdiyan ma miyan baran namuní ono.”

¹⁷Máan tiyan ma mai avúavá bei eyo iyampon kayo ano oniyáken Tiyarafenui vompon dókifin ma máa sikhharé ein baya ovaren me inen mino.

“En ama san tiran nakhan mai ano súpín ira ma kheiní iyan mino.” *Íbo 69:9*

¹⁸Yisasi máan tiyain má Yutan kayoi ánon banta kéká ano mai avúavá ódaren béin máa sen inaemí, “Tiyarafenu fintena ma éi mai avúavasí in ákona ma mantanteya mae mai éi mana enará ukhein aní daná aní í óderá mai fura yaná ino seno.”

¹⁹^kMáa síkan Yisasi evaránen betí ankan tiamemí, “Tiréti ankan ma kákan monó namun ma varákuresí maé téi kanú manaú damú anan evaráné uvaman kípanté uno.”

²⁰Máa síkan Yutan kayo ano evaránen temí, “Foti sikhisi (46) oranarái ma kákan monó namun uvantein mifo éi kanú manaú damú aná uvaman kípantó tiya vae.” ²¹^lMáa sen mifo mai Yisasi ve au van mi kákan monó namuntá o siáden mino. ²²^mBéi ma masí pinté e mantavin maen mi veni eyo iyampon kayo ano mai ma sikhá ein baya afová uren mi Tiyarafenui vaya ma vompon dókifin uvamádan baré ein má Yisasini vaya vá ovaren inen mumunan en mino.

Yisasi Ma Minó Nanin Bantai Avúavá Bá Ineine Vá Afová Ukhein Baya Ino

²³ⁿAvo Uantan Damú ma Yisasi Yerusaremí báken ma kokhon enará ukhein danasinta ma aníin onein nan minó nanin banta ano véintá ana mumunan en mino. ²⁴Máan tiyan Yisasi minó nanin bantai ineine afová ukhen pasen betí ankan ída kamú máan amen mino. ²⁵Mai véi ída afova van o afasí ukhantin pasen mana vanta ano ída véin tiaminten mino. Para vara seyo, minó nanin bantai avúavá bá ineine vá béi fefá afová ukhen mino.

Yisasi ma Nikodimasin Afova Amein Baya Ino

3^oMana Farasisi vanta Nikodimasi maen Yutan kayoi ánon bantan baren mino. ²Baren mana inúpá duntein pinté Yisasi má baya seno van eriven béi semí, “Aru soe, setí ankan minó ano éin afová ukhékun Tiyarafenu ano setí ankan afova simeno van tiantaya erikha ompo mana vantafin ma Tiyarafenu ma ída vantin maen éi ma enará ukhein danasinta ma uvariyaonafen ída uvaranten mino. ³^pMáa síkan Yisasi evaránen béin tian amá uan amemí, “Téi fura uron tiré éin tiamiyá uno. Banasi ano ma ída evaránen auyení inain mano ída kanaíen Tiyarafenui yafisin baru onanten mino.”

⁴Máa síkan Nikodimasi evaránen béin inaemí, “Intesá uren ná anon bantaí ma uvin nain mano evaránen auyení intéi vae. Be anóen arápin ná evaránen un pébintin ná enádá kainten nafino.”

⁵^qMáa síkan Yisasi evaránen béin tiamemí, “Pura uron tiré éin tiamiyá uno. Banta ano ma non nú Aunan núká ma ída auyení inain mano ída kanaíen

^k2:19 Mat 26:61; 27:40 ^l2:21 1Ko 6:19 ^m2:22 Ruk 24:6-8; Yon 12:16

ⁿ2:23 Yon 7:31 ^o3:1 Yon 7:50; 19:39 ^p3:3 Mat 18:3; 1Pi 1:23

^q3:5 Isi 36:25-27

Tiyarafenui yafisin barufin oferanten mino. ^{6r}Au ano ma afoká é iyain daná mai au ina ifo Kantá Aunan mano ma afoká é iyain mai yaná Kantá Aunan nina ino. ⁷Evaráneya auyení ono ma séi siyaruna vayará éi ída vá anú duman duman ono. ⁸Uva ano vei anunurái minó pimpá orera iyákaya avaya anan iniyákeya inte fákesá eriaren intefasá oriyán nafi mai ída afová éiya ono. Kantá Aunantá ma auyení iyain kayo ano máan manan ukhen mino.” ⁹Máa síkan Nikodimasi véin evaránen inaemí, “Mai ma siyaona yaná intesá en ná afoká intéi vae.”

¹⁰Máa síkan Yisasi evaránen béin tiamemí, “Éi Isareri kayoi arú banta ompo intesá ukhayá ma yaná ída afová iya vae. ¹¹Téti ankan ódaré afová ukheruna yana san mi fura siré tiretin tiamiyákeyai siréti ankan mai vayará ída mumunan iya ono. ¹²Téi ma vara rákena yana san mi siyákeya siretí ída mumunan iya ompo inaru rákena yana san ma sékuya intesá ureyá mairá mumunan inte fono. ¹³Ída mana vanta ano inarufá ódikhen mifo Banta Anin mano veyákái inaru fáké erakhein béi anan evaránen ódinten mino. ¹⁴Pefá ma vanta ída van kámá barafin ma Mosesi ano ma osafáe aman manon uváden daa amankampin ma intáneiníen Banta Anin maman daní urantin ma ¹⁵tvéintá mumunan inain nanin banta ano ída kípan para van oriyán ban aunan baranten mino.

¹⁶uPara vara seyo, Tiyarafenu ano auanon tákena mana ain iyampon uró dákaren barará nanin banta van moéken anunu uaren mai iyampon betí ankan amen mifo véintá ma mumunan inain nanin banta ano ída o afeyoran para van oriyán ban aunan

baranten mino. ^{17v}Banasi yaimin no-vara Tiyarafenu ano ve Anin tiantan barará eren na ino. Béi ma vara rákena nanin banta aya uren evaránen avirano van mino. ^{18w}Tiyarafenui auanon tákena mana iyampon uró ma vaintá ma ída mumunan iyain nanin banta kéká pefái yaimáan afeyorampin ban mifo mai mana iyampon tá ma mumunan iyain kayo ano ída afeyoranten mino. ^{19x}Mai ma yaimin naini ana máan mi ukhen mino. Kakhan ma varará erakhen mifo vanasi ano namu avúavá anan bariyan kakhan nan ída aran niyan mino. ²⁰Namu avúavá ma variyain kéká ano mai kakhani namuron báken betí avúavá maman dákó inain nan péden ída kakhantá erinten mifo ²¹fun-tákein avúavá ma variyain kéká anon kakhantá erintin Tiyarafenui ákonarái yoriyan mino sen onanten mino.”

Monó Non Péantan Banta Yoni Ano Ma Yisasin Aví Daní Ein Baya Ino

^{22y}Máa siren mai oyampáké Yisasin má bei eyo iyampon kayo vá ano Yerusaremí me ampiren Yudiá barafá o váken banasi monó non péantiyaren mino. ²³Máan tiyákan monó non péantan banta Yoni ano Aenoní barurá Sarimí ádé bákan mairá kokhon non eraviyákan banasi ano monó non perano van eríkan Yoni vetí ankan monó non péantiyaren mino. ²⁴Mai Yonin ma ída karavusifin pákaan kaúdakan mi máan tiyaren mino. ²⁵Máan tiyain damú ana Yonini eyo iyampon kayo vá mana Yutan banta vá ano Tiyarafenu avorá ma avusesein avúava san araíen asive asive en mino. ²⁶Máan turen Yonini eyo iyampon kayo ano véin me siamemí, “Aru soe, Yodani non ufákena ma éi ódare ma mai vanta

^r3:6 Yon 1:13 ^s3:14 Nam 21:9; Yon 8:28; 12:32 ^t3:15 Yon 20:31

^u3:16 Yon 3:36; 10:28; Rom 5:8; 8:32; 1Yn 4:9-10 ^v3:17 Ruk 19:10

^w3:18 Yon 5:24 ^x3:19 Yon 1:5, 9; 8:12 ^y3:22 Yon 4:1-2

van Tiyarafenu ano aní ukhein banta ino ma seona vanta anon monó non péantiyan maifá anan banasi oriyáken tetí ankan barunafá ída eriyán mino.”

²⁷ Maa síkan Yoni evaránen betí ankan tiamemí, “Inarufá ma vain Tiyarafenu ano mana mana vanta yoran amídú ukhen mino. ²⁸ Tiyarafenu ano ma aní ukhein banta vaumpo séi veni aa uvisen erin banta unon tékuyan inikha ono. ²⁹ Mana vanta ano ma anasi mádan mai nanin mano ven anasí iyan mifo véin má ma avunté iyá ein mano ma anasi varan baya iniren amusin iyainíien téin túpin timusin bíken mino. ³⁰ Béin aví dani suron intiná ten tiví bararasá eravino.

³¹ a“Béi inaru fákéi erikhen pasen minó esantakhen mino. Téi ma vara ráke vantán báké ma varai avúavá anan afová ukhé umpo véi inaru fákéi erikhen mino. ³² bMáan tukhan mi véi iniren ódein dana san mi siamiyan mifo ída mana vanta ano mai vaya fákaan ákona uren mairá mumunan iyan mino. ³³ Inte nanin banta anó mai vaya fákaan ákona uren ná mairá mumunan iyan nafi mai anon Tiyarafenu van pura vaya siya ne sé iyan mino. ³⁴ Tiyarafenu anon mai vanta siantan erikhen beni vayan tiyan mino. Para vara seyo, Tiyarafenui Aunan mano véimpin bíkakkan mino. ³⁵ cBe Afóe ano ve Anin nan anunu uren minó danáká ma yafisin ákona véin ayampin amen mino. ³⁶ dBe Anintá ma mumunan inain nanin banta ano ída kípan ayun para van oriyan ban aunan baranten mifo ve Anini vaya ánain ma ída vákurin nain nanin banta ano ída kanaíen aunan barantin Tiyarafenui aran daná ano vetin má banten mino.”

Yisasi Ma Sameriá Nanin Má Baya Sein Baya Ino

4 ^eYisasi ma vanasi monó non péantiyan ma veni eyo iyampon kayo mo kokhoníen ma Yonini eyo iyampon kayo eantiyain baya Farasisi kayo ano inen mino. ² (Mai maen Yisasi va monó non péantiyaren naifo véi eyo iyampon kayo anon péantiyaren mino.) ³ Mai ma Farasisi kayo ano afová ein baya Yisasi iniren Yudiá bara me ampiren Kariri varafá evaránen oren mino.

⁴ Sameriá bara aúbaná ma orikhein aa vá béi yakhafen orino. ⁵ fMáan tukhan béi oriyaren mana Sameriái varu Sikha se sikhein barurá Yekopu ma ve anin Yosepin amikhá ein bara ádé oren mino. ⁶ Oríkan bayan áaui en ayá aintá ma eriyá ein mano Yisasin ayampa yíkan Yekopuni non masí mairá baré in mai masí avafá o khumanen mino. ⁷⁻⁸ O khumantan bei eyo iyampon kayo minó ano evúten dunan miyaní ono van kákan barufin orivíkan beyaká ana varéin mana Sameriá nanin mano non dafono van erin Yisasi véi nan temí, “Non dáan timí nano.”

⁹ gMaa síkan mai Sameriá nanin mano anú duren temí, “Ída Yutan kayo vá Sameriá kayo vá manafiní ukhein mifo éi Yutan bantan ban ná téi Sameriá nanin mi vá umpo éi fará non nan inantiya fonó.” Mai fara va máa sen naino. Yutan kéká bá Sameriá kéká bá ída manafiníen dunan má non má nakhein mi van mino.

¹⁰ hMaa síkan Yisasi evaránen mai nanin tiamemí, “Tiyarafenu ano ma ameno van iyain amusin má inká téi iyé bará éi vaípa non nan inantiya rafu mai éi afová e vareya séi vaípa inantesí mai

^z3:28 Mat 11:10; Yon 1:20

^a3:31 Yon 8:23

^b3:32 Yon 3:11

^c3:35 Mat 11:27; Yon 5:20

^d3:36 Yon 3:16-18; 1Yn 5:12

^e4:1 Yon 3:22

^f4:5 Esé 33:19; Yos 24:32

^g4:9 Esr 4:1-5

^h4:10 Yon 7:37-38; Rev 21:6

ma fara van oriyán ban non amenunaren mino.”

¹¹Máa síkan mai nanin mano semí, “Kákan banta oe, ma non masí námen mi vákayai éi ída non dafin kura vá anan má mantena sefo inte fákená mai ma fara van oriyán ban non dafinte vae. ¹²ⁱErasan tinafu Yekopu ano ma ve anin kayo vá kao vá sipisipi kayo vá ma niyá ein mai non masí ma setin timikhá ein mai vanta éi esantakhe vae.”

¹³Máa síkan Yisasi evaránen béin tiamemí, “Banasi ano ma ma masí pintena non ma narantin evaránen non nan aiinten mino. ¹⁴^jAiinten mifo séi ma amenuna non mano non nan ma aiin kípaaantáden banasi aúpin non akharun mamen ída ma kípán para van oriyán ban aunan aminten mino.”

¹⁵Máa síkan mai nanin mano semí, “Kákan banta oe, mai non pintena manáa simikhesin ná enádá ída non nan tiintísá ma masí pintena ída ovaráné e yafono.”

¹⁶Máa síkan Yisasi mai nanin tiamemí, “Oreya e avafun o aviare ereno.”

¹⁷Máa síkan mai nanin mano semí, “Te sivafu ída vain muno.” Sikan Yisasi semí, “Éi fura se ono e avafu ída vain mino. ¹⁸Ída vain mompo fefá éi yan manápá bantan mantareya saréa ma ven má baona vanta mai ída en avafun baya fura siya ono.”

¹⁹Máa síkan mai nanin mano semí, “Kákan banta oe, éi mana sakhánampa vanta ono. ²⁰^kTéin tisimeno. Para é tiren ná minó Yutan kayo ano Yerusaremíi mana monó tin baru van mino siren o átaru iná inká tetí tinafu siráo ano mará Kerisiní anurá ana monó tían nafino.”

²¹Máa síkan Yisasi mai nanin evaránen tiamemí, “Téinti vayarasá mununan ono. Damú inka eriyain ída ayáká ban mara safi áa Yerusaremi safi Sifóentá minó ano monó tinten mino. ²²^lMáan tin nampo sireti Sameriá kayo ano ma monó tiyaona mai yaná ída afová ukha ompo seti Yutan kéká ano ana ma monó tiyaruna mai yaná minói afova ukhé tifékun mi Tiyarafenu ano sétin aní uren banasi evaránen aviran doran timikhen mino. ²³Timikhen mifo yamú eriyákan mafin inka fe e van mino. Kantá Aunani ákonará ma fura sikhein avúaváká ma Sifóentá monó tin nain mai nanin banta van mi Sifóe ano veyantá monó tino van anunu ukhen mino. ²⁴^mTiyarafenu maen Aunan mi van mifo vá béintá ma monó tin nain kéká ano Kantá Aunani ákona vá pura avúavá bá pókesá benta monó tino.”

²⁵Máa síkan mai nanin mano semí, “Téi afová ukhékun Tiyarafenu ano ma aní ukhein banta ma eriven maen mi véi anon kanaíen minó daná tian amá intí iné tifanté uno.”

²⁶ⁿMáa síkan Yisasi evaránen mai nanin tiamemí, “Mai ma siyaona vantan ma séi váankuno.”

Eyo Iyampon Kayo Ma Ovaránen Yisasi Vaípa Erein Baya Ino

²⁷Yisasi ma Sameriá nanin má baya siyá íkan ma vei eyo iyampon kayo ano ovaránen e oniyáken maen betí ankan anú duren mana ano véin nan pará mai nanin má baya siyayá ná bariya fono sen ída ináen mino.

²⁸Mai nanin mano vei non kave me non masí avafá kaúden evaránen kákan barufin oriven minó nanin banta siamemí, ²⁹“Mana vanta ano séin ma

ⁱ4:12 Yon 8:53 ^j4:14 Yon 6:35 ^k4:20 Diu 12:5-14; Íbo 122:1-5

^l4:22 2Ki 17:29-41; Ais 2:3; Rom 9:4-5 ^m4:24 Rom 12:1; 2Ko 3:17; Fir 3:3

ⁿ4:26 Mak 14:61-62

fefá bariyáeruna avúavá máa sisimiyan mifo mai maen Tiyarafenu ano ma aní ukhá ein bantá ban nafi eriveya onano.”

³⁰Máa siyain má minó nanin banta ano mai varu me ampiren Yisasin onano van ere ere en mino.

³¹Eriyain má Yisasi nan dunan nano van bei eyo iyampon kayo ano yuvun en mino. ³²Máa síkan evaránen temí, “Ída ino. Tenti yunan ma vain tiretí ankan ída afová ukha ono.”

³³Máa síkan beni eyo iyampon kayo ano veraran máa sen oreraemí, “Iye anó dunan baren ná me amikhan ná tino.”

³⁴Máa siyaimpin Yisasi evaránen betí ankan tiamemí, “Tenti yunan ma vain mai Tiyarafenui anunu ánain ma vákuren beni yorarí uan ma kípan mino. ³⁵P^tTiretí ankan ídá teyá ‘kamí kamí biyon ma orivití yunan duyasenté uno’ séiya fono. Tiretí ankan ná minó pimpá one eúkono yunan inka karaaren duyasirí ukhen mino. ³⁶Dunan ma yuyasin banta kayo ano kama miyan mi variyan mino. Mai yunan ma yuyasiyaini aran mi mai vanasi ma aviren ída kípan para van oriyan ban aunampin ma mo kaiyain mino. Máan tukhein nan mi yunan ma yoran banta vá dunan ma yuyasin banta vá ano amusin inten mino. ³⁷Máan tukhan mi mai veya fura sikhantin mana vanta ano ma yunan dóðakaré intin maen ena vanta anon mai yunan duyasinten mino. ³⁸Máan tukhein nan mi siretí ankan ída yunan dore nan ena kayo ano ákona yorari uren dóðadein dunampin mi siretin nan duyaseno van mi siantiyá uno.”

Sameriá Nanin Banta Ano Ma Yisasintá Mumunan Ein Baya Ino

³⁹Para va mai varu ráke Sameriá kéká ano Yisasintá mumunan en naino. Mai nanin mano ma fefá bariyá ein danasinta ma evaránen tiamein baya ma mai nanin mano vanasi siamin iniren mino. ⁴⁰Mumunan uren betí ankan mano véin o oniyáken maen ayópá íkan mai varurá kan damú báken ⁴¹kama veya siyákan kokhon mano veni veya iníden mumunan en mino. ⁴²qMumunan iyáken betí ankan mai nanin tiamemí, “Éin avaya inídesa seti mumunan erauno. Taréa setiyantái véini veya inídeí mumunan iyá uno. Béi fura sen barará nanin banta ma aya uren evaránen aviran nain banta ino.

Yisasi Ma Kamanini Ayafa Vanta Anin Ayofein Baya Ino

⁴³Sameriá nanin banta vá bákan kan damú orivin maen Yisasi e manten Karirifá oren mino. ⁴⁴rAfovasá ono. Pefá Yisasi veyan nan máa sikhain mino. “Ena varafimpái sakhampá vanta aví bain mifo vei vara anará ída véin aví ban mino.” ⁴⁵sOríkan Karirí nanin banta ano ódaren amusin iyan^{ss} béin e aviren mino. Mai fara va ino Avo Uantan Damú béi ano Yerusaremí kákan monó dafufin enará ukhein danasí iyákan betí ankan ontaren mino.

⁴⁶tKariri varafin mana Yisasi oriyaren béi ma fefá non maman uvainí ukhá ein Kaná barurá oríkan mana kamanini ayafa vanta anin aí iyan Kapeniamú barurá baren mino. ⁴⁷uBaren iníkan Yisasin nan Yudiá me ampiren Karirifá e van ne siyaimpin mai vanta ano Kaná

ss4:45 Banasi ano ma mana vanta amusin uanté iyain maen mai yufúdafú ma iyain mino.

o4:34 Yon 6:38

p4:35 Ruk 10:2

q4:42 1Yn 4:14

r4:44 Mat 13:57

s4:45 Yon 2:23

t4:46 Yon 2:1-11

u4:47 Mat 8:5-6

barufá oren Yisasin o yosiren béin má Kapeniamú oren mai ma ve anin aí iyan ma furono van iyain mo ayofano van ákonaen inaen mino.

⁴⁸ ^vMáa síkan Yisasi evaráne véin tiamemí, “Enará ukhein daná bá aní danasinta vá ana afoká intiyá ódé mumunan ono van iya rafono. Ídá para mumunan inte rafono.”

⁴⁹ Máa síkan kaminini ayafa vanta ano ákonaen inaen temí, “Bafan noe, se sanin purin nafo aine ereno.”

⁵⁰ ^wMáa síkan Yisasi evaránen béin tiamemí, “E anin e asefa inten mifo evaráne ei varufá orono,” síkan mai vanta ano Yisasini vayará mumunan iyáken bei varufá oren mino.

⁵¹ Mai ayafa vanta ano ída Kapeniamú orikhen para ayanafá oriyákan manáa vei yoran banta kayo ano vaya varen ayanafá e fóken tiamemí, “E anin inka asefaen mino.” ⁵² Máa síkan béi vetí ankan inaemí, “Nái áau rasá te sanin e asefaen nafino.” Síkan betí ankan evaránen béin tiamemí, “Inuran inúpá mana áauí in mi veni aí kípén mino.”

⁵³ Máa síkan mairá be afóe ano mai ma Yisasi sen ma e anin e asefa inten mino ma sein áau ovare me iniren ben má bei kéká bá ano Yisasintá mumunan en mino. ⁵⁴ ^xYisasi ma Yudiákké erieren ma Karirifá e varen ma ma yaná barein mai anon kan dádasí en mi enará ukhein daná afoká en mino.

Yisasi Ma Mana Arantan Namu Ukhein Banta Ayofein Baya Ino

5 Ínaimpáké Yutan kayoi kákan monó tin damú afoká íkan Yisasi evaránen Yerusaremí óden mino. ² Mai kákan

dafu ona aví Sipisipii Ona e sikhein akhentá Yerusaremí kákan barufin mana non akharun bákan mai non akharun aví Iburu vaya finté Betesda e sikhan mai akhempá dan manápá dusesí uádan baren mino. ³⁻⁴ Baré íkan mai yusé kayofin kokhon aí nanin banta vá auu yufúkukhein kayo vá arantan namu ukhein kayo vá ai ayan púkein kayo vá baren mino. ⁵ Bákan maifin mana vanta teti-eiti (38) oranará aí bain banta ano vakharen mino. ⁶ Mai vanta ayáká aí mantaréin Yisasi afová en ódaren béin inaemí, “Éin au evaránen kama ino vará iya fono.”

⁷ Máa síkan mai aí banta ano evaránen béin tiamemí, “Kákan banta oe, non ma karantó intin ma sivían ten nare ma nompin kain banta ída vákan ena kayo ano anan ainen ten esantaaren nompin araviyá uno.”

⁸ ^yMáa síkan Yisasi véin tiamemí, “Mantaveya ei yuvasí mamare orono.”

⁹ Máa siyain má mai vanta au ainen manádá kama íkan bei yuvasí dádaaren oren mifo mai Sabati yamú mai avúavasíen mino. ¹⁰ ^zMáan tíkan Yutan kayo ano ódaren mai vanta máa sen tiamemí, “Sabati yamú doran nan airo ananí ukhein mifo éi fará ei yuvasí mamareyá no fono.”

¹¹ Máa síkan béi evaránen betin tiamemí, “Mai ma sen tu ma kama usintein banta anon ‘Ei yuvasí mamareya orono’ sen tisimikhá uno.”

¹² Máa síkan betí ankan mano véin ákonaen inaemí, “Intéa vanta anó éin tiamen ná ei yuvasí mamareya orono sen nafino.”

^{*}5:3-4 Manáa Tiyarafenui vompon dókifin ena vaya ano vesi 3 vá 4 vá máa sen asotú ukhen mino. “Bafani enisori ano mana mana yamú eriven non karantó in maen maifin ma esesíen aravein nanin bantai aí kípáantiyaren mino.”

^v4:48 Yon 2:18; 1Ko 1:22 ^w4:50 Mat 8:13 ^x4:54 Yon 2:11

^y5:8 Mat 9:6 ^z5:10 Nee 13:19; Yer 17:21

¹³Máa siyákan kokhon nanin bantafin Yisasi ofébin mai ma au kama uantein banta ano aminoen mino. ¹⁴Amino ukharéin maen ínaimpáké Yisasi kákan monó namumpin ódiven onákan mai vanta varéin máa sen béin tiamemí, “Éi moéke kákan uman baran nampo vá au ma kama uveintá ída vá enádá umeí ono.” ¹⁵Máa sirákan mai vanta ano Yutan kayoi ánon banta kéka san dosen oren mo vetin tiamemí, “Ten tu ma kama usintein banta mai Yisasi ino.”

Yisasi Ma Veyan Nan Tiyarafenu Anin Muno Ma Sein Baya Ino

¹⁶Sabati yamú anan Yisasi ano vanasi ayofiyaimpin mi Yutan kayo ano mai van béin namuroí uanten mino. ¹⁷Máan uantiyákan Yisasi evaránen betin tiamemí, “Te Sifóe ano fara yoren oriyán báken taréa yeren doriyan mifo mai fará téi ifá onte rafuno.” ¹⁸^aSabatirá ma yoran are ukharé ein Yisasi yurafuriyáken ma inká Tiyarafenu van te Sifóe uron mino ma sein nan Yutan kayo ano iníkan Tiyarafenu vá un manái in baya siyaimpin mai van ben aruan purin aa van dosen mino.

¹⁹^bMáan tiyákan Yisasi afová iyáken betí ankan evaránen tiamemí, “Pura siré tiretí ankan tiamé uno. Be Anin mano ída kanafen beyantá mana avúavasí inten mifo ve Afóe ano ma varan nain mai avúavá máa anan be Anin mano varanten mino. ²⁰Para vara seyo, be Afóe ano ve Anin moéken anunu iyáken mi ve ma variyain avúavá máan be Anin aní intin baranten mino. Máan intin ma ma ayofein banta esantaren moéken kákaní ukhein danasinta varantiya mai avúava san anúde orera inono. ²¹Para vara seyo,

fúká ein kéká ma ve Afóe ano orun avían mantiyainí anan en mi ve Anin mano ve ma anunu inain kéká kasaen aunan aminten mino. ²²^cMáan tukhan banta ma yaimin doran maen ída ve Afóe ano yaimé iyan mifo ve Anin mi mai yoran amikhen mino. ²³^dMáan tukhein nará be Afóen aví ma yaní iyaonaí e vá be Anin avisá daní ono. Banta ano ma ve Anin aví ma ída yaní inteya mai ven ma siantan erikhein Afóen aví ída yaní e ono.

²⁴^eTéi fura siré tiretí ankan tiamé uno. Mana vanta ano ma sen tivaya inire ma séin ma sisintá erikheruna Tiyarafenu máa mumunan inona ano ída kípan ayun para van oriyán ban aunan baran nono. Betí ume ma yaimin ída vanten mifo veti fefái furin dafu finté ekháden para van oriyán ban aunani yafufin erikhen mino.

²⁵“Téi fura siré tiretí ankan tiamiyá uno. Damú ma afoká ono van iyá ein taréa inka afoká íkan pefá ma fúkaré ein nanin banta ano mai Tiyarafenu Anin avaya iniyantin inká mai vava ma inin nain kéká ano fara ayun banten mino. ²⁶Para vara seyo, ve Afoé ma veyampin aunan amin ákona vainífen be Anin má ákona amin be Anin má dere veyampin aunan ma amin ákona van mino. ²⁷Inká béi Vanta Anin mi vákan banasii avúavá ma yaimin ákona amikhen mino. ²⁸Máan tukhanti siretí ankan ída vá ma vava van anú dureya kokhon ineine ono. Inka yamú áde íri iyain púkein nanin banta ano Tiyarafenu Anini vava iníden maen ²⁹^fmasí pinté evaránen e mantaven maen kama avúavá ma varyaré ein kéká ano ída kípan para ayun ban oriyán ban aunan barantin inká namu avúavá ma varyá inain kéká ma kó tiantan naimpin oferanten mino.

^a5:18 Mat 26:4; Yon 7:1; 10:30 ^b5:19 Yon 5:30

^c5:22 Yon 5:27; Apo 10:42 ^d5:23 Fir 2:10-11; 1Yn 2:23

^e5:24 Yon 3:15-18 ^f5:29 Dan 12:2; Mat 16:27; Apo 24:15

³⁰gMáan tinten mifo séi mana yaná tési ineine finté ída varanté umpo se Sifóen pintena ma vareruna vayan dakhafé banasii avúavá daiméiyá uno. Téi ída sesi sinunu yakhafin na séin ma sisintá erikheruna Sifóeni anunun dakhafiyái séi ma yaimiyaruna ano funtáken mino.

Tiyarafenu Ano Ma Yisasi Nan Pura Vanta Ino Sein Baya Ino

³¹Téi ma sesi sivútivá bá doran ma san ma seyantá tian amá iyákun maen banasi ano mai vayan van beyantái siyan mino siren ída ininten mino. ³²Máa sen ininten mifo ena ano ma senti sivútivá bá doran ma san ma siyantiya mai furan tiyan mino.

³³Tiretí ankan Yonini vayan o iniren me siamino van manáa vanta kayo sianten nan orikhan mifo véi fura sikhein baya van mi sian amá ukhen mino. ³⁴Yonini avúavá baya ma siretin tiamiyaruna mai Tiyarafenu ano siretí ankan evaránen avirano van mumpo senti kama sivútivá bá doran baya vá ma sian amá inain mai ída varará banta kayoi yoran mino. ³⁵Mana oon ma uruádeiníi Yoni uven tiretin kakhaantayai sító máará amusin erono.

³⁶hMáan te ompo Yoni ma yoriyáken tenti vayan sian afoká iyá ein mai séi veni yoran esantakhein dorarí iyáké kokhon enará ukhein aní danasinta variyá umpo mai minó doran Tifóe ano séin timikhen mino. Minó doran ma séi ma varyaruna ano vanasi avorá tian amá en Tifóe anon téin tisintá erikhé uno. ³⁷iErikhékun mi Sifóe ano veyantái sen nan tian amá ukhen mifo siretí ankan ída ven avaya ineya ayafen one ukha

ono. ³⁸Máan tukhesin pasen tiretí ankan aúpin ída veni vayan vanten mino. Mai fara va ino. Béin ma siantan erikhein bantai vayará ída mumunan iya nan mino. ³⁹jTiretí ankan Tiyarafenui vompon dókifin dankáde mai vayan yaíde afová e nan mai ano ída kípán ayun para van oriyán ban aunan timinten mino siya ompo mai Tiyarafenui vompon dóki ano séin nan mi siádan baré íkaya ⁴⁰siretí ankan téi vaipá ída eriveya ída kípán ayun para van oriyán ban aunan bariya ono.

⁴¹“Téi ma ma vayan kayo ma siyaruna mai vanasi fintena kákan bí baranova rauno. Ída ino. ⁴²Máan tukhein mifo séi siretí ankan afová ukhé uno. Tiretí ankan aúkáké ída Tiyarafenu van anunu ukha ono. ⁴³Téi Sifóen avikái erikhé kuyai siretí ankan ída séinti vayan variya ompo mana vanta ano ma ve aviká ma erintiya mae siretí ankan manádái mai vantai vayan aine varan nono. ⁴⁴Tiretíyan mi kákan bí baran maran iyáke Tiyarafenu ano ma amiyain bí ída variya ompo intesá ureyá mumunan inte rafono.

⁴⁵“Tiretí ankan ída vá ten nan Tifóen avorá daiminten mino se vá ineno. Tiretí ankan ma Mosesin nan tiya inten mino ma se inikhá eona mai vanta anon tiretí ankan daiminten mino. ⁴⁶kMosesini vayará pura sen mumunan e vareya mai senti vayará deren mumunan inonaren mino. Mai fara vara seyo, béi ma uvantaré ein bompopin mai sen nan mi sikhán mino. ⁴⁷Máa sikhán mifo mai ma véi uvanteré ein bayará ma ída mumunan inteya mai siretí ankan intesá ureyá tenti vayará mumunan inte fono.”

g5:30 Yon 5:19; 6:38 h5:36 Yon 3:2; 14:11

i5:37 Mat 3:17; Yon 5:32; 8:18 j5:39 Ruk 24:27 k5:46 Apo 3:22

**Yisasi Ma Yan Manápá Tauseni
(5,000) Vanta Yunan Amein Baya Ino**

*(Matiu 14:13-21; Maki
6:30-44; Ruku 9:10-17)*

6 Máa siran manáa yamú orivíkan Yisasi Kariri non ma ena ví Taibiriasi e siyain e kháden oren mino. ²Oríkan kokhon nanin banta ano véin e vákuren oren mino. Mai fara va ino véi ma af nanin banta ayofantá ma enará ukhein daná ma variyan ma ontaré ein nan mino. ³Bákuren oriyákan Yisasin má bei eyo iyampon kayo vá ano mana anuyontá un kumanen mino. ⁴(Yutan kayoi Avo Uantan Damú ádé eriyákan mino.) ⁵Un kumantaren onákan kokhon nanin banta ano véi nan dosen amen édiyaimpin dovaéaren Firipin inaemí, “Tetí ankan ma ma nanin banta amékun nan nain dunan inte fákená miyaní óti-fante rafuno.”

⁶Béi ma mai vaya ma sein mai veyan ma varan nain daná pé afová ukhen Firipin mi mai vayafó akhenóka uan onen mino.

⁷Máa síkan Firipi evaránen béin tiamemí, “Tetí ankan ma kan tauseni monipó ma yunan miyaní urékun maen ma nanin bantafin ída kanaíen kova inten mino.”

⁸Máa síkan mana vei eyo iyampon Saimon Pitan afá aváe Enduru ano evaránen Yisasin tiamemí, ⁹“Masína mana iyampon mano yan manápá bereti vá kan noyana vá kain ban mifo ma nanin bantafin mai ano intesá uren ná kanaí inten nafino.”

¹⁰Máa síkan Yisasi vetí ankan tiamemí, “Minó nanin banta siamesin kuman ino,” síkan mairá kokhon kata varé íkan mai yaró kumanen oreraen mino. Maifin ma varé ein banta máa mai yan manápá tauseni (5,000) ino.

¹¹Kumamíkan Yisasi vereti kayo orun máden Tiyarafenu susu siantáden kisian banasi amíden ínaimpáké noyana kánan máden máan mana uren amíkan minó nanin banta ano nákan amú kuren míno. ¹²Amú kuriyaimpin Yisasi vei eyo iyampon kayo siamemí, “Mai yunan antan tavifá eraven afein nafa aían átaru ono.” ¹³Máa síkan mai ma yan manápá bereti finke ma kisian banasi amin narákan ma amú kurin ifá ein antan kayo o éke e éke uren tiyan mikan mifo sirantan kan orun kádan (12) unan bíken mino.

¹⁴Máan tíkan mai ma enará ukhein daná ma aní ein minó nanin banta ano ódaren temí, “Pura uron ten mai ma Tiyarafenu ano siantantín ma ma varará erano van ma síkhá ein mai sakhanampa vanta ino. ¹⁵¹Máa siren banasi ano Yisasin duvun intin kiní ino van iyain baya véi iniren afová iyáken mairá me ampíren beyaká anufá óden mino.

**Yisasi Ma Non Akharun
Daró Orein Baya Ino**

(Matiu 14:22-33; Maki 6:45-52)

¹⁶Ódivíkan mai inúpá bei eyo iyampon kayo ano non akhempá orun béin ave ukharen mino. ¹⁷Ave ukhan Yisasi ída ovaránen eríkan duniyaimpin non e kháden Kapeníamú orono van betí ankan botifin un kumanen mino. ¹⁸Kumanen oriyaréin kákan uva uaren non karantó en mino. ¹⁹Mai non aúbaná oriven onákan Yisasi non daró boti kakháaren oriyaimpin betí ankan akhokho van en mino. ²⁰Akhokho van iyain má Yisasi oovaren temí, “Téin eriyá umpo ída vá akhokho van ono.” ²¹Máa síkan betí ankan amusín iyáken béin botifin avían kaúdan mai voti ano manádá ainen mai ma oriyá ein barufá oren mino.

²²Ena ákurá banasi ano Yisasin onano van mai non avaruni ena ufá o átaru en mino. Mai fara va ino. Ben má bei eyo iyampon kayo vá ano manápá erikharen mi véin me afa uren eyo iyampon kayo ano ana votifin un kumamen oríkan ontaren mino. ²³O átaru iyákan mai ma Bafan mano ma susu siren bereti ma vanasi amin neintá manáa Taibiriasí kena voti kayo eren mino. ²⁴Mairá o átaru uven onákan Yisasin má bei eyo iyampon kayo vá ída vaimpin minó nanin banta ano mai voti kayofin kumamiyan non akharun e kháden Kape-niamú mo Yisasin nan doseno van oren mino.

Yisasi Aunan Ma Amin Bereti Ino

²⁵Banasi non e kháden ena ufá oriven Yisasin oniyáken mo véin inaemí, “Aru soe, inte áau rasá éi mafá ere fono.”

²⁶Máa síkan Yisasi evaránen betin tiamemí, “Téi fura uron tiré tiretí ankan tiamiyá uno. Téi ma enará ukhein daná ma aní iyaruna van ída iniya ompo siretí ankan inuran ma vereti amékuya ma nen nan amú kurein mai máa van mi se nan dosiya ono. ²⁷^mMáan tiya ompo siretí ankan ída vá ainen pútaen ma namuin dunan barano van ono. Banta Anin mano ma fara van oriyan ban aunan ma amin nain ná tiretí ankan ayampa ure vá doseno. Para vara seyo, Tifóe Tiyarafenu ano mai van mi véin tiantan erikhen mino.”

²⁸Máa síkan béin evaránen inaemí, “Tetí ankan inté ma ontesá kanaí é Tiyarafenui yorarí onté tife rafuno.”

²⁹ⁿMáa síkan Yisasi evaránen betin tiamemí, “Tiyarafenu ano ma siretin amin nain doran mai máan mi ukhen mino. Béi ma siantan ma erikhein bantarásá mumunan ono.”

³⁰^oMáa síkan betí ankan mai vaya iniren evaránen béin inaemí, “Mai éi intéa enará ukhein aní daná ma aníe-sirá tetí ankan ódaresá éintá mumunan ótifante rafuno. ³¹Para vara seyo, Tiyarafenui vompon dókifin máa sikhen mino. “Tinafu siráo ma kámá barafá nókan maen Mosesi ano inaru fáke manna e sin bereti amíkan nen mino.” *Eks 16:14-15; Nam 11:7-9; Íbo 78:24*

³²Máa síkan Yisasi vetí ankan tiamemí, “Téi fura siré tiretí ankan tiamé uno. Mosesi ano va mai inaru fáke vereti amikhan naifo, se Sifóe anon amikharen mi inká taréa inaru fáke fura vereti amiyan mino. ³³Para vara seyo, mai Tiyarafenui fura vereti uron manon inaru fáke erakhen barará nanin banta aunan amiyan mino.”

³⁴Máa síkan betí ankan temí, “Kákan banta oe, ena ena yamú mai vereti vá tetin timeno.”

³⁵^pMáa síkan Yisasi vetí ankan evará-nen tiamemí, “Téi aunan amin bereti umpo séi varunafá ma erin nain mano ída arafanan inten mino. Tentá ma mumunan inain mano ída enádá non nan ainten mino. ³⁶Tiretí ankan téin tonte ompo ída mumunan iyanái siamiyá uno.

³⁷Tiamiyá umpo Sifóe ma simikhein kéká ano ma se vaípa erintí maé téi ída uron mi vetí ankan evaráné tiantanté uno. ³⁸Para vara seyo, séi sesí sinunu ánain dakhafo novara inaru me ampiré erakhe raumpo mai ma sisintá erakheruna Sifóeni anunu ánain dakha-fono van mi erakhé uno. ³⁹^qErakhé umpo mai ma séin tisintá erakheruna Sifóeni anunu máan mi ukhen mino. Ma vara ma kípan nain damú mai ma séin timikhein nanin banta finté mana ano ída afeyoranten mifo minó kékái avorékun e mantanten mino. ⁴⁰Para

^m6:27 Yon 6:48-58 ⁿ6:29 1Yn 3:23 ^o6:30 Mat 16:1; Yon 2:18

^p6:35 Yon 4:14 ^q6:39 Yon 10:28-29; 17:12

vara seyo, te Sifóeni anunu máan mi ukhen mino. Be anin ma ódaren bentá ma mumunan ukháin nain nanin banta ano ínainpá kípan damú téi avorékun orun mantaven maen ída kípan para van oriyan ban aunan barano van mino.”

⁴¹Yisasi ma veyan nan téi inaru rákena vereti uno ma sein nan Yutan nanin banta ano iniren kakhí kakhá ten oreraen mino. ⁴²rMáan tiyáken betí ankan temí, “Ma vanta anóe afóen tetí ankan afová ukhékun béi Yosepin anin Yisasin ban mifo mai fará ten ná ‘téi inaru fáké erakhé uno’ siyan nafino.”

⁴³Máa síkan Yisasi evaránen tiamemí, “Tiretí ankan ída vá kakhirun tiriya vano. ⁴⁴sPara vara seyo, vanasi ano ída kanaíen te vaípa erinten mifo séin ma sisintá erikheruna Sifóe ano ma o aviádantin ma se vaípa erekharé intí maé ínainpá kípan damú purin pintena evarané avoran e mantanten mino. ⁴⁵Sakhanampa vanta kayoi vompon dókifin ma vain baya ano máa sikhen mino.

‘Minó nanin bantan Tiyaarafenu ano afova aminten mino.’ *Ais 54:13*

Tifóeni vaya ma iniren afová urein kayo anon te vaípa eré iyan mino. ⁴⁶tÍda mana ano Sifóen onten mifo Tiyaarafenu vá ma varen erakhein banta ano anan Tifóen onten mino.

⁴⁷uTéi fura siré tiretí ankan tiamiyá uno. Téintá ma mumunan iyain kayo ano fefái ída kípan aunan manten mino. ⁴⁸vTéi ída kípan ayun ma fara van oriyan ban aunan ma amiyain bereti uno. ⁴⁹Pefá tiretí ankan anafuyan mano kámá barafá manna e sin bereti nakharen mifo minó ano furein mino. ⁵⁰Purein mifo inaruráké ma erakhein bereti ma vanasi ano nanten maen beti

ída furinten mino. ⁵¹Mai ma aunan bain bereti ma inaru fáké erein mai séi umpo mana vanta ano ma mai vereti nanten maen ayun ma fara van oriyan ban aunan baranten mino. Mai vereti ma amenuna mai varará nanin banta ano ída kípan aunan barano van tesi simasin amenté uno.”

⁵²Máa síkan Yutan kayo ano veraran asive asive iyáken temi, “Ma vanta ano intesá urená be amasi simintí nantékun ná tino.” ⁵³Máa siyákan Yisasi vetí ankan tiamemí, “Téi fura uron tiretí ankan tiamiyá uno. Banta Anini amasi vá nare vá ma ída nanteya mai siretí ankampin ayun ma fara van aunan ída vanten mino. ⁵⁴Ída vanten mifo séin timasi vá nare vá ma nan nain kayo ano ída kípan ayun ma fara van aunan mantaré intí maé ínainpá kípan damú betin avorékun e mantanten mino. ⁵⁵Mai fara vara seyo, sen timasi maen mai fura sikhein dunan mi vákan inká tenti nare maen mai fura sikhein non mi vákan ukhen mino. ⁵⁶Tenti simasi vá nare vá ma niyain kayo ano séimpin baká téi vetí ankampin bá uno. ⁵⁷wAyun ma fara vain Tifóe ano séin tisintá erikhékun mi veni ákonarái sen taunan para van mifo mana ano ma máan mana en ten ma nanten maen tenti ákonará ayun ma fara van aunan baranten mino. ⁵⁸Téi mai inaru fáké ma erein pura vereti umpo fefá ma anafu aráo ano ma manna e sin bereti naren baren maen ínainpáké puren mino. Purein mifo ma ma siyaruna vereti ano mai vá ída manái ukhein ma ma nan nain mano ayun ma fara van oriyan ban aunan baranten mino.” ⁵⁹Béi ma ma vaya kayo sein mai Kapeniamú barurá monó átaru namumpin mi vanasi monó baya siamen mino.

**Yisasin Ánain Ma Yakhafen Nó Ein
Kayo Finté Ma Kokhon Mano Véin
Me Ampiren Orein Baya Ino**

⁶⁰Máa siyákan bei eyo iyampon kayo vá ano yere mai ma siyain baya iniren máa semí, “Amino eruna vayan tiyan mifo iye anó kanaíen ná ininten nafino.”

⁶¹Mai ma vei eyo iyampon kayo ano ma vaya kokhon iyain Yisasi afová iyáken betí ankan tiamemí, “Ma vaya anó tiretí ankani mumunan asuse iya nafino. ⁶²Tiretí ankan ma oniyasin ma Vanta Anin mano ma evaránen inarufá ódintiya mai inte esá té ininte fono. ⁶³Kantá Aunan manon ída kípán ayun ma fara van aunan banasi amé iyan mifo vantai ákona ano setí ankan ída uron mi siya iyan mino. Ma vaya ma siretí ankan ma siamiyaruna mai aunan mi váken béi ayun ma fara van oriyan ban mino. ⁶⁴^xBan mifo siretin pinté manáa ano séintá ída mumunan iya ono.” (Mai fara va máa sen naino. Iye anó béintá ída mumunan iyan ná inká iye anó béin namuro ayampin aminten nafi mai véi esé araf in táké afová ukharen mino.) ⁶⁵^yMáa siren enádá evaránen temí, “Tifóe ano ma ída ákona amin nain mano ída kanaíen te vaípa erinten mino. Mai ana van mi séi ma vaya siretin tiamé uno.”

⁶⁶Yisasi ma mai vaya siran maen ben ma yakhafen noré ein kayo finté kokhon mano véin me ifá en tipá oren noren mino. ⁶⁷Máan tíkan Yisasi vei sirantan kan orun kádan (12) eyo iyampon kayorá inaemí, “Tiretí ankan masá téin me ifáeyá orinte fono.”

⁶⁸^zMáa síkan Saimon Pita evaránen temí, “Bafan noe, éini vayafin mi ayun ma fara van oriyan ban aunan ban mifo setí ankan iye vaipasá oronte rafuno. ⁶⁹Éi Tiyarafenui mana kantasi ukheona

vantan ban ná tetí ankan afová ukhé mumunan iyá uno.”

⁷⁰Máa síkan Yisasi evaránen betí ankan tiamemí, “Tiyan míkan mifo sirantan kan orun kádan (12) eyo iyampon mi séi aviké umpo mai aúbaná mana Ban Anon ban mino.” ⁷¹Iskariotíke vanta Saimonin anin Yudasí nan mi véi máa sen mino. Tiyan mikan mifo sirantan kan orun kádan (12) eyo iyampon pintena mai vanta anon Yisasin namuro ayampin amintin aruan purinten mino.

Yisasin Má Be Afá Kéká Báí Vaya Ino

7^aMáan turen mai oyampáké Yisasi Kariri varafin mana váken minó barufimpá noren mino. Yutan kayo ano véin aruan puroño van iyákan mai van béi ída evaránen Yudiá barafá orono van ukharen mino. ²^bÍda orono van ukhan maen Yutan kayoi Iyon Baran Namun Kayo ma Uváden Monó Tin Omá ádé en mino. ³Ádé iyákan be afá kéká ano véin duvun uren tiamemí, “Ei varu me ampireya Yudiá barafá oriveya enará ukhein danasinta anésin ná ei eyo iyampon kayo ano onano. ⁴Minó nanin bantafin ma mana vanta ano ma vei yoran aní ono van maen ída aúpa doré iyain mifo éi minó nanin banta avorá oriveyá ei yoran anésin ná onano.” ⁵^cMai fara va máa sen naino. Be afá kéká ano yeren bentá ída mumunan iyáken mi sen mino.

⁶Máa síkan Yisasi evaránen betin tiamemí, “Tenti yamú ída afoká ukhen mifo siretí ma orono van inona yamú kasae orin nono. ⁷Minó nanin banta ano ída kanaíen tiretí ankan namuroi uantanten mifo vetíi namu avúavái sian páman iyákun mai van mi séin namuroí usintiyán mino. ⁸Mai omasí ma iyaipasá tiretí ankan orono. Para vara seyo, senti

^x6:64 Yon 13:11 ^y6:65 Yon 6:44 ^z6:68 Mat 16:16 ^a7:1 Yon 5:18
^b7:2 Riv 23:34 ^c7:5 Apo 1:14

yamú ída afoká ukhein téi ída oronté uno.”⁹ Maa sen tiamiren Yisasi Karirifá karemen mino.

¹⁰ Karentan maen be afá kéká ano mai omápá orivíkan ínaimpáké Yisasi aúpáké uaren maifá oren aúpá o varen mino. ¹¹ O vákan Yutan kayoi ánon banta kéká ano mai omápin benan dosi vaen banasirá inaemí, “Mai vanta inte-fasá ban nafino.”

¹² Maa síkan banasi ano kafaya sen orera iyákan manáa ano semí, “Béi kama vanta ino” siyákan inká ena kéká ano semí, “Ída ino. Béi vanasi kampun tiantan banta ino.” ¹³ Maa siyaren mifo vetí ankan Yutan kayoi ánon banta kéka san péden ída afoká tinton aúpá anan ti-yaren mino.

Yisasi Ma Kákan Monó Dafufin Banasi Avorá Monó Baya Siamein Baya Ino

¹⁴ Mai omasí e en oriyan ma mo aúban nasí iyan maen Yisasi monó dafufin ódiven monó baya araíen banasi siamen mino. ¹⁵ ^dTiamiyákan Yutan kayoi ánon banta kéká ano veni vaya iniren anú duren takhaen orera iyan temí, “Ma vanta ano ída afova ma varampin orikharen mifo inté uren ná béi ma afova manten nafino.”

¹⁶ ^eMaa siyákan Yisasi evaránen betí ankan tiamemí, “Ma vaya ma siretin ma séi siamiyaruna mai sesi vaya vaino. Ída ino. Tiyarafenu ano ma séin tisintá erikheruna mai veni vayan téi siamiyá uno. ¹⁷ Tiamiyá umpo mana ano ma Tiyarafenui vaya ánain ma yakhafono van ma iyanten mai anon kanaíen téi ma siyaruna vayai ana afová inten mino. Mai vaya senti ineine fintesá eriyán nafi áa Tiyarafenu fintesá eriyán nafi mai véin kanaíen afová inten mino.

¹⁸ ^fMana vanta ano ve aví daní ino van mi vei ineine finte vaya sé iyan mifo ena vanta ano ma siantan erikhein banta mai fura vantan báken mai ma véin tiantan erikhein banta aví yaní é iyan mino. ¹⁹ ^gÍdá Mosesi ano siretí ankan man baya amikharen nafino. Tiretí ankan pinté mana ano ída mai man baya ánain dakhafiya ompo fará téin tiruan purono van iya rafono.”

²⁰ ^hMaa síkan banasi ano evaránen béin tiamemí, “Éi óen mi iya ompo iye anó éin aruan purono van iya vae.”

²¹ Maa síkan Yisasi evaránen betin tiamemí, “Téi Sabati yamú ma vanta ayofan dorarí ma erúna van mi siretí ankan anúde orera iya ono. ²² ⁱMosesi ano au khavin avúavá amikhaya Sabati yamú deren iyampon au khaviya ompo mai avúavá ída véi araí ukhen mifo anafu aráon pintéi erikhen mino. ²³ ^jMáan tukhein nan mi siretí ankan Mosesini man baya ánain dakhafeya ain iyampon au Sabatirá kaviya ompo séi ma Sabatirá ma vanta ayoferuna van pará tireti séin nan aranan ná bariya rafono. ²⁴ Tiretí ankan puntákein avúavá posá minó daimin nompo ída vá auu máa fóké ódeya yaimono.”

Yisasi Mai Tiyarafenu Ano Ma Aní Ukhein Banta Fino Ma Sein Baya Ino

²⁵ Yerusaremíké manáa nanin banta ano máa sen oreraen mí, “Ma mai ma aruan purono van iyain banta fino. ²⁶ Béi minó avorá baya siyan mi setisi ánon banta kéká ano véin nan ída mana vaya siyan mifo Tiyarafenu ano ma aní ukhein banta inó ten afová iyanten nafino. ²⁷ ^kTetí ankan beni varu afová ukhé tifé umpo Tiyarafenu ano ma aní ukhein

^d7:15 Mat 13:54; Ruk 2:47 ^e7:16 Yon 12:49; 14:10 ^f7:18 Yon 8:50

^g7:19 Apo 7:53; Rom 2:21-24 ^h7:20 Yon 8:48; 10:20

ⁱ7:22 Esé 17:9-13; Riv 12:3 ^j7:23 Yon 5:8-10, 16 ^k7:27 Yon 7:41; 9:29

banta ma erin nain mai mana ano ída veni varu afová inten mino.”

²⁸Yisasi ma monó dafufin banasi monó baya siamiyáken maen avádóden oovaraaren temí, “Tiretí ankan téin má tesi varu vá afová ukha ompo séi ída sesi sinunurá erikhé uno. Ben avúavá purasen puntákein manon téin tisintá erikhékuyan tiretí ída véin afová ukha ono. ²⁹Téi ven má baréi véin afová ukhékun téin tisintá erikhé uno.”

³⁰Máa síkan ánon banta kéká ano mai vaya iníden béin pákano van en mifo véi ma uman baran nain damú ída erikhan mana ano ven au ída aru-ven mino. ³¹Máan tiyákan kokhon nanin banta ano ventá mumunan iyáken temí, “Tiyarafenu ano ma aní ukhein banta ma erinten maen ma vanta ano ma variyain avúavá danasinta esantaren ná enará ukhein avúavasá baranten nafino.”

Monó Ánon Banta Kayo Ano Ma Yisasi Pákano Van Ein Baya Ino

³²Banasi ano Yisasi ma variyain avúavá dana san kafaya sen orera iyákan Farasisi kéká bá monó ánon banta kayo vá ano iniren Yisasin pákano van monó dafurá ma yafisin banta kéká tianten mino. ³³Siantiyákan Yisasi vetin tiamemí, “Téi ída ayáká tiretí ankan má banté umpo séin ma sisintá erikheruna Sifóe vaípa evarané oronté uno. ³⁴Orivékun mae siretí ankan te nan dosin nompo ída sonan nono. Inká téi ma o vanuna varufá ída kanaíe orin nono.”

³⁵Máa síkan Yutan kayoi ánon banta kéká ano vetiyan ten oreraemí, “Béi inte-fasá orivintirá tetí ída ven onanté tifékun ná tiyan ná tino. Ena anan bantai varafá

ma manáa setinti kéká ma o vaípasá béi o van ná monó baya siaminton ná tiyan nafino. ³⁶Téin nan tiretí ankan dosin nompo ída kanaíeya sonan nono sen ma inká tiretí ída kanaíeya se ma o vanuna varurá erin nono ma sikhein mai veni ana intesá ukhen nafino.

Aunan Ma Vain Non Ma Yisasi Ano Iyáantein Baya Ino

³⁷Mai ma átaru en monó ten oriyaréin mo akheníen kípan kákan damú Yisasi orun mantaven avádóden oovararen temí, “Non nan ma aiiyain kayo áesin ná téi varunafasá eriven nano. ³⁸PSentá ma mumunan inain mano se varunafá eriven ná mai non nano. Mai fara vara seyo, Tiyarafenui vompon dóki ano máa sikhen mino. ‘Béin aú pinté ayun ma fara van non kayo oriyan banten mino.’ ³⁹Maí damú Yisasi ída fúaren kákan bí mantan inká ída Kantá Aunan eran ukhan mi mai ma ventá mumunan inain kayo ano ma ínaimpá Kantá Aunan baran nain nan mi siyaren mino. ⁴⁰Máa síkan mai vaya iniren manáa nanin banta ano semí, “Pura siren ma sakhanampa vanta uron mino.” ⁴¹Máa síkan manáa nanin banta ano semí, “Tiyarafenu ano ma aní ukhein banta ino.” Síkan inká ena kéká ano semí, “Inté uáken ná Tiyarafenu ano ma aní ukhein banta ano Kariri fáké erinten nafino.” ⁴²Para vara seyo, Tiyarafenui vompompin máa sikharen mino. ‘Tiyarafenu ano ma aní ukhein banta ano Kin Devitini anan pintéi véi ma fefá bá ein baru Betariamúí afoká inten mino.’ ⁴³Máa siyáken banasi ano Yisasi nan kokhon ineine uren kampintan daimen oreraen

7:28 Mat 11:27; Yon 8:55 7:30 Yon 7:44 7:34 Yon 8:21; 13:36

7:37 Riv 23:36; Ais 55:1; Yon 4:14 7:38 Ais 58:11

7:39 Yon 16:7; 20:22; Apo 2:4 7:40 Diu 18:18; Yon 6:14

7:41 Yon 1:46 7:42 Íbo 89:3-4; Mai 5:2

mino. ⁴⁴Máan tiyáken manáa ano véin bákúdé pákano van en mifo ída mana ano ven au aruven mino.

Yutan Kayoi Ánon Banta Kéká Ma Ída Mumunan Ein Baya Ino

⁴⁵Ída fákarí iyaimpin monó dafurá ma yafisin banta kéká ano ovaránen monó ánon banta kéká bá Farasisi kayo vá baípa eríkan betin inaemí, “Tiretí ankan pará béin ída fákaré aviré ere rafono.

⁴⁶“Máa síkan monó dafurá ma yafisin banta kéká ano evaránen temí, “Ma vanta ano ma vaya siyainíen pefá mana vanta ano ída sikharen mino.”

⁴⁷Máa síkan Farasisi kéká ano vetin nan tiren intemí, “Tiretí ankan mái véi mákáden aviren oriyanten mino. ⁴⁸“Tetí monó ánon banta kayo vá Farasisi kéká bá pinté béintá mumunan iyá tife rafuno. ⁴⁹Ída ifo man baya ma ída afová ukhein nanin banta anon béintá mumunan iyain Tiyarafenui aran daná ano vetin má ban mino.” ⁵⁰“Betí ankan pinté Nikodimasi ano Yisasin pe o ontaren betin inaemí, ⁵¹“Tetinti man baya ano vanta fasavi avían kópín kaonó tikhen nafi áa veni vaya ana nare inian puntádeya vá onó tikhen nafino.”

⁵²“Máa síkan betí ankan evaránen béin tiamemí, “Éin má dere Kariri fáke vanta fono. Tiyarafenui vompon dókifin kama e yankádeya vá afová ono. Ída mana sakhampa vanta Karirifá afoká uaren eré iyan mino.”

Pefá ma vá ein Kiriki vayai vompompin 7:53–8:11 ída varen mino.

⁵³Mai vaya ma kípiyain má minó ano meren be amápá oreraen mino.

Mana Nanin Mano Ena Vanta Vá Noré Íkan Oman Páman Nein Baya Ino

8 Orera uvíkan Yisasi Orifí Anufá óden mino. ²Ódikharen pe ákura suron béi evaránen kákan monó dafufin oríkan banasi e átaru uvin béi kumanten monó baya siamen mino. ³Tiamiyákan mana vanta aná ano ena vanta kéká bá moré íkan man baya ma afová ukhein banta kayo vá Farasisi kéká bá ano mai nanin aviren banasi avorá me khaúden ⁴Yisasin tiamemí, “Aru soe, ma nanin mano ena vanta vá noré íkan minó ano onten mifo ⁵Y Mosesini man baya ano ma setin tisimikhein mai onámaná kayo fosá ankaman purono sikhén mifo éi inte esá teyá iniya fono.”

⁶Betí ankan ma máa sein mai véi mana vaya sintí iniré mai vayará ben avían kópín kaono van ben máka sin maen Yisasi un baren mátimen ayam-póké kayóká bompon uvaren mino. ⁷“Uvariyákan betí ankan kokhon dádá inaiyan baimpin Yisasi orun mantaven betin tiamemí, “Tiretí ankan aúbaná pinté mana ume ma ída van nain banta ano nare vá onámaná ankamono.” ⁸Máa siren evaránen mátimen kayóká bompon uvaren mino.

⁹Uvariyákan mai kayo ano mai vaya iniren maen anon banta ráké nare arafí uren oriyán minó orian kípavin Yisasi veyáká para kumantan mai nanin mano ana ve vaintá mantakharen mino. ¹⁰Mantakhan Yisasi orun mantaven mai nanin tiamemí, “Anasi oe, mai ma éin kó tiantiyá ein kéká intefasá oren ná ída mana ano éin uman amiyan nafino.”

¹¹“Máa síkan mai nanin mano semí, “Kákan banta oe, mana ano ída van mino.”

Síkan Yisasi semí, “Téin má dere éin ída kó tiantanté umpo orive ída vá evaráne umeí ono.”

Yisasi Ma Varará Ma Vain Nanin Bantai Oon Mino

¹²^bMáa siren Yisasi evaránen banasi siamemí, “Téi ma varai oon mumpo séin tínain ma vákurin nain banta ano ída kípan aunan mamaren títípañin ída nonten mino.”

¹³Máa síkan Farasisi kayo ano mai vaya íníden Yisasin evaránen tiamemí, “Éi ei yoran avúava san manan tiyan nan mi vanasi ano eni vayará ída mumunan iyan mino.”

¹⁴^cMáa síkan Yisasi evaránen betí ankan tiamemí, “Mai fura ino. Téi sesi sivútivá baya anan tiyá umpo mai vayará minó ano vá mumunan ino. Mai fara vara seyo, séi inte fákesá erikherá inká intefasá oronte rafu mai séi afová ukhé umpo siretí ankan ída uron mi mayin afová ukha rono. ¹⁵^dMáan tukheyai ma vara ráke avúavá pói séin daimiya ompo séi ída mai avúavápó mana vanta yaimiyá uno. ¹⁶^eMáan tiyá umpo yaimono sé baré banasii avúavá puntádeí yaimon nunaren mino. Para vara seyo, seyaká ana ída vá umpo mai ma sen tisintá erikheruna Sifóen mái súpá ukhé uno. ¹⁷^fErasanti man baya ano máa sikhen mino. Kankanan bantai vaya ano ma manái intiya mai furan tinten mino. ¹⁸^gMáan tukhein nan mi séi seyantá tesi yoran avúavá baya siyákun mi inká ten ma sisintá erikheruna Sifóe ano yere senti yoran avúavá baya anan tiyan mino.”

¹⁹Máa síkan betí ankan inaemí, “Intesiná e afóe va vae.”

Síkan Yisasi evaránen betin tiamemí, “Téin ma afová ukhanteya mai Sifóen má deren afová inompo séin ma ída afová ukhanteya mai Sifóen má deren ída afová inono.” ²⁰^hKákan monó da-fufin ma moní kaiyaintái Yisasi váken mi mai monó baya siyan mifo mana ano ída véin páken mino. Mai fara va ino. Beni yamú ída erikhan mino.

Ída Ma Ará Baeran Kayo Ano Ma Vetí Umefin Purin Nain Baya Ino

²¹ⁱMáa siren Yisasi evaránen ena vaya semí, “Téi orivékuya siretí ankan ten nan dosivaeya siretí umefin purin nono. Mai ma séi oronunafá tiretí ankan ída kanaíeya orin nono.”

²²Máa síkan Yutan kayo ano mai vaya iniren betiyan ten oreraemí, “Téi ma oronuna varufá tiretí ankan ída kanaíe orin nono ma siyain mai veyantasá beyan aruan purono vará tino.”

²³^jMáa sen orera iyákan Yisasi semí, “Tiretí bara ráke ompo séi yante uno. Tireti ma vara finte ompo séi ída ma vara finté uno. ²⁴Máan tukháí siretí umefin purin nona van mi siamiyá uno. Para vara seyo, séi iyé bará teyan nan tiretin tiamiya rafu mairá ma ída mumunan inteza mai siretí ume avúavápin puraseya furin nono.”

²⁵Máa síkan betí ankan béin inaemi, “Mai éi iye fono.” Síkan Yisasi evaránen temí, “Mai ma séi nan iyé ba fono ma siyaona mai vayan o siamé eriyá bá uno. ²⁶Tiamiyá umpo siretí avúavá ma yaimin baya kayo kokhon mi sempin ban mifo mai ífá iyá uno. Téin ma sisintá erikheruna vantai avúavá puntákái véin pintena ma inireruna mai vaya kayoi varará nanin banta siamiyá uno.”

^b8:12 Ais 49:6; Yon 1:4-9; 9:5; 12:46 ^c8:14 Yon 5:31-32; 7:28

^d8:15 Yon 12:47 ^e8:16 Yon 5:30; 8:29 ^f8:17 Diu 19:15 ^g8:18 1Yn 5:9

^h8:20 Yon 7:30 ⁱ8:21 Yon 7:34; 13:33 ^j8:23 Yon 3:31

²⁷ Be Afóen nan mi Yisasi siyákan betí ankan amino ukharen mino. ²⁸^kAmino ukheimpin Yisasi semí, “Banta Anin ma yaa unkamádantá ma yaní inona yamúí séi iyé bará téi uno siya rafu mai afová inono. Tesi sinunurá ída mana yanasí iyá umpo se Sifóe ma sisimein danasíi iyá uno. ²⁹Téin ma sisintá erikheruna ano sen má báken téin ída ifáí teyaká bá uno. Para vara seyo, séi ma ena ena yamú bariyaruna mai anon béin amusin amiyán mino.”

³⁰Máa siyákan mai veya iniren kokhon nanin banta ano ventá mumunan en mino.

Abaraamun Akhafanáí Ma In Baya Ino

³¹Béintá ma mumunan ein Yutan kéká máa sen tiamemí, “Tenti veya ma ákona uan pákanona ano fura uron teya senti eyo iyamponíi inono. ³²Máan ma uveyan pura sikhein baya afová esin mi ma ma fura sikhein baya ano siretí ankan kampun bayai karavusi fintena utúantanten mino.”

³³^lMáa síkan betí ankan evaránen béin tiamemí, “Tetí Abaraamun anavasin mi váké pefá araf in táké eriyá ída mana vantai miyan ída van doran bantafí ukhé tifé umpo éi fará pura sikhein baya ano kampun bayai karavusi fintena setin utúantanten mino siya fono.”

³⁴^mMáa síkan Yisasi evaránen temí, “Téi fura siré tiretí ankan tiamiyá uno. Umeí ma iyain kéká ano mai umei miyan ída van doran bantaíi ukhen mino. ³⁵Miyan i van doran banta aví ída ven antumpin ban mifo ve anin avíi ve antumpin para van oriyán bá éiyan mino. ³⁶Máan tukhein mi ve Anin mano ma siretin nan mai utúanté uno ma sintiya mai siretí ankan pura uron tire kusen ban nono. ³⁷Tiretí ankan Abaraamun

anavasin mi vaná téi afová ukhé umpo siretí ankampin ída senti veya vákayai séin tiruan purono van iya rono. ³⁸Téi se Sifóen má ma váké ontaréeruna yaná máan tiretin tiamiyá umpo siretí ankan afóen pintena ma vareona afova ánain máan dakhafiya ono.”

³⁹ⁿMáa síkan Yutan kayo ano evaránen béin tiamemí, “Abaraamu setin tifóe ino.”

Síkan Yisasi evaránen temí, “Tiretí ankan pura se Abaraamun akhafana ma varé inte mae mai véi ma variyá ein avúavái varan nono. ⁴⁰Máan tukhein nan mi Tiyarafenu ano ma fura veya sisimein ma siretin tiamiyaruna van mi séin tirono van iya ompo Abaraamu ída máan tin nain ten mino. ⁴¹^oMáan tiyákeyan tiretí afóeyani avúavái variya ono.”

Síkan betí ankan béin tiamemí, “Tetí ankan ída aasá iyampon bá uno. Tiyarafenu veyáká anan tetin Tifóe uron ban mino.”

Ban Anon Akhafanáí Ma In Baya Ino

⁴²Máa síkan Yisasi vetí ankan tiamemí, “Tiyarafenu ma siretin Afóe ma varéintiya mai séin tivábá inonaren mino. Para vara seyo, Tiyarafenu vaípákéi séi eréi mará e vá uno. Téi ída sesi sinunurá erikhé umpo Tiyarafenu anon tisintá erikhé uno. ⁴³Máan tukhé umpo senti veya ma ída iniyaona mai anon tiretí ankan ída kama e afová iya ono. ⁴⁴^pTiretí ankan Ban Anon akhafanan bákeyai siretí afóeni anunu ánain mi vákuriya ompo esé arafintá béi vanta aruan purin bantan báken béi ída fura sikhein avúavá ánain bákuriyan mino. Mai fara va ino. Pura sikhein avúavá ída vempin ban mifo kampun bantan báken kampun baya afóe uron

mino. ⁴⁵Máan tukhein nan mi séi fura sikhein bayan tiyamiyákeyan tiretí ankan ída mumunan iya ono. ⁴⁶†Tiretí ankan onesí ma séi ma umeí iyákuya mai senti namu yaná maman dáko inompo séi ma fura sikhein baya ma siyákuya mai fará ída mumunan iya rafono. ⁴⁷†Tiyarafenu akhafana ano minó beni veya kamaen iniyan mifo siretí ankan ída ven akhafanan bákeyai veni veya ída iniya ono.”

Yisasi Ma Veyan Pákena Ma Sikhein Baya Ino

⁴⁸‡Máa síkan Yutan kayo ano evará-nen bein tiamemí, “Éin nan ma Sameríá bantan ban nan en aúpin namu aunan ban mino ma siyáé tiferuna mai furá tiyá tifé rafuno.”

⁴⁹Máa síkan Yisasi evaránen betí ankan tiamemí, “Téimpin ída mana namu aunan ban mifo séi se Sifóen avíi yaní iyákuyan tiretí ankan ten tiví bararasí iya ono. ⁵⁰Téi se sivisa yaní ono van iya rauno. Ída ino. Tiyarafenu anon ten tiví daní iyáken béi anan daimin banta van mino. ⁵¹†Máan tukhein nan mi fura siré tiretí ankan tiamiyá uno. Tenti veya ánain ma yakhafin nain nanin banta ano ída uron mi furinten mino.”

⁵²Máa síkan Yutan kayo ano semí, “Éimpin namu aunan mi varé íká taréan afová é tiféuno. Abaraamun má sakanampa vanta kayo vá púkein mi vákayan éi siyákeyan tenti veya ánain ma yakhafinona vanta ano ída uron mi furin nono siya ono. ⁵³Éi iye unó tiya fono. Erasan tiyavéno Abaraamu má sakanampa vanta kayo vá ma fúkein mai kéká esantakheyá tiya fono.”

⁵⁴Máa síkan Yisasi evaránen temí, “Téi ma se siví daní ékun maen mai sen

tiví paen danasí inten mifo siretí ankan ma seya setisi Tiyarafenu ino ma siyaona anon ten tiví daní iyan mino. ⁵⁵Máan tiyan mifo siretí ankan béin ída afová ukha ompo séi anan afová ukhé uno. Béin ída afová ukhé uno ma senté mai siretin an dé kákan kampun mi senté paséi séi ven afová ukhéi veni veya ánain bákuriyá uno. ⁵⁶Bakuriyá umpo siretin afóe Abaraamu maen tenti yamú onano van amusin iyan ineine iyaren ódaren amusin en mino.”

⁵⁷Máa síkan Yutan kayo ano semí, “Éi ída fifti (50) oranaí ukha ompo éi Abaraamun ontare vae.”

⁵⁸‡Máa síkan Yisasi evaránen temí, “Téi fura siré tiretí ankan tiamiyá uno. Abaraamu ída afoká ukhá téi fefái varé uno.” ⁵⁹Máa siyain má betí ankan oná-maná kayo máden ankamono van íkan Yisasi aupáké kákan monó namun me ampiren oren mino.

Inamumpá Auu Yufúkukhá Ein Banta Ma Yisasi Ayofein Baya Ino

9 Be anóen amúpimpá auu yufúkukhan kain baré ein banta Yisasi oriyaren onen mino. ²‡Oniyákan bei eyo iyampon kayo ano véin inaemí, “Aru soe, ma vanta ma inamumpá auu yufúkukhein ma kaein mai veni ume ano fi áa ve anóe afóeni ume ano fino.”

³‡Máa síkan Yisasi evaránen tiamemí, “Mai vanta vá be anóe afóen má ída umeien mifo Tiyarafenui ákona afoká intin onano van mi véin auu yufúkukhein inamumpá kaen mino. ⁴Taréa ma kakhakhein tasá mai ma séin tisintá erikherunai yorarisá ó tifano. Para vara seyo, yunintin maen ída mana vanta ano yoranten mino. ⁵‡Téi ma

^{98:46} 2Ko 5:21; 1Pi 2:22 ^{†8:47} 1Yn 4:6 ^{§8:48} Mak 3:21-22

^{†8:51} Yon 5:24 ^{‡8:58} Yon 1:1 ^{‡9:2} Isi 18:20; Ruk 13:2, 4

^{‡9:3} Yon 11:4 ^{‡9:5} Mat 5:14; Yon 8:12

ma varará ma varúna mai séi ma vara kakhaantan oon muno.”

⁶Y Maa siren Yisasi varará akhare siren mai vara fákaren áposí uren mai vanta auufen dampanten mino. ⁷Dampaantáden mai vanta siamemí, “Oreya vá Siroamu non masípin ná mo non perano. (Siroamu e ma sikhein mai siantan oren nen tikhen mino.) Maa siren tiantan mai auu yufúkukhein banta ano mo non péden erin auu kama íkan kasaen minó daná onen mino.

⁸Oniyákan béini ádé ma varé ein kéká bá inká béi ma fefá banasi vaípa moní inantiyan ma ontaré ein kayo vá ano vetiyan inae oreraen temí, “Ma fefá ma kumanten banasi vaípa moní inantiyaré ein banta fino.” ⁹Maa siyákan manáa ano sen “mai vanta ino” síkan inká ena kéká ano semí, “Ída ino. Ena véiren banta ino” sin iyaimpin mai vanta ano semí, “Téi mai vanta uno.”

¹⁰Maa síkan betí ankan béin inaemí, “Intesá uren nan ná auu kamaen nafino.”

¹¹Maa síkan béi evaránen temí, “Yisasin ne ma siyain banta anon ápo pákaren tuufen damparen tisinten, ‘Siroamú non masípin mo non pereya ápo tesé ono’ síkái mo fédékun mi sen tuu kama íkái minó daná oniyá uno.”

¹²Maa síkan betí ankan béin inaemí, “Mai vanta intefasá ban nafino.

Síkan “téi ída afová ukhé uno,” sen mino.

Yisasi Ma Ayofiyain Avúava San Ma Farasisi Kayo Ano Vetí Aúban Kokhon Baya Sein Baya Ino

¹³Maa siyaimpin mai kéká ano mai ma auu yufúkukharé ein banta yo aviren Farasisi kayo vaintá oren mino. ¹⁴Sabati yamúí Yisasi mai vanta auu kama uanten mino. ¹⁵Moran Farasisi kayo vá dere ano mai vanta auu ma kama ein nan

ina íkan betin tiamemí, “Béin ten tuufen ápo damparái nompin mo sesé uré kamaé oné uno.”

¹⁶Maa síkan manáa Farasisi kayo ano semí, “Tetí ankan afová ukhé uno. Ti-yarafenu ano ma vanta ída siantan erakhen mino. Para vara seyo, véi Sabati yamú durafuren doriyan mino.” Síkan manáa ano semí, “Intesá urená ume vanta ano máan ten ná enará ukhein danasinta aní intéi vae.” Siren beraran aúban daimen mino.

¹⁷Máan tiyáken mai ma auu yufúkukhá ein banta vetí ankan mano evaránen inaemí, “Mai ma éin ma auu kama uantein banta van iye inó teyá éi iniya fono.”

Síkan mai vanta ano evaránen betin tiamemí, “Mai véi mana sakhanampa vanta inon té téi iniyá uno.”

¹⁸Maa síkan Yutan kayoi ánon banta kéká ano mai ma fefá auu yufúkukharéin ma saréa auu kama ukhein banta van ída mumunan iyáken mai vanta anóe afóen aren mino. ¹⁹Arákan míkanan erin maen betí ankan máa sen inaemí, “Ma siré kanan anin nafino. Auu yufúkukhein ná inamumpá kaeona fino. Mai máan ma ukhantin intesá urená béi saréa auu kamaen oniyan nafino.”

²⁰Maa síkan be anóe afóe ano evaránen betin tiamemí, “Ma verasan tanin inamumpá auu yufúkukhá kaerunan bá afová ukhé uno. ²¹Máan tukhen mifo intesá uren ná auu kamain ná iye anó auu avové uanten nafi mai verasan ída afová ukhé uno. Béi anon mifo inaesen ná beyantá tinti vá inero.” ²²Para va vékan máa sen naino. Pefá Yutan kayoi ánon banta kéká ano siyáken Yisasin nan ma Ti-yarafenu ano aní ukhein banta ino ma sin nain nanin banta monó átaru namun pintena yo siantanté uno sikhan mai van mi féden máa sen mino. ²³Mai

ana vami ve anóe afóe ano siyáken, “Béi anoní ukhein mifo véintá ina ono,” sen mino.

²⁴Máa siyaimpin mai ma auu yufúkukhá ein banta evaránen araren tiamemí, “Tiyarafenu avíká pura vá teno. Para vara seyo, Yisasi ume vantan báká teti afová ukhé uno.” ²⁵Máa síkan mai vanta ano evaránen betin tiamemí, “Béi ume vanta fi áa ída fi mai séi ída afová ukhé umpo fefá ma séin tuu yufúkukharen ma saréa kama ukhein mai anan afová ukhé uno.”

²⁶Máa síkan betí ankan evaránen béin inaemí, “Béi ano éin náisá en nafino. Intesá urená éin auu kama uanten nafino.”

²⁷Máa síkan béi evaránen betí ankan tiamemí, “Téi inka siretí ankan tiamikhé umpo fará tiretí ída inintoyá kokhon dáadá inaiyá ba rafono. Tiretí ankan masá beni eyo iyamponí onova rafono.”

²⁸Máa síkan mai Farasisi kayo ano véin asen temí, “Éi veni eyo iyampon mompo setí ankan Mosesini eyo iyampon kayo uno. ²⁹Tetí ankan afová ukhékun Tiyarafenu anon Mosesin baya siamiyaren mifo mai vanta inte fákesá erikhen nafi mai setí ankan ída afová ukhé uno.”

³⁰Máa síkan mai ma auu yufúkukhá ein banta ano evaránen betin tiamemí, “Mai ma séin tuu kama usintá ma suu mareruna vanta van tiretí ankan ena vayan teya setí béin ída afová ukhé uno inte fákesá béi erikhen nafino siya ono. ³¹^aTetí ankan minó ano afová ukhé tiféuno. Ume nanin bantai vaya Tiyarafenu ano ída iné iyan mifo mana vanta ano ma véin avaya iníden ma veni anunu yakhafen ma véinta ana ma monó tin nain bantai vayan ineno van ukhen mino. ³²Pefá arái in táké ma eren tare ma varunará ída mana inamumpá ma auu yufúkukhan kaein mai mana vanta

ano evaránen auu kama uanten ne síká inikhé uno. ³³Tiyarafenu ano ma ída mai vanta siantantin ma erikhanten maen béi ída kanaíen mana yanasí inten mino.”

³⁴^bMáa síkan betí ankan evaránen béin tiamemí, “Éi ume vái inamumpáké afoká ukha ompo éi fará tetí ankan afova simeno van iya fono.” Siren monó átaru namun pintena véin do yarifaan barufá karúdan araven mino.

Monó Avúavápin Ma Farasisi Vanta Kayo Ano Kufa Ukhein Baya Ino

³⁵Mai vanta ma yarifaan karúdein baya Yisasi iniren béin nan dosiren máa sen tiamemí, “Éi Vanta Anintá mumunan iya fo áa ída fino.”

³⁶Máa síkan mai vanta ano evaránen temí, “Kákan banta oe, Vanta Anin iye fino. Mai éi sisimirá bentá mumunan ono.”

³⁷Máa síkan Yisasi evaránen béin tiamemí, “Ma ma saréa éin má baya siyain mai vantan bákaya éi inka oniya ono.”

³⁸Máa síkan mai vanta ano semí, “Bafan noe, séi entá mumunan iyá uno,” siren aron kan durafúden mátimen Yisasintá monó ten mino.

³⁹Máan tiyákan Yisasi semí, “Téi vanta anasii avúavá daimono van mi ma varará erakheruna auu ma yufúkukhein kéká ano auu marantin auu ma kama ukhein nanin banta kayo auu yufúkinten mino.”

⁴⁰^cMáa síkan manáa Farasisi kéká mairá baren mai vaya iniren béin inaemí, “Tetí ankan masá tuu yufúkukhayá éi siya vae.”

⁴¹Máa síkan Yisasi evaránen betin tiamemí, “Auu ma fura sen dufúkukhantin mi siretí ankani ume ída vanten mifo sireti ma seya suu fara vá

oniyá uno ma sinteya mai siretíi ume fara vanten mino.

Kamaen Ma Sipipirá Dafisin Banta Vá Bei Sipisipi Kayo Vái Vaya Ino

10 Yisasi máa siren temí, “Téi fura siré tiretí ankan tiamiyá uno. Mana vanta ano ma sipisipii yafu ona ráké ma ída ódinton ma savi finté da-furá káusiven ma ódin nain mai umoyan bantan báken mi enina yaná barano van ódinten mino. ²Ódinten mifo ona ráké ma ódin nain banta mai vei sipisipirá ma yafisin banta ino. ³Máan tukhantin mi onará ma yafisin banta ano ma sipisipirá dafisin banta ma ona yiantá-dantin minó sipisipi ano véin amen avaya afová ukantin mana mana sipisipi aví ararú intin ekhuven eranten mino. ⁴Dorun ma iyuvintin maen béi an oriyantin minó sipisipi ano vein amen avaya afová ukhen ánain dakhafen orinten mino. ⁵Orinten mifo ena vanta ano ma arantin maen mai vanta amen avaya ída afová ukhen pasen sipisipi kayo ano meren karan orera inten mino.”

⁶Yisasi mai vaya sian baéan betí ankan amiyan mifo veti ída véi ma siyain baya ana afová en mino. ⁷Máan tiyaimpin Yisasi evaránen betí ankan tiamemi, “Téi fura siré tiretí ankan tiamiyá uno. Téi sipisipi kayoi yafu ona uno. ⁸Esé ma erein banta kayo maen mai ena ina yaná umoyan in banta kékái eríkan mi mai sipisipi kayo ano vetíi vaya ída inen mino. ⁹Máan tukháí séi ona umpo mana vanta ano ma sempin ma eriaren umperan nain bantan Ti yarafenu ano evaránen aví dantin kasaen ódiven eraven iyáken kama yunan nanten mino. ¹⁰Umoyan banta ma erein maen mai vetin aruré asuse iyáké umoyan barano van mi eren mifo séi

ma erikheruna mai vetí ankan aunan barantin betimpin bíkano van mi eré uno. ¹¹eTéi sipisipirá kamaen dafisin banta uno. Kama yafisin banta anon bei sipisipi vare siren bei aunan ampiádé iyan mino. ¹²fMáan tiyan mifo mana vanta ano ma ída sipisipi afóe ma váken maen béi ída kamaen dafisin moníká ana ma yoriyaren onantin ma afá iyan erintin maen béi sipisipi kayo me karúden karan orivintin afá iyan mano sipisipi kayo vákúden arintin karan oreraen asuse inten mino. ¹³Para vara seyo, mai vanta ano miyan baran máarái yoriyaren pasen sipisipirá ída yafisin meren karan orinten mino.

¹⁴Téi sipisipirá kama yafisirfin bantan báké minó tesi sipisipi kayo afová ukhékun betí ankan má téin afová ukhen mino. ¹⁵gTifóe ano ma séin afová íká ma séi ano véin afová ukheruna van mi mai sipisipi kayo aya ono van te saunan ampiadíyá uno. ¹⁶hTenti sipisipi kayo vá ano ena yafufin bain mai kayo vá o avían mana yafufin kaurékun ten timen avaya afová uven mana kékasí uvintin mana yafisin manan banten mino. ¹⁷iTéi ma se saunan ampiádaré ma evaráné baranuna mai van mi se Sifóe ano se nan anunu iyan mino. ¹⁸Ída mana vanta ano kanaíen tenti saunan do varanten mifo séi sesi sinunu fintéi se saunan ampenté umpo sempin ákona vantíi saunan ma ampíré maé evaráné barantékun mi mai ákona Sifóe ano séin timikhen mino.

¹⁹Yisasi ma mai vaya kayo siyain má Yutan kayo ano iniren beraran aúban daimen mino. ²⁰Daimen orera iyáken kokhon banta ano semi, “Béimpin namu aunan mi vákan béi óen iyan mifo siretí ankan pará á kasédeyá beni vaya iniya rafono.” ²¹Máa síkan ena kéká ano semí, “Ma ída namu aunan ma vain bantai

^d10:8 Yer 23:1-2; Isi 34:2-3

^e10:11 Íbo 23:1; Rev 7:17

^f10:12 Apo 20:29

^g10:15 Mat 11:27; 1Yn 3:16

^h10:16 Ais 56:8; Isi 34:23

ⁱ10:17 Fir 2:8-9

vaya ifo kanaisá en ná namu aunan mano auu ma yufúkukháin nain evará-nen kama uantanten nafino.”

**Yisasi Ma Veyan Nan Tiyarafenu
Anin Muno Ma Sein Baya Ino**

²²Maí damú iyonin aúbaná bákan kákan monó tin damú† Yerusaremí afoká en mino. ²³Máan tukhan maí damú Yisasi maen monó dafufin Soromonini Yuséká noren mino. ²⁴Noré íkan Yuta kayoi ánon banta kéká ano véin maman aúban den iyen eúkuven inaemí, “Éi iye uron ná baná tetí ankan éi nan amino iyá tife rafuno. Tiyarafenu ano ma aní ukharé ein banta ma vanteya setin kamaeya sisimeno.”

²⁵Máa síkan Yisasi evaránen betí ankan tiamemí, “Téi fefái siretin tiamikhé umpo siretí ída mumunan iya ono. Minó doran ma Sifóen avíká ma yoriyaruna mai anon tiretin aní iyan mifo ²⁶siretí ankan ída senti sipisipi kéká pinte nan bákeya ída mumunan iya ono. ²⁷Máan tiya ompo senti sipisipi kayo ano sen timen avaya afová ukhá téi vetí ankan afová ukhékun mi sen tínain dakhafé iyan mino. ²⁸JTéi ena ena ma ayun para van oriyan ban aunan amirékun ída afeyoran para vantin maen mana vanta ano ída kanaíen tiyan pintena vetin do varanten mino. ²⁹Mai fara vara seyo, se Sifóe anon mai kéká téin timikhan béimpin kákan ákona vákan minó esantakhein mana vanta ano ída kanaíen ben ayan pintena yo varanten mino. ³⁰Para vara seyo, Tifóe rasan manan bá uno.”

³¹Máa síkan Yutan kayoi ánon banta kayo ano véin aruan purono van evará-nen onámaná kayo varen mino. ³²Máan

tiyaimpin Yisasi vetí ankan tiamemí, “Tifóe vaípáken nan kákan aní daná kayo siretin aní iyá umpo mai kayo fintena inte yaná ma variyarúna vará tiretí ankan onámaná tinkamono van iya rafono.”

³³^kMáa síkan Yutan kayo ano evará-nen béin tiamemí, “Tetí ankan eni kama yoran nara iniré éin onámaná ankamono van iya rauno. Ída ino. Éi varará banta ano ma Tiyarafenui varu variyaona ano véin oyampá bayan tiyan ná mai van mi éin onámaná ankamono van iyá tiféuno.”

³⁴Máa síkan Yisasi evaránen betí ankan tiamemí, “Tiretí ankani man bayafin Tiyarafenu ano vetin nan ayarafenu kayo an mi yakhaonó tikhen nafino. *Íbo 82:6*

³⁵Pefá ma Tiyarafenu ano ma vanta kayo van ma ayarafenu ino ma sikharé intin barará banta kayo ano Tiyarafenui vompon dóki fintena vaya ída kanaíen durafurinten mino. ³⁶Máan tukhen mifo Tifóe ano séin iyátintáden mi ma varará tisinta erakhé uno. Erakhéi séi ma Tiyarafenu Anin muno ma siyákuya fará tiretí ankan teyá éi Tiyarafenui varú barano vará iya vae siya rafono. ³⁷Téi ma Sifóeni yorarí ma ída iyákuya mai siretí ankan ída vá tenti vayará mumunan ono. ³⁸^lTéi veni yorarí iyá umpo siretí ankan ma ída senti vayará mumunan inte ya mai séi ma minó doran ma yoriyaruna rasá mumunan ono. Máan ma inte yan tiretí ankan kanaíeya afová inono. Tifóe sempin bá téi Sifóempin bá uno.”

³⁹Máa síkan betí ankan béin enádá pákano van íkan béi vetin me ampiren oren mino. ⁴⁰^mMáan tíkan Yisasi evará-

†**10:22** Mai monó tin damú maen oon ururen amusin in damusan mi Iburu vayafinté Anuka e siyan mino.

j10:28 Yon 3:16; 6:39 **k10:33** Riv 24:16 **l10:38** Yon 14:10-11

m10:40 Yon 1:28

nen Yodení non ekháden Yoni ma fefá banasi monó non péantiyaré ein baru ádé o varen mino. ⁴¹O vákan kokhon nanin banta ano véi vaintá eriven temí, “Pura ino Yoni vei vava ákona ino van ída mana avúavá aníen mifo minó baya ma ma vanta van tiyaré ein mai furan tiyaren mino.” ⁴²Máa siren mai varu ráké kokhon nanin banta ano véinta mumunan en mino.

Rasarusini Furin Baya Ino

11 ¹Mana Rasarusin ne sin banta vá be ayofi kanan Maria nú Mata nú bá Betaní barurá baréin Rasarusin aí en mino. ²Mai ma ínainpáké ma kama auna iyain uverifó ma Yisasin arantantá banaren ma ve ánon do fóké ma yo arumin nain nanin mi Maria varéin be aváe Rasarusin aí iyan baren mino. ³Baré íkan míkan anananosan mano Yisasi vaípa baya yan oríkan temí, “Bafan noe, mai ma éi moéke anunu iyaona vanta aí iyan ban mino.”

⁴Mai vava ma Yisasi iniyáken béi semí, “Mai aí ma vain mai fura sen purin aisa van naino. Tiya rafenu ano vei ákona vanasi aní intin mai finté uaren be anin mano kákan bí barano van mi mai aí pákakhen mino.” ⁵Yisasi ano Rasarusin má be ayofi kanan Matan nú Marian nú ba san mi moéken anunu ukharen mino. ⁶Máan tukharé íkan béi ma Rasarusini aí baya ma iniren maen mai ma véi varé ein barurá kan damú bá evaránen baren mino. ⁷Baré íkan kan damú orivin bei eyo iyampon kayo siamemí, “Erí Yutan barafá evarané oró tifano.”

⁸Máa síkan bei eyo iyampon kayo ano véin tiamemí, “Aru soe, sare uron mi Yutan kayo ano éin onámaná ankamono van ein mifo mai varufasá éi evaráne orono van iya fonó.”

⁹Máa síkan Yisasi evaránen betí ankan tiamemí, “Tiyán míkan mifo sirantan kan orun kádan (12) auará ídá kakhaken báe iyan nafino. Mana vanta ano ma kará ma nóken ída eyúpóen ankaminten mino. Mai fara va ino, ma varai kakhán oniyán pasen mino. ¹⁰Máan tiyaren ma yúdufumpin orinten maen béi eyúpóen ankaminten mino. Mai fara vara seyo, véin ma kakhantan oon ída van mino.” ¹¹Máa siren Yisasi vetí ankan tiamemí, “Tetisi sirona Rasarusi maen aun mi vakhein mai finte mo avoranté uno.”

¹²Máa síkan bei eyo iyampon kayo ano mai vava iniren béin evaránen tiamemí, “Bafan noe, véi ma auun bakhá inten evaránen e mantanten mino.”

¹³Rasarusini furí pákena van mi Yisasi siyákan bei eyo iyampon kayo ano yo inian aun mi vakhan man tino sen mino.

¹⁴Máan tiyaimpin betí ankan pámanen tiamemí, “Rasarusi fúkái ¹⁵siretí ankan mumunan ono van mi iniré béin má mairá ída o varé umpo erí béin o onatifano.”

¹⁶Máa síkan Tomasi nan ma Didi-masin ne siyain mano ena eyo iyampon kayo siamemí, “Erí tetí ankan má oré béin má manafin o furó tifano.”

Yisasi Ma Rasarusin Ayofí Kanan Ará Kusiantan Baya Ma Sein Baya Ino

¹⁷Yisasi ma Betaní barurá oriven iníkan maen Rasarusin nan pe fúbín masí uran kamí kamí damú orikhen ne sen tiamen mino. ¹⁸Betaní baru ráké ma Yerusaremí barurá ma oriyain mai kankanan maerin bákan ¹⁹Yutan kayo ano Mata nú Maria nú ayofi ma fúkan bain nan ará kusiantano van e varen mino. ²⁰Mata iníkan maen Yisasi nan eriyán ne síkan béin o onanono van oren mifo Maria maen ifá en mápin baren mino. ²¹Mata ma Yisasin o oniyáken

temí, “Bafan noe, éi mará baréesin te siyofi ída furin nainten mino. ²²Máan tukhen mifo saréa yere ma éi mana yana san Tiyarafenu vaípa ma inantesin maen éin amintéi téi afová ukhé uno.”

²³Máa síkan Yisasi véin tiamemí, “E ayofi evaránen e mantanten mino.”

²⁴Máa síkan Mata véin evaránen tiamemí, “Ínainpá ma ma vara kípan nain damú ma minó nanin banta ano ma e mantiyantin maen béi e mantantéi mai séi afová ukhé uno.”

²⁵Máa síkan Yisasi véin tiamemí, “Evaránen ma e mantan má aunan ma varan má téi umpo sentá ma mumunan uven púkaréin nain mano mai finté evaránen aunan baranten mino.

²⁶Baranten mifo iye anó para váken téintá mumunan inten nafi mai ano ída uron mi furinte mino. Mairá éi mumunan iya fono.”

²⁷Máa síkan Mata evaránen béin tiamemí, “Eyo Bafan noe, éi Tiyarafenu Anin báke mai ma ma varafin erinten ne ma sen béi aní ukhá ein bantan baná téi mumunan iyá uno.” ²⁸Mata ma máa siren maen evaránen oren be aunana Marian mo araan aúpá kaúden tiamemí, “Arú ano e váken éin nan ina iyan mino.”

²⁹Máa sein baya ma Maria inen maen ainen e manten Yisasi vaípa oren mino.

³⁰Yisasi ída mai varufin ódikhen mai ma Mata má o fóken baya seintá para varen mino. ³¹Maria ma ainen e manten barufá aravíkan mai ma véin ará kusiantano van mápin baré ein Yutan kayo ano ma onen maen masíkái mo arunaná barano van mi oriyan mino siren betí ankan béin bákuren oren mino.

³²Oríkan Maria ma Yisasin o oniyáken béin arantampin o mátimen temí, “Bafan noe, éi mará bano se varé esin te siyofi ída furin nainten mino.”

³³Máa siren Maria ífi dákan mai ma véin má orikhá ein Yutan kayo ano yere ífi diyaimpin Yisasi onan béin aúpin ákuna ano víken mino. ³⁴Máan tiyáken béi inaemí, “Intefasá béin masí uren nan ban nafino.”

Síkan “Bafan noe, erive onano,” sen béin tiamen mino.

³⁵Máa síkan Yisasi ífi den mino.

³⁶Ífi dan maen Yutan kayo ano semí, “Onano. Aúkákéi véin nan anunu ukhen mino.”

³⁷Máa siyákan manáa ano semí, “Béi auu yufúkukhá ein kayo kama uantan oniyain mifo ma vanta ma ayaintin ída furoren mino.”

Rasarusi Fúkáin Ma Yisasi Ano Orun Avían Mantein Baya Ino

³⁸Yisasin arápin evaránen arunaná édaviyaimpin masíká oren mino. Mai masí maen ompin boraádan baré íkan maifin masí uren oyirá onámaná iyádan baren mino. ³⁹Baré íkan Yisasi semí, “Masí oyi ráke onámaná do varano,” síkan maen mai ma fúkein banta ayofi Mata semí, “Bafan noe, kamí kamí damú orikhein aunka inten mino.”

⁴⁰Máa síkan Yisasi semí, “Téi ídá éin tiamerá mumunan ma inteya Tiyarafenui kakhán ákona onan nono sikha rafuno. ⁴¹Máa síkan betí ankan masí oyi ráke onámaná do mádan maen Yisasi inarufá kakháben máa semí, “Tifóe oe, éi ma senti simúkin iniyaona van mi susu sé uno. ⁴²Éi ena ena yamú tenti simúkin iniyaonan báí afová ukhé umpo ma ma iyukhein nanin banta ano éin nan mi séin tiantan erikhen mino sen afová iyáken mumunan ino van mi siyá uno.”

⁴³Máa siren Yisasi avádóden oovararen temí, “Rasarusi oe, e khuve erano.” ⁴⁴Máa sen Rasarusin ariyain má

davaráe fóké minó bukhafa úkukhein mano e khuáden barufá erákan Yisasi mai nanin banta siamemí, “Davaráe yo utúantá desin orino.”

**Yisasin Arin Aa Van
Ma Yosein Baya Ino**

(*Matiu 26:1-5; Maki 14:1-2; Ruku 22:1-2*)

⁴⁵uMáan tíkan ódaren mai ma Maria má o van arunaná bariyá ein Yutan kayo ano Yisasintá mumunan en oreraen mino. ⁴⁶vMumunan iyákan mai finté manáa ano oren mai ma Yisasi varein avúava san mo Farasisi kéká tiamen mino.

⁴⁷Tiamíkan monó ánon banta kéká bá Farasisi kayo vá ano Kanisori kéká aran e átaru uvin betin inaemí, “Ma ma enará ukhein aní danasinta ma uvaren dararen iyain banta amaniná naisá otifante rafuno. ⁴⁸Tetí ankan ma véin á ékun mai avúavasí ma iyantin minó nanin banta ano véintá mumunan intin maen Romui kamanin mano eriven tetinti kákan monó namun má bara vá máden namu uren asuse inten mino.”

⁴⁹Máa síkan mai aúbanté Kaiafasin ne sin banta mai oranafin monó ánon banta kékái ánon bantai ukharen e manten temí, “Mai ma siyaona vaya siretí ankan ídá afová ukha ono. ⁵⁰Ídá afová ukha ompo minó nanin banta ano o afeyoran nafo mana vanta ano ma vetin nan o furintin mai anan kama inten mino.”

⁵¹Mai vaya ma Kaiafasi sein mai ída vei ineine finté ten mifo mai oranafin monó ánon banta kékái ánon bantaí véi ukhen banasi aya ono van ma Yisasi furin nain nan mi sakhanampa vayan Yutan barafin ma vain nanin banta kayofin tiáden mino. ⁵²wMai varafin ma vain nanin banta máa vara siáden naino. Mai ma minó barafá ma Ti yarafenu akhafana

ma vain o avían átaru urantin mana kékási ma inain mai va san mi siáden mino.

⁵³xMáan tukhan béin ma arintin purin nain aa van maí damúké araíen dosen mino. ⁵⁴Dosiyákan mai van Yutan kayo avorá non nan Yisasi me ifá en Ifraimí baru ádé kámá barafá bei eyo iyampon kayo vá o varen mino.

⁵⁵O vákan Ti yarafenu ano ma Isareri kéká Avo Uantein Damú ádé iyákan minó pimpáké banasi ano Ti yarafenu avorá avusese ono van Yerusaremí barurá ana óden mino. ⁵⁶Un báken betí ankan Yisasin nan dosian more mere uvaen monó barurá o átaru uven beraran inaemí, “Tiretí ankan náie té iniya rafono. Béi ma omápin erinten nafino.” ⁵⁷Máa siren dosiyan maen monó anon banta kéká bá Farasisi kayo vá ano vanasi siamemí, “Yisasi ma onan nona ano vá me sisimirá o fáká tifano.”

**Kama Auna Iyain Uveri Ma Yisasin
Arantantá Banaein Baya Ino**

12^yAvo Uantan Damú ma afokáin nain mai yan manápá ifo afápá mana un kádan damú ana ukhan mai ma fúkaréin masí pinte avoran e mantein banta Rasarusini varurá Betaní Yisasi o unen mino. ²zOnóbin Yisasin nan amusin uren ma samádan dunan Mata kuviyákan mai ma Yisasi má ma yunan nan takhó ma mamáden kumannen eúkukhein kayo aúbaná Rasarusin má dere kumantaren mino. ³aKumantan Maria ano mana kama aunka iyain uveri anan aúbanáké ukhein baren me Yisasin arantantá banaren tesé uantáden be ánon do fóké arumiyákan mai namumpin kama aunka ano víken mino.

⁴Máan tiyaimpin mai ma ínaimpáké Yisasin avían namuro ayampin amin

^u11:45 Yon 7:31

^v11:46 Ruk 16:31

^w11:52 Yon 10:16

^x11:53 Yon 5:18

^y12:1 Yon 11:1, 43

^z12:2 Ruk 10:40

^a12:3 Ruk 7:37-38

nain banta Yudas Iskariotin[‡] ne sin mano mai van ída amusin iyáken temí,⁵ “Kákan moníká bain uveri anan mifo ídá áenasá baré mo sarí uresá mai monípó ona ma i vain kéká ame runo.”⁶ Béi ma máa sein mai ona i van nanin banta aya onovara sen naino. Béi umoyan bantan báken moní unantá dafisiyan maifinte varyiain bákan mi máa sen mino.⁷ Máa síkan Yisasi evaránen béin tiamemí, “Ma nanin áesin máan tino. Téi ma masípin oronuna maí damúken péntintiyán mino.”^{8b} Ona ma i van nanin banta anon tiretin má ena ena vantí van nompo séi ída siretin má ena ena vanté uno.”

Rasarusin Ma Aruan Purono Van Ein Baya Ino

⁹Yutan nanin banta ano iníkan ma Yisasin nan Betaní barurá e van ne sin maen béin má inká mai ma fúkáin ma avían mantakhein banta Rasarusin má onano van oren mino.¹⁰ Máan tiyákan monó ánon banta kayo ano Rasarusin dere aruan purono van en mino.^{11c} Mai fara va ino. Yisasi ano ma Rasarusin orun avían mantakhein nan Yutan kayo ano monó ánon banta kéká me ampiriyan Yisasintá mo mumunan iyan mino.

Yisasi Ma Kin An Daven Yerusaremí Ódein Baya Ino

(*Matíu 21:1-11; Maki
11:1-11; Ruku 19:28-40*)

¹²Ená damú Yisasin nan Yerusaremí ereno van ayanafá eriyán ne sin baya ano mai ma Avo Uantan Damú monó teno van Yerusaremí barurá o iyiyá ein nanin bantafin orera íkan inen mino.^{13d} Iniren minó nanin banta ano kefo

anaí uaren béin aayana fáke o avirano van oriyán oovararen temi,
“Béin avisá daní ino!”^f

Bafan avíká ma eriyain banta vá avábá uantano! *Íbo 118:25-26*

Isarerii kin avisá daní ono!”

¹⁴Tiyarafenui vompon dóki ano ma sikhare einfen mana ano ída ané kumantaré ein donkin arará Yisasi yosiren mai amaniná kumamen eren mino:

¹⁵“Saioní nanin banta oe, onano mana ano ída ané kumantaré ein donkin arará amaniná tiretí kin mano kumamen eriyán mifo ída vá akhokho van ono.” *Sek 9:9*

^{16e}Beni eyo iyampon kayo ano amino ukharen mifo Tiyarafenu ano ma Yisasin purin pinte orun avían mantaren kákan bí amiran maen ínainpákéi vetí ankan afová iyáken bompon dóki ano Yisasin nan mi sikharen mino sen mai avúavá ma afoká ein nan ovaren me inen mino.

¹⁷Máan tiyákan Rasarusi fúbin masí ukháin ma Yisasi ano aran e manten eran ma ontaré ein nanin banta ano ena nanin banta mo siamin mai vaya ano oreraen mino.¹⁸ Mai ma enará ukhein daná ma aní ein baya ma inikhá ein nanin banta anon béin aayana fáke o avirano van oren mino.¹⁹ Máan tiyaimpin Farasisi kayo ano veraran ten oreraemí, “Onano minó nanin banta ano ma véin bákuren oriyain mano setisi aafí ída iyan mino.”

Yisasi Ma Vei Furin Baya Sian Amá Ein Baya Ino

²⁰Avo Uantan Damú ma vanasi ano Yerusaremí monó teno van ódiyan maen Kiriki kayo vá maifin o varen mino.²¹ O varen mai kéká ano oren Karirí akhempá ma vain baru Betsaidáke vanta Firipi vaintá oriven inaemí, “Kákan banta oe,

[‡]12:4 Yudas Iskarioti e ma siyain mai *Iskarioti baru ráke vantan* ban mino.

^f12:13 Iburu vaya finte ‘Osana’ ma sikhein mai ‘avisá daní ino.’

^b12:8 Diu 15:11 ^c12:11 Yon 11:45 ^d12:13 Yon 1:49 ^e12:16 Yon 2:22

Yisasin onátifano van muno.” ²²Máa síkan Firipi ano Enduru mo siamíden míkanan mano Yisasin mo siamen mino.

²³^fTiamíkan Yisasi evaránen békanan tiamemí, “Banta Anin ma kákan bí baran nain maí damú inka afoká en mino. ²⁴^gTéi fura siré tiretí ankan tiamiyá uno. Mana uviti ayun ma varafin ída ar-avinten maen ída e ampaminten mifo varafin ma orun peran nain manon e ampamaren kokhon aran imádan-ten mino. ²⁵^hMáan tukhen mifo mana vanta ano ma vei aunan pákaan ákona iyáintin maen mai o afeyoranten mifo mana vanta ano ma ma varará bei aunan ma ampiyáintin maen beni aunan pákarantin ayun para van oriyán banten mino. ²⁶Mana ano ma senti yorarí ono van téin tínain ná bákurino. Para vara seyo, senti yoran banta ano se ma vanunarái vanten mino. Te Sifóe ano mai ma senti yorarí iyáin nain bantan kákan bí aminten mino.”

Inaru Fáké Mana Oova Ano Ma Yisasin Aví Daní Ein Baya Ino

²⁷ⁱMáa siren Yisasi semí, “Taréa sen tirá ano uman diyá umpo náiesá ten nuno. Tifóe oe, ma uman pinte siya onó tente rafuno. Ída ifo mai ma eriyain uman barano van mi erikharé uno. ²⁸Tifóe oe, e avisá maman kákaní ono” siyain má inaru fáké mana vaya eriyáken temí, “Te siví inka maman kákaní uráké evaráne maman kákaní onté uno.” ²⁹Máa síkan mairá ma iyukhá ein nanin banta ano siyáken aafan kankaré tiyan mino síkan manáa ano enisori anon béin má baya siyan mantino sen mino.

³⁰Máa síkan Yisasi semí, “Mai ma ineona vaya mai séin tiyain baya

vaino. Ída ino. Tiretin ma ayain baya ino. ³¹Barará nanin bantai avúavá ma yaimin damú inka afoká ein ma varará ma yafíká ein ánon banta^s Tiyarafenu ano vákúdantin orinten mino. ³²^jMáan tinten mifo ma vara ráke ma séin maman daní urantí maé minó nanin banta o aviádékun téi varunará erinten mino.” ³³^kYisasi ma mai vaya sein mai veyan ma furin nain avúavá páken nan tiamen mino.

³⁴^lTiamíkan banasi ano semí, “Man bayafin inétífékun Tiyarafenu ano ma aní ukhein banta ano fara van oriyán banten ne sikhen mifo inté uáké Banta Anin maman daní inte ne siya fono. Banta Anin mai iyé ban nafino.”

³⁵^mMáa síkan Yisasi vetí ankan tiamemí, “Tiretí ankan ma kakhaantan oon mano sító máarái vantin dunin mano siretin maman barará danten mifo vá tiretimpin ma oon báken kakhaan tiyaintasá nono. Títípafin ma oriyain banta ano mai ma véi oriyaípa ída afová ukhen mino. ³⁶ⁿMai oon ma siretin má bain nan ma ákona mumunan inte mae mai oon akhafanaíi inono.” Yisasi ma mai vaya kayo vanasi siamíden maen me onen aúpá oren mino.

Yutan Kayo Ma Yisasintá Ída Mumunan In Avúavú Ma Ákona En Pákakhein Baya Ino

³⁷Yisasi ma enará ukhein dandasinta ma vanasi avorá aníyian maen betí ankan ída véintá mumunan iyaren mino. ³⁸Máan ma ein manon sakhanampa vanta Aisaiya ma siádan baré ein bayan mo kanaíen mino:

“Bafan noe, iye anó tetinti vayará mumunan iyan ná

§12:31 Barará ma yafíká ein ánon banta mai Ban Anon mino.

^f12:23 Yon 13:31-32; 17:1 ^g12:24 1Ko 15:36 ^h12:25 Mat 16:25

ⁱ12:27 Íbo 6:3; 42:5; Mat 26:38 ^j12:32 Yon 3:14 ^k12:33 Yon 19:6

^l12:34 Íbo 110:4; Ais 9:7; Dan 7:14 ^m12:35 Yon 8:12 ⁿ12:36 Efe 5:8

inká intéa kékápin ná Bafan mano vei ayain ákona aní inten nafino.” *Ais 53:1*

³⁹Para va vanasi ano ída mumunan en naino. Aisaiya ma ena vompompin máa sikhein anará ino:

⁴⁰“Tiyarafenu ano vetí ankan auu yufúkuádaren

aráká iyádan

mai van ída kanaíen oniyáken

aúkáké inen

ará baerái ída ayofé uno.” *Ais 6:10*

⁴¹Para va máa sikhian naino. Aisaiya ano Yisasini kakhian ákona ódaren mai van mi siádan baren mino. ⁴²PMáan tiyákan maí damú ana kokhon Yutan kayoi ánon banta kéká ano Yisasintá mumunan ukharen mifo Farasisi kayo ano monó átaru namun pinte yo siantan nain nan mi féden betíi mumunan ída sian páman en mino. ⁴³QPara va ino, Tiyarafenu ano ma vetin aví daní in nan ída fura anunu ukharen mifo vanasi ano ma vetin aví daní in nan mi moéken anunu ukharen mino.

Yisasintá Ma Mumunan Iyain Kéká Ano Mai Ve Afóentái Mumunan Iyan Mino

⁴⁴Máan tiyákan Yisasi avádóden oovararen temí, “Mana vanta ano ma sentá mumunan iyain maí séintá ana va mumunan iyan naino. Maí ma séin tisintá erikheruna maí Tiyarafenuará deren mumunan iyan mino. ⁴⁵RMáan tiyáken ma séin tonanten maen maí ma séin tisintá erikheruna Tiyarafenu vái oniyain mino. ⁴⁶Téintá ma mumunan in nain nanin banta ano ída yúdufumpin bano van mi séi ma varará oon an davé erikhé uno. ⁴⁷SMana vanta ano ma senti vaya iniren ída kamaen dafisin nain nan ída véin daimonté uno. Para vara seyo,

vanasi yaimon novara erikhe rauno. Ída ino. Betin aya uré evaráné avirano van mi erikhé uno. ⁴⁸Erikhé umpo senti vaya ma iniren átakharé iyain kéká ma yaimin nain banta maí van mino. Maí ma vetin tiamiyaruna vaya anon ma vara ma akhení inain damú betin uman aminten mino. ⁴⁹Para vara seyo, ída sesi ineine finté tiamiyá umpo se Sifóe ano ma sisintáden ma máan ná teno ma sen tisimikharé ein bayan tiamiyá uno. ⁵⁰Téi afová ukhékun mi véi ma sisimikhein baya ano ayun para van oriyan ban aai aní ukhen mino. Máan tukháí maí vaya vá teno ma siren Tifóe ano ma sisimikhá ein bayan tiamiyá uno.”

Yisasi Ma Vei Eyo Iyampon Kayo Arantan Tesé Uantein Baya Ino

13 Tiyarafenu ano ma Isareri nanin banta Avo Uantan Damú áde iyákan Yisasi veyan ma ma vara me ampiren ma ve Afóe vaípa orin nain damu inká afoká en mino sen béi afová en mino. Bei vanasi ma ma varará bain nan anunun iyaren mi véi ma furin nain manon maí anunu maman dákó inten mino. ²Qnúpáké betí ankan kumanten dunan niyákan maí ma Yisinin avían namuro ayampin kaintin ma arin nain banta Saimonin anin Yudas Iskariotin aúpin Ban Ano mano fében ineine amen mino. ³UYisasi afová ukhan be Afóe ano minó daná ben ayampin mana amikhan béi Tiyarafenu vaípáké erikhein maí véi evaránen Tiyarafenu vaípa orinten pasen ⁴dunan nan takhókáké orun man-taaren bei ayá au anamun do yavaman kaúden tauri maman avisafin damen mino. ⁵Damuren mana yókifin non banaan kaúden bei eyo iyampon kayo

^o12:41 Ais 6:1 ^p12:42 Yon 9:22 ^q12:43 Yon 5:44 ^r12:45 Yon 14:9

^s12:47 Yon 3:17 ^t13:2 Ruk 22:3; Yon 13:27 ^u13:3 Yon 3:35; 16:28

arantan tesé uriyan mai ma avisafin damukhá ein taurifó arúantádú en mino.

⁶Máan ten oriyaren Pita vaintá oríkan béi semí, “Bafan noe, pará éi sen tirantan tesé into fonó.”

⁷Máa síkan Yisasi evaránen béin tiamemí, “Taréa ma séi variyaruna yaná éi ída afová ukha ompo ínaimpái afová inono.”

⁸Máa síkan Pita véin tiamemí, “Téin tirantan ída vá tesé ono,” síkan Yisasi evaránen béin tiamemí, “Éin arantan ma ída sesé ékuya mae éi ída kanaíeya senti eyo iyampon ban nono.”

⁹Máa síkan Pita evaránen temí, “Máan ma inte mae ída vá tirantan máa ana sesé iyáke siyan má t́non má dere vá tesé ono.”

¹⁰vMáa síkan Yisasi véin tiamemí, “Non ma fékein banta ano avusese ukhen mai van ída enádá non peré iyan mifo arantan máan tesé é iyan mino. Tíretí ankan inka avusese ukha ompo ída minó ano avusese ukha ono.” ¹¹Para va máa sen naino. Namuro ayampin ma véin avían kain nain banta Yisasi fe afová ukhen mai van mi minó ano ída avusese ukha ono sen mino.

¹²Yisasi vetí ankan arantan ma sesé uan ḱiparen bei ayá au anamun maman uren takhoká kumamen máa sen betin inaemí, “Ma ma séi vareruna yanái ana sítetí ankan afová ukhe fonó. ¹³Tíretí ankan ma Aru soe Bafan noe ma se séin tariyaona mai furan tiya ono. Para vara seyo, séi sítetí ankani Arú bá Bafan mái vá uno. ¹⁴wTéi Bafan má Arú bá ma váké arantan tesé uanterunaí e vá ena nanin banta vasá arantan teséin maran ono. ¹⁵xTéi ma avúavái sítetí ankan aní é umpo ma ma sítetintá ma aníeruna mai avúavá ana vá dakhafono. ¹⁶yTéi

fura siré tíretí ankan tiamiyá uno. Doran banta ano ída vei ayafa esantakhan inká baya ma varen orin banta ano ven ma siantein banta ída esantakhen mino. ¹⁷Ma ma séi ma siameruna vayai ana inka sítetí ankan afová e ompo mai vaya ánain ná kama e vákuriya sin ná maen mi avábá banti van nono.

**Yisasi Ma Yudasi Nan Éi Anon
Namuro Ayampin Tivian Kain Nono
Sen Tian Amá Ein Baya Ino**

(*Matu 26:20-25; Maki
14:17-21; Ruku 22:21-23*)

¹⁸“Téi ma avían tesinaí ukheruna mai minó kayo vara siya rauno. Tiyarafenui vompon dókifin ma máa sikhá ein mai fura sen afoká inten mino. “Téin má ma mana yókifin dunan niyain banta anon ten t́non dasamono van arantan daní iyan mino.” *Íbo 41:9*

¹⁹z“Mai yaná ída afoká ukhái saréa sítetí ankan tiamiyaruna ínaimpá ma afoká intiya séin nan mai ma Tiyarafenu ano ma aní ukhá ein banta ino seya afová ure mumunan inono. ²⁰aTéi fura siré tíretí ankan tiamiyá uno. Tenti vaya ma varen orin nain banta ma kama inteya mai sen má deren kama inono. Téin ma kama inteya mai sen ma sis-intá erikheruna Sifóen má deren kama inono.”

²¹Máa sirákan Yisasin ará ano uman deimpin mairá béi semí, “Téi fura siré tíretí ankan tiamiyá uno. Tíretí ankan pinté mana ano sentin namuro ayampin tivian kain nono.”

²²Máa síkan bei eyo iyampon kayo ano iye nará tiyan nafi siren beraran onan maran uren amino en mino. ²³Amino en orera iyákan mana Yisasi ma anunu ukhein mai eyo iyampon

v13:10 Yon 6:64, 70-71; 15:3 w13:14 Mat 20:28; Ruk 22:27

*13:15 Fir 2:5; Kor 3:13; 1Pi 2:21 y13:16 Mat 10:24

z13:19 Yon 14:29; 16:4 a13:20 Mat 10:40

mano veni ádé kumantaren mino.**

²⁴Kumantaré íkan Pita ano ánon póké tiamemí, “Iye anó máan tinté iná tiyan nafi mai véin ina ure ineno.”

²⁵Máa síkan mai eyo iyampon mano Yisasin ádé e afánen o súpá uven inaemí, “Bafan noe, éi iyen nará tiya fono.”

²⁶Máa sen ina íkan Yisasi evaránen tiamemí, “Dunan anufin ma vereti yaré orun maman amenuna mai vanta ino,” siyáken bereti máden dunan anu yó-k-ífin daaren Saimonin anin Yudas Iskar-iotin amen mino. ²⁷^bAmikan Yudasi ma mai vereti naran maen Ban Anon mano véin aúpin un periyain má Yisasi véin tiamemí, “Éi ma varano van ineine iyaona yaná aine varano.” ²⁸Yisasi ma mai vaya Yudasin tiamiyákan mai yu-nan nan takhó akhempá ma kumanen eúikukharé ein kéká ano mai vaya ana ída afová en mino. ²⁹Yudasi vetí ankani moníká dafisin bantan bákan manáa ano ma inein mano véin nan mai ma Avo Uantan Damú ma nan nain dunan ná baranten nafi áa ona ma ída van kayo amino vará Yisasi véin tiamiyain nafi sen beti inikharen mino. ³⁰Máa siyain má Yudasi ma mai vaya iniren ainen e man-ten dunteimpin barufá araven mino.

Yisasi Ma Vei Eyo Iyampon Kayo Auyen Man Baya Siamein Mino

³¹^cYudasi ma e manten barufá ar-avuvin maen Yisasi semí, “Taréa Vanta Anin mano kákan bí barantin maen Ti-yarafenu ano Vanta Anintá kákan bí baranten mino. ³²^dMáan ten ma Ti-yarafenu ano kákan bí ma mamaren maen Banta Anin ainen kákan bí am-inten mino. ³³^eTikhafana oe, séi sító máarái siretin má barééku mae sireti sen nan dosin nompo Yutan kayo ma

siameruna mai vaya anan tiretí ankan tiamiyá uno. Téi ma oronuna varufá tiretí ankan ída kanaíeya orin nono.

³⁴^fMáan tukhein nan mi saréa auyen man bayan tiretin amiyá uno. Téi ma siretin nan ma sinunu iyaruná ana eya vá ena van anunu ono. ³⁵Ben nan anun-uin maran ma esin ma minó nanin banta ano afová uren maen mi siretí ankan nan tenti eyo iyampon kayo ino sinten mino.”

Yisasi Ma Pita Nan Téin Oyan Timin Nono Sein Baya Ino

(*Matíu 26:31-35; Maki 14:27-31; Ruku 22:31-34*)

³⁶Máa síkan Saimon Pita ano Yisasin inaemí, “Bafan noe, éi intefasá orinte vae.”

Síkan Yisasi evaránen béin tiamemí, “Téi ma oriyaruna varufá éi saréa ída kanaíeya sivákurin nompo ínaimpákéi orin nono.”

³⁷Máa síkan Pita evaránen béin in-aemí, “Bafan noe, séi en nan purono van mi útakhé umpo náisá ukhantirá taréa séi ída éin avákurontéku vae.”

³⁸Máa síkan Yisasi evaránen temí, “Éi kanaisáeyá téin nan purinté tiya vae. Téi fura siré éin tiamiyá uno. Inuran kúkaró-pasí iyantin ma kokore ída asikantiya éi kanú manaú dádá téin nan ída afová ukhé uno sin nono.”

Yisasi Ma Vei Eyo Iyampon Kayo Ará Kusiantan Baya Sein Mino

14 “Tiretí ankan ída vá kokhon in-eine ureya ará uman diya vá bano. Tiyarafenurá ma mumunan ukhan te vá mai sentá bá dere vá mumunan ono. ²Tifóen amápin kokhon karafaran-bákái siretí ankani varu mo funtáan-

**13:23 Yisasi ma anunu ukhein eyo iyampon mai Yoni ino.

^b13:27 Yon 13:2 ^c13:31 Yon 12:23 ^d13:32 Yon 17:5

^e13:33 Yon 7:33-34 ^f13:34 Yon 15:12, 17; 1Yn 3:23; 2Yn 5

tano van mi séi oronté umpo ída máan tukharé intí téi ma vaya siretin tiamen nunaren mino. ³gTéi ma siretí ankani varu ma mo funtáadaré maé ovarané éré tiretin e avirékuya sen má oreyá séi ma varuna varurá tireti má o van nono. ⁴O van nompo séi ma orono van iyaruna mai varufá ma orikhein mai aa inka sireti afová ukha ono.”

Yisasi Maen Be Afóe Vaípa Ma Orikhein Aa Ino

⁵Máa síkan Tomasi véin inaemí, “Bafan noe, setí ankan ída afová ukhé umpo éi intefasá oriya vae. Intesá urerá tetí ankan mai aa afová onte rafuno.”

⁶hMáa síkan Yisasi evaránen béin tiamemí, “Téi anan aa váké pura vayai ana váké inká ayun ma fara van oriyan ban aunan mi vá uno. Mana vanta ano ída kanaíeya ena aa sáké oriareya Sifóe vaípa orin nompo séin pinté uaren anan orin nono. ⁷iTiretí ankan ma séin pura se afová ukharé inteya mai Sifóen má kanaíeya afová inonaren mino. Taréan arái eya Sifóen afová e véin one ono.”

⁸Máa síkan Firipi semí, “Bafan noe, e Afóen aní esí ma onékun mai anan kanaí inten mino.”

⁹jMáa síkan Yisasi véin tiamemí, “Firipi oe, ayá damúi séi siretí ankan má bákeya ompo éi ídá téin afová ukhe fono. Banasi ano ma séin toniyain mai Sifóen mi oniyan mifo éi fará e Afóen aní ono siya fono. ¹⁰kTéi Sifóempin bákun inká Tifóe ano séimpin ban ukhen mifo éi ídá mumunan iya fono. Tesi ineine fintesa séi siretí ankan baya siamiya rauno. Ída ino. Sifóe ma sempin bain manon téin pinté uaren mi vei yorarí é iyan mino.

¹¹lTifóe ma sempin bá ma séi véimpin ma varuna mairasá mumunan inompo ída ma mumunan inteya mai ma minó doran ma séi variyáku oniyaona mairasá mumunan ono.

¹²m“Téi fura siré tiretí ankan tiamiyá uno. Téintá ma mumunan inain mano sen ma yoriyáeruna yoran manáa esantaren doranten mino. Para vara seyo, séi se Sifóe vaípaí oronté uno. ¹³nTiretí ankan ma minó dana san ma sen tivíká inantesí maé mai yanasí kasaé uantanté uno. Para vara seyo, ve Anin mano ma mai yorarí inaintá be Afóe ano kákan bí baranten mino. ¹⁴Tiretí ankan ma minó dana san ma sen tivíká ma inaesí téi mai yanasí kasaé uantanté uno.

Yisasi Ma Kantá Aunan Tiantantin Eran Nain Nan Ma Iyáantein Baya Ino

¹⁵o“Tiretí ankan ma sen nan anunu inteya vá minó tenti vaya ánain ná kamaeya vákurono. ¹⁶pBákuriya sirá Tifóen tékun ná ena siretin Ayain amintin ná mai ano siretí ankan má ena ena van oriyan bano. ¹⁷qMai Ayain maen pura vaya ana ma sin Aunan mino. Barará nanin banta ano ída kanaíen béin baren onen afová en inten mino. Mai fara vara seyo, siretí ankan má béi vákaya ven afová ukheona siretimpin mí vanten mino. ¹⁸Téi ída me ifáékuya aso iyampon an dan nompo siretí ankan baonafá téi erenté uno. ¹⁹Titó anantá barará nanin banta ano séin ída enádá tonanten mifo siretí ankan manan ten tonan nono. Téi saunan para vantí bákeya siretí ankan má aunan para vantiya van nono. ²⁰rTéin ma furin pinte ma sivo-

§14:3 Yon 12:26 h14:6 Yon 11:25; Rom 5:1-2 i14:7 Yon 8:19

j14:9 Yon 12:45; Kor 1:15; Ibu 1:3 k14:10 Yon 12:49 l14:11 Yon 10:38

m14:12 Mak 16:19-20 n14:13 Mat 7:7; Yon 15:16

o14:15 Yon 15:10; 1Yn 5:3 p14:16 Yon 14:26; 15:26; 16:7

q14:17 Yon 16:13 r14:20 Yon 17:21-23

rantí e mantékuya maí damúí afová inono. Téi Sifóempin bákuya siretí ankan tempin baná téi siretimpin bá uno. ²¹Tenti man baya ma mana ano ma iniren kamaen mai ánain dakhafin nain mai ano sen nan mi anunu iyan mino. Mana ano ma sen nan anunu intin te Sifóe ano venan anunu intí ten má dere véi nan tinunu uré teyan aní onté uno.”

²²Máa síkan Yudasí ano Yisasin máa sen inaemí, “Bafan noe, éi intesá eyá tetí ankan mana eyan aní ureyá barará nanin banta ída kanaí e aní inte fono.” (Yudas Iskarioti ena ifo ena eyo iyampon ma manaí ukhein bí dakhein manon inaeen mino.)

²³Máa síkan Yisasi evaránen béin tiamemí, “Banta ano ma séin nan anunu uren tenti vava ánain ma kamaen dakhafintin maen Tifóe ano mai vanta van anunu inten mino. Máan tintí be-rasan mai vanta vá o vá ena ena fara vá oriyá banté uno. ²⁴Téin nan ma ída anunu iyain banta anon tenti vava ánain ída kamaen dakhafiyen mino. Tenti vava ma iniyaona mai séin ma sis-intá erikheruna Sifóeni vava ino.

²⁵“Téi ma saréa siretí ankan má para varunarái ma yanasinta siamiyá uno. ²⁶Tiamiyá umpo siretí ankan ma ákon-aen ayain nain mai Kantá Aunan mino. Téin tivkái Sifóe ano véin tiantantin eriven tiretin minó daná afova amiren ineine orun mantaantantiyai minó baya ma séi siretí ankan tiamiyáeruna van ovare me ineine inono. ²⁷Téi siretí ankan me afa uré orono van mi ará kusin tiretin ameruna mai anon tiretin má banten mino. Barará nanin banta ano ma amiyainí ukhein ará kusin na séi ame raumpo siretí ankan ída vá ará uman dare akhokho van ono.

²⁸Tiretí ankan me ampiré orikharé maé ovaráné erenté uno sé pefái siamékuya inikha ompo séin nan ma fura se anunu iyanteya mai siretí amusin ná ono. Para vara seyo, mai ma séin esantakhein Tifóe vaípái oronté uno. ²⁹“Mai yanasinta ída afoká ukháí saréa o útúbé tiamiyaruna ínaimpá ma afoká intiyan mumunan inono. ³⁰Téi ída siretí ankan má ayáká baya senté uno. Mai fara vara seyo, ma varará ma yafikein ánon banta ano eriyen mino. Béimpin ída mana ákona vain téin ída mana avúavasí me usintanten mino. ³¹Máan tinten mifo Sifóe ano ma sisimein danasintan téi variyákéi se Sifóen nan ma moéké tinunu iyaruna mai varará nanin banta ano afová ino van muno. Inka ifo erí oró tifano.”

Yisasi Fura Sikhein Uvaini Anan Mino.

15 “Téi fura sikhein uvaini anan^{††} mumpo se Sifóe uvaini yunan ana afóe ino. ²vTenti siyan kayo ano ma ída aran iré iyain mai Sifóe ano yo iyákuan karúdaren aran ma iriyain ayan kayon kamaen ayaní uran kokhon aran iré iyan mino. ³Téi ma siamiyaruna vava ano inka siretin áténa yuren ariké iyáku-rayan kama ukha ono. ⁴Tiretí ankan tempin asotú esirá inká téi siretimpin ná asotú ono. Para vara seyo, uvaini ayan mano ma anon kaufin ma ída o auntanten maen mai ano ída kaníen aran iranten mino. Tiretí ankan ma ída sentá e asotú inteya máan mana eya ída aran iran nono.

⁵“Téi uvaini anan mi vákuya siretí ankan uvaini ayan mompo sentá ma súpá intí ma séi ventá túpá onuna anon kokhon aran iranten mifo siretí ankan ma sen ampinteya ída kanaíen

††15:1 Uvaini aran ma iriyain mai anan manon iré iyan mifo ída yaa ana ino.

§14:24 Yon 7:16 †14:28 Yon 20:17 †14:29 Yon 13:19 †15:2 Mat 3:10

mana yanasí inono. ^{6w}Máan tinten mifo mana vanta ano ma ída sentá ma asotú ukharé intin maen daa ayan ma avaneiní uádantín asa khavintín átaru uren irafín karúdentín ken kaurinten mino. ⁷Ken kaurinten mifo siretí ankan ma sempín asotú esin ma senti vaya ano ma siretimpín banti mae siretí ma anunu inona yaná ma inantesin mai siretín aminten mino. ^{8x}Tenti eyo iyampon kayo anon pura se kokhon aran imádesin mairáí Sifóe ano kákan bí baranten mino.

⁹“Tifóe ano ma séin nan anunu iyainí é téi siretín nan tinunu iyá umpo ena ena vá tiretí ankan tenti sinunu aúpin ná bano. ^{10y}Tiretí ankan ma senti vaya ánain ma kama e yakhafinteya mai senti avábá aúpin mi van nono. Téi ma Sifóeni vaya ánain ma kamaé bakúde ma veni avábá aúpin barunaií inono. ¹¹Para va ma vaya siretín tiamiya rauno. Tenti simusin mano siretí ankampín bantín mai amusin mano víkaaren avanino van muno. ^{12z}Tenti man baya máan mi ukhen mino. Téi ma siretí ankan nan tinunu iyarunaf e vá ben nan anunuin maran ná ono. ^{13a}Mana ano ma vei arona kayo van ma anunu uaren betí ankan aya ono van ma vei aunan ma ampian kaé iyain mai avúavá anon ena van ma anunuin avúavá esantakhen mino. ^{14b}Téi ma siretí ankan tiamerunaf ma inteya mai sen tironan ban nono. ¹⁵Para vara seyo, yoran nanin banta ano vei ayafa vanta ano ma variyain daná ída afová ukhé iyan mino. Téi Sifóen pintena ma vareruna vaya inka siretí ankan tiamiráké mai van mi siretí ankan nan téi ída yoran nanin banta e senté umpo se sirona en tenté uno. ¹⁶Tiretí ankan ída séin aní ure siviáden ná bá

umpo siretí oreya mo yoresin ayáká ma fara van aran kokhon imádano van mi aní uré tiretín doran amikhé uno. Máan tiyáke ma sen tiviká Tifóe vaipá inantinona yanasinta mai vei kasaen aminten mino. ^{17c}Ben avábá in maran ono van mi siretín tiamiyá uno.”

**Barará Nanin Banta Ano
Ma Eyo Iyampon Kayo Ará
Namú Uantan Baya Ino**

¹⁸Máa siren Yisasi evaránen temí, “Barará nanin banta ano ma siretí ankan ma namuroí uantantiya mai van tiretí ída vá amino ono. Mai fefá betí ankan téin namuroí ukhá einí inten mino. ^{19d}Tiretí ankan ma ma vara ráke vanta kayo an ma yakhesin maen banasi ano setisi kéká ino siren tiretín nan anunu inten mifo siretí ankan ída ma vara ráke vantán ba ono. Téi ma siretín aní uré ma o avíadéku vaona van mi varará nanin banta ano namuroí uantanten mino. ^{20e}Téi ma siretí ankan tiamikháeruna mai vaya vá ovare me ineno. ‘Doran banta ano vei ayafa vanta ída esantakhein mino.’ Betí ankan ma séin namu usintákaren maen máan manan en tiretín má dere namu uantanten mino. Máan tinten mifo senti vaya ánain ma yakhákaren maen mai siretíi vaya ánain deren dakhafintén mino. ²¹Téi ma sisintá erikheruna Tiyarafenun barará nanin banta ano ída afová ukhen mí séin nare siren tiretín namuroí uantanten mino. ²²Téi ma ída erivé baya siamékun maen betí ankan ída umei miyan baranté ein mifo saréa vetí ankani ume ma aúmanin aa ída van mino. ^{23f}Téin ma namuroí iyain nanin banta ano mai Sifóen mái namuroí uantiyan mino. ²⁴Máan tiyan mifo vetin aúbaná

^w15:6 Mat 7:19; 13:42 ^x15:8 Mat 5:16 ^y15:10 Yon 14:15; 1Yn 2:5

^z15:12 Yon 13:34 ^a15:13 Yon 10:11; 1Yn 3:16 ^b15:14 Mat 12:50

^c15:17 Yon 13:34 ^d15:19 Yon 17:14 ^e15:20 Yon 13:16 ^f15:23 Ruk 10:16

ma váké mana vanta ano yoká ein doran ma ída yoriyákun maen umei miyan ída vetí baranten mino. Taréa enará ukhein danasintan téi aní iyákun betí ankan oniyáken mifo se Sifóe má téi má deren para namuroí usintiyān ban mino. ²⁵Mai avúavá ma vetí ankan bariyain manon mai ma vetí man bayafin ma máa sikhá ein mi kanafen mino. ‘Ída ana vaintá paran namuroí usintiyān mino.’ *Íbo 35:19; 69:4*

²⁶gTiretí ankan ma Ákona Uantan Aunan Tifóen má bain téi siantékun tireti vaonafá erinten mino. Pura vaya sin Aunan mi Sifóen má bain eriven maen tenti sivútivá bá doran má me sian amá inten mino. ²⁷Máan tinten mifo siretí ankan masá tenti vaya vá tivútivá basá tian amá ono. Mai fara vara seyo, siretí ankan manon araf in táké ten má báke minó daná afová ukha ono.”

16 “Tiretí ankan ída mumunan ampeno van téi inikhéi siretin ma vaya siamiyá uno. ²hPara vara seyo, yamú eriyain monó átaru namun pinte siretin do siantiyáken Tiyarafenui kama yorarí iyá uno siren tiretin aruan purinten mino. ³iMai fara va ino, vetí ankan Tifóen má ten má ída afová ukhen mi mai avúavá baranten mino. ⁴Máan tintéi séi siretin má ayáká bantéi ma vaya fefá ída siamikharé umpo ínaimpá ma vanta kayo ano ma mai avúavá ma siretin amaniná kaintiya ma vaya ovare me ineno van mi siamiyá uno.

Yisasi Ma Kantá Aunani Yorá Pákēna Van Tein Baya Ino

⁵“Téin ma sisintá erikháeruna Sifóe vaípái saréa oronté umpo intefasá oriya fono se ída mana ano ina iyan ná uno. ⁶Téi ma ma vaya siamiyaruna anon

tiretin aúpin arunaná édavuaeren ákuna víkiyan mino. ⁷jUman diyan mifo séi furan tiré tiretí ankan tiamiyá uno. Téi siretí ankan aya ono van mi siretin me ampíré oronté uno. Téi ma ída orékun maen mai siretí ankan ma Ákona Uantan Aunan mano ída kanafen tiretimpin erinten mifo séi ma orontéi mai véin tiantékun tireti vaípá erinten mino. ⁸Béi ma eriven maen barará nanin bantai ume vá Tiyarafenui funtákein avúavá bá inká banasii avúavá ma yaimin nain má maman banasii ineinefin kaintin ovaren me iniren afová inten mino. ⁹Banasí ano ma ída séintá mumunan iyain mai vetí ume véi anon maman afoká intin onanten mino. ¹⁰Béi anon puntákein avúavá maman afoká intin onanten mino. Para vara seyo, séi se Sifóe vaípá ma orivékuya siretí ankan ída evaráne séin tonan nono. ¹¹kBéi anon Tiyarafenu ma vanasi yaimin nain avúavá maman afoká inten mino. Para vara seyo, ma vara ma yafíkein ánon banta ma yaimin inka afoká ukhen mino.

¹²l“Téi kokhon baya siretí ankan tiameno van iyá umpo sireti ída kanaíeya saréa inin nono. ¹³Inin nompō Fura sikhein Aunan ma eriven maen tiretí ankani ineine maman puntarantiya minó baya ma fura sin afová inono. Béi ída vei ineine finté baya sinten mifo mai ma iniran nain baya máan tiamiyáken inká ínaimpá ma afoká ono van iyain danasintan tian amá inten mino. ¹⁴Béi ma sen pinte varan nain baya ma siretin timamin nain manon tenti kakhān maman dákó inten mino. ¹⁵Minó Tifóen nína yaná ma vain mai sen tinan báí mai van mi senti vaya véi mamaren tiretin tiaminten mino siyá uno.

⁸15:26 Yon 14:26 ^h16:2 Mat 24:9; Ruk 6:22; Yon 9:22 ⁱ16:3 Yon 15:21
^j16:7 Yon 14:16 ^k16:11 Yon 12:31 ^l16:12 1Ko 3:1-2

Eyo Iyampon Kayoi Arunaná Ano Ma Maman Amusin Amin Baya Ino

^{16m}Yisasi evaránen temí, “Ádé anantá téin ída sonan nompo ínaimpáké evaráne sító máarái sonan nono.”

¹⁷Máa síkan beni eyo iyampon kayo finté manáa ano veraran ten oreraemí, “Ádé anantá sémín ída sonan nompo ínaimpáké evaráne sító máarái sonan nono’ sen ma inká ‘te Sifóe vaípa oronté uno’ ma siyain mai veni ana intesá ukhen nafino.” ¹⁸Máa siren betí ankan temí, “Titó máara’ se ma siyain bayai ana mai seti ída kanaí é afová iyá tiféuno.”

¹⁹Máa siren betí ankan Yisasin inaono van iyákan béi fe afová uren betin tiamemí, “Téi ma sé, ‘Ádé anantá tiretí ankan ída sonan nompo ínaimpáké evaráne sító máarái sémín tonan nono’ ma sikheruna vará inain maran iya rafono.” ²⁰Téi fura siré tiretí ankan tiamiyá uno. Barará nanin banta ano kákan amusin inten mifo siretí ankan kákan ífí diyákeya moéke arunaná baran nono. Máan ma iyantin tiretí ankan ará ano uman danten mifo ínaimpáké mai ano vaéaren kama amusiníi inten mino. ²¹Anasi ano ma iyampon kain damú ma afoká íkan kákan aí pinté ma iyampon kaúden maen mai aí dana san ída iné iyan mifo auyen iyampon ma afoká uádein nan mi amusin é iyan mino. ²²Máan mi ukhantiya saréa siretí ankan ará uman dan nompo séi evaráné tiretí ankan onékun maen tiretin ará ano amusin inten mino. Mana vanta ano ída kanaíen mai amusin do varanten mino. ²³ⁿMaí damú tiretí ankan ída mana yana san téi vaípa inantin nono. Téi fura siré tiretí ankan tiamé umpo séin tivíká ma mana yana san ma Sifóe vaípa inan-

tesin maen béi kasaen aminten mino. ²⁴Pefá tiretí ankan mana yaná barano van ten tivíká ída inan tikhare ompo saréa ma araíe inantire varesin maen mai amusin mano siretin aúpin kanaíen bíkanten mino.

Yisasi Ma Ma Varai Ákona Esantakhein Baya Ino

²⁵“Te Sifóeni vaya kayo ma vaédiyá tiamiyaruna yamú ma afoká intí téi ída ena vá baya vaédiyá tiamenté umpo funtádeí siamenté uno. ²⁶Maí damú ten tivíkái Sifóe vaípa amúkin nono. Tiretini oo vare Tifóe vaípa timúkono vara siya rauno. Ída ino. ²⁷°Para vara seyo, séi nan Tiyarafenu vaípakéi erikha ono sireya siretí ankan mano séin tivábá ureya mumunan ukhen nan mai van mi Sifóe ano veyantá tiretin nan anunu iyan mino. ²⁸Téi se Sifóe vaípakéi ma varará erikharéi saréa ma vara me ampiré Tifóe vaípa evaráné oronté uno.”

²⁹Máa síkan beni eyo iyampon kayo ano semí, “Taréa éi ída vaya vaéde siya ompo funtádeyai siya ono. ³⁰Minó daná afová ukhen ná tetí ankan ma inikheruna mai mana vanta ano ída éin inaono van inten mino. Máan tukháí éin nan Tiyarafenu vaípakéi erikha ono siré mumunan iyá tiféuno.”

³¹Máa síkan Yisasi evaránen tiamemí, “Taréa inká mumunan iya rafono. ^{32p}Máan tiya ompo yamú ano eriyaren inka e afoká ukhein tiretí ankan mere asuse eya siretíi varufá orera uve seyáká anan meran nompo mai ída seyáká ana vanté uno. Mai fara vara seyo, se Sifóe ano sen má banten mino. ^{33q}Tiretí ankan téin má túpá uan ákona uvesin tiretin ará ano kusino van mi séi inikhéi ma vaya siretin tiamiyá uno. Ma varará ma vasin maen minó uman mano

^m16:16 Yon 14:19 ⁿ16:23 Mat 7:7 ^o16:27 Yon 14:21, 23

^p16:32 Mat 26:31, 56 ^q16:33 Yon 14:27; Rom 5:1; 1Yn 5:4

siretimpin afoká inten mifo ará kusin masá bano. Para vara seyo, séi ma varai ákona inka esantakhé uno.”

Yisasi Ma Veyan Nan Amúkein Baya Ino

17 Yisasi ma mai vaya kayo siamíden maen béi inarufá kakháben máa sen amúkemí, “Tifóe oe, yamú inka afoká en mifo vá e Anin kákan bí amesín ná inká e Anin mano éin evaránen kákan bí amino. ²Mai fara vara seyo, éi anon minó nanin bantará ma yafisin ákona véin amikha ono. Mai ma véin avían amikheona nanin banta véi anon kanaíen ayun ma fara van oriyán ban aunan aminten mino. ³Ayun ma fara van oriyán ban aunan mai máan mi ukhen mino. Mai aunan ma varan nain kayo anon éin nan manan pura sikhein Tiyarafenun ban mino sen afová en mi inká Tiyarafenu ano ma aní ukhein banta Yisasin nan éi anon tianten nan erikhen ne sinten mino. ⁴Éi ma sen timeona mai yoran inka yóan kípéi varará nanin bantafin éini kákan bí bá ákona vá aní é uno. ⁵Tifóe oe, fefá ma ma vara ída afoká ukhá ma kákan bí bá ma váeruna mai kákan bí taréa simiresíen má bano van mi ukhé uno.

Yisasi Ma Vei Eyo Iyampon Kayo Amúkuantein Baya Ino

⁶Barará banta kéká ma éi sen timikhá eona mai kayo éin aví inka siamikhé uno. Betí ankan eni vanta kékái varéiyai séin inka simikhe nan mi vetí ankan eni vaya kamaen dakhafiyán mino. ⁷Minó daná ma séin timikheona mai en pinté anan erikhan mi vetí inka afová en mino. ⁸Para vara seyo, mai ma sisimeona vaya máa vetin tiamékun inka afová en mino. E vaípakéi séin nan erikhen

mino sen afová iyáken inká en nan mi sen tiantan erikhen mino sen mumunan iyan mino. ⁹Barará nanin banta aya onovara séi simúkiya raumpo éi ma sen timikheona mai eni kékái vá mai kayo van mi simúkiyá uno.

¹⁰“Tenti vanasi ma vain mai eni nan bákan inká eni vanasi ma vain mai senti nan ban mino. Máan tukharé iyan minó mai nanin banta éi ovaráne sen timen nan mai anon téin kákan bí timen mino. ¹¹Téi ma vara me ampiré éi vaonafá orivé ída vanté umpo vetí ankan mi ma varará banten mino. Kantasí ukheona Sifóe oe, mai ma séin timikheona ákona fókesá betin dafiseno. Máan tesin ná erasan ma mana varuná e ná betí ankan mana vá bano. ¹²Utéi ma ma kéká bá báké maé éi ma sen timikheona ákona fóké betin dafíkékun bare mino. Minó ano ída afeyoranten mifo eni vompon dóki ano ma sikharé einí en mana vanta ano anan o afeyoranten mino.

¹³“Máan tintéii séi ma vetin má para váké maé kokhon bayan tiamiyaréi saréa éi vaonafá ma oriyákon maen mi senti simusin mano vetin aúpin bíkanten mino. ¹⁴Eni vaya máa inka vetin tiamikhékun mi ma vara ráke nanin banta ano vetin namuroí uantiyan mino. Para vara seyo, sen an den betí ankan ída ma vara ráke vanta kékái van mino. ¹⁵vMa vara rákena vetí ankan do aviran novara inaiya raumpo vetintá dafíbesin Ban Anon mano ída vetin namu ino van mi simúkiyá uno. ¹⁶Téi ída ma vara ráke vákun betin má dere sen an den ída ma vara ráke ino. ¹⁷Minó ei fura sikhein baya kayo fóké betí ankan afova amesín ná betin aúpin dorantin maman kantasí uven eni kékasí ino van muno. ¹⁸wÉi ma sen tisinten ná ma varafin ererunaí é ma kéká tiantékun ma varafin orin-

¹17:3 1Yn 5:20 ²17:4 Yon 4:34 ³17:5 Yon 1:1 ⁴17:12 Yon 6:39; 13:18

^v17:15 Mat 6:13; 2Te 3:3 ^w17:18 Yon 20:21

ten mino. ¹⁹Para vara seyo, vetin nan ma sesi minó bukhafa éin amerunaí en betíí minó bukhafa fura sen éin aminten mino.

**Yisasi Ma Mumunan Nanin
Banta Amúkuantein Baya Ino**

²⁰“Tenti eyo iyampon kayo ana aya ono vara simúke rauno vetí ankaní vava ma iniren téintá ma mumunan inain mai kéká bá aya ono van mi simúké uno. ²¹Téi ma simúkeruna mai minó nanin banta ano ará manafiní uren manafin bano van muno. Éi Sifóe sempin baná ma séi empin barunaíen betí ankan erasampin bantín éin nan mi se nan tiantan erikhen mino siren barará nanin banta ano mumunan inten mino. ²²xÉi ma kakhan má ákona vá ma séin timikhá eona mai séi vetin ameruna erasan ma sirá manafiní uré manafin barunaíen betí ankan ará manafiní uren manafin banten mino. ²³Téi vetí ankan má bákuya éi sen má banái mai avúava san mi vetí ankan ará manafiní uren manafin bantin barará nanin banta ano afová en éin nan mi séin tiantan erikhan mi séin ma anunu iyainí en mi vetin anunu iyan mino sen afová inten mino.

²⁴“Tifóe oe, ma ma sen timikheona nanin banta ano sen ma vanunará bano van mi inikhé uno. Ma vara ma ída afoká ukhaya ma éi sen nan anunu ure ma mai kakhan má ákona vá ma simikhá eona mai kakhan má ákona vá téin ma simikheona kéká ano onano van muno.

²⁵“Puntákein Tifóe oe, minó barará nanin banta ano éin ída afová ukhen mifo séi anan éin afová ukhékun mi éi ma sen tisinten ná erikháeruna mai senti eyo iyampon kayo anon afová ukhen mino. ²⁶Éin nan betí ankampin téi inka sian afoká uadákeruna éin nan para sian amáé oriyá bákuya mai ma éi sen tivábá

iyonaí eya vetin avábá esí maé téi vetimpin banté uno.”

**Yisasi Ni Namuro Kayo Ano
Ma Véin Pákein Baya Ino**

(*Matiu 26:47-56; Maki 14:43-50; Ruku 22:47-53*)

18 Yisasi mai vava siren bei eyo iyampon kayo vá Kidaroní ava e kháden ena ufá ódiaren orifí dunan anafin oferén mino. ²Yisasi kokhon damú bei eyo iyampon kayo vá mai yunan anafin o átaru iyain bákan béin ma namuro kayo ayampin avían amin nain banta Yudasi mairá afová ukharen mino. ³Afová ukharen Yudasi ano aruvin banta kayo vá monó ánon banta kayoi yafisin kéká bá Farasisi kayoi yafisin banta kéká bá avíaran mai kayo ano aruvin danasinta vá oon má uruuran Orifí dunan anafin oren mino.

⁴Oríkan Yisasi ve aurá ma afoká ono van iyain danasinta afová ukhen béi e afánen mai kéká ádé oriven máa sen inaemí, “Tiretí ankan iyen nará dosiya rafono.”

⁵Máa síkan betí ankan evaránen temí, “Nasaretíke vanta Yisasin nan mi yosiyá tiféuno.”

Síkan Yisasi semí, “Mai séi uno.” Máa siyákan mai ma véin aní intin ma fákan nain banta Yudasi má mairá mantakharen mino.

⁶Betí ankan iníkan ma Yisasi sen, “Mai séi uno,” ma siyain má mai vanta kayo ano e afánen oyampáké oro senten eraven barará ankamen oreraen mino.

⁷Máan tiyain má Yisasi evaránen betí ankan inaemí, “Tiretí ankan iyen nará dosiya rafono.”

Síkan betí ankan temí, “Nasaretíke vanta Yisasin nan muno.”

⁸Máa síkan Yisasi evaránen temí, “Mai séin báí siretí ankan tiamikhé umpo sen

nan ma yosiyanteya mai ma vanta kayo áesin ná orino.”^{9y}“Máan ma sein manon pefá ma máa sikhá ein bayan kanaíen mino. “Mai ma séin timikháeona nanin banta finté mana ano ída afeyoranten mino.”

¹⁰Máa siyain má Pita mana vae-nati yákaren orun danúaren monó ánon bantai ánon banta kékái yoran banta Marákusin ne sin ayan kuron pákena átaren do síkaan karúdan barará eraven mino.

^{11z}Máan tiyain má Yisasi Pitan tiamemí, “Baenati evaráneya veni anamumpin kain orino. Te Sifóe ano ma simikhein non kápi sen nan ída nan novara fono.”

Aanasin Ne Sin Banta Ano Ma Yiasin Inaein Baya Ino

¹²Máan tiyain má aruvin banta kayo vá betí ankani ayafa vá Yutan kayoi kákan monó namuntá ma yafikein kéká bá ano Yiasin pákaren ayantá ákona anampó damen mino. ¹³Kaiafasin anan Aanasin ne sin banta vaintá nare vetí ankan ben aviren oren mino. Mai oranafin Kaiafasi monó ánon bantai ánon bantaí ukharen ^{14a}béi Yutan kayo fefá tiamikharemí, “Minó nanin banta ayaen ma mana vanta ano ma furin nain mai kama inten mino.”

Pita Ano Ma Esé Araf En Yisasi Nan Ída Afová Ukhé Uno Ma Sin Nain Baya Ino

*(Matiu 26:69-70; Maki
14:66-68; Ruku 22:55-57)*

¹⁵Pitan má ena eyo iyampon má ano Yiasin bákuren oríkan monó ánon banta kékái ánon banta ano mai eyo iyampon afová ukhan pasen áíkan Yiasin avákuren monó ánon bantai yafufin óden mino. ¹⁶Ódivíkan Pita onará man-

takharéin mai ma monó ánon banta kékái ánon banta ano ma afová ukhein eyo iyampon mano onará ma yafisin nanin tiamíkan Pitan áin dafufin éden mino. ¹⁷Édiyain má mai ma onará dafisin nanin mano Pitan máa sen inaemí, “Éin má mai vantai eyo iyampon na fono.” Síkan Pita semí, “Ída ino. Téi ída veni eyo iyampon bá uno.”

¹⁸Dafisin banta kéká bá doran banta kayo vá ano iyon eimpin ira sáden mantakhen kaniyákan Pitan má maifin mantakharen mino.

Monó Ánon Banta Kékái Ánon Banta Ano Ma Yisasi Ina Ein Baya Ino

*(Matiu 26:59-66; Maki
14:55-64; Ruku 22:66-71)*

¹⁹Mantakhan monó ánon banta kékái ánon banta ano Yisasi ma siyá ein baya kayo vá beni eyo iyampon kayo va san béin inaein mino.

²⁰Ina íkan Yisasi evaránen tiamemí, “Téi afokái vanasi vaya siamiyaré uno. Monó átaru namumpin nafi kákan monó namumpin nafi ma Yutan nanin banta átaru uví téi afokái vetí ankan baya siamiyaré umpo ída aúpá tiamiyaré uno. ²¹Pará éi inaiya fono. Téi ma vaya siamiyá eruna mai vanta kayo vá ina ono. Betí ankan mi mai vaya afová ukhen mino.”

²²Yisasi máa síkan mana kákan monó namuntá dafisin banta ano mairá mantakharen Yiasin aunápin ankamiyan temí, “Monó ánon banta kékái ánon banta avorá mai inté ein bayá evaráne siamiya fono.”

²³Máa síkan Yisasi evaránen béin tiamemí, “Téi ma namu vaya ma siyákeya mai vayai ana sian amá inompo séi ma kama vaya siyákeya éi fará ten tinkamiya fono.”

²⁴ Maa sirákan mai ma Yisasin ayantá ma ákona anan damukharé ein para vákan Aanasin ne sin banta ano véin tiantan monó ánon banta kékái ánon banta Kaiafasi vaípa aviren oren mino.

Pita Ma Evaránen Yisasin Nan Ída Afová Ukhé Uno Sein Baya Ino

(*Matiu 26:71-75; Maki 14:69-72; Ruku 22:58-62*)

²⁵ Maa tiyákan Pita irará mantakhen kaniyáin manáa ano véin inaemí, “Éin má beni eyo iyampon nafono.” Síkan béi semí, “Ída ino. Téi ída veni eyo iyampon muno.”

²⁶ Maa siyain má monó ánon banta kékái ánon bantai yoran banta ma Pita ano ma átaren tíkein bantai kéká pinté mana ano semí, “Éi ven má orifí dunan anafin ban ná onte rafunon té iniyá uno.” ²⁷ ^bMaa síkan Pita enádá “ída ino,” siyain má ana kokore asen mino.

Pairotin Avorá Ma Yisasin Kótiantein Baya Ino

(*Matiu 27:1-2, 11-14; Maki 15:1-5; Ruku 23:1-5*)

²⁸ Kaiafasi ano Yisasin inaen eriyen me kípiyákan do kakhán ákurasí iyain má aruvín banta kéká ano véin do aviren Romú kayoi ánon kamanín amá oren mino. Mai namun ódíkan béin ma namuroí uantiyáin Yutan kayo ano maifin ódikharé ékun Ti yarafenu auufen painí eono siren are usintantí mai ma Avo Uantan Omasí ma inain pinte yunan ída nan nae siren maifin ída óden mino. ²⁹ Maa siren barufá baré íkan Pairoti ano eraven morun betin inaemí, “Nái anarasá ma vanta kó tian tiya rafono.”

³⁰ Maa síkan béin evaránen tiamemí, “Béi ída aau vanta varé intí ída véin aviré éi vaonafá eré tífanunaren mino.”

³¹ ^cMaa síkan Pairoti ano vetin tiamemí, “Béin avire mo siretíi man bayafó puntarano.”

Síkan Yutan kayo ano evaránen temí, “Teti mano ma vanta aruan purin nan airo ananí ukhein mi vá uno. ³² ^dMaa ma sein manon Yisasi ma veyan purin nain avúava san ma fefá tikharé ein mi fura sen afoká en mino.

³³ Maa síkan Pairoti ano evaránen kamanín amápin ódiven Yisasin aran ódikan má sen inaemí, “Éi Yutan kayoi Kin nafono.”

³⁴ Maa síkan Yisasi evaránen béin inaemí, “Éi ei ineine fosá mai vaya siya fo áa ena vanta kayo anó tiamikhayá tiya fono.”

³⁵ ^eMaa síkan Pairoti ano evaránen béin tiamemí, “Téi Yutan bantá báku vae. Ei kéká bá betíi monó ánon banta kayo vá anon éin avían téi varunará mera va ompo éi náí aaú manten nan nafino.”

³⁶ Maa síkan Yisasi evaránen béin tiamemí, “Tenti yafisin ída ma vara rákena van mino. Tenti yafisin ma vara rákena varé intin tenti yoran banta kayo ano kanafen aruvintin ída mana vanta ano kanafen Yutan kayo ayampin téin aminté ein mifo senti yafisin mai ena vara fákenan ban mino.”

³⁷ Maa síkan Pairoti ano véin inaemí, “Mai fura ifo éi mana Kin ná ba vae.” Síkan Yisasi evaránen tiamemí, “Téin nan ma Kin ne seona mai éi furan te ono. Pura sikhein baya sian banasi amin dorarín anarái sinóe ano séin kaen mino. Pura sikhein baya ma iniren mai ánain dakhafin nanin banta anon tenti vaya iné iyan mino.”

^b18:27 Yon 13:38 ^c18:31 Yon 19:6-7
^e18:35 Yon 1:11

^d18:32 Yon 3:14; 12:32-33

**Pairoti Ano Ma Yutan Kéká
Ayampin Yisasin Amein Baya Ino**

(*Matiu 27:15-31; Maki
15:6-20; Ruku 23:13-25*)

³⁸Máa síkan Pairoti ano véin inaemí, “Pura sikhein baya mai náí yana safino,” siren evaránen Yutan kayo vaípa aravuvén betin tiamemí, “Ma vanta ma kó tiantan aau ída van mino. ³⁹Ída van mifo ena ena oranafin Avo Uantan Damú ma eri mae mana karavusi ma útúantan avúavá afová ukheya sireti ma seona mai vantán karavusi útúdékun oré iyain mifo Yutan kayoi Kin ná útúantantín orino vará iniya rafono.”

⁴⁰Máa síkan betí ankan evaránen oovararen temí, “Ída ino. Mai vanta ída ifo Barabasi ino.” (Barabasi mai kamánin má aruvín duváden banta aruan púká ein banta ino.)

**Aruvin Banta Kéká Ano Ma Yisasin
Máká Máká Ein Baya Ino**

(*Matiu 27:27-31; Maki 15:16-20*)

19 Máa sirákan Pairoti ano síkan ayankuní ukhein dafiyó póké Yisasin ankamen mino. ²fAnkamiyákan aruvín banta kéká ano mana ayankun anan máden mai fóké kini kamamó ma einí ukhein uváden ben ánotá afu uantáden mana nararé au anamun máden uanten en mino. ³Máan tuantáden béin máká maáká iyan temí, “Yutan kayoi ákona kin noe, en aví daní iyá tiféuno!” siyáken béin auná ankamen mino.

⁴Máan tiyákan Pairoti ano evaránen barurá aravuvén máa sen banasi siamemí, “Béin pinte mana aau ída yoseruna mai van mi véin aviré tireti vaonafá erenté umpo vá afová ono.”

⁵Máa sirákan Yisasi mai ayankun anan kamamó ma ánotá uantein má nararé

au anamun ma uantein má para ukhan ekhuven barufá eravíkan Pairoti ano vanasi siamemí, “Ma mai vanta ifo onano.”

⁶Máan ma siyain má monó ánon banta kéká bá kákan monó namuntá ma yafisiyain kayo vá ano oniyáken oovaraaren temí, “Aruan purono. Aruan purono.” Síkan Pairoti ano vetin tiamemí, “Beni mana aau ída yosé umpo siretí ankan béin e avíde vá tireti yantásá daa unkamádantá arono.”

⁷Máa síkan Yutan kayo ano evaránen temí, “Béi ma siyáken téi Tiyarafenu Anin muno ma sikhein mano mai setisi man bayan durafuntein mai anará béi vá purino.”

⁸Máa síkan Pairoti ano mai vaya iniren moéken akhokho van en mino. ⁹gMáan turen Yisasin evaránen aviren kamanin amápin un pében béin in-aemí, “Éi inte varu fákesa fono.” Síkan Yisasi ída mana vaya evaránen ten mino. ¹⁰Máan tiyaimpin Pairoti ano véin in-aemí, “Ífá uantan ma orin má inká daa unkamádantá ma aruan purin ákona vá ma sempin bain éi ídá afová ukheyá ída ovaráne sen má baya siya fono.”

¹¹hMáa síkan Yisasi evaránen béin tiamemí, “Dan Banta ano ma éin ída ákona amikhá inti séin ída kanaíeya man barará kainonaren mino. Mai fara vara seyo, séin ma en ayampin kaein mai vantaí ume ano eni ume esantaren kákani suron ukhen mino.”

¹²iMáa síkan Pairoti ano iniren mai ráké Yisasin ma ifá uantantín orin nain aa van dosiyákan Yutan kayo ano oovaraaren temí, “Éi mai vanta ma ifá uantesin ma orintiya mai éi ída Sisan aronan ban nono. Inká mana vanta ano ma veyan nan ma séi kin muno ma sin

^f19:2 Ruk 23:11 ^g19:9 Mat 27:12 ^h19:11 Yon 10:18; Apo 2:23; Rom 13:1

ⁱ19:12 Ruk 23:2; Apo 17:7

nain mai ano Sisan mi namuroí uantiyan mino.”

¹³Máa síkan Pairoti ano ma mai vaya iniren maen Yisasin evaránen barufá aviren morúden baya ma yaimin kará aví Onámaná Aa e sikhein karáká kumänen mino. (Aramaiki veya finté Kabata e siyan mino.) ¹⁴Tiyarafenu ano ma Isareri nanin banta Avo Uantein nan ma ovaren me inin omá kákena yunan útain damú bákan bayan aúbaní iyaimpin Pairoti ano Yutan kayo siamemí, “Tiretí ankani kin masi ifo onano.”

¹⁵Máa síkan betí ankan oovararen temí, “Béin avire orono! Mo yaa unkamádantá aresin purino!”

Síkan Pairoti ano vetí ankan inaemí, “Tiretí Kin ná daa unkamádantá arin novarae.”

Máa síkan monó ánon banta kéká ano evaránen temí, “Tetisi kin ída ena van mifo Sisa veyáká anan ban mino.”

¹⁶Máa síkan daa unkamádantá Yisasin arino van betin amen mino.

Daa Unkamádantá Ma Yisasin Arein Baya Ino

(*Matiu 27:32-44; Maki 15:21-32; Ruku 23:26-43*)

Amíkan aruvin banta kéká ano véin aviren oren mino. ¹⁷Yisasi vei yaa unkamádan maman afuná uren Ánon Dampa e sikhein dontá oren mino. (Aramaiki veya finté *Korikhota* e sikhen mino.) ¹⁸Mai yontá moren Yisasin daa unkamádantá aruren inká kan banta vá tefá tefá aren en mino. ¹⁹Aru-ran maen Pairoti ano síkan betí ankan mana veya máa sen uváden Yisasini yaa unkamádantá ankantaaren mino, “YUTAN KAYOI KIN NASARETÍKE VANTA YISASI INO.” ²⁰Pairoti ano síkan mai veya Yutan baya finté uvaren Romú baya finté uvaren Kiriki veya finté

uvaren ukharen mino. Yisasin ma yaa unkamádantá arukhein mai Yerusaremí baru ádéi vákan Yutan kayo ano oriven mai veya yankafiyaren mino.

²¹Máan tiyákan Yutan kayoi monó ánon banta kéká ano máa sen Pairotin me yuvun iyáken temí, “Éi ída Yutan kayoi kin ne sire uvarano. Ma vanta ano sen téi Yutan kayoi kin muno siyaren ne sire uvarano.”

²²Máa síkan Pairoti ano evaránen temí, “Ída ino. Téi ma uvanteruna veya mai inká uvanté umpo áesin ná para vano.”

²³Aruvin banta kayo ano Yisasin daa unkamádantá aruren beni yante vuí daná kamí kamí pintan daíden mana mádú uaran námente au anamun mana en mino. Mai au anamun mana yavaráefó anan amu uran baren mino.

²⁴Máan tukheimpin aruvin banta kéká ano semí, “Ma au anamun ída kafasé tifanté umpo kati (satu) siré tifékun esesí ma inain manon baranten mino.”

Mai avúavá ma vetí ankan barein manon Tiyarafenui vompon dókifin ma máa sikhá ein mi kanaíen mino.

“Betí ankan tenti súf daná daíden baranten mino.

Mamaren betí ankan tenti su anamuntá kati sirákan mi esesí ma ein banta anon baren mino.” *Íbo 22:18*

Máan ma sikhá ein mai avúavá máan aruvin banta kéká ano varen mino.

²⁵^jDaa unkamádan ádé ma man-takharé ein kéká mai Yisasin anóen má be aunanan má Maria Koropasin aná bá inká Makdaráke nanin Marian mái man-takharen mino. ²⁶^kMantakhan Yisasi ma moéken anunu ukhein eyo iyampon má ano vetin ádé báin Yisasi ve anóen mo oniyán tiamemí, “Anasi oe, mai e anin mino.” ²⁷Máa siren mai eyo iyampon tiamemí, “Mai e anóe ino.” Máa siran

maen mai eyo iyampon mano Marian aviren be amápin mo kaúdáken maí damúké araién béintá dafisiyaren mino.

Yisasi Ma Furein Baya Ino

(*Matiu 27:45-56; Maki 15:33-41; Ruku 23:44-49*)

²⁸Taréa anan tenti yoran minó kípen mino sen Yisasi iniyáken Ti yarafenui vompon dókifin ma sikhareé ein baya kanaí ino van béi máa semí, “Non nan tiiyá uno.” *Íbo 22:15*

²⁹!Sikan mana íta uvaini vain kave mairá ádé baré íkan betí ankan manáa mó mofen ma einí ukhein daná máden ura yankará damuren mai kavefin daaren orun maman kain Yisasin oorá óden mino. ³⁰Ódikan Yisasi mai uvaini naan onen temí, “Mai inka kípen mino,” siyáken anuran durafuriyan bei aunan ampin orin puren mino.

Mana Aruvin Banta Ano Ma Bankan Póké Yisasin Ayorampin Antarein Baya Ino

³¹^mAvo Uantan Damú mai Sabatirá afoká intéin Sabati rákena yanasinta funtáádano van iyáken Yutan kayoi ánon banta kéká ano iníkan kákan damú ma furin banta kayo au ma yaa unkamádantá ban mai ída kama ukheimpin mai vanta kéká arantan iyarantin ainen pú bintin daa unkamádantá kena ainen do varano van betí ankan Pairotin mo inaen mino. ³²Ina urákan Pairoti ano kanai ino sin aruvin banta kéká ano oren Yisasin má ma yaa unkamádantá arukharé ein bantá kanan arantan mo iyen mino. ³³Iyaren maen betí ankan Yisasi vaintá oriven onákan bei fe fúkeimpin ída veni arantan iyen mino. ³⁴Ída iyákan mana aruvin banta ano

vankan póké ayorampin antariyain má nare vá non má ano manadá avanen barará eraven mino. ³⁵ⁿMana vanta ano ve auufó pura sen ontaré ein danái siretí ankan má mumunan ono van mi sian amá en mino. ³⁶Mai yanasinta ma afoká ein mai Ti yarafenui vompon dókifin ma máa sikhareé ein mi kanaíen mino. Mai vaya máan mi sikhán mino, “Beni mana yampa ída yurafurinten mino.” *Eks 12:46; Nam 9:12; Íbo 34:20*

³⁷^oMáa sikhán inká ena vaya vá Ti yarafenui vompon dókifin máa sikharen mino, “Bankan ma arukhá ein bantan betí ankan onanten mino.” *Sek 12:10*

Yisasin Ma On Aimpin Masí Ein Baya Ino

(*Matiu 27:57-61; Maki 15:42-47; Ruku 23:50-56*)

³⁸Mai oyampáké Arematiáke vanta Yosepi ano Pairotintá mo inaúdé Yisasin au varano van oren mino. Yosepi véi Yutan kayoi ánon banta ifo mai véi mana Yisasini eyo iyampon mi váken ena ánon banta kayo van péden bei mumunan aúpasí uren baré íkan Pairoti ano kana ifo varano síkan Yisasin au o varen mino. ³⁹^pYosepi ano mana inuran ma Yisasin o onein banta Nikodimasin má oren mino. Oriyákan daa anu fóké uvantan kama aunka iyain uveri^{‡‡} vá Nikodimasi mamaren oren mino. Mai auna uverii uman teti-foa (34) kiro ino. ⁴⁰Yosepin nú Nikodimasin nú ano Yisasin au o máden Yutan kayo ano ma furin banta aurá ma variyain avuavasíen kama aunka iyain uveri vanaren kama yavaráe kayofó úken mino.

⁴¹Mai ma Yisasin daa unkamádantá arukharé ein ádé mana yunan ana vákan maifin auyen masí uádan bákan

^{‡‡}19:39 Kama aunka iyain uveri mai *Mere* ino.

^l19:29 *Íbo* 69:21 ^m19:31 *Diu* 21:22-23 ⁿ19:35 *Yon* 21:24

^o19:37 *Rev* 1:7 ^p19:39 *Yon* 3:1-2

ída mana vanta kaúan arái ukhan mino. ⁴²Máan tukhan Yutan kayo ano Sabati rákena yanasinta útaen arakhókuin damú ban maen mai masí ádé baré ín Yisasin au yayien mai on aimpin mo masíen mino.

**Yisasi Ma Evaránen
E Mantein Baya Ino**

(*Matiu 28:1-10; Maki 16:1-8; Ruku 24:1-12*)

20 Santé^{¶¶} pe ákura suron Mákdaráke nanin Maria ano masíká onano van oriyaren o onákan masí ain oyi rákena onámaná do vaébaé uan kain baren mino. ²Máan tukháin ódaren Maria ovaránen tavaen Pita nú mai ma Yisasi moéken anunu ukharé ein eyo iyampon nú baípa éren me máa sen tiamemí, “Bafani au masí pintena yo ayóken mifo mai véin intefasá kaúken nafi mai séi ída afová ukhé uno.”

³Máa síkan Pitan má ena eyo iyampon má ano masí onano van tavaen oren mino. ⁴Békanan tavaen oríkan mai ena eyo iyampon mano Pitan esanten ayampaen ben nare masíká oren mino. ⁵Oren o kharemen aimpin onákan kama yavaráe ma Yisasin úkuantákaré ein mana vákan óden mifo véi ída masí aimpin umperen mino. ⁶Ben oyampáké Pita oren esavéden masí aimpin un pében onákan davaráe kayo ana vákan ⁷mairá mana ena yavaráe Yisasin ánontá ma úkuantan baré ein mai vanta ano ma yádaren ádun kaeiní ukharen mino. ⁸Máan tukhan mai ma esé aráien ma masíká orein eyo iyampon má ano masípín un pében mai yanasinta ódaren mumunan en mino. ⁹¶Tiyarafenui vompon dókifin ma Yisasin nan púaren evaránen e mantanten ne ma síkhá ein

baya vetí ankan ída afová ukharen mino. ¹⁰Máan turen mai eyo iyampon kanan mano evaránen barufá oren mino.

**Yisasi Ma Mákdaráke Nanin Marian
Avorá Dákó Ein Baya Ino**

(*Matiu 28:9-10; Maki 16:9-11*)

¹¹Orivíkan masí ain oyirá Maria mantakhen ífi diyáken masí aimpin máti-men mun onen mino. ¹²Onákan enisorí kanan mano efanten buí daná uren Yisasin au ma yan bakharé eintá mana ano ánompá kumanin ena ano arantampá kumanin ukharen mino.

¹³Kumantaren míkanan mano Marian inaemí, “Anasi oe, éi fará ífi diya fono.”

Síkan béi evaránen békanan tiamemí, “Tenti Bafan ma ayóden intefasá kaúken nafi séi ída afová ukhé mai van mi ífi diyá uno.”

¹⁴¶Máa siren dovaera senten onákan Yisasi oyampá mantakharen mifo ve nan ída Yisasi ino sen afová en mino. ¹⁵Máan tiyákan Yisasi véin inaemí, “Anasi oe, éi fará ífi diyá inká iyen nará dosiya fono.” Síkan dunan anará ma yafisin banta ino sen iniren temí, “Kákan banta oe, éi ma ven au ma vare mo kaurákan nonafá tisimesirá téi o varano.”

¹⁶Máa síkan mairá Yisasi semí, “Maria oe,” síkan Maria yo vaéan onen Aramaiki vaya finté, “Rabonai oe,” sen aren mino. (Mai “Rabonai” e ma siyain baya Aru sen tiyan mino.)

¹⁷¶Máa síkan Yisasi véin tiamemí, “Téi ída Sifóe vaípa ódikhé umpo ída vá ten tu fákano. Éi oreya sen tifá tiváeyan mana mo siameno. “Te Sifóen má tirití ankan Afóen má inká tenti Tiyarafenu vá tirití ankani Ayarafenu vá baípaí ódonté uno.””

¶¶**20:1** Kiriki vaya finté Santé san mi esé arái in damú se síkhen mino.

¶**20:9** Apo 2:24-32; 1Ko 15:4 ¶**20:14** Ruk 24:16; Yon 21:4

¶**20:17** Rom 8:29; Ibu 2:11-12

¹⁸ Makdaráke nanin Maria ano evará-nen oren mo máa sen eyo iyampon kayo siamemí, “Téi inka Bafan oné uno.” Siren Yisasi ma ven tiamein baya máa vetí ankan tiamen mino.

Yisasi Ma Vei Eyo Iyampon Kayo Avorá Ma Afoká Ein Baya Ino

(Matiu 28:16-20; Maki 16:14-18; Ruku 24:36-49)

¹⁹ Esé arái in damú áau eraven inú-pasí íkan eyo iyampon kayo ano Yutan kayoi ánon banta kéka san péden má ona munkuan ákona uren iyukharé íkan Yisasi vetí aúbaná o mantaven máa sen betí ankan tiamemí, “Tiretí ankan ará ano kusen ná bano.” ²⁰ Maa siren be ayan má ayoran má anín bei eyo iyampon kayo ano onen mino. Aní uran bei eyo iyampon kayo ano ma vetí Bafan onein nan kákan amusin en mino. ²¹ Amusin iyákan Yisasi enádá betí ankan tiamemí, “Tiretí ankan ará ano kusen ná bano. Te Sifóe ano ma sen tisintá erikhá erunaí é téi siretí ankan tianté umpo vá oronó.” ²² Maa siyan be aunan pútiádan betí ankan baípa oriyán temí, “Tiretí ankan Kantá Aunan ná barano. ²³ Tiretí ankan ma ena vanta kayoi ume ma ifá uantesin maen mai ume arúantanten mifo siretí ankan ma ena vanta kayoi ume ma ída ifá uantesin mai kayoi ume fara vanten mino.”

Yisasi Ma Tomasin Avorá Dakó Ein Baya Ino

²⁴ Yisasi ma vei eyo iyampon kayo vaintá ma o afoká ein inúpá Tomasin nan ma Didimasin ne sen ariyain eyo iyampon mano maifin ída varen mino.

²⁵ Máan tukharéin ena eyo iyampon kayo ano véin tiamemí, “Tetí ankan inka Bafan oné uno.”

Síkan Tomasi evaránen betí ankan tiamemí, “Béin ayampin ma antó arukhá ein afun má ayoran afumpin má ma séi ída seyantá tiyan kaúan onté maé mai séi ída mumunan onté uno.”

²⁶ Maa siran dan manápá ifo afápá kanú manaú un kádan damú orivíkan Yisasini eyo iyampon kayo ano ona munkuan ákona uren mai namumpin bákan Tomasin má maifin baréin Yisasi vetí aúbaná mantaven máa semí, “Tiretí ankan ará ano kusen ná bano.” ²⁷ Maa siren béi Tomasin tiamemí, “Éi eriveya siyan má tiyoran má tifumpin ayan kaúdeya onano. Ída vá anomé iniyákeya mumunan mana vá ono.”

²⁸ Maa síkan Tomasi evaránen béin tiamemí, “Tenti Bafan Tiyarafenu uron mono.”

²⁹ Maa síkan Yisasi evaránen béin tiamemí, “Éi sen tódeyan mumunan iya ompo séin ma ída sonten para ma mumunan iyain nanin banta ano vá amusin ino.”

Ma Vompon Dókii Ana Vaya Ino

³⁰ Yisasi vei eyo iyampon kayo avorá kokhon enará ukhein aní danasinta afoká ukharen mifo séi ída ma vompon dókifin minó uvaré uno. ³¹ Wída uvaré umpo ma vompon ma séi uvareruna mai Yisinin nan Tiyarafenu ano ma aní ukharé ein banta ino seya inká béi Tiyarafenu Anin mino se ureya véintá mumunan ono van mi uvaré uno. Béintá ma mumunan inona ano fara van oriyán ban aunan baran nono.

^t20:20 Yon 16:22; 1Yn 1:1 ^u20:23 Mat 16:19 ^v20:29 1Pi 1:8

^w20:31 Yon 3:15; Rom 1:17; 1Yn 5:13

**Yisasi Ma Yan Manápá Ifo Afápá Kan
Un Kádan Eyo Iyampon Kayo
Avorá Ma Afoká Ein Baya Ino**

21 Ínaimpáké Yisasi Kariri non akharun^{§§} akhempá bei eyo iyampon kayo vaintá enádá afokáen mino. Mai máan mi en béi afoká en mino. ²Saimon Pitan má Tomasín nan ma Didimasín ne siyain má Kariri varafin Kaná baru ráke vanta Natanierín má Sebetin anin kan má ena kankanan eyo iyampon má ano manafin iyukharen mino. ³Íyukharéin Pita máa sen betí ankan tiamemí, “Noyana arono van oriyá uno.” Síkan betí ankan temí, “Tetin má orinton muno.” Siren minó ano mana votifin un kumamen oren mifo mai inuran betí ankan ída mana noyana aren mino.

⁴Máan tiyákan do kakhiyain má Yisasi non akhempá e mantakhan bei eyo iyampon kayo ano véin ída oman afová en mino.

⁵Máan tiyákan Yisasi oovararen temí, “Tirona kayo oe, ídá manáa noyana arukhe rafono.”

Síkan betí ankan evaránen tiamemí, “Ída ino.”

⁶Máa síkan betin tiamemí, “Ayan kuron pákena mai voti akhempá base karúdaresín manáa noyana ferantiya varano.” Síkan betí ankan base mamanan karúdan aravuvín kokhon noyana víkavin betí ankan ída kanafen mai vase orun darifaan botifin kaoren en mino.

⁷Máan tiyákan Yisasi ma moéken anunu ukharé ein eyo iyampon mano Pitan tiamemí, “Bafan mantino.” Síkan Pita au anamun davamádaken doriyaren iníkan “Bafan mantino” siyain má béi

ainen au anamun e maman uren nompin káusiven ayan nakhosá den akhempá oren mino. ⁸Mai ráké ma akhempá orin ída nentá baren mifo nainti (90) mita máan bákan manáa eyo iyampon kayo ano mai votifin para váken basefin ma noyana víkakhein darifen oriyaren mino. ⁹Betí ankan ma non akhempá oriven onan maen ira kiyákan maifin manáa noyana iyó uran bákan mai akhempá bereti kayo vá baren mino.

¹⁰Bákan mairá Yisasi máa sen betí ankan tiamemí, “Taréa ma fákeona noyana kayo finte manáa vare ereno.”

¹¹^zMáa siyain má Saimon Pita votifin káusen ódiven base un darifen eyurá meren mino. Mai vasefin ma kákan noyana fékaré ein mai mana antareti ifo fiftitri (153) noyan nan baren mifo ída mai vase yáken mino. ¹²Máan turákan Yisasi vetin tiamemí, “Erive yunan nano.” Síkan eyo iyampon kayo ano afová en béi Bafan mino siren béin inain nan péden mana ano éi iyé fono sen ída ineen mino. ¹³Máan tiyákan Yisasi mairá oriven bereti vá noyana vá maman betí ankan amen mino. ¹⁴^aYisasi ma furin pinté e mantaven ma vei eyo iyampon kayo avorá afoká ein mai ma anon kanú manaú dádasí en mino.

**Pitan Nan Ma Yisasi Ano Séin Nan
Anunu Iya Fono Sein Baya Ino**

¹⁵Betí ankan ma yunan narákan Yisasi Pitan inaemí, “Yonin anin Saimoni oe, éi ma sen nan anunu iyaona ano ma vanta kayo ma sen nan anunu iyain mai esantakhen nafino.”

Máa síkan Pita semí, “Eyo Bafan noe, éi afová ukha ono. Téi en nan tinunu ukhé uno.”

§§21:1 Karirí noni ena ví mai Taiberiasí ino.

^x21:3 Ruk 5:4-7 ^y21:7 Mat 14:29; Yon 13:23 ^z21:11 Ruk 5:6

^a21:14 Yon 20:19, 26

Máa síkan Yisasi véin tiamemí, “Máan ma sinteya mai senti sipisipi arará kayo vá dunan amisintano.”

¹⁶^bMáa siren Yisasi evaránen Pitan inaemí, “Yonin anin Saimoni oe, éi sen nan anunu ukhe fonó.”

Síkan Pita semí, “Eyo Bafan noe, éi afová ukha ono. Téi en nan tinunu ukhé uno.”

Máa síkan Yisasi véin tiamemí, “Tenti sipisipi kayorasá dafítintano.”

¹⁷Máa siren evaránen Yisasi kanú manaú dádasí en Pitan inaemí, “Yonin anin Saimoni oe, éi sen nan anunu ukhe fonó.”

Síkan kanú manaú dádasí en ma Yisasi inaiyain nan Pita anomé iniyáken temí, “Bafan noe, éi minó daná afová ukha ompo séi en nan tinunu ukhé uno.”

Máa síkan Yisasi véin tiamemí, “Tenti sipisipi kayo vá dunan amisintano. ¹⁸Téi fura siré éin tiamiyá uno. Éi fumara ma vákeyai eyantá amú anan damure mae eyan ma orono seonafá oriya ompo éi ma afovaí uveya ayan kanan daní uresin ena vanta anon amú anan damuantáden éi ída orono sikhonona varufá aviren orinten mino.”

¹⁹^cPita inte avúavá puririsá intin ná Tiyarafenu ano kákan bí baranten nafi mai véi afová ino van mi Yisasi ma vaya sen mino. Máa siren Yisasi semí, “Téin tivákurono.”

²⁰^dPita yo vaében onákan mai ma Yisasi moéken anunu ukhein eyo iyampon mano vékanan oyampá avákuren eren mino. Dunan ma nein inuran ma Yisasín má o súpá uven ma “Bafan noe, iye anó éin namuro ayampin kaintéi vae” ma sein mai vanta ino. ²¹Pita ma véin ódaren Yisasín inaen temí, “Bafan noe, ma vanta vá intesá inten nafino.”

²²Máa síkan Yisasi evaránen béin tiamemí, “Béi fara vantí téi ovaráné ereno van inikhé umpo mai ano éin intesá intéi vae. Téin mana sivákurono.”

²³Mai eyo iyampon ída furinten mino ma sein baya ano mumunan nanin banta vaípa oreraen mifo Yisasi véin nan ída furinte ne vaya ída sen mino. “Béi fara vantí téi ovaráné ereno van inikhé umpo mai ano éin intesá intéi vae.” Máan manan béi sikhén mino.

Kípan Baya Ino

²⁴^eMai eyo iyampon mano anan mai yanasinta van tian afoká uren ma vompon uvamá den mino. Mai ma véi ma sian afoká ein baya mai setí ankan afová ukhé tifékun mai fura vaya uron mino.

²⁵^fYisasi ma minó avúavá bariyá ein mai kokhon ban mifo séi ma iniyaruna mana mana yanái vompon dóki uvaman kaúdu kaúdu ono sen báintin mai vompon dóki kayo ma kain afokhan ma varará ída kanaí inté ein mino.

^b21:16 Apo 20:28

^c21:19 Mat 16:24-25; 2Pi 1:14

^d21:20 Yon 13:23-25

^e21:24 Yon 19:35

^f21:25 Yon 20:30

**BAYA VAREN ORIN
BANTA (Aposeri) KAYO
MA YÓKEIN BAYA INO**

(Aposeri)

**Aposeri Vompon Ma Uvanteí
Pákenai Afova Vaya Ino**

**Ma vompon ma
uvantein banta ino.**

Ena anan pintena ayofan banta ma Porin arona váken ma ena ena véin má nókan ma minó ano anunu iyá ein banta Ruku ano ino. (Korosi 4:14 fin ná onano).

Uvarein orana ino.

AD sikisti-tari (63) fin Porin ma Romu kamani ano ma karavusíí ukharé in ma kíparí iyain oranafin mi ma vompon uvanten mino.

**Ma vompon ma
uvantein baru ino.**

Romú barurá ifo mai vompon ma uvaran danasinta Sisareá barurái ovare evare uan átaru uádaren mi uvanten mino.

**Ma vompon ma uvaman
amikhein kéká ino.**

Ída afová ukhé tiferuna vanta Tiofi-rasi maen Romu kamanini kákan doran banta váken monó tiyan mumunan iyá ein banta vá inká ena anan pinté ma monó tiyan mumunan ukhá ein kayo vá ino.

**Nái ana vará ma
vompon uvanten nafino.**

AD teti (30) oranafin ma Porin kar-avusi fáken Romui varafá orein baya vá inká monó doran ma arái uren dorein baya vá afová ino van uvaren mi inká mepifin anfen ukhen mino.

**Kantá Aunan Amin Nain Nan
Ma Yisasi Siamein Baya Ino**

1 ⁸Tiofirasi oe, Yisasi ma aráfen doriyáken monó baya minó nanin banta siamen eriyá ein bompon pefá uvaman amikhá uno. ²^hDoren eriyán mai ma vei yorará ino van ma vaya varen orin kayo me Kantá Aunani ákonafó monó baya siamin doran aní uran mi Tiyarafenu ano véin aviren inarufá óden mino. ³ⁱBéi uman o varen púaren masí pinté e mantavin beni vaya ma varen orin kayo ano ódarákan béin nan pura sen aun manten mino sino van betin avorá foti (40) yamúpin kokhon dádasí iyáken betí baintá afoká uviyan Tiyarafenui Yafisin pintena vaya siamen mino. ⁴^jManá damú ma Yisasi vetí ankan má duna niyáken máan mi sen tiamikharen mino, “Tiretí ankan ída vá Yerusaremí me ampire ena varufá orera iyákeya mai ma se Sifóe ano ameno van tianten mino séku ma inikhá eona yanasará ave ono. ⁵^kMonó non máa fói Yoni monó non péanten mifo ída ayáká basin mi Kantá Aunampó tiretin monó non péantanten mino.”

⁶^lMáa sirákan maen bei eyo iyampon kayo e átaru uven béin inaemí, “Bafan noe, saréa Isareri vara evaráne maman ákona uantádesin ná mana kin mano yafisinten nafino áa ída fino.”

⁸1:1 Ruk 1:3 ^h1:2 Mak 16:19; Ruk 24:49-51 ⁱ1:3 Ruk 24:36-49; Apo 10:41
^j1:4 Ruk 24:49; Yon 14:16-17; Apo 2:33 ^k1:5 Mat 3:11 ^l1:6 Ruk 24:21

^{7m}Máa síkan béi evaránen betí ankan tiamemí, “Mai áau fi yamu safi ída siredí ankan nina yaná banti ída kanafe afová in nompo Tifóe veyákái aní uren maináká dafíken mino. ⁸ⁿMáan tukhein Kantá Aunan ma siretimpin erivinti mae ákona mamareya séin pákena vaya Yerusaremí barufin má minó Yudiá bara akhempá bá Sameriá barafá bá inká ma varai minó akhempá deren mo siamin nono.”

Yisasi Ma Inarufá Ódein Baya Ino

(Maki 16:19-20; Ruku 24:50-53)

⁹Máa siran betí ankan avorá Ti-yarafenu ano véin aviran inarufá ódiyain má mana konan mano véin iyádan ída onen mino.

¹⁰Béi ódivíkan betí ankan ayompin kakhaken baré in efanten buí daná ukhein bantá kanan mano manádá betin ádé e manten mino. ¹¹ÓE mantaven máa semí, “Karirí banta kayo oe, pará tiretí ankan mará mantakheya ayompin kakhaké bara fono. Mai Yisasi ma Ti-yarafenu ano saréa siretin pinte aviren inarufá ódi ma oneona avúaváká ten mi véi umbaránen eranten mino.”

Matiasin Avían Tiyan Míkan Mifo

Sirantan Mana Orun Kádan

(11) Baya Ma Varen Orin

Kayofin* Asotú Ein Baya Ino

^{12p}Máa siran mairá eyo iyampon kayo ano Orifí Anuyon ne ma siyain anu me ampiren Yerusaremí oren mino. Yerusaremíké ma Orifí Anuyontá oriyain mai mana kiromita ino. ^{13q}Mai varufin oriven betí ankan ma fefá baré ein namumpin ódiven dan bain karafarampin un baren mino. Maifin ma un baré ein kéká mai Pita, Yoni, Yemisi, En-

duru, Firipi, Tomasi, Batoromiu, Matiu, Arfiusin anin Yemisi inká Seroti kéká pintena vanta Saimoni, inká Yemisin anin Yudasi siren mino. ¹⁴Mai vanta kéká bá anasi kayo vá inká Yisasin anóe Marian má be afá kayo vá e átaru uven ará manafiní uren amúkiyaren mino.

¹⁵Maí damú kayofin ma Yisasintá mumunan iyá ein nanin banta maen mai mana antareti ífo tuenti (120) nanin bantan átaru ukhen bákan mai finte Pita e mantaven ^{16r}máa semí, “Mumunan tiyofi sífá tiváeyan noe, pefá Ti-yarafenui vompompin Kantá Aunan mano Devitin oo ráké naren Yudasin nan Yisasin avían namuro ayampin kainten ne ma sikhá ein mano fura sen dákóen mino. ¹⁷Pefá Yudasi setimpin báken monó doran manaíen tetin má doriyaren mino.”

^{18s}Máan tukhan maen mai Yudasi ano vei namu avúavákáke miyampó mana vara o miyaní uren mai varafin beyantá ánon páké eraven ankamíkan ben amú pautivin ará kakhufen barará eraven mino. ¹⁹Ínaimpáké Yerusaremí barufin ma vain nanin banta ano mai vaya iniren maen mai vara van betí avaya finté Akeradama e sen mino. Mai víi ana mai nare vanakhein bara en tikhen mino.

²⁰Máa siren Pita evaránen temí, “Ma vaya van Í Bompompin máa sikhén mino,

‘Béi ma varé ein afokhan áesin para vantin ná

mai afokhampin ída vá mana vanta ano vano.’ *Íbo 69:25*

Inká mai vompompin mana ena vaya máa sikhén mino,

‘Ena vanta áesin ná beni varu varano.’

Íbo 109:8

*1:11 Baya ma varen orin kayo mai *Aposeri* en tiyan mino.

^m1:7 Mak 13:32 ⁿ1:8 Mat 28:19; Ruk 24:48 ^o1:11 Mat 26:64; Ruk 21:27

^p1:12 Ruk 24:50-53 ^q1:13 Mat 10:2-4 ^r1:16 Íbo 41:9 ^s1:18 Mat 27:3-8

²¹Máan tukhein nará minó banta kéká pinte mana vanta ano ma setí ankan má nókan Yisasi ma yoren non maen ontaré ein banta vá tetí avían kaékun ná beni varu varano. ²²Yoni ma aráien monó non péantiyá ein táké ma eriaeren ma Tiyarafenu ano Yisasin aviran inarufá ódein ma ontaré ein banta vá avían kaesin tetin tiyaen ná Yisasi ma fúaren e mantakhá ein baya vanasi siamino.

²³Pita máa sirákan kankánan banta avían kaen mino. Mana vanta maen kanú manaú bí ariyaren mino. Mai vanta van Yosepi ne sen ariyan inká Basabasin ne sen ariyan inká Yastasin ne sen ariyan mino. Ena vanta maen Matiasin ne sin avían kaen mino. ²⁴Mai vantá kanan avían kaúden máa sen amúkemí, “Bafan noe, eyaká anan minó nanin banta aúpin afová ukha ompo ma kanan pinte ma éi anunu ukhanona vanta vá tetin aní ure-sin ná ²⁵Yudasi vei yoran me ifá uren be nan ma vano sikhá ein barufá bano van oren mifo vékanan pinté iye anó Yudasini varu varen ná eni vava varen orin doran bantá inten nafino aní ono.” ²⁶Máa siren ayá danka vá asíka yanka vá punkíkhaan ayampin pákaran Matiasí ayá danka yanúden e aní uvíkan béin avían tiyan míkan mifo sirantan mana orun kádan (11) baya ma varen orin kay-ofin asotú en mino.

Pentíkosi Yamú Ma Kantá Aunan Erein Baya Ino

2^uPentíkosi yamú[†] e uníkan munan iyá ein nanin banta minó mana namumpin e átaru ukharen mino. ²Átaru ukháin inaru fáké manádá kákan uva ma en ereiní uaren mai ma vetí

ankan bá ein namumpin e víken mino. ³^vMáan tiyain má betí ankan onákan banta amafin ten kayo ano ira anafun ma karékará en oreiní uaren mai namumpin ma varé ein kayo ánontá mana mana en o yoman nen mino. ⁴^wMáan tiyain má Kantá Aunan mano vetí ankan aúpin bíkaven aya íkan aráien ara ara vava sen mino.

⁵Maí damú Tiyarafenu van ma féden bentá monó tiyain Yutan kayo ano minó bara fáké ere ere en Yerusaremí e varen mino. ⁶E varen mai ma uariyain ma in-ein kayo ano akhokho van e átaru uven mai ma siyain baya van takhaen oreraen mino. Mai fara va ino Yisasini vayan be avaya finté tiyan iníden mino. ⁷Iniren Yutan kéká ano anú diyáken temí, “Ma Karirí bara fáke nanin bantan banten mino. ⁸Máan tukhen mifo inté uáken ná mana mana si vava finté tiyará iniyá tife rafuno. ⁹Para vara seyo, Patiá bara fáké eriyán Midiá bara fáké eriyán Er-amíké eriyán Mesopotemiaké eriyán Yudiaké eriyán Kapadosiaké eriyán Pontasíké eriyán Esiaké eriyán ¹⁰Frikhiaké eriyán Pamfiriaké eriyán Isipíké eriyán Sairiní baru áde Ribiaké eriyán Romuké arona eriyán ¹¹inká Yutan kéká bá ena kéká bá ma setinti monó tiyain kéká bá Kirití kayo vá Arebia kayo vá anon iniyá tifékun tetinti vayafó Tiyarafenu ano ma ákona yorarí ukhein baya siyan mino. ¹²Betí ankan anú diyáken kokhon ineine iyan betiyan ten inemí, “Ma yaná ma afoká eini ana mai intesá ukhen nafino.” ¹³Máan tiyákan manáa kayo ano vetin nan taró tiyan temí, “Auyen uvaini kokhon naráken óen iyan mino.”

[†]**2:1** Avo Uantan dunan ma amusin iyan do naran mi mai oyam páké fifti yamú orivíkan Kantá Aunan erakhan mai vami Pentikosie siyan mino.

[†]**1:22** Mak 1:9; 16:19; Yon 15:27 ^u**2:1** Riv 23:15-21; Diu 16:9-11

^v**2:3** Mat 3:11 ^w**2:4** Mak 16:17; Apo 4:31; 10:44-46; 19:6

**Pita Ma Vanasi Monó
Baya Siamein Baya Ino**

¹⁴Máa siyákan Pitan má ena siyan míkan mifo sirantan mana orun ká-dan (11) eyo iyampon kayo vá ano e mantavin Pita oovaren máa semí, “Tirona Yutan kayo vá ena vara fáké ma Yerusaremí e vaona kéká ba soe, átaren ná mafá desin erivintirá mai ma afokái oneona yanái ana siaméku vá ineno.

¹⁵Tiretí ankan ma iniyaona ano ma kayo van óen non mi naráken óen iyan mino ma siyaona mai ída uron mino. Tare uron mi kakhakhan dan manápá ifo afápá kami kami un kádan (9 kiroki) áauí ukha ákurái va ono. ¹⁶Ma yaná ma afoká iyain nan pefá sakhanampa vanta Yoeri ano siádan baren mino.

¹⁷“Tiyarafenu ano siyáken ma vara ma kípano van iyantí maé tesi Kantá Aunan minó nanin banta amaniná banaékun tiretin anin kayo vá inká tiren araun kayo vá ano sakhanampa vanta an danten mino.

Máan tiyantín pumara kéká auu vaédantin oniyantin ayokhuvin banta kayo ano kokhon kain onanten mino.

¹⁸Maí damú ana sesi yoran nanin má bantafin má dere

sesi Kantá Aunan banaá dékun orintin maen sakhanampa vaya sinten mino.

¹⁹Máan tiyantí maé ara ara yaná ayompin maman dáko é maé inká barará ara ara aní danasí ékun maen

ira vá nare vá kákan íkun má édavinten mino.

²⁰Máan tintin áau ano sítípa intin inká biyon mano nare an den nararé inti ma ódaresin maen

ínaimpákéi Bafani erin mai kama uran en panu sikhein damúí erinten mino.

²¹Máan tiyantín intéa kéká anó ayaino van Bafan aví aranten nafi mai kéká aya uren evaránen aviranten mino.’ *Yoe 2:28-32*

²²“Isarerí nanin banta oe, Nasaretíke vanta Yisasini vaya senté umpo vá ineno. Tiretí afová ono van maen Tiyarafenu ano véin pinté uaren enará ukhein ákona vá aní daná bá uvaren dararen iyákaya sireyantá afová ukha ono. ²³Tiyarafenu ano afová ukhen pefá beyantá tiádan baré ein ánain dakhafen mi mai vanta siretin ayampin kaíkan namu vanta kayo ano siretin ayaen daa unkamádantá antópó béin arin puren mino. ²⁴Aruan púden nan purini ákona ano ída kanaíen béin pákaan dan baren mino. Mai fara va ino Tiyarafenu ano fúká ein pinte véin orun avían mantaren ída áin purini aí bá beraifin baren mino. ²⁵Pefá Deviti ano véin nan máan mi sikhan mino, “Téi onékun Bafan mano minó damú te má túpá ukhen mino.

Para vara seyo, véi sen tiyan kurompá bain mana yana san téi ída feranté uno.

²⁶Mai vará ten tirápin kama intirá timusin baya seno.

Máa sé umpo sen tu vá dere ano vá mai van ave ino.

²⁷Para vara seyo, éi ída áená purin nanin banta ma vaimpin báku mae inká ei kantasí ukhein banta ída áesin masípin púta inten mino.

²⁸Éi fefái aun ma varan ain aní ukha ompo

áesíen má bákuya moékan timusin timeno. *Íbo 16:8-11*

²⁹x“Mumunan tifá tiváeyan noe, setin tinau Devitini vaya sian páman uan amenté uno. Béi fúbíkan masí uran beni

masí para van eriyán taréa setimpin dere mai masí para van mino. ³⁰yMai fara va ino Deviti sakhanampa vantán bákan Tiyarafenu ano pura ódino siren béin iyáantiyáken ínainpá en ana akhá pinte mana yékun eni varu varanten mino síkan afová ukhan mino. ³¹zMáa síkhan mai ma varará nanin banta ma evaránen aviran banta ma e mantan nain Deviti ínainpákena yaná oniyáken béin ída áintin purin nanin banta vá báken mai masípin púta inten mino síkhanen mino. ³²Maí vaya ma síkhá einien Tiyarafenu ano mai Yisasin masí pinte orun avían mantá tetí minó kayo ódarákaréi mai vaya sian dáko iyá tiféuno. ³³aMáan tukhan pefá ma Tiyarafenu ano Kantá Aunan amenté uno siren ma iyáantáká ein Yisasin amin mamaren inarufá óden be afóen ayan kurompá un ban mi saréa ma oniyáke ma iniyaona Kantá Aunan banaiyan mino. ³⁴Deviti ída Yisasi ma ódeinien inarufá óden mifo véi máa síkhan mino,

“Bafan mano senti Bafan máa sen tiamikhan mino,

“Éi sen tiyan kurompá kumantesí

³⁵ma eni namuro kayo maman bararasí uré

en aránaó kaúdéku vá ono.” ’ *Íbo 110:1*

³⁶b“Máan tukhen mifo Isareri nanin banta oe, minó ano vá afová ono. Yisasi ma yaa unkamádantá ma aruan pureona vanta Tiyarafenu ano véin mamanan Bafaní uren doran banta e sen Tiyarafenu ano ma aní ukhá ein banta ino’.

³⁷Máa síkan banasi ano Pitani mai vaya inin amafon aí iyaimpin Pitan má ena vaya varen orin banta kéká bá inaemí, “Tifá tiváeyan noe, setí náisá onté tife rafuno.”

³⁸Máa síkan Pita evaránen betí ankan tiamemí, “Tiretí ankan mana mana ano ume finté ará baédeya Yisas Karaisin aviká monó non baresin ná Tiyarafenu ano siretíi ume ampiantano. Máan ma esin mi Tiyarafenu ano Kantá Aunan aminten mino. ³⁹cPefá Bafan tetisi Tiyarafenu ano siretí ankan má tiretí akhafana vá inká nentá ma vain nanin banta vá ma ínainpá araren Kantá Aunan amin nain mi iyáantákaren mino.”

⁴⁰Máa siren béi ena vaya kayo vá ákonaen tiamiyan tútúpemí, “Tiyarafenu inaesin ná tare ma vain namu nanin banta kayo fintena siretin aya ino.” ⁴¹dPitani vaya ano mai nanin banta amafon aí iyaimpin maí damú ana kanú manaú tauseni (3,000) nanin banta ano ará baéden monó non péden mai nanin banta ano Yisasintá ma mumunan iyain kayo vá o asotú en mamanan kokhonien mino.

Yisasintá Ma Mumunan Iyain Kéká Ano Ma Ará Manafiní Ein Baya Ino

⁴²eKokhoní uven mai kayo ano vaya varen orin banta kayo ma afova amiyan baya ákonaen iniyáken betin má manafin o átaru uven monó ten dunan nen amúken iyaren mino. ⁴³Máan tiyan Tiyarafenu ano vaya varen orin banta kayo finté ayan táké uaren kokhon enará ukhein ákona vá aní daná bá barákan banasi ano mai yanasinta oniyáken anú diyan akhokho van en oreraen mino. ⁴⁴fMáan tiyákan Yisasintá ma mumunan iyain kéká ano ará manafiní uren mana inintá báken minó daná ben amin ben amin iyaren mino. ⁴⁵Máan tiyáken betíi vara vá kama yanasinta vá sarí uren moní máden manáa yana san ma o afasí iyain kéká aya iyaren mino.

y2:30 2Sa 7:12; Íbo 89:3-4; 132:11 z2:31 Íbo 16:10

a2:33 Apo 5:32; 7:55-56 b2:36 Apo 5:30-31 c2:39 Ais 57:19

d2:41 Apo 2:47; 4:4 e2:42 Apo 20:7 f2:44 Apo 4:32-35

⁴⁶Máan tiyáken minó damú monó namun dafufin ena ena átaru iyáken maen inká mana mana namumpin o iyuve e iyuve en dunan niyáken betiyan maman bararasí uren amusimpin baren mino. ⁴⁷^gBáken ena ena yamú Tiyarafenu aví daní iyákan banasí ano vetin nan anunu iyan ena ena yamú Bafan mano ará ma vaerein nanin banta avídú íkan mai ma Yisasintá ma mumunan iyá ein nanin bantafin mo asotú en mino.

Mana Arantan Namu Ukhá Ein Banta Ma Pita Ayofein Baya Ino

3 Maná damú Pita nú Yonin nú monó namumpin amúkono siren kanú manaú áauíen inúpasí iyan oren mino. ²Oriyan o onákan monó átaru yafu ona van ma Avorú Ona e siyaintá mana arantan namu ukhein banta minó damú aviren mo khain báken monó dafufin ma ódein nanin banta vaípa moni san inantiyain baré íkan aviren meran baren mino. Mai vanta maen be anóen arápin mi arantan namu ukhan kaen mino. ³Morákan báken ma mai vanta ano Pita nú Yonin nú onan monó namumpin umperano van ódíkan maen békanan baípa mai vanta ano moní inanten mino. ⁴^hInan tíkan Pita nú Yonin nú ano mai vanta mo furefure oniyáken Pita semí, “Éi verasan tonano.” ⁵Máa síkan mai vanta ano náinasá timinten nafino sen mumunan iyáken purefure en békanan onen mino.

⁶ⁱOniyain má Pita máa sen tiamemí, “Téi ída moní dékun ban mifo se ma yákeruna yana amenté uno. Nasaretíke Tiyarafenu ano ma aní ukhein banta Yisasin aviká éi e mantave orono.” ⁷Máa siyáken ben ayan kurompáke yáman pákaaren orun ayan nóan mantiyain má ana mai vanta ayákon má aran-

tan má kamaen ákonaen mino. ⁸Ákona iyain má beyantá kútin e manten orian ódaren mairá békanan bákuren monó namumpin ódiyáken káosi káosi iyan Tiyarafenu aví daníen mino. ⁹Mai vanta ano káosi káosi iyan Tiyarafenu aví daní iyain minó nanin banta ano oniyáken, ¹⁰betí ovaren me afová en mai ma monó átaru yafu ona van Avorú Ona e siyaintá ma ena ena yamú báken ma moní inantiyain baré ein banta aurái ma yaná afoká ukhen mino siren takhaiyan kokhon ineine en mino.

Pita Ano Ma Vanasi Vaya Siamein Baya Ino

¹¹Banasi ano ma mai vaya iniyáken anúden orera iyan mairá tavaen e átaru uven mai vanta onákan Pita nú Yonin nú ayan pákáan ákona uren mai ma Soromonini Yuse se ma siyaintá mantakharen mino. ¹²Pita máan ma iyain oniyáken banasi siamemí, “Tiretí Isareri nanin banta oe, ma yaná ma yákó iyain nan pará anú diyayá békani kama avúavá bá ákona vá anon ma vanta ayain manten oriyan mino sireyá berasan urú toniya rafono. ¹³^jAbaramu má Aisakin má Yekopun má inká tetin tinafuyan mái Ayarafenu ano vei yoran banta Yisasin kákan bí amira mai vanta e avían namuro ayampin amen nan Pairoti ano véin ampiantiya ompo siretí Pairotin avorá ben oyan amire ída vá mai vanta ampiesin ná orino se ono. ¹⁴Máa sireya Kantasién Puntákein Banta oyan amire, vanta aruan purin banta van aésin teti vaípa erino siya inae ono. ¹⁵An uanten aun bain aintá ma siviren orin bantan tiretí aruan púden nan maen Tiyarafenu ano masí pintena evaránen avían mantará berasan ontaréi mai van tian dákó iyá uno. ¹⁶Berasan Yisasintá mumunan

^g2:47 Apo 6:7; 11:21 ^h3:4 Apo 14:9 ⁱ3:6 Apo 4:10; 16:18

^j3:13 Eks 3:6, 15; Ruk 23:13-25; Apo 2:23

iyáké ben avíkái ma vanta ayanóan mantékun ákona mamarai óde afová iya ono. Yisasin avíká ma mumunan in manon pura sen ma vanta ayofakhayan oniya rono.

¹⁷k“Tifá tiváeyan noe, séi afová ukhékuya siretin má tiretíi yafisin banta kayo vá ano ída afová ukheyan mai ná avúavá Yisasin amaniná kae rono. ¹⁸Máan te ompo fefá Tiyarafenu ano sakanampa vanta kayo finté uaren mai vanta van mi Tiyarafenu ano ma aní ukhein banta ano uman barante ne sikhá iyan ben amaniná máante rono. ¹⁹¹Máan tukhen mifo siredí ankan ará baéde sirun noe sireya Tiyarafenu vaípa oresin ná tiretíi ume arúantano.

²⁰Máan turantin Bafan pinté kusen ban erintin ná mai ma vanasi evaránen aviranten ne sen pefá aní ukhá ein banta Yisasin tiantantin ná enádá ovaránen erino. ²¹Erinten mifo véi inarufá pa ave ukhantín ná Tiyarafenu ano ma vei kantasí ukhein sakanampa vanta kayo finté uaren ma iyáan táká ein maman evaránen auyení urantín ná minó danasinta yákó ino. ²²Pefá Mosesi siyáken, ‘Bafan Ayarafenu ano siredíi kéká pinte mana vanta avían kaintin ten an den sakanampa vantái inten mifo siredíi beni minó baya inire vá dakhafono. ²³Máan tukhantín mai sakanampa vantái veya ma ída inin nain nanin banta ano ída uron mi Tiyarafenui vanasifin banten mino.’ *Diu 18:15, 18-19*

²⁴“Sakanampa vanta Samuerin táké ma arái uren erikhein sakanampa vanta kayo minó ano mana yana san mi sikháin maí damú inka yákóen mino. ²⁵Sakanampa vanta kayo ma siyá ein baya kayo vá Tiyarafenu ano ma siretin anafuyan má ma manafin kasen ban baya ma sikhá ein mai vetin

anavasin mi sireti varé en nan mi siretin amaninái yákóen mino. Béi Abaraamun tiamiyáken, ‘En anavasin pinté uaren mi minó barará nanin banta ano avu varanten ne sikhán mino.’ *Esé 22:18; 26:4*

²⁶mMáa sikharen mai van mi Tiyarafenu ano vei yoran banta avían mantaren tiretíi mana manai namu avúavá pinte avu uranti ará baerano van tiantan tireti vaonafá nare eren mino.”

Yutan Kayoi Ánon Banta Kayo Ano Ma Pita Nú Yonin Nú Aviren Me Vetí Ankan Auvé Mantein Baya Ino

4 Pitan nú Yonin nú ma vanasi veya siamiyákan mairá monó doran banta kayo vá Sadyusi kéká bá monó namuntá ma yafisiyain kayoi ánon banta vá ano mairá e unen oren mino. ²Onóben iníkan Yisasin nan e mantakhein púkein kéká ano yere orun mantanten mino sen míkanan mano sian afova amiyare íkan betí ankan o inen mai van kákantá aranan en mino. ³Aranan uren békanan pákádaran duniyaimpin ena ákurá do kakhantí kó tiantádé puntarano van míkan aviren mo karavusi namumpin kaen mino. ⁴nMíkan ma siyain baya iniren ma Yisasintá mumunan ein banta mai yan manápá tauseni ino (5,000).

Pitan Nú Yonin Nú Ma Kó Tiantein Baya Ino

⁵Máan tukháin ená damú Yutan kayoi yafisin kéká bá monó doran banta kayo vá inká man baya ma afová amin kayo vá ano Yerusaremí e átaru en mino. ⁶Átaru iyákan monó ánon banta kékái ánon banta Aanasi má Kaiafasi má Yoni má Areksanda má inká ena monó ánon banta kayoi kéká bá dere maifin e varen mino. ⁷Mai kéká ano Pita nú Yonin nú aviren me vetí ankan avorá kaúden

míkanan inaemí, “Intéa ákoná bákayá iyan avíkasá mai yaná bariya rafono.”

⁸Máa sen ina iyákan maen Kantá Aunan mano Pitan aúpin bíkavin betí ankan tiamemí, “Tiretí Isareríi yafisin má monó doran banta kayo va soe, ⁹ma ma aranta namu ukhein banta ma aya ukheruna fáke inté uákesá berasan béin ayofe rafu mai séi ma iniyarun siretí ankan tetin inaúdé afová ono van mi iya ono. ¹⁰oMáan tiya ompo vá minó Isareri nanin banta ano ma vaya vá afová ono. Mai ma Nasaretíke vanta Yisas Karaisin ma yaa unkamádantá aren nan púbin ma Tiyarafenu ano evaránen avían mantein banta avíkái ayofaádékun mai vantant tiretin avorá mantakhen mino. Béi maen

¹¹“Má uvaran banta kayo ano ma yo maman karúdein onámaná ano maman má dádaimpin mana ákona onámanasí ukhen mino.” *Íbo 118:22*

Mai ákona onámaná maen Yisas Karaisi ino.

¹²pMáan tukhantín ma varará banta ída ena vanta Tiyarafenu ano amikhá intin banasi evaráne aviranten e sikháintin tetin ída siyainten mifo Yisasi anan tetin barará nanin banta kama uren evaránen tiviranten mino.

¹³Mai vaya siyákan dafisin kéká ano Pita nú Yonin nú ódaren míkanan Yisasi má pefá bakan ontaren mino. Békanaan ída mana sikhuru siren afova mantá eintá ída feran ákonaen baya siyákan mai van betí ankan kokhon ineine en oreraen mino. ¹⁴Kokhon ineine iyáken betí ankan onákan mai ma arantan namu ukháin ayofein banta ano vékanan má mantakhan mai van betí ankan ída mana vaya evaránen békanaan tiamen mino. ¹⁵Máan turen mairá mai Kanisori ano[‡] vékanan tiantan mai átaru

namunté ekhuven barufá aravuvíkan betiyan baya sen oreraen mino. ¹⁶Ten orera iyáken temí, “Ma vantá kanan mano moéken enará ukhein ákona ma aní ein mai Yerusaremí ma varé ein nanin banta ano inka afová en orera ein ída umera tifanté umpo míkan amaniná náisá otifante rafuno. ¹⁷Máan tiyaren mai vaya ano minó nanin bantafin orera inafó erítifé békampin ákona é baya siamé tifékun ná ída evárénen mai víká banasi sian amino.”

¹⁸qBetiyán baya siren mairá békán aran mai namumpin ódíkan Yisasin aví tiriya ma vanasi afova amiyain béin aví ma sin má dere míkanan airo ananí uantent mino. ¹⁹rMáa síkan Pita nú Yonin nú ano vetí ankan evaránen tiamemí, “Tiyarafenu avorá tireti inte é té iniya rafono. Berasan mai Tiyarafenui vayá dakhafonu áa sireni vayá dakhafó tifante rafu maifin daidé vá afová ono. ²⁰Mai van mi verasan ída kanaíé vaya mará me fákanté umpo verasan ma oniyá ma inikhá eruna yaná minói sian dákó onté uno.”

²¹Máa síkan banasi ano ma mai yaná ódaren Tiyarafenu aví daní iyain nan mai yafisin kayo ano vetí ankan nan péden míkanan amaniná ída kanaí en mana aau kairín pasen ída uman amin nan evaránen ákona vaya ana siamíden tiantan oren mino. ²²Para vara seyo, mai ma míkan mano enará ukhein ákonafó ayofan ma arantan kamaein bantai orana mai foti (40) orana esantakhein banta ino.

Mumunan Iyain Kéká Ano Ma Amúkiyain Baya Ino

²³Pita nú Yonin nú tiantádan maen mai yafisin banta kayo me ampiren békani kéká baípa oren o váken mai

[‡]4:15 Mai Kanisori kéká maen Sanedrini e ma siyain kéká ino.

ma monó ánon banta kayoi ánon banta vá monó doran banta kayo vá ano ma sein baya siamen mino. ²⁴sTiamin iniren mairá betí ankan ará manafíní uren Tiyarafenu amúkuan amen temí, “Bafan noe, éi vara vá non má inaru vá maifin ma minó daná baini uvaran benafo ono.” ²⁵Pefá eni Kantá Aunan mano sétin tináu Devitin mana veya amíkan Deviti máan mi sikhhan mino.

“Intéa ana vará minó ena anan nanin banta ano móekentá aranan iyáken ná

para é tiren ná mai Isareri nanin banta ano fasavifá namu avúavasí ono van baya sian damuan kaiyan nafino.

²⁶Minó bara vain bain ma vain kin kayo ano aruvín danasinta utaaren mantakhan

inká dafisin kéká bá ano manafin átaru uven

Bafan Tiyarafenu maman bararasí uré barará nanin banta ma evaránen aviran nan ma sikhá ein banta maman bara finí ono van iyan mino. *Íbo 2:1-2*

²⁷tPura siren Erotin nú Pontias Pairoitin nú ano ena anan kéká bá Isareri nanin banta kayo vá o éken ma varufin e átaru uven ei kantasí ukhein doran banta Yisasi ma fefa éi aní ure nan baré ein maman bararasí ono van iyan mino. ²⁸uBetí ankan ma varein daná mai ei ákonará pefá tíaden nan baré íkan mi eni anunu vá ineine vá ánain mi yakhafen mai yaná afoká en mino. ²⁹vBafan Tiyarafenu oe, setí eni yoran banta kayo ma sikhokho simin baya kayo ma siyain ná inireya siya esirá ákona ukhé ída feran eni veya ákonaé banasifin tian dáko ono. ³⁰E ayan daruádesin orinti vá banasi aí kípaan tiyáke aní danasinta aní iya vá ara ara yaná ei kantasí ukhein doran banta Yisasin avíkasá uvarano.”

³¹Máan amúkiri uan kíparan maen mai ma vetí ankan baré ein namun antu antu iyáken Kantá Aunan mano vetí ankampin bíka víkan Tiyarafenui veya ákonaen tian dáko iyáken ída feran akhokho van en mino.

Yisasintá Ma Mumunan Iyain Kéká Ano Ma Vetin Nina Yanasinta Avarí Iyái Pákena Vaya Ino

³²wYisasintá ma mumunan ein kéká ano mana ineine vá mana ará bá báken mai kéká pinté ída mana ano ma yaká ein dana san tiyáken ma seya sina ino sen mifo minó dana ma mana mana ano ma yan baré ein danasinta mai minó avarién oreraen mino. ³³Máan tiyan kákan ákonafó Aposeri kéká ano Yisasi ma fúaren orun mantakhein baya vanasi siamen orera iyákan Tiyarafenu ano mai nanin banta van anunu iyáken betí ankan móekentá avábá uanten mino. ³⁴xMáan tíkan betí ankan aúbaná ída mana nanin banta ano ona varafi yunan narafi o afasí ukharen mino. Máan tukhen kokhon bara fi ma safi ma yaká ein minó sarí uriyan moní máden mai moní baren ³⁵me aposeri kayo amíkan mai moní daíden i ma vain kéká amiyaren mino.

³⁶Máan tiyákan Saiprasíke mana Rivai ánon banta Yosepin ne ma siyain banta aposeri kayo ano ena ví Banabasi ne siran baren mino. Banabasin bí maen mai veni ana Ará Ákona Uantan Anin ne ma siyain baya vá manaí ukhen mino. ³⁷Mai vanta ano vei vara sarí uren mai ráke moní baren Aposeri kayo mo amen mino.

Ananiasin Nú Safairan Núi Vaya Ino

5 Mana Ananiasin ne sin banta vá be aná Safairan ne sin má baren békani

^s4:24 Eks 20:11; Nee 9:6; Íbo 146:6 ^t4:27 Mat 27:1-2; Ruk 23:7-11; Apo 3:13

^u4:28 Apo 2:23 ^v4:29 Efe 6:19 ^w4:32 Apo 2:44 ^x4:34 Apo 2:45

manáa vara sarí uran mana vanta ano miyaníen mino. ^{2y}Miyaní uran mai vara ráké moní be aná ano afovai ukhan daíden manáa veyan aúpa kaúden manáa ana varen aposeri kayo mo makáden tiamen mai máa moní i varé uno siren amen mino. ^{3z}Amíkan Pita máa semí, “Ananiasí oe, fara é tire e aú ona yire nan Ban Anon mano en aúpin bíkaya Kantá Aunan mákádeya mai vara ráké ma vareóna moní manáa aúpa kae fono. ⁴Ídá afová ukhen nan ná mai vara ma ída sarí ukhen nan en nina varéin ná mai vara miyaní urá moní bare fono. Mai moní eninaí uvi ompo e anunu ánain bákureya ída amenté uno sinona van Ti-yarafenu amenté uno ma sireya náiná anó éin mai inin amiyá mai avúavá bare fono. Tetin na máka sisinte va ompo Ti-yarafenui máka siante ono.”

⁵Máa síkan Ananiasí mai vaya iniyáken eraven barará ankamiyan esé ana fúbíkan banasi ano Ananiasin amaniná ma yáko ein baya iniren moéken akhokho van en mino. ⁶Máan tuvíkan pumara vanta kayo ano mai vanta e maman davaráefin úkuren baren mo masíen mino.

⁷Masí uran kanú manaú áau orivíkan Ananiasin amaniná ma yáko ein daná be aná ano ída afováin mápin un peren mino. ⁸Unóbíkan Pita véin inaemí, “Éi sisimeno mai máa monisá tirei vara ráke vare fono,” síkan mai nanin mano siyáken, “Eyo, mai máa moní i varé uno.”

⁹Máa síkan Pita véin tiamemí, “Pará tiré kanan baya sian damureya Bafani Kantá Aunan máka sentá fono. Onano, en avafun ma masí ein kayo onará édiyain mai kéká ano éin má daiyóen orinten mino.”

¹⁰Máa siyain má anan Pitan aran-tampin mai nanin eraven ankamen

púbíkan mairá pumara vanta dun onan mai nanin púkeimpin mairá béin daiyó en oren be avafun ma masí ukharé ein áde mo masíen mino. ¹¹Masí urákan monópin ma vain nanin banta vá ena nanin banta kayo vá ano mai vaya ma iniyáken moéken akhokho van en mino.

Aposeri Kéká Ano Kokhon Nanin Banta Ma Ayofein Baya Ino

^{12a}Aposeri kéká ano kokhon enará ukhein ákona vá aní danasinta vá banasi aúban uvaryákan maen Bafantá ma mumunan iyain nanin banta ano ará man-afiní uren o éken Soromonini Yuséká átaruen mino. ¹³Átaru iyan mai kéká ano féden ída vetin má e átaru iyaren mifo mai kékápin ma ída vain nanin banta anon betin aví daní iyaren mino. ¹⁴Máan tiyákan kokhon nanin banta ano Bafantá mumunan iyan beni kékápin me asotú asotú en maman kokhoníen mino. ¹⁵Máan ma iyain anarái Pitan aman ma oriyain aa akhempá banasi ano aí nanin banta aviren mo yóki uvíden kaiyan inká manáa kúkútafin kaiyaren mino. ¹⁶Máan tiyákan Yerusalemí baru áde ma vain barufin páké ano yere aposeri kayo e oniyáken aí nanin banta vá inká namu aunan ma fákakhein kéká bá aviren eríkan mai nanin banta ayofen mino.

Namuro Kayo Ano Ma Aposeri Kéká Namu Uantein Baya Ino

¹⁷Monó ánon banta kékái ánon banta vá bei kéká ma Sadyusifin bain kayo vá ano ma mai avúavá oniyáken aposeri kayo ará namu uanten mino. ¹⁸Namu uantáden betí ankan e manten aposeri kayo fákaren aviren banasi ma kar-avusíí iyain namun mo karavusííen mino. ^{19b}Máan turan mai inuran mana Bafani enisori ano minó ona yiren betí

ankan aviren barufá morúden máa semí,
²⁰ “Tiretí ankan monó dafufin o mantave
 auyen aunani veya minó tiamesin ná ba-
 nasi ano inino.”

²¹ Máa síkan aposeri kayo ano mai
 veya iniren pe ákurá e manten oren
 monó namun dafufin o váken arafen mai
 veya sian afova amiyaren mino.

Máan tiyákan mairá monó ánon banta
 kékái ánon banta vá bei kéká bá Isarerii
 yafisin kayoi ánon banta kéká bá aran e
 átaru uven mai aposeri kayo aviren betí
 baintá erino van karavusi namumpin
 baya yan oren mino. ²² Piripo kayo ma
 siantan oriyan o onákan mai karavusi
 namun ída aposeri kayo vaimpin evará-
 nen oren mo mai ánon banta kayo
 siamemí, ²³ Teti oriyá o onékun karavusi
 namunte ona fara ákonaen munkukhan
 onará ma yafisin banta kayo fara man-
 takhá ma ona ma yiré maifin ma onékun
 ída mana vanta maifin baren mino.”

²⁴ Máa síkan kákan monó namuntá ma
 yafisin kayoi ánon banta vá monó ánon
 banta kayo vá ano ma mai veya iniren
 kokhon ineine en amino iyáken máa
 semí, “Náina sá afoká inten nafino.”

²⁵ Máa sen iniyákan mana vanta ano
 enóben betí ankan tiamemí, “Orive
 onano, mai ma karavusifin kaeona kéká
 masina kákan monó namun dafufin o
 váken banasi iyanuan kaúden mai veya
 siamin iniyán mino.” ²⁶ Máa síkan kákan
 monó namuntá ma yafisin kayoi ánon
 banta vá piripo kayo vá ano oren
 aposeri kayo o aviren eren mifo vanasi
 ano onámaná ankamin nain nan pé-
 den betí ankan amaniná ída mana yaná
 avúavasien mino.

Aposeri Kayo Ano Ma Tiyarafenui Vaya Anan Dakhafó Tifanté Uno Sein Baya Ino

²⁷ Dafisin banta kayoi ánon banta kéká
 ano aposeri kayo ina ino van piripo kayo
 ano vetin aviren me kaúdákan monó
 ánon banta kékái ánon banta ano máa
 sen inaemí, ²⁸ c “Teti ma siretí ankan
 tiamé ída uron ná mai vanta aviká monó
 baya vanasi siameno siré airo ananí uan-
 teruna ifo fará tiretí mai veya vanasi
 siamiyan nan Yerusaremí ma vain nanin
 banta ano mai veya inen orera iyákayá
 inká tetin nan mai vanta aruan pure ono
 sireyá tetin tu finté iya fono.”

²⁹ d Máa síkan Pita má ena veya varen
 orin banta kayo vá ano evaránen betí
 ankan tiamemí, “Tetí Tiyarafenui veya
 anan dakhafo sifanté umpo varará nanin
 bantai veya ída yakhafó tifanté uno.

³⁰ Tiretí ankan manon Yisasin daa un-
 kamádantá aruan púden nan mi setisi
 sináuyani Ayarafenu ano véin purin pin-
 tena evaránen avían mantakhen mino.

³¹ e Béi anon tetinti aa aní uren evaránen
 tiviran banta vákan Tiyarafenu ano véin
 aviren inarufá mun bei ayan kurompá
 kain dan bain kin aniní ukhein tetí Is-
 areri nanin banta siyaintí maé tirá baeré
 tifékun tetinti ume ampisintanten mino.

³² Tetí ankan mai yanasinta ódákéi mai
 veya sian dákó iyá tifékun inká Ti-
 yarafenu oo ma yaiyein kékái Kantá Au-
 nan amikhan mai aunan mano yere sian
 dákó iyan mino.

Kanisori Vanta Kamarieri Ano Ma Aposeri Kayo Van Bempáké Bano Sein Baya Ino

³³ Máa síkan Kanisori kayo ano mai
 veya iniren kákantá aran nan iyáken
 betin aruan purono van en mino.

³⁴ Aruan purono van iyákan mai yafisin

banta kayoi ánon banta kéká pinté mana Farasisi vanta véin aví Kamarierin ne sin man baya afová ukhan ma vanasi ano véin kákan bí amiyain mano orun mantaven tiamemí, “Ma kéká tiantan manáa afará barufá orun bano.”³⁵ Maa sin betin aviren barufá aravuvíkan mairá Kamarieri orun mantaven Kanisori kayo siamemí, “Isareri vanta kayo oe, mana yaná ma ma vanta kayo amaniná kaono sinte mae ovare me inireya vá mainá betí ankan amaniná kaono.”³⁶ fAfovái ukharono. Ída ayá damú oriyan mino. Teudasi ano e mantaaren temí, “Téi vafan bákun ten tiví bain banta uno,” síkan ádé anantá kami kami antareti (400) nanin banta ano véin dakafiyaréin maen kamani ano véin aruan púdan bentá ma mumunan iyá ein kayo me ifá en orera íkan beni yoran mo savifa afe ein mino.³⁷ Ben oyampáké kamani ano ma vanasi aví baran damú Kariri fáke Yudasín ne sin banta ano e manten banasii ineine maman asuse en kamanin aré tavono van íkan béin má aruan púdan ben ma vákuren noré ein kéká ano me onen karan orera ein mino.³⁸ Máan tukhein nan mi siretí ankan tiamiyá uno. Ma varará bantai ineinerá ma yoriyaren mai yoran mo asuse inten mifo ída vá mana yaná betin amaniná kaiya ampiantesin ná orino.³⁹ Tiyarafenu ano ma mai ineine yákó ukhá inti mae máan tiya véin má namuroí inampo ída vá mai yoran are ono.”

⁴⁰ gMaa síkan Kanisori kayo ano Kamarierini vaya iniren baya varen orin banta kayo aran eríkan dafiyó ankáden Yisasini vaya siamen non nan airó ananí untáden ampiantan oren mino.

⁴¹ hBetí ma Yisasín avíká uman baren ayave o yosín ma Tiyarafenu ano vetin nan kama nanin banta ino ma sein nan

mi vaya varen orin banta kéká ano yafisin banta kayoi ánon banta kéká me ampíren oriyáken amusín en mino.⁴² Amusín uren Yisasi ma vanasi evará-nen avíkein mai kama vaya ída me ampínton ena ena yamú kákan monó dafu kayofin má mana mana namumpin má orera uven tiamiyaren mino.

Dan Manápá Ifo Afápá Kan Un Kádan Monó Doran Ayain Banta Ma Aní Ein Baya Ino

6 ⁱMaí damú eyo iyampon kayo ma mo kokhoní iyan maen mai aúbanáké Kiriki vaya ma siyain Yutan kayo ano Aramaiki vaya ma siyain Yutan kéká anan uanten máa semí, “Minó damú tiretí varé nanin kayo anan ayaiya ompo setisi varé nanin kayo ída ayaiya ono.”² Maa siyaimpin tiyan míkan mifo sirantan kan orun kádan (12) eyo iyampon kayo ano ena eyo iyampon kayo minó iyanuan kaúden máa semí, “Dunan amin naro sire ma Tiyarafenui vaya mo siamin doran ma me ampín ída kama ukhen mino.³ Máan tukhein mifo sífá tiváeyan noe, siretin aúbaná intéa anó banasi avorá kama ví bákan ná Kantá Aunan mano aúpin bíkakkaná kama afova van nafi mai finte vá dan manápá ifo afápá kan un kádan banta aviádesin ná mai yorantá betí ankan dafisino.⁴ Dafisiyantí maé teti minó damú tímúkiyáké Tiyarafenui vaya siamiyá banasi aya ó tifanté uno.”

⁵ Banasi ano mai ma aposeri kayo ano ma sein baya van amusín uren mairá ákona mumunan iyan ma Kantá Aunan mano víkakhein banta Stivenin manan kaiyan Firipi má Prokorusin má Níkanorin má Timonin má Pamenasin má Antiokí banta Nikorasín má avían kaen mino. Nikorasi ída Yutan kéká

^f5:36 Apo 21:38 ^g5:40 Apo 4:18 ^h5:41 Mat 5:10-12; 1Pi 4:13

ⁱ6:1 Apo 4:35

pintena vanta ifo béi ena anan bantan báken Yutan kayoi monó dakhafiyán mino. ⁶Máan turen mai vanta kéká avían aposeri kayo vaintá me kaúdan mai yorari ino van ayan ánonotá kaúden avu uanten mino.

⁷Máan turan Tiyarafenui vaya ano minó barufá orera íkan Yerusalemíké kokhon nanin banta kayo ano aú baéden Yisasini eyo iyampon kayoí iyákan inká kokhon monó ánon banta kayo vá dere ano Tiyarafenui vaya iniren mumunan en mino.

Isarerii Ánon Banta Kayo Ano Ma Stiveni O Fákein Baya Ino

⁸Tiyarafenui sarisari vá ákona vá ano Stivenimpin bíkavin banasi aúbaná enará ukhein aní danasinta uvariyaen mino. ⁹Máan tiyákan Yutan kayoi Monó Ano Ma E Anunurasá Bano ma sikhein monópin ma Sairiní baru vá Areksandriá baru vá inká Sirisia bara vá Esiá bara vápinté ma e varéein Yutan kéká ano mai vayará araíen Stivenin má asiven mino. ¹⁰^kMáa siyan maen Kantá Aunan mano Stivenin kama afova amiyan ma siyain baya mai kéká ano ída kanafen ankaman durafurin nainíen mino.

¹¹Máan tiyaimpin mai setí inékun Mosesin má Tiyarafenu vái ankayan tiyan mino sino van mai kéká ano aúpáké ena vanta kayo mo arápiníen mino.

¹²Mai avúavasí o senten banasi vá monó ánon banta kayo vá man baya ma afova amin kayo vá arápiní uren Stivenin o fáken Kanisori kéká baintá mo khaen mino. ¹³Mo khaúden béin aúfin manáa kampun baya sino van manáa vanta kayo síkan mai kéká ano máa semí, “Minó damú inétifékun ma vanta ano Tiyarafenui kantisí ukhein baru vá

beni man baya vá ankayan tiyaren mino. ¹⁴Máan tiyáken inká Nasaretíke vanta Yisasi ano kasaen monó namun ankaman mádaren inká Mosesi ma setin timikhá ein avúavá do maman karúdan-ten mino siyáká iniyaré tiféuno.”

¹⁵Máa siyan mai ma Kanisori namun ma varé ein kayo ano Stivenin purefure en oníyan maen ben auná ano enisori auná ma fanu seiníen mino.

Stiveni Ma Kanisori Kayo Manáa Vaya Siamein Baya Ino

7 Máan turan mairá monó ánon banta kékái ánon banta ano Stivenin in-ae mí, “Ma ma éin nan tiyain baya kayo mai furá tiyan nafino.”

²^lMáa síkan Stiveni evaránen temí, “Tifá tiváeyan má tifóeyan ma soe, siretí ankan ná ineno. Teti sinafu Abaraamu ma Mesopotemiá barafá ban ma Araní barufá ída orikhan maen inarufá ma minó ákona vain Tiyarafenu ano Abaraamu vaintá dákó en mino. ³Dakó uven Tiyarafenu ano véin tiamemí, ‘E antun má ei vara vá ampireya séi ma aní onuna varafasá orono.’ *Esé 12:1*

⁴^m“Máa síkan Abaraamu Saridia vara me ampiren Arani varufá o varéin be afóe ma fúbíkan Tiyarafenu ano véin tiantan ma ma saréa vaóna vara e varen mino. ⁵ⁿMaí damú Abaraamun ída manáa vara amikhan inká ída iyampon kaúkan maen Tiyarafenu ano siyáken, ‘Ma vara ínaimpáké e má en ana akhá bá amenté uno,’ sen iyáantákan mino. ⁶^oTiyarafenu ano Abaraamun máa sen tiamemí, ‘En ana akhá ano ma ena varafá o soya ma vainí ukhantín kami kamí antareti (400) oranarái vetin uman amiyantín miyan ída van dorarí inten mino. ⁷^pMáan tinten mifo mai ma ída miyan ban dorarí uantiyaré inona kéká

téi uman amirékun maen ínainpáké betí mai vara me ampiren ma varará e váken téintá monó tinten mino.⁷ *Esé 15:13-14*

⁸qMáa siren mairá Tiyarafenu ano Abaraamun má ma kasen báken au ma kaí pákena siamidán mairá Abaraamu ano Aisakin afóení uven béin kaúdan ma yan manápá ifo afápá kanú manaú damusí ma iyan maen béin au kharan ínainpáké Aisaki ano Yekopun kaúdan inka Yekopu ano siyan míkan mifo sirantan kan orun kákan (12) banta setin tináuyan kaen mino.

⁹rKaúdan mai sináuyan mano Yosepin ará namu uantáden avían ena kékápin mo sarí uran béin miyaní uren aviren Isipi morun kain baren mifo Tiyarafenu véin má báken ¹⁰sbeni uman kayo aya iyaren mino. Aya iyan Yosepi ma Isipíké Kin Fero má ma vaya siyákan Tiyarafenu véin kama afova amiyan kin mano véin nan moéken anunu uren mai van mi kin mano véin maman kamaniní urákan Isipí dafiaren ben amáká dafisen mino.

¹¹tDafikaréin ínainpáké Isipi vá Kenani vái varafin kákan anan eríkan kákan uman baren tetin tináuyan mano arafan nan ída kanafen dunan doseren en mino. ¹²Mai umampin ban maen Yekopu iníkan Isipí dunan ban ne siyain baya iniren tetin tináuyan tiantan ída aravin táké araíen araven mino. ¹³uAravukharen ma evaránen kan dádasí en Isipi aravíkan mairái Yosepi veyan maman páman en be afá aváeyan tiamemí, 'Téi Yosepi uno,' ma siyain baya ínainpá kin mano afová en be antun mi varéin mino sen mino. ¹⁴vMai oyampáké Yosepi ma siantan be afóe

Yekopun má bei kéká minó ma o aviren erein mai seventi-faipi (75) nanin banta ino. ¹⁵wYekopu ma Isipi orun baren ínainpáké béi fúbin inká setin tináuyan má dere furen mino. ¹⁶xPúbíkan ínainpáké mai kéká daiyó en evaránen Sekemú barufá ma fefá Abaraamu ano manáa monípó Amorin akhafana finte miyaní ukhá ein barafin ma varé ein masípin mo masíen mino.

¹⁷yKokhon orana orivin maen Tiyarafenu ano ma fefá Abaraamun tiamen éin avu onté uno ma sikhá ein damú ádesí iyákan Isareri nanin banta ma Isipí baré ein mano mo ampan kaureren kokhoníen mino. ¹⁸Máan tiyákan Yosepin ída afová ukhein banta ano Isipii kiníen mino. ¹⁹zMai kin mano setisi kéká bá tináuyan má máká maáká en namu uantáden aase ma kaúdan iyampon arará kayo vá arin purino siren betin duvunin baren mo karúden mino.

²⁰aMaí damú ana Mosesin ma ve anóe ano kaúden onan Tiyarafenui avorá avorú iyampon baimpin be anóe afóe ano kanú manaú biyontá mápin aúpa dafisiyaren mino. ²¹bDafisiyaren béin ma avían barufá kaúdan maen kin araun mano véin aviren mo ve akhasí uran baren mino. ²²Báken maen Mosesi ano Isipi kayoi kama afova variyáken e anoníen baya vantaí iyan ákona yoraríen mino.

²³cMáan ten oriyán ma Mosesi e anoníen foti (40) oranaí ma iyáken mairá be afá aváeyan Isareri kéká o onano van en mino. ²⁴cIneine uren oriyán o onákan mana Isipi vanta ano Isareri vanta aruren namu uantiyá íkan mai anonafá mai vanta mo ayaen Isipi

7:8 Esé 17:9-14; 21:4 7:9 Esé 37:11, 28; 39:2, 21-23 7:10 Esé 41:37-44

7:11 Esé 41:54; 42:1-2 7:13 Esé 45:1-4, 16 7:14 Esé 45:9-11; 46:27

w7:15 Esé 46:1-7; 49:33 x7:16 Esé 23:2-20; 33:19; Yos 24:32

y7:17 Eks 1:7-8 z7:19 Eks 1:11-22 a7:20 Eks 2:2 b7:21 Eks 2:3-10

c7:24 Eks 2:11-15

vanta aruádan puren mino. ²⁵ Mosesi ma inikhá ein Tiyarafenu anon tiantan tetin me siya iyan mino sen bei kéká ano ovaren me ininten mino sen mifo vetí ída afová ukharen mino. ²⁶ Máan turákaren ena ákurá Mosesi oriyan o onákan Isareri vanta kan mano aruviyaréin béi mo yódá iyáken temí, ‘Tire anavasan mompo fará tirékan aruvianta fono.’

²⁷ “Máa síkan mifo mai aruvin ma aráí uren ena vanta vá aruviyá ein banta ano Mosesin do ékiyáken máa semí, ‘Iye ano éin nan ánon bantaí ukheya setin daimono sikhaya fono. ²⁸ Éi ma inuran ma mana Isipi vanta ma aruan pure-onáí eyá téin tiruan purono vara fono.’ ²⁹ ^d“Máa síkan mairá Mosesi mai veya iniren me onen karan Midianí barafá o soya vanta an dakhen baren maifá anasi mamáken kankanan afon iyampon kaen mino. ³⁰ ^e“Kaúden baréin foti (40) orana esantari íkan banta i van kámá barafá Saináí anuyon ádé o varé íkan mana enisori ano ira khiyain daa finté uaren Mosesi vaintá dákó en mino. ³¹ Mai ira ma khiyan Mosesi ódaren kokhon ineine iyáken mai ma yákó iyain daná onano van ádé oriven iníkan Bafan amen avaya ano máa semí, ³² ‘Téi en afóeyan ma vain Abaraamu Aisaki Yekopuni Ayarafenu uno,’ ma síkan Mosesin akhokhofen avinantan diyaimpin ída mo onen mino. ³³ Máan tiyaimpin Bafan mano véin tiamemí, ‘Mai ma éi mantakhaona vara mai kantasí ukhein bara yontá ifo ei arantan anamun ná do ayufono. ³⁴ Intéa uman ná tenti vanasi ma Isipí bain amaniná kaiyan nafi inka séi ódaré vetíí ífí inéi mai umanpinte utúantano siréi eré umpo varéa erikhesirá éin tiantéku evaránen Isipisá orono.’

³⁵ ^f“Mai ma vetí ankan Mosesi nan tiyáken, ‘Iye anó éi nan tetintasá

dafisiyáke vá daimono sirákaya fono’ siren ma veni veya ída inen do ékein mai Tiyarafenu anon daa ana ma ira khiyain pinté béin nan ore vá betíí yafisiní ukhe mai uman pinte utúde vá avirano siren tiantein mino. ³⁶ ^g“Mosesi ano Isipíke yo iyanen oriyáken maen Isipi varafin má Nare Non má inká foti (40) oranará banta i van kámá barafá báí enará ukhein ákona vá aní danasinta vá uvaren dararen ukharen mino.

³⁷ “Mai Mosesi anon Isarerin nanin banta máa sen tiamikharen mino. ‘Tiyarafenu ano sen ma erunaí ukhein mana sakhanampa vanta eni vanasi aúbanáke siantékun orinten mino,’ sen tiamikharen mino. *Diú 18:15*

³⁸ ^h“Béi anon banta ída van kámá barafá banasi iyukhein aúbaná tetin tifóeyan má báken Saináí anuyompin óden enisori vá un bákan Tiyarafenui aun bain baya siamikharéin taréa setimpin e van mino.

³⁹ “Tiamíkan mifo setin tináuyan mano veni veya átakharé en oyan amiren betin ma iniyá ein pura sen evaránen Isipí orono van mi inikharen mino. ⁴⁰ ⁱ“Mai kéká ano Eronin tiamemí, ‘Mai ma Isipíke setin tiviren erein Mosesin amaniná náí yanasá dákó ukhen nafi seti ída afová ukhétifé umpo éi ena ayarafenu kayo uvádesin ná tetin tufá oriyan aa aníen tiviren orintisá orono.’ ⁴¹ ^j“Máa siren maí damú anan arará burumakaó aman manon uváden betiyantá ma ayampóké uvarein danáká íkun uan amiyan amusin en maináká monosí uanten mino. ⁴² Máan tiyaimpin Tiyarafenu ano vetí ankan me oyan amiran maen ayontá ma vain danasintará betí aráíen monó tianten mino. Máan ma ein manon sakhanampa

vanta kéká ano ma vompon uvamádan baré einíen mino.

“Isareri nanin banta kayo oe, foti (40) oranará ma vanta ída van kámá barafá ma váke

íkun uan amiya eona yanasinta mai séin ná bare me susu sisintiyare rafono.

⁴³Mai ma yavaráe fóké ma uvaran namun ma kampun ayarafenu Moreki nina ma vare nóke ma

inká tiretí ayampó ma uvaran kampun ayarafenu Refanini ofun amantá ma monosí uantiyaóna

mai van mi séi siretin tiantéku mae Babironí esante enai varafá o soya ma vainí ukhe van nono.’ *Amo 5:25-27*

⁴⁴“Tiyarafenu ano ma Mosesin tiamíden béin aníin onein mai avúaváká ten mi yavaráe fóké Tiyarafenui má uváden maifin Tiyarafenu ano vetin má manafin ban baya kaúdan mi setin tináuyan mano vanta ída van kámá barafá baren noren mino. ⁴⁵^kMai ma yavaráe fóké uvaran namun ma setin tifóeyan amin mamaren maen mai vá baren Yosua má enai vara varano siren oríkan Tiyarafenu ano vetin avorá mai kéká aren tain orivin mai namun mo khain mai varafá para van oriyan Devitini yamú mo kanaíen mino. ⁴⁶^lTiyarafenu ano Devitin kama uantan béi amusin uaren Yekopuni Ayarafenu ma van nain namun uvarano siren béin inaúan inen mino. ⁴⁷^mMáa sen inaen mifo Soromoni anoi véin amá uvaren mino.

⁴⁸“Máan ten mifo vanta fóké ma uvaran namumpin Dan Bain Tiyarafenu ano ída vákan sakhanampa vanta ano sikhen mino.

⁴⁹“Bafan mano siyáken inarufái senti kini kumanin kará bákan bararái se sirantan kain baru van mifo

siretí inté ukhein namun ná tentina uvarantó iyákeyá inká

intefasá tenti sivíkan baru vanten nafino. ⁵⁰Téin tiyan mano mai ídá minó danas-inta uvante rafuno.’ *Ais 66:1-2*

⁵¹ⁿ“Tiretí ankan monó baya átakharéin nanin banta ma vainí ukheya ída veya iniyáke Tiyarafenu ída ará amiya ono. Tiretí afóeyan ma iyaré einí eya minó damú Kantá Aunan mano ma siamiyain baya átakharé iya ono. ⁵²^oIntéa sakhanampa vantá tiretí afóeyan mano fefá betin amaniná ídá uman amikharen nafino. Mai ma Funtákein Avúavá Baran Banta erinten ne sen tian dákó iyaré ein banta kéká inan aruan púkaré íkan mai vanta ma yákói mae saréa siretí anon avían namuro ayampin amen nan béin aruan puren mino. ⁵³Tireti anan Tiyarafenui man baya enisori kayo finte vareona ifo mai ánain ída yakhafe ono.”

Stivenin Ma Onámaná Ankamein Baya Ino

⁵⁴Máa síkan mai yafisin banta kayoi ánon banta kéká ano Stivenini veya ma iniren maen béin nan aranan iyáken avayanan uanten mino. ⁵⁵^pMáan uantiyákan Kantá Aunan mano Stivenin aúpin bíkavin inarufá mun onan Tiyarafenui kakhan má Yisasi véin ayan kurompá mantakharen mino. ⁵⁶^qMantakhan béi máa semí, “Inaru ona yiví téi oniyá umpo onano. Vanta Anin mano Tiyarafenui ayan kurompá mantakhen mino.”

⁵⁷Máa siyain má betíi atarentá iyáden avádóden bádiyáken Stiveni vaintá tavaen oren mino. ⁵⁸Oren béin e yarifen kákan baru akhempá morun kaúden araién onámanápó ankamiyáken mai ma esé araién béin au finté ma iyá ein kéká

ano vetíí ayá buí dana ayúariyan Sorin ne sin pumara arantampin kaen mino.

⁵⁹Stivenin ma onámanápó ankamiyan maen béi máa sen amúkemí, “Bafan Yisasi oe, séin taunan barano.” ⁶⁰rMáa siren aron kan daféden oovariyáken temí, “Bafan noe, vetí ankani ume vá ampiantano.” Máa siren aun ma vareínfen puren mino.

8 Sorin avorái Stivenin ma arin puriyan óden kana ino sen mino.

Yisasintá Ma Mumunan Iyain Kayo Ma Namu Uantein Baya Ino

Stivenin ma aruan purein táké arái uren mumunan nanin banta namu uanten inká monó ma siyain kayo ma Yerusaremí baré ein máden asuse iyaimpin monó nanin banta kayo me onen karan oreraen Yudiá barafa safi inka Sameriá barafa safi oriyákan aposeri kayo ano Yerusaremí pa varen mino. ²Tiyarafenu oo yaiyin banta kayo ano Stivenin daiyen mo masí uren kákantá kunfen mino. ³sMáan ten mifo Sori ano monó nanin banta máden asuse iyáken mápin peren kuven iyan banta vá anasi vá do yarifen karavusifin mo khaen mino.

Firipi Ma Mo Sameriá O Varé Ein Baya Ino

⁴Máan tiyan ma karan orera ein kéká ano mai ma karan oreípá mo monó baya siamen mino. ⁵Máan tiyákan Sameriá akhempá mana varurá Firipi mo Tiyarafenu ano ma aní ukhein bantai vaya vanasi siamen mino. ⁶Tiamiyákan kokhon nanin banta ano Firipin avaya iniyáken inká be ma enará ukhein avúavá ma yákó iyain oniyán maen ádé oriven kamaen inen mino. ⁷Iniyákan Firipi ano kokhon namu aunan ma varé ein nanin banta aú pinte yo siantiyákan

mai namu aunan kayo ano vádiyan orera iyan inká ai ayan ma fúkein kayofi arantan ma namu ukhein kayofi ayofiyákan banasi ano onen mino. ⁸Máan tiyákan mai van mai varufin kákan amusin en mino.

Uvátakhan Banta Saimonini Vaya Ino

⁹Máan tiyan Saimonin ne sin mana uvátakhan banta mai varurá bákan Sameriá akhempá ma varé ein nanin banta ano véin nan takha iyan maen béi siyáken, “Téi kákan banta uno,” siyaren mino. ¹⁰Máa siyan minó ona vain má ída ona vain má ano veni vaya iniren béin amo siyan temí, “Moéken enarasí ukhein ákona e ma siyain ma vantafin ban mino.” ¹¹Máan tiyan pefái veni uvátakhan nan takhaen eriyaren mai van béin ánain mana yakhafen mino. ¹²Máan tiyaréin ma Firipi ano Tiyarafenui kama yafisin baya vá inka Yisas Karaisin aví bá ma siamin iniyáken mai vayará mumunan uren minó nanin banta ano non baren mino. ¹³Máan tiyan Saimoni veyan má mumunan uren monó non péden Firipin dakhafen nóken enará ukhein ákona vá aní daná bá ma uvariyarin oniyáken takhaen mino.

¹⁴Máan tiyákan baya varen orin banta kayo ma Yerusaremí ma varé ein mano iníkan Sameriá barafá ma vain nanin banta ano inka Tiyarafenui vaya iniren mumunan iyané siyaiimpin Pita nú Yonin nú tiantan maifá oren mino. ¹⁵Békanan Sameriá ma orivin maen mai kéká ano Kantá Aunan barano van Tiyarafenu vaípá amúken mino. ¹⁶Para va ino Bafan Yisasin aviká anan monó non péden mana ano ída Kantá Aunan mantaréin mino. ¹⁷tMáan turen Pita nú Yonin nú ano vetin ánontá ayan kaíkan Kantá Aunan baren mino.

18-19 Aposeri kan mano ma ayan ánotá kain Kantá Aunan bariyain Saimoni ódaren moní baren betin me amiyán temí, “Téin dere mai ákona simikhesirá tiyan ma ánotá kaonuna nanin banta ano kanafen Kantá Aunan barano.”

20 Maa síkan Pita ano Saimonin tiamemí, “Ei moní bá en masá purase o aiyorano. Para vara seyo, Tiyarafenu ano ma vei sarisarifó para amiyain ákona monípó miyaní onté unon te ine ono. 21 Tiyarafenui yorampin eni afokhan ída vanten mino. Para vara seyo, ven avorá en ará ída funtáken mino. 22 Máan tukhen mifo ará baéde Bafan Tiyarafenuirá amúkesin ná e aúpin ma namu avúavá inin ma ineona ume vá ampiantano. 23 Téi farava máa siya rauno. Éin ma oniyaruna Tiyarafenui ákona varano van moéke anunu e nan mai ano éin avíada umei unampin bae ono.”

24 Maa síkan Saimoni evaránen békanaan tiamemí, “Bafan baípasá amúkusintésin ná mai ma sen timaniná dáko ino seona yaná ída vá dáko ino.”

25 Pita nú Yonin nú ano ma Bafani vaya siamiyáken beni ana vaya manan dáko uren Yerusaremí evaránen oriyáken Sameriá akhempá ma vain baru kayo fimpá kama vaya e siamen oren mino.

Firipin Má Itiopiá Banta Vái Vaya Ino

26 Maí damú Bafani enisori ano Firipin máa sen tiamemí, “E mante sautí aravuve vá mai ma Yerusaremíké kámá barafá aravuaeren ma Khasá oriyain aintá o muntave vá aravono.” 27-28 Maa síkan Firipi e manten mai aasá araviyaren mana Itiopiá bara fáke kákan banta

vá o fóken mino. Béi maen Kandasin ne sin Itiopia kayoi kuinini moníká dáfkéin doran banta¹ váken Yerusaremí monóká erikharen bei karisifin kumamen evaránen bei varufá oriyáken mana sakhanampa vanta Aisaiyani vompon dóki finte yankafen oren mino. 29 Mai vompon onen oriyákan Kantá Aunan mano Firipin tiamemí, “Mesan karisi vaintá oriveya mai ádé orono.”

30 Maa síkan Firipi savaen mai karisi ádé oriven iníkan mai vanta ano sakhanampa vanta Aisaiyani vompon dóki finte yankafiyaréin béin máa sen inaemí, “Mai ma yankafiyaona vomponi ana afová ukhe fonó.”

31 Maa sen ina íkan mai vanta ano semí, “Ída ma mana vanta ano sisimintí intesá erá téi mai vayai ana afová onte rafuno.” Maa siren mai vanta ano Firipin aran mai karisifin ben má un kumanen mino.

32 Mai ma kuinin ayain banta ano ma yankafiyá ein bompon mano máa mi sikhén mino,

“Mana sipisipi arono van aviren oren ma inká ayo yo khaono van aviren oren íkan ma ída vádeiní en be oo fáken mino.

33 Béin maman bara ana kanti ana uren ída funtákein kó tiantáden

ma vara ráke ven aunan do manteini ana akhá i vain pasen

banasi ano ída o araren tinten mino.” Ais

53:7-8

34 Mai vompon ma yankáden mai vanta ano Firipin inaemí, “Tisimeno, mai sakhanampa vanta ano ma sikhein beyan nará tikhen nafi áa ena vanta vará tikhen nafino.” 35 Maa sen ina íkan mai ma yankafein baya ana Firipi araíen tian dáko iyan inká kama vaya ma Yisasin nan tikhein nan tiamen mino.

¹8:27-28 Mai vanta avankan bíkein banta ino. Para va ino, vetí man baya ano siyáken kuinini yoran bantaí ma inona ano avankan ná do viseno sikhén mino.

36-37 ^uBékanan mai vaya e sen oriyan baren manáa non baintá oriven mai vanta ano siyáken, “Onano masi non eraviyan mifo fara vará téi ída monó non perante rafuno.”§ 38 Maa siren mai vanta ano síkan mai ma oriyaerein karisi ma fákaran Firipi má mai vanta vá nompin aravufen Firipi ano mai vanta monó non péanten mino. 39 Péantáden békanan non me ampiren aifá édákan Bafani Kantá Aunan mano Firipin do aviren enafá orivin ída véin onen mifo mai vanta ano amusin en bei varufá oren mino. 40 ^vFiripi maen intesá eipáke safi Asotusí barufin o afoká uven mai ráké araién Yisasini kama vaya minó baru kayofin e siamen oriyan baren Sisariá e unen mino.

Sori Ano Ma Vei Ará Baerein Baya Ino

9 ^wMaí damú ana Sori ano Bafani eyo iyampon kayo aruan purono van pa sinko sen oriyáken 2 Damaskasí monó átaru namun kayofin mai intéa nanin banta anó Aa Ma Yakhafin Kéká** banafi mai vetin páken Yerusaremí karavusifin mo kaono van Sori ano Damaskasí monó ánon banta kayoi ánon banta mo inaen mino. 3 Ina íkan eyo sin Sori oriyan baren Damaskasí áde oriyaín má inaru fáké kakhán mano manáda béin panu sen eúkuáden mino. 4 Maañ tiyaín má Sori varará eraven ankamen iníkan mana oo va ano máa sen tiamemí, “Sori oe, Sori oe, náí ana vará tein namuroí usintiya fono.”

5 Maañ síkan Sori inaemí, “Bafan noe, éi iye fono,” síkan béi evaráñen temí,

“Mai ma séin namuroí iyaona mai séi Yisasi uno. 6 Maañ tiya ompo éi mantave kákan barufin ódesin maen inte yanasá barante fo mai mana vanta anon tiaminten mino.”

7 Maañ sin maen Sorin má ma oriyaaré ein banta kéká ano vaya ída sinton mairá mantakhen mai vaya inen mifo mana vanta ída onen mino. 8 Maañ siran Sori varará bakharen orun mantaaren auu máben onákan auu sítípa ukhen ída mana yaná onarí iyaimpin ben má ma orikhá ein kéká ano ayan noren Damaskasí barufin óden mino. 9 Moran maen kanú manaú damú Sorin auu yufúkuvin báken mana yunan nafi non nafi ída niyan mino.

10 Damaskasí barufin maen mana Ananiasin ne sin eyo iyampon baré íkan Bafan mano auu véden béin ariyan temí, “Ananiasi oe,” síkan béi evaráñen temí, “Boe, Bafan noe,”

11 síkan Bafan mano véin tiamemí, “Sori maen taréa sentá amúkiyan ban mifo vá Puntákein Aasá oriare Yudasín amá orive Tasúsike vanta Sorin nan muno se vá ina ono. 12 Béin auu vaédan Ananiasin ne sin banta ano véin ánotá ayan mo kákan béin auu evaráñen kama iyan onen mino.”

13 Maañ síkan Ananiasí evaráñen Bafan tiamemí, “Bafan noe, Yerusaremí ma eni mumunan nanin banta vain amaniná ma mai vanta ano ída funtákein avúavasí ma iyaín nan kokhon manon ten orera iyá inikhé uno. 14 Maañ tiyáken monó ánon banta vaípákena eyo sin ákona vompon amin mamaren entá ma monó tiyaín

§8:36-37 Ínaimpáké manáa vompoppin ena vaya ves 37 fin asotú ukhen mino: *Maañ síkan Firipi semí, “Éi ma e aúkáké mumunan iyante fara monó non baran nono,” síkan mai vanta ano evaráñen béin tiamemí, “Yisasi Tiyarafenu Anin ma varará nanin banta evaráñen aviran bantan bá bentá mumunan iyá uno.”*

**9:2 Aa Ma Yakhafin Kéká maen Yisasín áñain bákuríyaín kayo van tikhen mino. 19:9, 23; 22:4; 24:14, 22 fin ná dere onano.

kéká minó karavusi fákano van mará erikhen mino.”

¹⁵xMáa síkan Bafan mano siamemí, “Ena anan kéká bá betí kin kayo vá inká Isareri nanin banta vápin tenti monó baya varen orino van béin inka aní ukhé umpo vá orono. ¹⁶yTéin tínain ma vákurin naintá béi intesá ená uman baranten nafi mai véin aní onté uno.”

¹⁷Máa siran Anianisi orein mano mai namumpin ódiven Sorin árontá mun ayan kaiyan temí, “Tifá tiváe Sori oe, mafá ereno van eriyáe nan ma ayanafá dákói ma oneona vanta, Bafan Yisasi ano éin nan evaránen auu mábé onesin Kantá Aunan mano éimpin bíkano van mi séin tisintá eré uno.” ¹⁸Máa siyain má anan Sorin auufenté ataro ma yo siven eraveiní íkan evaránen auu máben oniyáken e manten monó non peren mino. ¹⁹Péden manáa yunan naren bei ákona evaránen mamaren Damaskasí ma varé ein eyo iyampon kayo vá manáa yamú baren mino.

Sori Ma Damaskasí Bá Yerusaremí Bá Ma Varé Ein Baya Ino

²⁰Ákona mamaren esé ana e manten Yutan kayoi monó átaru namun kayofin oriven Yisasi Tiyarafenu Anin mino sen aráfen monó baya siamen mino. ²¹zMáa síkan beni vaya ma inein nanin banta minó ano anúden orera iyan máa sen inaemí, “Mai ma Yerusaremí ma Yisasini eyo iyampon kayo aruan puriyan karavusi fakaádaren ma inká maráke kayo vá dere karavusi fáke monó ánon banta kayoi monó ánon kéká baípa orono van ma erein banta fino.” ²²aMáa siyan Sorini monó baya ano moéken ákona íkan Damaskasí ma varé ein Yutan kayo ano Yisasin nan Tiyarafenu ano ma aní ukhein banta ino sen afová

uren akhokho van ída evaránen béin má manáa vaya sen mino.

Yutan Kayo Ano Ma Sorin Aruan Purono Van Iyain Baya Iniren Ma Karan Orein Baya Ino

²³Máa sen kokhon damú oriyen maen manáa Yutan kayo ano Sorin aruan purono van aúpáké baya sian damuáden mino. ²⁴Máa siren mai Yutan kayo ano Sorin aruan purono van mai varuí yafu ona kayo ma vaintá ena ena vayan má inuran má daffan ákona iyain baya Sori inen mino. ²⁵bMáan tiyákan ben ma vákuren noré ein kayo ano inuran pinté Sorin do aviren mo basketifin dan kumamin mairá anan damuren kafi ain pinté dan aravuaren me onen oren mino.

Sori Ma Yerusaremí O Varé Ein Baya Ino

²⁶cOren ma Yerusaremí oriven Yisasini eyo iyampon kayo vá o asotú uvé dorano van íkan betí ankan béin nan ída fura sen eyo iyamponí ukhen mino sen anomé iniyáken béin nan peren mino. ²⁷dMáan tiyaimpin Banabasi ano Sorin aviren baya varen orin banta kayo vaintá moren Sori inté ená ayanafá oriyaren Bafan onaná béin baya siamídan inká béi inté ená Damaskasí barufin Yisasin aví ída feranton ná tian dákó ena fi, mai fákena vetin tiamen mino. ²⁸Tiamídan Sori vetí ankan má báken Yerusaremí ída feranton Bafan avíká kasaen nóken banasi monó baya siamiyaren mino. ²⁹Tiamen nókan Kiriki vaya ma siyain Yutan kayo ano véi má baya fóké asive asive iyáken mai kéká ano véin aruan purin aa van dosiyaren mino. ³⁰Máa siyain baya ma monópin bain afá aváeyan mano iniyáken béin do aviren Sisariá morúden tiantan Tasusí oren mino.

^x9:15 Apo 26:2, 6; 27:24; Rom 1:5 ^y9:16 2Ko 11:23-28 ^z9:21 Apo 8:3

^a9:22 Apo 18:28 ^b9:25 2Ko 11:32-33 ^c9:26 Kar 1:17-19 ^d9:27 1Ko 9:1

³¹Orivin mumunan nanin banta ma Yudia safi Karirifa safi inká Sameriá akhempa safi ma varé ein kéká Kantá Aunan mano mumunan ákona uantan kokhon mano vetimpin o asotú íkan amusin pinté kusen báken Bafan nan péan amiyaren mino.

Ainiasin Nú Dokasin Núi Vaya Ino

³²Pita ma minó akhempá doren noren maen Ridá barurá ma mumunan nanin banta vain onano van oren mino. ³³O varen mai varu finte Ainiasin ne sin banta onákan dan manápá ifo kanú manaú oranará ai ayan púkan kúkútafin mana vakhen baren mino. ³⁴Baréin Pita véin tiamemí, “Ainiasi oe, Tiyarafenu ano ma aní ukhein banta ano ayofen mifo mantave yuvasí dádá ono.” Maa siyain má ana Ainiasi orun manten mino. ³⁵Máan tíkan Ridá barurá ma varé ein nanin banta vá Seroní puntákeín avafin ma varé ein nanin banta vá ano mai vanta amininá ma yáko ein daná ódaren betí ará baéden Bafan baípa éren mino.

Tabita Ne Sin Nanin Ma Fúkaren E Mantein Baya Ino

³⁶Máan tiyákan mana mumunan nanin Tabitan ne sin nan ma Kiriki veya finté Dokasi ne siyain nanin mano Yopá barurá báken minó damú béi kama avúavá ana variyáken ona ma i van nanin banta aya iyaren mino. ³⁷Aya iyaren aí baren púbíkan non péantáden dan bain karafarampin mun asédan baren mino. ³⁸Ridá baru maen Yopá baru ádé baré íkan eyo iyampon kayo ano inin Pitan nan Ridá barurá ban ne siyaimpin kan banta siantan béi vaípa onóben temí, “Aine setí ma varuna varufá tare ana orono van muno,” siren tútúpen mino.

³⁹Máa síkan Pita maí kan má oren onóbin do aviren dan bain karafarampin ódíkan minó baré nanin kayo ano véi

vaintá e iyen eúkuven ifídiyáken Dokasi ma vetin má para váken amu uariyan amiyaré ein iyon afuin má ona vá Pitan anéan mino.

⁴⁰Máan turan Pita ano minó nanin banta siantan barará karafarampin aravuvíkan aronkan durafúden amúkuren mai ma fúkeín nanin baípa do vaében temí, “Tabita oe, orun mantano,” síkan mai nanin auu máben Pitan me oniyán orun mantaan kumanen mino. ⁴¹Kumamin Pita ano mai nanin ayan pákaren ayain mantavíkan mairá mumunan nanin banta kayo vá baré nanin kayo vá aran édákan mai ma fúká ein nanin ayun para van aní in onen amen mino. ⁴²Mai ma yáko ein baya ano Yopá barufin orera íkan iniren kokhon nanin banta ano Bafantá mumunan en mino. ⁴³Máan turen burumakaó aufó ma minó daná uvariyan banta Saimoni má Pita manáa yamú baren mino.

Tiyarafenui Enisori Ano Ma Koniriasi Vaintá Afoká Ein Baya Ino

10 Sisariá barurá mana Koniriasin ne sin banta váken Itaríke aruvin banta kéká ino ma siyain pintena mana antareti (100) aruvin banta kayorá dafisiyaren mino. ²Daffken báken be má minó be antun má Tiyarafenu aránaó báken bentá mumunan iyan maen Yutan kayofin ma ona i vain nanin banta aya iyáken minó damú Tiyarafenu vaípa amúkiyaren mino. ³Máan tiyaren mana inúpáké kanaú manaú áaú iyan béi onákan Tiyarafenui enisori ano yáko ma ereiní uaren “Koniriasi oe,” sen me aren mino.

⁴Arákan Koniriasi akhokho van mo furefure en oniyáken “Bafan noe, náí fino,” sen béin ina íkan enisori ano evaránen tiamemí, “Éi ma amúkiyaóna vá inká ona ma i vain nanin banta ma aya iyaóna avúava san Tiyarafenu ano

anunu iyáken amusin uantiyan mino. ⁵Máan tukhen mifo saréa ana manáa vanta kayo siantesin Yopá barurá oren Saimonin ne sin banta van ma Pitan ne sen ariyain banta mo yosiren aviren ná erino. ⁶Mai vanta maen ena Saimonin ne sin banta ven amá un non akhempá bakan burumakaó au fóké ma manáa yaná uvaré iyain mai vanta vái véi van mino.”

⁷Máa siren mai ma véin tiamein enisori ma orivkan Koniriasi vei yoran bantá kanan má mana aruvín banta veyan dere Tiyarafenu ma anunu ukhein avúavá ana ma vákuriyain banta vá aren mino. ⁸Aran eríkan mai ma afoká ein danasinta van tiamíden mai kanú manaú tiantan Yopá barufá oren mino.

Pitan Ma Auu Vaédan Onein Baya Ino

⁹Oren ayanafá e vakharen ena ákurá Yopá baru ádé oríkan mo vayaní iyan maen Pita amúkono van má daró óden mino. ^{††} ¹⁰Pitan arafan puriyákan dunan nano van iyan para yunan taren tasu sasu ein pinté béin auu vaédan maen ¹¹inaru ona yivin mai finté davaráeren daná minó kamí kamí akhen pákaaren dan barará eren mino. ¹²Maifin ara ara osafáe kayo vá ayon pinte nun kayo vá inká ara ara safúna kayo vá bíkakharen mino. ¹³Máan tukhan Pita iníkan mana vaya ano siyáken, “Pita oe, mantave ma safúnan kayo arure nano,” sen béin tiamen mino.

¹⁴^eMáa síkan Pita evaránen tiamemí, “Éin avorá ída avusese en ída funtákein dunan báká ída nakherúnan bantí Bafan noe, ída séi nanté uno.”

¹⁵^fMáa síkan mai vaya ano evaránen kan dádasí en béin tiamemí, “Téi

Ayarafenu ano ma maman avusese uranuna yana san i vá teya fainí ukhen mino seno.”

¹⁶Mai ma sein baya ana kanú manaú dádasí en tiamíden ainen evaránen mai yavaráe varen inarufá óden mino.

¹⁷Máan turan mai ma auu vaédan onein danasinta van inté ukhen nafino sire Pita kokhon ineine iyan bakan mai ma Koniriasi siantan Sisariáké erein kanú manaú banta ano Saimonin ama san o inaen eriyain baren dafu onará e manten mino. ¹⁸E mantaven maen oovaraáden inaemí, “Saimonin nan ma Pitan ne siyain banta ma namumpin ná báe iyan nafino.”

¹⁹Máa sen ina iyákan mai ma auu vaédan ma onein danasinta van Pita fa ineine iyan maen Kantá Aunan mano véin tiamemí, “Saimoni oe, kanú manaú banta ano en nan dosen e van mino. ²⁰Dosiyan mifo ída vá kokhon ineine iyáke vá téi anon betin tiantékun erikhen mifo aravuve vá betin masá orono.”

²¹Máa síkan Pita aravein mano mai vanta kanú manaú morun tiamemí, “Tiretí ankan ten nan mi yosia ompo fará ere fono.”

²²Máa sen ina íkan mai máa kanú manaú banta ano evaránen temí, “Mana antareti (100) aruvín banta kayorá ma yafíkein Koniriasin ne sin banta maen Tiyarafenu van péden béin avorá puntáken bakan Yutan nanin banta kayo ano véin nan kama vanta ino siyain bakan kantasí ukhein enisori ano éin nan o aviren erinti vá éi ma siaminona vaya vá inino siren béin tiamídan tetin tisintái éin avirano van mi eré tiféuno.” ²³Máa síkan Pita mai vanta kanú manaú e araádan be ma varé ein namumpin óden mino.

^{††}**10:9** Isareri kayoi má daro avaién ákona ukhan mairá onóbe enóbe é iyan mino.

^e**10:14** Riv 11:1-47; Isi 4:14 ^f**10:15** Mak 7:15, 19

**Pita Ma Sisariá Barurá Oren
Koniriasin Amá O Varein Baya Ino**

Un bakharen ena ákurá Pita mai kayo vá oríkan Yopá baru ráké manáa monópin bain afá aváeyan mano vetin má oren mino.

²⁴Orein ayanafá e vakharen ená damú Sisariá oriyan maen Koniriasí o varen me afová iyan máan ten betin nan erinten mino siren bei kama arona kayo vá be antun má o iyanuádaren betin má manafin átaru ukhen ave iyaren mino. ²⁵Átaru ukharéin Pita ma mápin ódiyain má Koniriasí oniyáken aufá mo aron kan daféden béin monosí uanten mino. ²⁶gMáan tíkan Pita ano véin orun ayanoá diyáken, “Mantano séi éi ma eonaí é ma varará banta uno,” sen béin tiamen mino.

²⁷Máan turen Pita mairá be má e vaya sikhan mápin ódiyain un onákan kokhon nanin banta e átaru ukharen mino. ²⁸Átaru ukharéin Pita mai nanin banta siamemí, “Tiretí afová ukhen nan tetisi man baya ano siyáken Yutan kayo ano ena anan banta vá ída vá manafin báke ída vá betí baintá orono sikhen mifo Tiyarafenu ano siyáken ída vá mana vanta van ída funtákeona váke ída sesé ukhaona ono se vá tiameno sen téin aní uren tisimen mino. ²⁹Mai ana van mi éi ma vanta kayo sianten nan oríká ída áao sin éin oo yayié ereruna van mi éin inaiyá umpo náí vará téin tare fono.”

³⁰Máa sen ina íkan Koniriasí evará-nen tiamemí, “Kamí kamí damú oriyan mifo kanú manau áauíen inúpasí iyáká te simápin timúkiyá baréékun manadá mana vanta ano vei auí daná kaké panu sivin ten tufá e manten mino. ³¹E mantaven mai vanta ano máa semí, ‘Koniriasí oe, éi ma kama avúavasí eya ona

ma i vain nanin banta ma aya iyaona van Tiyarafenu ano amusin uren inka eni amúkin inen mino. ³²Máan tukhen mifo Saimonin nan ma Pita ne sen ariyain banta ano vurunakaó au fóké ma manáa yaná uvariain Saimonin ne sin banta amá ma un non akhempá baimpin ban mifo manáa vanta siantan ná Yopáké o avirano.’ ³³Máa sen tisimein nan mi éin ainen o avirano van banta siantékun oríka kama avúavasí eya ere ompo intéa vayá tetin tisimeno van Bafan mano siamí inikharé intefo sare ana minó ano inintó bá tifé umpo Tiyarafenu avorá tisimí inétifano.”

**Pita Ma Koniriasin Amápin Yisasini
Kama Vaya Siamein Baya Ino**

³⁴hMáa síkan Pita araién betí ankan tiamemí, “Tiyarafenu ano minó ara ara nanin bantafin manaí ukhein avúavasíen aya iyái saréa inka séi fura sé afová é uno. ³⁵Máan té iyan mifo minó kéká pinté intéa nanin banta anó ben nan péden ben aránaó báken puntákein avúavá ana variyan nafi mai nanin bantan Tiyarafenu ano aviré iyan mino. ³⁶Máan tukha siretí afová e nan mai kayoi Bafan ma vain Yisasi Tiyarafenu ano ma aní ukhein banta finté uaren kamaen kusen ma van baya Tiyarafenu ano Isareri nanin bantafin dan erakhen mino. ³⁷iYoni ano ma monó non péantádan intéa yanasá Karirifá arai uren Yudiá barafá oreraen dákó ukhen nafi mai siretí ankan afová ukha ono. ³⁸jNasaretí kena vanta Yisasin Tiyarafenu ano intesá ená bei Kantá Aunan má ákona fóké bá aní uran intesá uren ná Ban Anoni ákona ano yaramádan baré ein nanin banta aya uren ayofen noren nafi mai Tiyarafenu véi má túpá ukhan mino.

§10:26 Apo 14:13-15; Rev 19:10 h10:34 Diu 10:17; Rom 2:11

i10:37 Mat 4:12-17 j10:38 Mat 3:16; Ruk 4:17-21

³⁹Yutan kayoi varafá bá Yerusaremí barufin má ma variyaré ein maen mai minó danasinta setí ódarékun inká béin daa unkamádantá arin púkaréin ⁴⁰kanú manaú bayan orivin Tiyarafenu ano furin pinte orun avían mantarákan banasi avorá orin onen mino. ⁴¹kMáan ten mifo minó nanin banta ano va véin onen naino. Mai ma Tiyarafenu ano ma fefá aní ukhá ein kéká ma varé e tifékun ma véi fúkaren e mantaaren dunan nen non nen í ontaréi sian páman iyá tiféuno. ⁴²lTiyarafenu ano véin nan mi fa ma ayun bain má púkein nanin banta vái yaimin banta vá bano siren pefá aní uran baren mino se vá pura veya vanasifin tian amesin ná inino siren tetin ákonaen baya sisimen mino. ⁴³mBéintá ma mumunan inain nanin banta van Tiyarafenu ano véin pinté uaren ume kayo ampiantanten mino sen minó sakanampa vanta kayo ano ven nan pefá o utúben tian amá uran baren mino.”

Ena Anan Nanin Bantafin Ma Kantá Aunan Erein Baya Ino

⁴⁴nPita ma Tiyarafenui veya fara siamiyan bákan maifin ma e átaru ukhen mai veya ma iniyá ein nanin banta amaniná Kantá Aunan mano eren mino. ⁴⁵Pitan má ma mumunan Yutan kayo ma orikhá ein kéká ano onan ena anan nanin bantafin dere Kantá Aunan banaan amiyaimpin betí anúden oreraen mino. ⁴⁶oPara va ino mai kéká ano ara veya fóké Tiyarafenu aví daní iyan betí ankan iniren mino.

Máan tiyaimpin Pita semí, ⁴⁷“Teti ankan ma Kantá Aunan baré tiferuna avúaváká ten mi ma kéká ano Kantá Aunan baren mifo iye anó kanaíená ma

nanin banta ano ma monó non peran nain aa iyarante fono.” ⁴⁸pMáa siren mai nanin banta van Tiyarafenu ano ma aní ukhein banta Yisasin avíkasá monó non perano siran betí ankan monó non péden mai oyampáké manáa yamú betin má bano van Pitan inaen mino.

Pita Vaintá Ma Afoká Ein Danasinta Van Ma Veyantá Puntáden Tian Amá Ein Baya Ino

11 Ena anan kéká bá ano yere Tiyarafenui veya iniren mumunan iyan mino síkan Yutan barafá ma veya varen orin banta kayo vá monópin ma varé ein afá aváeyan má ano inen mino. ²Mai veya iniren baintá Pita ma Yerusaremí unóbíkan au khavin avúavá ma fara fákaren bain mumunan nanin banta ano véin oyampá baya sen asiyáken ³qamá semí, “Ída au khavin banta kéká amái o fébe veti má dunan niya ono.”

⁴Máa síkan béi vaintá ma afoká ein danasinta van puntáden araíen tian amá en mino. ⁵r“Yopá barurá téi simúkiyá baréékun tuu vaédá onékun inaru fáké mana kákan davaráeren daná kamí kamí akhentá pákaaren te vaintá dan eren mino. ⁶Eriyain má maifin purefure é onékun ayuntáke safúna kayo vá afá tafúna kayo vá ara ara osafáe kayo vá inká ayompin ma noin nun kayo vá baren mino. ⁷Baré fkan mana veya ano séin tisimemí, ‘Pita oe, orun mantave mai yanasinta arure vá nano.’

⁸“Máa síká téi evarané tiamiyáké, ‘Bafan noe, éin avorá ída funtáken ída avusese ukhein daná baká ída nakherunan bantí téi ída nanté uno.’

⁹“Máa sékun inaru fáké kan dádasí en temí, ‘Ayarafenu ano ma maman avus-

^k10:41 Ruk 24:42-43; Apo 1:8 ^l10:42 Apo 17:31; 1Pi 4:5 ^m10:43 Ais 53:5-6; Yer 31:34; Apo 2:38 ⁿ10:44 Apo 11:15; 15:8 ^o10:46 Apo 2:4; 19:6 ^p10:48 Apo 19:5 ^q11:3 Apo 10:28; Kar 2:12 ^r11:5 Apo 10:9-48

ese uran bain danasinta van ída vá painí ukhen mino seno.’¹⁰ Mai ma sein baya kanú manaú dádasí en tisimíden minó danasinta evaránen darifan inarufá óden mino.

¹¹ “Máan turan maí damú ana Sis-ariá baru ráké mana vanta ano kanú manaú banta siantan téin tivirano van eriyán baren te ma varuna namun eren mino. ¹² Eríkan Kantá Aunan mano séin tisimiyáken, ‘Éi ída vá kokhon ineine iyáke vetí ankan masá orono,’ síkan dan manápá ifo afápá mana un ká-dan tifá tiváeyan ma monópin bain kéká ano yere se má oriká oriyá baré mai ma siantan erein banta amá ódé uno. ¹³ Ódékun béi inté ená mana enisori onan ná ben amápin dáko uven tiamiyáken, ‘Banta siantesin Saimonin nan ma Pítan ne sen ariyain banta vá Yopá baru ráke o avire ereno.’¹⁴ ^s ‘Béi maen manáa vaya varen éin me siamintin mai vaya finté uaren Tiyarafenu ano éin má e antun má evará-nen aviranten mino.’

¹⁵ ^t “Máa sirá téi arái uré baya siyá-kun esé araiintá ma setimpin Kantá Aunan mano erein avúaváká ten betimpin er-aven mino. ¹⁶ ^u “Máan tikan Bafan mano fefá tiyáken ma Yoni ano nompói vanasi monó non péanten mifo siretí ankan Kantá Aunan pói féantanten mino ma sikhá ein baya ovaré me iné uno. ¹⁷ Pefá ma Tiyarafenu ano ma aní ukhein banta Bafan Yisasintá mumunan ékun ma Tiyarafenu ano Kantá Aunan amusin timikharen mi saréa Tiyarafenu ano manaí amusin mana ena anan kéká amikhen mifo séi iyé barerá Tiyarafenui yoran are onte rafuno.”

¹⁸ ^v “Máa sin ma vetí ankan mai vaya iniren mairá ída ananin baya sen mifo

Tiyarafenu aví ana maman daní iyáken temí, “Ena anan banta ano ma ará baeran inan Tiyarafenu ano kanae sein pasen betin má deren para van oriyan ban aunan baranten mino.”

Siriá Barafin Ma Vain Antiokí Monó Nanin Banta Fákena Vaya Ino

¹⁹ ^w Stivenin ma arin púbin maen Yisasintá ma mumunan ukhá ein kéká namu arirí iyaimpin betí ankan me onen Fonisíá akhempa safi Saipurúsí akhempa safi inká Antiokí barura safi karan orera iyáken Yisasini kama vaya Yutan nanin bantafin mana e siamen oren mino. ²⁰ Máan tiyákan maen betin aúbaná manáa Saipurúsíke vanta kayo vá inká Sairiní baru ráke kéká bá baren Antiokí barurá oriven Kiriki nanin bantafin dere Bafan Yisasini kama vaya fákena vetin tiamen mino. ²¹ Tiamiyákan Bafani ákona ano vetí ankampin bákan pasen kokhon ena anan nanin banta ano Bafantá mumunan uren ará baeren béi vaípa eren mino.

²² ^x “Máan tiyain baya ma Yerusaremí mumunan nanin banta varé ein kayo ano iniren Banabasin tiantan Antiokí oren mino. ²³ Oren o unaven onákan Tiyarafenu ano ma vetin kama uren taris-ari uantiyaré ein ódaren béi amusin iyáken betí aúkáké pura sen Bafan má ana vano van betin ákona uanten mino. ²⁴ Béi kama vanta vákan Kantá Aunan mano véimpin bíkakkan maen béi ákona mumunan má báken kokhon nanin banta kayo aya uren Bafan baípa o aviádan eriyaren mino.

²⁵ ^y “Máan turen Banabasi ano Sorin nan doseno van Tasisí barufá oren mino. ²⁶ Oriyan baren béin mo ódaren o aviren Antiokí meran baren mino. Báken mai

^s11:14 Apo 16:31 ^t11:15 Apo 2:4 ^u11:16 Apo 1:5

^v11:18 Apo 13:48; 14:27 ^w11:19 Apo 8:1-4 ^x11:22 Apo 4:36

^y11:25 Apo 9:30

orana aúpin Banabasin nú Sorin nú ano mumunan nanin banta kayo vá manafin átaru uviyan kokhon nanin banta kayo Tiyarafenui afova vava siamiyaren mino. Máan tiyáken eyo iyampon kayo van Karaisini kéka se sen esé arafen Antiokíí aví tein mino.

²⁷Máan tiyain pimpá ana manáa sakanampa vanta kayo ano Yerusaremí me ampiren Antiokíí eren mino. ²⁸Eraven mai kayo finté Akhabusin ne sin sakanampa vanta ano orun mantaaren Kantá Aunani ákonará máa semí, “Kákan anan dákó intin Romi kamanin mano ma yafikein bara kayofin arafan nan puren orera inten mino sikháin ma Sisa Kraudiasi ma kiní uven dafisein damú mai yaná dákó en mino. ²⁹Máa síkan iniren Yisasini eyo iyampon kayo ano veyan ma ukheí páké en Yutan barafá ma monópin bain afá aváeyan aya ono van baya sian damuáden mino. ³⁰^aMai ma sian damuádeiníen betíí amusin moní Banabasin nú Sori nuká kaúden tiantan baren Yerusaremí monó doran banta kayo mo amen mino.

Kin Eroti Ma Pitan Páken Karavusifin Mo Khaein Baya Ino

12 Máan tiyain pimpá ana Kin Eroti ano manáa mumunan nanin banta kayo aruren namu ono van karavusi fáken mino. ²Pákaan kaúden béi ano síkan Yonin aváe Yemisin baenatifó anuran tíkan puren mino. ³Máan turen Eroti onákan Yutan kayo ano mai avúava san amusin iyaimpin Yisi Ída Van Bereti Ma Nan Omá Damú Pitan má dere fáken mino. ⁴Pakaádaren Tiyarafenu ano ma Isareri nanin banta Avo Uantan damú ma esantavintí Pitan avían banasi avorá kaúde daimonté uno sen iniren Eroti ano Pitan avían dumukatifin kaúden sikistini

(16) aruvin banta kayo ayampiní uran kamí kamí ano yafídú iyaren mino.

⁵Pitan ma yumukati namumpin kain ban maen béin Tiyarafenu ano ayaino van monó nanin banta ano ákonaen amúkiyaren mino.

Tiyarafenui Enisori Ano Ma Pitan Karavusi Finté Útúantein Baya Ino

⁶Máan tiyákan Eroti ena ákurá béin daimintéin mai inuran kankanen seni anampó béin damuádan aruvin bantá kan aúbaná bavíkan ena aruvin banta kayo ano yumukati namun onará dafíkaren mino. ⁷Máan tukharéin Bafani enisori ano maifin manáda áfoká íkan dumukati namumpin panu siyain má enisori ano Pitan ayorantá ankan ankan iyáken béin avoren temí, “Aine mantano,” siyain má Pitan ayan pinte seni anan útufen eraven mino.

⁸Máan tiyain má enisori ano véin tiamemí, “Ei ona vá arantan anamun má ono,” síkan Pita uran maen enisori ano siamemí, “Ei ayá iyon afuin ureya séin dakhafono.” ⁹Máa síkan Pita mai karavusi namun me ampiren enisori yakhafen oriyáken enisori ano ma mai avúavá bariyain Pita amino ukhen tuu vaédái oniyá uno sen inikharen mino. ¹⁰^bMáa sen iniyáken esé ma yafíká ein má ínain ma yafíká ein banta vá esanten aravuren kákan barufin ma oriyain onará oríkan mai ona ano veyantá e yiven oriyain má míkanaan mai ona finté e yuvinen oriyain baren mana aasá o muntaven oriyain manáa ayáká orivin mai enisori ano véin me ampiren ainen oren mino.

¹¹Orivíkan mairá Pitan auu sapé tiyain má béi semí, “Taréa inka afova suron ékun Erotin ayan pinten téin tiviren inká Yutan kayo ano ma intéa yanasá ten timaniná kaono van iyaren

^a11:28 Apo 21:10

^a11:30 Apo 12:25

^b12:10 Apo 5:19

nafi mai uman kayo finten Bafan manon bei enisori siantan téin tiyaen mino.”

¹²Máa siren mai yaná ma afová iyáken Yonin nan ma Maki ne sen ariyain banta anóe Marian amápin kokhon nanin banta kayo ano átaru ukhen amúki-yará íkan mai namun béi oren mino.

¹³Onóben baru fáke onará béi mo ankan ankan iyan maen iyé e van nafi siren onano van Rodan ne sin doran arinta ano araven mino. ¹⁴Araven orun iníkan Pitan amen avaya vaimpin kákan amusin iyáken ída ona yivinton evaránen mun máa semí, “Pita onará e van mino,” sen mai ma iyukhá ein nanin banta siamen mino.

¹⁵Máa síkan, “Éi óen ná iya vae” sen mai kayo ano véin tiamiyan mifo véi ákonaen tiyáken, “Téi Pitan amen avayan bá inikhere,” siyaimpin betí ankan tiyáken, “Beni enisori anon tino.”

¹⁶Máa siyákan maen Pita onará pa ankan ankan iyan baimpin betí ankan ma morun ona yiren béin oniyan anúden oreraen mino. ¹⁷Máan tiyaimpin ída veya sino van Pita ve ayampó oorá ankan ankan iyáken inté ená Bafan mano karavusi finte útúden béin avían barufá daná eren nafi mai fáke siamíden, “Ma ma yákó ein danasá Yemisi má manáa sífá tiváeyan masá tiameno,” siren betí ankan me ampiren ena varufá oren mino.

¹⁸^eMáan tukharéin ena ákurá aruvin banta kayo ano Pita intefasá orikhen nafi siren akhokho van dosian more mere en mino. ¹⁹Máan tiyákan Eroti

ma mai veya iniren Pitan dosíkan ída vaimpin mai ma yafiká ein aruvin banta kayo avían kaúden avóbé en inaúden ma kékasá aresin purino sen mino.

Kin Eroti Ma Furin Baya Ino

Máan turen ínaimpáké Eroti Yudiá me ampiren Sisariá manáa orun baren mino. ²⁰Kin Eroti ano Taiyá baru ráke vá Saidoní baru ráke nanin banta vá anan maran uren betin nan móeken aranan uantiyaren mino. Máan tiyákan mai nanin banta ano véin ma yafikein bara kayo finte yunan bariyaren pasen kin mano ma kama yoran banta ino siyain banta Barastasi má ará manafinín baya sian damuaren Kin Erotin onano van oren mino.

²¹Kin Erotin ma onano sikhá ein damú ma yákó íkan béi kin buí daná uren kini karáká kumamin banasi e iyuvin ákona veya siamen mino. ²²Sian míkan mai nanin banta ano oovararen temí, “Ma ma siyain baya ma varará bantai veya vaino ayarafenui veya ino.” ²³^dMáa síkan Eroti ano ída Tiyarafenu aví maman daní iyaimpin Bafani enisori ano véin manádá do ankamádan eraviyain má bintokhéna kayo ano véin aú bukhafa nákan puren mino.††

²⁴^ePuren mifo Tiyarafenui veya ano mo kákaníen minó barufá oreraen mino. ²⁵^fBanabasin nú Sorin nú ano vetíi monó nanin banta ayain doran dóan kípären maen Yonin nan ma Maki ne sen ariyain banta avíaren Yerusaremí baru me ampiren evaránen Antiokí oren mino.

††**12:23** Ínaimpáké Yosifasin ne sin mana afova vanta ano siyáken Erotin aúpin kákan aí afoká íkan dan manápá damú esantan maen puren mino sen bei vompon dókifin uvantaren mino.

^c**12:18** Apo 5:22-24 ^d**12:23** Dan 5:20 ^e**12:24** Ais 55:11

^f**12:25** Apo 11:29-30; 15:37

**Yerusaremíke Monó Ánon Banta
Kéká Ano Ma Banabasi Nú Saimonin
Nú Avu Uantáden Tiantan
Monó Dorantá Orein Baya Ino**

13 Antiokí monó namumpin manáa sakhanampa vaya sin banta kayo vákan ma inká Tiyarafenui vaya ma afova amin banta kayo van ma ukharé ein mai vetin aví maen Banabasi má Saimonin nan ma sókon banta e sen ariyain má Sairiní baru rákena vanta Rusiusin má inká Kin Erotin má ma avunté iyá ein banta Manaenin má Sorin má ino. ^{2g}Maná damú monó nanin banta kayo ano yunan auraren amúkiyan Bafantá monó tiyan baréin Kantá Aunan mano vetin máa sen tiamemí, “Tiretí ankan Banabasin nú Sorin nú anésin ná mai ma varano van arakheruna yorarí ino.” ^{3h}Máa síkan betí ankan dunan auraren amúkuren maen mai ma siamein bantá kan ánotá ayan kaúden avu uantáden tiantan oren mino.

**Banabasi Nú Sorin Nú Ma Saiparasí
Musóká O Varé Ein Baya Ino**

⁴Máan turan Kantá Aunan mano míkanan tiantan Serusíá barurá aravunen mai ráke sipi evaránen Saiparasí musóká oren mino. ⁵ⁱOriyaren ma Saramisí barurá o unavin maen betin ayain bantan Yon Maki orikharen mi Yutan kayoi monó átaru namun kayofin Tiyarafenui vaya siamen mino.

⁶Saiparasí musóká békanan o váken ma minó akhempá noren maen Pafosí barurá oriyan o onákan Ba-Yisasin ne sin Yutan kayoi kampun sakhanampa vanta váken béi uvatakhan iyan ara ara aufon iyaren mino. ⁷Mai vanta ano kamanini ánon banta Sekius Paurusin ne sin banta vá bákan maen kama in-

eine vá afova vá bain banta váken Tiyarafenui vaya ineno van Banabasin nú Sorin nú arákan oren mino. ⁸Oríkan mifo mai ma aufon iyáken uvatakhan iyá ein banta Ba-Yisasin aví ma Kirikí vaya finté Erimasi ne sen ariyain banta ano ma inikharé ein Kamanini ánon banta ano Yisasintá mumunan inain nan békanan namuroí uantiyan beni aa iyarano van en mino. ⁹Inikhan Sori nan ma Pori ne siyain bantafin maen Kantá Aunan mano víkavíkan Erimasin auufen kakháben temí, ¹⁰“Éi Ban Anon akháí váke minó puntákein avúavá namuroí iyan nan éimpin ara ara mákasin má namu yaná bá bíkakhayai Bafani funtákein avúavá maman kampun bayafin kaiya ompo mai avúavá ídá ifá inte fono. ^{11j}Tiyarafenui aran naná ano saréa éin auu namu uvintiya áau ída onan manáa ayáká banono,” máa siyain má anan títipa ukhein konan ten daná ano Erimasin aaurá iyábíkan béi ma ayan noren oriyan aa aníin banta van mo yose me yose en mino. ¹²Máan tiyákan Kamanini ánon banta ano mai yaná ódaren mumunan iyákan Bafan nan ma siyain baya ano véin ará manten mino.

**Porin Má Bei Arona Kéká Bá
Pisidiá Bara Fin Bain Baru
Antiokí Ma Varé Ein Baya Ino**

^{13k}Pori má ben ma ayaen doren noré ein kéká bá ano Pafosí baru me ampiren sipi e varen orein mano Pamfiriá barafin bain baru Peká oríkan mairá Yon Maki vetin mo afa uren Yerusaremí evaránen oren mino. ¹⁴Orivíkan betí ankan Peká me ampiren Pisidiá barafin bain baru Antiokí o varen Sabati yamú Yutan kayoi monó átaru namumpin o kumanten mino. ¹⁵Kumantan monó átaru namuni ánon banta kayo ano man baya vá

^g13:2 Apo 9:15 ^h13:3 Apo 6:6 ⁱ13:5 Apo 12:12; 15:39 ^j13:11 Apo 9:8

^k13:13 Apo 15:38

sakhanampa vanta kayoi vava vá danká-den manáa vanta siantan Pori má bei mana yoran banta kayo vá mo siamemí, “Tifá tiváeyan noe, siretimpin ma vanasi ákona uantan baya ma vantiya sesin ino.”

¹⁶Máa síkan Pori e mantaven betí ankan ída vava sino van ayan daní uren temí, “Tiretí Isareri nanin banta vá ena anan nanin banta vá ano ma Ti-yarafenu aránaópá oriyaona kayo ano vá ineno. ¹⁷Isareri kayoi Ayarafenu ano setinti sinafu siráon nan be ina e sen aní ukharen betíi vara ma me ampiren Isipí o vákan maen béi ano vetin mamanan kokhonasí uran baréin bei kákan ákonará betí ankan Isipíke iyanen eren mino. ¹⁸Eriyáken foti (40) oranará ma kámá barafá Ti-yarafenui vava átakharé iyan ma véin uman amiyákan maen béi yo yuren betintá kamaen dafisiyaren mino. ¹⁹Máan tiyáken Ti-yarafenu ano Kenaní barafin ma yan manápá ifo afápá kan un kádan anan nanin banta ma varé ein aren taaren betíi vara o mamanan bei vanasi inái ino van amen mino. ²⁰Mai yanasinta ma yákó iyaré ein mai kamí kamí antareti ifo fifti (450) orana aúpin mino.

Máan turen mai oyampáké Ti-yarafenu ano mai nanin bantará ma yafisin banta kéká aní uren amíkan mai kéká ano vetintá dafisen eriyen sakhanampa vanta Samuerini yamú e khanaíen mino. ²¹Máan tiyain damú anan banasí ano kin nan muno siren inantiyaimpin mi Ti-yarafenu ano Benisamenini anan banta finte Kisin anin Sorin aní uran foti (40) oranará kiní ukhen betintá dafikaren mino. ²²Dafíkaréin Ti-yarafenu ano Sorin doékaren Devitin mamanan kiní uren

béin nan temí, “Te súkákéi sinunué Yesin anin Devitin dosiré aní erunan béi anon ten too yayien te ma siamenuna yanasinta varanten mino.’

²³“Mai vanta anavasin pintéi vanasi ma evaránen aviran banta Yisasin nan Ti-yarafenu ano fefá tian damuádan baréin mai vantant Isareri nanin bantafin tiantan eren mino. ²⁴Ínaimpáké Yisasi erintéin Yoni ano minó Isareri nanin banta van ará baéde vá monó non barano siyaren mino. ²⁵Yoni ma vei yoran kípán akhempá béi semí, “Tiretí ankan ten nan iye inó tiya rafono. Téi mai vanta va uno. Ída ifo véi sen toyampá eriyain téi ída kanaí é beni arantan anamuntáke anan útufonté uno.’

²⁶“Máan tukhen mifo sífá tiváeyan ma Abaraamun akhafana vaona vá inká tiretí ena anan nanin banta ano ma Ayarafenu van péde ven aránaó baona kéká ba soe, mai ma evaráné aviranté uno ma sikhare ein baya mai setimpin mi eren mino. ²⁷Máan turan maen Yerusaremí nanin banta vá betíi yafisin kéká bá ano Yisasi nan banasí ída evará-nen aviran banta ino siren béin ída kamaen oman afová en pasen sakhanampa vanta kayo ano ma ena ena Sabati yamú ma vanasi siamyaré ein baya ánain mi vákuren béin arino sen mino. ²⁸Máan tiyáken ben nan purino ma siyaini aau ana yosíkan ída vaimpin Yisasin arintin purino van betí ano Pairotin ákonaen tútúpen ineen mino. ²⁹Máan turen mai ma fefá sakhanampa vanta kayo ano ma sikhá ein avúaváká ten minó uman béin amaniná kaúden daa unkamádan-táke un mamádan barará eravuvin béin daiyen on aimpin mo masíen mino. ³⁰Masí en mifo Ti-yarafenu ano evará-

¹13:17 Eks 1:7; 6:6; 12:51 ^m13:18 Nam 14:34; Diu 1:31-32 ⁿ13:19 Diu 7:1;

Yos 14:1 ^o13:20 Ano 2:16; 1Sa 3:20 ^p13:21 1Sa 8:5, 19; 10:20-24

^q13:22 1Sa 13:14; 16:12; Íbo 89:20 ^r13:23 2Sa 7:12-16 ^s13:24 Mat 3:1-2

^t13:25 Yon 1:20, 27 ^u13:28 Mat 27:22-23 ^v13:29 Mat 27:59-60

nen purin pinte véin orun avían manten mino. ³¹ ^wMantaran mai ma véin má Kariri fáké Yerusaremí barurá ma onóbe enóbe iyaré ein kayo ano kokhon damú béin oniyaren taréa mai kéká anon tetisi vanasifin béin nan tian dáko uan amiyen mino.

³² “Máan tukháí mai ma Tiyarafenu ano setin tináuyan ma iyáan táká ein kama vayan tiretin tiamiyá tifeuno.

³³ Taréa ma vetin akhafana ma varunafin mi Tiyarafenu ano mai ma sian damuádan baré ein baya kanaí ino van purin pintena Yisasin orun avían mantakhan mi kan dádasí ma en uvantein Í Bompon dókifin uvamádan ban mino. Mai vaya ano siyáken,

“‘Taréa séi en afóení ékuya éi sen taniní e ono,’ sikhén mino. *Íbo 2:7*

³⁴ Tiyarafenu ano véin purin pintena orun avían mantein ída fúta inten mino sen mi ma vayan uvamádan baren mino. Tiyarafenu ano siyáken,

“‘Téi ma kantasí ukhein danasinta vá pura sikhén avu vá ma fefá Kin Devitin iyáan tékun baré ein tiretí ankan amenté uno.’ *Ais 55:3*

³⁵ Tiyarafenui vompon dókifin ena vaya ano máa sikhén mino,

“‘Ei Kantasí Ukhein Banta éi ída áesin masípin púta inten mino.’ *Íbo 16:10*

³⁶ “Deviti ma ma varará báken Tiyarafenui oo yaiyen oriyen baren o fúbíkan be anáuyan má masí uran ben au ano mo fútaen mino. ³⁷ Máan ten mifo mai ma Tiyarafenu ano furin pinte evaránen avían mantein bantai au ída fútaen mino.

³⁸ “Máan tukhein nan mi sifá tiváeyan noe, siretí ankan afovasá ono. Yisasin pinté uaren ma siretíi ume ampiantákein bayan tiamiyá uno. ³⁹ ^xMosesini man baya ano ída kanaíen tiretíi ume arúantáden puntákein nanin banta e sen aran-

ten mifo mai vantará ma mumunan inain nanin banta ven pinté uaren mi minó ume arúantáden puntákein nanin banta e sen aranten mino. ⁴⁰ Máan tukhen mifo mai ma sakhanampa vanta kayo ano ma siádan baré ein danasinta ano siretí ankampin afoká inafa vá dafían ákona ono.

⁴¹ “‘Oyampá baya sin kéká soe, siretí oniyáke anú de orera iya vá púan kípano.

Para vara seyo siretí aúbaná ma séi mana yaná uvaré dararé éku siretí ída kanaí eya mumunan iyasin manáa kéká ano ma siaminti mai yere ída mumunan inono.’” *Aba 1:5*

⁴² Máa siren Porin nú Banabasin nú ma vetíi monó átaru namun me ampiren oriyen maen betí ankan tiyáken ena Sabati yamusá mai ma seóna vaya ovaráne me sesirá inétifano sen békanan tiamen mino. ⁴³ Máa siren mai namun pinté ma orera iyan maen mai ma ará baéden Yutan kayoi monó avúavá ma vákuriyain kayo vá Yutan kayo vá ano Porin nú Banabasin nú bákuren oriyákan betin má e vaya sen oriyen tútúpen temí, “Ayarafenui sarisari aúpin ákona e vá monó teno,” sen betí ankan tiamen mino.

⁴⁴ Orikharen ena Sabati yamú ádé anantá mai varu fintena minó nanin banta ano Bafani vaya ineno van e átaru en mino. ⁴⁵ Átaru iyaimpin Yutan kayo ano mai ma e átaru ukhein nanin banta ódaren Porin ará namu uantáden béi ma siyain baya van ankayan tiren oyampá baya sen mino.

⁴⁶ ^yOyampá baya siyaimpin Porin nú Banabasin nú betin nan ída feran evaránen tian amá uan amen temí, “Tiretin naren arafé Tiyarafenui vaya sian améku ída maman kákan danasí eya fara van oriyen ban aunan baran nona van ifá

enái saréa yo vaéaré ena anan nanin bantafin mi sian dáko iyá uno. ⁴⁷Para vara seyo, Bafan mano ákona vaya máan mi sen tetin tisimikhen mino,

“Téi anon éin maman ena anan nanin bantai kakhaní urékuya ma varai minó ankina fákena nanin banta aya uresí betin evarané aviranté uno.”

Ais 49:6

⁴⁸Máa síkan ena anan nanin banta kayo ano mai vaya inin betin arápin kama íkan mai kéká ano Bafani varará amusin uren ben aví maman daní iyákan mai ma fara van oriyan ban aunan barano van ma Tiyarafenu ano aní ukhein nanin banta ano mumunan en mino.

⁴⁹Máan tiyákan Bafani vaya ano minó akhempá oreraen mino. ⁵⁰Máan tiyan mifo Yutan kayo ano vetíi monó tin avúavá ma yakhafíyan ma aví bain nanin kayo vá mai varu ráke ánon banta kéká bá arápiní uren minó ano araíen Porin nú Banabasin nú aruren mai varu fintena vékanan do sianten mino. ⁵¹^zMáan tiyan mai ma sein baya oyan amiyaimpin békanan arantantá ma varé ein kayó do fúpa tiren Antiokí me ampíren Aikoniamú barufá oren mino. ⁵²Oríkan eyo iyampon kayo ano amusin iyákan Kantá Aunan mano vetin aúpin bíken mino.

Porin Nú Banabasin Nú Ma Aikoniamú Barufin Kama Vaya Siamein Baya Ino

14 Porin nú Banabasin nú ano Antiokí monó átaru namun ma variyaré ein avúavá anan Aikoniamú baren mino. Békanan Yutan kayoi monó átaru namumpin ódiven Tiyarafenu kama vaya siamíkan kokhon ná Yutan kayo vá ena anan nanin banta kayo vá ano iniren mumunan en mino. ²Máan tiyákan ída

ma mumunan ein Yutan kayo ano ena anan nanin banta kayo arápiní íkan mumunan ma iyain nanin banta namuroí uanten mino. ³^aMáan tiyaimpin Porin nú Banabasin nú ano Aikoniamú barurá ayáká báken ída feranton Bafani avábá in baya vanasi siamiyákan Bafan mano vékanan ákona amíkan enará ukhein avúavá bá aní danasinta vá banasi aní iyan maman pura yanasí en mino. ⁴Máan tiyaimpin mai varu ráke nanin banta kayo ano kampintan daíden manáa kayo ano Yutan kayoi kékasí íkan manáa ano aposeri kayoi kékasín en mino. ⁵^bMáan turen ínaimpáké Yutan kayo vá ena anan nanin banta kayo vá ano Porin nú Banabasin nú onámaná ankamintin purino van betíi yafisin kayo vá baya sian damuáden mino. ⁶⁻⁷Máa sen orera iyain baya ma vékanan inen maen Rikoniá barafin ma vain kákan barú kanan Ristará bá Debé bá kan pin karan oriyáken mai akhempá ma vain nanin bantafin Tiyarafenui kama vaya me asotú en tiamen noren mino.

Porin Nú Banabasin Nú Ma Ristaráke Nanin Banta Tiyarafenui Kama Vaya Siamein Baya Ino

⁸Ristará barurá mana vanta ve anóe ano ma kaein táké arantampin ída ákona vákan ída onóbe enóbe in kumanten mana varen mino. ⁹Kumanten báken Pori ma vaya siyain mai vanta ano iniyákan Pori mai vanta furefure en oniyáken ma vanta ano mumunan iyain béi kanaíen kama inten mino sen inen mino. ¹⁰Máa sen iniren Pori oovararen temí, “Ei arantantá orun mantano,” síkan mai vanta ano mai vaya inen kútin orun mantaven oren mino.

¹¹^cMáan tíkan kokhon nanin banta kayo ano Pori ma varein daná

^z13:51 Mat 10:14; Apo 18:6 ^a14:3 Mak 16:20; Ibu 2:4 ^b14:5 Apo 14:19
^c14:11 Apo 28:6

ódaren Rikoniá baya finté betí ankan oovararen temí, “Ayarafenu kayo ano vantai avúaváká ten tetí ankampin erakhen mino.”¹² Máa siren betí ankan Banabasin nan Siusin^f ne sen inká Pori vava sin banta vákan béin nan Emesin^{§§} ne sen en mino.¹³ Máan turan maen Siusii monó namun mai varu akhempá baréin mairá ma mai monó ánon banta vá banasi vá ano manáa afon burumakaó bá manáa faravá asína uran má mamaren Banabasin nú Porin nú íkun uan ameno van mai varui yafu onará oren mino.

¹⁴Máan tiyain baya ma Banabasin nú Porin nú ma inen maen békani ona yákaren mai nanin banta kayo aúbaná tavaen oriyáken oovararen temí,¹⁵ d“Banta kayo oe, fará ma avúavá barano van iya rafono. Berasan tireti ma einí ukheruna vantán báké mai ma veni ana i vain avúavá ma variyaona finten tiretin avían para van oriyan ban Tiyarafenu ano ma inaru vá bara vá un non má mai aúpin ma minó danasinta vain ma uvantein banta vaípa kaono van mi kama vava fóké tiretin tiamiyá uno.¹⁶ eTiyarafenu ano fefá áíkan ara ara vara finte nanin banta ano vetí anunu ano ma orein avúaváká baren oriyaren mino.¹⁷ fMáan tiyan mifo véi ída manáa yaná úaviran bei avábá anfen ayon pinta á dan eriyán inká béi kama áau amíkan dunan ampan kauri niyan nan tiretin aúpin amusin bíkaan tiyan mino.”¹⁸ Mai vava fóké Banabasin nú Porin nú ano ákonaen are uantiyan mifo vanasi

ano míkani vava ída ininton iyaníen míkan íkun uan ameno van iyaren mino.

¹⁹gMáan tiyákan Antiokí baru rákena manáa Yutan kayo vá Aikoniamú baru rákena vá ano Ristará barurá eriven banasi arápiní íkan betí ano Porin ará uman daantáden onámaná ankaman kaúden inka furen mino siren kákan baru finte yo yarifen baru akhempá morun karúden mino.²⁰ Máan turan mifo Yisasintá ma mumunan iyá ein kéká ano o iyen eúkuvíkan Pori orun mantaaren evaránen kákan barufin o varen ená damú Banabasi má Debé barufá oren mino.

Porin Nú Banabasin Nú Ano Ma Auyen Mumunan Kékái Ará Ákona Uantein Baya Ino

²¹Debé barufá o varen míkanaan mano Tiyarafenui kama vava mai varufin tiamíkan banasi ano Yisasintá mumunan en orera iyákan ínaimpáké békanaan evaránen Ristará barufá bá Aikoniamú barufá bá Antiokí barufá bá oren mino.²² hOriven míkanaan mano Yisasintá ma mumunan iyá ein nanin banta mo ákona uantiyáken temí, “Uman kayofin orivétiféi ínaimpáké Tiyarafenui Yafisin aúpin oró tifanté umpo fura sikhein mumunanta sá mantaan ákona ono,” sen e siamen oren mino.²³ Máa sen oriyáken Porin nú Banabasin nú ano yunan auraren amúkiyáken Yisasintá ma mumunan iyain nanin bantará ma kanaíen dafiseren ukhein banta kayo aní uren ayon ánotá kauren amúkuanten

^f14:12 Siusi maen Kiriki nanin bantai ayarafenun bákan Romu kamaní ano ma yafíká ein bara kayofin bentá mumunan iyaren mino (Romúke nanin banta ano Yúpitan ne sen aví ariyaren mino).

^{§§}14:12 Emesi maen Kiriki nanin bantai ayarafenun báken baya varen oriyáken baya sin banta ino sen mumunan iyaren mino. Romú kéká ano Mekiurin nan ayarafenun ban mino sen mumunan iyaren mino.

^d14:15 Íbo 146:6; Apo 10:26 ^e14:16 Apo 17:30 ^f14:17 Yer 5:24

[§]14:19 Apo 17:13; 2Ko 11:25 ^h14:22 Apo 15:32; 1Te 3:3

mino. Máan turen mana mana monó namuntá dafídú uantáden betí ankan Bafan ayampin kaen mino.

**Porin Nú Banabasin Nú Ma
Siriá Bara Fin Antiokí Barufá
Evaránen Orein Baya Ino**

²⁴Máan turen ínaimpáké Banabasin nú Porin nú ano Pisidiá barafá oriaren Pamfiriá barafin oren mino. ²⁵Oriven ma Pekhá barurá Tiyarafenui vava siamíden maen ínaimpáké míkanan Atariá barufá araven mino.

²⁶ⁱOrun baren ma míkanan monó doran kípáren maen mai ma monó nanin banta kayo ano ma vékanan tarisari urantin mai yorará ino van ma Tiyarafenui ayampin kaen baru mai Antiokí varéin maifá sipi varen oren mino. ²⁷^jOriyan baren míkanan mairá o unaven mai ma Tiyarafenu ano vékanan ayan táké uaren ena anan nanin bantai mumunan ona ma yiantein baya monó nanin banta mo átaru uádaren tiamen mino. ²⁸Tiamíden maen békanan Yisasintá ma mumunan iyain nanin banta kayo vá manáa ayáká baren mino.

**Yerusaremí Ma Yisasín Bákuriyain
Kayoi Ánon Banta Kéká Ano
Átaru Ein Baya Ino**

15^kYudiá kena manáa vanta kayo ano Antiokí araven morun monó nanin banta kayo araíen afova amiyan temí, “Tiretí ankan ma Mosesini avúavá ída yakhafe siretí au ma ída kavesin maen Tiyarafenu ano ída kanaíen tiretí ankan evaránen aviranten mino.” ²^lMáan ma siyain baya van Pori nú Banabasi nú mai vanta kéká bá asiven mino. Máan tiyan monó nanin banta ano vava sian damuaren Porin nú Banabasin nú bá inká ena mumunan

banta kayo vá aní uren Yerusaremí ma vain aposeri kayo vá inká monó doran banta kayo vá mai vava mo funtarano van Yerusaremí tiantan oren mino. ³Monó nanin banta kayo ano vetí ankan tiantan oriyáken Fonisiá bara vá Sameriá bara vá aúbanapin ma vain kéká afova amiýáken temí, “Tiyarafenu ano ena anan nanin banta kayo ará baéden aviren mino,” síkan maí kan barufin ma mumunan nanin banta vain mano mai vava iniren amusin en mino. ⁴^mBetí ankan Yerusaremí onóbíkan mumunan nanin banta kéká bá baya varen orin banta kayo vá monó doran banta kayo vá ano amusin uren Porin nú Banabasin nú aviren mo khain Tiyarafenu ano ma vékanan ayantá ma varein danasinta vetí ankan tiamen mino.

⁵Máa síkan Farasisi kéká pintena manáa mumunan banta kayo ano orun mantaven temí, “Ena anan banta kayo ano ma setí ankampin ma e ferano van inti vá betin au kare Mosesini man baya siamesin ná mai ánain dakhafino.”

⁶Máa síkan baya varen orin banta kayo vá monó doran banta kayo vá ano mai vava funtarano van átaru en mino. ⁷ⁿÁtaru uven betí ankan kokhon ná baya sirákan Pita e mantaven betí ankan tiamemí, “Tifá tiváeyan noe, siretí ankan afová ukha ono fefái Tiyarafenu ano siretimpin doran daíden téin aní iyáken ena anan nanin banta kayo ano vá kama vava sen too fentena iniren ná mumunan ino sikhen mino. ⁸^oTiyarafenu ano minó nanin banta kayoi ará afová uren kana van mino siyáken Kantá Aunan tetí ankan ma simeinién betí ankan amiyan mino. ⁹Béi ída setí ankan ena avúavasíen betí ankan ena avúavasíen iyan mino. Betí ankan béintá mumu-

ⁱ14:26 Apo 13:1-2 ^j14:27 Apo 15:4, 12 ^k15:1 Kar 5:2 ^l15:2 Kar 2:1
^m15:4 Apo 14:27 ⁿ15:7 Apo 10:1-43 ^o15:8 Apo 10:44; 11:15

nan íkan mai mumunan manon betin aní íkan mi véin avorá maman avusese iyan mino. ¹⁰P Máan tukhen mifo fará tinafu siráo fi seti safu mai ída kanaí é bararen uman kayo mamariyá monó nanin banta amempin kuviyáké Tiyarafenu akhenóka uan oniya rafono. ¹¹Q Bafan Yisasin ano ma sarisari ukhein nará mumunan ékun ná mai vanta kayo ma evaránen avireinién ná Tiyarafenu ano setí ankan má evaránen tivirano.”

¹²Pita máa sirákan mai ma átaru ukhen baré ein banta kayo ano ída mana vaya sinton Banabasin nú Porin núi veya átare amiren inikhan Tiyarafenu ano ma vékan pinté uaren ma enará ukhein ákona vá aní danasinta vá ma ena anan nanin banta aúbaná ma mantaré ein nan tiamen mino. ¹³R Békanan baya sian kíparan Yemisi máa semí, “Tifá tiváeyan noe, senti veya vá ineno. ¹⁴Tiyarafenu ano ena anan bantafin oriven betí ankan avían bei kékasí ono van iyákan pefái Saimoni ano* setí ankan tisimikhen mino. ¹⁵Sakhanampa vanta kayo ano ma uvamádan baré ein bompon má dere ano manái ukhen mino. Mai vompon mano máan mi sikhén mino.

¹⁶Iñainpáké téi ovaráne erivé Devitini yavaráe namun ma eravukhá ein maman mantanté uno.

Béin amákompin evaráne uvaman kaúdé pefá ma varé einí uan kaúdékun

¹⁷manáa vanta ma me á inain kéká anon Bafan nan dosintin

inká ena anan kéká pinté ma sen tiví mamaren bain kayo anon mumunan intéin

Bafan mano ma sikhá ein mai yanasintan afókáen mino.’ *Amo 9:11-12*

¹⁸Pefa suron mi ma yanasinta ma afokáin nain baya sikhén afová ukharen mino.’

¹⁹“Máan tukhen mifo séi ma ini-yarúna setí ankan ída vá ena anan banta kayo ano ma ará baéden Tiyarafenu vaípa oriyain uman ameno. ²⁰S Erí tetí ankan mana vompon uvamádekun betí ankan baípa orintí betí tiamiyáké ída vá kampun ayarafenuntá ma íkun uran dunan barano seno. Mai avúavasí ma uran dunan mano Tiyarafenu avorá painí ukhen mino será inká betí ankan nan ída vá ena nanin banta kayo vá banasiíin avúavá barano será inka ída vá banta kayo ano ma amempin anan damuren ariyain tafúna kayo ne vá nare ma fara vain tafúna kayo ída vá nano sé tian amé tifano. ²¹Para vara seyo, fefá ma eriyán taréa ma eman kanaí iyain minó barufá ma Yutan kayoi monó átaru namun ma vaimpin Mosesini man baya ena ena Sabati yamú tiamiyán inikhen mino.”

Yerusaremíké Ma Mana Vompon Uvaman Ena Anan Nanin Banta Amein Baya Ino

²²Máa siren aposeri kayo vá Yisasiní mumunan nanin bantai monó doran banta kayo vá monó nanin banta kayo vá ano veya sian damuaren betin pinke manáa vanta aní uren tiantantin Porin nú Banabasin nú bá Antiokí orino van en mino. Mana vanta mai Yudasi nan ma Basabasi ne siyain má inká ena vanta Sairasi má ino. Békanan maman monó nanin banta kayoi ánon bantaíen mino. ²³Békanan ayantá betí ankan bompon uvamá diyáken temí,

Tetí aposeri kayo vá monó doran banta kayo vá inká tiritini monó afá

*15:14 Saimonini ena ví maen Pita ino.

P15:10 Mat 11:30; Kar 3:10 Q15:11 Kar 2:16; Efe 2:5-8 R15:13 Kar 2:9

S15:20 Eks 34:15-17; Riv 17:10-16

aváeyan má ma varuna ano ma vompon uvádé máa sé uno:

Tiretí ena anan nanin banta kéká pinté ma Yisasintá mumunan iyaona kayo ma Antiokí baona vá Siríá barafín ma vaona vá Sirisíá barafín ma vaona mai kayofín máí oren mino.

Tifá tiváeyan noe, bayan mino.

²⁴ Tetí inékun maen tetin pinté manáa vanta kéká ano setí ída sianterunará tiretí ankampin oriven betíi vaya fóké akhokho amiren tiretíi ineine asuse uantiyan mino.

²⁵ Máan tiyain nan mi setí ankan mai yaná ma afoká iyain baya iniréi setí ankan tirá manafíní uré moeké tinunu iyaruna sífá tiváe kan Banabasin nú Porin nú bá kankanan tifá tiváen má aní uré tiantékun orino van tetí ankan baya sian damuádé uno. ²⁶ Békanaan ma furin nain nan ída feranton kasaen Bafan Yisasi Karaisin aví tian páman inten mino.

²⁷ Máan tukháí setí ankan Yudasín nú Sairasin nú tiantékun tiretí ankan baonafá oriven betiyantá mo vaya sian amá inten mino. ²⁸ Kantá Aunan mano setí ankan má bakái ída siretin kokhon uman amenuna van inikhéi ma vaya sian damuádé umpo vá mai avúavá anáin mana vá dakhafono. ²⁹ Kampun ayarafenun kayo ma íkun uantanton ma aruran nain tafúna siretí ankan ída vá neya inká nare ma fara vain tafúna kayo ída vá neya inká banta kayo ano ma amempin anan damuren arin nain tafúna ída vá neya inká ena nanin banta kayo vá ma vanasiin avúavasá ífá ono. Tiretí ankan ma mai avúava sintará dafisinteya mai kama in nono.

Inka ino.

³⁰ Máa siren monó nanin banta ano mai vanta kayo siantan Antiokí araven monó nanin banta kayo morun iyanuan átaru uren mai vompon amen mino.

³¹ Amíkan mai nanin banta ano mai vompon dankáden bétí ankan ma ákona uantan kama vaya ma inein nan amusin en mino. ³² Yudasín nú Sairasin nú sakanampa vantá kan baren békanaan mano monó nanin banta kokhon ná kama vaya kayo fóké tiamiyáken mai avúavá póké betíi ará ákona uanten mino. ³³⁻³⁴ Antiokí békanaan manáa ayáká baré íkan ínainpáké monó nanin banta ano susu siantáden ará kusin masá orono siran mai ma siantan erikharé ein banta kayo vaípa evaránen oren mino.†

³⁵ Orivíkan Porin nú Banabasin nú Antiokí barurá para váken manáa kokhon kayo vá békanaan Bafani vaya siamiyan afova amen mino.

Porin Nú Banabasin Nú Ma Kákan Asivirí Ein Baya Ino

³⁶ Manáa yamú orivíkan Pori ano Banabasin tiamiyáken, “Bafani vaya ma erasan pefá tiamerúna kayo evarané minó barufá noké oné eúkiyá maé betí ankan kaná ban nafi afová onté tiféuno.”

³⁷ Máa síkan békanaan má Yonin nan ma ena ví Maki ne siyain banta vá Banabasi aviré orono van ten mino.

³⁸ Máan tíkan Pori siyáken, “Mai vanta ano fefá Pamfiriá barafá erasan má oren doran nain nan ífá ukharé ein erasan má ída orinten mino.” ³⁹ Máa siren mai van békanaan kákan asivirí uren békanaan enádá bá ída manafín doren mino.

Banabasi ano Makin avíaren mana sipifín kádusiven Saiparasí musóká oren mino.

⁴⁰ Máan tíkan Pori ano Sairasin avíaren

†**15:33-34** Manáa vompoppin ena vaya asótúen ena ves 34 fin máa síkhen mino, ³⁴ *Sairasi Antiokí bano van en mino.*

†**15:28** Mat 23:4 ^u**15:37** Apo 12:12, 25 ^v**15:38** Apo 13:13; Kor 4:10

békanan orono van íkan monó nanin banta ano siyáken Bafani avábá ano vá tirékan má bano sen tiamen mino. ⁴¹Máa sirákan békanan Siriá bara vá Sirisiá barafá bá oriven mai akhempá ma monó nanin banta kayo ma vain ákona uanten mino.

Timoti Ma Porin Nú Sairasin Nú Bá Monó Dorarí Ein Baya Ino

16 ^wPorí ano Debé barurá onóben mai ráké Ristará barufin oríkan maifin mana mumunan banta Timotin ne sin be anóe Yutan nanin báken mumunan iyain maen be afóe Kiriki vantan baren mino. ^{2x}Ristaráké bá Aikoniamú baru rákena vá monó afá aváeyan mano véin kákantá amo siyan mino. ³Porini anunu ano Timotin aviré orono siren béin au khaen mino. Para vara seyo, mai akhempá ma vain Yutan kayo ano afovaí ukhan ben afóe Kiriki vantan bain bákan mino. ^{4y}Máan turen Pori mai kéká bá minó barurá oriven mai ma Yisasini mumunan nanin bantai ánon banta kayo vá aposeri kayo vá ano ma Yerusalemí ma sian ákona ein baya e siamen oriyáken temí, “Ma vaya inire vá dakhafono.” ⁵Máa sen ákona uantan baya mumunan nanin banta siamiyan mai kéká ano mo ákona iyan maen ena ena mumunan nanin banta e asotú iyan mo kokhoníen mino.

Porin Ma Auu Vaerein Baya Ino

^{6z}Kantá Anunan mano vetin nan ída vá Esiá barafá mo monó baya siameno siren airo ananí uantiyaimpin Pori má bei kéká bá ano Kaesiá bara vá Firikhiá baravái minó akhempá orera uven monó baya siamen mino. ⁷Ori-

yaren Misiá bara akhempá ma onóben Bitiniá barafá orono van íkan maen Yisasini Anunan mano ída vá orono sen mino. ⁸Máa siyaimpin Misiá bara esanten Troasí barafá araven mino. ⁹Mai inuran Porin auu vaédan Masedoniá bara fáké mana vanta ano mantakhen Porin ákonaen ariyan temí, “Ma ufá ekháde Masedoniá erive vá tiya ono.” ¹⁰Porin ma auu vaédan ma ódará maé mai varafá mo vanasi siamino van mí setin tariyan mino siré Masedoniá barafá orono van útaé tiféuno.

Firipaí Baru Fin Ma Ridia Ará Baerein Baya Ino

¹¹Máa siré Troasíké mana sipifin kumamé un nompin Samotresí barafá puntádé onóbé ená damú Neaporisí barurá o uné tiféuno. ¹²Mai varu me ampiré maé pefá ma Romu ano Masedoniai varafin kákan baru vaimpin ma mo varuí ma ukhá ein Firipaí barurá manáa yamú o varé tiféuno.

¹³O varé Sabati yamú mai kákan baru me ampé aravuaré mana non akhempá timúkó tifano van oriyá onékun anasi kéká átaru ukháí mai nanin kayo vá o khumamé monó baya siamé tiféuno. ¹⁴Mai nanin kayo fintena mana Taiaitairá baru rákena nanin Ridian ne sin báken béi nararé davaráe kayo kain bákan miyaní iyain ban maen béi Ti-yarafenurá monó tiyain baréin Bafan mano ven aú ona yiran Porí ma kama vaya sein mai vaya máa inen mino. ¹⁵Iniren Ridian má bei kéká bá ma monó non péden maen temí, “Ten nan ma Bafantá mumunan iyan mino ma se siretí ankan iniyante mae ereya sen timápin o vano,” sen tetin ínanen taren mino.

^w16:1 Apo 14:6; 2Ti 1:5 ^x16:2 Fir 2:19-22 ^y16:4 Apo 15:23-29

^z16:6 Apo 18:23

**Porin Nú Sairasin Nú Ma Firipái
Karivusifin Pákaan Kaein Baya Ino**

¹⁶Maná damú amúkin barurá orono van oriyaré é tifékun mana miyan ída van doran arinta namu aunan mano véin pákaxhan ínaimpá ma erin nain danáká sakhanaampa veya siran maen beni yafisin kayo ano kákan miyan bariyain baré íká béin má o fóké uno. ¹⁷aPori ma setin má oriyan maen mai arinta ano sínain dakhafen eriyáken oovararen temí, “Ma vanta kayo maen Dan Bain Tiyarafenui yoran banta kékái váken para van aunan baran aa ma orikhein bayan tiamiyan mino.” ¹⁸Mai arinta ano ena ena máa sen oriyan baré íkan maná damú Pori iníkan aí pefe iyaimpin béi yo vaéaren mai aunan tianten temí, “Yisasi Karaisin avíká éi mai arinta me ampire orono,” síkan esé ana mai aunan mano mai arinta me ampiren oren mino.

¹⁹Orivin mai arintai yafisin kayo ano onákan betí ankan ma moní bariyará ein ída aaí iyaimpin mai kayo ano Porin nú Sairasin nú pákaren do yarifen átaru varurá ayafa vanta kayo avorá mo khaen mino. ²⁰bBékanan darifen baya ma yaimin banta kéká avorá mo khaúden máa sen tiamemí, “Ma Yutan bantá kan mi váken ma varufin uman maman dákó en asuse iyan mino. ²¹Békanan manoi Romuí varafá ma are ukhein avúvavá maman dákó uren banasi afova amiyán mino.”

²²cMáa síkan banasi o átaru uven Porin nú Sairasin nú ákonaen asen auvin baya siyaimpin baya yaimin banta kayo ano síkan békani auí daná do vararó uan karúdaren dafiyó ankamen mino. ²³Békanan ma yafiyó namu ankamirí uren maen aviren mo karavusifin karú-

daren karavusi namuntá ma yafisin banta van ákona e vá békantá dafiseno sen tiamen mino. ²⁴Máa síkan mai veya iniren mai namuntá ma yafisin banta ano vékan aviren mai namumpin ma aúbaná bain karafarampin mun kaúden daa khaeádan békan arantantá kaúden damen mino.

²⁵Máan turan báken inuran aúbaná Porin nú Sairasi nú ano Tiyarafenuí amúkiyáken í diyan ena karavusi kéká ano iniyaren mino. ²⁶Iniyaré íkan anú deiníen kákantá bara kaya iyain má mai mái namádan kayo kaya iyain má manadá ona yiven orera íkan minó karavusi ayan arantantákena seni anan útufen oreraen mino. ²⁷dMáan tiyain má mai namuntá ma yafíká ein piripo vanta ano orun mantaven onákan ona yiven orera ukhan inka karavusi kéká karan oren mino siren bei vaenati orun danú aren beyantá beyan arono van en mino. ²⁸Arono van íkan Pori avádóden oovararen temí, “Minó ano ída kharan orera ukhé tifé umpo ída vá eyantá arono.”

²⁹Máa síkan mai firipo vanta ano oon ure ereno sen oovariyan tavaen Porin nú Sairasin nú ma vain karafarampin ódiven akhokho ano avinantan diyaimpin békan baintá un baren aron kanan daféden matimen mino. ³⁰eMáan turen békanan aviren barufá morun kaúden inaemí, “Kákan bantá kan noe, inte avúvasavá urékun ná Tiyarafenu ano evaránen tiviranten nafino.”

³¹Máa síkan békan mano véin evaránen tiamemí, “Bafan Yisasintá ma munan esin maen mi éi má ei kéká bá evaránen aviranten mino.” ³²Máa siren Bafani veya mai vanta vá be amápin ma varé ein kéká bá tiamen mino. ³³Mai inuran mai áaurá anan mai firipo vanta

^a16:17 Mak 1:24 ^b16:20 Mak 13:9 ^c16:22 2Ko 11:25; 1Te 2:2

^d16:27 Apo 12:18-19 ^e16:30 Apo 2:37

ano Porin nú Sairasin nú aviren namon mo sesé uantádan béin má bei kéká bá monó non péanten mino. ³⁴Máan turan mai firipo vanta ano Porin nú Sairasin nú aviren be amápin mo khaúden kákan dunan táden amin niyákan béi má minó bei kéká bá ma Tiyarafenurá mumunan ein nan béin aúpin amusin bíken mino.

³⁵Máan turen bákan kakhen ákurasí iyain má baya yaimin banta kayo ano vetí firipo kéká tiantan mai ma karavusi namuntá ma yafíká ein banta mo siamemí, “Maí kan banta karavusi finte útúantesin orino.” ³⁶Máa síkan mai firipo vanta ano Porin tiamemí, “Baya ma yaimin kéká ano siré kanan karavusi fintena vá utúantano sen mifo vá tirékan ará kusin masá orono.”

³⁷Máa síkan Pori mai firipo kéká máa sen tiamemí, “Berasan Romúke vantan bákun ída kamaen kó tiren ana afováin banasi avorá dafiyó tinkáden karavusifin kaí baréekun aúpáké ma sisintano van iyain mai ída kama ukhen mifo mo sesin mai vanta kayo eriven e sivían kaintisá aravono.”

³⁸Máa sen tiamíkan mai firipo kéká ano Porini vaya varen mo vaya yaimin banta kéká tiamíkan iníden Porin nú Sairasin nú Romú bantá kan baré íkan mai van akhokho van en mino. ³⁹Akhokho van uren baya yaimin banta kayo ano karavusi namumpin oriven mo sirun noe siren Porin nú Sairasin nú do aviren barufá morun kaúden mai varu me ampiren orino van míkanan tianten mino. ⁴⁰Karavusi namun ma me ampiren Ridian amápin oren mo monó afá aváeyan ákona uantan baya siamíden békan mai varu me ampiren oren mino.

Porin Nú Sairasin Nú Ma Tesaroniká Barufá Baré Ein Baya Ino

17 Porin nú Sairasin nú ma Amfiporisí baru vá Aporoniá baru vápin ma onóben maen Tesaroniká barurá oríkan mai varurá mana Yutan kayoi monó átaru namun baren mino. ²Bákan Pori ve avúavá baren monó átaru namumpin ódiven kanú manaú Sabati yamú Tiyarafenui vompon dóki fintena vaya vanasi vá tiren iniyaren mino. ³Máan tiyáken maen Tiyarafenu ano ma aní ukhein banta ma uman baren púaren ma furin pinté orun mantanten ne ma vompon dóki ano sikhá ein mai Yisasi ino. Béin mi Tiyarafenu ano aní ukhein bantan báká beni vayan tian dáko iyá uno sen beni ana vaya siamen mino. ⁴Máa síkan iniren manáa Yutan kéká bá kokhon ná Kiriki kéká ma Tiyarafenu van periyain kayo vá inká manáa ánon nanin kayo vá ano Pori ma siamein baya van mumunan iyáken békan ánain dakhafen mino.

⁵Máan tiyaimpin manáa Yutan kayo ano ará uman daantáden Porin nú Sairasin nú arintin purino van átaru varurá ma aau vanta kéká ma vain má kokhon nanin banta vá iyanuádaren mai kayo arapinfen mino. Máan tíkan Yasonin ne sin banta amá ona mo varákuren Porin nú Sairasin nú o aviré banasi vaintá merano van mo yosen mino. ⁶Dosíkan míkanan ída vaimpin bádiyáken Yasonin má manáa mumunan afá aváeyan má do yarifen baru ánon banta kayo avorá mo khaúden oovaren temí, “Ma vanta kayo anon minó akhempá nóken aau maman dáko iyain bákan taréa ma varufin e van mino. ⁷Máan tiyan mi Yasoni anon betin avían be amápin kain báken mai kéká ano Sisani vaya yurafúden ena Yisasin ne

sin banta van kin ban mino sen banasi siamiyaren mino.”⁸ Maa síkan mai varu fintena nanin banta vá ánon banta kayo vá ano ma mai vaya iniren amino iyáken kokhon ineine en mino.⁹ Mai vaya iníden ánon banta kayo ano síkan Yasonin má mai ma fáken erein kéká bá ano kó miyaní uran betin ampiantan oren mino.

Porin Nú Banabasin Nú Ma Beriá Barufá Baré Ein Baya Ino

¹⁰ O vákan ma inuraní iyain má monó afá aváeyan mano Porin nú Sairasin nú tiantan Beriá barufá onóben Yutan kayoi monó átaru namun ma vaipá oren mino.¹¹ Beriá barurá ma vain Yutan kayo ano Tesaronaiká barurá ma vain Yutan kayoi avúavá esantakhen pasen Porin nú Sairasin nú ano ma siamein baya kayo iníden amusin iyáken Tiyarafenui vompon dóki fintena ena ena yamú dankáden maen daíden mai ma siyain baya furá tiyan nafino van oniyaren mino.¹² Ódaren Yutan kéká pintena kokhon ná nanin banta vá manáa aví ma vain Kiriki nanin kayo vá kokhon Kiriki vanta vá ano mumunan en mino.

¹³ Mumunan iyákan Pori ano Tiyarafenui vaya ma Beriá barurá banasi siamiyain baya Tesaronaiká baru ráke Yutan kayo ano iníden oren mai varurá o vanasi iyanuádaren arápiní íkan betin máden intanen asuse en mino.¹⁴ Máan tiyaimpin monó afá aváeyan mano Porin tiantan un non akhempá aravuvíkan Sairasin nú Timotin nú Beriá barurá para varen mino.¹⁵ Manáa mumunan banta kayo ano Porin aviren morun Atení barurá afa uren orun baránen édiyákan Sairasin nú Timotin nusá tiamesin ainen téi varunará erino sen Pori mai vanta kayo siamen mino.

Porin Nú Banabasin Nú Ma Atensí Barurá Baré Ein Baya Ino

¹⁶ Pori ma Atensí barurá Sairasin nú Timotin nú ave ukhen ma onákan maen kampun ayarafenu kayoi aman manon minó akhempá bákan ódaren ará namuen mino.¹⁷ Máan tukhan Pori ano Yutan kékái monó átaru namumpin oriven Yutan kayo vá ena anan nanin banta vá ano ma Tiyarafenu van péden bentá monó tiyain kéká bá mai vaya sian puntariyan inká ena ena yamú átaru varurá oriven mairá ma o átaru ein nanin banta vá baya siyan iyaren mino.¹⁸ Máan tiyákan manáa Epikuri-ani vá Sitoiki vái ineine ma yakhafiyain afova vanta kayo ano Porin má ákonaen baya fóké asive asive iyákan manáa ano semí, “Ma ma vaya uvaren noin banta ano náí yaná bayá teno vara fino.” Maa sen ina íkan manáa ano siyáken, “Ena varu fáke ayarafenu kayoi vayan tiyanteno mino.” Para va ino Pori ano Yisasin kama vaya vá púkaren ma evaránen orun mantakheí pákena vaya kayon tian dáko uan amiyan mino.¹⁹ Maa siren béin do aviren kó inin kayo van ma Ariopakhusi e siyain kéká baintá mo khaúden inaemí, “Éi ma auyen baya ma vanasifin tian dáko uan amiyaona kaná beni ana sian amá esirá inétifante rafuno.”²⁰ Éi ma siyaona vaya ma inétifekun maen auyen avúavákái siyan ná mai van mi éi mai vaya ana sian amá esí inétifano van muno.”²¹ Atensí nanin banta vá ena fáke kéká ma mai varufin e vain kayo vá ano ída mana yorarí inton ena ena yamú auyen baya vá ineine vá ma yáko iyain mai vaya kayo ana siren daídiyan iniyaren mino.²² Máan tiyan maen Areopakusí kéká aúbaná Pori orun mantaven máa semí, “Atensí banta kayo oe, séi onékuya siretí ankan ákona

e ara ara avúavá póké monosí iya ono.
²³ Para vara seyo, séi ma eúkiyá tireti ma monosí uantiyaona yanasinta ma avóbé é oniyaré maé mana íkun uan amin oná-maná ma kará nará urantá ma onékun maen *Ída Afová Ukhé Tiferuna Ayarafenu* ina ino seya vompon uvantaré enái mai ma ída afová ukhe ma monosí uantiyá eona mai saréa siretin tian amá uan amenté uno.

²⁴h^cMa vara vá mai aúpin ma vain danasinta ma uvantein Tiyarafenu mai inaru vá bara vaí Bafan mi váken ída varará banta ano ma uvantein monó namun kayofin báé iyan mino. ²⁵iMáan tukhen béi ída mana yana san o afasí ukhantí teti varará banta ano véin ayaó tifantéuno. Para vara seyo, veyantái minó danasinta vá aunan má banasi amé iyan mino. ²⁶Ma varafin banasi víkakhen bano van béi mana vanta finté uaren ara ara nanin banta yákó uadaren betin ma avían kain nain damú bá baru vá puntáden aní urú en mino. ²⁷jTiyarafenu ma mai avúavasí ein mai vanasi ano véin nan dosen oriyan o oman dákó ino siren máanten mifo véi ída setin me ampiren nentá ban mino. ²⁸Para vara seyo, véin mái manafin báké baré aruvé iyá tifékun mai van mi siretí ankani afova vanta kayo ano síkharé ikái vetin anavasin mi setí ankan bá tiféuno. ²⁹kMáan tukháí Tiyarafenu anavasin ma vá tiferuna ano ída vá Tiyarafenu van kori siriva onámaná an dakhen ne será barará banta ano ma ayan póké uvaman kain danáká inin onan kaó tifano. ³⁰Pefá banasi ano mai avúava sinta ída afová ukhen bariyan maen Tiyarafenu ano ifá uantiyaren mifo saréa minó akhempá ma vain nanin banta ano ará baerano van béi ákonaen baya siamiyan mino.

³¹lPara vara seyo, véi ma maná damú puntákein avuávápó bara yaimino van ma aní uran baré ein banta mai minó nanin banta ano ódaren pura ino sino van mai vanta ano ma fúkaréin purin pinte véin orun avían mantakhen mino.”

³²Máa siran purin nanin banta ma orun mantan baya ma sian dákó iyain nan manáa kéká ano inian kaumpan uren kakhirun ariyan mifo manáa ano semí, “Éi mai vaya evaráne sesí inétifano van muno.” ³³Máa siran kó inin banta kéká Pori me ampiren oren mino. ³⁴Pori ma siamein bayará manáa nanin banta ano véin dakhafen mumunan en mino. Mai ma mumunan ein kékápin mana Ariopakhusi fintena vanta Dionisasi-
 asin má inká ena Damarisin ne sin nanin má manáa nanin banta vái varen mino.

Pori Ma Koriní Barufá O Varé Ein Baya Ino

18 Máan turen mai oyampáké Pori Atensí baru me ampiren Koriní barufá oren mino. ²mKoriní barurá oriven mai rákena mana Yutan banta Ákuiran ne sin má ofóken mino. Béi maen Pontasí bara fákena vanta váken ída ayá damú orikhan be aná Prisiran ne sin nanin má Itarí bara me ampiren erikharen mino. Para va ino, Yutan kéká ma Romú barufin baré ein Sisa Kraudiasi ano minó do siantan orera iyákan mai finté erikhá íkan Pori vékan onano van oren mino. ³nOren o onákan kao au fóké davaráe namun uvaran ábasu vákan Pori yere mai yoran afová ukharen be ábasu vá o váken mai yanasinta uvariyaen mino. ⁴Máan tiyáken ena ena Sabati yamú Yutan kayoi monó átaru namun oriven maen Yisasini kama vaya iniren

^h17:24 1Ki 8:27; Apo 7:48 ⁱ17:25 Íbo 50:12 ^j17:27 Íbo 145:18; Yer 23:23

^k17:29 Ais 40:18-20; 44:10-17; Apo 19:26 ^l17:31 Íbo 96:13

^m18:2 Rom 16:3 ⁿ18:3 Apo 20:34

mumunan ino van Yutan kayo vá Kiriki kayo vá ákonaen tútúpiyaren mino.

⁵ÓMáan tiyaré íkan Sairasin nú Timotin nú ma Masedoniá bara fáké eravíkan maen Pori fura sen monó bayafin o aní uven Tiyarafenu ano ma aní ukhein banta Yisasin ban mino sen Yutan kéká tiamen mino. ⁶PMáa sen tian miyákan maen Yutan kéká ano véin namuroí iyaimpin mai avúava san Pori vetí ankan aníen bei aúí daná kákena kayó do fupá tian karúdiyáken temí, “Tare ráké ena anan bantá kayofin mi monó baya mo siamenté umpo siretí ankan ma o aiyora-nonai mai siretin nina yana ifo mai uman ída séi varanté uno.”

⁷Máa siren mai monó átaru namun me ampíren ena anan banta ano ma Tiyarafenu á má ádé baré íkan mai namun oren mino. ⁸O vákan monó átaru namuntá ma ánoní ukhein Karispusin ne sin banta vá bei kéká bá ano Bafantá mumunan íkan Koriní baru ráké kokhon nanin banta vá ano mai veya iníden mumunan uren monó non peren mino.

⁹Máan tiyákan mana inuran Bafan mano Porin auu vaéden tiamemí, “Ída vá perano. Mai ma siyaona veya ída vá pákiyákeya kasae vá banasi siameno. ¹⁰QPara vara seyo, ma varufin tenti vanasi kokhon bain pasé téi en má túpá ukhékun éin ída uman aminten mino.” ¹¹Máa sirákan Pori mai varurá eitini viyontá báken Tiyarafenui veya siamiyan afova amiyaen mino.

¹²Máan tiyá íkan Karion ne sin banta ma Akaiá barafá kamanini uvin maen manáa Yutan kéká ano manafin o átaru uven Porin namuroí uantáden do aviren kópín mo khaen mino. ¹³Mo khauren máa semí, “Ma vanta ano setisi man baya ma yurafurin avúavái vanasi

aní iyáken afova amiyan mi enará ukhein avúavápó Tiyarafenu á monosí iyan mino.”

¹⁴Máa síkan Pori vei veya seno van iyain má Kario ano máa sen Yutan kayo siamemí, “Yutan kayo oe, sireti ma onesin ma sító auu fi kákan auu fi ma mantaré inain banta ma avire khópin me kaesí maéi siretíi veya inenté uno. ¹⁵Máan tukhen mifo siretíi veya ma inéku mae siretíi man baya vá aví bá baya va san mi inaeona séi mai yanasinta ída yaimonté umpo sireti yantasá mai veya funtarano.” ¹⁶Máa siren betí ankan kó baru fintena yo sianten mino. ¹⁷Máan turákan banasi ano Yutan kayoi monó átaru namuntá ma ánoní ukhein banta Sostenesin kó baru rákena fákaren ankamiyákan maen Kario oman kaumpan en mino.

Prisiran Nú Akuiran Nú Bá Inká Aporosin Máí Vaya Ino

¹⁸rMáan turan Pori manáa yamú Koriní barurá baren mairá monó afá aváeyan me susu siantáden Siriá barafá orono van aravíkan Ákuira ná Pirisiran ná ábasu ano véin bákuren oriyaren Senkriá barurá orun báken inaimpá sipi varen orinten pefá Tiyarafenu vá tian damuádáká einíen ánon do khaen mino. ¹⁹Máan turen mai ráke sipi varen Efesásí barurá oriven Prisiran nú Akuiran nú ábasu mairá me afa uren Yutan kayoi monó átaru namun oriven betí ankan má bayaién mino. ²⁰Bayai urákan betin má manáa ayáká bano van inain Pori ifá en mino. ²¹Ifá uren orinton iyáken betí ankan máa sen tiamemí, “Tiyarafenu ma anunu intí ovaráne erenté uno,” siren sipifin kumamen Efesásí me ampíren oren mino. ²²Mai sipi ano ma Sisariá barurá mo khuádan maen mai

^o18:5 Apo 17:14-15 ^p18:6 Apo 13:46, 51; 20:26

^q18:10 Yos 1:9; Ais 41:10 ^r18:18 Nam 6:18; Apo 21:24

ráké Pori Yerusaremí barufá ódiven mun mumunan nanin banta oniyáken bayan mino siren mai oyampáké Antiokí barufá evaránen araven mino.

²³Mánáa yamú ma Antiokí barurá orun baren maen mai ráké mai varu me ampiren Karesiá bara vá Frikhiá bara vápín eúkiyan Yisasintá ma mumunan iyain nanin banta aya iyan ákona uanten mino.

Aporosi Ne Sin Banta Ano Ma Efesasi Barufá Ma Yisasini Kama Vaya Sein Baya Ino

²⁴Máan tiyákan Areksandriá baru fáké Aporosin ne sin mana Yutan banta ano Tiyarafenui vompon pintena vaya moéken afova mantein bákan Efesasi barurá eren mino. ²⁵Eren mifo Aporosi maen Bafani aa afová ukhen pasen moéken amusin iyáken Yisasin pákena vanasi siamiyáken Yonini monó non peran manan afová ukharen mino. ²⁶Máan tukhen monó átaru namun oriven ída feranton ákonaen baya siyaré íkan Prisirán nú Akuirán nú ábasu ano veni vaya iniren béin do aviren békan amá moren Tiyarafenui aa fákena manáa aya íkan moékentá afová en mino.

²⁷Máan turen Efesasi baru me ampiren Akaiá barafá orono van muno sen Aporosi siyaiimpin monó afá aváeyan mano véin ákona uantáden Akaiá barafá ma vain eyo iyampon kayo ano véin kama ino siren mana vompon uvamádan mamaren oren mino. O váken maen Tiyarafenui avábápó ma Yisasintá mumunan iyain kéká kama ayairí iyaren mino. ²⁸^sMáan tiyáken maen Yutan kéká bá ákonaen bayafó asive asive iyáken banasi aúbaná monó dóki fintena vayafó tian amá iyáken Tiyarafenu ano ma aní ukhein bantan Yisasi van ne sen mino.

Pori Ma Efesasi Barufá Baré Ein Baya Ino

19^tAporosi ma Koriní barurá o vákan maen Pori anuyompin bain baru kayo fimpá eúkiyan banasi onen oren Efesasi barurá oriven mai ráke manáa eyo iyampon kayo o yosen mino. ²^uYosiren mai kéká máa sen inaemí, “Mumunan ma eona yamú Kantá Aunan bare rafono,” síkan mai kéká ano evaránen temí, “Ída ino. Kantá Aunan ban mino sé ída afová ukhá tiféuno.” ³Máa síkan Pori evaránen inaemí, “Mai intéa monó non ná tireti varera fono,” síkan betí evaránen temí, “Yoni ma aní ukhein monó non ma feran mino.” ⁴^vMáa síkan Pori semí, “Pefá ma Yoni monó non péantiyá ein maen mai vanasi ano ma ará baédan mi féantiyaren mino. Máan tiyáken ínaimpá ma sen toyampá erin nain bantarasá mumunan ono ma sikhá ein mai Yisasin nan mi sikharen mino. ⁵Máa sen tiamin iniren mai kéká ano Bafan Yisasin avíká monó non peren mino. ⁶^wMonó non pédákan Pori ano vetin ánontá ayan kaíkan Kantá Aunan mano vetimpin e víkavíkan ara ara vaya vá sakhánampa vaya vá ten oreraen mino. ⁷Máan ma ein mai siyan míkan mifo sirantan kan orun kádan (12) banta kayo ino.

⁸Máan turen Pori kanú manaú biyontá mairá báken maen Yutan kayoi monó átaru namumpin ódiven Tiyarafenui Yafisin aú pintena vaya ákonaen tiamiyaren mino. ⁹Máa sen tian miyákan manáa kéká ano mai vayará ída mumunan inton banasi aúbaná mai ma Yisasintá mumunan in Aa Ma Yakhafin Kéká ankayan tiyaiimpin Pori me ifá uren eyo iyampon kayo iyan uaren Tairanusini afova amin namun o váken ena ena

^s18:28 Apo 9:22 ^t19:1 1Ko 3:6 ^u19:2 Apo 8:16 ^v19:4 Mat 3:11

^w19:6 Apo 8:17; 10:44, 46

yamú mai kéká bá bayá iyaren mino. ¹⁰Kan orana aúpin máa sen oriyan bákan Yutan kéká bá Kiriki kéká bá ma Esiá barafin ma vá ein mai minó kayo ano Bafani vaya inen mino.

**Skivan Anin Kayo Ano Ma
Namu Aunan Kayo Yo
Siantano Van Ein Baya Ino**

¹¹^xMáan tiyákan Porin ayan táké uaren Tiyarafenu ano manáa enará ukhein danasinta afoká iyaren mino. ¹²^yMáan tiyan maen asínun arumin davaráe ano fi inká aurá ma yampan davaráe ano fi ma Porin au aruvúdein baren mo aí nanin banta aurá tosain maen mai kéká aí kípiyan inká namu aunan ma varé ein mano me ampiren ori-yaren mino.

¹³Máan tiyákan manáa Yutan banta kayo ano eúkiyan Yisasin aviká namu aunan ma vanasifin bain ma yo siantano van maen máa siyaren mino, “Mai ma Pori ano ma vanasifin tian dákó iyain banta Yisasin aviká mai kéká me amp-eno.” ¹⁴Yutan kayoi monó ánon banta ma Skiva ne sen aví tiyain banta anin kéká ma yan manápá ifo afápá kan un kádan kayo ma vain mano namu aunan do siantiyaren mino. ¹⁵Máan ten oriyá íkan maná damú mai namu aunan mano vetíi vaya iníden evaránen temí, “Mai ma siyaona Yisasin má Porin má onté umpo siretí intéa kékasa fono.” ¹⁶Máa siren mai ma namu aunan aúpin bain banta ano mai kéká ankáden ká aruren aúí daná dákarán nare ana kéká ano avápá me onen má me ampiren karan oren mino.

¹⁷^zMáan turákan Efesasí barufin ma Yutan nanin banta vá Kiriki nanin banta

vá ma vain kayo ano mai vaya iníden kákantá akhokho van iyáken Bafan Yisasin aví daníen mino. ¹⁸Mai vaya iníden ma mumunan ein kéká ano vanasi avorá e unen eriven betíi ume sian dákó en mino. ¹⁹Máan tiyákan manáa kéká ano ma ara ara uvátakhan baya ma uvantá ein bompon kayo varen me khaúden banasi avorá ira saman kau-ren mino. Mai vompon kayoi miyan ma yankafein mai fifti tauseni (50,000) drakma[‡] e sin moní ma sirivafó uvantein mino. ²⁰Máan tíkan mai aa fáké Bafani vaya ano ákona vá mo kákaníen minó akhempá oreraen mino.

²¹^aMai yanasinta ma yákó uvíkan maen Pori Yerusaremí orono van iyáken temí, “Masedoniá bara vá Akaiá bara vápín oriaré ma Yerusaremí onóbé maé mai ráké Romú barufá deren oronté uno.” ²²Máa siren béin ayaen doran bantá kan Timotin nú Erastasin nú tiantan ben an uanten Masedoniá barafá oriyákan béi Esiá barafá manáa ayáká baren mino.

**Efesasí Barurá Ma Kákan Aruve
Asive In Afoká Ein Baya Ino**

²³^bMaí damú ana Aa Ma Yakhafin Kéka san Efesasí barufin kákan uman dákó en mino. ²⁴Esé arái in uman maen mana Demitriasin ne sin banta váken béi ano kokhon doran banta avían kain anasi ayarafenu Atemisini sitó namun sirivafó uvádan kákan monípó miyaní iyaren mino. ²⁵Máan tiyain bákan mai vanta ano vanasi vá bei yoran banta kayo vá inká ena mai yanasinta ma uvariyain kéká bá iyanuan kaúden máa semí, “Banta kayo oe, afovasá ono mai yorantái setí kákan moní bariyá tiféuno.

[‡]19:19 *Drakma* e ma siyain mai *mana aintain moní* an dakhein bákan mai moní ano mana vayan ma yorarí uren miyan bariyá ein má manaf ukhen mino.

^x19:11 Apo 14:3 ^y19:12 Apo 5:15 ^z19:17 Apo 5:11

^a19:21 Apo 23:11; Rom 1:13 ^b19:23 2Ko 1:8

²⁶Máan tiyá tiferuna ifo inká tireti iniyáke onen nan Pori ano Efesásí baru rákena nanin banta vá Esiá bara fin ma vain nanin banta vá ákona vayafó aviren tavi aasái oren mino. Béi siyáken ayampó ma uvaran mai ída ayarafenu ino siyan mino. ²⁷Máan ma siyain baya ano setí ma uvádé moní bariyá tiferuna yanái aa iyariyákan banasi ano Atemisintá ma monosí iyá ein má bení monó namun máí maman paen danasí inten mino. Máan tiyáken Esiá barafin má minó akhempá ma ven aví daní iyá ein maman paen danasí intin beni kákan bí asuse inten mino.”

²⁸Máa síkan mai vaya iníden mai nanin banta ano aranan uaren avádóden oovaren temí, “Efesásí nanin bantai kákan ayarafenu Atemisi ino.” ²⁹^cMáa síkan Efesásí barurá ma vain nanin banta ano aran má bádiyan o átaru uven Khaiusin nú Aristakusin nú do yarifen átaru varurá oren mino. Mai ma yarifen orein bantá kan mai Masedoniákéi váken Pori má monó doraríen noren mino. ³⁰Máan tíkan banasi avorá Pori orivé baya seno van íkan eyo iyampon kayo ano ída vá orono siren ayópá en mino. ³¹Máan tiyákan Esiá barafá ma Kamanin dorampin ma Porini arona kayo varé ein mano yere véin nan ída vá banasi avórá átaru varurá orino siren baya yan baren eren mino.

³²Mai ma átaru varurá o iyein nanin bantai ineine asuse ukhan, minó ano ara ara vaya esen orera iyáken náí anavará e átaru ukhé tiferafuno siren kokhon mano amino en mino. ³³Máan tiyákan Yutan kayo ano Areksandan avéken mun banasi avorá kaúdan manáa kéká ano vnan mai ma afoká iyain baya sian dákó ino síkan béi ayan daní uren baya fákano siren beyan nan tian amá ono van en mino. ³⁴Máan tíkan banasi ano afová en

onákan béi Yutan banta vaimpin minó ano oo manafiní uren kankan áau aúpin ovaren oriyan temí, “Efesásí nanin bantai Atemisi anan kákaní ukhen mino.”

³⁵Máa siyákan Efesásí barui vompon uvaran banta ano vanasí van baya fákano síkan mai ma oovariyá ein mo fákaran béi máa semí, “Minó akhempá ma vain nanin banta ano ídá afová ukhan ná kákan Atemisin aman ma inaru fáké un kararen eravin ná Efesásí baru ano mai yanáká bá beni monó namuntá dafíken nafino. ³⁶Máan tukhantin ída mana vanta ano sen mai yaná ída onté uno sinten mifo ída uron ná ámun uare mana yanasí ono. ³⁷Ma vantá kanan mano ída mana yaná monó namun pinta umoyan baren inká ída setisi anasi siyarafenu Atemisin ankayan tikheintá pasavin avire ere ono. ³⁸Demitriasin má bei yoran banta kayo vápin ma uman baya ma vantí mae mai vaya kópin maman kaúdesin ná kó inin banta kéká ano vá mai vaya yaíden ná puntarano. ³⁹Máan tukhen mifo siretimpin ma manáa ena vaya vá ma vantí mae mai vaya vare mo átaru varurá tiresin banasi ano vá mai vaya yaimino. ⁴⁰Máan tiyanti afovasá ono. Tare ma variyá tiferuna avúaváká kasaen kó tisintaren ukhen mino. Ída mana ana vaintá paran e átaru iyá tiferuna ída kanai é tian amá ótiféuno.” ⁴¹Máa siren mai nanin banta siantan oreraen mino.

Pori Ma Masedoniá Barafá Bá Kiriki Varafá Bá Ma Orein Baya Ino

20 Mai ma ákonará asiviyá ein baya kayo ma mo kípavin maen Pori ano eyo iyampon kayo aran e átaru uvíkan betin ákona uantan baya siamíden mai oyampáké betí ankan me susu siantáden Masedoniá barafá oren mino. ²Masedoniá barafin oriyan monó nanin

banta ará ákona uantan baya e siamen oriyaren Kiriki varafin o unaven ³mairá kanú manaú biyontá o varen mai ráké Siriá barafá sipi varé orono van ein mifo ifá uren evaránen Masedoniá barafá oren mino. Mai fara va ino. Yutan banta kayo ano véin aruan purono van aúpá baya sian damuádiyain baya iníden mai van mi erikhá ein aintá evaránen oren mino. ⁴Oríkan ma véin má or-ein kéká maen Beriá banta Pirusin anin Sopaten má Tesaroná káke vantá kan Aristakusin nú Sékundusin nú bá Debí baru ráke vantá kan Khaiusin má Timotin má inká Esiá bara fákena vantá kan Tikikasin nú Trofimusun nú bá ino. ⁵Mai vanta kayo ano aníen oren Troasí barurá o sive ukharen mino. ⁶O sive ukhá Firipaí barurá bákun Yisi Ída Van Bereti Ma Nan Omá Damú esantaví mai ráké sipifin e varé oriyákun dan manápá damú oriví mairá Troasí barurá betí ankan baintá orivé mai varurá mana uikirá baré uno. ⁷Baré esé ará in damú bereti kisi kisi é nano van monó nánin banta vá mana namun o átaru ukhékun Pori veya sen oriyen evaránen inuran aúbanasí en mino. Mai fara va ino. Ena ákuráí véi orinten pasin máan ten mino. ⁸Tari stori namumpin minó ano iyukhé tifékun maifin kokhon oon uruádan ki-yaren mino. ⁹Kiyákan mai namuni unduará Yutikusin ne sin pumara ano kumanten aun tókó iyan bakan Pori veya sen oriyen baré in aunká baaren eraven barará ankamin banasi ano orun aviá-daran maen mai fumara ano fúkaren mino. ¹⁰Máan tukhan Pori araven mai fumara orun dafayoriyan máa semí, “Ída fúken ayun para van mifo i vá akhokho van ono.” ¹¹Máa siren evaránen mai namumpin ódiven bereti un máden kisiren naren ayáká baya sen oriyen mo kakhen ákurasí íkan me onen oren

mino. ¹²Orivíkan mumunan nanin banta ano mai fumara ayun para van ará kusin má amusin iyan aviren mo mápin kaen mino.

Pori Ma Efesasíke Monó Doran Banta Kayo Ará Ákona Uantein Baya Ino

¹³Pori ano Asosí baru ráke nan sipi e varanté uno siren barará oriyaimpin tetí ankan béin an uanté sipi varé Asosí barurá béin o ave é tiféuno. ¹⁴O ave ukhá ékun Pori onóbí ben má do aviré sipifin Mitiríní barufá oré tiféuno. ¹⁵Ená damú Mitiríní baru ráke sipi varé Kiosí musó akhempá onóbé ená damú Samosí barurá onobé inká ená damú Miretusí barurá o uné tiféuno. ¹⁶O unavékun Pori Esiá barafin manáa ayáká ída vano van Efesasí baru esantano van en mino. Para va ino. Aaí ma intí maé Kantá Aunan ma erein damú ída erikhantí ainé Yerusaremí barufá orono van en mino.

¹⁷^dMáa siren Miretusí barurá báken Efesasí baru rákena Yisasini mumunan nanin bantai ánon banta kayo ano e onano van Pori veya siádan oren mino. ¹⁸^eE siádan orin mai kéká ano eriyain má béi máa sen betin tiamemí, “Esé ará é ma Esiá barafin ereruna ráké tiren má anan bá oriyá bákuya senti sivútvá pefáí afová ukha rono. ¹⁹Máan tukhein nan téi ifí pinté teyan maman bararasí uré Bafani yorarí iyákun maen manáa Yutan kéká ano séin tiruan purono siren moéken uman timiyaren mino. ²⁰Tiretí ankan afová ukhe rono, siretin ayaen ma ará ákona uantan monó baya kayo ída mana áé umpo minó nanin banta avorá mai afova amiyá maé inká tiretin amápin e feré kuvé iyá mai yorarí é uno. ²¹Máan tiyá maé Yutan kayo vá Kiriki kayo vá tiamiyáké ará baéde Tiyarafenu vaípa orive vá tetisi Bafan Yisasintá mumunan ono sé tiamikhé uno.

²²“Máan tukhein nan mi saréa Kantá Aunani anunu vákuré Yerusaremí barufá oriyá umpo intéa yanasá ten timaniná afoká inten nafi mai séi ída afová ukhé uno. ²³†Máan tukhen mifo minó barurá ma orerunafin mai Kantá Aunan mano sisimiyáken kákan uman má karavusi vá ano anan éin ave ukhen mino. ²⁴§Máa siyan mifo ída se suu van iniyáké Bafan Yisasi ano ma simikhein doran dóan kípano van mi inikhé uno. Mai yoran mi Tiyarafenu ano ma vei sarisarifó ma evaránen tetin tivíkein mai kama vayan tian dákó onté uno.

²⁵“Máan tukhein nan mi séi afová iyákéi mai ma varu vaintá eúkiyá ma Tiyarafenui Yafisin aú pintena vaya kayo ma siamiyá eruna nanin banta finté mana ano ída evaráne séin tonan nono. ²⁶Máan tukhein nan mi siretin pinté ma mana ano o afeyoresí maé téi ída kanaí é mai uman barantéi saréa siretin avorá tian amá e uno. ²⁷Para vara seyo, Tiyarafenu ano ma siretin nan tiamesin ná afová en inino ma sikhá ein baya máa fefái minó tiamikhé uno. ²⁸hMáan tukhé umpo siretihan kama e yaffiare vá inká tiretin nan ma yafisino siren ma Kantá Aunan mano ma amikhein nanin banta kayo rasá kama e yafiseno. Tiyarafenu ano ma ve anini narefó ma miyaní uan beinaí ukhein mumunan nanin bantarásá sipisipirá ma yafisiyain kéká an de vá dafiseno. ²⁹iTéi ma orivékun maen manáa nanin banta ano afá iyan ma sirempin ereiní uven sipisipi kayo ma máden asuse ono van einí intéi téi afová ukhé uno. ³⁰Máan tiyantín tiretí aúbanáké manáa ano e mantaven pura yaná do vaéden kampun bayafó Yisasin bákurin nanin bantai inin máden asuse uren iyanen orinten mino. ³¹jMáan tin-

ten mifo vá daffan ákona iyáke vá ovare me ineno. Kanú manaú orana aúpin mi ída sivíkan te sínu finté inúpa ákurá man o amé eriyaré uno.

³²Mai van mi saréa siretí ankan avián Tiyarafenui yafisimpin má béi ma sarisari ukhein baya aúpin má ma kaeruna mai ano vá tiretí ankaní ará ákona uantiyá inti vá bení kantasí ukhein nanin banta ano ma o varan nain avábasá barano. ³³kTéi ma siretin má báké maé ída mana nanin bantai siriva fi kori fi inka kama aúf danasa rafi sinunu iyá uno. ³⁴lMáan tiyá umpo sireti afovasá ono, te siyampói minó danasinta uvádé teyan tiya iyá inká tési mana yoran kéká ayaé iyá uno. ³⁵Ákona yorarí uren ma ona i van kéká ma ayain inka siretin aní é uno. Bafan Yisasi ano ve oo fenté máan mi sikharen mino, ‘Ena vanta ma amin kékápin mi moéken avábá ban mifo ena finte ma varan kékápin ída avábá ban mino’ ma sikharé ein baya vá ovare me ineno.”

³⁶Mai vaya kayo sian kíparen Pori aron durafúden mai nanin banta kayo vá amúken mino. ³⁷Máan turan mai kayo ano Porin o yafayóden ifí diyáken amónen mino. ³⁸Mai ma vetí ankan ma moéken arunaná barein maen mai ma Pori sen téin tiyafen ída evaráne sonan nono ma sein baya van mino. Máan turen béin aviren sipifin mo afaen mino.

Pori Má Bei Mana Yoran Kéká Bá Ano Ma Yerusaremí Orein Baya Ino

21 Efesásí baru ráke monó doran banta kayo ída me amperen iyá maé ayan amantiyá tusu siantádé sipifin un kumamé puntádé Kosí musóká oré uno. O varé ená damú Rodesí musóká onóbé mai ráké Patará barurá

^f20:23 Apo 9:16; 21:11 [§]20:24 Apo 21:13; 2Ti 4:7

^h20:28 1Ti 4:16; 1Pi 5:2-4 ⁱ20:29 Mat 7:15; Yon 10:12 ^j20:31 1Te 2:11

^k20:33 1Ko 9:11-12 ^l20:34 Apo 18:3; 1Te 2:9

oré tiféuno. ²Patará barurá o varé iné tifékun mana sipi ano Fonisiá barafá orinton iyane siyaimpin mai sipifin kumamé oré tiféuno. ³Oriyá baré Saiparasí musó ádé ayan ópá oriaré Siriá barafin Taiyá barurá o unavé tifékun mai varu rákena yanasinta ma varen oriyá ein mo khaen mino. ⁴^mMáan tiyaimpin tetí ankan Taiyá barurá eravuvé mumunan nanin banta van e yosé oriyá o odaré betin má dan manápá ifo afápá kan un kádan damú bákun Kantá Aunan pintena mumunan nanin banta ano manáa inin mamaren Porin ayópá en ída vá Yerusaremí barufá orono sen mino. ⁵Máa sirá bákun tetisi orin damusí iyain má mai varu me ampíré oré tiféuno. Minó mai varuráké ma Yisasin bákuriyain banta kayo vá betí aná akhafana vá ano Taiyá baru me ampíren tetin tiviren un non akhempá morúdá eyu ampantá tiron durafúdé timúké tiféuno. ⁶Timúkuré ínaimpáké tiyan timantin maran uré tetiyan sipifin odékun maen betí evaránen barufá oren mino.

**Akhabusi Ne Sin Mana Sakhanampa
Vanta Ano Ma Porin Amaan
Baya Siamein Baya Ino**

⁷Máan turé Taiyá baru me ampíré sipi varé oriyá baré Toremaisí barurá o unavé tifé mai rákena mumunan nanin banta o ódaré, bayan mino siré tifé betí ankan má mana vayan baré tiféuno. ⁸ⁿBaré ena ákurá Toremaisí baru me ampíré oriyá baré Sisariá barurá o unavé maé monó baya ma sian banasi amin banta Firipin amá o varé tiféuno. Mai ma vaya varen orin kéká ma yunan ayaino van dan manápá ifo afápá kan un kádan banta kéká ma aní uran baimpin ben máí van mino. ⁹Béi kamí kamí ar-

inta kéká dan bákun banta ída varanton para van maen sakhanampa vaya kayo siyaren mino.

¹⁰^oMáan tiyáká mai varurá manáa yamú ovátifékun Yutan bara fáké mana sakhanampa vanta Akhavirusin ne sin mano eren mino. ¹¹^pMai vanta ano seti varunará eriven Porini amú anan e máden be ayan arantantá damuren máa semí, “Kantá Aunan mano sisimiyáken, ‘Yerusaremí ma vain Yutan kayo ano ma avúavá anan baremí ma amú anan afóen ayan arantantá damuren ena anan banta kayo ayampin kainten mino.

¹²Máa siká mai vaya ma iniré tifé mai varu ráke nanin banta vá Porin nan ída Yerusaremí barufá odino van ayópá é tiféuno. ¹³^qAyopá é tifékun béi evaránen temí, “Pará tirté ankan ifiso vaso iyayá ten tikuna simiya rafono. Bafan Yisasin aviká ma sen tiyan tirantantá ma yamin nan mana va útakhe raumpo Yerusaremí ma sen tiruan purin masan deren útakhé uno.” ¹⁴Máa siká ínané ayópá é tifékun Pori yo yurú en oronté uno siyaimpin mairá mo ífá uré máa sé tiféuno, “Bafani anunu áesin ná dákó ino.”

¹⁵Máa siré mai oyampáké tetisina yanasinta utaré Yerusaremí barufá odé tiféuno. ¹⁶Ódékun Sisariá baru ráké manáa eyo iyampon kayo ano siviren ódein mano mana feyan eyo iyampon Saiparasíke vanta Nasonin amápin mun kaí baré tiféuno.

**Pori Má Bei Mana Yoran Kéká Bá Ma
Yerusaremí Ódein Baya Ino**

¹⁷Yerusaremí barurá ma e uné odé tifékun maen monó tifá tiváeyan mano amusin iyáken tiviren mino. ¹⁸Máan turá baré ená damú Yemisin onano siré oré tifékun Pori setin má oríkan minó monó doran banta kayo vá e átaru en

^m21:4 Apo 20:23 ⁿ21:8 Apo 6:5; 8:40 ^o21:10 Apo 11:28

^p21:11 Apo 20:23; 21:33 ^q21:13 Apo 20:24

mino. ¹⁹rE átaru uvíkan Pori mai kéká ará kusin baya siren mairá Tiyarafenu ano ma veni monó doran pinté uaren ma ena anan nanin bantafin ma ara ara yorari ukhá ein baya siamen mino.

Pori Ma Yerusaremí Kákan Monó Namumpin Ma Tiyarafenu Avorá Avusesein Avúavasí Ein Baya Ino

²⁰sSiamíkan mai ánon banta kayo ano Porini vava iníðaren Tiyarafenu aví daní iyáken temí, “Tifá tiváe oe, éi afovasá ono. Kokhon tausení Yutan kayo ano inka Yisasintá mumunan iyáken, mai kayo ano Mosesini man baya ánain ákonaen dakhafiyán mino. ²¹Máan tiyan mifo manáa kayo ano eni yoran baya mai nanin banta me siamiyáken maen éin nan ena anan nanin banta aúban ma vain Yutan kéká san ída vá Mosesini man baya yakhafiyáke inká tiretí ankan akhafana ída vá au khaiya ída vá peyante avúavá bákuroño siyan ne sen tiamikhen mino. ²²Éin nan pura sen e vane sen ininten mifo intesá ó tifante rafuno. ²³Máan tukhein nan mi seti ma siamenuna aa vá dakhafono. Tetin pinté kamí kamí banta kayo ano Tiyarafenu vá ákona vava sian damukhen mino. ²⁴Mai van mi éi mai kéká bá o asotú uve vá mai vanta kéká avíareya Tiyarafenu avorá ma avusese in avúavasí iya vá éi ano íkun uan amin danasinta miyaní uresin ná mai kayo ano ánon do minó barukhano. Máan tesin ná minó nanin banta ano oniyáken ná mai ma éin au finté iyain baya vará ída fura vava ino sen iniyáken ná en nan man baya ánain dakhafiyán mino sen inino. ²⁵uMáan tukháí ena anan nanin banta finté ma mumunan iyain kéká pefái vompon uva-man amiyáké máa sé tiféuno. Ída vá

kampun ayarafenun ma íkun uan amiran nain danasinta neya vá, nare fa yiyain tafúna ída neya vá amempin ma anan kuren arukhan nain tafúna ída neya vá inká ída vá ena ana safi ena avafun nafi inká aasá non nanin arinta va safi vá banasíí ono sikhé tiféuno.

²⁶vMáa sirákan ena ákurá Pori ano mai ma seinfen mai vanta kayo avíaren Ayarafenu avorá ma avusesein avúavasí uren maen kákan monó namumpin óðiven mai avúavá ma kípan nain damú ma mana mana vanta ano íkun uan amin nain baya vanasi siameno van óden mino.

Esiá Bara Fáke Yutan Kayo Ano Ma Porin Aruan Purono Van Pákein Baya Ino

²⁷Dan manápá ifo afápá kan un kádan damú ma avusese in avúavá ma variyá ein mai áde anantá mo akhen diyákan maen Esiá bara fáké ma erikhá ein Yutan kéká ano kákan monó namun pinte Porin óðaren banasi arápiní íkan aranan uaren Porin páken mino. ²⁸Páken oriyáken máa sen oovaren mí, “Isareri vanta kayo oe, erive setin tiya ono. Ma vanta ano minó akhempá nóken Mosesini man baya vá tetinti vanasi vá inká ma kákan monó namun má ankayan tiyaren mino. Máa siyaren inká Kiriki vanta kéká aviren ma kákan monó namumpin dun peran maen mai avúavá ano kantasí ukhá ein baru man painíen mino. ²⁹wPara va máa sen na ino. Pefá Pori ano Efesasí baru rákena vanta Tarofimusin má Yerusaremí nókan Yutan kayo ano ontaren pasin mi mai vantán aviren kákan monó namun da-fufin óden mino sen iniren mi máan ten mino.

^r21:19 Apo 15:12 ^s21:20 Apo 15:1, 5 ^t21:23 Nam 6:1-20; Apo 18:18

^u21:25 Apo 15:29 ^v21:26 1Ko 9:20 ^w21:29 Apo 20:4

Romú Piripo Kayo Ano Ma Porin Ayaein Baya Ino

³⁰ Porin ma fákan baya Yerusaremí nanin banta ano iniren o éke e éke en kákan monó namuni varurá ana e iyuaeren béin do yarifen barufá araviyain má ainen monó dafu ona kayo munken oreraen mino. ³¹ Munkuren béin aruan purono siráken minó Yerusaremí nanin banta ano aran má o éken átaru iyain baya Romú bara fákena aruvin banta kayorá ma yafikein banta ano inen mino. ³² Iniren mai yafisin banta ano esé ana manáa aruvin banta kayoi yafisin banta vá aruvin banta kéká bá aviaeren mai ma sisuvo siyain barurá araviyain má mai nanin banta ano vetin onen Porin ma ankamiyá ein mo ifá en mino.

³³ Máan tiyain má mai yafisin banta ano Porin o fákaren aruvin banta kéká tikan kankan seni anampó béin damuran mairá Yutan kayorá inaemí, “Ma iyen bantá báken náí ausá ukha fono.”

³⁴ Máa sen ina íkan manáa kéká ano oovarariyan ena veya e sen orin maen inká ena kéká ano ena veya e sen orin tisuvofin ída kanaíen betí veya inen mai ma afoká iyain afová oren iyaimpin mai yafisin banta ano aruvin banta kayo síkan Porin aviren aruvin banta kayo amápin óden mino. ³⁵ Porin ma aviren oriaren ma yetará ódiyain má mai nanin banta ano véin aruan purono siren aran má aasá iyariyaimpin aruvin banta kéká ano véin avian daní uren daiyó en óden mino. ³⁶ Oriyákan minó nanin banta ano yakhafen oyampá oriyáken, “Béin aruan purono,” sen oovaren mino.

Pori Ma Aramaiki Vaya Finté Banasi Vaya Siamein Baya Ino

³⁷ Máa siyákan mai aruvin banta kayo ano Porin aviren mápin ódono van

ádé oriyain má béi máa sen dafisin banta inaemí, “Kaná áesi manáa veya éin tiamente rafuno,” síkan. Mai yafisin banta ano Porin inaein temí, “Éi Kiriki veya afová ukhe fono. ³⁸ yÉi nan Isipíke vanta mairá ma kamanin namuroí uan-táden ma manáa yamú orivin kamí kamí tauseni (4000) aruvin banta kayo yo iya-nen kámá barafá ovaré ein banta inon té iniyá uno.

³⁹ Máa sen ina íkan Pori evaránen temí, “Ída ifo séi maé Sirisiá barafá Tasusí ma aví bain baru ráke Yutan mumpo áesi banasi veya siameno.”

⁴⁰ Máa síkan dafisin banta ano kana ino síkan má ona ódintá un mantaven ayan daní íkan banasi ma sisuvo siyá ein mo fúkekhavin Aramaiki veya finté máa sen tiamen mino.

22 Pori semí, “Tifá tiváeyan má tifóeyan ma soe, inimesirá téin ma kó tisintiyaona fákena sian amá ono.” ² Máa siren Yutan kayoi veya Aramaiki finté ma síkan maen banasi mai veya iníden tisuvo ma siyá ein mo fúkekhavin Pori máa sen mino,

³ z“Téi maé mana Yutan bantan bákun te sinóe ano Sirisiá barafin ma vain baru Tasusí séin kaen mifo ma kákan barurái e inoré uno. E inoriyá maé Kamarierin aránaó bákun teti sináuyani minó man baya sisimídá pasé mai ma siretin ma Tiyarafenun aví ma yaní iyaonaf anan éi Tiyarafenun aví dani iyá uno. ⁴ aMáan tiyá mai Aa Ma Yakhafin Kéká uman amé aruan puriyáké manáa kéká anasi vá banta vá páké mo karavusifin kaiyá uno. ⁵ Mai avúavá ma variyá eruna mai monó ánon banta kayoi ánon banta vá Kanisori kayo vá ano afová ukhen mino. Betí ankan mana vompon uvamáda betí kéká ma Damaskasí barurá bain morun amiré mai ma Yisasintá ma mumunan iyá ein kéká karavusi orun páké

Yerusaremí mun kaúdé uman ameno van aravé uno.

⁶Araviyarékun bayan aúbaná Damaskasí baru ádé ma orékun maen inaru fáké manadá kákan panu sin mano séin iyááden mino. ⁷Máan tíká barará ma eravé tinkamiyá mana veya inékun téin tisimemí, ‘Sori oe, Sori oe, fará tein uman timé oriyá ba fono.’

⁸“Máa síká mairá béin inaéú, ‘Bafan noe, éi iye fono,’ sékun béi máa semí, ‘Téi Nasaretíke vanta Yisasin bákuya éi uman time oriya va ono.’ ⁹Mai ma sen má orikhá ein kéká ano inaru fákena kakhnan manan onen mifo mai ma séin baya sisimiyain banta avaya ída inen mino.

¹⁰“Máa síká mairá béin inaéú, ‘Bafan noe, séi náinasisá onte rafuno,’ sékun Bafan mano máa semí, ‘Mantaveya Damaskasí barufin ódesin maen mairái éi ma yoranona minó baya siaminten mino.’ ¹¹Máa sirá mai ma fanu sein mano suu yufúkuadá ída onanunái ékun mai ma se má orikhá ein kayo ano siyanoren Damaskasí barufin óden mino.

¹²“Mai varurá Ananiasin ne sin banta maen Tiyarafenui man baya ánain dakhafiyáken ben aránaó bákan Yutan kayo ano véin amo siyain banta varen e sonano van eren mino. ¹³Eren beí ano senti ádé e mantaven temí, ‘Te sífá tiváe Sori oe, auu mábe onano,’ síkan esé anan tuu kama iká tuu mábé béin mun oné uno.

¹⁴“Onékun béi máa semí, ‘Setinti sinaúyani Ayarafenu ano vei anunu afová ure yakhafiya inká Puntákein Banta oniyáke veni veya ineno van mi éin aní uren aviren mino. ¹⁵Éi anon mai ma oniyáke veni veya ineona vanasifin tian pura yanasí iyákeya véin pákena sian dákó inono. ¹⁶Máan tukhen mifo

náinasará ave ukhé ba fono. Mantaveya Yisasin avíká mumunan ureya monó non pédesin eni ume sesé ino.’

Ena Anan Nanin Bantafin Kama Vaya Mo Siamino Van Ma Yisasi Ano Porin Tiantein Baya Ino

¹⁷“Máa sirá Yerusaremí ovarané e vá maé kákan monó namun un báké timúkiyá ékun tuu vaédá ¹⁸^bBafan onékun téin tisimen temí, ‘Aineya Yerusaremí baru me ampire sare ana orono. Para vara seyo, séin pákena veya ma sesin banasi ano ída uron mi ininten mino.’

¹⁹^c“Máa síká evarané béin tiaméú, ‘Bafan noe, mai nanin banta ano afová ukhá monó átaru namun pimpá oriviyá éintá ma mumunan iyá ein kéká pákaré aruriyá karavusifin kaiyá uno. ²⁰^dMáan tiyáké éintá ma mumunan ukhá ein banta Stivenin ma arein damú téi anon mai ma ariyá ein kayoi ayá auí danáká dafíké, kana ino siyáku mi véin aruan purein mino.

²¹^e“Máa sirékun Bafan mano semí, ‘Orono, éin tian tékuya nenta suron ena anan nanin bantafin orin nono.’

Pori Ma Romú Bara Fákena Vantá Uno Sein Baya Ino

²²Banasi ano vempáké púkekhakhen inikhan Pori mai veya ma sian kíparen maen mairá banasi ano bádiyáken oovararen temí, “Ída ásin máan banta kéká ma varará pa vanten mifo véin aresin purino.

²³⁻²⁴Banasi ano ma máa sen o varyiáken danténa iyon afuin daváden dan beravé iyáken kayó páken karúdarú iyan, maen Porin aviren mápin ódino van aruvin banta kayoi ayafa ano sianten mino. Máa síkan aruvin kéká

^b22:18 Apo 9:29-30 ^c22:19 Apo 8:3; 26:9-11 ^d22:20 Apo 8:1

^e22:21 Apo 9:15

ano aviren odiyan máa sen tiamemí, “Yafiyosí ureya Porin ankádeya ina ono. Paraé tiren ná banasi ano aran má oovararen ma avúavá bariyan nafino se veni ana ina ono. ²⁵fMáa síkan Porin dafiyó ankamono van béin barará maman aseriyákan mairá mana antareti (100) aruvin banta kayoi yafisin banta ano mantakháin mai vantará Pori inaeen temí, “Kanaisá eyá Romú bara fákena vanta maen ída veni aui ana afová inton dafiyó ankaminte fono.

²⁶Máa síkan mana antareti (100) aruvin banta kayoi yafisin banta ano Pori ma sein baya iníden oren bei ayafa vanta mo siamemí, “Ma Romú bara fákena vantana ban mifo intesá inte fono,” sen inaeen mino.

²⁷Ayafa vanta ano mai vaya iníden oren mo Porin inaemí, “Éi fura seyá Romú bara fákena vanta fono,” síkan Pori eyo sen evaránen béin tiamen mino.

²⁸Máa síkan mai ayafa vanta ano semí, “Romú bara fákena vantaí onovan kákan monípói miyaní ukhé uno,” síkan Pori semí, “Máan te ompo se sinóe sífoe maen Romú bara fákena nanin bantan baren téin kaí bá uno.”

²⁹gMáa síkan mai vaya inídaren mai ma véin dafiyó ankáden inaono siyá ein kéká ano me ifáen orera iyákan ayafa vanta ano Porin ma Romú bara fáke vanta vákan ma seni anampó ayan arantantá damukhá ein nan ovaren me inen akhokho van en mino.

Kanisori Kayo Avorá Porin Aviren Mo Khaein Baya Ino

³⁰Máan turen ená damú ayafa vanta ano fará Yutan kéká ano Porin namuroí uantiyan nafino van afová ono siren seni anan utúantáden tikan monó ánon banta kayoi ánon kéká bá Kanisori kayo vá e

átaru uvin betí ankan avorá Porin aviren mo khaen mino.

23 Porin aviren mo Kanisori kayo avorá mo kaúdan béi mai kayo aaufen mo oniyáken temí, “Tifá tiváeyan noe, Tiyarafenu ano ma simein doran inka séi yóan kíparékun téimpin ída mana uman bá tirá kusin mái vá uno. ²hMáa siyain má monó ánon banta kékái ánon banta Ananiasí ano Porin ádé ma mantakhá ein kayo van béin oo ankamino van tiamen mino. ³iMáa síkan Pori evaránen béin tiamemí, “Tiyarafenu ano éin mi ankaminten mino. Para vara seyo, éin aúpin mana namu yafu ma fúta ukhan banasi ano kama ukhen mino siren onano van efanten kava ma yan me fereneiní ukha ono. Man baya fóké téin kó tisintano sireya eyantá mai man baya yurafuriyáke séin tinkamino van tian miya ono.

⁴Máa síkan mai ma Porin ádé mantakhá ein kayo ano máa sen béin tiamemí, “Éi ídá perantó Tiyarafenui ánon banta kékái ánon banta ankayan baya siré ayave amiya fono.”

⁵Máa síkan Pori evaránen temí, “Tifá tiváeyan noe, Tiyarafenui vompompin man baya ano siyáken, ‘Ída vá banasirá ma yafíkein banta oyampá baya seno,’” *Eks 22:28*

sikhen mifo véin nan ída monó anon banta kékái ánon banta ino se afováin mi ma vaya sé uno.

⁶jMáa siren Pori ma afová íkan maifin manáa Farasisi kayo vá manáa Sadyusi kayo vá bakan maen mai Kanisori kayo auufen kakháben oovararen temí, “Tifá tivaéyan noe, mai séi mana Farasisi vanta anin mi váké téi yere Farasisi vantana bá uno. Tareá ma séi kó avorá e mantakheruna mai fúkaren orun mantantá ma mumunan iyaruna anará ino.”

^f22:25 Apo 16:37 ^g22:29 Apo 16:38

ⁱ23:3 Mat 23:27 ^j23:6 Apo 26:5

^h23:2 Yon 18:22-23

⁷Máa síkan Farasisi kayo vá Sadyusi kayo vá ano vayafó aruve asive iyain má mai átarufin ma o iyukhá ein nanin banta ano veraran aúban daimen mino. ⁸^kSadyusi kayo ano mai fúkaren ma evaránen orun mantan má enisori kayo vá ara ara aunan kayo va san ída mumunan in maen inká Farasisi kayo ano mai máa yana san mumunan in iyain mi van mino.

⁹Máa siren kákantá baya sen tisuvo siyaimpin manáa Farasisi kayo finté ma man baya afová ukhá ein kéká ano orun mantaven ákonará baya siyáken temí, “Mana aunan mano fi inká mana enisori ano fi véin má bayái ukhan ten mifo setí onékun ída mana uman ma vantafin ban mino.” ¹⁰Máa siyákan aruvin banta kayoi ayafa vanta ano onan kákantá asive asive en Porin darifen more mere iyaimpin, máan tiyaren Porini ayan arantan davisen orinae siaren bei aruvin banta kayo van aine vetí ankan ayan pintena orun avire aruvin banta kékái mápin mun kaoro sen tiamen mino. ¹¹^lMáa síkan aviren múdan baré in ena inuran Bafan mano ven ádé e mantaven máa sen tiamemí, “Yerusalemí barurá ma senti vaya sian dákó eonái eya Romú barufin dere mai vaya mo sian dákó in-ompo mantaan ákona vá ono.

**Yutan Kéká Ano Ma Porin
Aruan Puroño Van Baya Sian
Damuádein Baya Ino**

¹²Máan turan ena ákurá manáa Yutan kéká ano o átaru uven baya sian damuádiyan temí, “Ída mana yunan má non má nakhé Porin ma aruan púdei yunan ná tifanté uno,” siren baya sian damuáden mino. ¹³Mai vaya ma sian damuádein mai foti (40) vanta esantakhein kayo ano ino. ¹⁴Máan turen mai kayo ano monó ánon banta kayoi ánon

banta kéká bá monó doran banta kayo vá baípá oriven mo máa semí, “Tetí ída mana yunan nakhé tifé ma Porin aruan púde maé mai anan dunan nanté uno sé baya sian damuáde tiféuno. ¹⁵^mMáa sé tifé umpo sireti má Kanisori kayo vá ano oreya vá aruvin banta kayoi ayafa mo mákaseya máa ná teno, ‘Porin avireya setin tivorá mo khaesin ná béi ma manáa vaya sikhein ana sian amá inti sá iné tifano sesin ma mará aviren ereno van ma eriyantisá aayana fákena vá arékun purino.”

¹⁶Máan ma siyain baya ma Porini nointa ano iniren maen aruvin banta kayo ma vain namun oriven Porin mai vaya mun tiamen mino.

¹⁷Pori mai vaya iniren mana antareti aruvin banta kayoi yafisin banta aran eríkan máa sen tiamemí, “Ma fumara avire mo ayafa vanta aní ono véimpin manáa vaya vain ayafa siaminten mino. ¹⁸Máa síkan mai ayafa vanta ano mai fumara aviren mo ayafa vanta avorá kaúden temí, “Karavusi vanta Pori ano séin tará onóbékun tiyáken ma fumara vá avire ayafa vaintá orono. Béimpin manáa vaya vain éin nan tiaminten mino siren tisintá aviré eré uno.”

¹⁹Máa síkan ayafa vanta ano mai fumara ayan noren akhempá mo khaúden inaemí, “Nái vayá bákayá tisimeno van ere fono.”

²⁰Máa sen ina íkan mai fumara ano máa semí, “Manáa Yutan kéká ano siyáken inuran ákurá éintá inaé tifékun Porin aviren mo Kanisori kayo avorá kaintin béi ma sikhá ein baya evaránen tian amá inten ne siyan mino. ²¹Máa sinten mifo ída vá betí ankan avaya ineno. Para vara seyo, foti (40) vanta esantakhein kayo anon aúmantaren Porin ma avire oresin maen aruan puroño van ákona vaya sian damuádan bakan dunan

má non má auraren báken minó dana utaan kauren éi ma eyo sinona van ave ukhen mino.

²²Máa sirákan mai ayafa vanta ano mai fumura siantan oriyákan máa sen tiamemí, “Ída uron ná ma ma sisimeóna vava ena vanta mo siameno.”

**Romui Aruvin Banta Kéká
Ano Ma Porin Aviren Sisariá
Barafá Orein Baya Ino**

²³Máan turen kankanan bei aruvin banta kayoi ánon banta aran eríkan máa sen tiamemí, “Oreya kan antareti (200) aruvin banta kayo vá osintá ma kumamen aruviyain seventi (70) vanta kayo vá inká uve isanafó ma aruviyain banta kayo kan antareti (200) vá o avídeya utaare vá tare inuran dan manápá ifo afápá kamí kamí áau rasá Sisariá barufá orono.” ²⁴Máan tiya vá manáa osin amanina sá kumanin avové uresin ná Pori mairá kumaminti vá dafían ákona uve avire mo kákan kamani Feriksin ayampin ka ono.

²⁵Máa siren ayafa vanta ano máa sen bompon uvaren mí,

²⁶“Séi Kraudias Risiasi ano

kákan kamanin Feriksin mi ma vompon uvan man amé uno. Bayan mino.

²⁷ⁿMa vanta maen Yutan nanin banta ano fákaren aruan purono van iyái téi inékun béi Romú bara fákana vanta vaimpin tesi aruvin banta kayo avíaré betin me intanuré aviré tiféuno. ²⁸^oNái vará Yutan kéká ano ven arono van iyan nafino van afová ono siré béin aviré morun betí ankani Kanisori átarufin kaé uno. ²⁹Aviré morun kaúde inékun, Yutan kéká ano vetíi man bayará anan esiaren mo vava siyá inékun maen béi ída mana furin

aau fi inká karavusií oren aau fi mantaren mino. ³⁰^pMáan turé inékun aúpáké béin aruan purono van baya yamuan kaiyá í iniré mai van mi ainé mai vanta siantékun e vaonafá aviren orinten mino. Orivintíi mai ma véin kó tiantan kayo van baya utaaren véi vaípasá oresin tiretí ankani khó inino sé tiamé uno.

³¹Mai vompon uvaman amin maren maen ayafa vanta ano ma seiníen mai aruvin banta kayo ano mai inuran manan Porin do aviren Antipatirisí barurá oren mino. ³²Moren ena ákurá osintá ma kumamen aruvin banta kayo ana ákan Porin do aviren Sisariá barufá oríkan mai ma varará orin aruvin banta kayo ano ovaránen Yerusaremí eren mino. ³³Erivíkan osintá ma kumamen aruvin banta kayo ano Sisariá barurá o unaven bompon baren mo kamanin banta amiyáken Porin má dere mai vanta ayampin kaen mino. ³⁴Máan turan kamanin banta ano mai vompon dankáden mairá Porin inaeen mí, “Éi inte vara fákesá fono,” síkan téi Sirisiá bara fáké uno sen tiamen mino. ³⁵Máa síkan iníðaren kamanin banta ano semí, “Éin ma kó tiantan kayo ma erintí maéi eni khó inenté uno,” siren bei yoran banta kayo siantan Porin aviren mo Kin Erotin amá karavusiíen mino.

Feriksi Ma Porini Kó Inein Baya Ino

24 Dan manápá damú orivíkan monó ánon banta kékái ánon banta Ananiasin má manáa monó doran banta kayo vá mana kamanini man baya ma afová ukhein banta Teturusin ne siyain má avíaren Sisariá barurá dorun nóben Porin ma kó tiantano siyain baya seno van kamani vaintá oren mino. ²Kamanini kó barufin o

ⁿ23:27 Apo 21:30-33; 22:25-27 ^o23:28 Apo 22:30

^p23:30 Apo 23:16-23; 24:1-9

khumamin mairá Porin aviren me khaúdan Teturusi ano Feriksin máa sen tiamemí, “Feriksi oe, éi ma kamaniní eona ráké ma eriyá tiferuna afokhampin ída mana aruvin nafi asivin nafi váká eni kama ineinerá bá tifékun ída varé ein danasintan dákó iyan mino. ³Kákan banta Feriksi oe, mai yana san éin moékentá timusin uantiyáké éin kákan bí amiyá tiféuno. ⁴Mai van mi éin ayáká pákaré ban nampó kaná ará timeya ma ma setí ankan tenuna vaya vá inisintante fono.

⁵Tetí ankan onékun ma vanta maen aau yákó in bantan báken minó barafá nóken Yutan kéká arápiní íkan aruve asive iyan mino. Máan tiyáken béi maen ena auyen monó ma Nasarini kayo e ma siyain kékái ayafa vantán ban mino. ⁶⁻⁸“Máan tiyáken béi setinti kákan monó namun ankayan tiren máden painí ono van iyá tiféi mai ánarái véin páké tiféuno. Tetisi man baya ánain mi yakhafé béin kó tiantanté uno. Aruvin banta kékái ayafa vanta Risiasi ano setin tiyan pintena véin e aviren oren mino. Béin ma ina ureyai ven ma kó tiantiyaruna ana eyantá afová inono.”

⁹Máa siyain má Yutan kéká ano yere asotú uven ákonaen tiyáken mai fura vayan tiyan mino.

Pori Ma Feriksin Avorá Kó Tein Baya Ino

¹⁰Máa sirákan kamani ano Porin mo oniyáken auufó éi seno síkan mairá máa semí, “Kákan banta Feriksi oe, ayá oranarái ma nanin banta aúban bákeya vaya yaimin bantái ukhen ná afová ukhé mai anarái simusin iyá teyantá tesi vaya siamenté uno. ¹¹Éi aine afová inono mai ída kokhon damú orikhen mifo tiyan míkan mifo sirantan kan orun

kádan (12) damú máan orikhen mino. Téi ma Yerusaremí kákan monó namun kayofin monó teno van óderuna ¹²ma ma sen kó tisin tiyain kéká maen ída mana ano soná mana vanta vá kákan monó namumpin tisiviyáké inká monó átaru namumpin má Yerusaremí barurá bá ída aau yákó ino siré mana vanta arápiní ukhé uno. ¹³Máan tukhan mi ída kanafen ma kéká ano mai ma séin kó tisintiyá ein baya kayoi ana man amá inten mino. ¹⁴Pura yaná ma vain mai máan mi ukhen mino. Mai ma auyen monó ino ma veti siyain Aa Ma Yakhafin Kéká ma yakhafiyaruna mai sinafu siráo ma yakhafiyá ein Tiyarafenui yakhafiyáké Mosesini man baya vá Sakhanampa vanta kayo ma vompompin uvantein máa vái minói yakhafiyá uno. ¹⁵“Mumunan kéká bá ída mumunan kayo vá ma fe fúkaré ein ma Tiyarafenu ano avorantin orun mantan nain nan ma veti ave ukhein máan manan é mumunan iyá ave ukhé uno. ¹⁶Máan tukhein nan mi Tiyarafenun avora safi inká banasi avora safi mana uman téimpin banae siré tirá ákona é iyá uno.

¹⁷“Manáa oranará ena akhempá noré maé ovaráné Yerusaremí ma sesi kéká ona ída van ma vain mai kayo amusin amiyáké inká Tiyarafenun tusu siantan danasinta vá baré eré uno. ¹⁸“Téi sinafu siraóni avúavá baréi avusese uvé monó dafufin o vákun mi sonen mifo maifin ída vanasi váken tisuvo siyan mino. ¹⁹Máan tukhen mifo Esiá bara fáké ma erikhein Yutan banta kayo ma varé inten maen mai kéká ano kasaen en avorá e mantaven téin ma kó tisintano ma siyain baya kayo tian amá inten mino. ²⁰Máan tukhantin Kanisori kéká avorá ma un manteruna mai senti aau ma ma kayo

⁹24:5 Apo 17:6 ¹24:6-8 Apo 21:28-30
¹24:18 Apo 21:17-28

⁹24:15 Yon 5:28-29

ano afová ukhan ten mai vaya sian amá ino. ²¹uMana vaya máai Kanisori kayo avorá oovararé té uno mai vaya maen purin nanin banta furin pinté orun mantanten mino ma serunarái saréa en avorá kó tisintiyán mino.”

²²vPori ma mai vaya siran maen Feriksi Aa Ma Yakhafin Kéká afová ukhen pasen mairá kó mo fákaren kó nanin banta siantan orera iyákan máa semí, “Ayafa vanta Risiasi ma erantíi siretí kó daimonté uno.” ²³Máa siran orera iyákan mana antareti (100) aruvin banta kayoi ayafa vanta máa sen tiamemí, “Porintá daffike vá áesin beyan kasaen nontin ná bei kéká ano me aya iyan be ma sin nain danasinta amino.

²⁴Máa siren baréin manáa yamú orivíkan Feriksin má be aná Durusira mai Yutan nanin bain bákan eriven békanan Porin avire ereno síkan aviren meran Tiyarafenu ano ma aní ukhein banta Yisasintá ma mumunan iyain baya siamen mino. ²⁵Tiyarafenui funtákein avúavá baya vá inká banta ano ma ve avúaváká dafisin má inká Tiyarafenu ano ma ínaimpá kó tiantan nain baya vá Pori siyákan Feriksi iníden akhokho van iyáken temí, “Inka ifo orikháesi ená damú afokhan ma vantí ovaráné araanté uno.” ²⁶Máa siren tiantan oriyákan maen Feriksi ano mana yana san ave ukharen mino. Feriksi ma inikhá ein mai Porin nan moní miyaní urantíi siantékun orinten mino siren kokhon damú araren ben má bayai iyaren mino.

²⁷Máan ten oriyan bákan kanká-nan orana esantavin Posius Festusi ano Feriksinu varu varen kamaninién mino. Kamaniní ukhan mifo Feriksi ano Yutan kayo amusin ameno van Porin karavusifin áin baren mino.

Festasi Ma Kó Inein Baya Ino

25 Festasi ma kamanini ánon bantaí uvin kanú manaú damú orivin maen Sisariá baru me ampiren Yudiá barafin oriven Yerusaremí óden mino. ²wÓdíkan monó ánon banta kayoi ánon banta kéká bá Yutan kayoi kákan banta kayo vá ano véi vaintá oriven Porin ma kó tiantan baya funtaren mino. ³xBetí ankan manáa vanta kayo siamintin aasá aúmantaren Porin arintin purino van ákonaen béin tiamen temí, “Éi setí ankan tiyaeyavá mai vanta siantesin Yerusaremí erino.” ⁴Máa síkan Festasi betí ankan evaránen tiamiyáken, “Porin Sisariái karavusií ukhein tanáa yamúí váké evaráné Sisariá oronté uno,” sen tiamen mino. ⁵“Oronté umpo áesin tiretí ankan pinté manáa ánon banta kayo ano séi má aravuyen mai vanta ano ma aau mantantiya kó tiantano.”

⁶Máa siren Festasi ma yan manápá ifo afápá kanú manaú un kádan damu safi áa tiyan míkan damu safi vetí ankan má baren Sisariá araven orun baren ená damú daimin namumpin béi o kumamen Porin aviren béi vaintá erino van baya yan oren mino. ⁷yOríkan maen Porin do aviren merákan Yerusaremí ma me ampiren aravein Yutan kayo ano véin ádé e mantaven kokhon ná kó baya kayo fóké béin kó tianten mifo veni ana ída maman dáko en mino.

⁸Máan tiyaimpin Pori evaránen betíi vayará máa sen tiamemí, “Téi ída mana Yutan kayoi man baya fi kákan monó namun ma safi inká Sisan ma safi ída mana namu avúava uantáké uno.”

⁹Máa síkan Yutan kayo amusin ameno van Festasi ano Porin inaen temí, “Téin nan ma uman kayo Yerusaremí mo yaimino vará anunu iya fono.”

^u24:21 Apo 23:6

^v24:22 Apo 23:26

^w25:2 Apo 24:1

^x25:3 Apo 23:15

^y25:7 Apo 24:5-6

¹⁰Máa síkan Pori evaránen temí, “Ma ma saréa séi mantakherúna namun mai Sisani yaimin namun mi vain ma namun manan téin daiminten mino. Yutan kayoi mana aauí téi ída ukhékuaya éi fefái afová ukha ono. ¹¹Mana aau ano furino ma sikharé intí kasaé puronté umpo mai ma Yutan kayo ano séin daimiyain bayai ana ma ída fura vantin mana vanta ano ída kanafen betí ankan ayampin téin kainten mifo Sisan mano senti kó daimino van muno.”

¹²Máa síkan Festasin ma inin amiyain banta kayo vá bayái uaren ínaimpáké Porin tiamemí, “Sisa ano éin daimino van anunu iya ompo véi vaipasá orono.”

Festasi Má Kin Akhripa Má Ma Manafin Baya Sein Baya Ino

¹³Manáa yamú orivin Kin Akhripa má be ayofi Benisi má ano Festasin onano van Sisariá araven mino. ¹⁴zBékanan kokon damú Sisariá baimpin Festasi ano Porini vaya kin tiamemí, “Pefá ma Feriksi ano yumukatifin pákaádein bantan taréa yere fara van mino. ¹⁵Yerusaremí ma séi un bákun monó ánon banta kayoi ánon banta kéká bá monó doran banta kayo vá ano véin ákonaen kó tian tiyáken aruan purono van inae mino.

¹⁶“Máa síká téi evarané betí ankan tiamiyáké tetí Romúke kéká ano ída fara vanta aré iyá umpo aau ma vain banta afokhan amékun béi ma kó tiantiyain banta kayo avorá be ma varein danasinta sian amá é iyan mino. ¹⁷Téi ma Sisariá ovaráné ererúna yamú mai vanta kayo vá dere ano séin má eriká ída áékun betí ankan ave en mifo ená damú anan daimin namumpin kumamé mai vanta aviren erino van baya yékun oren mino. ¹⁸Mai ma véin kó tian tiyain banta kayo ano ma mantaven Porin kó tian tiyá maé

mana kákan aau mantan nain nan iné umpo ída ino. ¹⁹Ída ifo vetí ankani ará uman ma sian dáko ein mai Yutan kayoi monó tin avúavá baya vá inká Yisasin ne sin banta ma fúkein nan ma Pori fa van ne ma siyá ein nan mino. ²⁰Mai vayai ana yoseno van ékun mifo senti ineine ano ída kanaí iyaimpin Yerusaremí orintí bení kó daimono van béin inae uno. ²¹Inaékun Pori siyáken, ‘Dumukatifin baréékun ínaimpáké Sisa ano séin daiminten mino,’ síká téi siyáké, ‘Dumukatifin baré intirá béini aa yosiré tiantékun Sisa vaipá orino,’ sé uno.”

²²Máa síkan Akhripa mai vaya iniren Festasin tiamemí, “Teyantá mai vantai vaya ineno van muno,” síkan Festasi semí, “Inuran mi inin nono.”

Kin Akhripan Avorá Ma Pori O Mantein Baya Ino

²³Máa sikharéin ená damú Akhripan nú Benisin nú ano kini kama ona uren békanan oríkan aruvin banta kayoi ánon banta kayo vá mai varurákéna kákan banta kayo vá ano átaruin namumpin ódivin Festasi ano síkan Porin aviren eren mino. ²⁴Merákan Festasi semí, “Kin Akhripan má tiretí minó banta kayo vá ano ma setin má baona ano ma vanta vá onano. Minó Yutan anan nanin banta kayo ma Yerusaremí bain kéká bá mará ma vain kéká bá ano ma vanta kó tiantiyáken betí ákonaen oovararen béi ída vanten mifo aresin purino sen mino. ²⁵Máa síká téi inékun béi ma kanafen purin nain aau ída mantaré iká Sisa ano véin daimino van anunu iyaimpin béin tiantékun Romú orino van tian damuádékun ban mino. ²⁶Máan tukhen mifo setisi kin baipá ma veni aau fákena ma uvamadékun orin nain baya ída vaimpin mi veni aau ana vaya inian puntádesí bompompin uvarano van mi

Kin Akhripa má minó nanin banta vá avorá aviré eré uno. ²⁷Téi ma mana karavusi vanta ma siantékun orintí ma véin ma kó tian tiyarunai ana ma ída siamenté mai séi ma iniyaruna mai avúavá ano ída kama inten mino.”

26 Maa siran Kin Akhripa ano Porin tiamemí, “Ei veya seno van afokhan amé uno,” síkan Pori ve ayan daní uren bei veya araíen temí, ²“Kin Akhripa oe, mai ma ei veya seno van muno ma seona van timusin iyá Yutan kayo ano ara veya kayo ma sen nan tiyai pákena saréa en avorá mantakheruna sian amáéku vá ineno. ³Yutan kayoi minó avúavá bá aruven asivein má éi afova suron ukheona vantana baná mai éi ineno van tiamenté umpo vem-páké bake vá tenti veya kama e ineno.

⁴“Téi ma sirará iyampon táké ma sesi vara anará baré ma Yerusaremí barurá o váké intéa sivútivá basá ee sinoní erafu mai minó Yutan kayo ano afova suron ukhen mino. ^{5a}Téi Farasisi vanta ma váké betíi ákona man baya kayo aránaó eriyaré umpo Yutan kayoi monó avúavá bá ída manaí ukhein pasen tenti sivútivá ma siameno sinten maen kasaen tiaminten mino. ^{6b}Mai ma fefá tetinti sináuyan ma Tiyarafenu ano iyáantan baré ein mai yaná mamanan dákó intí onano van mi mumunan iyákun mai van mi saréa séin kó tisintiyán mino. ⁷Mai ma setinti kéká tiyan mikan mifo sirantan kan orun kádan (12) anan banta kéká ma Tiyarafenu ano iyáantan báken mai yaná dákó intí onano van inuran má bayan má Tiyarafenu monó tiantiyaré ein mai mumunan mi iyá uno. Kin noe, mai van mi Yutan kayo ano séin kó tisintiyán mino. ⁸Paraé tiré Tiyarafenu ano ma fefá puká ein nanin banta kayo evaránen avían purin pinte

mantiyain nan tiretin pinté ída mumunan iya rafono.

^{9c}“Pefá téi má dere Nasaretíke vanta Yisasín aviká ma yoriyain doran mádé namu ono van iniré kasaé ara ara avúavá bariyaré eruna ino. ¹⁰Máan tiyáké monó ánon banta kayoi ánon banta kéká ano ma ákona simikhá má Tiyarafenui vanasi fáké mo yumúkatifin dékun baréi máé ten má dere siyan befió urékun mai kéká arin puriyaren mino. Mai avúavái Yerusaremí barurá bariyaré uno. ¹¹Máan tiyáké betin pákaré aau ameno van ena ena yamú betíi monó átaru namun e feré kuvé iyá Tiyarafenu asiren oyan amino van ákonaé tútúpiyaré uno. Máan tiyáké betin pákaré aruré uman ameno van kasaé nentá ma kákan baru kayo vain pimpá dere oriyaré uno.”

¹²“Mai avúavá ma varé noruna fimpá maná damú monó ánon banta kéká ano veya séin tisimíden tisintá Damaskasí barufá ma oriyain aayana oré uno. ¹³Kin noe, mai aayana oriyaré ékun bayan aúbaná inaru fáké áaui fanu esantakhein panu ano séin má ten má ma oriyaré ein kéká bá ekuádá oné uno. ¹⁴Máan tiyain má minó ano varará eravé tinkamiyá inékun Aramaiki veya finté téin tisimemí, ‘Sori oe, Sori oe, fará téin dakháan karudé tiriya fono. Éi ma séin namuroí iyaona mai anon eyan uman baran nono.’

¹⁵“Maa síká, ‘Bafan noe, éi iye fono,’ sé béin inaékun, ‘Téi Yisasín bákuya séin mi yakháan karúde siríya ono sen téin evaránen tisimen mino. ¹⁶Taréa ana éi orun mantano. Téi éin aní uréku senti yoran bantaí uveya séi ma éin aní onuna yoran má mai ma éi séin toneona veya vá banasi siameno van mi éi vaonará dákóé uno. ¹⁷Ei vanasi finte vá ena anan nanin banta finte vá aya urékun éin ída

^a26:5 Fir 3:5-6 ^b26:6 Apo 23:6; 28:20 ^c26:9 Apo 8:3

aren asen inti mae vetí baípa tiantéku orono van muno. ¹⁸dOrive mae yúdufun daná pinte vetin auu yo vaéan kakhantá kaúde inká Ban Anoni ákona ano ma fákaran bain pinte avían Tiyarafenu amiresin betíi ume kayo van tirun noe sintin betíi ume ampíantádantin ná mai ma sentá mumunan uvíkan Tiyarafenu ano sesina ino ma siren aní uran bain nanin bantafin aví bantín ná bano.’

¹⁹“Máan tukháí Kin Akhripa oe, mai ma suu vaédan ma inaru finté dákó iká ma oneruna mai yaná téi ída soyan amenté uno. ²⁰Téi maen Damaskasí barurá ma vain nanin bantafin arái uré Yerusaremí barurá onóbé inká Yudiá barafin eúkuaré ena anan nanin bantafin oriyáké ará baéde vá Tiyarafenu vaípa erive vá mai ma fura se ará baékanona mai siretíi avúavá posá aní ono siré tiamé uno. ²¹Máan ma seruna veya van mi Yutan kayo ano monó dafu fintena séin pákaren tirono van iyan mino. ²²Máan tiyan mifo Tiyarafenu ano séin tiya iyáká eriyaré taréa e mantakhé aví i vain má aví bain nanin bantafin má pefá ma sakhanampa vanta kayo vá Mosesin má tiádan baré ein danasinta van dákó inten mino sé betin tiamiyá umpo mai amaniná ída mo ena veya kayo vá tiyá uno. ²³eMai ma Tiyarafenu ano ma aní ukhein banta ano vá uman o varen púben ná purin kayoi aníen orun mantan banta vá báken bei vanasifin má ena anan nanin bantafin má Tiyarafenui kakkan ná bano sen tiádan baren mino.

²⁴Pori ma siamiyain baya van Festusi vaé tiyáken oovaren temí, “Pori oe, Éi ma moéke afova mante siyaona veya kayo ano éin tavifá do óen uáda oriya ono.”

²⁵Máa síkan Pori evaránen béin tiamemí, “Festusi oe, séi ída óen iyá umpo fura sen beni ana vain baya

kayon tiamiyá uno.” ²⁶Téi ma éin tiamiyaruna veya kayo ída feranton Kin Akhripa avora safi atarenta safi ída mana veya fa savifá esanten mifo minó baya kayo inikhái siamé uno. Para vara seyo, ída mana veya aúpasíe uno. ²⁷Máa siren Pori maen do vaéaren Kin Akhripa inaemí, “Kin Akhripa oe, éi sakhanampa vanta kayoi veya van mumunan iya fono. Téi afová ukhé uno éi mumunan iya ono.

²⁸Máa síkan Kin Akhripa ano Porin inaemí, “Tare ana éi ano séin maman mumunan bantaí onté unó té iniya fono.”

²⁹Máa síkan Pori véin evaránen tiamemí, “Taréa fi ínaimpáke safi séi ma Tiyarafenu vaípa timúkiyaruna eya ana vaompo mai ma séi ma siamiyaruna veya ma iniyain kéká bá ída áinti seni anan kayo fóké damuádanti van nompo Tiyarafenu ano siretin maman téi ma varunaí inten mino.”

³⁰Máa síkan Kin Akhripa má kamanini ánon banta vá Benisi má maifin ma o kumantá ein kéká bá orun manten mino.

³¹Orun manten mai namun me ampiren ma varufá morun bayaíen orera iyáken temí, “Ma vanta maen ída mana furin aau fi karavusíin auu fi manten mino.”

³²Máa sen orera iyákan Kin Akhripa ano Festusin tiamemí, “Ma vanta ano Sisan nan tenti kó inino van muno ída sen baré inti éi kana véin karavusi útuantesin orin nainten mino.”

Pori Ano Ma Mana Sipifin Romú Barufá Orein Baya Ino

27 Tetí ankan nan sipi varé Itarí barafá orino siren baya sian damuá daren mana antareti (100) aruvin banta kayoi ánon banta ayampin Porin má ena karavusi kayo vá kaen mino. Mai vanta Sisani aruvin banta kéká pintena

Yuriasin ne sin banta ino. ^{2f}Tetí ankan mana Adaramitiamú kena sipi ano Esia kayoi non akhempá ma vain baru kayo fimpá orono van iyáká mai sipifin un kumamékun Masedoniai varafá ma vain baru Tesaronikáke vanta Aristarkusi ano setin má manafin un kumamen oren mino.

³Oriaré ená damú Saidoní barurá o unavé tifékun Yuriási ano Porin kama avúavá uanten tiantan be arona kayo o oniyáken beti vaípákena aya varen mino. ⁴Mamaren ma Pori ovaránen sipifin eriví maé teti Saidoní me ampíré oriyá tifékun uva ano ákonaen sipi e avéken eriyaimpin Saiparasí musó akhempá ana oren mino. ⁵Mai ráké Sirisiá bá Pamfiriá báí un non aúbaná oriaré maé Risiai varafá Mairá barurá oré tiféuno. ⁶Aruvin banta kayoi ánon banta ano mai varurá oren o onan Areksandariá baru rákena sipi ano Itarí orono van iyaré íkan tetí ankan e siviren mai sipifin mo khaen mino. ⁷Kaúdá mai sipifin oré tifékun ákona uva iyáken sipi e avékiyaimpin tasoren oriyákan sipifin ma yoran banta kayo ano ákonaen doren oriyán baréí manáa yamú o uné tiféuno. Nidasí baru ádé oré tifékun uva ano ákonaen e sivékiyaimpin do vaéaré Kirití musó oriaré Saramoné bara ádé onóbé mai musó oyampá oré tiféuno. ⁸Oriyá tifékun botifin ma yoran banta kayo ano ákonaen dorákan Kiriti musó kayoi non akhen mana yakhafé oriaré Raseá baru ádé non un mantan ma sipi kayo ano ma Kamaen Avikiyainta se ma siyaintá o uné tiféuno.

⁹Kokhon damú un nompin bempáké oriyákan Yutan kayoi yunan auran damú ma esantavin maen mai oyampáké kákani suron en non karantó íkan mai van Pori emantaaren betí ankan dafisin baya siamemí, ¹⁰“Minó banta kayo ano

vá ineno. Tetí ankan ma oré tifékun maen kákan uman afoká intin kokhon daná o aiyorantéí afová ukhé uno. Ona vá sipi vá ana va aiyoranten naino, seti máí furó tifanté uno.” ¹¹Máa síkan aruvin banta kayoi ánon banta ano ída Porini vaya ininton sipi ma varen nain banta vá sipi afóen máí ineine ánon mana vákuren mino. ¹²Kákan uva ma inaintá ma sipi varen mai non akhempá ma mo khain ída kama ukhein mino siren sipifin ma vain banta kayo ano vaya siaren mai varu me ampíren Finiksí oren o vantin uva kípano van inikharen mino. Kirití musópin ma Finiksí e ma siyaintá mana non un mantan tefá tefá akhen kanan mano áau aravípa auuí ukhan mino.

Kákan Uva Ma Afoká Uaren Békón Unen Erein Baya Ino

¹³Saoti fáké uvaen mifo ída ákona íkan beti ma inein mano kama intíi savaé ainé mai ma serúna nompin oronté uno siren anka orun darifaan kaúden Kirití Musó non akhempá oren mino. ¹⁴Ída ayáká oriyain má mana kákan uva, Noti fáke Uva e ma siyain araién afoká uaren békón unen eren mino. Kirití musó pintéi mai uva ano eren mino. ¹⁵Eriaren sipi me ákonaen avékiyain má sipifin ma yoran banta kayo ano sipi evaránen e vaéko uan mai ma ereípasí uren orono van íkan ída kanaí eimpin ifáin uva ano sipi e avéken oren mino. ¹⁶E avéken orí tifé saoti fákena mana Kauda se sin tító musó ópá orin ma uva sitosí iyain má tetí ankan ainé tító dinki ma sipi oyampá damuran baré ein ída kanaíen o yarifaren iyá ákonaé darifiyá darifaan ádesí é uno. ¹⁷Máan turé tifékun sipifin ma yoran banta kayo ano yinki orun darifaan sipifin kaúden damuan ákona uren anan karúdan sipi aránaópá ar-

avuvin sipirá eúkuren damuan ákonaen mino. Afarika kayoi un nompin Sirtisi e siyaintá manáa eyu yon kayo varé intin mairá sipi o khumanin nae siren sipifin ma yoran banta kayo ano akhokho van uren anka karúdan nompin araven mino. ¹⁸Uva uaren non kákantá karantóen tetin tivékiyaimpin ená damú sipifin ma yoran banta kayo ano arafen manáa ona maman nompin karúden mino. ¹⁹Kanú manaú damusí íkan sipifin ma yoran banta kayo ano sipi fintena yanasinta vetiyantá mamariyan nompin karúden mino. ²⁰Kokhon damú tetí ankan áau vá ofu kayo vá ída onékun kákan uva ano ana setin tivékiyákan mai van teti ma ineruna ano ída kamaé banté tifé umpo minó anon afeyoranté uno siré ineine é tiféuno.

²¹Minó banta ano ayá damú ída yunan nan eriyaimpin Pori vetin aúban mantaven máa semí, “Tiretí ma vanta kayo ano senti vaya inire mai ánain dakhafeya Kirití musó ída me ampireya ere varé esí ída ma uman e yosékun ída minó daná ída o afeyoran nainten mino. ²²Máan inainten mifo saréa siretí ankan tiamé uno. Mantaan ná ákona ono. Para vara seyo, sipi anan afeyoranten mifo siretin pinté ída mana vanta afeyoranten mino. ²³Téi Tiyarafenui vantán báké bentái monó tiyarunan ban mi sare inuran beni enisori ano senti ádé emantaven máa sen mino, ²⁴g“Pori oe, éi ída vá akhokho van eya vá éi Sisan aufasá o mantano, Tiyarafenu ano eni amúkin inen mino. Éin má minó banta ma sipifin baona vá ano ída afeyoran nono. ²⁵Enisori ano máa sikhén mifo ma vanta kayo oe, mantaan ná ákona ono. Téi mumunan iyaruna Tiyarafenu ano ma séin tisimein daná máan béi afoká inten mino. ²⁶hMáan tinten mifo sipi ífá é tifékun orintin ná uva

ano sipi e avéken eyu rasá mo kaintin kuman ino.”

Un Non Mano Ma Sipii Oyampákena Ankaman Barakein Baya Ino

²⁷Fotini (14) inuran kákan Meditèrianí un nompin non daró sipi e iyanká oriyá baré é tifékun inuran aúbaná sipifin doran banta kayo ano avadúan onen temí, “Mana vara ádé eriyá tiféuno.” ²⁸Máa siren non ma avamaran danka kain aravin avamáden onan 40 mita vákan manáa sipi e afánen oríkan mairá evaránen avamaran danka kain aravin avamáan onan 30 mitaíen mino. ²⁹Sipi ma onámaná baintá ma orinten mo varakinten mino siren betí ankan akhokho van uren kamí kamí anka sipi ayompá karúdan aravuvin ainen do kakhano van amúken mino. ³⁰Sipifin doran banta kayo ano sipi me ampiré aupáké karan orono van dinki anan utúden kain eravíkan kampun ten sipi aunasí ma ukheípá anka khaono van muno sen mino. ³¹Máa síkan aruvín banta kayoi ánon banta vá aruvín banta kayo vá Pori siamemí, “Ma vanta kéká ma ída sipifin ma vantí maeya siretí ankan afeyoranono.” ³²Máa siyain má aruvín banta kayo ano mai ma dinkirá ma kukhá ein anan tikaran non mano evaren oren mino.

³³Do yákan áau iniseno van iyákan minó banta ano yunan nano siren Pori máa semí, “Tiretin ará ano ída kamaen kumaniyákaya fotini (14) damú ída yunan nanton arafan mi vare ono. ³⁴Baré enái séi ákonaé tiretin tiamé umpo vá manáa yunan tireti nesin ná mai ano ákona amino. Tiretin ánon do fintena mana ída afeyoranten mino.” ³⁵Maa siren mairá béi vereti máden betin avorá Tiyarafenu susu siantáden kisiren aráíen nen mino. ³⁶Niyáken Pori ano vetin

ákona uantádan betí ankan dunan nen mino. ³⁷Kan antareti ifo seventi sikhisi (276) vanta ano mai sipifin baré uno. ³⁸Minó ano yunan kanafen naren sipi ída uman dano vare siren uviti yunan kayo nompin karúden mino.

³⁹Áau e uníkan sipifin ma yoran banta kayo ano mai ma seti ovaruna non akhempá ída afová ukharen betí ankan onákan mana kama eyu vákan kanaf ma intin sipi maifasí urantin mai eyu yaró tavaen ódino van en mino. ⁴⁰Máa sen iniren minó bakharaini anan ma sipii ankará kukharé ein tíken orera uren ifáin un nompin bákan sipi ma stiaí iyá ein kákan danká kanan tákena vakharaini anan útufen mino. Útúdan uva ano e avékantin non akhempá orino van minó seri antúkaádan ódivin akhempá orono van oren mino. ⁴¹Orin mifo non aúbaná eyu yon baréin mai sipi ano mai yaró o kumamin non mano sipii oyampákena ankaman baráken mino.

⁴²Máan tiyain má aruvin banta kayo ano karavusi kéká karan orin nae siren minó aruan purono van en mino.

⁴³Máan tíkan aruvin banta kayoi ánon banta ano Porin aya ono van iniren aruvin banta kayo van ída vá karavusi kayo aruan purono siren airo ananí uanten mino. Máan turen ayan nakhosá ma afová ukheona vanta kayo nare vá un nompin káusiveya nakhosáde akhempá orono. ⁴⁴Orivinti maeya vá ena kéká ano vá sipi rákena ma varákuádan daa vá mádeya mai yaró nakhosáde akhempá orono síkan aruvin banta kayoi ánon banta ano ma seiníen ída mana afeyoran minó ano non akhempá oré tiféuno.

Pori Má Maratá Musóká O Varé Ein Baya Ino

28 Tetí minó ano kamaé eyurá orivé inékun mai muso san Maratá ino

sen mino. ²ⁱMairá áden iyon iyákan mai varu ráke nanin banta ano setin kama avúava suron usinten ira sáden tetin e sivían ira akhempá kaiká tu múmúé tiféuno. ³Máan tiyá tifékun Pori ira áiden me sariyaréin mai irafin banta arin osafáe varéin ira akhiyaimpin e unen eraeren Porin ayan untaren mino. ⁴Máan tíkan mai varu ráke nanin banta ano onákan mai osafáe ano Porin ayan afáaren iroriró nakhan betiyan máa sen oreraemí, “Onano ma vanta aruan purin bantan baren ída un nompin púkaréin mi namu avúaváká anona ayarafenu ano ve nan ída ayun bano van mi máan tiyan mino.” ^{5j}Máa šiayain má Pori mai osafáe yo yampátian karúdan irafin eravuvíkan ída mana uman baren mino. ^{6k}Máan tiyain má banasi ano Porin nan ainen au faminten nafi áa vararasá eraven ankamen purinten nafi siren ayáká ban onan mana uman ída ven aurá afoká iyaimpin banasi ano evaránen ena inin baren temí, “Mai véi mana ayarafenu van mino sen inen mino.”

⁷Mai musóká ma ánoní ukhein banta aví Pubiriasini vara mai varu áde baré íkan mai vanta ano setí ankan e siviren be amápin mo kaiká kanú manaú damú bákun kama yafisirí iyaren mino. ⁸Máan tiyá íkan Pabiriasin afóen ara oriaren aurfá ira kharo iyan bakhen baré íkan Pori véi vaintá oriven ben aurá mo ayan kaúden amúkiyain má evaránen e asefaen mino. ⁹Máan turan mai musóká ma aí nanin banta ma varé ein mano minó eríkan mai kayo vá Pori ayofan asefaen mino. ¹⁰Máan turákan betí ankan mai setin kama avúava suron usintiyáken ínaimpá ma sipifin oriyáké ma varanuna yanasinta van ma sinunu iyá eruna yaná máa simen mino.

Pori Ma Romú Barufá O Varé Ein Baya Ino

¹¹Máan turá kanú manaú biyontá Maratá musóká baréékun mana Areksandariá baru rákena sipi asíká karina ayarafenu Kaston nú Poruksin núi aman manon uvaman kain sipi ano kákan uva van péden baré iká maifin un kumamé mai musó me ampiré oré tiféuno. ¹²Oriaré Sirakyusí barurá o unavé kanú manaú damú mairá o varé tiféuno. ¹³O varé mai ráké oriaré Rekhiumú barurá oré tiféuno. Ovaré ékun ená damú saoti fáké uva iká Rekhiumú me ampiré oriaré ená damú Puteorí barurá o uné tiféuno. ¹⁴O unavé mai rákena manáa monó tifá tiváen onékun tetin tiyopá iká mai varurá dan manápá ifo afápá kan un kádan damú baré mai varu me ampiré barará Romú barufá oré tiféuno. ¹⁵Oriyáken tetin nan eriyen mino sin baya Romúke monó tifá tiváeyan mano iniren o aayana fáke setin e sivirano van eren mino. Apiusini Makheti varurá ma Miyaní Uren Baran Namun ma Kanú Manaú Bainta se ma sikheintá o fókan maran ékun mai van Pori ano Tiyarafenu tusu siantan ben ará ano ákona varen mino. ¹⁶Máan turá teti Romú o vákun kamani ano Porin mana má amiren eyakasá bano síkan Pori mai namumpin ban maen mana arugin banta ano ventá dafisiyaren mino.

Pori Ma Romú Barufin Tiyarafenui Vaya Siamein Baya Ino

¹⁷Máan tiyákan kanu manaú damú esantavin Pori Yutan ánon banta kayo aran e átaru uvin máa sen betin tiamemí, “Tifá tiváeyan noe, séi ída se sífá tiváen oyampá baya sé inká teti si sinafu siráoni avúavá doeké é ukhékun Yerusaremíke séin karavusi

fákaren Romú kayo ayampin kaen mino. ¹⁸Kauran Romú kayo ano ma senti vaya yaíden iníkan maen tenti aau ída vákan ten nan ída kanafen purinten mino siren tisintano van en mino. ¹⁹Máan tíkan maen Yutan kayo ano mai vaya átakharé íkan tenti aa ída ena vaimpin mi Sisa vá tenti vaya yaimino sé umpo mai sesi kékápin ída mana aau vantí betin ída kanaíé daimonté uno. ²⁰Tiyarafenu ano ma aní ukhein banta onano van ma Isareri nanin banta ano ave ukhá ein banta fefá erikhái mai vantará ma séi mumunan iyaruna mai anarái sen timempin ma seni anan kukhein nan téi siretin oniyá baya siameno van mi arékuya ere ono.”

²¹Máa síkan betí ankan evaránen béin tiamemí, “Yudiáké mana vanta ano ída éin nan bompon uvaman timin maen inká mai fáké ma erein Yutan banta kéká pinté mana ano ída éin nan me namu vaya sikhen mino. ²²Oída mana vaya sikhen mifo éi eyanta ei ineine setin tisimesí ineno van mi setí ankan iniyá uno. Mai fara vara seyo, Yutan kékápin ma auyen monó ma afoká iyan ma minó páke nanin banta ano ma mai kéká oyampá baya siyain baya ana seti afová ukhé tiféuno.”

²³Máa siren ovaránen ma e átaru inain damú aní urákaren Pori ma vain namumpin kokhon nanin banta ano e iyuvíkan Tiyarafenui yafisin pintena vaya vá Mosesini man baya vá sakhanampa vanta kayoi vompon pintena vaya vá tiamen mino. Tiamiyáken betin nan ará baéden Yisasintá mumunan ino van ákurákáké arái uren e siamen oriyan evaren inúpasíen mino. ²⁴Inupasí íkan manáa ano mai ma Pori siamein bayará mumunan en mifo ena kéká ano mai vayará ída mumunan en mino. ²⁵Máan tiyan betiyan asive asive uaren oreraen mino. Ínaimpá orera intéin Pori kípan

¹28:18 Apo 26:31 ^m28:19 Apo 25:11

ⁿ28:20 Apo 26:6-7 ^o28:22 Apo 24:14

baya máa sen betin tiamemí, “Teti sinafu siráon nan Kantá Aunan mano fura uron mi sen sakhanampa vanta Aisaiyan ooráké uaren máa sikharen mino,

²⁶ “Mai nanin bantafin oriveya máa se vetin tiameno,

“Tiretí ankan ena ena vaya inin nompo ída kanaíeya veni ana afová inono.

Tiretí ankan ena ena onan nompo ída kanaíeya mana yaná oman afová inono.

²⁷ Para vara seyo, mai nanin bantai ineine ona munkukhan

baya inin nan betin átaren mano afon kiyán

inká auurá iyádan ban mino.

Beti mana yaná ódaren inká baya iniren beni ana afová uren ará baéden te varunafá ²⁹ ovaránen erintí téi vetin

evaráné kama uré ayofanuna van mino.’ *Ais 6:9-10*

²⁸⁻²⁹ “Mai ana van mi Tiyaarafenu ano ma kama yorará uren ma vei vanasi aya ein inka e siantáan ena anan nanin bantafin kaintin mi mai yaná afová uren dakhafintéfi sireti ineno van mi séi siamé uno.”[¶]

³⁰ Máan turen Pori kan oraná mana vanta amá máden báken mai má afóen miyaní iyan maen banasi ano ma véin o onano van ma orin maen amusin iyan e araan kaúden baya siamiyaren mino.

³¹ Máan tiyáken béi ída feranton ákon-aen Tiyaarafenui yafisin pintena vaya siamiyan maen inká Tiyaarafenu ano ma aní ukhein banta Bafan Yisasin nan banasi afova amiyan maen mana ano ída véin airo ananí uanten mino.

[¶]**28:28-29** Tiyaarafenui manáa vompon dókifin ena asotúin baya ves 29 fin máa sikhén mino, ²⁹ *Mai vaya máa siren maen Yutan kayo véin ampiren oreimpin betiyan ákonaen asiven mino.*

PORI MA ROMÚ KEKÁ UVAMAN AMEIN BOMPON MINO

(Romu)

Romui Vompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pori ino.

Uvarein orana ino.

AD fifti-seveni (57) fin nafi áa fifti-eiti (58) fin nafin uvanten mino. Mai maen Pori ma kanú manaú dádasí en ma monó doraríen eúkiyaren ma mo kípiyan mi ma vompon uvanten mino.

Ma vompon ma uvantein baru ino.

Koriní barurá ino. Mai maen kanú manaú biyontá ma Kiriki varafin ma Pori nóein pimpá ino.

Ma vompon ma uvaman amikhein kéká ino.

Yisasintá monó tiyáken ma mumunan in avúavá ano Romú barafin pefá o vákan mai kayo esé araíen o onano van Pori inikhen mai van mi mai kéká uvaman amikhen mino.

Nái ana vará ma vompon uvanten nafino.

Mai vompon mano setisi ume avúavá ma ena ena vain mi sian aní ukhen mino. Tiyarafenu ano vanasi aya urantin ume ída vain kéká ino sino van mi

anunu iyáken be Anin ma e fúaren e mantakheini narefó umei karavusi fintena miyaní uren mi Kantá Aunani ákonafó banasi maman kantasí ukhen mino. Monó dorarí in má inká ma varará ma aronái in avúavá bá deren kákaní ukhan mai van mi sikhen mino.

Mai vompompin ma kákan ineine ma sian amá ukhein baya ino.

Mumunantá ma miyaní uren aviran baya: Yisasintá ma mumunan é tiferuna anon umei karavusi fintena setin miyaní uren mi fura sen ume vá aau vá ída van nanin banta e sen aní ukhen mino. Karaisi ma furen bei nare vanaein manon tetin tesé uran mi Tiyarafenu ano setin nan puntákein nanin banta e sen tariyain Tiyarafenu ano ma vanasii avúavá daimin nain damú tetin tiya inten mino (Romu 5:9 fin ná onano).

Tesé uran ma avusese ukhein baya: Mana yaná ano ída o yampakhan pura sen avusese uaren maman kantasí ukhen ne sen mai vompon mano sian amá ukhen mino.

Pori Ma Araí En Banasi Ákona Uantein Baya Ino

1 ^{PT}Éi Pori Yisas Karaisini yoran banta uno. Tiyarafenu ano vei kama vava varen banasi mo siamino van tivíden tisinten mino. ^{2Q}Mai kama vava Tiyarafenu ano vei sakhanampa vanta kayo oorá tiádan kantá bompon dókifin uvamádan baren mino. ³Tiyarafenu Anin Yisasi ma varará banta an daven Kin Devitini anampin afoká ukharé eini kama vava ino. ⁴Tetinti Bafan Yisas Karaisin ma masí pintena Tiyarafenu ano ma vei ákonará avían mantaran maen mai véi Tiyarafenu Anin mi varéin Kantá Aunan mano setin aníen mino.

^{5r}Tiyarafenu ano setin nan beni vava varen ena anan nanin banta

ma minó akhempá ma vaimpin mo siamintin bentá mumunan uren ben ánain bákuriyáken ben aví maman daní ino van mi Yisas Karaisin pinté uaren mai amusin má ákona vá tetin timikhen mino. ⁶Máan tukhan mi mai ma Yisas Karaisini kékasí ino van ma arakhein nanin bantafin tiritin má baono.

⁷Romu kéka soe, Tiyarafenu ano siretin avábá uren mi veni kékasí ono van aren mino. Tetin Tifóe Tiyarafenu vá Bafan Yisas Karaisin má ano vá tiritin tarisari uantanti vá kuse vano.

Romú Ma Monó Nanin Banta Vain Ma Pori Onano Van Iniyaré Ein Baya Ino

⁸Ma varará minó akhempá ma vain nanin banta ano ma siretí ákona mumunan nan ma siren iniyain nan mi Yisas Karaisin avíká araié Tiyarafenu susu sianté uno. ⁹⁻¹⁰Mai ma séi moéké tukáké mumunan iyaruna Tiyarafenu Anini kama vaya ma vanasi siamiyaruna mai sireti ma o afasí iyaona yana san náí máa yádasá béin timúkimpó ena ena siamiya rafu mai véi afová ukhen mino. Mai Tiyarafenu ano kanaíen aaí intí tiritin o onano van mi ena ena simúkiyá uno.

¹¹Mai fara vara seyo, siretin ma ayain monó avúavá ma ákona uantan mai siretin má daídékuya Bafampin ákona e vano van mi iyá uno. ¹²Mai senti ineine máan mi ukhen mino. Tiretí ankani mumunan mano sen tiya intin maen inká anona senti mumunan mano siretin aya intin ma inten mai avúavá anon minó tetinti mumunan ákona usintanten mino. ¹³^uMumunan tiyofi sífá tiváeyan noe, sireti vaípa téi orono van kokhon damú ineine iyaré umpo saréa siretí ankan afovasá ono. Tenti yorantá ma

ena anan kéká ano mumunan nanin bantaí uan unein máa mana siretin má ono van mi séi iyákun mifo kokhon daná ano ena ena afoká iyan tenti aa iyariyaren mino.

¹⁴Para vara seyo, Kiriki kéká maen afova vain nanin bantan bákan inká ena kéká maen ída afova vain nanin banta vákan mi maí kampin dorano van mi Tiyarafenu ano séin ma yoran timikhen mino. ¹⁵Máan tukháí sireti Romú nanin banta ma kama vaya siamin nan ten tirá ano mantiyan mino.

¹⁶^vMáan tukháí kama vaya ma siami nan téi ída siyave éiyá uno. Mai fara vara seyo, Tiyarafenui ákona mai kama vayafin báken mumunan ma ein nanin banta evaránen aviriyan mino. Teti Yutan kéká nare ma sivíaren ena kéká bá deren aviranten mino. ¹⁷^wTiyarafenu ano mai kama vaya rákéi vei avúavá aní uren mi setin nan puntákein nanin banta e sen taré iyan mino. Tetí ankan pura sé mumunan iyákun ná tetin nará puntákein nanin banta e sino. Mumunan aa sáké anan Tiyarafenu avorá puntákein nanin bantaí inono. Mai fara vara seyo, Tiyarafenui vompon dókifin máa sikhen mino. “Mumunan ma inain nanin banta van mi Tiyarafenu ano funtákein nanin banta e sen ararantin ída furin ayun para van aunan baranten mino.” *Aba 2:4*

Ume Avúava San Ma Tiyarafenu Ano Aran Nan Uantein Baya Ino

¹⁸Máan tukhan maen mai ma namu avúava san mana uren pura sikhein avúavá ma oyan amé iyain kékápin Tiyarafenu ano inaru fáké bei aran daná anié iyan mino. ¹⁹^xPara vara seyo, Tiyarafenu ano mai nanin banta vei avúavá aní íkan afová uran betí in-

⁶1:7 Nam 6:25-26 ¹1:9-10 Apo 19:21; Rom 15:23 ^u1:13 Apo 19:21

^v1:16 Mak 8:38; Apo 13:46; 1Ko 1:18-24 ^w1:17 Rom 3:21-22

^x1:19 Apo 14:15-17; 17:24-28

impin pe van mino. ²⁰yMai ma vain danasinta maen Tiyarafenu ano ma esé arañen inaru vá bara vá uváden inká minó danasinta ma uvantein táké ma erikhein mai vanasi ano véin ída onten mifo veni aúpa ma vain ákona vá béi ma uvantein danasinta vá anan afová en onten mino. Máan tukhantín mi ída mana nanin banta ano kanañen Tiyarafenu van ída afová ukhé uno sen tinten mino.

²¹zBetí ankan Tiyarafenu afová ukhen mifo veti ída ven aví daní iyan ben tusu sian tiyan é iyan mino. Máan tiyákan mi vetíí ineine ano asuse uvíkan ineine vá afova vá ma ída vain kéká an dakhan mai anon aúpin títpa ukhan aminofin ban mino. ²²aBáken tetimpin afova van mino sé iyan mifo vetíí ineine asuse ukhein kayo ino. ²³bMáan tukhen mi aunan má kakhan má ma vain Tiyarafenu betí ankan oyan amiren ída ena vá bentá monó té iyan mino. Betí ankan banta aman manon nafi nun aman manon nafi safúna aman manon nafi inká osafáe aman manon nafi uvariyan uren Tiyarafenu ma monó teren me ifá en mai yanasintará anan monó té iyan mino.

Barará Ma Vain Nanin Banta Ano Ma Ara Ara Umeí É Iyain Baya Ino

²⁴Máan tiyákan Tiyarafenu ano vetin ampiádan mi uméin anunu ano vetin e yarifaádan ída funtákein avúavasí iyáken beraran namu avúava suron baré iyan mino. ²⁵Máan nanin banta ano Tiyarafenui fura sikhein baya ampiren kampun bayan bariyan mino. Máan tiyáken minó daná ma uvantein Tiyarafenu me oyan amiyáken béi ma uvantein danasintará monó tiyan mai yanasinta aránaópá oriyan mifo seti vá

Tiyarafenu avisá ena ena yaní ó tifano. Pura ino.

²⁶Betí ankan Tiyarafenu me oyan amin mi mai Tiyarafenu ano vetin ampiádan mi vetíí fain avúavápin ban mino. Bákan mi anasi kéká ano ábasui funtákein avúavá me ampiren beraran ída funtákein namu avúavá ánain bákuré iyan mino. ²⁷cBanta kayo vá deren ábasui funtákein avúavá bá me ampiren betin aúpin ira ariyákan e manten ena vanta kéká bá namu avúavasí é iyan mino. Banta kéká ano ma ayave avúavá ma variyain mai ayái anona evaránen betíí namu miyan baré iyan mino.

²⁸Betí ankan ída Tiyarafenu aránaó ban ineine íkan mi vetin áikan namu ineine ánain bákuriyáken minó ída funtákein avúava sinta varé iyan mino. ²⁹Ara ara namu avúava sinta ma veti varé iyain mai ída funtákein avúavá bá ena ina yaná ódare namu ineine uantan má ena namuroí uantan avúavá bá ena ina yana san aran iyáken inká banta aruan puriyáken aruve asive iyan ena vanta kampun tian tiyan ena vanta namu uanté iyan mino. Máan tiyáken inká ena oyampá baya siyan maen ³⁰oorá ará baya e sian more mere iyáken Tiyarafenu namuroí uantiyan baya átakharé uren au khákan iyáken beyan nan amo siren namu avúava sinta varano van mana iniyáken be anóe afóeni vaya átakharé iyan mino. ³¹Betí ankampin ída ovaren me iníden baran avúavá bákan betí ma siadákaré ein baya ánain ída yakhafiyán mino. Máan tiyáken betíí ádékena van ída iniyan ena vanta van ída arunan uantiyan mino. Mai namu avúava sinta ano vetimpin bíkakhen ban mino. ³²Tiyarafenui man baya ano máan avúava sinta ma varan nain mano vá purino

^y1:20 Yop 12:7-9; Íbo 19:1 ^z1:21 Efe 4:17-18 ^a1:22 Yer 10:14; 1Ko 1:20

^b1:23 Diu 4:15-19; Íbo 106:20 ^c1:27 Riv 18:22; 20:13; 1Ko 6:9

sikhan maen betí ankan afová ukhen mifo mai vaya átakharé iyáken ara ara namu avúavá betí bariyan ena kéka san moéke mai avúavasá barano siyákan bariyan mino.

Tiyarafenu Ano Ma Ume Yaimiyain Baya Ino

2^dMáan tukhanti éi ída setisi kéka san mai namu avúavá bariyan mino sinono. Para vara seyo, ei avúavá ano ída funtákan mae mai ena ano ma variyain avúavá máan éi má bariya ono. ²Máan tukhan mae setí ankan afováé tifékun mai Tiyarafenu anon puntákein avúavápói mai ma namu avúavá bariyá ein kéká daiminten mino. ³Máan tukhanti éi ma iniyaona ena kéká anan Tiyarafenu ano yaíden uman amirantí maé mai uman ída varanté unó té iniya fono. ⁴eTiyarafenu ano ma éin ída ainen namu miyan amin ma kama avúavasíen ayáká ma ave ukhen bain mai van éi ídá iniyáké oman aniana iya fono. Éi mai avúavá pinté ará baerano van mi vei kama avúavá aníen ída ainen uman amiyan mino.

⁵Máan tiya ompo éi e ará ákona ureya ída ará baere ono. Máan ma iya vaona avúavá anoi ei namu miyan átaru iya vaonai Tiyarafenui funtákein kó ma erin nain damúí veni aranan ná ano yákó intiya éi mai namu miyan baran nono. ⁶f“Mana mana nanin banta ano ma variyain avúavákái Tiyarafenu ano yaiminten mino.” *Íbo 62:12; Pro 24:12*

⁷Máan tinten mifo inte kéká anó mantaan ákona ukhen kama yorarí iyaré inten nafi mai Tiyarafenu ano ínaimpáké betin amo siren kákan bí bá ayun ma fara van oriyán ban aunan ma aminten mino. ⁸gAminten mifo mai ma vetiyan ban nain nan mana ma iniren pura vaya

me oyan amiren ída funtákein avúavá ánain mana vákuriyá inain kékáí mai Tiyarafenu ano ve aran nan ná betin amaniná bana inten mino. ⁹Mai ma namu avúavá ma variyain kayofin mi aau vá uman má afoká inten mino. Mai uman mano Yutan kayofin nare afoká uaren ena anan nanin bantafin orera inten mino. ¹⁰Máan tinten mifo kama avúavá ma variyaráin nain nanin bantan Tiyarafenu ano inarurá kama kumanin má kákan bí bá ará kusin má aminten mino. Yutan kayofin nare amiaren ena anan nanin banta vá deren aminten mino. ¹¹Para vara seyo, ída aronafin avúavá bantin Tiyarafenu ano mana avúaváká anan daiminten mino.

¹²Man baya ma ída afová ukhen ma umeí iyaréin nain kékáí Tiyarafenu ano yaíden uman aminten mino. Man baya ma afová ukhen ma umeí iyáin kékáí Tiyarafenu ano mai man bayafó betíí avúavá daíden uman aminten mino. ¹³Para vara seyo, man baya van mino sen ma fara oniyain kéka sa Tiyarafenu avorá puntáken naino. Ída ino. Mai ma man baya ánain bákuriyain kéka san mi Tiyarafenu ano funtákein kéka se siyan mino. ¹⁴hEna anampin ída Tiyarafenui man baya váé iyan mifo vetíí inin pintéi fura sen ma man baya afová ukhen dakhafeiníí iyan mino. Para vara seyo, vetíí aukákéi funtákein avúavá ánain dakhafiyan namu avúavá oyan amiyan mino. ¹⁵Mai ma variyain avúavá anon betin aníen Tiyarafenui man baya ano setin túpin báí funtákein avúavá bariyáké namu avúavá ída variyá uno sen inikhen mino. ¹⁶iInikhen mifo vanasi ma yaimin nain damú ma fura sen afoká intin maen Tiyarafenu ano Yísas Karaisin ákona amintin minó nanin banta ma aúpá bariyáin nain avúavá

^d2:1 Mat 7:1-2; Yon 8:7 ^e2:4 Efe 1:7; 2Pi 3:15 ^f2:6 Mat 16:27; 2Ko 5:10
^g2:8 2Te 1:8 ^h2:14 Apo 10:35

daiminten mino. Máan mi sé tesi vaya minópin tian amá uno.

Man Baya Anon Kanaíen Tiya Inten Ne Ma Yutan Kayo Ano Siyan Baya Ino

¹⁷Téi Yutan bantan báké Tiyarafenui man baya fákakhé maé beni kékái varuna véi siya inten mino sireya e amo sé iya ono. ¹⁸Tiyarafenu ma anunu iyain éi afová ukha ono. Para vara seyo, man baya fintena kama avúavá bá namu avúavá bá inka éi inireya afová ukha ono. ¹⁹Éi seya inka séi afová ukheruna kanaíe auu yufúkukhein aa aní uanté inká anukheimpin ma vain kéká oon kakhaanté onté uno se iné iya ono. ²⁰Éi ma iniyaona ano Tiyarafenui man baya fintena fura vaya vá afova vá minó manteruna mai kasaé ída ma afova vain kayo vá inka iyampon arinta an ma yakhein kéká bá afova amiyá onté uno se iné iya ono.

²¹Máan téiya ompo ena nanin banta ma afova amiyáke mai eyan ída afova variya ono. Ena kéka san ída vá umoyan barano sire mae éi umoyan baré iya ono. ²²Ena ana safí avafun nafi ma yarifan mai namu ukhen ne sé iya ompo éi mai avúavá baré iya ono. Kampun ayarafenurá ída vá monó teno séiya ompo monó ma ída inin afokhampin ma vain nanin bantai monó namun pintena éi manáa yaná umoyan baré iya ono. ²³Éi ma iniyaona ano Tiyarafenui man baya afová ukhé uno sireya e amo sé iya ompo éi Tiyarafenu me oyan amireyá beni man baya yurafuré iya ono. ²⁴Mai avúava san mi Tiyarafenui vompon dóki ano máa sikhen mino. “Tiretí ankani anarái ena anan kéká ano Tiyarafenu oyampá baya siren béin oyan amé iyan mino.” *Ais 52:5; Isi 36:22*

Au Khavin Avúavá Pákena Vaya Ino

²⁵Tiyarafenui man baya ánain ma vákurinteya mai au ma khavin avúavá kama inten mifo ída ma minó man baya ánain bákurinteya mai éi ída ma au khakhein banta an mi yakha ono. ²⁶^kMáan tukha ompo ena anan nanin banta kayo ano ma Tiyarafenui man baya ánain ma yakhafintin maen mai ídá Tiyarafenu ano vetin avían bei kékasi inten nafino. ²⁷Ena anan nanin banta ano ída au khavin Tiyarafenui man baya ánain dakhafiyain mifo sireti Yutan kéká ano veni man baya afová ureya au khaviya ompo man baya ánain ída yakhafiyaona enan anan kéká ano ínainpáké tiretin daídantin uman aminten mino.

²⁸Mai fara vara seyo, éi ída kanaíe yan bukhafa máara safi inká au khavin avúaváka safi Yutan banta uroní inono. ²⁹Ída ino. Tiyarafenu avorá ma funtákein manoi fura sen Yutan banta uron ban mino. Inká pura sen au khavin avúavá ma vain mai yan bukhafa máa ma au khavin naino. Tiyarafenui Kantá Aunan manoi aúpin afoká uádé iyan mino. Intéa kéká anó mai avúavá baré iyan nafi mai varará nanin banta ano va amusin uanté iyan naino. Ída ino. Tiyarafenu anon amusin uanté iyan mino.

Tiyarafenu Ano Ma Siren Mai Ánain Pura Sen Dakhafiyain Baya Ino

3 Au ma khavin avúavá ma au ina yaná ana ma vantin maen Yutan kéká ano intesá ená ena anan banta kéká esantanten nafino. Au khavin avúavá ano kama yanasá afoká uádé iyan nafino. ²Pura uron mino. Tiyarafenu ano Yutan kayo ara ara kama yanasinta amikhen mino. Esé araíen minó bei vaya amikharen mino. ³Pura ino, manáa ano

vetí ma siadákare ein baya yurafuren mai ánain ída yakhafé iyan mifo máan ma inain nan Tiya rafenu ano veyan ma siadákare ein baya yurafurinten nafino. ⁴Ída uron mino. Minó barará banta ano kampun té iyan mifo Tiya rafenui vompon dóki ano ma sikheinfen Tiya rafenu veyáká anan pura sé iyan mino.

“Tiya rafenu oe, éi funtákein avúavá máa fosá téin kó tisintano.

Beti ma éin kó tiantano van inti maeya éi vetí kó darádeya funtákein kó anan tin nono.” *Íbo 51:4*

⁵Tetisi namu avúavá ano ma Tiya rafenui funtákein avúavá ma maman dákosí urantí maé mai seti inte esá tente rafuno. Tiya rafenu ano ma setinti ume ayá ma anona simin nain nan mai véi namu avúavái iyan minó tétifante rafuno. (Manáa nanin banta ano máan ineinen é iyan mino.) ⁶Ída uron mino. Tiya rafenu ano ma ída kama avúavá ánain ma ena ena vákurinten maen intesá uren ná béi minó barará nanin bantai avúavá daiminten nafino. ⁷Manáa ano máa sen iné iyan mino: “Tenti kampun baya ano ma Tiya rafenui fura vava ma maman dáko intin mai ano veni kákan bí moékantin ma kákani suron iyantin maen mai véi náí anarasá téin nan ume vanta ino siren ná namu miyan tíminten nafino.” ⁸Erí namu avúavá bariyá tifékun mai ráké moéken kama avúavá afoká ino ma siyanteya mai asuse vayan té iya ono. Manáa vanta ano sen tufin kuráden téi ma siyaruna vava van asuse vava vá manái ukhein bayan tiyan mino sé iyan mino. Mai ineine máden ma mai avúavá ánain dakhafiyá inain kékái Tiya rafenu ano yaíden mai ayá namu miyan aminten mino.

Ma Varará Ma Mana Ída Funtákein Nanin Banta Vain Baya Ino

^{9m}Máan tiya ompo mai seti Yutan kéká anó ena anan kayo esantakhé tife rafuno. Ída ino! Minó Yutan kéká bá Kiriki kéká bá ano manái é umefin bá tiféuno. ¹⁰Mai van Tiya rafenui vompon dóki ano máa sikhen mino.

“Ída mana vanta ano funtákein avúavá baré iyan mino.

Ída uron mino. ¹¹Ída mana ano kama afova manten mino.

Ída mana ano Tiya rafenu van dosikhen mino.

¹²Minó ano inka Tiya rafenu oyan amen mino.

Minó ano mo namu uron en mino.

Ída mana ano kama avúavá bariyan mino.

Ída uron mino.” *Íbo 14:1-3; 53:1-3; Ekr 7:20*

¹³“Betí vava ano vanta masí ma yuvakhen namu aunka é iyainíi ukhen mino.

Betí ankan kampun baya anan té iyan mino. *Íbo 5:9*

Betin oofen namu osafáei aufon ma víkakhen avanen eraveiníi iyan mino. *Íbo 140:3*

¹⁴Betí ankan ena vanta ma namu uren aran amiyan uman amin baya anan té iyan mino.” *Íbo 10:7*

¹⁵Betí ainen ena vanta aruan purono van manan é iyan mino.

¹⁶Betí ankan ma oriya intá ena nanin banta namu uanten uman amen en nó é iyan mino.

¹⁷Ena nanin banta vá ma ará manafiníi uren ban avúavá betí ankan ída afová ukhen mino.” *Ais 59:7-8*

¹⁸“Tiya rafenu ano ma vetí ankan uman amin nan ída feré iyan mino.” *Íbo 36:1*

¹⁹Máan tukhein nan mi man baya ma amikhein nanin banta ano mai man baya ano ma sikhán nain aránaopa sá bano. Para vara seyo, ínaimpáké ma Tiyarafenu ano ma varará nanin banta ma yaimin nain damú ída mana ano kanafen tiyáken téi man baya ída afová ukharé uno sinten mino. ²⁰nMan baya ánain ma vákurin avúavá ano Tiyarafenu avorá ída funtáken banten mino. Para vara seyo, man baya ma afova suron ma inten mai seti ume nanin bantan bá uno sen afová inten mino.

**Yisas Karaisintá Ma Mumunan Iyain
Kayon Tiyarafenu Ano Ume
Arúantáden Puntákein Nanin
Banta E Sen Aré Iyan Mino**

²¹Man baya ánain ma yakhafintasa Tiyarafenu ano setin nan puntákein nanin banta e sinten naino. Ída ino. Pefá ma Tiyarafenui vompon dókifin ma sikaré einíen ena aa sákéi setin nan puntákein nanin banta e sinten mino. ²²oUme arú-intano van muno siren ma Yisas Karaisintá ma mumunan inain nanin bantan Tiyarafenu ano ume arúantáden puntákein nanin banta e sinten mino. Yutan nanin banta fi ena anan nanin banta fi mai aa sáké anan Tiyarafenu ano minó aviranten mino.

²³Mai fara vara seyo, minó nanin banta ano umeí ukhéi Tiyarafenui kakhakhein avúavápin o afasí ukhé tiféuno. ²⁴pYisasi ma setin ume arútintákein mairái Tiyarafenu ano setin tarisari uren puntákein nanin bantae siyan mino. ²⁵Tiyarafenu ano ma Yisasin tiantan erein mai véi furintin beni nare ma vanain nain mano minó bei vanasii ume arúantano van mino. Mai avúavá ma Tiyarafenu varein manon tetin nan puntákein nanin

bantae siyan mino. Pefá Tiyarafenu ano funtákein avúavasíi en umeí ma ein nanin banta ída ainen uman amikharen mino. ²⁶Máan mana en mi saréa ma ume nanin banta ano Yisasintá ma mumunan in maen Tiyarafenu ano funtákein nanin bantae siyan mino.

²⁷Máan tukhen mifo mana vanta ano kanaisá en ná téi kama avúavá bariyákon Tiyarafenu ano amusin iyan mino siren ná be amo sinten nafino. Ída ino. Man baya ánain ma vákuriyá tiferuna rasaino. Ída ino. Tetisi mumunan-tái funtákein nanin banta e sinten mino. ²⁸Para vara seyo, mumunan ma iyá tiferuna anon Tiyarafenu avorá puntaké tifé umpo man baya ánain ma vákurin avúavá ano vaino. Ída ino.

²⁹qTiyarafenu maen mai Yutan kayoi Ayarafenu aná ban nafino. Béi ídá ena anan nanin bantai Ayarafenu van nafino. Ída ino. Béi ída Yutan kékái Ayarafenu ana van mifo ena anan nanin bantai Ayarafenu vái van mino. ³⁰rMáan tukhan maen mai mana Tiyarafenu anan báken pura sen ma mumunan in aa sáké anan Yutan kéka safi inká ena anan nanin banta fi e avían puntákein kéka se sinten mino. ³¹sMáa sinten mifo mai seti nan man baya me ífá uren mumunan in ain mana yakhafino vara fino. Ída uran mino. Pura sen mumunan in avúavá anoi man baya maman ákona iya ono.

**Abaraamuni Mumunantá Ma
Funtákein Banta E Sein Baya Ino**

4 Abaraamu maen tetin an dakhein bantan báken tetin tináu ifo véin nan ma Tiyarafenu ano funtákein banta e ma sikhá ein nan ma afová iyáké teti ankan náí esá té tifante rafuno. ²Abaraamu ma kama yorarí iyá ein nan puntákein banta uno siren be amo sinten mifo

ⁿ3:20 Íbo 143:2; Rom 7:7; Kar 2:16 ^o3:22 Kar 2:16 ^p3:24 Rom 5:1

^q3:29 Rom 10:12 ^r3:30 Diu 6:4; Kar 3:20 ^s3:31 Mat 5:17

Tiyarafenu avorá ída ino. ³tPara vara seyo, Tiyarafenui vompon dóki ano setin tisimiyáken Abaraamu ma Tiyarafenurá mumunan ein nan mi véin nan puntákein banta e sikhen mino. *Esé 15:6*

⁴Banasi ano yoriyá eintái miyan baré iyan mifo ída fara amusin ne siren miyan amé iyan mino. ⁵Máan tukhan maen banasii mumunantái Tiyarafenu ano funtákein nanin banta e siyan mifo vetíi yoranta saino.

⁶Man baya ma yakhafiyareona rasa Tiyarafenu ano funtákein banta e sikhen naifo amusin ná ono sen Kin Deviti mai avúava san mi sikhen mino.

⁷“Baya átakharé uren umeí iyá intin ma ume ampiantáden daramantákan nain kéká ano vá amusin ino.

⁸Tiyarafenu ano ume ampiantáden ma fura sen ma áuntan nain kéká ano vá amusin ino.” *Íbo 32:1-2*

⁹Teti ankan ma iniyaruna ano Abaraamuni mumunan nan mi Tiyarafenu ano funtákein banta e sikhen mifo mai avábá ma vain mai Yutan kéká ina ana fi aa ena anan nanin banta vasa fino. ¹⁰Máa sikhen mifo mai inté ma uran ná béin nan puntákein banta e sen nafino. Au ma kharan ná puntákein banta e sikharen nafi áa au ma ída khakhan ná puntákein banta e sikharen nafino. Au ma ída khakhan maen pefái Tiyarafenu ano véin nan puntákein banta e sikharen mino.

¹¹uAu khavin avúavá ída afoká ukhan inká Abaraamu yere ída au khakhan maen pefái Tiyarafenu ano veni mumunantá puntákein banta e siren béin avíkaréin mai avúavái aníen mi au ma khavin dákoén mino. Máan tukhein nan mi mai ma au ída khavin mumunan ukhein kékái anafun Abaraamu

van mino. Betí ankani mumunantái Tiyarafenu avorá puntákein kékasi ukhen mino. ¹²Abaraamu mai fefá ída au khakhen mumunan ukharen mifo au ma khakhein kéká ano ma Abaraamun an den mumunan ma intin maen mai Abaraamu vetin anafu vá deren ban mino.

Tiyarafenu Ano Ma Iyáantákein Mai Minó Mumunan Nanin Banta Anon Baranten Mino

¹³vPefá Tiyarafenu ano ma Abaraamu má be anavasin má ayampin minó baramenté uno siren ma iyáantákarein mai véi ma man baya ánain bákuriyá einta saino. Ída ino. Béi ma Tiyarafenui vayará ma mumunan eintái véin nan puntákein bantae siren iyáantákaren mino.

¹⁴wMáan tukhan mi man baya ánain ma vákurin kéká anan Tiyarafenu ma iyáantákaré ein daná baranten mino ma sinteya mai mumunan ánain ma vákurin avúavá ano faen daná an dantin mi mai ma Tiyarafenu ano iyáantan nain daná ano yere fara savifá o afeyoranten mino.

¹⁵xMai fara vara seyo, man baya ánain ma vákuro no van ein kéká man baya anon uman amé iyan mifo man baya ma ída vantin maen man baya yurafurin avúavá ída vanten mino.

¹⁶yMáan tukhan mi Tiyarafenu ano ma iyátintákaré ein mai yaná mumunan aa sáké anan para vará tifanté uno. Yutan kayoi avúavá ánain ma ída yakhafin ma Abaraamu ma mumunan iyá ein an ma yátifanté mai Tiyarafenu ano ma Abaraamun iyáantákaré ein daná bará tifanté uno. Máan mana en mi Abaraamu mai minó mumunan ma inain nanin banta anafuíi inten mino. ¹⁷Tiyarafenu ano ma véin tiamikharé ein mai vompon dókifin máa sikhen mino. “Téi anon

^t4:3 Kar 3:6 ^u4:11 Esé 17:10-11 ^v4:13 Esé 17:4-6; 22:17-18; Kar 3:29

^w4:14 Kar 3:18 ^x4:15 Rom 3:20; 5:13 ^y4:16 Kar 3:7

éin maman kokhon nanin banta anafuní é uno.” *Esé 17:5*

Purin banta ma evaránen aunan amen ma ída varé ein daná ma vayafó tíkan afoká ein Tiyarafenu^rá ma mumunan ein nan mi Abaraamu maman barará nanin banta anafuní uanten mino. ¹⁸Tiyarafenu ano máa sikharen mino, “Éi kanaíé minó ofu yankafinte fono. Ída ifo en ana akhafana ano máan uron mi en mo kokhoní inten mino.” *Esé 15:5*

Mai ma iyáantein danasinta ano ída kanaíen afoká írí ukhan mifo Tiyarafenui vayará ana Abaraamu fura sen mumunan ukharen mino. ¹⁹Abaraamuni orana mana antareti (100) vákan ben au varimú ukhan Sara ída kanaíen iyampon kairí ukhan maen béi afová ukhen mifo veni mumunan mano ída ánuní in moéken ákona ukharen mino.

²⁰Tiyarafenu ano ma Abaraamu minó daná iyáantákein nan iniren béi ída kokhon ineine ina vei mumunan ákona uren Tiyarafenu aví daní iyaren mino.

²¹Para vaino, Tiyarafenu ano ma iyáantákein daná kanaíen afoká inten mino siren béi afová ukhen pasen mino.

²²Béini mumunan nan mi Tiyarafenu ano funtákein banta e sen mino.” *Esé 15:6*

²³Tiyarafenui vompon dókifin ma funtákein banta e sen ma arakhein mai Abaraamun beyákasara sikhén naifo ²⁴mai setin ma san deren tikhen mino.

Tetisi Bafan Yisasin ma Tiyarafenu ano masí pintena avían mantakheintá ma seti mumunan ma iyaruna mai van mi Tiyarafenu ano iniren teti nan puntákein nanin banta e sen tariyan mino.

²⁵^aTetisi ume arútintano vare siren Tiyarafenu ano namuro kéká ayampin Yisasin ampiádan aruan puren mino. Púbíkan tetin nan puntákein nanin banta

e sen tarano van mi Tiyarafenu ano véin masí pintena orun avían manten mino.

Mumunan Mano Ma Amusin Afokáin Nain Baya Ino

5 Máan tukháí setí ankan inka mumunan ukhé tifékun mi Tiyarafenu ano seti nan puntákein nanin banta e sikhén mino. Tetisi Bafan Yisas Karaisi ma varein avúavá anon Tiyarafenu vá maman teti sirá manafiní usinten mino. ²Yisasi anon tetisi mumunantá aa uvít-intádái Tiyarafenui sarisari aúpin bá tiféuno. Tiyarafenui ákona vá kakhán má dere varano van mi mantaan ákona ukhé tiféuno.

³^bMáan ma ukhékun ma minó uman tetimpin afoká iyain mai vasará timusin ó tifano. Mai fara vara seyo, mai anon tetisi mumunan ákona usinten oriyan banten mino. ⁴Tetisi mumunan ma ákonaen bantin maen mai anon tetin ákona usintantí minó akhenóka yo ékaré Tiyarafenu ma sivirano van tikhein nan ave ó tifanté uno. ⁵Tiyarafenu ano ma setin tivirano van tikhein mai ída fasavi ave ukhé bá tifanté uno. Mai fara vara seyo, Tiyarafenu ano setin nan anunu uren mi Kantá Aunan timikhan mai ano setin túpin bíkakhén mino.

⁶Teti yantá ída kanafé é mantaan ákona írí ékun mi Tiyarafenu ano ma aní ukhá ein damú afokáin ume nanin banta evaránen avirano van mi Yisas Karaisi yorun puren mino. ⁷Ída kanaíen mana vanta ano kama vanta aya ono van beni varu varen purinten mifo kama avúava suron ma variyain bantai varu varen kasaen purono van inten mino. ⁸^cTeti ume avúavúpin para vá tifékun mi Tiyarafenu ano ve ákona arunanái aníen mi Yisas Karaisi furino van tiantan eren mino.

^a4:19 *Esé 17:17* ^a4:25 *Ais 53:4-5* ^b5:3 *Yem 1:2-3; 1Pi 1:5-7*

^c5:8 *Yon 3:16; 1Yn 4:10*

^{9d}Karaisi ma furen bei nare vanaein manon tetin tesé uran mi Tiyarafenu ano setin nan puntákein nanin banta e sen tariyain béi ma vanasii avúavá dáimin nain damúí setin tiya inten mino. ¹⁰Tetí ankan ma Tiyarafenu vá namuroí ukharé ékun ma Tiyarafenu Anin ma furein manon namuro avúavá kípá sintáden Tiyarafenu vá maman tirá manafiní usinten mino. Máan tukhan béi evaránen e mantakhein mai ma fara van oriyan ban uman pintena fura siren tiya inten mino. ¹¹Mai ma Bafan Yisas Karaisi ano ma varein avúavá anon tetin maman Tiyarafenu vá ma sirá manafiní ukhein mai vará timusin ó tifano.

**Adamun Pinté Purin Afoká Uvin
Ma Karaisin Pinté Aunan
Baran Afoká Ukhein Baya Ino**

^{12e}Adamu ano ma umeí ein mai anon purin dákkó uran ma varará oreraen mino. Mai fara va ino, minó nanin banta ano umeí ukhan mino. ^{13f}Man baya ída afoká ukhan ume nare ma varará baren mifo man baya ma ída afoká ukhan maen namu avúavá ma variyá ein kayoi ume Tiyarafenu ano ída yankafiyen mino. ¹⁴Adamun táké ma arái uren eren Mosesintá ma e kanaí ukhá eintá purini ákona yafikhan minó ano furiyaren mino. Mai kéká ano ída Adamu ma mana ákona are varákeiníen mifo vetí ankan paran puriyaren mino. Ínainpáké Yisasi ma ena avúavá baran nain mi Adamu faran aní ukhan mino.

¹⁵Máan tukhen mifo Adamuni ume vá Tiyarafenui sarisari vá ída manaí ukhen mino. Mai fara vara seyo, mana vantaí umerái minó nanin banta ano furiyaréin mi Tiyarafenui sarisarii ákona anon Yisas Karaisin pinté uaren banasii ume arúden evaránen avíken mino.

¹⁶Tiyarafenui sarisari ano Adamuni ume vá ída manaí ukhein mi setimpin afoká é iyan mino. Adamu ano umeí ureintái Tiyarafenu ano minó nanin banta van umeí ukha ono sikhá maé tetí ankan moéké ume avúavá bariyá tifékun maen Tiyarafenu ano mai van ída inin tetin tarisari uren puntákein nanin banta e sen taré iyan mino. ¹⁷Adamu veyáká umeí ureintái furin mano minó nanin bantafin afoká ukharen mifo Tiyarafenui moékakhein tarisarirá ma funtákein avúavá baran nain kéká anon Yisas Karaisin pinté uaren ume vá purin má esantanten mino.

^{18g}Máan tukhan mi mana vanta anon man baya yurafúdein anarái Tiyarafenu ano seti minó nanin banta mai umerái kó tisintákaren mino. Máan manan en mi mana vanta ano funtákein avúavá uren tétin e sivían Tiyarafenui kékasí uren mi véi ayun ma fara van aunan tetin timen mino. ^{19h}Para vara seyo, mana vanta ano ma vaya átakharé ureintái minó nanin banta ano veni avúavá baren umeíin nanin bantaí ukharen mino. Máan manan en mi mana vanta ano ma Tiyarafenu oo yaiyúká eintái kokhon nanin banta ano véin avorá puntákein nanin bantaí inten mino.

²⁰Minó nanin banta ano vetíi ume afová ino van Tiyarafenui man baya amirákan beti mai man baya moéken durafuriyaren mino. Durafuriyáken kokhon umeí ma iyan maen Tiyarafenui sarisari ano moéken kákaní iyaren mino. ²¹ⁱMáan tukhan mi ume avúavá ano vetíi yafisiní ukhen mi mai ume anon purin afoká uanten mino. Máan tukhen mifo setisi Bafan Yisas Karaisini yorantái Tiyarafenui sarisari ano yafisiní ukhan mi véi setin tarisari uren teti nan puntákein nanin banta e sen tarará ayun

^d5:9 Rom 1:18; 2:5; Efe 2:3-5 ^e5:12 Esé 3:6; Rom 6:23 ^f5:13 Rom 4:15

^g5:18 1Ko 15:22 ^h5:19 Ais 53:11 ⁱ5:21 Rom 6:23

para van oriyán ban aunan manté tíféuno.

Umei Ákona Ma Kípakhein Baya Ino

6 Taréa inte esá teti sé tífante rafuno. Umei aná teti é oriyá bá tífékun ná Tiyarafenu ano sarisari en oriyán banten nafino. ²Ída uron mino. Teti inka ume avúavá kíparé purein an dakhé umpo mai intesá uré evarané ume avúavá baranté tife rafuno. ³Jtetí ankan ma Yisas Karaisin má ma manafin túpá uvé monó non baré inká manafin túpá uvé puré ma ukhá é tiferuna mai sireti áunte rafono. ⁴kMonó non ma feré tiferuna anoi Karaisini furin má teti súpá uvékun mi Tiyarafenu ano Karaisin má manafin masí ukhen mino. Be Afóe ano ma Karaisin masí pintena ma vei kákan ákonafó avían manteiní é teti ankan auyen aunan mamaré bá tífanté uno.

Yisas Karaisin Má Ma Mumunan Nanin Banta Ano Orun Mantakhein Baya Ino

⁵Teti ankan Karaisini furin má manafiní ukhé tiferuna véi ma e manteiní é tetin má dere e mantá tífanté uno. ⁶1Teti ankan ma umei yoran bantaí ma ukharé é tiferuna mai inka Karaisin ma yaa unkamádantá aruan purein mano setin túpin ma yoriyaré ein umei ákona kípakhein mino. Máan tukái seti ída umei yoran bantan bá tíféuno. ⁷Para vara seyo, setí ankan ma Karaisin má pureuna anoi umei ákona fintena ampiádá bá tíféuno.

⁸Inká teti ankan ma Karaisin má manafin puró tífanté béini auyen aunan bará tífantéi afová ukhé tíféuno. ⁹Para vara seyo, Karaisi inka masí pinté e mantakhein béi ída enádá purintéi teti ankan afová ukhé uno. Mai furini ákona ída

vain ída kanaíen béin maman bararasí inten mino. ¹⁰Béi ma manádá ana ma furein avúavá anon umei ákona kípaáden mino. Máan turen mi véi Tiyarafenu aví daní ono van para van mino.

¹¹mMáan manaeya siretí ankan má dere umei ákona aránaópá ída va ompo Yisas Karaisin pinté uare vá Tiyarafenu aví daní ono vará para vano. ¹²nTiretí ankan ída vá áesiná ume ano siretí avúaváká dafisino. Mai fara vara seyo, ume ano e yarifaáantiya namu avúavá ánain bákurin nono. ¹³oTiretí ankan ída vá mana vukhafa áesin ná umei yoran danasí ukhen ná ena nanin banta namu uantiyan bano. Ída vá máan tiyáke vá Tiyarafenu ma auyen aunan amikhein nará tiretí ankan pura sire vá minó bukhafa véin ná ameno. Tiretí ankan e au áesin ná Tiyarafenui yoran danasí uven ná beni funtákein avúavá dorarí ino. ¹⁴pTaréa ume ano ída siretí ankantá dafíken mino. Mai fara vara seyo, siretí ankan taréa ída man bayai aránaópá ba ompo Tiyarafenui sarisari aránaópái va ono.

Puntákein Avúavúí Yoran Bantaí Ma In Baya Ino

¹⁵Máan tukháí setí ankan ída man baya aránaópá taréa vátifé umpo mai intesá ótífante rafuno. Tiyarafenui sarisari aránaópá bá tífé umpo mai umeisá é oriyá bá tífante rafuno. Mai ída uron mino. ¹⁶qTiretí ankan ma mana yana san ma moéke ininteya mai veni miyan ída van doran bantaí ma inona ídá afová ukhe fono. Tiretí ankan umei miyan ma ída van doran bantaí ukheyá purinte fo áa Tiyarafenui vaya ánain ná bákureyá puntákein nanin bantaí inte fono. ¹⁷Tiretí ankan pefá umei yoran bantaí ukharé en nan ma Tiyarafenu ano

j6:3 Kar 3:27 k6:4 Kor 2:12 l6:6 Kar 5:24 m6:11 2Ko 5:15; Kar 2:19

n6:12 Esé 4:7 o6:13 Rom 12:1 p6:14 1Yn 3:6 q6:16 Yon 8:34; 2Pi 2:19

siretin ma vei auyen afova vava siamira ma yakhafiyaona vará Tiyarafenu susu siantano. ¹⁸Tiretí ankan umei yoran bantaí ukharé en nan mai finte Tiyarafenu ano ovaránen avíden maman puntákein avúavái miyan ída varan doran bantaí uraya va ono.

¹⁹Ayafa vanta kéká bá ída miyan baran doran banta kayo váká o siaré ma siamiyaruna mai siretí ankan kasae ineno van muno. Pefá tiretí ankan e au áenan pain avúavá bá baya átakharéin avúavá bá miyan ída varan doran bantaí ukhareya ompo saréa sireti au áesin ná puntákein avúavái ída miyan baran doran bantaí uvinti vá Tiyarafenu avorá kantasí ukhe vano.

²⁰Pefá ume avúavái ída miyan baran doran bantaí ma ukhá eona yamú kayofin puntákein avúavasí ma inan tiretí ankan ída iniyare ono. ²¹Mai avúavá ano intéa kama yanasintá maman afoká uáden nafino. Ída ifo mai ano e aú iyampon ma aruan purin manan maman afoká ukhayai siretí ankan ma fefá bariyá eona avúava san taréa ayave iya ono. ²²Ayave van iyaré enan Tiyarafenu ano umei ákona fintena siretin evaránen avíden bei ída miyan baran doran bantaí ura va ono. Máan ma eona anon puntákein avúava afoká intiya fara van oriyen ban aunan baran nono. ²³¶Para vara seyo, umei miyan purin mana ifo setisi Bafan Yisas Karaisin pinté uaren Tiyarafenu ano vei amusin mi ayun ma fara van oriyen ban aunan tetin timikhen mino.

Taréa Seti Ída Man Baya Aránaópá Bá Tiféuno

7 Mumunan ukhe ma man baya afová ukheona kéká soe, mai ma ída furin para vain kéká ano vá man baya ánain dakhafino ma sikhein mai siretí

ídá afová ukhe fono. ²Mana ábasui avúavákái siádanté uno. Anasi ano ma vanta mantantin ma ve avafu ída furin para vantin maen mai man baya ano ve avafu má damuádan ban mifo ve avafu ma furintin man baya ano ída enádá bá be avafun má damuádan-ten mino. ³Máan tukhen mifo vanta ma ída furin para vantin ma ve aná ano ena vanta e manten o varanten maen mai nanin mano famúku avúavasí inten mino. Máan tinten mifo ve avafu ma fúbintin maen mai man baya ano ída véin damukhein ena vanta ma varanten mai ída famúku avúavasí inten mino.

⁴¶Máan tukhanti mumunan tifá tiváeyan noe, ma vá afová ono. Tiretí ankan man bayai ákona finté Yisas Karaisin má daa unkamádantá púken nan mi Mosesini man baya ano ída fákaáda va ompo mai ma furin pinté e mantakhein banta vái kase vaono. Máan tukhaona kasae Tiyarafenu avorá kama yorarí iyáke kama aran imádan nono. ⁵Tetí ankan ma feyante sinunu ánain ma fara yakhafiyá bá tiferuna anon tetin túpin umeíin ineine édaviyan mino. Máan tiyain mano man baya mamádan umeíin inin erí ma umeí urékun mi furin afoká iyaren mino. ⁶¶Máan tiyaré ma setí ankan Yisas Karaisi má pureruna anon man bayai ákona fintena utútintádan ída mai ano setí ankan damukhen mino. Máan tukhantí ída setí ankan peyante man baya ano ma uvantein bompon ánain dakhafó tifanté umpo Kantá Aunani auyen avúavá kái fure sé Tiyarafenu ánain dakhafó tifanté uno.

Tiyarafenui Man Baya Ano Ma Setisi Ume Maman Afoká Ein Baya Ino

⁷Tiyarafenui man baya ma iniyaruna anó umeí iyá tife rafuno. Ídá ino. Man

¹6:23 Rom 5:12, 15 ²7:4 Rom 6:2, 11

³7:6 Rom 8:2; 6:4

baya ano ída umeí iyan mifo setisi umen aní usinté iyan mino. Para vara seyo, man baya ano ma sen “ída vá ena ina yana san aran nano.” Eks 20:17; Diu 5:21 Man baya ano ma ída sisimikhantí mai séi ída kanaí é afová onté uno. ⁸Máan tonté erunaren mifo man baya finté uaren mí ara ara sinunu mamádan tetin túpin édavé iyan mino. Man baya ída varé intin umei ákona ída van nainten mino.

⁹Téi man baya ma ída afová ukhé maé mai séi kana vá uno siyaré umpo man baya ma ineruna anon téi ume vantan baruna furonté uno sé afová é uno. ¹⁰Man baya ano kamaen ayun ma fara van oriban ban aunan ma simeren mifo furin miyan manan timen mino.

¹¹Man baya ano séin mákádá umeí urékun mairái man baya ano umeí e ono siren purin miyan timen mino. ¹²Máan ten mifo man baya ano veyan ádun ban puntáden kantasien kama ukhen mino. ¹³Kama ukhen mifo mai kama avúavá anó téin tiruan ná puriyan nafino. Ída uron mino. Mai ume ano kama yaná pókéi séin purin miyan timen mino. Kama man baya anon téi ma varyaruna yanasinta van mai namu avúavái varyiáke umeí iya ono siren aní iyan mino. Tiyarafenui man baya fókéi ume ano namu yanasinta afoká iyantí mai setí ankan umei namu yanasinta fura sé oná tifanté uno.

Tetimpin Ma Namu Avúavá Bá Kama Avúavá Bá Aruviyain Baya Ino

¹⁴Man baya ano funtáká afová ukhé tifé umpo séimpin ma aau vain manon ten maman umei ída miyan baran doran bantaí uren ná bá uno. ¹⁵W^wTéi ma varyaruna avúavá ída afová ukhé uno. Mai fara vara seyo, funtákein avúavá

barano ma seruna ída varéiyá umpo ída ma sinunu ukhein avúava sintan téi varyiá uno. ¹⁶Bariyá umpo séi ma varyaruna avúava sinta van ma ída sinunu ékun maen mai anon man baya van kama yaná ino sen aní inten mino. ¹⁷Aní inten mifo mai ída seyantá namu avúava sinta varyiá uno. Ída ino. Ume ma sen túpin bain manon namu ineine simí bariyá uno. ¹⁸Dan buk hafai anunu ánain bákuré moékantá namu avúavasí ékun mai ano sen túpin ída mana kama avúavá báká afová ukhé uno. Mai fara vara seyo, kama avúavá ana varano van iyá umpo ída kanaí é baré iyá uno. ¹⁹Téi kama avúavá ma varano seruna mai ída varé iyá uno. Inká namu avúavá ma ída varano seruna mai séi varé iyá uno. ²⁰Baré iyá umpo séin ma ída sinunu ukhein avúavá ma varé iyaruna mai ída seyantá baré iyá uno sé iniyá umpo sen túpin ma vain ume anon baré iyan mino.

²¹Máan tukháí séi onékun mai avúavá ano sentá dafíkái séi kama avúavá ma varano van ékun maen namu ineine ano senti aa iyariyan ban mino. ²²Máan tiyákái séi Tiyarafenui man baya van pura sé te súkáké tinunu ukhé uno. ²³x^xMáan tukhen mifo séi onékun umei ákona ano sen túpin báken mai ano senti ineine vá aruvé iyan mino. Mai umei ákona ma séin túpin para vain manoi maman bararasí uren miyan ma ída varan doran bantaí urá bá uno. ²⁴Mai ume anon téin maman kákan umampin kaen mifo iye anó mai fintena séin tiya uren tiviranten nafino. ²⁵y^yTetisi Bafan Yisas Karaisin pinté ma uaren tiyaein nan mi Tiyarafenui tusu sianté uno.

Máan tukhein nan mi sesi ineine finté Tiyarafenui yoran bantaí ono van inikhé umpo yan buk hafai anunurái

umei miyan ída varan doran bantaí ukhé uno.

**Kantá Aunan Táké Ma
Aunan Bariyain Baya Ino**

8 Máan tukháí Yisas Karaisin má ma manafin túpá ukheruna nanin banta mai man baya ano ída kanaíen kó tissanten mino. ²Mai fara vara seyo, Yisas Karaisin pinté uaren mi aunan ma amé iyan mai Kantá Aunani ákona anon ume ú purin núí ákona finte setin útúfen mino. ³Man baya ano ume fintena ída kanaíen tetin tiya oren eimpin Tiyarafenu ano setin tiyaono van ena aa uvisen be Anin tiantan barará banta an daven eren mifo véi ída ume vain banta ino. Tiyarafenu ano mai aa sákéi setisi ume van be Anin tiantan daa unkamádantá e fúaren umei ákona ano ma setintá dafikáré ein mai aruan puren mino. ⁴Man baya ano ma fefá tikharé ein mai setimpin mo kanaí ino van mi mai avúavá baren mino. Máan tukháí saréa setí ída ume avúavá ánain dakhafiyá umpo Kantá Aunani avúavákái yakhafiyá tiféuno.

⁵Bara ráke avúavá ánain ma yakhafiyain kékái ineine ano vara ráke avúava san mi iné iyan mifo Kantá Aunani avúavá ánain ma yakhafé iyain kékái ineine ano Kantá Aunan mano ma anunu ukhein mai ánain mi yakhafiyain mino. ⁶Bara ráke avúavái anunu ánain ma yakhafin nain kéká ano furinten mifo Kantá Aunani anunu ánain ma yakhafin nain mai kéká ano ayun ma fara van aunan mamaren ará kusen banten mino. ⁷Mai fara vara seyo, vara ráke avúava san ma anunuin manon Tiyarafenu namuroí uantiyáken ída veni man baya ánain dakhafé iyan mino. Máan tiyain ínaimpáké ída kanaíen

beni man baya ánain dakhafinten mino. ⁸Máan tukhantín mi vara ráke avúavái anunufin ma noin kéká ano Tiyarafenu ma amusin ukhein avúavá ída kanaíen baranten mino.

⁹aBaranten mifo siretí ankan ída enádá bá bara ráke avúavápin no ono. Ída ino. Tiyarafenui Aunan ma siretí ankampin ma vantín mae mai siretí saréa Kantá Aunani avúavápin mi no ono. No ompo Karaisini Aunan ma ída mantein kéká mai ída Karaisini kéká ifo afova sá ono. ¹⁰bUme avúavá ano siretín au aruan purinten mifo Karaisi ma fúaren e mantein manon Tiyarafenu avorá funtákein kékasí ukha ono. Máan tukhen nan Yisas Karaisi ma siretimpin bain manon tiretín aú iyampon ayun para van mino. ¹¹Tiyarafenui Aunan mano Yisas Karaisin masí pinta avían manten mino. Mai Aunan ma siretí ankampin ma vantí mai ma furin bukhafafin Aunani yorantá Tiyarafenu ano ayun ban aunan aminten mino.

**Kantá Aunani Ákonafó Ma
Mumunan Iyain Kayo Mai
Tiyarafenu Akhafana Ino**

¹²Mumunan tiyofí tifá tiváeyan noe, setí ankan auyen avúaváká ana vá nó tifano. Teti feyante arái avúaváká nono vara siya rauno. Ída ino. ¹³cTiretí ankan ma feyante arái avúavápin ma nonteya mai furin nompo Kantá Aunani ákonará ma minó aui namu avúavá ma aruan purinteya mai siretí ankan ayun ban aunan baran nono. ¹⁴Minó nanin banta ano ma áin ma Tiyarafenui Aunan mano ma aviren oriyain mai Tiyarafenu akhafanan ban mino. ¹⁵deMai Aunan ma Tiyarafenu ano amikhein mano ída siretín maman para yoran bantaí urantiya siretí evaráne akhokho van

^a8:4 Kar 5:16, 25 ^a8:9 1Ko 3:16; 12:3 ^b8:10 Kar 2:20

^c8:13 Kar 6:8; Kor 3:5 ^d8:15 Mak 14:36; 2Ti 1:7 ^e8:15 Kar 4:5-7; Rev 21:7

inono. Ída ino. Tiyarafenui Aunan mano siretin maman Tiyarafenu akhafanaí iyan mino. Kantá Aunani ákonarái seti máa sé Tiyarafenu van aréiyá tiféuno. “Tifóe oe, Tifóe oe.” ^{16f}Mai veni Kantá Aunan mano setinti sú iyampon tisimí tiféi seti Tiyarafenu akháí vá uno sé iyá tiféuno. ¹⁷Teti Tiyarafenu akhafanan bákun mai ma véi simeno van tisin-tákein daná ma setin tifá tiváe Karaisin ma amikhein mai kama yaná baranté tiféuno. Béi ma uman barein máan té ma saréa seti uman mantaré ínainpá teti kákan bí mamaré ben má kama kumanirí onté tiféuno.

Ínainpá Ma Kákan Bí Baran Nain Baya Ino

¹⁸Ínainpá ma Tiyarafenu ano setin kákan bí timin nain mano saréa ma seti varyiaruna uman má ída manaí inten mino. ¹⁹Mai fara vara seyo, Tiyarafenu akhafanaí ma ukháin nain kéká ma maman afoká inain damu san mi véi ma uvantein danasinta ano ave ukhen mino. ^{20g}Minó daná ma saréa ma váken ma namu ukhein mai yanasinta ída vei anunurá afoká ukhen mino. Ídaino. Tiyarafenu anon betin afoká uráken betin kama avúavá uantano van iyákan ave ukhen mino. ²¹Ave ukhen ma fúaren pútaono van ma iyaréin nain uman pintena ma utúantantin Tiyarafenu akhafana vá ma kákan bí baran nain mai van mi ave ukhen mino.

²²Para vara seyo, Tiyarafenu ano ma uvantein danasinta ano mai ma anasi ano iyampon kaono van inamun nan ma aureinén eriyán bá tetí ankan afová ukhé tiféuno. ^{23h}Ída mai yanasinta ano ana aí bariyan berai siyan mifo setí aráí in amusin ma Kantá Aunan timikhein

kayo ano yeren mai uman pintena útútintano van mi verai siyá tiféuno. Máan turen Tiyarafenu ano ma setin auyen bukhafa simiren inká maman be akhafanaí suron ono van ma siádan bain damu san mi ave ukhé tiféuno. ²⁴Tiyarafenu ano setin evaránen tivídái véi ma kama avúavasí usintano van ma sikhein nan mi setí ankan mumunan ukhé béin ave iyá tiféuno. Mai fara vara seyo, fefá ma mantanuna yana san ída ave iyá bá tifanté uno. ²⁵Máan tó tifanté umpo mai ma ída mantanuna yanasinta ma varano sé tifanté mai setí ankan tirá kusin má bákesá ave ó tifano.

²⁶Máan ma ukhé tifékun mi Kantá Aunan mano setin uman pintena siya inten mino. Mai fara vara seyo, setí ankan ma simúkonuna yanasinta ma ída afová ukhékun maen mai Kantá Aunan mano setin tiyaen berai siyan Tiyarafenu amúkuan aminten mino. ²⁷ⁱMai ma setin túpin afová ukhein Tiyarafenu anon Kantá Aunani inin afová ukhen mino. Mai fara vara seyo, Tiyarafenui ineine ánain mi yakhafen Kantá Aunan manon tetí mumunan kéká ákonaen amúkus-inté iyan mino. ^{28j}Tiyarafenu ano ven nan ma anunu ukhein kéká ayaino van mi minó danápin doriyái setí ankan afová ukhé tiféuno. Tiyarafenufin manáa ákona ineine vain nan mi mai kéká arakhen mino. ^{29k}Para vara seyo, Tiyarafenu ano vei vanasíí ma inain kéká ma maman be Anin an darantin ma mai nanin banta aváení ma ve Anin mano inain mai véi fefái afová ukharen mino. ³⁰Béi ma fefá aní ukharé ein kékái arakhen mino. Mai ma véi arakhein kéká san puntákein kéká ino sen araren mai kéká kákan bí aminten mino.

**Mana Yaná Ano Ma Ída Kanai
En Tiyarafenui Avábá Pinte
Yo Siviran Nain Baya Ino**

³¹ Tiyarafenu ano ma kama avúavasi ukhein nan mai inte esá teti sé tifante rafuno. Tiyarafenu ano ma setin tiya ukhantín maen mai iye anó kanafen tetin namuroí usintanten nafino. ³² Tiyarafenu ano ída ve Anin pákan tetin tiyaino van béin tiantan eren mino. Be Anin ma setin timikhanten maen mai ídá ena yanasinta vá dere fara siminten nafino.

³³ Tiyarafenu ano ma setin maman bei náí ma urantí bá tifékun maen mai iye anó tetin kó tisintanten nafino. Ída ino. Tiyarafenu ano veyantái setin nan puntákeín nanin banta e sen tarakhen mino. ³⁴ Iye anó teti nan ume ayá namu miyan barano sinten nafino. Ída ino. Yisas Karaisi fúaren e mantavin Tiyarafenu ano véin kákan bí amiran ben ayan kurompá báken tetin tiyaino van Tiyarafenu siamiyan mino.

³⁵ Karaisini avábá pinte náí yaná anó tetin do sivranten nafino. Aau anó tetimpin afoká inten nafi uman nafi vanta kayo anó tetin namu usintanten nafi sirafan nará ótifante rafu ída ma suí daná ban nain mano fi áa namu yaná anó tetin namu inten nafi áa furin nan ma akhokho van in mano fi mai minó máa yanasinta ano kaná Karaisini avábá pinta yo sivranten nafino. ³⁶ Mai yanasinta ma setimpin ma afoká é iyain mai Tiyarafenui vompon dóki ano máa sikhán mino.

“Tetí ankan eni vanasin bákun ena ena yamú tetin tiruan puriyan mino. Sipisipi an den tetin timen tíkano van manan iyan mino.” *Íbo 44:22*

³⁷ Máan tukhé tifé umpo mai yanasinta afoká inten mifo mai ma Karaisi ano setin nan avábá iyain mai véi anon tiyaintí mai yanasinta esantanté uno.

³⁸ Ída mana yaná ano kaníen beni avábá pinta setin do sivranten mino. Purin má ayun ma fara van mano fi áa enisori kayo vá namu aunan má ano fi áa saréa ma afoká ukhein danasinta vá ínaimpá ma afoká inain danasinta vá ano fi áa minó ákona vain ara ara yanasinta vá ano fi mai yanasinta ano ída kanafen Tiyarafenui avábá pinta setin do sivranten mino. ³⁹ Tetí ankan dan uron ná un bá tifante rafu áa un nompin námen ná orun bá tifante rafu mai Tiyarafenu ano ma uvamádan bain mai yanasinta ano ída kanafen tetisi Bafan Yisas Karaisin táké ma Tiyarafenu ano aní ukhein avábá pinta seti yo sivranten mino.

**Tiyarafenu Ano Ma Isareri
Kéká Aní Ukhein Baya Ino**

9 Téi Karaisini yoran bantan bákun Kantá Aunan mano se súpín báken ineine simiyái ída kampun tin téi fura vaya anan tiyá uno. ² Ena ena yamú te súpín kákan tirunan ná édaviyáká kokhon ineine anan iyá báé iyá uno. ³ Isareri kéká ma se siyofi sífá tiváeyan ma vain mai Tiyarafenu ano evaránen avirano van mi iniyá uno. Téi ma Karaisin pinte yo sisintan nain mano ma vetin ayairí ma ukhantín mai kasaen téin tisintano van mino. ⁴ Betí ankan Isareri nanin bantan bákun mi Tiyarafenu ano vetin nan be akhafana e sikhén mino. Tiyarafenu ano vei kakhán má ákona vá betin aní uren betí ankan má ará manafin kasén ban avúavái aníen bei man baya amen mino. Amiren monó tin avúavá betin aní uantáden kama yaná

iyáantan ban mino. ⁵Pefá betí anafu aráo ano Tiyarafenui yorampin aví bain nanin bantan baré íkan mi Karaisi ano vetí kékápin mi vantafen mino. Karaisi véi Tiyarafenun báken minó danáká dafíken mifo ena ena yamusá ben aví daní ó tifano. Mai fura ino.

**Tiyarafenu Ma Iyáantan Daná Ma
Varé Iyain Mai Vei
Anunurái Amé Iyan Mino**

⁶Tiyarafenu ano ma Abaraamun iyántákaré ein baya ano ída fa savifá afe en mino. Ída ino. Para vara seyo, Yekopun ana akhá pinté ma e afoká iyain kéká ano seti Isareri kéká uno siyan mifo ída fura sen Tiyarafenurá mumunan ukhen mino. ⁷Abaraamun pinté ma ayuman ukhein nan mi véin ana akhafanan bá uno siyan mifo vetí ankan ída fura sen ben ana akhafanan ban mino. Para vara seyo, Tiyarafenu ano fefá Abaraamun máa sen tiamikharemí, “Kokhon iyampon kaesin banten mifo Aisakin pinté ma ayuman inain nanin banta mai senti kékái vanten mino.” *Esé 21:12*

⁸^PMai vayai ana máan mi ukhen mino. Abaraamuni nare ráké ma afoká ukhein mai iyampon kéká pinté manáa anon Tiyarafenu akhafanaí ukhen mifo Tiyarafenu ano ma iyáantantá ma mumunan in avúavá káké ma afoká ukhein mai kéka san mi Abaraamuni kéka se siyan mino. ⁹Mai van mi Tiyarafenu ano máa sen iyáan temí, “Mai ma sikará onuna yamú ma séi ovarané erékun maen Sara ain iyampon kainten mino.” *Esé 18:10, 14*

¹⁰Mai ma sikharé ein iyampon teti sinafu Aisakin mi kain baren e anoní uaren Revekan mamáken ain iyampon kanan karina kaen mino. ¹¹⁻¹²Reveka karina iyampon kanan kauran maen Tiyarafenu ano míkani kama avúavá

bá namu avúavá bákasa ódaren aníen naino. Ída ino. Tiyarafenu ano vei anunurái mana aníen mino. Béi fe o útúben Revekan tiamikharen mino. “Esé ma ká inain iyampon mano ínain ma afoká inain iyamponi yoran bantaí in-ten mino.” *Esé 25:23*

Mai ma siamikharéin ma afoká ein avúavá ano Tiyarafenui ineine ánain mi vákuren mifo seti ma kama yoran má namu yoran má ma variyarunara saino. Ída ino. ¹³Tiyarafenui vompon dóki ano máa sikhen mino. “Téi Yekopun nan mi sinunu iyá umpo Iso nan ída sinunu iyá uno.” *Mar 1:2-3*

¹⁴Mai van Tiyarafenu ano ída funtákein avúavasíi iyan minó té tifante rafuno. Ída ino. ¹⁵Mai fara vara seyo, Tiyarafenu ano Mosesin pefá tiamikharen mino,

“Téi mana vanta ma sirunan uantano van tesi sinunurái máan té iyá uno. Inká téi mana vanta ma avábá uantano van tesi sinunurái máan té iyá uno.”

Eks 33:19

¹⁶^QMáan tukhan mi Tiyarafenu ano ma iyáantan daná ma varé iyain mai ída vanasii anunura safi yoranta safi varé iyan mino. Ída ino. Tiyarafenu ano vei anunurái amé iyan mino. ¹⁷Para vara seyo, vompon dókifin Tiyarafenu ano ena vava máa sen Kin Feron tiamikharen mino. “Éin ma maman kiní uréku vaona mai sesi kákan ákona éintá aní urékun ten tiví ano ma varará orera ino van muno.” *Eks 9:16*

¹⁸Máan tukhanti seti afova sá ó tifano. Tiyarafenu ano manáa kéká ma arunan uantano van mai vetin arunan uanté iyan mino. Inká béi ma manáa kékái ineinerá ma yasirádantin baya ída inino van ma é iyain mai vei anunu fóké máan té iyan mino.

¹⁹Tiretí ankan pinté manáa ano máa sin nono. “Tiyarafenu ano veyantá ma yuvun intin banasi ano namu avúavá bariyan nain nan mai fará tenti vaya ída iniyá uno sen béi sinten nafino.”

²⁰Ída vá máan baya seno. Éi varará banta ano iyé bakeyá Tiyarafenu ano ma vara nain avúava san asinte fono. Kave ano kanaísá en ná ben ma uvarein banta van ten ná, “Éi fará téin máan uvararí e fono” *Ais 29:16; 45:9*

²¹“Kave uvaran banta ano ma kankanan kave uváden maen mana kaverá kamaen bompon uren mai kave kama yorarí in kaen inká ena kave fara ena yorarí in uvaman kaen é iyan mino. Mai avúavá ano ídá puntáken nafino.

²²Tiyarafenu ano véimpin ákona vantin pasen banasi yaiminten mino. Máan tinten mifo inká beimpin ákona vantin kasaen mai ma veni vaya átakharé inain kéká ave ukharen ínaimpákéi yaíden uman aminten mino. ²³Mai fara va ino véimpin ákona van bei arunanápin ma aviádantin bano ma sikhein nanin banta vá deren bei kakhan aní intin onanten mino.

²⁴Tiyarafenu ano ma sen Yutan kéká bá ena anan nanin banta kayo vái arakhé uno ma siyain mai setin nan mi siyan mino.

²⁵Sakhanampa vanta Oseani vompon dókifin Tiyarafenu ano ena anan nanin banta kayo van máa sikhen mino.

“Mai ma fefá ída senti vanasi varé ein mai ínaimpáké tesi vanasi oe sé aranté uno.

Inká mai ma ída sinunu iyaréeruna kéká ínaimpáké móeké tinunu ukheruna kéká ino senté uno.” *Ose 2:23*

²⁶Inká ena anafin máa sikhen mino.

“Ída senti vanasi ono’ ma sikharé inain kéká san ínaimpáké ‘taunan

bain Tiyarafenu sikhafana ono’ sinten mino.” *Ose 1:10*

²⁷Isareri kéká san Aisaiya iniyáken ovaraaren temí,

“Isareri nanin banta ano kokhoníen non akhempá ma vain eyu an ma yesin maen

Bafan mano manáa nanin banta anan aviranten mino.

²⁸Para vara seyo, Bafan mano varará nanin banta ainen mi

kó tiantáden uman aminten mino.” *Ais 10:22-23*

²⁹Inká ena anafin Aisaiya máa sikhen mino.

“Minó ákona ma vain Bafan mano setin tinafu siráon manáa ída áen baren mai Sodomu vá Komora vá ma einíen minó tiruan kípanté ein mino.” *Ais 1:9*

Isareri Kéká Ma Ída Mumunan Ein Baya Ino

³⁰Mai avúava san tetí ankan inte esá tente rafuno. Máan ná té tifano. Ena anan nanin banta ano Tiyarafenu van ída yosiyán mifo vetíi mumunantá Tiyarafenu avorá puntákein nanin bantan ban mino. ³¹Ban mifo Yutan kéká ano man baya ánain dakhádé puntákein nanin bantaí ono van en mifo ída kanaíen mai avúavá baran nainíen mino.

³²Mai fara fino. Mumunan ma uren Tiyarafenu avorá puntákein nanin bantaí oren mi man baya ánain dakhafiyá kama avúavá baranté uno sen inikharen mino. Máa sen inikhan betimpin ída mumunan bakan mai ano kákan onámaná ma aasá bainí ukharéin eyúpóen ankamen mino. ³³Tiyarafenui vompon dóki ano mai van mi afova amikharen mino.

“Ineno. Banasi ano ma eyúpó en ma eraven ankamin nain onámaná

Yerusaremí kaonté uno. *Ais 8:14*

Mai onámanáká ma mumunan inain nanin banta ano ída ayave van inten mino.” *Ais 28:16*

Isareri Kéká Ano Ma Tiyarafenui Avúavá Ída Afová Ukhein Baya Ino

10 Mumunan tiyofi sifá tiváeyan noe, Tiyarafenu ano Isareri kayo aya uren evaránen avirano van mi sen tú ano vetin nan moéken anunu iyákái Tiyarafenu vaípa tímúkuan amé iyá uno. ²Téi afová ukhékun Tiyarafenu ma anunu ukhein avúavá ánain dakhafiyá uno siyan mifo véin ánain ma yakhafin mai avúavá betí ída afová ukhen mino. ³Mai fara vara seyo, Tiyarafenu ano ma vetin maman puntákein nanin bantaí ma in aa ída afová ukhen mino. Man baya ánain ma yakhafin avúavúpókéi Tiyarafenu avorá puntákein nanin bantaí onté uno siyan mifo Tiyarafenui funtákein ine inerá ída oriyan mino. ⁴Mosesini man baya inka Karaisi me kanaí ukhein minó nanin banta ano ma mumunan inteya mai Tiyarafenu avorá puntákein nanin bantaí inono.

Mumunan Nanin Bantan Ma Tiyarafenu Evaránen Aviran Nain Baya Ino

⁵“Minó man baya ánain ma yakhafin nain nanin banta anon Tiyarafenu avorá puntákein nanin bantaí inten mino” sen Mosesi vompompin uvantaren mino. *Riv 18:5*

⁶Máa sikhen mifo Tiyarafenu avorá ma funtákein nanin bantaí inain nan máa sikhemí, Yisas Karaisi aya ino van “ída kanaí e inaru fáke un avire eran nono.” *Diu 30:12*

⁷Inká máa sikhemí, “Yisas Karaisin evaráne avían mantano van ída kanaí e furin nanin bantai varufin aravin nono.” *Diu 30:13*

⁸Yisas Karaisintá ma mumunan esin Tiyarafenu ano siretin evaránen aviran nain nan bompon dóki ano máa sikhen mi, “Mai vaya ano yákó bákayai kasae vanasi siamiyan nan tiretin aúpin ban mino.” *Diu 30:14*

Mai vaya anan teti siamiyá uno. ⁹Mai fara vara seyo, siretin pinté mana ano ma Yisasi nan Bafan mino sireya ma Tiyarafenu ano masí pintena véin avían mantakhen mino seya aúkáké mumunan inteya mai Tiyarafenu ano éin evaránen aviranten mino. ¹⁰Mai fara vara seyo, setí túkáké ma mumunan iyarunarái Tiyarafenu ano setin nan puntákein nanin banta e sé iyan mino. Máa sé iyan mifo inká too fóké ma setisi mumunan tian amá iyarunarái Tiyarafenu ano setin evaránen tiviranten mino. ¹¹Tiyarafenui vompon dóki ano mai van máa sikhen mino. “Béintá ma mumunan inain kéká ano ída ayave van inten mino.” *Ais 28:16*

¹²Yutan kayo vá Kiriki kayo vá mai manaí anan ukhan betíi Bafan mana anan bakan mi vetí ankan ma inantein danasinta manaí uren amé iyan mino ¹³Mai fara vara seyo, “Bafan aví ma aran nain nanin banta mai véi aya uren betín evaránen aviranten mino.” *Yoe 2:32*

¹⁴Aviranten mifo vetí ankan ma ída véin nan mumunan iyáken intesá urená ayain nan be vaípa inantinten nafino. Beti ankan ída ma veni vaya inikhen mai intesá uren ná bentá mumunan inten nafino. Mana ano ma vetin ída vaya siamintin maen mai veti intesá uren ná beni vaya ininten nafino. ¹⁵Baya siamino van ma ída vanta siantantin mai inté uren ná baya siaminten nafino. Tiyarafenui vompon dóki ano máa sikhen mino. “Kama vaya ma varen eriyain kéká ano setin mi simusin timiádiyan mino.” *Ais 52:7*

**Isareri Nanin Banta Ano Tiyarafenui
Kama Vaya Kayo Iniyán Mifo Mairá
Ída Mumunan Éiyan Mino**

¹⁶Timiyan mifo ída minó nanin banta ano mai kama veya inikhen mino. Mai fara vara seyo, Aisaiya máa sikharen mino. “Bafan noe, setí ankan ma vetin tiamiyaruna vayará iye anó mumunan ukhen nafino.” *Ais 53:1*

¹⁷Karaisini kama veya ma inin avúavá anon mumunan afoká é iyan mino.

¹⁸Máan tukhen mifo Yutan kayo ano fura sen ná mai veya inikhen nafino. Eyo inka inikhen mino.

“Tiyarafenu ano ma minó danasinta uvantein baya ano inka minó nanin bantafin oriaren mai veya ano minó barafá orera ukhen mino.” *Íbo 19:4*

¹⁹Orera ukhen mifo mai fura sen ná Isareri nanin banta ano minó bayai ana afova suren ukhen nafino. Eyo mai fura sen betí ankan afova suren ukhen mino. Para vara seyo, Mosesini yamú dere Tiyarafenu ano máa sikharen mino.

“Ena vara fákena ída aví bain nanin banta séi avábá uantanuna van tiretin ará uman daantan nono.

Inká ena anan nanin banta ma ída afova vain kayo ma avábá uantanuna van tiretí ankan betin aranan uantan nono.” *Diu 32:21*

²⁰Máa siran ínaimpáké Aisaiya ano Tiyarafenu van máa semí,

“Téin nan ma ída yosiyaré ein kéká avorá inka yákó é uno.

Téin nan ma ída iniyá ein kékápin inka seyan aní é uno.” *Ais 65:1*

²¹Máa sikhán mi Isareri nanin banta van iniren Tiyarafenu ano semí,

“Minó damú betin ariyákun mifo senti veya átakharé uren ten toofá do yuriyan mino.” *Ais 65:2*

**Tiyarafenu Ma Isareri Nanin Banta
Arunan Uantein Baya Ino**

11¹Tiyarafenu ano Isareri kayo me oyan amikhará téi siya rafuno. Ída uron mino. Téi Abaraamun pinté ma ayuman ukhein Bensamenin anan bantán báke Yutan bantai vá umpo afova sá ono.

²Máan tukhékun Tiyarafenu ano fefá aráí in táké ma veinaí ukhein nanin banta ída me ampikhein mino. Mai van ma vompon dóki ano sikhein tireti ídá afová ukhe fono. Sakhanampa vanta Iraiya ano Isareri nanin banta ayaino van Tiyarafenu vaipá ákonaen máa sikhén mino. ³“Bafan noe, eni sakhanampa vanta kéká minó aruan púden éin ma íkun uan amin kará kayo vá dere varakuariyan karúdará teya anan ukhékun téin má tirono van dakhafiyá uno.” *1Ki 19:10, 14*

⁴Máa síkan Tiyarafenu ano ma evará-nen béin tiamein mai veya afová ukhe fono. Tiyarafenu ano semí, “Éi ída eyaká ana vaono. Dan manápá ifo afápá kan un kádan tauseni (7,000) ano ma kam-pun ayarafenu rá ída monó tiyain kayo vá deren para van mino.” *1Ki 19:18*

⁵Máan tukhan taréa minó Yutan kayo vá dere Tiyarafenu me ampikhen naino. Mai ma Tiyarafenu ano sarisari uren avikaré ein nan manáa ano fara van mino. ⁶Máan tukhan betí yorantasá aviken naino. Tiyarafenu ano vei sarisari rái aviken mino. Betí dorantá ma avikantin maen Tiyarafenu sarisari ano ída fura yanasíi inten mino. ⁷Máan tukhen mifo mai seti inte esá té tifante rafuno. Isareri kéká ano mai yaná barano van ákona yorari uvákon den mifo ída varan nainíen mino. Betí kéká pintena mai ma Tiyarafenu aní uran ben ninaí ukharé ein máa anon baren mifo

minó kayoi ineinerá dasirákaren mino.
⁸ Tiyarafenui vompon dóki ano máa sikharéin mino.

“Tiyarafenu ano vetin maman purin banta an daran auká bakhen eriyaren taréa vetin aurá iyádan ída onariín átarén dasíkarán ída vaya iniyan mino.”

Diu 29:4; Ais 29:10

⁹ Devitin má dere máa sikhen mino.

“Áesin ná beti ma omasí inain mano manan betí oyivan an davintin ná anuran ariyan nain nan kana vá uno vá tino.

Áesin ná mai amusin mano sin nainén uman barano.

¹⁰ Áesin ná betin auu yufúkuvintin ída vá onano.

Áesin ná uman mano amininá ódiven ayoron davénarantin ná mátinten bano.” *Íbo 69:22-23*

Ena Anan Nanin Banta Ano Afá Orifi Yaa An Dakhá In Ma Tiyarafenu Ano O Iyaaren Ayun Táke Orifi Yaará Ma Asótu Ein An Dakhein Baya Ino

¹¹ ^wMáa sikhen mifo mai fura sen ná Isareri nanin banta ano eraven ankan-ten ídá evaránen e mantanten nafino. Ída uron mino. Betí ankan ma Tiyarafenu oyan amiyain nan mi Tiyarafenu ano ena anan kéká evaránen avídan- tin Isareri kayo ano ódaren tetin mana sivi-rano van muno siren aranan ino van mino. ¹² Isareri kéká ano ma Tiyarafenu oyan amiran mai van mi ena anan nanin bantafin Tiyarafenu ano avábá amikhen mifo ínainpáké Isareri kéká ano ma Tiyarafenu vaípa ovaránen erintin maen minó nanin bantafin beni avábá ano mo kákani suron inten mino.

¹³ Mai van mi siretíena anan nanin banta ma vaona van mi séi siyá uno. Ena anan nanin bantafin baya varen orino

van ma Tiyarafenu ano séin aní ukhein mai kákan doran uron mino. ¹⁴ Mai fara vara seyo, Tiyarafenu ano ma sireti ena anan nanin banta kama avúavá uantan nain mano Isareri kayo auu yavo sintin Tiyarafenu ano senti yorantá betin pinte manáa ovaránen avirano van muno. ¹⁵ Mai fara va ino. Tiyarafenu ano Isareri nanin banta oyan amiren mai van mi sireti ena anan nanin banta avíden avábá uanten mino. Máan ten mifo Yutan kayo ano ma Tiyarafenu vaípa ovará- nen erinten maen mai fúkaren ma e man- teiníi intin Tiyarafenu ano vetin moékan avábá inten mino. ¹⁶ Abaraamu má Isareri kayo ma ayuman in banta kéká bá ano ma kantasí ukhantín maen mai vetin ana akhafana vá ano yeren kantasí inten mino. Inká daa arú kayo ano ma kama ukhantín maen mai yaa ayan kayo vá ano yeren mo kama inten mino.

¹⁷ ^xMáan tukhan maen Isareri kéká ano mai ayuntáke orifi yaa ana an mi yakhá en nan mi Tiyarafenu ano manáa ayan iyaren do varen mino. Do máden inká tireti ena anan nanin banta ano mai afá orifi yaa an mi yakhá en nan Tiyarafenu ano o iyaaren ayuntáke orifi yará ma asótu einén mino. Máan turai saréa siretí ankan ayuntáke orifi ayan ma einí uveyan mai yaa fintena anu variyákeya ana variya vaono. ¹⁸ Máan tukha ompo ída vá mai ma iyaan karú- dakhein ayan kayo van esantakhé uno se ineno. Tireti ma máan ineine ma iyanteya mai sireti afova sá ono. Ída yaa ayan mano arúpin anu aminten mifo yaa arú anoi yaa ayampin anu aminten mino.

¹⁹ Amé iyan mifo siretí ankan ída vá teya “Tiyarafenu ano mai ayan kayo síkaran bain téin maifin asotú inten mino” sire avan avan ono. ²⁰ Mai fura máan tin nampo Yutan kayo ano ma ída

mumunan ein nan mi Tiyarafenu ano yo síkaan karúdakhen mino. Tiretí ankan ma mumunan eona van mi maifin mamán asotú ura va ompo ída vá avan avan iyákeya siretin ma Tiyarafenu ano yo síkaan karúdan nain mai vará perano. ²¹Para vara seyo, Tiyarafenu ano fefá ma varé ein daa ayan ma yo síkakhanti mae mai siretí ankan má dere yo síkan-ten mino.

²²Maán tinten mifo Tiyarafenu ano kamaen avábá iyáken inká ákonaen baya siyan é iyan mifo afova sá ono. Mai ma Tiyarafenu oyan amé iyain kéká béi au-ufen kakháben ákona vaya sé iyan mifo véin nan ma anunu ein kéká béi avové uren kama uanté iyan mino. Tireti ma véin purase oyan amesin maen béin má deren tiretin oyan aminten mino. ²³Mai ma fefá daa ayan kayo ma sikakharé ein mai Yutan kéka san mi sikhein mai veti ma mumunan intin maen Tiyarafenu-ufin ákona vantin kasaen evaránen mamán mai ma síkakhareéimpin asótú inten mino. ²⁴Tiretí ankan afová ukha ono. Tireti fefá afá orifi yaa ayan an mi yakharé en nan Tiyarafenu ano síkaren ayuntáke orifi yaa anará mo asótú ura vaompo mai ída éi mai finte yaa ayan uron mono. Máan tukhantin pasen Tiyarafenu ano kasaen mai ma yo síkan karúdakharé ein ayan evaránen mamán asótú inten mino.

Tiyarafenui Arunaná Mai Minó Nanin Banta Ina Ino

²⁵Ena anan nanin banta ma mumunan iyaona kéka soe, aúpa baya sireti afová ono van muno. Ída vá teya Tiyarafenu ano Isareri nanin banta inka me oyan amiren teti nan mana iniyá uno sire au khákan ono. Manáa Isareri kékái ará bá ineine vá ano ákona ukhen bantin

ma ena anan nanin banta kayo ano mumunan en maifin mun asótú uvintin mi máan tinten mino. ²⁶Maí aa sákéi minó Isareri kayo evaránen avirantéin mi Tiyarafenui vompon dóki ano máa sikhen mino.

“Isareri kéká ma aya ino van ave ukharé ein banta ano Yerusaremíké eman-ten eren me ayaintin

Isareri kéká ano ma Tiyarafenu oofá átakharé iyá ein avúavá me an pinten mino. *Ais 59:20-21*

²⁷Ampirantí maí damúí séi vetí ume arúantádé

tirá manafiní é kasé banté uno.” *Yer 31:33-34*

²⁸Isareri kayo ano Yisasini kama vaya oyan amiran mai anon Tiyarafenu vá namuroíen mino. Namuroí ein nan mi Tiyarafenu ano vei avábá po ena anan nanin banta ayaen mino. Ayaen mifo fefá ma Abaraamun ana akhápin ma iyáan takharé ein nan mi Tiyarafenu ano veináí ukhein bákan taréa vetin nan para anunu ukhen mino. ²⁹Mai fara vara seyo, Tiyarafenu ano ma veináí ono siren aren ma inká bei amusin amen ma uran nain daná ída evará-nen do varanten mino. ³⁰Pefá tiretí ankan Tiyarafenui vaya átakharé iyare ompo saréa Isareri kéká ano ma vaya átakharé iyain mai anarái Tiyarafenu ano siretin tarisari uanten mino. ³¹Mai ma fefá baya átakharé iyá eonaíen mi saréa Isareri kéká ano Tiyarafenui vaya átakharé íkan mai van mi siretin tarisari uanten mifo maná damusí ma intin maen betin má deren Tiyarafenui sarisari varanten mino. ³²Minó nanin banta ano vaya átakharé uran mi Tiyarafenu ano vei sarisari aní ono van mi vetí ume avúava san karavusíí uádan baren mino.

Pori Ma Tiyarafenu Aví Daní Ein Baya Ino

^{33a}Ódoo. Onano, ven nina yanasinta vá afova vá ineine vá ma moékakhein Tiyarafenu ma vain nee.

Onano, véi ma ineine uren bariyain avúavá

mai seti ída kanaíe afová ó tifanté uno.

^{34b}“Iye anó Tiyarafenu ma ineine iyain afová inte fono.

Inká iye anó kanaíeya véin ineine aminte fono.” *Ais 40:13*

³⁵“Iye naré Tiyarafenu mana yaná amiresin ná anona éin ovaránen aminten nafino.” *Yop 41:11*

^{36c}Para vara seyo, Tiyarafenu anon minó daná uvamá daran beni ákonará báken mai yanasinta ano véin kákan bí amiyan mino. Béin avisá ena ena yaní ono. Mai fura ino.

Minó E Au Ma Tiyarafenu Íkun Uan Amin Baya Ino

12^dMáan tukhein nan ma sireti munan nanin banta ano ma Tiyarafenui arunana san ma ovare me iniyaona kayo oe, minó bukhafa vá Tiyarafenu ma íkun uan amiyan an deya vá ameno. Máan ma inteyan beni vanasí esin Tiyarafenu ano moéken amusin inten mino. Tiretí ankan ída vá ma vara ráke avúavá ánain dakhafiyákeya áesin ná Tiyarafenu ano siretí ineine maman auyení uranti vá puntákein avúavá basá nono. Máan ma urantiyan inte yanasá Tiyarafenu avorá kama ukhan ná ben ma

amusin amin avúavá ban ná puntákanti varano van béi inikhen nafi mai afová inono.

Tiyarafenu Ano Ma Setin Ara Ara Yorará In Amusin Timikhein Baya Ino

^{3e}Tiyarafenu ano vei sarisari fói séin aní uren bei yorará ino sikhái siretin tiamiyá uno. Tiretí ankan ída vá teya setisi sivútivá ano ena kéká esantakhen mino seno. Tiretí ineine yaídeya afová ure vá tiretí mumunantá ma Tiyarafenu ano amikhein doran ná puntáde yorano.

^{4f}Tetisi minó bukhafa ano ída mana yorará ana é iyan mifo mana mana vukhafa ano veyan ara ara yorará i é iyan mino. ⁵Máan manan é tetí minó ano Karaisini mana mana vukhafa an mi yakhé tiféi ara ara yorará ó tifanté uno. Karaisin má mana vukhafái ma ukhantesá ben aya ven aya é dorá tifano.

^{6g}Tiyarafenu ano setin ara ara yoraráin amusin paran timikhen mino. Máan tukhanti ma sakhanampa vaya sin afova éin amikhantiya mai ei mumunantasá Tiyarafenu ano ma siamin nain baya seno. ⁷Inká banasi ayain afova ma éin Tiyarafenu ano amikhantiya mai kama ure vá banasi aya ono. Inká arú doraráin afova ma éin Tiyarafenu ano amikhantiya mai kama ure vá afova ameno. ⁸Inká ará bá ineine vá ákona uantan afova ma amikhantiya mai yorarisá ono. Inká ona avaráin doran ma amikhantiya mai aúkáke sá avarí ono. Inká Tiyarafenu ano ma yafisin doran ma amikhantiya mai fura yorarisá ono. Inká éin ma ena sarisari in doran ma amikhantiya mai amusin iya vá dorano.

^a11:33 Ais 55:8-9 ^b11:34 1Ko 2:16 ^c11:36 1Ko 8:6

^d12:1 Rom 6:11, 13; 1Pi 2:5 ^e12:3 1Ko 12:11; Efe 4:7; Fir 2:3

^f12:4 1Ko 12:12, 27 ^g12:6 1Ko 12:4-11; 1Pi 4:10-11

Ena Ma Avábá Uantan Baya Ino

⁹Ena nanin banta ma avábá ono van pura se aúkáke sá avábá ono. Namu avúavá oyan amireya funtákein avúava sá pákaan ákona ono. ¹⁰^hTireti ankan Tiyarafenui vanasi vá ara amireya e afá aváeyan ma avábá iyaonai sá ono. Tiretí ankan eyan maman bararasí ure vá ena aví ana vá daní ono. ¹¹Tiretí ankan ída vá avesara yorarí iyákeya avúavá basá Bafani yorari ono. ¹²ⁱMai ma Tiyarafenu ano ma kama uantano van ma iyain nará amusin iya ave ukhe vá bano. Uman ma siretimpin afoká iyantiya mantaan ákona ukhe vá amúkiya vano. ¹³^jTiyarafenui vanasi ano ma mana yana san ma o afasí intiya mai vetin ná aya ono. Ena varu fáke nanin banta ano ma sireti vaonará ma erintiya mai vetin ná kama ure yafiseno.

¹⁴^kMumunan inona van ma vanasi ano ma siretin namu uantantiya ída vá aranan uantiyákeya Tiyarafenu vaipá amúkesin ná betin avábá ino. ¹⁵Amusin ma inain nanin banta vasá manafin amusin ono. Inká arunaná ma varan nain nanin banta vasá tireti manafin arunan ono. ¹⁶^lTiretí ankan banasi vá manafin ná amun amun iya vano. Tiretí ankan ída vá témpin mana afova vá uno sire kákan banta an diyákeya fara nanin banta vasá manafin bano.

¹⁷^mTiretí ankan ma namu avúavá uantantiya mai ída vá anona evaráne vetin namu uantano. Ída ino. Minó nanin banta ano ma siretin kama ineine uantaren avúavasá ena ena yamú barano. ¹⁸Minó nanin banta vá ma ará manafiní uren ma kusen ban aa vará ákona e yoseno. ¹⁹ⁿTe sirona kayo oe, siretin ma namu uantantiya anona ída

vá evaráne vetin namu uantano van iyákeya Tiyarafenui ayampin ná ampiádano. Mai fara vara seyo, Bafan mano vei vompon dókifin máa sikhen mino.

“Namu uantan ayá ma amin mai senti yoran mino.

Namu ma uantein ayá téi vetin afova amenté uno.” *Diu 32:35*

²⁰^oMáan tonté umpo mai ma vompon dóki ano sikheinisé ono.

“Namuro kéká ano ma arafan nan intiya yunan ná betin ameno.

Inká non nan ma intiya non ná dáan ameno.

Tireti ma máan tesin maen betí ma namu avúavá bariyá ein nan ayave inten mino.” *Pro 25:21-22*

²¹Ída vá áesin namu avúavá ano siretin maman bararasí ino. Kama avúavá posá namu avúavá maman bararasí ono.

Kamanini Ará Naópá Ma Van Baya Ino

13^pMinó nanin banta ano vá kamanini aránaopa sá bano. Para vara seyo, Tiyarafenu anon kamanin doran kain bákan béi anan minó kamanin ákona amikhan doriyan mino.

²Máan tukhanti kamanini man baya ma ída inin nain kéká ano mai Tiyarafenui vayan átakharé iyain ínaimpáké uman baranten mino. ³^qPara vara seyo, kama avúavá ma variyain kékasa kamani ano akhokho amen novara ino.

Mai ma namu avúavá ma variyain kékái akhokho ameno van mino. Máan tinten mifo kamanin mano ma inikhein avúavá ana ma yakhafinteya mai kama iya ono siren amo sinten mino. ⁴Tiretí ankan ayaintiya kama e vano van mi Tiyarafenu ano kamanin kain ban mifo sireti ma namu avúavá bariyá inte veni miyan baran nompó vá perano. Namu

^h12:10 1Pi 1:22 ⁱ12:12 1Te 5:16-18 ^j12:13 Ibu 13:2 ^k12:14 Mat 5:44; 1Ko

4:12 ^l12:16 Pro 3:7 ^m12:17 1Te 5:15 ⁿ12:19 Mat 5:39

^o12:20 Mat 5:44 ^p13:1 Pro 8:15; Tai 3:1 ^q13:3 1Pi 2:13-14

avúavá ma uran nain ma yaíden evará-
nen miyan amin nain mai anarái Ti-
yarafenu ano kamanin ákona amiren
kain ban mino. ⁵Máan tukhanti vá ka-
manini aránaópá báke vá namu avúavá
bá kama avúavá bá oman afová iyákeya
aau ma varan nará perano.

⁶Kamanin ma siretí ankan takisi
amesin maen beni yoran kéká ano
miyan bariyáken mi Tiyarafenu ano ma
amikhein dorantá ákonaen dafisinten
mino. ⁷Tiretí ankan nan ma yorano
sikhan nain doran purase vá dorano.
Tireti ma ye nan bain danasinta vá inká
enafáke ma ovariyaona yanasintará bá
ma kamani ano ma sakisi van inantin-
tiya mai kasae vá ameno. Inká tiretí
ankan kamanini aránaópá báke vá kama
avúavasá aní ono.

Ena Van Ma Anunu In Avúavá Ano Ma Tiyarafenui Man Baya Mo Kanaí Inain Baya Ino

⁸Ena ina yanasinta ma mantare
anona evaráne amin nompo ena ma
avábá in avúavá ano fara vá ban oriyan
bano. Para vara seyo, ena ma avábá
iyain avúavá anon Tiyarafenui man
bayan kanaí iyan mino. ⁹Tiyarafenui
man baya ano máan mi sikhen mino.

“Ída vá pamúkuí eya”

inká “Ída vá ena aruan pureya” inká

“Ída vá ena ina yanasinta umoyan
bareya” inká

“Ída vá ena ina yana san aran nano.” *Eks*
20:13-15, 17

Mai man baya kayo vá ena man baya
kayo vá anoi ma mana man bayafin
manan ban mino. “Eyan nan ma anunu
iyaonaíe vá ena van anunu ono.” *Riv* 19:18

¹⁰Ena nanin banta van ma avábá
iyaona ano mai vetin ída namu uantiyan
nan mai avábá anon Tiyarafenui man
baya mo kanaí iyan mino.

Bafan Yisas Karaisini Avúavá Ano Ma Siretíí Auí Daná An Ma Yan Baya Ino

¹¹Taréa ma vaona yamú mai avúavá
barano van mi siamiyá umpo afovasá
ono. Mai ma setin e sivranten mino
sire ma araíntá mumunan iyá eona maí
damú inka ádé en mifo aunan ma vakhá
eona vá orun mantave auu safe seno.

¹²Mai ma yuntaré ein inka yo kakhán
ádé iyan mifo ída vá dunin avúavápin
báke kakhakhein avúavá po sá maman
aruvín auí daná ma yampeini sá ono.

¹³Máan ture vá kakhakheintá ma noin
nanin banta an de vá puntádé nono. Tetí
ankan ída vá óen non nare sá óen é nóké
pamúku avúavá iyáké inká ena nanin
banta ina yana san ída vá tirá namu
uré tiruve sisive é nó tifano. ¹⁴Áesin
ná Bafan Yisas Karaisini avúavá ano
siretíí auí daná an dakhanti ída vá dan
bukhafai anunu ánain dakhafono.

Ena Mumunan Nanin Banta Van Ma Oyampá Baya Sin Baya Ino

14 ²Mumunan ma ída ákona ukhein
kékasá aya iyáke ída vá betí
ankan ma variyain avúavá daimono.

^{2a}Para vara seyo, manáa ano ma mumu-
nan iyain mai kasaé minó dunan nanté
uno siren niyan mifo manáa ano au-
raren maen manáa yunan máan né iyan
mino. ^{3b}Máan té iyan mifo mai ma minó
dunan ma niyain kéká ano ída vá mai ma
manáa yunan aurakhein kéká oyampá
bayo se siná inká manáa yunan ma au-
rakhein kéká ano ída vá minó dunan

¹13:6 Mat 22:21 ⁵13:8 Mat 22:39-40; Yem 2:8 ¹13:9 Diu 5:17-19, 21

^u13:10 1Ko 13:4-7 ^v13:11 Efe 5:14; 1Te 5:6-7 ^w13:12 1Yn 2:8

^x13:13 Ruk 21:34; Efe 5:18 ^y13:14 Efe 5:11 ^z14:1 Rom 15:7

^a14:2 Esé 9:3-4 ^b14:3 Kor 2:16

ma niyain kéká daimono. Mai fara vara seyo, Tiyarafenu ano minói aviranten mino. ^{4c}Éi iyé bákeyá enai yoran bantai avúavá daiminte fono. Daimin nompo veni avúavá ano mo kama inten nafi áa namu inten nafi mai Bafan mano anan betin daíden ayaintin mantaan ákona inten mino.

^{5d}Máan mana en mi manáa ano ma inin nain mano maná damú anan moéken kantasí ukhen ne sintin inká manáa ano ma inin nain mano minó damú ano maná anan ukhen ne sinten mino. Máan tukhanti inte inin manó ei inimpin kama ukhanten nafi mai ánain ná dakhafono. ⁶Mai ma maná damu san inian kákan damusí uren monó tiyain kéká ano mai Bafan nan mi iniren máan tiyan mino. Inká mai ma minó dunan niyain kéká ano Bafan nan iniren Tiyarafenun naren tusu siantáden né iyan mino. Inká mai ma manáa yunan ma aurakhein kéká ano Bafan amusin uantano van mi Tiyarafenun naren tusu siantáden né iyan mino. ⁷Mai van mi ayun ma fara van má purin má maen mai ída seti sinunurá banté tifé umpo Tiyarafenui na yaná ino. ^{8e}Bafan amusin uantano van mi ayun para vátifé umpo ínainpáké ma furonuna ano yere mai venina anan banté uno. Máan tukhantí seti ayun para vante rafu áa furonte rafu mai Bafan nina yaná ana ino.

⁹Mai ma fara ayun bain kayo vá mai ma fúkein kayo vái Bafan ninaí ono van mi Karaisi ano fúaren e mantakhen mino. ^{10f}Máan tukhen mifo mai fará ena mumunan kékái avúavá daídeya vetin maman bararasí iya fono. Tiyarafenu avorái mana mana ano mantavékun mi setin daiminten mifo afovasá ono. ^{11g}Tiyarafenui vompon dóki ano máa sikhen mino.

“Téi ena ena varuna Bafan mano fura uron té uno.

Minó ma varará nanin banta ano séi varunará eriven me aron durafúden te nan Tiyarafenu uron mino sinten mino.” *Ais 45:23*

¹²Máan tukhein nan mi setí afová ukhé tiféuno. Minó teti ma variyaruna sivútivá Tiyarafenu siamékun ná béi ana vá daimino.

Ena Mumunan Nanin Bantai Avúavá Ma Ída Yaimin Baya Ino

¹³Máan ná tin nompo ída vá mumunan nanin bantai avúavá daimin maran ono. Máan ma ótitanuna anoi vetí aa iyará tifanté uno. ^{14h}Bafan Yisasi ano senti inin amá usintá pura sé afová ukhékun mana yunan ma nan mano ída veyantá Tiyarafenu avorá painí ukhen mifo vantafó ma Tiyarafenu avorá namu ukhen ne siren ma mumunan inté inti mai vanta avorá mai yunan pura sen namu ukhen mino. ¹⁵ⁱMáan tukhantin ma inká éi niyanona van ma ena afá aváe ano ará namu uantantiya mae ma éi ída véi ará amiya ompo ída vá mai yunan nano. Para vara seyo, Yisas Karaisi véi ma san mi fúken mifo ída áesin éini yunan nan mano véin mamádantin umefin eraven ankan mino. ¹⁶Máan tukhantiya ída vá áesin ena mumunan nanin banta ano éi ma kama ukhe ne se inin nona yana san namu yaná ino vá tino.

¹⁷Para vara seyo, yunan má non má ma niyain mai ano va Tiyarafenui yafisimpin kákan danasí ukhen naino. Mai ma funtákein avúavá bá ará kusin má amusin in avúavá bá ma Kantá Aunan mano setimpin afoká é iyain mai anoi kákan danasí ukhen mino. ¹⁸Tiretí ankan ma Karaisini yorarí iyákeya máan avúavá ma varesin maen mai Tiyarafe-

^c14:4 Mat 7:1; Yem 4:11-12 ^d14:5 Kar 4:10-11 ^e14:8 Kar 2:20 ^f14:10 2Ko 5:10 ^g14:11 Fir 2:10-11 ^h14:14 Apo 10:15; Tai 1:15 ⁱ14:15 1Ko 8:11-13

nun mi amusin amesin banasi ano yere siretin nan kama yorari iyan mino sinten mino.

¹⁹JMáan tukhen mifo setisá ena nanin banta vá manafin tirá kusé bákesá mumunan avúavápin ben aya ven aya ó tifano. ²⁰kTiretí ankan ma niyaona mai yunan naro sire ída vá Tiyarafenui yoran máde asuse ono. Minó dunan kama ukhen mifo mumunan kéká ma mamá-dantin umefin eraven ankamoren dunan ma nan nain manon mai namu inten mino. ²¹Mumunan kéká ano ará uman daantáden ma eraven ankamoren mai safúna fi uvaini non nafi ída vá niyáke inká namu yaná ino ma sen afová ukhan nain daná ída vá barano.

²²Mai ma siretí ankan ída uman ban mino sireya mumunan iya ma variyaona yanasinta áin ná Tiyarafenu vá tirékan nampin mana vá bano. Inká mai ma funtákein daná ino siren mumunan iyan ma variyain kéká ano vá amusin ino. ²³Máan tukhen mifo mana vanta ano ma ída mumunan in kan inin má ma váken dunan nanten maen mai van béi umefí inten mino. Béi ma ída funtákein danasinta ino sen mumunan ukhein danasinta ma varanten mai véi umefí inten mino.

Ena Nanin Banta Aya Ono Van Ma Iyan Ban Baya Ino

15 Tetisi mumunan ma ákona ukhá baruna kéká ano vá mai ma vetíi mumunan ída ákona ukhan ma umampin bain kékasá aya ótifan numpo ída vá tetiyan nan mana ma simusin timin avúavá ana variyá bá tifano. ²lTetí ankan ná ena mumunan nanin banta ayaé tifékun ná betíi mumunan mano moéken ákona ino. ³Para vara seyo, Karaisi má deren ída veyan amusin barano van doriyá in mai van mi Ti-

yarafenui vompon dóki ano máa sikhen mino. “Mai ma siretin oyampá baya siyain kayo ano mai sen timaniná kain-ten mino.” *Íbo 69:9* ⁴mPara vara seyo, mai vaya kayo ano setin afova simiyantí mantaan ákona ukhé Tiyarafenuun ave ukhé tifékun tetin evaránen tivirano van mi fefá bompon dókifin uvantaren mino.

⁵Yisas Karaisin ánain ma yakhafiyante mai áesin ná mai ma kama ineine amiren ákona uantiyain Tiyarafenu ano vá bei Kantá Aunan póké tiretiyan ma manafin ban avúavá amino. ⁶Amirantii ará manafiní ure ma varanona yaná anon tetisi Bafan Yisas Karaisin afóe Tiyarafenuun avíi maman daní in nono.

⁷nYisas Karaisi ma siretin nan anunu uren avireiníe ma ena nanin banta anunu ure avirante mae mai anoi Tiyarafenuun kákan bí amin nono. ⁸oTetí ankan afovasá ó tifano. Yisas Karaisi ma Yutan kayoi yoran bantaí ma ein mai anoi mai ma vetin anafu aráompin ma iyántákaré ein baya ano kanaí intin mai Tiyarafenu ano furan tikharen mino sino van mino. ⁹pInká ena anan nanin banta avábá uantádantin betin má dere Tiyarafenu aví daní ino van mi Karaisi eren mino. Mai van mi vompon dóki ano máa sikhen mino.

“Ena anan nanin banta finté uaré éin aví daní onté uno.

Éin aví daní in í kayo yanté uno. *2Sa 22:50; Íbo 18:49*

¹⁰Tiyarafenui vompon dókifin enadá máa sikhen mino.

“Ena anan nanin banta kayo oe, Tiyarafenui vanasi vasá manafin amusin ono.” *Diu 32:43*

¹¹Inká evaránen máa sikhen mino.

“Tireti ena anan nanin banta oe, Bafan avisá daní ono.

j14:19 Rom 12:18; 15:2 k14:20 1Ko 8:13 l15:2 1Ko 10:24, 33

m15:4 2Ti 3:16 n15:7 Rom 14:1 o15:8 Mat 15:24 p15:9 Apo 3:25

Minó barará nanin banta oe, véin avisá daní ono.” *Íbo 117:1*

¹² Inká sakhánampa vanta Aisaiya máa sikhén mino.

“Yesin anan pinté ma afoká in nain banta ano minó barará diffbintin maen béi anan tiya uren evaránen tiviranten mino siren

ena anan nanin banta ano ventá mumunan inten mino.” *Ais 11:10*

¹³ Mai ma ameno siren iyáantáka ave iyaona Tiyarafenu vaipá timúkékun ayainti mumunan esin amusin má ará kusin má bíkaantanten mino. Mai ma varano sire ave iyaona inimpin Kantá Aunan mano moéken ákona amintin mantaan ákona in nono.

Pori Ma Vompon Uvarein Bayai Ana Ino

¹⁴ Mumunan tifá tiváeyan noe, Tiyarafenui kama avúavá inka sireti afová uren nan mai yanasinta ano siretimpin bíká téi fura siré afová eruna kasae ena nanin banta mai veya afova amin nono. ¹⁵ Tiyarafenu ano sein tarisari uren doran timikhá ein nan mi manáa ákona veya siretin uvaman ameruna mai ano kasaen tiretin ineine aminten mino.

¹⁶ Tiyarafenu anon ena anan nanin bantafin Yisas Karaisini kama veya mo siamino van mi séin aní uren monó ánon banta ano ma yoriyain avúaváká ten nan dorano van mai yoran timen mino. Kama veya mo siamékun Kantá Aunan mano vetin ayaintin Tiyarafenu ano ma ará manafiní é iyain íkun uan amin an dantin pura sen betin maman bei vanasií ino van muno.

¹⁷ Máan tukháí Yisas Karaisi ma seimpin báká maTiyarafenui yorarí iyaruna van mi simusin iyá uno. ¹⁸ Téi

ída ena yanasinta van baya seno van mumpo mai ma Yisas Karaisin pákena van ma siyá bariyá iyarunará ma ena anan nanin banta e mamádan Tiyarafenui oo yayiyain mai veya anan tenté uno. ¹⁹ Ara ara enará ukhein daná ma afokáin ákona Tiyarafenui Aunan mano séin timikhá Karaisini kama veya Yerusaremí ké arái uré avové é banasi e siamé oriya Iririkumí barafin mo kanaf é uno.[§]

²⁰ Tenti ákona inin ma vain mai Karaisini kama veya ma fefá inikhein akhempá ifá uré mai ma ída inikhein nanin bantafin ma mo siamin nan mi sinunu iyá uno. Ena vanta ano ma namádan daféádantá ma uvareiní ída ono van muno. ²¹ Tiyarafenui vompon dókifin máa sikhén mino.

“Mai ma Tiyarafenui veya ída siamikháin nain kéká ano onantin inká mai ma veni veya ída inikharéin nain kéká ano afová inten mino.” *Ais 52:15*

²² Mai ma Tiyarafenui veya ída inikharé ein barufimpái siamé noké tiretin ída ainé o oné uno.

Pori Ma Romú Orono Van Ineine Ein Baya Ino

²³ Ída ainé oné umpo mai varafimpá ma yoré noré eruna inka saréa me kípé uno. Tiretin nan kokhon oranarái o ineine é eriyá baréi saréa siretin o onano van iyá uno. ²⁴ Spenii varafá ma oronté maé tiretin naren e odé oronté uno. Tiretin má ma manafin o varééku mae siretíí aaí usintesí oronté uno. ²⁵ Uoronté umpo monó nanin banta ma Yerusaremí bain naren mo amusin moní amiré ínainpákéi oronté uno. ²⁶ Mai fara vara seyo, Masedoniaú Akaiáiú varafá ma Ti-

§15:19 Iririkumí mana Ítarí ádé ma vain bara ino.

¶15:12 Rev 5:5 ¶15:16 Rom 1:5; 11:13 §15:20 2Ko 10:15-16 ¶15:22 Rom 1:13 ¶15:25 1Ko 16:1-4 ¶15:26 Apo 24:17; 1Ko 16:1; 2Ko 8:1; 9:2, 12

yarafenui vanasi vain mano Yerusaremi ma Tiyarafenui vanasi váken manáa yana san ma o útuftiyain kékápin dantin ma orin nain danasinta van betiyan baya sian damuré moní átaru ono van iniyan mino. ²⁷ ^wBetí ankan amusin mái mai avúavá bariyaren mino. Mai fara vara seyo, Tiyarafenui kama vaya ma Yutan kéká pintena varein mai ayái anona moní átaru uren evaránen aminten mino. ²⁸ Mai moní ma áturu urantí baré mo amirékun ma mamarantí maé ínainpáké Spení ma orono van tiretin naren e oné oronté uno. ²⁹ ^xTéi fura sé afová iyá umpo séi ma sireti vaonafá ma oronuna mai Karaisini kákan avábá báí oronté uno.

³⁰ ^yMumunan kéka soe, setisi Bafan Yisas Karaisin avíkái siretin ákonaé tiamiyá uno. Mai ma Kantá Aunani yorantá avábá in maran iyá tiferuna van mi Tiyarafenu vaípa amúkusintésin téin tiya ino van muno. ³¹ Amúkesin ná Tiyarafenu ano séintá dafíkantisá Yudiá barafin ma vain kéká ano ma veni vaya átakharé iyaimpin mai ma átaru uádan moní baré orékun ná mumunan kéká ano amusin iyan barano. ³² Mamarantin ma Tiyarafenu ano anunu intí maé túpin timusin bantíi siretin má e váké mumunan ákona uantan maran ó tifanté uno. ³³ Ará ma kusiantan Tiyarafenu ano siretin masá bano. Mai fura ino.

Pori Ma Amusin Baya Vei Arona Kayo Van Tein Baya Ino

16 Teti mumunan tiyofi Fibi maen bákan tiretin onano van orinten mino. ² Orinti mae mai ma Bafani yoran banta kama e aya iyaonaí e véin aya ono van muno. Manáa yoran aya ono van ma sinti véin ná aya ono. Mai fara vara seyo,

kokhon nanin banta aya uaren ten má deren tiya ukhen mino.

³ ^zPrisira nú Ákuira nú ten má tiyaen Yisas Karaisini yorariin ábasu ifo vá amusin uantano. ⁴ Míkan nan mano séin naro siren purin aví dóká ída seya ana vékan tusu siantiyá umpo ena anan pinte monó nanin banta ano yeren tusu siantiyán mino.

⁵ Mai ma vékan amápin átaru iyain monó kékasá tenti simusin baya siameno.

Tiamiyáke mai ma Esiá bara finté esé arafén ará baéden Yisas Karaisin ánain ma yakhafein banta mai sesi kama sirona Epenetusi ifo vá tenti simusin baya vá dere véin ná tiameno.

⁶ Mai ma siretin aya ono van ákona yorari iyain nanin Marian dere vá tenti simusin baya siameno.

⁷ Inká Antronikusin nú Yuniasin nú mai senti ádéken nan báken ten má karavusí ukharen mifo senti simusin baya vá míkan dere siameno. Téi ma ída Karaisini yoran bantaí ukhékun maen békan manon pefá ayáká dókein bantá kan bákan ena aposeri kéká ano vékan nan peyan doran bantan báken Karaisini kama yorari ukharen ne siyaren mino.

⁸ Bafan avíká ma séi sinunu iyaruna vanta Ampriatusin ná tenti simusin baya siameno.

⁹ Tetisi mana yoran banta ma Karaisini yorari iyain Urubanusí má inká tesi kama sirona Stakisi nusá tenti simusin baya siameno.

¹⁰ Mai ma ara ara uman eriyán Karaisin avíká mantaan ákona ukharé ein banta Aperesin má inká Aristoburusini mápin ma vain mumunan kéká dere vasá tenti simusin baya siameno.

^w15:27 1Ko 9:11 ^x15:29 Rom 1:11 ^y15:30 2Ko 1:11; Kor 4:3; 2Te 3:1

^z16:3 Apo 18:2

¹¹ Tenti ádékena vanta Erodionin má inká Narsisusin amápin ma vain mumunan kéká basá tenti simusin baya siameno.

¹² Mai ma Bafani ákona yorarí in nanin kan Tri finan nú Tirfosa nú bá inká ena sen tirona nanin ma Bafani ákona yorarí iyá ma sinunu ukheruna Pesisí masá tenti simusin baya siameno.

¹³ ^aInká mai ma Bafan mano aní ukhá ein banta Rufusin má be anóe masá tenti simusin baya siameno. Rufusin anóe anon te sinóen an dakharen mino.

¹⁴ Asinkritusín má Frekonin má Ermesín má Patrobasín má Ermasín má inká betín má ma vain mumunan kéká basá tenti simusin baya siameno.

¹⁵ Firorokusín má Yuriasín má inká Nereusín má be ayofi má inká Orimpasi má betín má ma vain mumunan kéká basá tenti simusin baya siameno.

¹⁶ ^bTiyarafenurá ma monó tiyain nanin banta ano ma avábá iyain avúavá kasá ben avábá in maran ná ono.**

Minó Karaisini vanasí ma vain mano siretimpin betíi amusin baya yan oren mino.

Monó Tin Kéká Aúban Ma Yaimen Noin Kékasan Ma Feran Baya Ino

¹⁷ ^cMumunan tiyofi sífá tiváeyan noe, ma ákona vayan tiamenté uno. Mai ma nóken eraran aúban daimin baya ma sen noin kéka sará dafiseno. Beti ma sin nain baya ano mai ma fefá afová ukheona vaya vá ída manái ukhantín

mi savifái aviren orinten mifo ída vá betín ádé orono. ¹⁸ ^dMai fara vara seyo, mai kéká ano setisi Bafan Karaisini avúavá ánain ída yakhafiyán mifo vetíi ineinerái yakhafiyán mino. Betíi kámpun baya kayo fóké banasi ase amiádaren betíi kama mumunan máden asuse iyan mino. ¹⁹ ^eMáan tiyan mifo sireti ma Bafani vaya ánain dakhafiyaona mai minó nanin banta ano afová ukhen mino. Mai van mi séi simusin iyá umpo siretí ankan puntákein avúavá óde afová ure vá betín má namu avúavá barana vá teno.

²⁰ ^fMáan ma iyasín maen ída ayáká báken mi ará kusín ma amiyain Bafan mano siretín arantan aránaópá Ban Anon kaúden dasamintén mino.

Tetisi Bafan Yisas Karaisini sarisari ano siretín masá bano.

²¹ ^gTesi mana yoran banta Timotín má inká tenti ádékena kéká ma Rusiusín má Yesonín má Sosipaterín má ano amusin baya yan tireti vaonafá oren mino.

²² ^hTéi Porini vaya ma uvariyaruna vanta Tertiusi anon Bafan avíká tesi simusin baya yékun tireti vaonafá oren mino.

²³⁻²⁴ ^hMonó nanin banta vá ma Kaiusín amápin ma átaru iyákun ma setintá kamaen dafisiyá ein mai véin má deren amusin baya sireti vaonafá dan oren mino.

Mai ma kákan barufín kamanini moníká ma yafisiyain banta Erastusín má inká mumunan tifá tiváe Kuartusín má dere anon amusin baya yan

****16:16** Kiriki vaya fintéi *Tiyarafenurá ma monó tiyain nanin banta ano ma kantasí ukhein amónan maran iyain* nan tikhen mino.

^a**16:13** Mak 15:21 ^b**16:16** 1Ko 16:20; 1Pi 5:14 ^c**16:17** Mat 7:15; Tai 3:10

^d**16:18** Fir 3:19; 2Pi 2:3 ^e**16:19** Rom 1:8; 1Ko 14:20 ^f**16:20** Esé 3:15

^g**16:21** Apo 16:1-2; 19:22; 20:4 ^h**16:23-24** Apo 19:22; 1Ko 1:14

tireti vaonafá oren mino.^{††} ²⁵iYisas Karaisi ano ma siretin ena anan nanin banta ayain nan ma fefá bompon dókifin tiádan aúpa baré ein mai saréa Tiyarafenu ano siretin aya inti mantaan ákona in nono. ²⁶Mai ma fefá sakhanampa vanta kayo ano siádan baré einíen mi fara van oriyen ban

Tiyarafenu ano ma ákonaen tiádan baré ein mi minó barará nanin bantafin inka sian amá é tiferuna mai kasaen Karaisintá mumunan uren ben ánain dakhafinten mino. ²⁷Yisas Karaisini kama avúava sará mai ma afova víkakhein Tiyarafenu aví ena ena yaní ó tifano. Mai fura ino.

^{††}16:23-24 Tiyarafenui manáa vompon dókifin ves 24 fin ena vaya asotúin máa sikhen mino. ²⁴ *Tetisi Bafan Yisas Karaisini sarisari ano siretin masá bano. Pura.*

ⁱ16:25 Rom 1:5; Efe 1:9; 3:5, 9; Kor 1:26

**PORI MA ESÉ ARAÍEN KORINÍ
NANIN BANTA UVAMAN
AMEIN BOMPON MINO**

(1 Korini)

**Korinii Esé Bompon Ma Uvanteí
Pákenai Afova Vaya Ino**

**Ma vompon ma
uvantein banta ino.**

Baya varen orin banta Pori ino.

Uvarein orana ino.

AD fifti-siksi (56) fin nafi áa fifti-seveni (57) fin nafin uvanten mino. Mai maen Pori ma kanú manaú dádasí en ma monó doraríen eúkiyain pimpá ino.

**Ma vompon ma
uvantein baru ino.**

Taréa ma Téki e siyain barafin ma áau orun perápá bain baru Efesasíi kanú manaú oranará o váken ma vompon uvanten mino.

**Ma vompon ma uvaman
amikhein kéká ino.**

Pori ma kan dádasí en ma monó doraríen eúkiyaren ma Ákaiá barai ánon baru váken ma inká bisinisi impin o aní ukhein baru Koriní ma ena anan nanin banta ano ma monó tin avúavápin ma mo kokhoní iyain kékái uvaman amikhein mino. (Aposeri 18:11 fin ná onano.) Béi mana orana ifo afápá mana un kádan biyontái váken uvanten mino.

**Nái ana vará ma
vompon uvanten nafino.**

Koriní baru ráké ma eriyain bompon má inká mai fáké ma erein arona kéká báí vaya Pori afová en iníkan monó nanin bantafin kampun afová amin banta kéká ano oriven uman mamanan dáko uran monó tin avúavá mo ampiren peyan ineine rá oriyan ne seimpin mino. Ma ma esé uvantein bompompin ída fura sen mai uman afová inton paran manáarái kampun afová amin banta kayo van tikhen mino. (Kan dádasí ma en uvanteimpin mi fura sen tian amá ukhen mino). Inká kiasosí in avúava safi man baya fi Bafani ká dunan nan nafi fúaren orun mantan nafi inká Koriní nanin bantai ábasuí in má dunan nan ma safi Kantá Aunan mano ma amusin amiyain má monó tin avúavá ba safi ano ma Koriní nanin banta uman amiyain mamanan bararasí ino van Pori ída o úku e úku inton puntáden tian amá ukhen mino. Sapta 13 fin ma avábá í pákena ma sikhein ma san deren tian ákona ukhen mino.

**Pori Ma Amusin Bompon Uvaman
Koriní Nanin Banta Amein Baya Ino**

1 Yisas Karaisini kama vaya varen mo vanasi siamino van ma Tiyarafenu ano vei anunurá tivíká ein banta séi Porin má mumunan tifá tiváe Sostenesin má anon ma vompon uvaré uno.

²Tiyarafenu ano vei vanasií uveya kantasi ukhe vano van ma avíkein kéká ma Koriní barurá banan ma inká Yisas Karaisini yorantá ma avíden mamanan kantasi ura ma minó akhempá baona nanin banta ano ma Yisas Karaisin nan ma setisi Bafan má betí Bafan má ino ma siyaona mai kékái ma vompon berasan mano uvaman amé uno.

³Teti Sifóe Tiyarafenu vá tetisi Bafan Yisas Karaisin má pinte sarisari vá ará kusun má ano kanaíen tiretin má banten mino.

Pori Ma Susu Siantein Baya Ino

⁴Tiyarafenu ano ma vei sarisari siretin amira ma saréa Yisas Karaisin niná ukheona van mi séi ena ena véin tusu sianté iyá uno. ⁵⁻⁶Para vara seyo, mai ma ara ara afova váka ma ákona e kaya siyaona mai Tiyarafenu anon Yisas Karaisin pinté uaren mai afova amikhái Yisas Karaisin nan ma siamiyá erun mai inka siretí ankan pinté afoká en mino. ⁷Máan tukhanti setisi Bafan Yisas Karaisi ma ovaránen erin nain nan ma ave ukhe ma Kantá Aunani ara ara amusin barano van ma iyaré eona mai inka saréa vare ono. ⁸JInká béi ano mai amusin kayo fóké tiretin maman ákona uantádanti oriyare setisi Bafan Yisas Karaisi ma ovaránen erin nain damú ída mana aau vanti ven avorá o mantan nono. ⁹^kTiyarafenu ano veyan ma sirein daná bariyain mi vákan be Anin ma setisi Bafan Yisas Karaisi vain má manafin bano van mi siretin arakhen mino.

Monó Nanin Bantafin Ma Yaimin Avúavá Bain Baya Ino

¹⁰^lMumunan tiyofi sífá tiváeyan noe, ída vá aruve asive iyáke setisi Bafan Yisas Karaisin avíká kama e manafin báke vá eraran ma aúban daimin avúavá ída vanti vá manafin ma vava sire ma varanona yaná ano vá mai kama ino. ¹¹Mumunan kéka soe, siretí ankan ma aruve asive iyaona vava mai Karoen amápin ma vain kéká anon me sisimí iniréi ma vava siyá uno. ¹²^mTiretí ankan máa mi siya ono. Manáa kéká ano Porin mi yakhafiyá uno siyáka inká manáa ano Aporosin mi yakhafiyá uno síka manáa

ano Pitan mi yakhafiyá uno síka manáa ano Karaisin mi yakhafiyá uno siya ono.

¹³Kanaí eyá Yisas Karaisin maman aúban daiminte fono. Téi Pori anó tiretin nan pukékuyá inká ten tivíkasa monó non mante fono. ¹⁴ⁿTéi ma Krispusin má Kaiusin má monó non péantádé ma siretin ída féantákeruna van mi Tiyarafenu tusu siantiyá uno. ¹⁵Máan tukhé umpo ída vá mana ano sen nan ben avíkái monó non péké uno vá teno. ¹⁶^o(Stefanasini kéká bá deren monó non péan tákékun ban mifo mai oyampáké ena kéká bá péke rafu ída afová ukhé uno.) ¹⁷Yisas Karaisi ano monó non péantano vara séin tisinten naino. Tiyarafenui kama vava siamino van mi sisinten mino. Mai fara va ino vara ráke afova ma mantein banta kayo ano ma siyain avúaváká baya siyaré Yisas Karaisini yaa unkamádan maman paen danasí onuna van mino.

Yisas Karaisi Mai Tiyarafenui Kama Afova Vá Ákona Vá Ino

¹⁸^pMai fara vara seyo, Yisas Karaisini yaa unkamádan nan ma siyain baya ano varará ma o afeyoriyain kéká avorá paen danasí ukhá afová ukhé umpo mai ma inarufá orono van ma útakhé tiferuna kéká ano ma oniyá tiferuna mai Tiyarafenu ano ma setin tiviriyain ákonan ban mino. ¹⁹Mai fara vara seyo, vanasi ano ma vetiyantá betiyan ayain nain nan Tiyarafenui vompon dóki ano máa sikhén mino.

“Bantai afova mádé asuse uré betíi ineine finte kama afova yo varanté uno.” *Ais 29:14*

²⁰^qMáa sikhén mifo mai ma kama ineine vain kéká bá kama afova variyain kéká bá inká be afova van ma fura fura

¡1:8 1Te 3:13; 5:23 ^k1:9 1Te 5:24; 1Yn 1:3 ^l1:10 Fir 2:2

^m1:12 Apo 18:24-28; 1Ko 3:4 ⁿ1:14 Apo 18:8; Rom 16:23

^o1:16 1Ko 16:15 ^p1:18 Rom 1:16 ^q1:20 Yop 12:17; Ais 19:12; 33:18; 44:25

sin kéká bá mai intesá ukhen nafino. Tiyarafenu ano máan ineine vá ma vain kékái afova maman paen danasí ukhen mino. ²¹rMai fara va ino, vantai ineine ano Tiyarafenui ineine vá ída manái ukhan ída kanafen beni veya ineren ukhan mi setí ankan ma asuse aa fáké monó baya siamiyaruna anon banasí aya iyákan Tiyarafenu ano amusin iyan mai kéká aviriyan mino. ²²Yutan kayo ano enará ukhein avúavá aní intí ódaré mumunan ono van iyákan inká ena anan nanin banta kayo ano vetí ankan ma afová ukhein avúaváká ma siamintin iniren mumunan in nain nan mi yosiyan mino. ²³sMáan tiyan mifo Yisasi ma yaa unkamádantá purein nan ma setí ankan tiamiyákun Yutan kayo ano mai veya inian paen danasí iyan maen inká ena anan nanin banta kayo ano iniren asuse veya ino siyan mino. ²⁴tMáa siyan mifo mai ma Tiyarafenu ano Yutan kayo vá ena anan nanin banta kayo vá ma evaránen avíkein mai Yisas Karaisi maen Tiyarafenui ákonan báken beni kama ine inen ban mino. ²⁵uMai fara vara seyo, varará banta ano Tiyarafenui ineine van asuse ukhen mino siyan mifo vetí kama ineine esantakhen mino. Inká Tiyarafenui avúava san ída ákona van ne siyan mifo vantai ákona esantakhen mino.

²⁶vMumunan kéká soe, afova sá ono. Manáa kéká ano ída afova váka ída aví bain nanin banta akhafanan báke ída ona vain kayon baré en nan mi Tiyarafenu ano siretin arakhen mifo ovare vá me ineno. ²⁷Wai ma kama ineine vákái vá uno ma siyain kéká ayave ameno van mi mai ma asuse ineine vain kéká Tiyarafenu ano aní uren doran amen mino. Inká mai ma ákona

vain kéká ayave ameno van mi mai ma ída ákona vain kéká aní uren doran amen mino. ²⁸Xkama ineine ma vain kékái afova mádé asuse ono van mi ma ma vanasí ano namuen púta ukhen mino siyá ein kéká Tiyarafenu ano aní uren doran amen mino. ²⁹wMáan turantin Tiyarafenu avorá ída mana ano séi mai yaná manté uno sen be amo sino van mino.

³⁰xYisas Karaisin pinté uaren tetin tiya ono van mi Tiyarafenu ano veyantá mai aa maman asamana uran ban mino. Mai fara va ino, Tiyarafenu ano setin evaránen tivirano van mi Yisas Karaisimpó tetin afova simiren maman puntákein kékasí uren inarufá orino van tetin kantasí urá bá tiféuno. ³¹Máan tukhein nan mi Tiyarafenui vompon dókifin tikhen mino. “Mana nanin banta ano ma amo seno van Bafan mana vá amo sino.” Yer 9:24

Pori Ma Tiyarafenui Kama Afova Vaya Vanasi Siamein Baya Ino

2 Mumunan tiyofi sifá tiváeyan noe, Tiyarafenui veya ma aúpá baré ein ma séi esé arafé tiretin tiameruna mai ma varará banta ano ma kákan afova manten ma siyain avúavákasa siame rauno. Ída ino. ²Para vara seyo, Yisas Karaisin má inká daa unkamádantá ma véi fureí pákena vá anan tiameno van ukhá uno. ³yTéi ma esé arafé é tiretí ankan baonafá oreruna mai ída ákona vákái sikhokhofiyá oré uno. ⁴zTéi ma Tiyarafenui veya siamiyaré eruna mai kama uréi siamiyáké ída ase vayafó iyaní uré tiretin aviké umpo Kantá Aunan manon tiretin aúbaná ákona yorarí ukhen mino. ⁵Máan turéku mae varará bantai ineinerá ifá ureya Tiyarafenui

^r1:21 Mat 11:25 ^s1:23 Rom 9:32; 1Ko 2:14 ^t1:24 Kor 2:3

^u1:25 2Ko 13:4 ^v1:26 Mat 11:25; Yem 2:5 ^w1:29 Efe 2:9

^x1:30 Yer 23:5-6 ^y2:3 Apo 18:9; 2Ko 10:1 ^z2:4 1Te 1:5

ákonará mumunan ono van mi siamiyaré uno.

Kama Afova Ma Kantá Aunan Pinté Erein Baya Ino

⁶Tiyarafenui vaya ma inikhein kékápin mi véi ma simikhein ineinera baya siyaré umpo varará bantai ineinera safi inká ma varará ma o aiyoran nain dafisin kékái ineinera safi va siyare rauno. Ída ino. ⁷Tiyarafenu ano ma setin tiya uré tivirano van pefá bara ída uvanten aúpá ma aúmádan baré ein mai ineine vayan tiamiyá uno. ⁸Tiamiyá umpo varará ma yafisin kéká ano mai yaná ída afová ukharen mino. Betí ankan afová en baren tetisi Bafan ma kakhan má bain ída yaa unkamádantá arintin purin nainten mino. ⁹Mai van mi Tiyarafenui vompon dóki ano máa sikhén mino.

“Tiyarafenu ma avábá in nain kéká ina ma útaádan bain mai ída mana ano onan ída mana ano inin ída mana vantai inimpin bá ukhén mino.” *Ais 64:4*

¹⁰Máan tikhén mifo Tiyarafenu ano vei Aunan pókéi mai yanasinta mamán dákó uren minó daná dosiren Tiyarafenui aúpá bain daná ina aní urá mai afová ukhé tiféuno. ¹¹Mana ano ída kanaíen ena ano ma iniyain ineine afová inten mifo veyákái afová inten mino. Inká ída kanaíen mana ano Tiyarafenui ineine afová inten mifo vei Aunan mano anan afová inten mino. ¹²Tiyarafenu ma kama yanasinta fara setin timikhein afová ino van mi vei Aunan tetin timikhén mifo ma vara ráke aunan naifo afova sá ó tifano. ¹³Tetí ankan ma ma vaya kayo siamiyaruna mai ma vara ráke afova fosa siamiya rauno. Ída ino. Aunan mano ma setin timikhein

mai Aunani vayan pura sé monó tiantan avúavá tian amá uan amiyá tiféuno. ¹⁴Amiyá tifé umpo ída ma monó avúavá afová ukhén kéká anon Tiyarafenui Aunan mano ma monó tiantan avúava san ma siamin nain ída kanaíen afová inten mino. Mai anon asuse ineine vetimpin ban mifo Aunan ma vain kéká anon nái yana sará Aunan mano siamiyan nafi mai kasaen afová inten mino. ¹⁵Mai ma Aunan bain kéká anon minó daná daíden afová inten mifo ída ma Aunan bain kéká anon ída kanaíen mai kékái avúavúa daíden afová inten mino. ¹⁶Mai van mi Tiyarafenui vompon dóki ano ina ukhén mino.

“Para vara seyo, iye anó Bafani ineine afová ukheyá béin inin aminte fono.” *Ais 40:13*
Máa sikhá afová ukhé tifé umpo setimpin Karaisini ineine van mino.

Monópín Ma Aruve Asivein Baya Ino

3 Mumunan tiyofi sífá tiváeyan noe, fefá téi ma siretí ankan má báké monó baya inikhein nanin bantafin ma vaya siamiyainisa iyare rauno. Ída ino. Yisas Karaisini avúavápin arará iyampon kayo an mi yakhenái vara rákena avúavá ánain ma vákuriyain kékápin ma vaya siamiyainí iyaré uno. ²aPefá tirtetí ankan ída ákona yunan narí ukhareya saréa yere máan manan ukhén náí arará iyampon ma nan anu máa ameiníi iyá uno. ³bMai fara vara seyo, ume avúavá ánain para vákuriya vákeya afá aváen má anan maran eya aruve asive iya nan mai anon tirtetí avúavá aní iyan mino. Máan ma iyaona anon ída Bafani vanasi ano ma einíi iya ono. ⁴cPará ída ma monó inin kéká ano ma variyain avúavá bariyayá mana ano se séi Porin ánain mi vákuriyá uno siyá inká ena ano se séi

Aporosin ánain mi vákuriyá uno siyá ba rafono.

^{5d}Aporosi iyé bará inká téi Pori iyé bákuyá berasantá aruve asive iya rafono. Berasan pinté uareya mumunan ono van mi Bafan mano mai yoran berasan timikhá doriyá uno. ⁶Téi ma yanayun pafasirékun Aporosi non amiran maen Tiyarafenu anon e ampamádé iyan mino. ⁷Máan tukhan mi yanayun ma fafasé iyain má non ma amé iyain mái aví ída van mifo Tiyarafenu ma e ampamádé iyan mai veyáká avíi van mino. ^{8e}Danayun ma fafasin banta vá non ma amin banta vá ano maman manafiní ukhen mana anarái yoriyain pasen mikan ma yoriyá inaintái miyan mádú mádú inten mino. ⁹Mai fara vara seyo, setí ankan manafin mi Tiyarafenui yorararí iyá tiféku siretí ankan beni yunan bara vá má báí va ompo seti sina vaono.

**Monó Doran Banta Kayo
Van Ma O Sian Má Uvaran
Bantará Dan Bain Baya Ino**

¹⁰Tiyarafenui sarisarirái afova van ma má uvariyan banta an davé namádan dafédékun mi ena kayo ano mairá má uvariyan mino. Uvariyan mifo mai namádantá ma má uvaran nain kéká ano vá kamaen dafiben ná uvarano. ^{11f}Mai fara vara seyo, Tiyarafenu ano Yisas Karaisin maman namádaní uren pe yafédan bain mana ano ída kanaíen ena namádan daferanten mino. ¹²Máan tukhein mai namádantá ma má uvaran nain mano kasaen kori fi siriva fi kama onámaná kayo fi yaa fo safi namí po safi inká uviti ayan po safi uvaranten mino. ^{13g}Uvaranten mifo Tiyarafenu ano ma vanasii avúavá daíden kó tiantan nain damúí má uvaran banta kayoi yoran

amáká afoká inten mino. Maí damú anan minó nanin bantai yoran irafin ma iyó einíi urantin iyé kama yorarí iná inká iyé namu yorarí iyan nafi yákó inten mino. ¹⁴Iye anó mai namádantá má uvantá intin ná ída ira khanten nafi mai vanta anon bei miyan baranten mino. ¹⁵Máan tinten mifo iyen amasá ira kanten nafi mai yoran bantai yoran tavifái o afeyoranten mino. Máan tintin mai ma ira anamuná pinté ma e yúden karan ereiníi en mi má uvaran banta kayo ano anan para vanten mino.

Monó Namun Ma Vain Mai Vanasi Ino

^{16h}Tiretí ankan Tiyarafenui kákan monó namun mi van nan ma veni Kantá Aunan mano ma siretimpin bain mai ídá afová ukhe rafono. ¹⁷Tiyarafenui kákan monó namun ma namu inain bantan Tiyarafenu ano véin namu inten mino. Mai fara vara seyo, Tiyarafenui kákan monó namun kantasí ukhayai sireti vanasi ano mai veni kákan monó namun mi va ono.

Ída Ma Vanasii Aví Daní In Baya Ino

¹⁸Tiretí ankan ída vá tiretiyan kamupun tiantiya vá baro. Ma vara ráke yanasintará ma afova vantiya siretiyan maman asuse vanta kayo an dakhare vá ínaimpáké Tiyarafenu avorasá kama afova ma vain banta kayoí ono. ¹⁹Mai fara vara seyo, ma vara ráke afova ano Tiyarafenu avorá asuse ukhan mi veni vompon dókifin máa sikhen mino. “Manáa kéká ano ma vara ráke afova fóké ma minó danasinta variyain nan ma kana variyá uno ma siyain mai Tiyarafenu ano maman betíi oyivan ma munteiníi uadé iyan mino.” *Yop 5:13* ²⁰Evaránen Tiyarafenui vompon dókifin máa sikhen mino.

^d3:5 Apo 18:4, 11, 27-28 ^e3:8 Mat 16:27; Efe 2:20-22

^f3:11 Ais 28:16; 1Pi 2:4-6 ^g3:13 1Ko 4:5 ^h3:16 1Ko 6:19; 2Ko 6:16

“Manáa nanin banta ano setimpin afova van mino sen ininten mifo

Bafan mano mai ineine afová ukhantín paen danasí inten mino.” *Íbo 94:11*

²¹Máan tukhein nan mi minó daná mai siretin ninan ban mifo vanta aví ma yaní in avúavá ifasá oro. ²²Porin má Aporosin má Pitan má mai siretin ayain kéká ino. Inká ma vara vá ayun ma fara van má purin má taréa vá inká inuran má minó daná bá mai siretí ina yanái vákaya ²³inká tireti Yisas Karaisin ninan banan béi Tiyarafenu inan ban mino.

Yisas Karasini Kama Vaya Ma Varen Orin Banta Kékái Vaya Ino

4 Máan tukhen mifo Aporosi rasan nará Yisas Karaisini yoran bantá kanan mi váken beni aúpá bayan kamaen daffiben tisimiyan mino seya vanasi ano vá afová ono. ²ⁱEña ina yanáká daffiantano van ma mana vanta aviáadantin báken maen ben nina yanákasá daffian ákona uantano. ³Téi kama e sá doriya rafu áa namue sá doriya rafu mai seyantá ída afová ukhé umpo sireti safo áa ena kéká ano fi ma sen tivútivá daíde afová inteya mai sító daná ino. ⁴Teyan nan kama anan é doriyá uno siyá umpo Bafan beyaká anan tenti yoran daíden afová uren mai kama yorarí e ono sen inká mai namu yorarí e ono sen tisiminten mino. ⁵^jMáan tukhen mifo vanasii avúavá ma yaíden afováin damú ma ída erikhanti ma yoriyaruna sivútivá ída vá daimiyáke áesin ná baré intin Bafan mano vá me yaimino. Bafan ma eriven maen tetisi súpin ma aúpáké bariyá onuna yaná maman dáko kakhakheintá kaúdantin tetí ma yoriyaruna sivútiváká ten Tiyarafenu ano miyan timídú inten ino.

Koriní Nanin Banta Ano Vetiyam Amo Siyan Ma Amaan Baya Sein Mino

⁶^kMumunan tiyofi sífá tiváeyan noe, Aporosi rasan mano siretí ayainí uvé ayaéku ma ma siamiyaruna yanasinta one afová ono van mi siamiyá uno. Tiyarafenui vompon dóki ano ma sikhein baya amaniná ída vá ena vaya kayo maman asotú ono. Máan ma inte mae ída mana ano ma yoriyain avúava san maman daní ureya ena ano ma yoriyain nan maman bararasí inono. ⁷^lIntéa yaná ma variyaona anó tiretin maman enará ukhen nafino. Intéa kama yanasá Tiyarafenu ano siretin ída amikhen nafino. Tiretí ankan ma kama yaná amikhanti ma kama yorarí iyanteya ída vá tesi ákonarái yoriyá uno se vá e amo seno.

⁸Tiretí ankan ma ineona ano minó dana san ma iyaré eruna inka vare-runu mai kin an davé tetisi ákonará bátifanté uno sireya setin me ampín nompo mai kana ino. Tiretí ankan ma kin an dante mae mai setin má deren kiní uvé tiretin má banté uno. ⁹Mai fara vara seyo, kó tiantáden ma furino van kana ino sikhein banta kéká an mi yen Tiyarafenu ano seti aposeri kayo maman dákosí urá bátifékun enisori kayo vá banasi vá ano setin toman paen danasí iyan mino. ¹⁰Tetí ankan Yisas Karaisini asuse yoran banta an dakhéku mae siretí ankan ma iniyaona ano Yisas Karaisin má túpá ukhé minó daná afová ukhé uno siya ono. Tiretí ankan Tiyarafenui ákona váká bá tiféuno sireya setin nan ída ákona vákan ban mino siya ono. Tiretí ankan banasi ano setin mi simo siren betin nan intiyan mino siya ono. ¹¹^mTaréa ma vá tiferuna yamú mai sirafan nan iyáké maé non nan tii iyáká tuí dana san iyákun banasi ano

ⁱ4:2 Ruk 12:42 ^j4:5 1Ko 3:8 ^k4:6 Rom 12:3 ^l4:7 Rom 12:6

^m4:11 2Ko 11:23-27

siruren tisiren iyákan ída setin timá ban mino. ¹² Tetí ankan ma vanuna van mai ákonaé tiyan póké dódékun mai ano setin tiya iyan mino. Tetí ankan ma aufon usinteín kéká kamaé avábá uan-tiyáké tetin ma sírono van iyáká maé bempákéí vá tiféuno. ¹³ Banasi ano ma namu veya sen tisiká betí ankampin puntakeín baya anan tiamiyá uno. Taréa ma vá tiferuna yamú mai vanasí ano setin maman kanti ma karúdiyaimpin ma karúdeiní iyá bá tiféuno.

**Pori Ma Monó Afóen An Mi
Yakhé Uno Ma Sein Baya Ino**

¹⁴ Ma ma uvariyaruna vompon mai siretin ayave ameno vara uvariya raumpo se sikhafana an mi yakhen náí siretin afova veya siameno van muno. ¹⁵ ^oTiyan mikan tauseni (10,000) vanta ano ma Yisas Karaisini veya ma siamiyain kéká pinté mana anon tiretin afóen an dé iyan mino. Para vara seyo, séi ma Tiyarafenui kama veya siretin tiamiyaruna mai Yisas Karaisimpin tiretin afóen an mi yakhé tiretin naren tiamé uno. ¹⁶ ^pMáan tukháí sen tan deya se ma variyaruna avúavá ánain bákurono van mi siretin tiamiyá uno. ¹⁷ ^qMai van mi siretin ayaintí séi ma variyaruna avúavá barano van mi Timotin tiantékun tiretí vaonafá oriyan mino. Para vara seyo, véi anon te sikhá an dakhen Bafantá kamaen monó tiantiyái véin nan tinunu ukhé uno. Inte avúavá kasá Yisas Karaisini veya minó akhempá ma vain nanin bantafin afova amiya rafu mai vayan béi siaminten mino.

¹⁸ Téi afová ukhékun manáa kéká ano séin nan ída ovaránen e sonantéí uno siren betí ankan ma variyain avúava san

betiyan amo siyan mino. ¹⁹ Amo siyan mifo Bafan mano séin nan orino van ma anunu intí téi ma oréku mae mai ma vetíí avúaváká ma ve amo siyáken kákan baya siyain kayo ano mai fura sen ná Tiyarafenui ákona ano vetimpin baná ban nafi mai o onanté uno. ²⁰ ^rMai fara vara seyo, Tiyarafenui Yafisin pintaena veya ana ma siyain mano ída kanaí inten mifo Tiyarafenui ákona vasá báken dorano. ²¹ Tiretí ankan náí yanasá ino vará iya fono. Téin nan tiretin mo uman amiyáken asino va rafono, áa vem-páké kamaen avábá uantano vará iniya rafono.

**Namu Avúavá Ma Variyain Banta Ma
Monó Pinte Yo Siantan Baya Ino**

5 ^sÍda monó inin kéká ano ída variyain afoká iyain nan téin me sisimí uman dé iné uno. Tiretí ankani monó pinté mana vanta ano ve afóen aná bá aau variyan mino sen tisimikhén mino. ² Mai fará tiretí ankan au khákan mana iyákeyá ída arunaná mádeyá ayave van iya rafono. Tiretíí monó pintaena mai vanta fará ída yo siantiya rafono.

³ ^tTéi siretí ankani yan bukhafafin ída vá umpo siretíí aunampin mi vá uno. Máan tukhéí séi ena ena siretin má báí mai vanta ano ma varein avúavá inka fefá dainté uno. ⁴ Tetisi Bafan Yisasín aviká ma siretí ankan átaru esí maé tesi inimpin tiretin má báken inká tetisi Bafan Yisasini ákona ano ma siretin má ena ena vaintasá ⁵ ^umai vanta monó pintaena yo avían Ban Anon ayampin amesin ná beni ume vukhafa namu uvintin baré intin ná Bafan ma erin nain damusá Tiyarafenu ano véini aunan evaránen avirano.

ⁿ4:12 Mat 5:44; 2Te 3:8 ^o4:15 Kar 4:19 ^p4:16 Fir 3:17 ^q4:17 Apo 19:22

^r4:20 1Ko 2:4 ^s5:1 Riv 18:7-8; Diu 22:30 ^t5:3 Kor 2:5 ^u5:5 1Ti 1:20

^{6v}Tiretí aví anan daní iya vákeya mai ma namu avúavasí iyain ifá en nan para oriyán ban mino. Mai avúavá ma áesin ma mana ano varen oriyán baré intin maen mai ano minópin orera inten mifo siretí ídá afová ukhe rafono. ^{7w}Mai ma namu avúavasí iyain banta yo siantáde vá kama e vano. Mai fara vara seyo, Yisas Karaisi anon avo uantan dunan ma nan sipisipi arará an daven tetintá ákonte ukhen mino. ^{8x}Máan tukhein nará erí tetí ankan ída vá pefá ma omáká niyá ein bereti an dé namu avúavasí iyáké ída yisi vain bereti ma niyá ein an desá kamaen ma funtákein avúavá ana vá bará tifano. ⁹Pamúku avúavasí ma iyain nanin banta vá tiretí ankan ída vá manafin banon tiré téi fefá bompon uvaman amikharé uno. ¹⁰Barará nanin banta ano ma famúku avúavá bariyan ma ena ina yana san aran naren umoyan bariyan ma inká kampun ayarafenurá monó tiyan ma iyain mai kéká ampeno vara siamiya rauno. Ída ino. Máan nanin banta ma me ampeno vará mai fura se ma vara vasá me ampeno. ^{11y}Taréa ma séi vompon uvaman tiretí ankan ma amiyaruna mai mana vanta ano ma siretin má monópin bá uno siren ma famúku avúavá baren ma ena ina yana san aran nen ma kampun ayarafenurá monó ten ma ena oyampá baya sen ma inká ákona non naren óen en ma kampun avúavá póké ena vanta ina yaná umoyan baren ma iyain mai vanta vá manafin ída vákeya yunan nano van muno.

¹²Ída ma monópin bain kéká ma yaimin mai senti yoran naino. Ída ino. Monópin ma vain kéká ma yaimin mai setisi yoran mino. ^{13z}Monó ma ída inin afokhampin ma vain nanin bantan Tiyarafenu ano yaimintéin maen mai van Tiyarafenui vompon dóki ano máa

sikhen mino. “Namu vanta ma siretin aúbaná bain ná do siantaro.” *Diu 17:7; 19:19; 21:21; 22:21, 24; 24:7*

Monópin Bain Kéká Ma Avían Kópin Kain Baya Ino

6 Monópin bain kéká bá ma aruve asive uareya mai uman monópin ma vain kayorá desin puntaran nain nan pará kópin puntarano van betin avire oré iya fono. ^{2a}Manáa yamú dáko intí ma setí monópin baruna kéká ano ma ma vara ráke nanin bantai avúavá ma yaídé afová ó tifanuna siretí ankan ídá afová ukhe fono. Ínainpáké barará nanin bantai avúavá daimin nompo saréa ma sító uman kayo ma vain kanaí eyá eyantá mai uman kayo ará amin aa fáké daiman onante fono. ³Enisori kayo ano ma yoriyá ein avúavá ma ínainpáké tetí monópin ma varuna nanin banta ano ma yaídé afová ótitanuna mai siretí ídá afová ukhe fono. Afová ma ukhanteya ma varará ma sító uman kayo vain mai kasae vá eyantá daiman onano. ⁴Máan tukhanti monópin ma vaona kayo aúbaná ma uman bantiya mai fará tiretiyantá mai uman ída funtaranoná iyá baru kópin baré oré iya rafono. ⁵Tiretí mumunan ma iyaona kayo aúbanápin ídá kama ineine vá bain kéká báken ná mai uman kayo funtaran nainí iya rafono. Tiretí ankan ma kópin bare oriyaona avúava san mi ayave ono van ma vaya siamiyá uno. ⁶Monópin ma vain banta ma avireya afokhampin ma vain kéká avorá ma mo kó tiantiya ona van mi sakha iyá uno.

⁷Monópin ma van nain kéká bá ma aruve asive urante mai inka ayave manta ompo ída vá mai uman bare kópin oriyákeya siretí ará ana vá ameno. ⁸Ída ma máan tinten mae mai siretiyan mi

^v5:6 Kar 5:9 ^w5:7 Ais 53:7; 1Pi 1:19 ^x5:8 Diu 16:3

^y5:11 2Te 3:6; Tai 3:10 ^z5:13 Diu 13:5; 17:7 ^a6:2 Rev 20:4

namu avúavasí eya monópin ma vain kéká kampun tire avire kópin oriya ono.

Ída Ma Famúku Avúavá Ma Variyain Baya Ino

^{9b}Namu avúavá ma variyá ein kéká ano Tiyarafenui Yafisimpin ída ódinten mifo mai ídá afová ukhe rafono. Pamúku avúavasí ma en noin kéká safi varará danáká ma monó tiantan nafi ena ana safi ena avafun nafi ma varen non má inká banta kéká safo ain iyampon kéká safo ma nókeya ena vanta ano famúkuí uantano vará iya rafo inká banta ano vanta vá ábasuí iya rafo ¹⁰aá ena ina yanasinta umoyaní in kéká safo inká kokhon ona vantí bano van anunu in kéká safo áa óen non nan kéká safo áa ena namu vaya sen asin kéká safo áa kampun tiriya ena ina yaná baré no rafo mai kayo ano ída kanaíeya Tiyarafenui Yafisimpin ódin nono. ^{11c}Tiyarafenurá ma ída mumunan ukheya fefá manáa ano mai avúava sinta variyare ompo saréa Tiyarafenu ano mai ume kayo sesé uantáden maman beinaí uraya va ono. Mai ma Bafan Yisas Karaisi ano ma varein avúava san má inká Tiyarafenui Kantá Aunan mano setin túpin ákona yorarí iyaintá báí Tiyarafenu ano siretin nan puntákein nanin banta e sen ariyan mino.

Bantai Au Vukhafa Mai Kantá Aunan Amá Ino

^{12d}Tiretí ankan kasaé minó dasainta varanté uno sin nompo mai yanasinta finte manáa yaná ano ída ayainten mino. Minó dasainta séi kasaé baranté umpo ída vá mai yanasinta ano sentá dafisino. ^{13e}Dunan ma vain mai sirápin mi nékun aravé iyan maen

tirá ma vain mai yunan báin mi van minon manáa ano séiya mifo ínaimpáké Tiyarafenu ano mai ma anunu in avúavá do varanten mino. Máan tintéin mi famúku avúavasí ino vara setin tu vukhafa uvamádan ban naino. Ída ino. Bafani yorarí ino van mi su vukhafa uvamádan ban mi Bafan mano setin turá dafisiyan mino. ^{14f}Tiyarafenu ano ma setisi Bafan púkáin ma masí pinte orun avían mantéiní en mi vei ákona fóké tetin tu vukhafa masí pinte evaránen tivían mantanten mino. ^{15g}Tiretí ankani au vukhafa ano ma Yisas Karaisini mana mana vukhafa vain mai ídá afová ukhe rafono. Mana vantai au vukhafa ano Yisas Karaisin nina ma vantin maen béi kasaen ná mai vukhafa fóké pamúku avúavasí inten nafino. Ída uron mino. ^{16h}Mana vanta ano ma mana nanin pamúkuí uantanten mai míkan nan mano mana vukhafái inten mino ma sikhein ídá afová ukhe rafono. Mai fara vara seyo, Tiyarafenui vompon dóki ano sikhen mino. “Míkanan mano maman mana vukhafái é iyan mino.” *Esé 2:24* ¹⁷ⁱMáan tiyan mifo Bafantá ma súpá ukhein kayo ano aunampin béin má maman manafiní ukhen mino.

¹⁸Pamúkuí ma in ume finté me ampire vá karan orono. Ena ume kayo ano ída aú bukhafo ano ma umeí einí iyan mino. Para vara seyo, famúku ume ano aú pintéi yákó iyan mino. ¹⁹Tiretí ankan aú ma vain mai Kantá Aunani kákan monó namun mi vákan Tiyarafenu anon Kantá Aunan tiretin amikhan maifin ban mifo ídá afová ukhe rafono. Tiretí ankan ída siretí inan ba ompo Tiyarafenu ina ono. ^{20j}Para vara seyo, Tiyarafenu anon esantakhein miyan pókéi siretin miyaní uádaya va ompo siretíi au vukhafa fókésá

^b6:9 Kar 5:19-21; Efe 5:5; Rev 22:15 ^c6:11 Tai 3:3-7 ^d6:12 1Ko 10:23

^e6:13 1Te 4:3-5 ^f6:14 Rom 8:11; 1Ko 15:20; 2Ko 4:14 ^g6:15 Efe 5:30

^h6:16 Mat 19:5 ⁱ6:17 Yon 17:21-23; Rom 8:9-11 ^j6:20 1Ko 7:23; 1Pi 1:18-19

beni yorarí iyákeya véin aví ana vá daní ono.

Ábasuí Ma Ini Afova Vaya Ino

7 Tiretí ankan ma vompopin ina ukharé eona mai vaya anan taréa siamenté uno. Banta ano ma ída anasi varano sinte mae mai kaman inono. ²Máan tin nompó famúku avúavá ano mo kákaní iyáí mai van banta ano anasi varantin ná inká anasi ano vanta varantin ná ino van mi siyá uno. ³Banta au ma vain mai anasi inan ban mifo ída vá pákaan ákona intin inká anasi ano máan mana en be au ma vain mai vanta inan ban mifo ída vá pákaan ákona ino. ⁴Be aná ano ve au ampian be avafun am-intin ná inká be avafun má dere máan mana vá ino. ⁵Banta vá anasi vá ma manafin bákeya vanasí iyare ma manáa afará pa váké timúkintó uno sire ará manafiní ure ma varé inte vá aine vá evaráne vanasín avúavá maman kaono. Para vara seyo, ábasuí ma ukhein kéká ano ma aui anunurá ída yafisintin maen Ban Anon mano akhenóka inten mino. ⁶Tesi ineinefin ma vain bayan tiamiyá umpo vanasí in avúavasá are uantiya rauno. Ída ino. ⁷Minó banta ano sen tan den ída anasi varan para vano sé inikhé umpo minó ano ída manafí ukhé tiféuno. Tiyarafenu ano ábasuí ma in amusin manáa kéká amiyan inká ena kéká ída ábasuí in para ma van amusin amiyan ukhen mino.

⁸Máan tukháí ída anasi varan ma inká banta ída varan ma ukhein kéká bá kentosí ma ukhein kéká ba san mi siyá uno. Téin tan den ma ída ábasuíen para ma van mai kama ukhen mino. ⁹^kMáan tukhen mifo manáa ano ma vanasí in anunurá ma ída kanaíen dafisirí intin maen kasaen betí ankan ábasuí inten

mino. Para vara seyo, vanta varantin ma inká anasi varantin ma inain avúavá anon pamúku avúava san ída ará mantanten mino.

¹⁰^lMáan tukháí mai ma ábasuí ukheona kéká san mi Bafan mano ákona vaya sikhái mai vayan tiamiyá umpo sesi vaya vaino. Ída ino. Banta aná ano ída vá be aná me ifá ino. ¹¹Máan tinten mifo anasi ano ma ve avafun me ifá inten maen mai ena vanta ída vá o varyáken ná evaránen be avafu vaipá orintin ná be avafu ano ída vá be aná ifá ino.

¹²Taréa manáa kayofin mi siádanté uno. Mana monópin ma van nain banta ano ma ída monópin bain nanin ma mantaré intin ma ven má bano van inikhantintin maen ída vá mai nanin ifá uantano. Bafan mano va ma man baya sian naifo seyantái siyá uno. ¹³Inká monópin ma van nain nanin mano ma ída monópin bain banta ma mantaré intin ma ven má bano van inikhantintin maen ída vá mai vanta ifá uantano. ¹⁴Mai fara vara seyo, ída ma mumunan iyain banta ano ve anái mumunantái kantasí ukhan inká ída ma mumunan iyain nanin mano ve avafuni mumunantái kantasíin iyan mino. Ída ma máan tesin maen tiretí ankan akhafana ano ída kantasíen pain má banten mifo mai avúavá ma varesin mi Tiyarafenu avorá kantasí inten mino.

¹⁵^m(Máan tinten mifo ída ma monópin ban nain nanin banta ano ma ve avafun nafi inká be ana safi ma ifá uantanti mae mai áesin ná orino. Ída mumunan in nanin banta ano mumunan nanin banta vá manafin ída vanten mino. Mai fara vara seyo, ará kusin má bano van mi Tiyarafenu ano ve akhafana arakhen mino.) ¹⁶ⁿAnasi kayo oe, afovasá ono.

^k7:9 1Ti 5:14 ^l7:10 Mat 5:32; 19:9; Mak 10:11; Ruk 16:18

^m7:15 Rom 14:19 ⁿ7:16 1Pi 3:1

Tireti ma mumunan ukhesin ma vanta kayo ano onanten maen mai ano kasaen ayaintin ará baeranten mino. Inká banta kayo oe, afovasá ono. Tireti ma mumunan ukhesin ma anasi kayo ano onanten maen mai ano kasaen ayaintin ará baeranten mino.

Intéa Avúavá Kasá Banan Ná Tiyarafenu Arákaya Mumunan Ukhare Intefo Mai Avúavákasá Bano

¹⁷Tiyarafenu ano ma araádaren intéa varurasá kainten nafi mai van eyo sire vá mai ma esé ákona uan mantanona rasá ba oriya vano. Minó akhempá mai man baya anan monó nanin bantafin tiamiyá uno. ¹⁸Pefá ma ída mumunan ukhen au khakharein banta ano ída kanaíen ída ma au khakhein banta an danten mino. Inká ída ma au khakhen mumunan uvin nain banta ano ída vá au kha ino. ¹⁹°Mai fara vara seyo, au khain avúava safi inká ída ma au khain avúava safi mai sító daná ifo Tiyarafenui man baya ánain ma vákurin manon kákan danasí ukhen mino.

²⁰Intéa avúavá kasá banan ná Tiyarafenu ano arákayá mumunan ukharé intefo mai avúavákasá béin má kase vano. ²¹Éi ma miyan ída varan doran banta váesin ma mai finte arakhá intiya mae ída vá áesin mai ano éin kokhon ineine amiyán bantiya vá kusin bare vá bano. ²²°Éi ma umei ída miyan ban doran banta varé esin ma mai fin-tena Bafan mano arakhanti mae mai véi anon umei ákona finte utúanten mifo vá afovasá ono. Miyan baran doran banta váesin ma Bafan mano arakhantiya mai saréa veni miyan ída varan doran bantafí e ono. ²³Tiyarafenu ano esantakhein miyan pókéi siretin miyaní uádaya va ompo ída vá barará avúavái miyan ída van doran bantafí ono. ²⁴Máan tukhein

nan mi mumunan tifá tiváeyan noe, intéa avúavákasá banan ná Tiyarafenu ano arákayá mumunan ukharé inte fo mai avúavákasá béin má kase vano.

Ída Ma Ábasuí Ukhein Kékái Vaya Ino

²⁵Máan tukhantí ída ma ábusuí in kayoi afova vayan tiamenté uno. Bafan mano ída mana ákona vaya sisimikharé intí tiamenté umpo véi ma sen afová ukhá beni arunaná áupin ma fura sé baruna vanta anon man baya siamiyá uno. ²⁶Taréa ma ara ara uman afoká iyain mai van mi mai ma vaona avúaváká para vano van tiamiyá uno. ²⁷Taréa ma ábasuí ukhanteya ída vá durafurono van ono. Ábasuí ma ída ukhanteya mai ída vá ábasuí ono van en nono. ²⁸Máan tin nampo ábasuí ma ukhanteya maifin ída umeí ukha ono. Ínka arinta ano ma vanta varanten mai ída umeí inten mino. Ábasuí ma uvintin kokhon uman afoká intéii aurá dafiseno van mi ma vaya siyá uno.

²⁹Mumunan tiyofi sifá tiváeyan noe, yamú inka asíka ukháí séi ma vaya siamenté uno. Tare rákesá anasi ma mantan nain banta kéká ano ída vá áintin ábasuí in avúavá ano vetíi vampin kákan danasí ino. ³⁰Amusin mano fi arunaná ano fi ona vará o afasí inten nafi mai ano ída vá áintin Tiyarafenui yorantá aa iyarano. ³¹¶Mai ma ma vara ráke yanasinta ma varen aruven iyain kéká ano ída vá mai yanáká ákona inin kaiyáken kama aasákesá baren aruven ino. Para vara seyo, minó ma varafin ma vain danasinta ano mo kípanten mino.

³²Minó avúavá ma variyanteya mai ineine ampesin eravino van muno. Anasi ma ída mantan nain banta ano inté uresá Bafan amusin amente rafu siren beni yorará ana ono van é iyan mino. ³³Mai avúavá anasi avafu ano ída kama uren

baré iyan mifo mai ma ve aná amusin ameno van ma iyain ineine anon ³⁴beni kama ineine máden daimiyan mino.

Máan mana en mi kentó nanin kayo vá inká arinta kayo vá ano fura sen be aú bá aman má Bafan amiren beni yorarí ono van é iyan mino. Máan tiyákan banta ma mantein nanin mano ma vara ráke yanáká inin kaúden mai intesá uré te sivafun amusin uantante rafu siren kokhon ineine é iyan mino. ³⁵Máan tukháí ma veya ma siamiyaruna mai siretí ankan kama e vano van mi siyá umpo siretin na mai yanáká are uantiya rauno. Ída ino. Kama e vákeya intesá esin ná ayainti Bafani yorarí inte fo mai avúaváká daffbeya yorano van mi siyá uno.

³⁶Mana vanta ma arinta amikhantín mai vanta ano ma ayáká báken ída ákonaen be aurá dafisirí ukhantín maen kasaen ná mai ma amikhá ein arinta varano. Maifin ída ume vanten mino. ³⁷Máan tinten mifo mana vanta ma ena ano ída siamintín ma vei anunu ánain dakhafen mai ma amikhá ein arinta van ída varan kasaé banté uno siren ma ve aurá daffan ákona inten maen mai yere kama ukhen mino. ³⁸Máan tukhantín ábasufí ma ukhen ban mano kama ukhen mifo inká ída ma ábasufí in mai anon moéken kama ukhen mino.

³⁹Mana nanin ma ve avafu ída furin para vantín maen ída ena vanta varanten mifo ve avafu ma fúbintín ena vanta ma varano van inten mai Bafantá ma mumunan ukhan nain banta vá barano. ⁴⁰Máan tukhen mifo se ma inikheruna mai nanin mano ma ída ena vanta varan para ma van mi kama ukhen mino. Téi ma iniyaruna ma veya kayo Kantá Aunani ineineráí siyá uno.

Namu Yanasintará Ma Ákontein Baya Ino

8^sNamu yaná baimpin ne siré ma yunan pon unáde ákonté iyaruna fákena veya ino. Kákan afova ma manté tiferuna van mi su khákan iyá tifé umpo ena ma ará amin avúavá anon monópin ma vain nanin banta ará ákona uanté iyan mino. ²Mana vanta ano ma siyáken minó danáí ana afová ukhé uno ma siyain mai ída fura sen afova ukhen mino. ³Máan tukhen mifo Tiyarafenu van ma anunu é iyain nanin bantan Tiyarafenu ano afová ukhen mi vetintá dafisé iyan mino.

⁴Máan tukhen mifo namu yanáká ma ákonte uran dunan pontá mai náiesá tétifante rafuno. Mai fura ino setí ankan afová ukhékun ída ena ayarafenu vákan mana Tiyarafenu máan báé iyan mino. ⁵Mai fara vara seyo, manáa ano ma iniyain mano ma varará kokhon ayarafenu vákan inká inarufá deren kokhon ayarafenu van ne sé iyan mino. ⁶Máa sé iyan mifo setí ankan ma inikheruna mai seti Sifóe mana Tiyarafenu anan báken béi anon minó daná afoká uráken béin dafíká bá uno sé iniyá tiféuno. Máan tukhan mana Bafan ma Yisas Karaisi vain mai véin pintéi ara ara yaná afoká ukhan béi anon tetin tautan timikhá bá tiféuno.

⁷Máan tukhékun maen minó monópin ma vain nanin banta ano ana va mai yaná afová ukhen naino. Ída ino. Manáa ano fura ayarafenuráí monó tiyá uno siren mai ma ákonté uran dunan pon niyaré íkan mai avúavá anon betí ineine mo asuse ukhen mino. ⁸Máan tukhen mifo ara ara yunan ma nan avúavá ano ída sivían Tiyarafenu adé mo khainten mino. Dunan ma suraré bá tífanuna van

⁷7:39 Rom 7:2-3 ⁸8:1 Apo 15:29 ¹8:2 Kar 6:3

^u8:4 Diu 4:39; 6:4; Kar 4:8 ^v8:6 Efe 4:5, 6

ída mana yaná o afeyorantin inká dunan ma nanuna finté ída mana kama yaná o vará tifanté uno.

^{9w}Máan tonté tifé umpo siretí ankan ma nan daná ino sire kasae nan nona ano monópin ma ída ákona van bain kékái ineine máde asuse uresin eraven ankamin nafo yafían ná ákona ono.

¹⁰Mai fara vara seyo, ída ákona van ma monópin báken aurakhá ein nanin banta anon oniyantiya kampun ayarafenui monó namumpin nan nono. Máan ma inona anon betin ará mantaantesin mai ma kampun ayarafenui aurakhá ein dunan pon naren eraven ankaminten mino. ^{11x}Máan ma inona avúavá anon mai ma ída monópin ákona ukhein kéká aya ono van ma Yisas Karaisi e fúkein mai kékái ei afova fóké máden asuse inono. ¹²Máan tesin ma monópin ída ákona ukhein kéká ano ma eni namu avúaváká ma umeí intiya mai Yisas Karaisin má deren umeí uantán nono. ^{13y}Mai van mi séi ma nanuna yunan pon mano ma monópin ma ída ákona ukhein kéká mamádantin eraven ankamoren ma ukhantí maé mai séi ída evaráné mai yunan nanté uno. Mai fara seyo mai ma monópin ída ákona ukhein kéká ída mamádékun eraven ankamino van muno.

Aposeri Kayo Ano Vetii Yorantá Ma Miyan Baran Baya Ino

^{9z}Téi mai manáa kéká an dé monópin kama erá ba rafuno. Téi ídá Yisas Karaisini vaya varen orin bantá^{‡‡} ba rafuno. Te suu fóké ídá tetisi Bafan Yisasin onte rafuno. Téi ma ákona yorarí iyaruna rasá tiretí ankan Bafantá munan iya rafono. ^{2a}Ena kéká ano séin

nan ída aposeri e siyan mifo siretí ankan afová en ná téi aposerin bá uno. Para vara seyo, sireti ma fura mumunan má ma vanteya mai séi nan Bafani aposerin ban mino sin nono.

³Téimpin ma aposeri yorarí in ákona váká ma yoriyaruna van ma yaimiyain kékái evaráné tiamiyá uno. ^{4b}Kasaerá tiretí ankan amápin bariyá tiretin má manafin dunan ná non má nan tifante rafuno. ⁵Ena aposeri kayo vá Bafan Yisasin afá kéká bá inká Pitan má an derá kasae monópin ma vain nanin aviaré monó dorarí é nonte rafuno. ⁶Áa Banabasi rasan mano aná moní baran dorarí urerá mai yoran aya onte rafuno.

⁷Aruvin banta ano kasaen ná beyan dunan dosiren nariyan ná para yoranten nafino. Inká dunan ma yoran banta ano yunan mana yoriyan báken mai finte ídá manáa unáden nanten nafino. Inká sipisipirá ma yafisin banta ano fara aná dafisiyan báken ídá nan anu kháden nanten nafino. ⁸Tiyarafenui man baya ano ídá mai van tikhará bantai ineine finté tiya rafuno. ^{9c}Mai fara vara seyo, Mosesini man baya ano máa siyáken, “Kao ano ma uviti áftan do siviyáken ma yunan niyanti ída vá así ono,” sikhén mino. *Diu 25:4*

Tiretí ankan ma iniyaona Tiyarafenu ano kao van maná tiyan nafino. ^{10d}Mai ma siyain mai seti Tiyarafenui yoran nanin banta kayo va san má deré tiyan nafino. Eyo. Mai setin ma san nan mi siyan mino. Dunan ma yoran banta ano yunan ma yuyasiyáké mai fintena manáa naanté unon té iyan mino. Máan manae vá monó dorarí ma iyain kéká ano ma mo aya iyanti vá anona vetin ná aya ono. ^{11e}Tiretí ankampin monó baya fókéi

^{‡‡}9:1 Yisas Karaisini vaya varen orin banta e ma siyain mai **aposeri** van mino.

^w8:9 Rom 14:13-15; Kar 5:13 ^x8:11 Rom 14:15, 20 ^y8:13 Rom 14:21

^z9:1 Apo 22:17-18; 26:16; 1Ko 15:8-9 ^a9:2 2Ko 3:2-3 ^b9:4 Ruk 10:8

^c9:9 1Ti 5:18 ^d9:10 2Ti 2:6 ^e9:11 Rom 15:27

yanayun ma fafaseiní urékun ban mifo yunan má tuí daná ba san ma inantiyá tiferuna mai siretimpin ídá kanaí ukhayá anona ída inan tiya iya rafono. ^{12f}Ena kéká ano ma monó baya siretin me siamiyain nan ma vetin aya iyaona mai setin má dere ídá moéke siya inte fono.

Máan tiyaré Yisas Karaisini kama vava ma oriyain aa iyanaruna van mi sireti vaonafá tiya ono van ída ina iyá tiféuno. ^{13g}Kákan monó namumpin ma yafikein kéká ano maifin ma varen eriyain dunan ma né iyain ídá afová ukhe rafono. Íkun uan amin dunan antan ma maifin doriyain kéká ano ma varen mo né iyain mai vá deré ídá afová ukhe rafono. ^{14h}Máan mana en mi mai ma kama vava varen mo siamiyain kéká ano mai aa sákéi aya variyan mifo mai ma mo siamin nain kéká ano vá anona vetin aya ono sen Bafan mano ákona vava sikhen mino.

¹⁵Máan tukhen mifo séin tiya ino van ída uron mi ina iyaré umpo saréa séin araíe siya ono vara siamiya rauno. Ída ino. Téi ma simusin pinté monó baya vanasi sian amiyarunará miyan timeno vara ma vompon uvariya rauno. Ída ino. Te ma yoré oriyaruna yorantá ma miyan inantiré baranté maé mai sesi yoran aa iyaranté paséi mai aésirá téi furono. ¹⁶ⁱMai fara vara seyo, Yisasini kama vava ma siamintá ída su khakan onté uno. Tiyarafenu ano séin tútúpein nan mi siyá umpo ída ma siamenté mai séi uman mi varanté uno. ¹⁷Tesi sinunu finté ma mai avúavá bariyá maé mairá beni miyan baranté umpo mai ída sesi sinunurái variyá uno. Tiyarafenu anon téin aní uren airo ananí urá báké beni yoran bariyá uno. ¹⁸Téi náí miyan ná bariya rafuno. Monó baya ma sian ami-

yarunará ma miyan bararen mifo mai vanasi ma kama vava sian amiyaruna van mi simusin manan iyá uno.

Pori Mai Minó Nanin Bantai Yoran Banta Ino

¹⁹Téin ída mana nanin banta ano miyan timiyantí pasé betíi vava ída inenté umpo minó nanin bantai yoran banta vakesá mai aa sáké banasi o aviádékun ná Yisas Karaisintá mumunan ino. ^{20j}Yutan kayo vá ma vakesá betí ankan ma variyain avúavá pókesá o aviádékun ná Yisas Karaisintá mumunan ino. Yutan kayoi man baya ma yakhafiyan kéká bá ma vakesá mai séi ída mai man bayai aránaópá bá umpo veti ma variyain avúavá pókesá o aviádékun ná Yisas Karaisintá mumunan ino. ²¹Yutan kayoi man baya ma ída afová ukhein kéká bá ma váké mai vetin an dakhéi mai aa sáké betí ankan o aviádékun Yisas Karaisintá mumunan iyan mino. Máan ma iyaruna anon Tiyarafenui man baya ída yo variyá umpo Yisas Karaisi ma me yóan kanaí ein man baya aránaói vá uno. ^{22k}Mumunan ma ída ákona ukhein kéká bá ma váké betí an dakhé mai aa sákéi vetin o aviádékun Yisas Karaisintá mumunan iyan mino. Minó kéká ano ma kasaen mumunan oren aa sákéi o aviádékun Yisas Karaisintá mumunan iyan mino. ²³Yisas Karaisini kama vava ano orera ino van mi yoriyákun mi maifin beni avábá ano simusin timiyá doriyá uno.

Íú Tiren Ma Uviní In Baya Ino

²⁴Kokhon mano ma sava iyaré ein pinté mana anoi minó esantaren miyan baré iyan mifo afovasá ono. Tiretí ankan má dere mai avúaváká teya sava iyare

^f9:12 Apo 20:34; 2Ko 11:9 ^g9:13 Diu 18:1-3 ^h9:14 Mat 10:10; Kar 6:6
ⁱ9:16 Yer 20:9 ^j9:20 Apo 21:20-26 ^k9:22 2Ko 11:29

vá esantare miyan barano. ²⁵ Ara ara íú ma siyain kéká ano yafíben baren mi íú tiren minó ma esantarein mano ainen mo kípán miyan mi varé iyan mifo ída kípán miyan nan mi seti yoriyá tiféuno. ²⁶ Mai van mi savifá mo yáan dana siréi mesan ma mo kípán akhen ma vain mi kakhá áké tava iyá uno. Mai ma ayán dámaná ma aruviyain banta ano ma ayán tavifá karúdein nisa iya rauno. Ída ino. ²⁷ Ena nanin banta ana monó baya siamé oriyaré ída miyan baranae siré teyan dafíbéi ákona maman one one iyá uno.

Kampun Ayarafenurá Ma Monó Tiyain Baya Ino

10 ⁿ Mumunan tiyofi sifá tiváeyan noe, siretí ankan ída mo áunono van muno. Pefá kámá barafá Tiyarafenu ano konan dákan tetin tináuyan an uanten oriyákan inká non aúbaná pe uantáden mairá betin avían ena ufá kádakharen mino. ² Mosesin ma yakhafen orein kéká minó ano konan má un nompin má monó non péken mino. ³ Inká minó ano enará ukhein avúavápó ma afoká uádan dunan nen mino. ⁴ Inká minó ano enará ukhein avúavápó ma afoká uádan non nen mino. Mai fara vara seyo, enará ukhein onámaná anon betin má oriyákan mai finten non nein baréin mai onámaná Yisas Karaisi ino. ⁵ Tiyarafenu ano ma aviren oriyáken maen betí ankan pinté ma kokhon mano variyain avúava san ída amusin uren pasen kámá barafá aruren asuse en mino.

⁶ Betí ankan ma variyaré einí ukhein avúavá baranuna van mi Tiyarafenu ano fe o útúben mi setin aní ukhen mino.

⁷ Tiretí ankan ída vá manáa kéká an deya kampun ayarafenurá monó tiantano. Para vara seyo, Tiyarafenui vompon dóki ano máa sikhen mino. “Banasi ano omá dunan má non má niyáken pamúku avúavasien iyaren mino.” Eks 32:6

⁸ Manáa kéká an deya ída vá pamúku avúavasí ono. Máan tiyaren tuenti-tri tausení (23,000) ano maná damú ana furein mino. ⁹ Inká mai kéká ano ma Bafan akhenóka uan oniyaré in ma osafáe ano untádan purein mifo vá betí ankan an ída vá dano. ¹⁰ Manáa kéká ano ma aveantumpin baya siyaré ein an ída vá dano. Para vara seyo, mai avúava san mi vetin aren asuse ino van Tiyarafenu ano vanta ma aruan purin enisori siantan erein mino. ¹¹ Mai avúava sinta ma vetin amaniná ma afoká ukhein manon tetin aní ukhen mino. Ma vara ma mo kípán akhempá ma vá tiferuna nanin banta ano afova varano van mi Tiyarafenui vompon dókifin uvamádan baréin mai inka afoká ukhen mino. ¹² Tiretí ankan mantaan ákona ukhé uno sireya aniana iyare mai avúavápin tiretin má dere erave ankamin nampo yafían ná ákona ono.

¹³ Mai avúavá tiretin amaniná dákó inten mifo fefá ma varé ein kéká ano mai ma variyaona akhenókafin orikhen mifo afovasá ono. Mai akhenóka kayo ano siretin maman bararasí uranti ída mantaan ákona inae siren Tiyarafenu ano vei yoraríen ída áin mai akhenóka ano moéken kákaní iyan mino. Tiretimpin ma akhenóka erintin maen béi aa yosirantiya sireti akhen uvesin mai akhenóka ano siretin ída maman bararasí inten mino.

¹9:25 Fir 3:14; 2Ti 2:4-5; 4:7-8 ^m9:27 Rom 8:13; 13:14

ⁿ10:1 Eks 13:21-22; 14:22-29 ^o10:3 Eks 16:35 ^p10:4 Eks 17:6; Nam 20:11

^q10:5 Nam 14:29-30 ^r10:6 Nam 11:4, 34; 1Ko 10:11 ^s10:8 Nam 25:1-9

^t10:9 Nam 21:5-6 ^u10:10 Nam 16:41-49

**Kampun Ayarafenun Ma Íkun
Uan Amin Má Bafani Yunan
Nan Avúavá Bá Baya Ino**

¹⁴Máan tukhen mifo séi ma sin-unu ukheruna sirona kéka soe, kampun ayarafenurá ma monó tiantan avúava sará péde nentasá bano. ¹⁵Tiretí ankan kama inin má bain nanin banta ompo vá téi ma sian amiyaruna vaya mai furá tiya rafu siretí yantasá daídeya afová ono. ¹⁶^vBafani yunan kain takhoká ma kápi fintena uvaini non niyá tiferuna anon Yisas Karaisini nare vái manafin kasé bá tiféuno. Inká bereti ma kisiré niyá tiferuna anon Yisas Karaisini au vái manafin kasé bá tiféuno. ¹⁷^wMáan tukhein nan mi mana vereti finte ma kisiré niyá tiferuna anon mai setí ankan mana vukhafan bá tifékun mai anon aní iyan mino. ¹⁸^xIsareri kéká ano ma íkun uan amiyáken ma mai fintena varen mo niyaré ein avúavá anon Tiyarafenu vá manafiní iyaren mifo ovare vá me ineno.

¹⁹^yNái yana sará téi siamiya rafuno. Mai ma kampun ayarafenu kayorá ma monó ten noin kéká ano ma fura ayarafenu kayon bá uno siren ma íkun uan amiyain mai kákan danasá bará tiya rafuno. ²⁰^zÍda uron mino. Tiyarafenu rasa íkun uan amiyain naifo mai namu aunantái íkun uan amiyái siretí ankan má mai namu aunantá ma monó tiantan avúavá ída varano van mi siamiyá uno. ²¹^aTiretí ankan ída kanaíeya Bafani kápi finte vá namu aunani kápi finte vá non niyáke inká ída kanaíeya Bafani yunan kain takhókáke vá namu aunani yunan kain takhókáke vá dunan nan nono. ²²^bNái avúavasá bariya rafono. Bafan mano ma Isareri kékái namu avúava san ma uman ameiní ino vará tiretí ankan

béin aran amiya rafono. Tetisi ákona ano veni ákona esantakhen minó té iniya rafono.

**Tiyarafenu Aví Ma Yaní In Ma
Moéken Kákaní Ukhein Baya Ino**

²³^cTiretí ankan mai minó danasinta kasaé baranté uno siya ompo minó danasinta ano va ayainten naino. Ída ino. Minó danasinta kasaé baranté uno siya ompo minó danasinta ano va siretí mumunan ákona uantanten naino. Ída ino. ²⁴^dTiretí ankan ma vanona van ída vá iniyákeya ena kéká ma aya inona vará ineno.

²⁵^eNái safúna kayó sarí urantiya miyaní inte fo mai van ída vá nan nafi áa ídá nan nafi seya kokhon ineine iyákeya mai fara vá bare mo nano. ²⁶^eMai fara vara seyo, minó ma varará ma vain danasinta mai Tiyarafenun nina ino. *Íbo 24:1*

²⁷Ída ma monó tiyain banta ano ma ve amápin ma yunan nano van aviren orintiya mai kasae vá orono. Oresin ma yunan amintiya mai ída vá kokhon ineine iyákeya fara vá máde nano. ²⁸^eNan nompo manáa kéká ano ma siamiyáken ma yunan kayo mai kampun ayarafenurá ákonte ukhein dunan pon mino ma sintiya mai vetin ará namu uantant nampo ída vá máde nano. ²⁹Tiretí ankan ma nanteya maifin ída uman ban mifo mai ma siamin nain kéká ano ma ódaren ará uman daantan nain nan mi siamiyá uno.

Mai anarái séi ma ída variyaruna avúavá ma ena ano varano sintí mai ídá kanaí é barante rafuno. ³⁰^fTiyarafenu ma susu siantádé timusin iyá nanuna yunan nan mai fará uman barante rafuno.

^v10:16 Mat 26:26-28 ^w10:17 Rom 12:5 ^x10:18 Riv 7:6 ^y10:19 1Ko 8:4

^z10:20 Diu 32:17; Rev 9:20 ^a10:21 2Ko 6:15-16 ^b10:22 Diu 32:21

^c10:23 1Ko 6:12 ^d10:24 Rom 15:1-2 ^e10:28 1Ko 8:7 ^f10:30 1Ti 4:4

³¹gDunan má non masá nante fo áa manáa yanasá barante fo mai Tiyarafenu aví ma maman daní in avúavá kasá barano. ³²hTireti ma varanona yanáká ída vá áesin Yutan kayo fi áa ena anan nanin banta fi áa monó nanin banta fi vá eraven ankan mino. ³³iTéi má deren mai aa yakhafiyákéi minó nanin banta ma amusin amenuna yanasinta anan bariyá uno. Intéa yanasá tempin kama ukhen nafi mai ída sesi sinunurá bariyá umpo ena nanin banta ma ayaintin Tiyarafenu ano vetin evaránen aviraren ukhein danasinta anan bariyá uno.

11 ^jYisas Karaisi ma aní ukhein ánain ma séi vákuriyarunai e vá tiretí ankan téi ma aní iyaruna sínain bákurono.

Banasifin Ma Funtákein Avúavaká Monó Tin Baya Ino

²Tiretí ankan ma séin nan para ineine iyákeya ma inká téin tisimein baya ma siretin tiamékuya ma fákakheona van mi amo siyá uno. ³kTimusin iyá umpo mana yaná tiretí ankan afová ono van muno. Minó bantai ánon mi Yisas Karaisi van mi inká anasii ánon mi ve avafun ban mi inká Yisas Karaisin ánon mi Tiyarafenu van mino. ⁴Ánontá ma yóki yádáken amúken ma inká sakhanampa veya sé iyain banta kéká ano mai vei ánon Yisas Karaisin nan ída iniyan mino. ⁵Ánontá ma ída yóki yádáken amúken ma inká sakhanampa veya sé iyain nanin kayo mai ve avafun nan ída iniya inká be ánon do ma minó do varukheiníi iyan mino. ⁶Anasi ano ma ve ánontá ma ída yafinten ná be ánon do asíkarasá kavino. Anasi ano ma ánon do asíkará kaven do varukhen in nan ma ayave van inten ná be ánontasá dóki yafino. ⁷lBanta ano ma ída ánontá dóki yafin nain mai

véi Tiyarafenui aman manon mi váken beni kakhan mái van mifo anasi ma vain mai vantai kakhan mái van mino. ⁸mMai fara vara seyo, vanta ano ída anasi finté afoká ukhen mifo vanta fintéi anasi ano afoká ukhen mino. ⁹Banta ano anasi aya ino vara uvanten naifo anasi ano vanta aya ino van mi uvanten mino. ¹⁰Máan tukhantin anasii ánontá ma van nain dóki ano vá béimpin ma vain ákonai aní danasí ino. Mai fara vara seyo enisori kayo ano yafíken mino.

¹¹Bafari vanasi uno ma sikhein ábasufin ída kanaíen anasi ano ádun bantin inká banta ano ádun bantin inten mino. ¹²Para vara seyo fefá Tiyarafenu ano vanta aufói anasi uvantaréin mi saréa anasi ará pinté banta afoká iyan mifo minó daná Tiyarafenu fintéi erikhen mino. ¹³Tireti yantasá ma veya yaimono. Anasi ano ma ánontá ída yo yafinton Tiyarafenurá ma amúkin nain mai kama avúavasá inten nafino. ¹⁴Banta ano ma ánon do ifáin ayasí iyain mai seti vanasi ano ma variyaruna avúavái siretin aní iyan mifo mai vanta ano ídá ayave iyan nafino. ¹⁵Mai fara vara seyo, anasi kayoi auí danasí ukhen betin ánontá dáken amusin amino van mi Tiyarafenu ano ayá ánon do amikhen mino. ¹⁶Máan tukhen mifo manáa ano ma senti veya kayo van ma kokhon baya sinten maen Tiyarafenui ena monó kayofin ída ena avúavá bain mai ánain ída vákurinten mino.

Bafari Au Vá Nare Vá Ma Nan Baya Ino

¹⁷Taréa ma séi siamenuna veya mai siretí ankan ma amo sin baya va sente rauno. Ída ino. Mai fara vara seyo, siretí ankan ma átaru iyaonafin kama yaná manáai afoká é iyan mifo namu

g10:31 Kor 3:17 h10:32 Rom 14:13 i10:33 1Ko 9:20-22 j11:1 1Ko 4:16

k11:3 Esé 3:16; Efe 5:23 l11:7 Esé 1:26-27 m11:8 Esé 2:18-23

yaná anan esantakhé iyan mino. ¹⁸ⁿMa vava seno van iyáké téi ma inéku mae siretí ankan ma monó átaru iyá eona fin asivúare eraran aúban daintenan mai vava me sisimíká mai van puran tino sé iniyá uno. ¹⁹Máan tiyái mai ma aúban dainteona finté mai intéa kéká anó pura sen Tiyarafenui anunu ánain bákuriyan nafi mai siretiyantái afová inono.

²⁰Bafani yunan nantá ma manafin e átaru uve mai yunan ma neinisa iya vaono. Ída ino. ²¹Mai fara vara seyo, séin ma sisimí ineruna siretin pinté manáa ano ída ave into siretíi yunan afasí iyáke kokhon uvaini nare óen en nan inká manáa kéká ano arafan nan é iyan mino. ²²Tiretí ankani yunan má non má ma nan namun ídá ba rafono. Tiretí ankan Tiyarafenui mono san paen danasí ureya monó nanin banta vá ída ma yunan bain kéká bá ayavé amiya rafono. Téi náiesá té tiretin tiamente rafuno. Mai avúava san tiretin amo sente rafuno. Ída uron mino.

Yisasi Ma Vereti Vá Uvaini Vá Bei Eyo Iyampon Kayo Amein Baya Ino

(Matiu 26:26-29; Maki 14:22-25; Ruku 22:14-23)

²³Mai fara vara seyo, séi ma Bafan pintena vareruna vayan tiretimpin tiádékun oriyan mino. Namuro ayampin ma véin amin nain inuran manan Bafan Yisasi ano vereti orun mamaren ²⁴Tiyarafenu susu siantáden kisiren temí, “Ma se sui siretin ayaino van amé uno. Máan tiyáke vá tiretí ankan ten nan inisinte vá baro.” ²⁵oBereti ma amin naran maen mai ma einí ana en uvaini kápi orun mamaren temí, “Ma kápi mai Tiyarafenu vá ma auyen avúaváká kasen ban mi sesi naren

banaé umpo máan mana e niyáke vá ten nan inisinte vá baro.” ²⁶Mai fara vara seyo, siretí ankan mai vereti vá mai kápi finte vá ma niyasin maen mai anon Bafani furin baya sian dákó iya vasin mi véi ovaránen erinten mino.

Tetisi Sivútivá Daíden Ma Bafani Au An Dakhein Dunan Nan Baya Ino

²⁷pMáan tukhein nan mi mana vanta ano ma mai vereti vá Bafani kápi fin má ma niyáken ma ída funtákein avúavavasi ma inain mai véi Bafani au vá nare vái fainí uren ume avúavái varen mino. ²⁸Máan tukhein nan mi mai vereti vá kápi fin má ma nano sinte vá ei ineine vá aú bá daíde inire vá nano. ²⁹Mai fara vara seyo, mana vanta ano ma Bafani au van ída kamaen inin nan ma mai vereti vá kápi fin má ma nanten mai ano veyantái Bafan mano ma yaíden amin nain uman o maman be amaniná kainten mino. ³⁰Mai anarái siretí ankan pinté kokhon ná ano ída ákona van af bariyan maen manáa ano inka fúken mino. ³¹Máan tukhen mifo setisi ineine vá tú bá ma yaíde ma nékun maen Tiyarafenu ano setin ída yaiminten mino. ³²qMáan tonté tifé umpo Bafan mano ma setinti sivútivá daíden ma uman timé iyain mai anon tetin puntariyain mai varará nanin banta vá ída uman bará tifanté uno. ³³Máan tukhen mifo vá mumunan tiyofi sífá tiváeyan noe, Bafani yunan nanovan ma átaru inte vá ben avein maran ná ono. ³⁴Arafan uron ma furinti e amá nare ma yunan nare e átaru inona mai anon e amaniná ída uman e mamádan nono.

Ínainpá ma séi oronté maé ena vá mo inin amenté uno.

Kantá Aunan Ma Amusin Amiyain Baya Ino

12 Mumunan tiyofi sífá tiváeyan noe, Kantá Aunan mano ma siretin mana mana amiyain amusin nan taréa vompon uvaman amenté uno. Mai fara vara seyo, Kantá Aunan mano ma amiyain amusin ída afová ukhen ná mai kamaé tiameno van muno. ²Tiretí ankan ma ara ara yanáká ma monó tiyan nan maen mai yanasinta ano siretíí ineine yo yarifaádaya ída vaya siyain ayarafenu kayorá monó tiantiyare ono. ³Máan tiukhein nan mi siretin tiamiyá uno. Tiyarafenui Kantá Aunan má ma vaya siyain kéká ano ída kanaíen Yisasin amaniná aau amino van Tiyarafenuin tiaminten mino. Inká ída ma Kantá Aunan ban nain kéká ano ída kanaíen Yisasin nan Bafan mino sinten mino.

⁴Ara ara monó dorarí in amusin ma amé iyain mai mana Kantá Aunan manon mai amusin kayo amé iyan mino. ⁵Banasi ano monópin ara ara yorarí é iyan mifo mai mana Bafani yorarí anan é iyan mino. ⁶Tiyarafenu ano ara ara aa sákéi setin túpin doriyan mifo mai mana Tiyarafenu anan báken mi minó pin doriyan mino.

⁷Minó nanin banta aya ono van mi Kantá Aunan mano monó dorarí in amusin mana mana simikhen mino. ⁸Kantá Aunan mano manáa kéká kama ineine ma amin afova vá banasi ma monó baya sian amin má amiyáken inká ena kéká mai Tiyarafenui vaya ma ovaren me yaíden afová in amusin amen ukhen mino. ⁹Kantá Aunan mano manáa kéká mai ákonaen ma mumunan in amusin amiyáken inká ena kékái aí banta ma ayofan ákona amen ukhen mino. ¹⁰Manáa kéká mai enará ukhein

aní danasí ma in ákona amiyáken inká ena kékái sakhanampaí ma in afova amen ukhen mino. Inká manáa kéká mai ena aunantasá baya siyan nafi áa Tiyarafenui Kantá Aunan tasá baya siyan nafi siren ma afová in ákona amikhen mino. Máan tiyáken inká manáa kéká mai ara ara vaya finté ma vaya sin amusin amiyáken inká mai vaya ma vaéan amin afova ena kéká amen ukhen mino. ¹¹Mana Kantá Aunan manon beyantá mana mana ano ma kanaíen doraren avúaváká ten ákona vá afova vá amídú ukhen mino.

Mana Aulin Ma Kokhon Bukhafa Vain Baya Ino

¹²vBanta aulin mai ara ara yanái van mifo mai mana vukhafa fintéi yákó ukhen mino. Yisas Karaisini monó nanin bantafin máan manan ukhen mino. ¹³wTetí manáa ano Yutan kéká bá tifékun manáa ano ena anan kéká bakan manáa ano ída miyan ban doran kéká bakan inká manáa ano kusen ban kéká ban ukhen mino. Máan tukhan maen mana Kantá Aunan manon Yisas Karaisimpin monó non pétintádá mai Kantá Aunan manan minó ano manté tiféuno.

¹⁴Máan tukhan mana vukhafa fintéi ara ara yaná ban mifo ída mana yaná ana van mino. ¹⁵Arantan mano sen téi ída ayan bákéi ída au vukhafafin bá uno sinten mifo mai véi aui mana vukhafan ban mino. ¹⁶Inká átaren mano sen téi átaren mi váké ída auu varuna séi ída au vukhafafin bá uno sinten mifo véi aui mana vukhafan ban mino. ¹⁷Minó bukhafa ano auu ana ma vantin mai inté uren ná baya ininten nafino. Inká minó bukhafa ano ma mana átaren mana ma váken mai inté uren ná manáa

[†]12:2 Aba 2:18-19

[§]12:3 1Yn 4:2-3

[†]12:4 Rom 12:6

^u12:11 1Ko 7:7

^v12:12 1Ko 10:17

^w12:13 Kar 3:28

yaná auna inten nafino. ¹⁸Tiyarafenu ano veyan ma anunu ein barurái mana mana vukhafa uvaman kaudú uran ban mino. ¹⁹Au vukhafafin mana yaná ana varé intin mai intesá in nainten nafino. ²⁰Mai ída kanaí in nainten mifo mana vukhafafin mi ara ara yaná ban mino.

²¹Auu ano ída kanafen ayan nan ída éin nan iyá uno sintin inká ánon mano ída kanafen arantan nan ída éin nan iyá uno sintin inten mino. ²²Manáa ída ákona vain bukhafa mai vanta au fin ída vano sen baré intin au vukhafa ano ída kamaen ban nainten mino. ²³Manáa vukhafa ída kama ukhen mino ma sétiferunan tuí uaké kama iyá uno. Inká manáa siyave vukhafa ma vain mi mai ena ano onana siré aúpasíi iyá tiféuno. ²⁴Manáa vukhafa mai veni yoran ída van mino siyá tifé umpo Tiyarafenu ano minó bukhafa ovare evare uan manafin kaúden ída aví bain bukhafa ino ma siyaona mai kama e yafiseno van mi kain ban mino. ²⁵Máan tukhein nan mi veraran ída aúban daiminten mifo ventá dafisin maran mi inten mino. ²⁶Mana vukhafa ano ma aí o yosin maen minó bukhafa anon ai san éiyan mino. Inká mana vukhafa ma maman daní in maen mai minó bukhafa anon amusin éiyan mino.

²⁷^xMinó ano Yisas Karaisini au vukhafan bákeya mana mana ano veni mana vukhafan barú ukha ono. ²⁸^yTiyarafenu ano ma Yisas Karaisini au vukhafafin asotú uran bain kéká maen masi van mino. Esé ma vain mai vava varen orin banta kéká bákan mairá sakanampa kéká bákan ukhen mino. Inká kanú manausí ma ukhein kéká mai afova amin kayo vá enará ukhein aní daná ma uvaran kayo vá bákan inká aí ma ayofan amusin ma mantein kayo vá ena nanin banta ma kasaen aya orin

kéká bákan ukhen mino. Inká mai ma yoran danasintará ma yafíken doran amin kéká bákan inká ara ara vava finté ma vava sin kéká bá bákan ukhen mino. ²⁹Minó ano aná baya varen orin kéká ban nafino. Ída ino. Inká minó anó sakanampa kéká ban nafino. Ída ino. Inká minó anó afova ma amin kéká ban ná inká enará ukhein aní danasí ma in ákona mai minópin ná ban nafino. Ída ino. ³⁰Inká minó ano aná ayofan amusin mantan ná inká ara ara vava ma sin amusin mai minosá timikhan ná inká mai vava kayo ma o vaéan amin amusin minó anó manté tife rafuno. Ída uron mino. ³¹^zMáan tukhein mifo ena nanin banta ayain amusin ma varan nará moéke anunu ono.

Ena Van Ma Anunu In Avúavá Ano Moékakhen Mino

Máan tin nompo mai yanasinta ma esantakhein avúavá mai siaméku inin nono.

13 Barará nanin bantai ara ara vava vá inká enisori kayoi vava vá pó ma siyákun ma ena avábá uren ará amin avúavá ma sempin ída vantin maen mai senti vava ano yavena ma ankamiyan avaya yakhaní iyan inká bano ano ma aseíní iyákun pasen mi veni ana ída vanten mino. ²^aMáan tinten mifo sakanampa vava sin amusin baré ma inká Tiyarafenui aúpá baya afováin baré ma inká minó afova varé ma inká anuyon kayo siantantin ma e afánen orin mumunan ma sempin bantin ma ena ará amin avúavá ma ída vantí maé mai senti yoran mano mo faen danasíi inten mino. ³Ona ída van nanin banta ma se sina yanasinta varé mo amiyá ma inká ira khiyaimpin te su ampian kaiyá ma ena nanin banta ma ída avábá onté maé mai senti yoran paen danasíi inté uno.

^x12:27 Rom 12:5 ^y12:28 Efe 4:11-12

^z12:31 1Ko 14:1 ^a13:2 Mat 17:20

⁴Avábá in avúavá maen mai ída ma ainen aran édavin avúavá bákan inká ena ma ará amin avúavá ban ukhen mino. Avábá in ma vain mai ena ina yana san inian namu uanten ma inká be amo siyan be aví daní in naino. Ída ino. ⁵Avábá in avúavá ma vain mai koen ma veyan nan mana inian ma ainen aran nan uaren ena inian namu uantan avúava saino. Ída ino. ⁶bAvábá in avúavá mai ume yanápin amusin in naino. Pura yanápin ma amusin in avúavá ino. ⁷cAvábá in avúavá maen ída ainen o kípán maen inká ena ena Tiyarafenurá inin kaen inká ena ena yamú kama yana san ave en maen inká ara ara uman eriyantin ákonaen dafíken báken ma ena kéká bá manafin ban avúavá ino.

⁸Avábá in avúavá maen para van oriyán banten mifo sakhanampa veya sin nafi ara veya finté ma sin nafi inká kákan afova ma mantein mai avúava sinta kípanten mino. ⁹Mai fara vara seyo, saréa sító máarái afova manté tifékun inká sakhanampa vanta kayoi veya vá dere ano sító máarái sian amá iyan mino. ¹⁰Máan tukhen mifo mai yanasinta ma fura sen minó afoká inain damú ma ma sanáa afová ukhé bariyá tiferuna yanasinta ída vanten mino.

¹¹Arará iyampon ma váké maé iyampon mano ma veya seiní é arará ineine é inká iyamponi avúaváká noré umpo e inoré bantaí ma iyáké maí damú anan iyampon kayoi avúavá me ampé uno. ¹²Taréa maí Tiyarafenui auná onano van iniyá tifé umpo ven auná maen namu ukhein kamufin ma oneiní iyáken béi anan tetin toniyan mifo ínainpái veni ádé orivé ben ayafen ódé pura sé afová ó tifanté uno.

¹³dMáan tukhantin kanú manaú avúavái fara vanten mino. Mai máa maen mumunan in má kama yana san

ma avein má ena ma avábá uantan má ifo avábá in manon moéken kákaní ukhen mino.

Ara Ara Vaya Vá Sakhanampa Vaya Ma Sin Máí Amusin Baya Ino

14^eEna nanin banta ma avábá in avúavasá pákaresin bantiya Kantá Aunan mano ma ara ara amusin amiyain bariyáke vá Tiyarafenui vayará ma sakhanampa veya sin avúava sará moékentá anunu iyáke vá barano. ²Mai fara vara seyo, mana vanta ano ma ara ara veya finté ma ara ara sin nain baya mai vanasi ano ída afová inten mifo Tiyarafenu ano anan afová inten mino. Kantá Aunaní ákonarái mai ma aúpá baré ein baya siyan mino. ³Máan tiyan mifo sakhanampa veya ma siyain manon ena nanin banta ákona amiren ará kusiantiyán maen betíi monó tin avúavá aya íkan ákona é iyan mino. ⁴Ída afová ukhein baya finté ma veya siyain banta ano veyan manan aya iyan mifo sakhanampa veya ma siyain banta ano monó nanin bantan aya é iyan mino. ⁵Monópin báke ma mumunan iyaona kéká ano ara veya finté baya seno van inikhe ompo sakhanampa veya seno van mi moéken tinunu iyá uno. Mai fara vara seyo, sakhanampa veya ma siyain avúavá anon ara veya finté ma veni ana ída sian amá in ma siyain esantakhen mino. Mana vanta ano ma mai ma siyaona veya ma kanaíen baéan monó nanin banta ma amintin manan mai finten betin ma ayain baya afová inten mino.

⁶Mumunan tiyofi sifá tiváeyan noe, siretí ankan ma ída afová ukhanona veya finté ma siamenuna ano mai inté en ná tiretin ayainten nafino. Ída ayainten mifo mai ma Tiyarafenu ano aúpá baya sisimein má inká sakhanampa veya

^b13:6 Rom 12:9 ^c13:7 1Pi 4:8 ^d13:13 1Te 1:3 ^e14:1 1Ko 12:31; 14:39

vá inká afova amin baya vá ma sian amenuna anon tiretin kanaíen aya inten mino. ⁷ Okhaxhan nafi vano fi ma ída aunan bain danasinta ano ma asiyainí en kamaen puntáden baya siamiyan mino. Mai fara vara seyo, mai yanasinta fóké ma ída kamaen asintin mai ída kanaíen mana ano afová inten mino. ⁸ Inká ufen ma ída kama asirí ma intin mai aruvin banta kayo ano inté uren ná aruvin damú ino sen afová uren ná utá inten nafino. ⁹ Tireti ankan má dere máan manan inono. Ída ma e avaya finté baya sin ma ena vaya finté ma siyasin mai intesa uren ná mai vaya ena kéká ano afová inten nafino. Mai ma sinona vaya ano fasavi afokhampin ma oreiní inten mino.

¹⁰ Ara ara vayan minó akhempá bákan mai vaya kayo ma inikhein kéká ano anan mai vaya kayoi ana vaya kamaen afová é iyan mino. ¹¹ Máan tukhen mifo mana vanta ano ma ena vaya finté baya siyantí ma mai vayai ana ída afová ékun maen mai verasan enafá banta ma vainí ukhé beni vaya ana ída afová ékun inká tenti vaya ana yeren ída afová inten mino. ¹² Máan mana eya Kantá Aunani amusin barano sire anunu iya ompo Tiyarafenurá amúkesin ná monópin ma vain kéká ayaen amusin amintin ná monó tin avúavá ákona ino.

¹³ Máan turanti mae mai ída afová ukhein ena vaya finté ma vanasi siamin amusin ma mantanona ano amúkesin ná mai ma seona vaya ana ma sian amá in ákona Tiyarafenu ano amino. ¹⁴ Mai fara vara seyo, séi ma ída afová ukheruna vaya finté ma simúkiyá kun ten tú iyampon manon amúkiyan mifo sesi ineinefin ída veni ana afová é iyá uno.

¹⁵ Máan tukhantí maé mai séi intesá onte rafuno. Téin tú iyampon ma amúkiyantí mai sesi ineinefó basá

timúkono. Inká tú iyampon ma í diyantí mai sesi ineinefó báí í danté uno. ¹⁶ Mai fara vara seyo, en aú iyampon mano ma Bafan aví daní iyan amúkuan amiyan ma susu sian tiyantín ma mai vayai ana ma ída afová ukhá in nain mano intesá uren ná mai vaya ma siyaona afová en ná pura ino sinten nafino. ¹⁷ Éi ma susu siantan nona mai kama uron mi inompo mai ma ádé báken inin nain kéká ída uron mi aya inten mino.

¹⁸ Téi ma siretin esantaré ma ara ara vaya kayo fóké banasi sian amiyaruna van mi Tiyarafenun tusu sian tiyá uno. ¹⁹ Máan tiyá umpo Tiyarafenui monó nanin bantafin kasaen ma ineren ukhein dan manápá baya máa vá ten umpo ena vaya finté ma siyan mikan tauseni (10,000) vaya ma sékun maen kokhon nanin banta ano ída kanaíen ininten mino.

²⁰ Mumunan tiyofi sifá tiváeyan noe, mai ma sian amiyaruna yanasinta van ída vá arará iyamponi ineine variya vano. Namu avúavápin ma o fékeya arará iyampon an diya van nompo siretí inimpin ná karakhein nanin banta an ná dano. ²¹ Tiyarafenui vompompin Bafan mano máa sikhen mino.

“Ída ontanona vanta kayo finte safi inká ída afová ukheona vaya siyain kéká oo ráke safi uaré

mai nanin bantafin baya siamenté umpo vetí ankan ída senti vaya ininten mino.”

Ais 28:11-12

²² Ara ara vaya finté ma vaya siyain avúavá mai mumunan nanin banta ayain baya vaifo mai ma ída ma mumunan iyain kéká ina ino. Sakhnanampa vaya ma siyain mai mumunan ma iyain kayo ayain baya ifo ída ma mumunan iyain kéká ina vaino. Ída ino. ²³ Máan tukhein nan mi manáa ída ma mumunan in kéká bá inká mai vaya ída afová ukhein kayo

vá ano eriyán ma e onantín mumunan nanin banta ano ma ara ara vava fóké ma monó baya siyantín mai van amino uren mai kéká ano óén mi iyan ne sin ten mino. ²⁴^hMáan tukhen mifo sakhanampa vava siyá esin ma manáa kéká ano eriyán ma e inintín ma mai vava siyain maen mai vava ano vetíi ume maman dáko urantín ará baeranten mino. ²⁵Máan tintín maen mai kayo aúpin ma ara ara ineine aúpá baré in nain e unen dáko intín aron durafúden Tiyarafenu má monó tiyáken mai Tiyarafenu ano sireti má pura sen ban mino sintén mino.

**Puntákein Avúavá Póké Ma
Monó Tin Baya Ino**

²⁶ⁱMáan tukhein mifo mumunan tiyofi sifá tiváeyan noe, mai ma sian ameruna vayai ana sian amékuya inin nono. Monó nanin banta ma átaru uvinte vá manáa kéká ano í desin ena kéká ano afova vava sinti vá inká mai ma Tiyarafenu ano aúpá baya siamikhá in nain kéká ano vá tian dáko ono. Ínká manáa kéká ano ída ma afová ukhan nain baya finté tiresin ena kéká ano vá mai vayai ana sian amá ino. Máan ma inona ano vá Tiyafenurá ma monó tiantan avúavápin ná ákona uantano. ²⁷Máan tiyantín kan mano fi kanú manaú ano fi ma ena vava finté ma vava seno van ma intín maen ná mai áintín mana ano sirú tirú iyantín ena ano vá mai vayai ana vaéan banasi amino. ²⁸Amintén mifo ma mai vava ana ma vaéan amin banta ma mai átarufin ída vantín mai ma ída afová ukhein baya finté ma siyain banta ano ana vei ineine finté sá Tiyarafenu vá aúpá baya sino.

²⁹^jÁésin ná kan mano fi kanú manaú ano fi vá sakhanampa vava siyantín minó ano mai ma siyain baya vá daí-

den afová ino. ³⁰Afová inten mifo manáa kéká ano ma sakhanampa vava siyantín ma mai aúbanáké mana vanta ano Bafani vava ma varantín mai ma vava siyá in nain banta ano vá bei vava fákano. ³¹Mai aa sákéi mai ma sakhanampa vava siyaré inona kéká ano kasae eyan tirú tirú iyasin minó nanin banta ano mai vayai ana afová intín betíi mumunan ákona uantantén mino. ³²Mai ma sakhanampa vava siyain kéká ano ve aunantái yafidú ukhen mi vava sé iyan mifo afovásá ono. ³³Mai fara vara seyo, minó akhempá ma monó nanin banta vaimpin mai ída asusein Tiyarafenu ban mifo ará kusin mana ma amin Tiyarafenu ban mino.

³⁴^kYutan kayoi man baya ano ma sikheiníen ída vá anasi arinta ano monó átarufin o aníen baya siyáken betiyan ná maman bararasí ino. ³⁵Anasi ano ma mana inain bantín maen be amápin oriven ná be avafun tasá ina ino. Mai fara vara seyo, anasi ano ma monó átarufin baya sin maen mai ída funtáken mino.

³⁶Tiretí Koriní nanin banta ano ma iniyaona ano mai Tiyarafenui afova vava ano setimpín mi aráf uren mo kípakhen minó tiya rafono. Ída uron mino. ³⁷^lMana vanta ano séi sakhanampa vantán báké monó bantan bá uno se vareya mai sen nan Bafani ákona vayan uvaman timiyan mino sireya afová inonaren mino. ³⁸Máan tinonaren mifo ma vava ma inian kaumpan esin maen mai Tiyarafenu ano éi má deren inian kaumpan inten mino.

³⁹Mai vará mumunan tiyofi sifá tiváeyan noe, amusin pintesá sakhanampa vava siyákeya inká ara ara vava finté ma siyaintá ída vá are ono. ⁴⁰Máan tin nompo funtákein avúavá

^h14:24 Yon 16:8 ⁱ14:26 1Ko 12:8-10 ^j14:29 1Te 5:21

^k14:34 1Ko 11:3; 1Ti 2:12 ^l14:37 1Yn 4:6

pókesá minó daná arakhóku ure varesin ná mo kama ino.

**Yisas Karaisi Ma Evaránen
E Mantein Baya Ino**

15 Mumunan tiyofi sífá tiváeyan noe, pefá ma Yisas Karaisini kama vava siaméku ma inire mantaan ákona ukhaona van tian ákona uantano van mi ma vava senté uno. Mai fara vava seyo, mai vava ma ineonarái mantaan ákona ukha ono. ²Mai ma siamenuna kama vayará ma ákona mumunan esin maen mairái Tiyarafenu ano aviranten mifo ena yanáká ma mumunan esin mai ída aviranten mino.

³Mai fara vava seyo, inte vayá mantare rafu mai vava máan tiritimpin tiamé uno. Tiyarafenui vompon dókifin ma síkhá eníen Yisas Karaisi ano setinti umerái e fúken mino. ⁴Tiyarafenui vompon dóki ano ma síkharé einíen béin masí uran ma kanú manaú damú orivíkan masí pinté e manten mino. ⁵Masí pinté e mantakharé íkan Pita nare ódaran ínaimpáké eni eyo iyampon kayo ano onen mino. ⁶Ódaran maí damú anan dan manápá antareti (500) nanin bantafin afoká íkan onen mino. Afoká íkan ma ontaré ein kéká pinté manáa ano furiyan maen kokhon mano fara van mino. ⁷Mai oyampáké Yemisi ano véin ódaran ínaimpáké ena bava varen orin kéká onen mino. ⁸Minó ano ontaré ínaimpáké iyampon ma kain damú ma esantavin ma fasavi yamú ma mo afoká einíi en ten tivorá afokái oné uno.

⁹Mai fara vava seyo, séi ma fefá Tiyarafenui vanasi aruan puriyaré eruna van téin nan ída aposeri oe sen tarantí eyo iyampon kayoi aránaó bano van muno. ¹⁰Máa siyá umpo sesi yoran

tasa Tiyarafenu ano séin tarisari usintádá máan tukhe rauno. Ída ino. Mai fara vava seyo, ena aposeri kéká esantaré téi yóké umpo mai seyantasa yóké rauno. Ída ino. Tiyarafenu ano vei sarisari fókéi séin pinté uaren doren mino. ¹¹Máan tukhanti séi ma sian amiyaruna mai vava ano fi ena eyo iyampon kayo ano ma siamin nain bava ano fi mai ída enará ukhantiya onan nono. Yisasi ma fúaren e mantakhein bava ma seti siaméku mairá ma mumunan iyaona anon kákan danasí ukhen mino.

**Púká Inain Kéká Ma
E Mantan Nain Baya Ino**

¹²Máan tukhen mifo Yisasi ma fúaren e mantakhein bava ma siamékuya inikha ompo mai faraé tireyá tiréti ankan pinté manáa ano mai ma fúkein nanin banta van ída orun mantanten mino siya rafono. ¹³Mai fara vava seyo, fúkein nanin banta van ma ída orun mantanten ne sinte mai Yisas Karaisin nan ída evaránen e mantakhen nen tin nono. ¹⁴Yisas Karaisi ma ída evaránen avían mantakhanti mae mai ma veni furin bava ma sian ameruna vá Tiyarafenurá ma ákona inin kaiyaona vá ano mo faen danasí anan inten mino. ¹⁵Púkein kayo ano ída evaránen orun mantanten ne ma sé tifanté mai seti aposeri kéká ano Tiyarafenun kampun tiantá tifanté uno. Mai fara vava seyo, Tiyarafenu anon Yisas Karaisin masí pintena orun avían mantakhein bantí teti ma siyaruna vava mai kampun mi siyanté uno. ¹⁶Mai fara vava seyo, fúkein nanin banta ma ída e mantanté intin mai Yisas Karaisin má deren masí pinté ída e mantakhen mino. ¹⁷Inká Yisas Karaisin ma ída masí pintena orun avián mantakhe ne ma sinteya

^m15:3 Ais 53:5-12 ⁿ15:4 Mat 12:40; Apo 2:24-32

^o15:5 Mat 28:16-17; Ruk 24:34 ^p15:7 Apo 1:3-4 ^q15:8 Apo 9:3-6

^r15:9 Efe 3:8; 1Ti 1:15 ^s15:10 2Ko 11:23

mai siretíi mumunan mano mo faen danasí intiya siretí ankan umefin para van nono. ¹⁸ Máan tukhantin mi Karaisintá ma mumunan uven púkan nain kayo ano o afeyoranten mino. ¹⁹ Inká taréa ana Yisas Karaisin nan tiya ino van muno siré ma iniyaruna mai fura sé ma varará ma ída funtákein nanin banta ma vain esantaréi namu uron ukhé bá tifékun mi ena nanin banta ano setin nan arunan us-intanten mino.

²⁰ Máan tukhen mifo Yisas Karaisi ma fúbin masí pintena Tiyarafenu ano orun avían mantakhein mai fura yaná ino. Mai ma fúká intin evaránen orun avían mantan nain kékái véi ano aníen ifan dunan pinte ma aráien duyasein an mi yakhen mino. ²¹ Mai fara vara seyo, Adamun pinté uaren purin afoká ukháin mi inká Yisas Karaisin pintéi orun mantan afoká en mino. ²² Máan tukhein nan mi Adamuni kékasi ma in nain mano mai furiyan manan banten mifo Yisas Karaisini kékasi ma in nain kayoi fara van oriyan ban aunan aminten mino. ²³ Aminten mifo evaránen ma e mantani aa mai máan mi ukhen mino. Yisas Karaisin naren púbin mi ifan dunan ma yuyaseiníen béin orun avían mantakhein pasen béi ma ovaránen erin nain damú beni vanasí ma fúkaren masí pinté orun mantanten mino. ²⁴ Orun mantavintin maen namu aunan kayoi ara ara ákona vá inká namuro ano[¶] ma yafisiyá ein má maman bararasí uren dafisin ákona maman Tifóe Tiyarafenu kaúdantin mi ínainpáké bara ma kípan damú afoká inten mino.

²⁵ Mai fara vara seyo, Yisas Karaisi ma kin karáká kumantantin maen béi anon beni namuro kayo maman bararasí

urantin mi véi yafisinten mino. ²⁶ Purin ma vain mai sipá kípan namuron bain mai maman bararasí uren beni ákona yo maman karúdanten mino. ²⁷ Mai fara vara seyo, Tiyarafenui vompon dóki ano sikhen mino. “Tiyarafenu ano minó danáká ma yafisin ákona véin amikhen mino.” *Íbo 8:6*

(Amikhen mifo Tiyarafenu vasa mai ma ven amikhein ákona aránaó ban naino. Ída ino.) ²⁸ Máan turen béi ma minó daná ákona maman barasí uren be Afóen avorá orintin maen mai ma esé arái en be Anin minó ákona amikhá ein Tiyarafenu ano minó danáká o ánoní inten mino.

²⁹ Púká ein kayo ano ma ída e mantantin maen betin aya ono van ma monó non péantáká ein kéká ano náiesá tinten nafino. Inká púká ein kayo ano ma ída orun mantanté intin mai náí ana vará purin nanin banta aya intó uno siren monó non maman tiyaren nafino. ³⁰ Inká náí vará ena nanin banta aya ono van ena ena yamú tetiyantá uman bariyá bá tife rafuno. ³¹ Monó nanin banta oe, fura siré ma vaya siamiyá uno. Ena ena yamú maen purin mano sen má áde suron ban mifo Yisas Karaisi ma siretin má túpá ukhen ma siretimpin doriyain nan mi simusin iyá uno. ³² Nai yanasá barano vará Efesasí ma vain banta kayo vá ma siruviyaruna ano afá tafúna kayo vá ma aruvein an diyá tife rafuno. Ída ma fúkein nanin banta ma orun mantiyain ma vantí maé mai seti ankan ída kanaí é kama yanáká inin kaúde ave ukhé bá tifanté uno. Mai fara vara seyo, sakhanampa vanta Aisaiya máa sikhen mino.

“Inuran puró tifanté umpo erí tifé omasí iyáké

[¶]15:24 Namuro maen mai namu aunan kayo vá Ban Anon má bei namu enisori kayo vá ino.

[†]15:21 Rom 5:12 [‡]15:23 1Te 4:16; Rev 20:5 [§]15:25 Mat 22:44

[¶]15:26 Rev 20:14 [×]15:30 Rom 8:36

óen non naré óen ó tifano.” *Ais 22:13*

³³ Ída vá áesin ná mai ma furin pinté ída e mantanten ne ma siyain kéká ano éin máka sino. Mai fara vara seyo, “namu avúavá ma variyain kéká ano kama avúavá aruan puré iyan mino.” ³⁴ Ída vá umeí iya váke ovare vá me ineno. Mai fara va máa siya rauno, manáa ano ma ída Tiyarafenun afová ukhanteya mai siretin ayave vá bano.

Evaránen Ma E Mantan Nain Bukhafai Vaya Ino

³⁵ Banten mifo manáa vanta ano ina iyan ma “Intesá uren ná púkein nanin banta ano orun mantaven inté ukhein bukhafá mamaren ná erintéi vae” ma siyain, ³⁶ ymai faraé tiré óen banta ano ma inaeiní iya rafono. Danayun ma varafin pafasiren nan maen ída esé ana orun pótíyan mifo fúaren mi ínaimpá orun póté iyan mino. ³⁷ Inká danayun ma varafin dóden nan baren ma e ampamé iyain mai esesa máan tukhein na yaruan mo yoré iya vaono. Ída ino. Titó asakhakhein ayun mi varafin pafasiren nan baren orun póté iyan mino. ³⁸ Póté iyan mifo Tiyarafenu ano vei anunurái mai yanasinta auí uanté iyan mino. Ara ara ayun ma vain mai vei avúavákái sen orun ampamé iyan mino. ³⁹ Mai ma ara ara yanayun kayo vá káta kayo vá ano ma e ampamiyain má minó danái au ano ída manái ukhen mino. Banta au vá uraran au vá nun au vá inká noyana au kayo vá ano enarasí ukhé iyan mino.

⁴⁰ Máan manan en mi ayompin ma vain danasinta vá barará ma vain danasinta vá ban mino. Ayompin ma auí ukhein danasinta vá barará ma auí ukhein danasinta vá ano ída manái ukhen mino. ⁴¹ Áau ano veyan enará ukhein daná bakan mi inká biyon má ofu kayo vá ano enará ukhen mino. Máan

tukhan ofu kayo mai veyan mana mana ano ena avúaváká panu sirú é iyan mino.

⁴² Evaránen e mantan nain bukhufa ano máan manan ukhen mino. Mai ma masí ukhá ein bukhafa ano fútaen namu ukhá intin maen evaránen ma orun mantan nain bukhafa ano ída fútaen namu inten mino. ⁴³ ^zTetisi furin bukhafa ma onékun maen tivesara iyan mifo fúká intin ma ínaimpáké orun avían manten orera uvintin maen kama vukhafa vái vanten mino. Inká taréa ída ákona vákan ban mifo ínaimpáké ma evaránen orun avían mantarantin maen kákan ákona vái vanten mino. ⁴⁴ Betí ankan mai yan bukhafa vái saréa van mifo fúkaré intin ma ínaimpáké orun avían mantaren maen Kantá Aunan mano ma aunan amin nain bukhafa vái vanten mino. Mai fara vara seyo, ma varará ma ainen purin bukhafa ano ma vainíen inarurá deren mai ma Kantá Aunan mano aunan amin nain bukhafa vái van mino.

⁴⁵ Máan tukhan Tiyarafenui vompon dóki ano máa sikhen mino. “Esé araiintá Adamu ne ma siyain banta ano aun mantaren mino.” *Esé 2:7*

Mantein mifo ínaimpá ma Adamun an dakhein banta Yisas Karaisi ma erein manon ayun para van oriyan ban Aunan amin bantaíen mino. ⁴⁶ Barará bukhafa naren erivin maen ínaimpái Kantá Aunan mano ma aunan amin bukhafa eren mino. ⁴⁷ Esé ma erin banta Adamu maen bara ráke kayó pákaren uvantáin mi ínaimpá ma erin banta Yisas Karaisi mai inarufákéi erikhen mino. ⁴⁸ Minó barará nanin banta ano Adamun an den barará bukhafa vái van mifo inaru vukhafa ma vará tifanuna ano mai Yisas Karaisin au vukhafa an mi yanten mino. ⁴⁹ Adamu ma ma varará banta vain an mi yakhé tiferuna maná damusí ma intí maé inaru

fáke vanta Yisas Karaisin an dá tifanté uno.

⁵⁰ Mumunan tiyofi sífá tiváeyan noe, séi máan mi siyá uno. Dan bukhafa vá nare vá ano ída kanafen Tiyarafenui yafisin aúpin orinten mino. Ma ma setinti ainen pútain bukhafa ano ída kanafen ayáká para oriyán banten mino.

⁵¹ ^aMáan tukhen mifo inikhesirá taréa Tiyarafenui aúpá baya ma setí ankampin afoká ukhein tiaméku vá ineno. Ída minó ano fura sé puró tifanté umpo maman ena vukhafái ó tifanté uno. ⁵² Tipá kípan ufen ma asinti mai ma auu makhí diyaona an den mi mai avúavá afoká inten mino. Mai fara vara seyo, ufen ma asintin mai ma mumunan uven púká in nain kéká ano auyen bukhafa vái orun mantanten mino. Inká mai ma ída fúká ótífanuna nanin banta ano maman auyení é ída furin para oriyá bá tifanté uno. ⁵³ ^bMai fara vara seyo, ma varará ma ainen puren púta iyain bukhafa ano maman inaru rákena ída ma furin para van oriyán ban bukhafaisá ino.

⁵⁴ Mai ma ma varará ainen puren púta iyain bukhafa ma maman ída ainen pútain inaru vukhafái urantin maen mai ma Tiyarafenui vompon dóki ano sikhá ein mi mo kanaí inten mino. Mai máan mi sikhán mino.

“Aunan mano furin inka aruan kípen mino. *Ais 25:8*

⁵⁵ Purin noe, intesí eni ákona van nafino. Purin noe, inté ureyá tirinte fono.” *Ose 13:14*

⁵⁶ ^cMai fara vara seyo, ume anon aruan puriyákan inká ume ano man baya finten ákona variyan mino. ⁵⁷ Máan tiyan mifo Tiyarafenu ano ma setisi Bafan Yisas Karaisin pinté uaren tiyáí ma furin má ume vá ma esantakhé tiferuna vará béin moékantá aví daní iyá tusu siantano.

⁵⁸ Máan tukhein nan mi séi ma moéké tinunu iyaruna mumunan tiyofi sífá tiváeyan noe, Tiyarafenui yorantá mantaan ákona uveya vá moékan dorarí ono. Mai fara vara seyo, siretí ankan ma Bafani yorarí iyaona mai ída fa savifá o afeyorantéi afová ukha rono.

Yerusalemí Ma Vain Monó Nanin Banta Ayain Moní Ma Átaruin Baya Ino

(*Romu 15:25-29; Karesia 2:10*)

16 ^dYerusalemí ma monó nanin banta aya ono van átaru uáden nan bain moní san mi siamenté uno. Mai ma siaméku Karesiá nanin banta ayaeonáí eya vá betin aya ono. ² Ena ena Santesí ma intiya siretiyan ma yoriyaona aa fáké ma moní dosiyaona vá daídeya susu siantan monisá ákonafin kaono. Téin nan me sintí moní átaru ono van muno sire ída vá tive iya vano. ³ Téi ma oronté maé mai ma Yerusalemí nanin banta aya ino van ma amusin baren orin kéká aní uresin baré in nain kayoi mo máan ná ono siré bompon uvaman amenté uno. ⁴ Inká téi ma inékun kama ukhan nain nan mi siretin má manápá oró tifanté uno.

Pori Ma Mónó Doran Kéká Ayaino Van Ina Ein Baya Ino

⁵ ^eMasedoniá barafá orono van iyaruna ma onobé maé inaimpáké tiretin e onanté uno. ⁶ ^fTéi ma inikheruna iyonin damú ma siretin má manáa o vákun iyonin ma kípavintí ma orono van éku mae sireti anon tivire mo sifa in nono. ⁷ Taréa ma sireti vaonafá ma oronté maé ída ainé tiretin me ampiré orono van mumpo Bafan mano ma kana ino sin nain nan mi siretin má manáa ayáká o vanté uno. ⁸ Máan tonté

^a15:51 Mat 24:31; 1Te 4:15-17 ^b15:53 2Ko 5:4 ^c15:56 Rom 7:13

^d16:1 Rom 15:25-26; 2Ko 8:1-9 ^e16:5 Apo 19:21 ^f16:6 Rom 15:24

umpo saréa Efesasí barurá bákun maen Pentíkosi yamú afoká uvintíi vetin me ampenté uno. ^{9g}Mai fara vara seyo, mará kákan doran baká dorano van iyákun kokhon nanin banta ano ineno van iyan mifo manáa kéká ano séin namuroí usintiyan mino.

^{10h}Timoti má sireti vaonafá orintiya vá téi ma erunaíen Bafani yorarí iyain banta ifo véin kama uresin ná bano. ¹¹ⁱÍda vá áesin manáa kéká ano véin oman aniana ino. Timusin iyáké béin má manáa mumunan kéká bá onano van iyá umpo véi ma avire me afa iyákeya ará kusin masá tiantan erino.

^{12j}Mumunan tifá tiváeyan mano ma siretin oman oniyain kéká bá teti sifá tiváe Aporosi ma san tiretin mo onano van ena ena sútúpiyákun mifo véi ída oriyan mino. Máan tiyain béi ma orono van inin nain damúí siretin o onanten mino.

¹³Tiretiyan dafían ákona ukheya vá puntákein mumunantá mantaan ákona ukheya ída feran daná bantiya vá ákona ukhe vano. ¹⁴Minó danasinta ma varanteya avábá in avúavá póké ana vá barano.

^{15k}Akaiá^{§§} barafá onen nan maen Stefanasin má bei kéká bá naren monó baya iniren mumunan iyáken betiyantá ena mumunan kéká ayain dorarí ein mi vakái mumunan tiyofi sifá tiváeyan noe,

siretin ákona é tiamiyá uno. ¹⁶Máan avúaváká teya ma ma aví teruna kéká bá inká pura sen ma monó dorarí iyain kayo vá kama e yafiseno van mi siamiyá uno. ¹⁷Tiretin má ída mará ere ompo Stefanasin má Fotunatusin má inká Akaikusin má ma sireti vaona fákena ma ayain danasinta varen erein nan mi kákan timusin iyákéi oné uno. ¹⁸Mai ma siretíi mumunan ákona uantiyá einíen mi senti mumunan me ákona usinten mino. Máan ma en kama yorarí iyain kékasá amusin uantano.

Pori Ma Sipá Amusin Baya Sein Mino

^{19l}Esiá barafá ma vain mumunan kéká bá Akuiran má Prisiran má inká mai ma monó dorarí inton ma vetí amápín átaru uven baya siyain kéká bá anon betí aú kákéi Bafan avíká tireti vaonafá amusin baya yákan oren mino. ²⁰Mará ma vain monó nanin banta ano sireti vaonafá monó amusin baya yan oren mifo vá tiretiyan monó avúavá posá betin avábá in maran ná ono.*

²¹Téi Pori anon teyantá timusin baya uvaman amé uno.

^{22m}Bafan ma ída avábá in nain nanin banta ano vá uman barano. Tetisi Bafan noe, ereno.

²³Bafan Yisasini sarisari ano siretin masá bano. ²⁴Yisas Karaisin avikasá tenti avábá ano sireti vaonafá orino.†

§§16:15 *Akaiá* bara maen Kiriki akhempái van mino.

*16:20 Kiriki vaya fintéi *Tiyarafenuará ma monó tiyain nanin banta ano ma kantasi ukhein amónan maran iyain* nan tikhen mino.

†16:24 *Ínaimpá ma uvarein bompompin ena vaya mo asotú ukhen mino. Mai vaya “Mai fura ino”* sikhen mino.

§16:9 Apo 19:8-10; 2Ko 2:12 ^h16:10 1Ko 4:17 ⁱ16:11 1Ti 4:12 ^j16:12 1Ko 3:6 ^k16:15 1Ko 1:16 ^l16:19 Apo 18:2, 18, 26 ^m16:22 Kar 1:8-9; Rev 22:20

**PORI MA KAN DÁDASÍEN
KORINÍ NANIN BANTA
UVAMAN AMEIN
BOMPON MINO**

(2 Korini)

**Kan Dádasí En Ma Korini Uvanteí
Pákena Afova Vaya Ino**

**Ma vompon ma
uvantein banta ino.**

Baya varen orin banta Pori ino.

Uvarein orana ino.

AD fifti-sevenifin mino. Esé bompon uvádan manáa viyon orivin mai oyampákéi ma vompon uvanten mino.

**Ma vompon ma
uvantein baru ino.**

Kiriki varafin bain baru Masedoniá ino. Taitasi ma Koriní me ampiren ma evaránen ovan mi uvaren mino.

**Ma vompon ma uvaman
amikhein kéká ino.**

Koriní barurá ma monó tiyan mumunan iyain nanin bantafin mino.

**Nái ana vará ma
vompon uvanten nafino.**

Koriní baru ráké kampun afova amin banta kayo ano Porini vaya varen orin doran má pura sikhein kama vaya ma sian dáko iyain ma san ma uman amiyain nan mino. Pori vei yoran má Yisasini kama vaya ma siamiyain ma san mi esé arái in ai (sapta) kayofin ákon-

aen tian amá ukhen mino. Yerusaremí ma monó tiyain nanin banta ma ayain moní ma karú darú in má inká Taitasi ma Koriníké ovaránen erin nain damu san ma sikheí páken nan sapta eiti vá naini vápin tikhen mino. Monó nanin banta vá ma ará manafiní in avúavákái Pori orikhen mino. Sapta teni (10) fin amen avaya ano manáa mo enará ukhen mino. Sapta teni (10) ráké tetini (13) fin ma orikhein mai manáa nanin banta ano ma ída ará baeran báken Porin uman amiyán ará namu uantiyan baya ino.

Porini Amusin Baya Ino

1 Yisas Karaisini kama vaya varen mo vanasi siamino van ma Tiyarafenu ano vei anunurá tivíká ein banta séi Porin má inká tetisi kama sífá tiváe Timotin má anon ma vompon uvaré uno.

Mai ma Koriní barurá baona monó nanin banta kayo vá inká Ákaiá barafin má ma mumunan kéká baonafái uvamádekun oren mino.

²Teti Sífóe Tiyarafenu vá inká Bafan Yisas Karaisini sarisari vá ará kusin má ano siretin má banten mino.

**Tiyarafenu Ano Ma Minó Nanin
Banta Ará Kusiantein Baya Ino**

³Tetisi Bafan Yisas Karaisin Afóe Ayarafenun avisá daní ó tifano. Mai véi anon tetin nan arunan uren kusin timé iyan mino. ⁴Teti ma umampin oré tifékun ma véi setin kama uren kusin timé iyainí esá ena nanin banta ma umampin orintí maé kamaé aya ékun ná kusin barano. ⁵Mai fara vara seyo, Yisasi ma vareiní ukhein uman ma seti variyaruna van mi Tiyarafenu ano Yisasin pinté uaren tetin moékan arunan é iyan mino. ⁶Máan tiyantí tetí ma uman baranuna anon tiretin ará kusiantantin Tiyarafenu ano siretin kanaíen aya uren

evaránen aviranten mino. Mai fara vara seyo, Tiyarafenu ano ma setin tirá kusisintan nain manon tiretin ará ákona uantanten mino. Máan ma urantiyan bempáké báke mai ma setí ankan bariyarunaí ukhein uman baran nono. ⁷Tetí ankan ma ákonaé iniyaruna mai ma setí variyarunaí ukhein uman ma siretí ankan má dere varesin maen Tiyarafenu ano siretin máí ará kusin aminten mino.

⁸PMumunan tiyofi sífá tiváeyan noe, Esiá barafin ma setin timaniná afoká ukhá ein uman afová ono van muno. Kákan uman uróí afoká uven tetisi ákona maman bararasí uraká tetí ankan puronté uno sé inikhá uno. ⁹Pura ino. Tetí ankan purimpin tisintákaren mifo mai yaná ma yáko ein nan ída setisi ákonará ino sé iné tifanté umpo fúká ein ma evaránen avían manté iyain mai Tiyarafenui ákonará ino sé uno. ¹⁰Q Tiyarafenu ano furin pintena setin tiya uren tivíkein béi ano anan ena ena setin tiya uriyan tiviranten ne sé iniyá ave ukheruna mai yaná afoká inten mino. ¹¹Tiretí ankan ma setin tiyae amúkeona vá inká kokhon nanin banta ano ma amúkein máí Tiyarafenu ano iniren mi setin tarisari uren tiya ukhein kokhon nanin banta ano setin too varen béin tusu siantanten mino.

Pori Ma Orono Sikhá Ein Nan Ma Sirun Noe Sein Baya Ino

¹²Máan tukhein nan mi setiyan timo siyá uno. Teti ma siretin má báké ma sretimpin má inká ena nanin bantafin má ma yoriyá eruna mai fura sen puntákein inin má avúavá bá ma Tiyarafenu ano simikheintái yoriyaré uno. Ena nanin banta vá tiretí ankampin má ma yoriyaré eruna mai ída setisi ákonará ifo Tiyarafenui sarisarirá ino.

¹³Tiretí ankan ma kasae yankáde afová oren bompon mi séi uvaman amiyaruna manáa yamú ma oriyantiyan teti ma siamiyaruna veya oman afova suron inono. ¹⁴rTaréa setinti veya ana manáan afová iyaona ináimpáké minó afova ureya Bafan Yisasi ma ovaránen erin nain damúí siretin ma amo siyarunaí eya setin timo sin nono.

¹⁵Mai fara vara seyo, siretí ankan nare o ódékuya kan dádasí e avu varano van mi sirá mantiyá inikhé uno. ¹⁶sTéi ma inikheruna mai Masedoniá barafá ma oronté tiretin e oné orikharé ma ovaráné erenté maé tiretin má e vákuya mai ráké aái usintesí Yudiá barafá oronté uno.

¹⁷Ma veya ma sian damuáderuna van tiretí ankan ten nan ineine uren ífá inten minó té iniya rafono. Ída ino. Mai ma vara ráke nanin banta ano ma veya sian damiyan ma varanté uno sen inká ída varanté uno sen uren ma mai yaná kasaen bariyainisá iya rafuno. Ída ino.

¹⁸Tiyarafenu ano minó bei veya ánain mi yakhafé iyain bantí pasé máan manan onté uno. Téi fura siré tiretin tiamiyá uno. Téi ma siyaruna veya kayo mai séi ma varanuna yana san mi fura sé tiyá uno. ¹⁹tMai fara vara seyo, Tiyarafenu Anin Yisas Karaisini veya fe-fái sen má Sairasin má inká Timotin má ano siamiyáké béimpin eyo sin manan ban mifo mai ma arakhéké iyan ída ino ma sin má eyo ma sin má béimpin ída vane séku inikha ono. ²⁰uMai fara vara seyo, Tiyarafenu ano ma iyáantan baya kokhon uron mi varé íkan Yisasi ano mai veya kayo me kanaí ukhen mino. Máan tukhein nan mi setí ankan mai véin pinté uaré pura ino siyáké maé Tiyarafenu aví daní é iyá tiféuno. ²¹Mai van mi Tiyarafenu ano setin má inká tiretí ankan má aní uren mi setin

^p1:8 Apo 19:23; 1Ko 15:32 ^q1:10 2Ti 4:18 ^r1:14 2Ko 5:12; Fir 2:16

^s1:16 1Ko 16:5-6 ^t1:19 Apo 18:5 ^u1:20 Rev 3:14

ákona simiká Yisasín má manafin báké mantaan ákona ukhé tiféuno. ^{22v}Máan tukhékun pasen kokhon daná ma setin timeno van ma kaúdákeín pintena Kantá Aunan pói araíen aní daná tetin túpin kain eravíkan tetin maman bei vanasíf ukhen mino.

Pori Ma Ída Ainen Evaránen Koriní Barufá Orein Baya Ino

²³Tiyarafenu ano séin afová ukháí furan tiyá uno. Tiretin uman amenaen tiré Koriní barufá ída ainé evarané oré uno.

^{24w}Tiretin amusin ameno van mi siretin má doriyá umpo ída siretíí mumunantá dafisintó uno. Para vara seyo, mumunampin pefái mantaan ákona ukha rono.

2^xMai van mi séi ovaré me iniré ída vá betin ena vá mo uman amékun aú arun barano sé iniréí ifá é uno. ²Mai fara vara seyo, séi ma siretin uman amirékun ma arunanápin basin maen mai ena intéa kékasá bain ná téin timusin timinten nafino. Ída ino. Tireti anan ba ono. ³Mai van mi fefá ma yékun orein bompompin máa sé uvantaré uno. Téi ma orékun maen mai ma séin moékantá amusin timiyain kéká ano ída vá tirun naná timino sikhare umpo séi ma inikheruna mai sempin ma vain timusin tiretí ankan má dere varano van muno. ^{4y}Tiretin nan kákan tirunaná bariyáké iff pintéi mai vompon uvaré uno. Tiretí ankan arunaná amen novara ma vompon uvare raumpo séi ma siretin nan moékantá tinunu iyaruna mai afová ono van muno.

Ena Nanin Bantai Ume Ma Ampiantan Baya Ino

⁵Mana vanta ano ma e manten tiretí ankan uman amintiya ma arunanápin basí mai uman téi ída varanté umpo monó nanin banta ma amikhein uman

mai manáa sesosikhái séi ída kanaí é kokhon baya senté uno. ⁶Máan turaya ma kokhon mano mai uman daíde ma mai vanta ameona uman mai kanaí ukhen mino. ⁷Máan tukhein nará mai vanta enadá ída uman ame vá beni ume ampiantádeya kama e ayaesin ná ída arunanápin báken amusin ná ino. ⁸Máan ture véin aní eya en nan para sinunu iyá uno vá tenovan mi éin duvuniyá uno. ⁹Éi intesá é tenti vaya iniré bákurinte fono van mi mai vompon uvaman amé uno. ¹⁰Éi ma mana vantai ume ampiantesí maé inte uman ná béi mantaren nafi mai séi yere veni ume ampiantanté uno. Tiretin naren tiré Yisas Karaisin avorá máan tonté uno. ^{11z}Máan tékun Ban Anon mano ída kanaíen tetin akhenóka intí eravé tinkamó tifano van muno. Para vara seyo, veni namu avúavá pefái seti afová ukhé tiféuno.

Auyen Kasen Ban Avúavái Yoran Banta Kékái Vaya Ino

^{12a}Troasí barurá ma Karaisini kama vaya seno van ma oriyá bá o onékun maen Bafan mano fefái senti aa uvíádan baren mino. ^{13b}Máan tukhan mifo mairá ma kusen ban nan ída sinunu ukharé uno. Mai fara vara seyo, se sifá tiváe Taitasin ída onté pasé betin nan me sirun noe siré béin nan dosintó Masédoniá oré uno.

¹⁴Máan tukhantí tetí ankan Tiyarafenu vará tusu sian tátifano. Mai fara vara seyo, Tiyarafenu anon Yisas Karaisin pinté uaren tetin tiyái minó danápin esanté iyá uno. Tiyarafenu anon tiyái Yisas Karaisin pákena afova vaya minó akhempá tiyákun kama uveri aunka ma orera einíi iyan mino. ¹⁵Mai fara vara seyo, inarufá orin aintá manta ma inká aron i van masípin orin

^v1:22 2Ko 5:5; Efe 1:13-14 ^w1:24 1Pi 5:3 ^x2:1 1Ko 4:21 ^y2:4 Apo 20:31

^z2:11 Ruk 22:31 ^a2:12 Apo 14:27; 1Ko 16:9 ^b2:13 Apo 20:1

aintá manta ma ukhein kayofin tetí ankan aunka uveri an mi yakhé tifékun Yisas Karaisi ano setin máden íkun uan Tiyarafenuun amiyan mino. ¹⁶cMai ma inarufá orin aintá ma mantakhein kayo ma aunan amin uveri ano ma kama aunka einí ukhé tifé umpo mai ma verai siyan ban barufin ma orin aintá ma mantakhein kayofin namu aunka ma iyain uveri an mi yakhé tiféuno. Iye anó mai avúavápin kanaí inten nafino. Ída ino. ¹⁷Máan tukhéi setí ankan ona ma mamáken miyaní ino van me khoe khoe en noin kayo an ída yakhé tiféuno. Moní barano siren ma monó ten noin kayo kokhon mi van mino. Tetí ankan Yisas Karaisi yafiká ben avorá pura sen puntákein avúavákái Tiyarafenui vaya sé nó tiféuno.

Aposeri Kéká Mai Auyen Kasen Ban Avúavái Yoran Banta Kayo Ino

3^dAraíerá téi kamaé puntáké doriyá unó terá evaráné te simo siya rafuno. Ída ino. Tetí ankan manáa kéká an derá teti siví daní ono van ena vanta kayo ano uvamádein bompon ná amiya rafu áa siretí ankan mano máan ukhein bompon uvamádesin tetin tiyaino vará iya rafuno. Ída uron mino. ²eTiretí ankan manan tetisi vompon bákeya súká uvanten nan minó nanin banta ano mai vompon mi yankáden afová é iyan mino. ³fTetí ankan ma yoriyaruna yoran manon aníen Karaisin pinté erikhein bompon mino siyan mino. Mai vompon maen ída vompon dankafó uvanten mifo fara van oriyan ban Tiyarafenui Kantá Aunan pói uvanten mino. Onámaná daro sa uvanten naifo vanasi aúkái uvanten mino. ⁴Yisas Karaisin pinté uaren mi Tiyarafenu ano setin tiyái mai yorarí iyái

ventá anan ákona inin kaúké tiféuno. ⁵Ída setisi ákonarái mai yoran doriyá tiféuno siré teti siví daní otifanté umpo Tiyarafenu finté anan mai ákona eré iyan mino. ⁶gMáan tukhan Tiyarafenu anon tivíadá auyen avúavápin ma kasen ban doran bantaí ukhé tiféuno. Peyante man baya ano ída kanaíen ayun ma fara van oriyan ban aunan timinten mifo mai ma auyen kasen ban avúavákái Kantá Aunan mano ayun ma fara van oriyan ban aunan timikhen mino.

Auyen Kasen Bani Kakhan Ákona Ino

⁷hMosesini Man Baya ma onámanáká uvantaré ein mai kama aa sákéi amikharen mifo mai ano furin manan dáko iyaren mino. Mai man baya ano Tiyarafenui kakhan mái eríkan Mosesin auná pinté panu uron tiyákan Isareri nanin banta ano ída kanaíen ben auná onen mifo mai kakhan mano ainen mo kípen mino. ⁸Máan tukhen mifo saréa ma Kantá Aunan mano yoriyain khakhan mano ídá moéken esantakhen nafino. ⁹iBanta ma aruan purin daná ano ma kakhan baren erikharé intin ma inká auyen avúavápin kasen ban mano ma setin nan puntákein nanin banta ino ma sikhein panu anon moékakhen mino. ¹⁰Máan tukhein nan mi auyen kakhan manon pura sen peyante kakhan esantakhen mino. ¹¹Para vara seyo, feyante avúavá ano ainen kípan kakhan mái erikharen mifo auyen avúavá anon moékan kakhan má para van oriyan banten mino.

¹²Máan tukhein nan mi setisi ákona inin mairá kaúdákéi ída feran kasaé baya siyá uno. ¹³jMáan tukhantí tetí ankan ída Mosesin an dé mai ma ve aunápin panu siyan ma Isareri kayo ano onan

^c2:16 Ruk 2:34; 2Ko 3:5-6 ^d3:1 Apo 18:27; 2Ko 5:12 ^e3:2 1Ko 9:2

^f3:3 Eks 24:12; Yer 31:33; Isi 36:26-27 ^g3:6 Yer 31:31; Yon 6:63; 1Ko 11:25

^h3:7 Eks 34:29 ⁱ3:9 Diu 27:26; Rom 1:17 ^j3:13 Eks 34:33

nae siaren ma yavaráe fóké iyareiní ó tifanté uno. ¹⁴Máan tukhan taréa yere feyante Man Baya yankafiyán mifo mai ma fefá iyákaré ein davaráe ano vetí ankani inintá para iyákan ída kanafen beni ana afová iyan mino. Yisas Karaisintá ma mumunan intin manan mai ma iyákein davaráe yo varanten mino. ¹⁵Máan tukhan taréa yere Mosesini Man Baya ma yankafiyán maen mai ma iyákaré ein davaráe ano vetí inintá para iyákan pasen beni ana ída kanafen afová iyan mino.

¹⁶^kMáan té iyan mifo Bafantá ma ará baéden mumunan inain kékái ineinerá ma iyákaré inain davaráe Tiyarafenu ano yo varanten mino. ¹⁷^lMáan tinten mifo Bafan maen Aunan mi váken pasen interesá Beni Aunan ban nafi mairái kusin amé iyan mino. ¹⁸Máan tiyain nan mi mai yavaráe ano ída setin tunáká iyákein Bafani kakhan mano setimpin eriaren kamu finté ma mo fanu seinén ena nanin banta fanu siantanten mino. Bafani Aunan mano setimpin bempáké erirú iyan tetin maman béin an darantin beni kakhan mano setimpin bíkaaren ena nanin banta mo fanu siantanten mino.

Bara Khavefin Ma Kama Yanasinta Vain Baya Ino

4 Máan tukhein nan mi Tiyarafenu ano vei arunaná pinté uaren ma yoran timikhái ída sivesara iyá tiféuno. ²^mMáan tukháí setí ankan betin ayave amin avúavá ída variyá inká ída auráké iyá tiféuno. Tetí ankan ída ena nanin banta máká maáká iyáké inká Tiyarafenui vava ída ovaéde tiyá tiféuno. Tetí ankan Tiyarafenu avorá puntákein baya anan tiyá tifékun mi kama ineine

ma vain kéká anon pura sen afová iyan mino.

³Máan tukhen mifo seti ma kama vava siyaruna ano inte kayo avorasá davaráe ano ma iyareiní iyan nafi mai o afeyoran nain kékái váká tetí afová ukhé tiféuno. ⁴^mMa vara ráke Ban Anon mano vetí ankani inintá dasirádan pasen Kama Vayai ákona kakhan ída oniyán mino. Yisas Karaisi ma Tiyarafenui aman manon báká ma veni ákona kakhan nan ma siyaruna van ída iniyan mino. ⁵Mai fara vara seyo, setisi sivútivá pákena va siamé nó tife raumpo Yisas Karaisi ma setisi Bafan bain mai véin páken nan tiamiyá tiféuno. Inká béi ma setin tiya ukhein nan mi siretin ayain kékái vá tiféuno. ⁶^oMai fara vara seyo, fefá ma ma varafin títpa ukháin ma kakhan afoká ino síkan ma afoká ein Tiyarafenu anon tetin túpin kakhasintái nó tiféuno. Mai khakhan manon tetinti inin amá usintái Yisas Karaisin pinté uaré Tiyarafenui ákona kakhan oniyá tiféuno.

⁷^pMáan tukhen mifo mai ma ainen duvé iyain bara khave kayo an mi setí ankan dakhé tifékun mi Tiyarafenui kakhan mano ma setimpin bain manon kama yanasinta ma vara khave kayofin bainí ukhen mino. Máan tukhan mi setin pinté uaren aní ino van mi Tiyarafenu finté mai kakhan ákona ano erikhen mifo ída setin pinté erikhen mino. ⁸^qMáan tukhan minó akhen pákéi ara ara uman mano setin timaniná afoká iyan mifo mai ano setin ída maman bararasí iyan mino. Máan tiyan mai ano setinti inin máden asuse iyan mifo ída ífá iyá tiféuno. ⁹Namuro kayo ano setin timaniná ara ara uman kaé é iyan mifo Tiyarafenu ano ída setin oyan timé iyan mino. Tetin tiruren namu urá maé

^k3:16 Eks 34:34 ^l3:17 Yon 8:36; Rom 8:2 ^m4:2 2Ko 2:17; 1Te 2:5

ⁿ4:4 Efe 2:2; Kor 1:15; Ibu 1:3 ^o4:6 Esé 1:3; Ais 9:2; 2Ko 3:18

^p4:7 2Ko 5:1 ^q4:8 2Ko 1:8; 7:5

e mantaaré para yoré oriyá tíféuno. ¹⁰rYisas Karaisi ma vareiní ukhein aí bá uman má ma variyá tiferuna anon béi ma evaránen e mantakhein ákona aníin oniyán mino. ¹¹sMai fara vara seyo, seti ma ayun para vá tiferuna nanin banta ano ma Yisasín ánain bákuriyaruna van mi furin uman tetin timaniná kaiyan mino. Máan ma inain manoi setinti yan bukhafa fintena Yisasini avúavá onanten mino. ¹²Máan tukhein nan mi seti ma furin uman bariyá tiferuna anoi siretimpin ayun ma fara van aunan afoká uantiyan mino.

¹³Máan tiyan mai van mi Í Bom-poppin pefá máa sikharen mino. “Tiyarafenu rái mumunan iyáké tiyá uno.” *Íbo 116:10*

Máan ma sikhá einí é tetí ankan deren mai manái mumunan mái vá mai vaya kasaé tiyá uno. ¹⁴tMai fara vara seyo, Yisasi ma fukaréin avían mantein Tiyarafenu anon béin má tetin tivían mantarantíi siretí ankan má manafin ben avorá o mantanté afová ukhé tíféuno. ¹⁵Mai yanasinta ma setin turá afoká iyain mai siretí ankan aya ino van mino. Tiyarafenui sarisari ano kokhon nanin banta avíádantin Karaisi vaípa eriven béin aví moékantá daní intin khakhan ákona ano véimpin bíkaaren avan inten mino.

Ákona Yorarí In Baya Ino

¹⁶uMai van mi setí ankan ída ífá onté tíféuno. Setinti yan bukhafa finte ákona kípé iyan mifo minó damú Kantá Aunan manon túpin evaránen auyen ákona simé iyan mino. ¹⁷vMai fara vara seyo, saréa seso sikhein uman mi variyá tife umpo ínaimpáké para van oriyan ban kakhan mi siminten mino. ¹⁸wMáan tin-

téii saréa ma uman bariyá tiferuna van ída iniyá uno. Para vara seyo, seti ma oniyá tiferuna mai ída ayáká ban uman mifo mai ma fara van oriyan ban danasinta ma ída onté tiferuna ano ma simusin timin nain nan mi saréa inikhé tíféuno.

Tiyarafenu Ano Ma Fara Van Oriyan Ban Bukhafa Simin Nain Baya Ino

5^xMai fara vara seyo, ma varará ma yavaráe namun uvantáin ma varákiyain an mi setin tu ano yakhá afová ukhé tiferuna furé maé ma vararái ma vukhafa me ampé tifanté uno. Máan tuvintin maen para van oriyan ban bukhafa ma Tiyarafenu ano veyantá uvantein timídaníi inarufá o vá tifanté uno. ²yMáan tukhein nan mi inaruráke vukhafafó auí daná ma usinteiní ino van mi ma vara ráke vukhafafó berai siyá tíféuno. ³Mai fara vara seyo, inaru ráke vukhafa ma usintádantí maé ída sivápa vátifékun onanten mino. ⁴Para vara seyo ma vara ráke vukhafafin ma váké berai siyá umpo ma vukhafa ída vantí bano vara siya rauno. Ída ino. Inaru ráke auyen bukhafa mamarékun mai ano ona an davintin mai vukhafa ano ída furinton para vano van mi siyá uno. ⁵Tiyarafenu ano mai anarái setin uváden mi mai ma kama yanasinta ma iyátintákein ma ínaimpáké timin nain mi anfen Kantá Aunan timikhen mino. ⁶zMai vukhafafin ma vá tiferuna anon Bafani varufin ben má ída vátifé umpo mai ma iyátintákein danasinta anon ena ena setin tirá ákona usintiyá mai seti afová ukhé tíféuno. ⁷Máan tiyain nan mi setí ankan mumunantái vátifé umpo suufó ma onan tasa ino. Ída ino. ⁸aMáan tukhá ma vukhafa me ampiré Bafani varufin ben má o vá tifano van moéké tinunu ukhéi mai van

^r4:10 1Ko 15:31 ^s4:11 Rom 8:36 ^t4:14 1Ko 6:14 ^u4:16 Efe 3:16

^v4:17 Rom 8:17-18 ^w4:18 Kor 1:16 ^x5:1 2Ko 4:7 ^y5:2 Rom 8:23

^z5:6 Ibu 11:13-16 ^a5:8 Fir 1:23

ákonaé iniyá tiféuno. ^{9b}Mai van mi ma vukhafafin má inká ena vukafafin má ma vanté maé mai véin ma amusin amin inin onan masá bá tifano. ¹⁰Mai fara vara seyo, minó anon Yisasini yaimin karáká oré tifékun maen teti ma mai vukhafa vá báké ma kama yana safi namu yana safi ma variyá ótífanuna avúavákái miyan tímídu inten mino.

Tetí Ankan Tiyarafenui Ará Manafiní In Baya Ma Vanasi Siamin Baya Ino

¹¹Máan tukhein nan mi setí ankan Tiyarafenu van pédé ben aránaópá bákéi véintá mumunan ino van banasi ákonaé tiamiyá uno. Mai yorarí ma iyaruna mai Tiyarafenu ano fefá afová ukháí mai siretin má dere afová ono van mi ákonaé iniyá uno. ¹²Máa senuna van tetin nan puntákein banta kéká ino sireya simo seno vara ma vompon uvaman amiya rauno. Ída ino. Tetisi sivútiva san amusin ureya mai ma yan bukhafará ana oniyá ma súkáké Tiyarafenui funtákein avúavá ma variyaruna kéka san ma soyampá baya siyain kayorá daffan ákona ono van mi siyamiyá uno. ¹³Onesí ma óen áen ma iyáku mae mai Tiyarafenu ano kákan bí barano van mumpo inká onesí ma funtákein inin ma variyáku mae mai siretin nan mi iniré máan tiyá uno. ¹⁴Mai fara vara seyo, Karaisini avábá anon tetin tirá mantarái siretin nan inire mumunan ono van mi siyamiyá uno. Mai ma Yisasi ma minó nanin bantai ume van púkein nan mi setí ankan dere fúaré e mantakhé uno sé mumunan iyá tiféuno. ^{15c}Minó nanin banta van mi véi fúken mifo aun ma vantin ban nain kayo ano veyan nan ída vá inin naifo mai ma vetin nan e fúaren ma e mantakhein banta van mana vá inino.

¹⁶Máan tukhein nan mi ma vara ráké avúavápó banasii avúavá taréa ída yaimiyá tiféuno. Pura ino. Pefá maé barará avúavápó Karaisini avúavá daimiyá tifé umpo saréa ída ino. ^{17d}Máan tukhein nan mi mana ano ma Yiasin má o súpá inten maen béi auyeníi inten mino. Beni feyante avúavá ano e kípavintin auyen avúavá báí vanten mino. ^{18e}Karaisi ma varein avúavá kái Tiyarafenu ano setin evaránen tivíden mi auyen avúava sinta simiren inká ena nanin banta ma o avían dantin ma véin má ará manafiní in doran tetin timikhen mino. ^{19f}Mai fara vara seyo, Tiyarafenu ano Karaisimpin báken mi minó nanin banta vá ma manafin kusen ban aa uví dáken pasen taréa ída vanasii ume yankáden uman amiyan mino. Máan tukhein nan mi vanasi ma o avían béin amin doran mi setin timikhen mino. ²⁰Tetí ankan Karaisini oo vanta kékái vákun Tiyarafenu ano setin pintéi uaren tiretin baya siamiyan mino. Tiyarafenu vá manafin kuse vano van mi Karaisin oo varé tiretin tútúpé ariyá uno. ^{21g}Karaisi maen ída ume van banta ífo setin tiya ino siren mi Tiyarafenu ano setinti namu avúavá maman Karaisin amaniná kaúdan mi íkun uan Tiyarafenu amikhein pasé béin pinté uaréi Tiyarafenui funtákein nanin bantái ó tifanté uno.

6 Tetí ankan Tiyarafenu vá manafin doriyákéi véi ma sarisari ukhein nan béin pákaan ákona ono van mi ínané tiamiyá uno. ²Para vara seyo, véi máa sikhén mino.

“Teyantá ma siretin avidé kama onuna yamú ma aní ukharé eruna yamú afoká íká tiretíi ífí iniré aya é uno.” *Ais 49:8*

^b5:9 Kor 1:10; 1Te 4:1 ^c5:15 Rom 14:7-8 ^d5:17 Rom 8:1; Kar 6:15

^e5:18 Rom 5:10 ^f5:19 Rom 3:23-25 ^g5:21 Ibu 4:15

Tiyarafenu ano ma siretin aya uren ma evaránen aviriyain damúí saréa vaono.

**Pori Ma Uman Kayo
Yosiá Ein Bayo Ino**

³Banasi ano setisi yoran nan namu yorarién mino sin nain nan pasé mana nanin bantai inarufá orin aasá ída mana yaná maman iyariyá uno. ⁴Tetí ankan Tiyarafenui yoran banta kékái váké pasé kama avúavá anan ena nanin banta aní é iyá uno. Máan tiyáké maé tetin timaniná ma aau fi uman nafi ma afoká iyá maé mantaan mi ákona ukhé bá tiféuno. ⁵^hBanasí ano siruren kar-avusifin pákaan kaiyan inká namuro kayo ano sisiren tinkayan tiyá maé tetí ankan kákan uman uron bariyá maé ída kamaé tuun bariyá inká tirafan báé iyá uno. ⁶ⁱKantá Aunani ákona fókéi sirá kusin avúavá bá ena avábá in má inká kama ineine uren ma funtákein avúavá baran máí fákaráké doriyá uno. ⁷Tiyarafenui ákona ano setimpin bakái fura sikhein baya anan tiamiyá uno. Puntákein avúavá pói setisi siruvin danasí é inká tankoí é ukhé tiféuno. ⁸Manáa nanin banta ano sinkayan máden toy-ampá baya siren kampun dorarí iyan mino siyan maen inká manáa ano setin timo siren kama yorarí iyan ne siren tetin tiví daní iyan mifo setí ankan Tiyarafenui yoran para yoré oriyá banté uno. ⁹^jBanasi ano ma ída afová ukhein banta an dakhé tifé umpo minó anon tetin afová ukhen mino. Purin mano setin pákiyan mifo ída furiyá tiféuno. Inká tetin tinkáden purin tirirí iyan mifo ída furiyá tiféuno. ¹⁰Tetisi sirun nanápin bá umpo ena ena yamú Tiyarafenu ano simusin manan timé iyan mino. Minó daná ída vá bá umpo ena

nanin banta ayaékun inaru fáke kama yanasinta variyan mino. Inká ída mana yaná dékun ban mifo minó danái kanaí ukhé tiféuno.

¹¹Koriní ma vaona nanin banta oe, fura vayan tiretin tiamiyá pasé túkákéi siretin tirá amé tiféuno. ¹²Tiretin nan moéké tinunu iyái siretin ída sirá namu uantiyá umpo mai setin ará namu usintiya náí sirá ída manafiní ukhé tiféuno. ¹³^kTiretin ma sirá amerunaí eya vá tetin ará timeno van mi ve afóe ano ma ve akhafana siameiní éi siretin tiamiyá uno.

**Ída Ma Mumunan Iyain Nanin Banta
Vá Ma Ída Manafin Doran Baya Ino**

¹⁴^lÍda ma monó tiyain kéká bá ída vá o súpá uveya yorarí ono. Mai fara vara seyo, funtákein avúavá bá namu avúavá bá ano ída manafin dorarí inten mino. Inká kakhan má títípa vá ano ída manafin túpá inten mino. ¹⁵Yisasin má Ban Anon má ano ída ará manafiní ukhein pasinti monó ma siyaona nanin banta ano ída kanaíeya ída ma monó tiyain nanin banta vá o súpá uveya yoran nono. ¹⁶^mAyarafenui monó namun má kampun ayarafenui monó namun má kasaesá maman túpá ótifante rafuno. Ída ino. Mai fara vara seyo, aun ma fara van oriyan ban Tiyarafenui monó namun mi setí ankan báken pasen béi máa sikhen mino.

“Téi ano vetin má báké

betin aúbaná nó maé

Betíi Ayarafenu váken inká

tenti vanasin banten mino.” *Riv 26:12*

¹⁷ⁿ“Máan tukhein nan mi Bafan mano siyáken

mai kéká me ampire nentá oriveya

vetíi fain danasinta ída aruvesirá

tiretin avirano sen mantino.” *Ais 52:11*

¹⁸“Minó ákona ma vain Bafan mano máan mi sen mantino.

Tiretin Afóení éku mae inká ten tikhafanaíi inono.” *2Sa 7:14*

7 Téi ma sinunu ukheruna sírona kéka soe, Tiyarafenu ano ma amenté uno siren ma iyáantan baré ein danasinta inka varé tifé umpo erisá dante vukhafa vá tú iyampon má ma fainíin avúavá do sesé uan karúdaré avusesese uve sá ben nan mana feriyáké kantasí ukhein avuavá ana vá bará tifano.

**Korini Nanin Banta Ano Ma
Ará Baerein Nan Ma Pori
Amusin Ein Baya Ino**

²Tetí ankan ída mana vanta namu uanté, aré asé inká ena vanta kampun tiré namu yanápin avían kaúké tifé umpo ara sá timeno. ³Ma ma siyaruna mai siretin au finí in baya va siya rauno. Ída ino. Pefái siretin tiamiyái setí purasé túkákéi siretin nan tinunu iyá uno séku inikha ono. Mai van mi furonte rafu áa fá bante rafu mai avúavá anan bariyá banten mino. ⁴Ara ara uman ma setin timaniná erí ma siretin nan ovaré me inékun maen mai anon tirá kusin timé iyan mino. Máan tiyain nan mi siretí ankan nan kákan timusin uantiyákéi ma vaya siamiyá uno.

⁵PMai fara vara seyo, Masedoniá barafá ma onóbékun maen ara ara vayafó tetin uman timíkan mai anon tikhokho fan tufá tivesaraen mino. ⁶Máan tiyákun mifo mai ma uman baren ará namuin ma ará kusin amé iyain Ayarafenu ano ma Taitasin tiantan orein manon tirá kusin mo simen mino. ⁷Taitasini erin mano ana va sirá kusin timen naino. Tiretí ma véin má dere ará kusin amireya inká ten timaniná ma afoká ukhein dana san ma arunan us-

intáde ma siretíi avábá ma aní eona van ma véi me sisimein nan mi kákan timusin é uno.

⁸QTenti vompon mano siretí ankan ará namu uantáken mifo mai van ída sirá amé uno. Mai fara vara seyo, fefá tirun noe siyá umpo saréa afová é ma vompon mano manáarái siretin ará namu uanten mino sé iniyá uno. ⁹Mai vompon ma uvaman amirékun ma ará namu eona rasa saréa simusin iya raumpo Tiyarafenu anon mai ará uman maman dákó en mino. Mai anon tiretíi ineine maman amá urayan ará baere ompo setinti vaya ano ída uman amen mino. ¹⁰RTiyarafenu anon ará uman maman dákó uran mi mai ano setisi inin maman amá uren tiya íkái sirá baédékun evaránen tiviré iyan mino. Máan té iyan mifo mai ma ída aúkáké tirunoe sin aú baerará ma ein nanin banta anon purin maman dákó é iyan mino. ¹¹Tiyarafenu ano ma mai arunaná maman dákó ein manon kama avúava sinta maman tiretin aúbaná dákóen mino. Mai avúava sinta maen ákona inin má doreya inká tiretiyan maman aní eya ída ume vane seya inká tiretí ankan ume van aranan iyáke akhokho van eya inká téin tonano van eya inká kama e yafíbe yoreya inká ena ma funtáde yaimin avúavá ma vareona ino. Mai avúavá ma eona anon aní eya siretimpin ída mana aau van minon te ono. ¹²Aau vanta fi áa aauí uantan banta fi funtarano vara séi mai vompon uvare rauno. Ída ino. Tiretíi avúavá e unen dákó édavintiya Tiyarafenu avorá teti nan purase anunu ono van mi mai vompon uvaman amé uno. ¹³Tiretin ma setin nan anunu iyaona avúavá anon tetin tirá ákona usinté iyan mino.

Inká mai ma Taitasini ará uman ma maman kusiantádeya ma véin amusin ameona avúavá bá ano yeren tetin kákan timusin timen mino. ¹⁴Tiretí kama avúava san amo sé pefái Taitasin tiamikharé ékuyan mai ma séi siamikáeruna avúavasí uren náí séi ída siyave van é uno. Mai fara vara seyo, Taitasi ano yeren tenti vava van puran tikha ono sen mino. ¹⁵Taitasi ma sireti vaonafá oríka ma avinantan má béin e avire mo kauráke ma ven oo yayiyá eona van béi moékantái arunan uantiyan mino. ¹⁶Máan tiyain nan mi siretí ankan nan moéke kama avúavasí inono se mumunan iyáké timusin uantiyá uno.

Tiretí Ankan Aúkákésá Avarí Ono

8 ^sMumunan tiyofi sífá tiváeyan noe, Tiyarafenu ano ma Masédoniáke monó kéká ma sarisari uren aya ukhá ein onano van muno. ²Betí ankan amaniná kákan uman uron afoká íkan minó dana san o afasí iyáken mifo mai van betí ankan ída inina mai ma ona ída van ma o afasí iyain kéká ameno siren amusin má kokhon moní átaru en mino. ³Mai ma átaru ein moní betí anunu finte náí máa yákaren nafi mai máa me khaúdú en mifo mai esantaren moéken karúden mino. ⁴Máan tiyáken inká setin nan áesí Yerusaremí ma vain mumunan kéká bá dere aya ono siren ákonaen tútúpiyaren mino. ⁵Máan tiyaren mifo esé daná betiyan Bafan amiren inká betí ará tetin timiren mi mai ma Bafan mano vetin amein inin ánain bákuren tétin timiyan mino. Betí ankan ída kanaíen baranten mino siré inikháeruna avúavá esantaren moékan avúavái variyan mino. ⁶Pefá Taitasi ano ena nanin banta ma ayae kama yaná amin dorarí ono van tiretin

ará ákona uantaya yókareya afová ukhe náí véi evaránen o váké dóan kípáno van mi ákonaé tiyá uno. ⁷^tTiretí ankan ara ara yoran ma variyaonafin kama iya ono. Tiretí ankan Tiyarafenu ará mumunan iyákeya ída feran kasae mai ma mumunan iyaona avúavá tian amá iya ono. Inká tiretí ankampin kokhon afova vakaya Tiyarafenui yorarí ono van moéke anunu iyákeya setin nan iniya ono. Máan mana e vá ena ma amin avúavápin ná tiretí ankan moékantasá dorano.

⁸Téin too yayie mai yorari ono vara yuvuniya rauno. Ída ino. Ena nanin banta ano ma mai yorarí ono siráken ma iniyain nan mi siretí ankan ma ena avábá uantan avúavá purase aní ono van muno. ⁹^uMai fara vara seyo, siretí ankan pefái setisi Bafan Yisas Karaisini sarisari in avúavá onta ono. Béi ma inarufá báken maen minó danái yan baren mifo siretin naron tiren ona ída van banta an den mino. Mai ma inarufá bain danasinta varano van mi máan ten mino.

¹⁰Tiretí ankan ma moní átaruin dorarí ukhá eona fákena sesi inin máan mi ukhen mino. Maman ma esantein oranafin tiretí ankan mai yoran ará urákeya mai yorarí ono van anunu iya ono. ¹¹Máan tiya ompo mai yoran ná e yore mo kípáno. Pefá tiretin ará ano mai yorarí ono siren mantakhen mifo sireti ma yákanona avúaváká tiya vá ameno. ¹²^vPara vara seyo, Tiyarafenu ano inte yanasá tiretí ankan dákefo mai aukáké ma amin nan mi amusin ukhen mifo ída ma vain dana san ída inikhen mino.

¹³Tiretí ankan mana mai uman baresin ena nanin banta ano avábaká bano vara ma vava siya rauno. Ída ino. Minó ano manaí ukhein uman barano van mi siyá uno. ¹⁴Taréa siretí

^s8:1 Rom 15:26; 2Ko 9:1-2 ^t8:7 1Ko 16:1-2 ^u8:9 Mat 8:20; Fir 2:6-7
^v8:12 Mak 12:43-44

ankan kokhon daná kaen nan báí kasa eya vetin aya ukhá esin ná inká anona sireti ma o afasí inona yamú anona aya ino. Máan ma inte mae minó ano manái ukhe van nono. ¹⁵Mai van ma Tiyarafenui vompon dókifin máa sikhhen mino.

“Kokhon dunan ma átaru uan kaé iyain kéká ano ída esantaren kai é iyan mino. Inká manáa yunan ma átaru é iyain kéká ano ída o afasí é iyan mino.” *Eks 16:18*

Taitasin Ma Siantan Koriní Orein Baya Ino

¹⁶Téi ma siretin nan iniyarunái en ma Tiyarafenu ano Taitasin inin iniyain nan mi Tiyarafenuun tusu sian tiyá uno.

¹⁷Tiretí ankan baonafá orino siré tetí tiantékun eyo sikharen mifo véi yere orivé mai yorará ono siren moékantá anunu iyaren pasen mi vei anunu finté tiretí baonafá orinten mino. ¹⁸Tetí ankan ena sifá tiváen má deren Taitasin má tiantékun orinten mino. Tiyarafenui kama vaya ma véi siamiyain nan mi monó nanin banta ano véin amo sé iyan mino. ¹⁹Mai avúavá máa rasa ino. Monó kéká ano ven ma sá moní ma átaru uádan baren Yerusamí orino sikhhen mino. Tetí ankan mai yorará Tiyarafenu aví moékantá daní iyáké inká tetí ankan mai yorará ono van inikhé uno vá té banasi aní ono. ²⁰Mai ma átaru uran moní baré Yerusaremí oronunafin ída mo asuse urékun mana ano namu ineine ino van mi mai sifátiváen má aviré uno. ²¹Para vara seyo, setí ankan puntákein avúavasí ó tifanté umpo ída vá Tiyarafenuun avorá ana kama avúavasi ono van iyáké banasi avorá basá máan ó tifano.

²²Máan tukhá ena sifátiváen má békanantái muntaré tiantékun oren mino. Kokhon damú ara ara yorampin

béin akhen ókha ékun ákona yorará oné uno. Béi fura sen tiretin nan kama avúavasí anan inono sen afová ukhen pasen béi mai yorará ono siren kákantá anunu ukharen mino. ²³Máan tukhen mifo manáa ano ma Taitasin nan ma ina intiya mae siamiyákeya senti mana yoran bantan báken tiretin ayaé iyan mino vá teno. Ena sifá tiváe kan maen ena akhen pákena vantá kan mi o varen monó dorará iyáken Karaisin kákan bí amiyain mino vá te siameno. ²⁴^wMáan tukhein nará tiretimpin ma kama avúavá bain ná míkan banta rasá aní ono. Máan tesin ná tiretimpin ma ará amin avúavá bain minó nanin banta ano afová uren ná pura ino sen onano.

Yerusaremí Ma Vain Monó Nanin Banta Ano Ma Moní Átaru Ein Baya Ino

9^xTéi ída kanaíé Tiyarafenui vanasi ma aya iyaona fákena van tenté uno. ²Mai fara vara seyo, siretí ankan ma amusin má ma ena nanin banta aya iyaona avúavá téi afova ukhé pasé Masédoniá kayo avorá tiretin amo sé iyá uno. Tiretí Akaiá barafin ma vaona kayo van pe o útúben maman oranafin mi mai yorará ono siren útakhen mino sé tiamé uno. Tiretí ankan ma ará bá ena amin avúavasí eona ano vetí ankan ará man- ten nan pasen betí deren mai yorará ono van en mino. ³Máan tiyan mifo siretí ankan amo sin baya ma siyá eruna van banasi ano iniren ída aniana ino van muno. Mai ma siameruna yanasinta útakhe fono van mi maí kanan banta ano onano van tiantékun oren mino. ⁴Mai fara vara seyo, Masédoniáké ma manáa kéká ano sen má oriyaren o onanti ma ída útakharé esí maé mai setí ankan tiyave van éku mae siretí moéke ayave van inono. ⁵Mai van mi iniré pe o útúbé

tifá tiváeyan tiantékun oren mo aya inti mai ma monó kéká amusin ameno van ma iyáanten nan baré ein danasinta útan kaono van muno. Téi ará bá ma amin amusin nan mi inikhé umpo enai yuvuntá ma amin amusin nan ída siyá uno.

Danayun Pafasintá Ma Sian Baeran Baya Ino

^{6y}Tiretí ankan afovasá ono. Tanáa yanayun ma fafa sikhareya sanáa yunan mi yuyasin nompo kokhon danayun ma fafa sikhareya kokhon dunan mi yuyasin nono. ⁷Máan tukhantiya mana mana vanta ma ona ameno van inteya ovare me inídeya vá ameno. Ída vá enai yuvuntá ameno. Mai fara vara seyo, ará bá ma amin nanin banta van mi Tiyarafenu ano anunu é iyan mino. ⁸Máan ma esin Tiyarafenu ano éi ma iniyaona yanasinta víkaantádantiya fase onesin kokhon danasinta vanti kasae ena nanin banta avarí inono. ⁹Mai van Tiyarafenui vompon dóki ano máa sikhen mino.

“Bé ve ina yanasintafó ona ída vain nanin bantafin amusin dan orera en mino.

Beni funtákein avúavúa ano fara van oriyán banten mino.” *Íbo 112:9*

^{10z}Máan tukhan Tiyarafenu anon danayun amiren inká béi anan ara ara yunan amé iyan mino. Máan manan en minó danasinta amintiya maifó ena nanin banta aya iyasín pasen mana vanta ano ma kokhon danayun pafa siráken ma kokhon dunan duyasiyainí eya funtákein avúavá kayo varan nono. ^{11a}Máan tesin Tiyarafenu ano kokhon danasinta amintiya mae maifó máan mana eya ena nanin banta aya inono. Máan tukhantiya mai yanasinta mamare mae ona van ma o afasí iyain kéká amesín mi vetí ankan mai

avúava san moékantá Tiyarafenu tusu siantanten mino.

¹²Máan tinten mifo siretí ankan ma varanona yoran manon Tiyarafenui kéká ayaintin maen ída mana yana san o afasí iyáken Tiyarafenu moékantá tusu siantanten mino. ¹³Máan te ma ena amin avúavá anoi Tiyarafenu aví daní inono. Para vara seyo, éini moéken amin avúavá anon mi aníen Yisas Karaisini Kama Vaya yakhafiya ne sinten mino. ¹⁴Máan tesin maen mai nanin banta ano Tiyarafenui sarisari ma vetí ankampin bíkakhein nan tiretin moéken anunu uren Tiyarafenu ano siretin kama ino van amúkuantanten mino. ¹⁵Máan tukhantí Tiyarafenu ma moékan kama ukhein amusin daná ma simikhein nará tusu sé tifano.

Pori Ma Monó Dorarí Iyáken Mai Yoran Ma Ákona Ein Baya Ino

10^bTiretí banasi ano séi nan tiyáke Pori ma setin má báken maen periyán baren ma enafá o van mi ákona vayafó bompon uvaman timiya ne siya ompo Karaisi ma einí éi seyan bararasí uré bempáké bákéi siretin tiamiyá uno.

^{2c}Te ma iniyaruna ída mai ano kanafí inten mifo intéa kéká sará bara ráke avúavá bariyan ne siyan nafí mai kékápin ída ákona é baya seno van muno. ³Pura ino. Tetí ankan ma varará bá umpo ma vara ráke nanin banta ano ma siruveini sa iyá tife rauno. Ída ino. ^{4d}Ída ma vara ráke aruvin danasinta ifo inaru fáke Tiyarafenui ákona aruvin danasinta fóí Ban Anoni ákona yafu ankaman mádariyá tiféuno. ⁵Mai aruvin danasinta fóí Tiyarafenui kama avúavá ma vanasi ano afová ono sein ma iyákaré ein aruan mádariyá tiféuno. Inká mai aruvin danasintafó anan betíi átakharéin

^y9:6 Pro 11:24-25

^z9:10 Ais 55:10

^a9:11 2Ko 1:11; 4:15

^b10:1 1Ko 2:3

^c10:2 1Ko 4:21

^d10:4 Efe 6:13-17

ineine ma vá ein do maman karúdaréi Karaisin oo yayino van afova amiyá tiféuno. ⁶Máan tukhantin intéa kéká anó iniren dakhafiyantin ná inká intéa kéká anó mai ánain ída yakhafinten nafi mai kékái uman amenté uno.

⁷Tiretí ankan afoká ma vain danas-intarái ineine kaiya ono. Mana ano ma Yisas Karaisini vantán bá uno ma sinten ná mai setin má deren Yisas Karaisini vantán bá tifé umpo véi ovaren ná me inino. ⁸ePara vara seyo, siretíi mumunan ákona uantano van mi Bafan mano mai yoran timikhaní pasé ída siretíi mumunan mádé asuse onté uno. Máan tukhanti mai yorantá ma seti sivi daní onté ída siyave van ó tifanté uno. ⁹Máan tukhantíi sesi vompon póké tiretin ída akhokho amiran muno. ¹⁰Para vara seyo, manáa ano siyáken Porini vompon mano setin ákonará duvun iyan mifo seti varunará mai vempáké tiyan mino. Máan tukhan maen beni veya mai ída ákona ukhen mino. ¹¹Máan baya ma siyain kéká ano vá ovaren me afová ino. Mai ma enafá báké ma vompompin uvaman amikharé eruna mai siretin má ma e váké mai avúavú anan baranté uno.

¹²Máan tukhantí manáa kéká ano ma ve amo siren be aví daní é iyainí ída onté uno. Inká tetisi sivútivá bá betin avúavábá manaf ukhen ne ída senté uno. Ída ino. Mai kéká maen betiyantái enai avúavá óden betíi avúavá daimen non mifo mai kékápin ída fura afova van mino. ¹³fMáan tukhantíi tetisi sivútivá ída maman dani uré tetimpin ákona van mino sé tifantéuno. Tiyarafenu ano ma setin timikhein doran máarái seti simo siré mai máa anan doriyáké béi ma mai avúavakasá daimono ma sikhein máará anan daimonté umpo Tiyarafenu ano ma iniádan baré einíi eya siretin mái

mai yorampin baono. ¹⁴Máan tukhein nan mi ída moéké teti simo siyá umpo mai ma Tiyarafenu ano simikhein kanarái sé teti simo siyá uno. Mai fara vara seyo, setí ankan naren arafé Yisas Karasini Kama Vaya siretimpin baré orikharé uno. ¹⁵Máan tukhá ena ano ma yókeintá ída seti sivi maman daní iyá uno. Tiyarafenu ano ma simikhein doran puntádé dorékun mai ano siretíi ankani mumunan ákona uantantin tetisi yoran mano siretimpin mo kokhoní ino van muno. ¹⁶Máan intí maé tiretin oyampá ban ma ída yoriyain baru kayo fimpá bá orivé dorano van muno. Para vara seyo, ena ano ma fefá dókein baru kayofin dódé te simo sira rauno. Ída ino. ¹⁷gMai van Bompon dóki ano máa sikhen mino. “Banta ano ma mana vanta amo seno vará Bafan mano ma yókein nará amusin uren ben mana vá amo sino.” *Yer 9:24*
¹⁸hPara vara seyo, vanta ano ma amusin iyáken beyan amo sé iyain kéká maen Bafan avorá mai kayo ída kákaní ukhen mifo véi ano ma mana vanta kákan bí amé iyain banta anon kákan bí baré iyan mino.

Porin Má Kampun Aposeri Kayo Vái Vaya Ino

11 Téi ma fara aniana veya siyá báké ma se simo siyákuya mai ída vá me ífá ono. Tirun mompo mai ma aniana veya ma siyaruna vá ineno. ²iMai fara vara séi siretíi ankan nan kokhon ineine iya rauno. Tiyarafenu ano yeren kokhon ineine iyái mai van mi vanta amikhein arinta ano ma ákona en bainí ukheya Karaisin má bano van mi siamiyá uno. ³jMáan tukhen mifo fefá ma osafáe ano Ivin ma mákasikharé einíen Ban Anon mano siretíi inin máden asuse intiya mai ma funtáde Karaisin ánain

^e10:8 2Ko 13:10

^f10:13 Rom 12:3

^g10:17 1Ko 1:31

^h10:18 1Ko 4:4

ⁱ11:2 Efe 5:26-27

^j11:3 Esé 3:4, 13

dakhafiyá inona me ifá ure kampun avúavápó béin dakhafinona van mi iniyá uno. ⁴kPara vara seyo, siretí ankan ma onékuya enará ukhein Yisasin má Kantá Aunan má monó baya vá pákena van ma ena kéká ano me siyákaya mae siretí ankan kasae mumunan iya ono. ⁵lMáan tiya ompo setí ankan kama uron mi iyá uno ma siyain aposeri kayoi aránaópá téi ída vá uno. ⁶mMáan tukhéi vanasifin ma sánaen monó baya sin afova ída manté umpo fura sé betin esantaréi afová ukhé uno. Mai afova fefái ara ara aa sáké tiretí ankan aní ékuya fura se afovaí ukha ono.

⁷nMáan tukha ompo séi ma seyan bararasí uré tireti vaípáke ma ída miyan inantinton Tiyarafenui Kama Vaya ma siamiyaruna mai umesá iya rafuno. Ída ino. ⁸oTiretí ankan ma fara aya ono siré ena monó kéká ano ma karúdarú uádan pintena moní ma variyaruna anoi umoyaní ma einí iyá uno. ⁹Máan tukhantíi siretí ankan baonafá ma o varé maé mana yana san ma o afasí ma é ída sireti vaonafá inan té iyá uno. Mai fara vara seyo, Masédoniáké ma erein tifá tiváeyan mano mai ma o afasí iyá eruna yanasinta simikhantí pasé téi ída kanafé tireti siya ono van mana yana san inan tenté uno. Ída uron mi máan tonté uno. ¹⁰Téi fura sé afová ukhékun Karaisini fura yaná ano sempin bantí pasé mai ma ída miyan bariyaruna van Akaiá barafin ma minó akhempá nóké mai van kasaé te simo senté uno. ¹¹Mai séi fará tireti vaonafá mana yana san ída inantiya rafuno. Téi ídá tiretin nan tinunu é iya rafuno. Tiyarafenu ano afová ukhái séi fura siré tireti nan moeké tinunu iyá uno. ¹²Máan tiyái mai ma setin má manaí dorarí iyá uno siren ma vetiyan amo siyain kékái aa yasíkano van pasé para máan tiyá banté uno. ¹³Mai kéká maen kam-

pun doran banta kayo ino. Betí avúavá ano siretin auuráké uren Yisas Karaisini kama yoran banta ma einí é iyan mifo ída ino. ¹⁴Máan tiyan mifo séi ída sinú diyá uno. Para vara seyo, Ban Anon mano yere kasaen kakhan enisori ma einí iyan mino. ¹⁵Máan tukhantiya Van Anoni yoran kéká ano ma ara ara avúavá póké ma vanasi mákáden ma vetiyan nan puntákein kéká uno ma sin nain nan tiretí ankan ída vá anú duman duman iya vá baro. Ínaimpáké betí ankan ma variyá inain avúavákái miyan baranten mino.

Porin Amaniná Ma Eriyain Uman Kayo Van Ma Sein Baya Ino

¹⁶Mai ma fefá tiamikharé eruna mai vaya anan taréa evarané tiamiyá uno. Mana vanta ano sen nan ída vá óen iya ne sin nompo séi ma manáa aniana vaya ma siyákeya mai kampun banta kayoi vaya ma iniyaonaí eya senti vaya inesí maé manáará te simo seno van muno. ¹⁷Au khakan in avúava san Bafan mano ída anunu ukhen mifo séi maen óen banta an mi ziyá uno. ¹⁸Máan tukhein nan mi kokhon nanin banta ano ma vara ráke avúavápin au khakan inté intí maé mai sen mái máan tonté uno. ¹⁹Máan tukhein nan mi intéa kéká anó mai van afová ukhé uno siyafo mai kéká ano óen kayo an mi yiya ono. ²⁰Máan tukhein nan mi mana vanta ano ma veni yorarí ono van duvun en nafi áa siretin nina yanasinta varen nafi áa siretin máká maáká en nafi inká tiretin maman bararasí uren beyan nan mana inian kákaní iyáken inká tiretin auná ma ankamen ma intiya mai siretí ankan ída mana avúavasí ukha ompo ifá en nan mi máan tiyan mino. ²¹PMáan tukhá téi siyave van ída kanafé é tiyáké tetimpin

^k11:4 Kar 1:8-9 ^l11:5 1Ko 15:10; 2Ko 12:11 ^m11:6 1Ko 2:1, 13
ⁿ11:7 1Ko 9:18 ^o11:8 2Ko 12:13; Fir 4:15-16 ^p11:21 Fir 3:5

ída ákona vain mai yanasí ontere senté umpo vetí ankampin ákona van mi máan tiyan ne senté uno.

Betiyán ma inte yanápin nafi ma ve amo sintí maé mai seyan dere se simo senté umpo mai evaráné óen banta an mi yanté uno. ²²Máan tukhantín betí ankan Iburu kéká unó tinten nafi mai sen má Iburu vanta uno. Inká betí ankan Isareri kéká unó tinten nafi mai sen má Isareri vanta uno. Inká betí ankan Abraamun anavasin munó tinten nafi mai sen má ben anavasin muno. ²³¶Mai kéká ano Karaisini yoran banta uno sé iyan mifo séi mana óen banta an ma yiyaruna anoi vetí ankan esantaré moékantá Karaisini yorarí iyá uno. Téin karavusifin pákaan moren ída yankaforen dáda dafiyó tinkáden tiruan purirí é iyan mifo séi moékantá ákona yorarí é iyá uno. ²⁴¶Yutan kéká ano yan manápá damúpin teti naini (39) yádái ákona yafiyópó tinkádú ukhen mino. ²⁵¶Kanú manaú dádásí en Romu kéká ano kunan dafiyópó tinkamen mino. Maná damú Yutan kéká ano onámanápó tinkamen mino. Inká kanú manaú dáda téi ma oreruna sipi namuein mino. Máan tuví mana inuran má bayan má un non daró noré uno. ²⁶¶Máan tukhá kokhon dáda minópimpá ma nóké anon nonpim e iyankarí iyákun inká umoyan banta kayo ano siruren ten tina yanasinta yafiyaren mino. Inká ena anan nanin banta vá tesí kéká bá ano yere sirono van iyaren mino. Kákan baru kayofin nafi kámá barafa safi uman baré ída kama iyaré uno. Un nompin afeyorarí é iyákun inká kampun ten monó kéká uno ma siyain kayo ano uman timiyan mino. ²⁷Máan tukháí séi kokhon damú ákona yorarí iyá paséi ída kamaé tuun baré iyá uno. Kokhon damú ída non má dunan

má nanton tirafanan para e manté oré iyá uno. Ída ona váká pasé iyon nan takhin takhin é iyá uno. ²⁸Máan tiyá maé monó nanin banta ano intesá ena ena uman kayo varanten nafi siré anomé iné iyá uno. ²⁹Manáa monó kékái mununampin ma mo iyon in maen ten tufá ída múmú é iyan mino. Manáa kéká ma umefin mamádan eraven ankamí maé tiran nan uantiyá uno.

³⁰Máan tukhantí te simo ma seno vará inte yanasinta anó tenti sivesara aní iyan nafi mai vará moékantá te simo seno van muno. ³¹Mai ma ena ena aví daní iyain Tetisi Bafan Yisas Karaisin Afóe Ti yarafenu ano afová ukháí ma fura vayan tiamiyá uno. ³²¶Téi ma Damaskasí bákun maen Aretasin ne sin Kin ni kamanin banta kayo ano séi nan pákano siren aruvin banta kayo kaíkan kákan baru ona kayorá dafisen orikharen mino. ³³Máan tukharen mifo kákan baruí kafi aimpinté uaren téin unampin uféden kaí aravuaré me oné karan oré uno.

Pori Ma Ayankuní Ukhein Daná Aní In Onein Baya Ino

12 Te siví ma yaní in pintena ída mana yaná baranté umpo ída ena aa vain pasé mai avúavá para varé oriyá banté uno. Máan tiyá banté umpo áesi Bafan mano ma séin tuu vaéden ma aní ein danasinta vá inká aú páke yanasinta vá tiaméku vá ineno. ²⁻³Téi Yisas Karaisini yoran bantan baré ékun Ti yarafenu ano e siviren dan uron inarufá múdá bákun fotini (14) oranan orikhen mino. Mai sen tu minó bukhafa anó o van nafi áa saunan máa anó o van nafi mai séi ída afová ukhé umpo Ti yarafenu ano anan afová ukhen mino. ⁴Téin ma siviren inaru varufin ma moráká maé téi

¶11:23 Apo 16:23 ¶11:24 Diu 25:3 §11:25 Apo 16:22; 14:19

¶11:26 Apo 9:23; 14:5 ¶11:32 Apo 9:23-25

sinú duré mai ma enará ukhein baya ma ineruna van ída kanaí é baya seren é uno. ⁵Mai vaya ma inikherunará te simo senté umpo mai van ífá iyá umpo mai ma sesi ákona ma ída vain nan manan te siví daní onté uno. ⁶Te siví ma yaní onté maé mai fura vaya anan tenté umpo ída óen banta an danté uno. Máan tonunaren mifo ífá é uno. Mai fara vara seyo, vanasi ano senti wayará ten tiví daní uren tenti ineine ánan dakhafin nain nan paséi se ma varyiaruna avúavá bá inká te ma siyaruna vaya vá inen onen ma uren maen ten nan puran tiyan mino sen inino van muno.

⁷Tiyarafenu ano kama yanasinta séin aní uren maen inká téin nan mai yanasinta van ovaren me iniren be aví daní inae siaren mana ayankun an dakhein daná áikan ten tufin dafékakhen mino. Mai yaná maen mai Ban Anoni vaya varen orin bantan tiantan e váken mi séin nan be aví daní inae siren iyariyan ban mino. ⁸Máan tiyáká mai yaná do maman karúdasintano van kanu manaú dádái simúkimpói Bafan baípa ínané inantiyaré uno. ⁹^wMáan tékun maen béi evaránen tisimemí, “Éin an den ma ákona ída vain nanin bantafin mi senti sarisari ano kama yorarí iyáken mai sarisari ano éimpin kanaí ukhen mino,” sen tisimikhá paséi senti ákona ma ída vain nan mi se siví daní iyá kun maen Yisas Karaisini ákona ano sen pinté uaren doriyan mino. ¹⁰Máan tukhein nan mi Yisas Karaisini yorarí impin ma ída senti ákona vantin ma vanasi ano siruren tisiren toyampá baya siyá ma kákan uman bariyaruna van mi simusin iyá uno. Para vara seyo, séimpin ma ída ákona van maen mai Yisas Karaisini sarisari anon téin evaránen ákona simé iyan mino.

Pori Ma Koriní Nanin Banta Van Kokhon Ineine Ein Baya Ino

¹¹^xTiretí ankan manon téin tirá maman mantarenái óen banta an davé te simo siyá uno. Tiretí ano ma séinti sivú-tivá baya uvádeya ma séin timo seren mifo siretí ankan ída máan tená paséi seyantá tian dákó é umpo mai ma aví bain aposeri kayo aránaópá ída séi vá umpo séi faen danái vá uno. ¹²^yTéi ma siretin aúbaná ma o váké maé ten nan purase aposeri ino seno van kokhon danái varyiaré uno. Para vara seyo, séi nan Tiyarafenu yorarí iyan mino seya afová ono van paséi mantaan ákona uvé minó uman bariyáké maé inká enará ukhein danasinta vá aní danasinta vá maman dákó ukharé uno. ¹³^zEna monó namun kayofin ma monó tiyain nanin banta ma maman tiyaruna avúavá anan tiretin manan té umpo mana uman máan ída amé uno. Téin dunan timin uman ma ída ameruna ano ma namu ukhéku maeya mai ume vá ampisintano.

¹⁴Kanú manaú dádasi é tiretí ankan baonafá orono van útakhé umpo mai ma oronunafin ída siretin uman amenté uno. Tiretí afová ukharono. Iyampon kayo ano ída yunan dosen be anoifon mo amé iyan mifo vetin anoifo anon dunan dosen be akhafana mo amé iyan mino. Máan tukhein nan mi siretí minó daná barano vara oronte raumpo siretin nan mi oronté uno. ¹⁵Minó te sina yanasinta vá te su vá tiretí ankan ameno van moéké tinunú iyá umpo siretí ankan téin nan ída anunu iya ono.

¹⁶Tiretin pinté manáa ano sen nan ída uman timiyan ne siren maen máa siyan mino. “Teti sina yanasinta ída afoká umoyan iyan mifo ara ara vaya kayofó tetin mákáden maen aupáké baré

^v12:7 Yop 2:6 ^w12:9 Fir 4:11-13 ^x12:11 2Ko 11:5 ^y12:12 Rom 15:19

^z12:13 2Ko 11:9

iyán mino.”¹⁷ Mai intesá ukhen nafino. Mai ma siantékun orein banta kayo ayan táké uaresá tiretin nina yaná umoyan bare rafuno.¹⁸ ^aTiretí ankan baípá ma Taitasin tiantékun oriyá maé ena sívá tiváen tékun ben má muntaven oren mifo Taitasi ano siretin nina yaná mákádén ná umoyan baren nafino. Ída ino. Para vara seyo, verasampin mana Aunan mi vaká mana aasáí oriyá manaí doraríí iyá uno.

¹⁹ Tetiyan aúpasí ono vara ma vompon uvaman ame rauno. Ída ino. Teti ankan Karaisini yoran banta kékái váké Tiyarafenun avorá pura vayan tiyá umpo séi ma sinunu ukheruna sirona kéka soe, siretíí mumunan maman ákona uantano van mi ma vaya siyá uno.²⁰ Para vara seyo, séi ma oriyá o onéku maeya séi ma inikheruna avúaváká ma ída vare ma inká tireti ma inikheona avúaváká ída séin tonanona van mi feriyá uno. Tái ma o onékun ma aruve asive in nafi ena ará namu uantan nafi ena aranan uantan nafi eyan nan mana inin avúava safi oyampá baya sin nafi e sian more mere in nafi au khákan in avúava safi asuse avúava safi ma van nan mi feriyá uno.²¹ ^bPara vara seyo, fefá ma umeí iyá éona van ída ará baédeya sirun noe sen nan ma famúku avúava safi inká ena aranan avúava safi ma siretimpin para vain ma mo onékun ma Tiyarafenu ano siyave simin nain nan mi feri yá uno.

Pori Ma Sipá Ákona Uanten Amaan Baya Sein Mino

13 ^cKanú manaú dádasíí é tiretí ankan baonafá oronté umpo Tiyarafenui vompon dóki ano máa sikhen mino. “Kan nafi kanú manaú banta ano fi ma onantin ma mana vanta ano aaufi

ukhá inti mae kasae mai vaya kópin puntaran nono.” *Diu 19:15*

² Pefá ma kan dádasí é ma siretin má báké maé mai ma umeí ukhá ein kayo fefái afova vaya siamikharé uno. Máan tukharéi saréa ma vompon ma uvaman amerunafin dere evarané mai ma umeí ukhá ein kayo vá ena kéká bá afova vaya siameruna fasintí téi ma oronté mai ma umeí iyáin nain kéká ída avo uantanté uno.³ Máan ma ékuyan tireti afová eya Karaisi anon ben pinté uaren baya sisimiyán mino sinono. Tiretíí avúavá ma maman puntarampin béin ída afonkakhein pasen bei kákan ákona fói siretimpin doranten mino.⁴ ^dPara vara seyo, fefá béimpin pura sen ída ákona van maen daa unkamádantá arukharen mifo saréa Tiyarafenui kákan ákonarái van mino. Máan tukhan tetin má deren ída ákona van mifo véin má ma súpá ukheruna van mi Tiyarafenui ákona ano setimpin báken mi mai ákona ano siretimpin doriyan mino.

⁵ ^eEna ena yamú ákonaé mumunan iya rafuno sire vá e avúavá bá ineine vá daíde vá onano. Eyan avádúan onesin ma Karaisi ma ída siretimpin banti maeya mai fura se ída mumunan ukha ono.⁶ Máan tiyákeyan teti ma Karaisini yorarí iyaruna oman afová inono sé inikhé uno.⁷ Tiyarafenu ano siretin ayaintiya ída namu avúavá barano van mi setí ankan timúkiyá umpo setin nan Karaisini yoran banta kéká ino sen banasifin tino varauno. Ída ino. Para vara seyo, seti nan kampun banta kéká ino siya ompo setinti kákan inin ma vain mai funtákein avúavá ana varano van muno.⁸ Para vara seyo, setí ankan ída kanaí é pura yaná namuroí ó tifanté umpo mai yanákái mantakhé pasé mai yanái ayaiyá tiféuno.⁹ Tetimpin ma ída

^a12:18 2Ko 8:6, 16-18 ^b12:21 2Ko 13:2 ^c13:1 Mat 18:16; 1Ti 5:19

^d13:4 Fir 2:7-8 ^e13:5 1Ko 11:28

ákona van ma siretimpin ákona vain nan mi simusin iyáké Tiyarafenu ano siretin ayaintiya ákona mumunan má bano van timúkiyá uno. ¹⁰fBafan mano vei yorantá dafisino van mi séin aní uren ákona simikhá doriyákéi siretin má ma ída varuna afokhampin ma vompon uvamadékun oren mino. Mai fara vara seyo, séi ma oronté maé ída ákona vayafó tiretin má baya seno van muno. Tiretin máden asuse ino vara Bafan mano mai ákona simikhen naifo siretin ayaintiya mumunan ono van mi simikhen mino.

Pori Ma Amusin Ein Baya Ino

¹¹Mumunan tiyofi sífá tiváeyan noe, sesi vaya mará me akhení iyá tusu

sé umpo senti kípán baya vá inero. Tiretíi namu avúavá ampireya vá ben ákona uantan maran iya vá amusin iyáke inká manafin báke vá ará kusin avúavá baresin ná avábá uren ma ará kusiantan Tiyarafenu ano siretin má bano.

¹²Tiyarafenurá ma monó tiyain nanin banta ano ma avábá iyain avúavá kasá ben avábá in maran ná ono.‡ ¹³Tiyarafenui kantasí ukhein nanin banta ano amusin baya ne siádan oren mino.

¹⁴Bafan Yisas Karaisini sarisari vá Tiyarafenui avábá bá Kantá Aunani manafin ban avúavá bá ano vá tiretin má bano.

‡13:12 Kiriki vaya fintéi *Tiyarafenurá ma monó tiyain nanin banta ano ma kantasí ukhein amónan maran iyain* nan mi sikhen mino.

f13:10 2Ko 10:8

**PORI MA KARESIÁ NANIN
BANTA UVAMAN
AMEIN BOMPON MINO**

(Karesia)

**Karesia Vompon Ma Uvanteí
Pákenai Afova Vaya Ino**

**Ma vompon ma
uvantein banta ino.**

Baya varen orin banta Pori ano ma ma vompon uvantein nan kan ineinen iyan mino.

- (1) Karesiá barafin ma Pisidiá distrikifin ma sautí bain baru kayo Antiokí bá Aikoniamí bá Ristará bá inká Debé bápín ma esé aráien monó dorarí uren ma avían mantakhá eimpin minon ten iniyan maen inká
- (2) Karesiá barafin ma notí bain baru kayofin ma kan dádasí en monó dorarí ukhá ein ne sen iniyan mino. Taréa ma Teki e siyain barafin mi Karesiá bara varen mino.

Uvarein orana ino.

- (1) Karesiá barafin ma sautí bain kéká ma uvaman amikhanten maen mai AD foti-eiti (48) fin nafi áa fotinaini (49) fin nafin uvanten mino. Mai maen kanisori kayo ano ída Yerusaremí átaru ukhan mino.
- (2) Inká Karesiá barafin ma notí bain kéká ma uvaman amikhanten maen mai AD fifti-siksi (56) fin nafi áa fifti-seveni (57) fin nafin uvanten mino. Mai maen Romú nanin banta ída vompon uvaman amikhen mino.

**Ma vompon ma
uvantein baru ino.**

Kanisori átarufá Yerusaremí oriyáken nafi áa Masedonia safi áa Koriní barurá ma kanú manaú dádasí en ma monó doraríen noren ma e váken nafin ten iniyan mino.

**Ma vompon ma uvaman
amikhein kéká ino.**

Pori ma Karesiá barafin esé aráien monó dorarí iyákan ma mumunan ukhá ein kékápin nafi áa kan dádasí ma en monó dorarí íkan ma mumunan ein kékápin nafi non ten iniyan mino.

**Nái ana vará ma
vompon uvanten nafino.**

Monó nanin banta ma Pori afova amiyan ma Yisas Karaisintá ma mumunan esin maen mai avúavá anon auu ída manten ne sinten mino ma sikhá ein me ampiren man baya ánain bákuriyaimpin mino. Kampun banta kayo ano kampun afova amiren enará ukhein bayafó banasi aviren tavi aasá oriyán mifo Pori ano vei vava varen orin doran nan pura sen ákona vain doran ne sen maman amá ukhen mino. Karesiá nanin banta ano ma Yutan kékái avúavá ánain ma yakha fono van ma auu khavin daná ma maman kainten maen mai vetimpin manan minó afova van mino. Mai man bayai karavusii sá inten nafi áa Yisasin pinté uaren ná auu ivan kékasí inten nafi mai vetí anunu ino. Máan tukhen mifo mai ma monó nanin bantaí ukhen ma amusin dosiyá ein mai ída vetí anunu ánain bákurinten mifo Tiyarafenun anunu ánain dakhafen ena nanin bantai yoraríen ná aya ino.

Porini Amusin Baya Ino

1 Téi vava ma varen orin banta Pori uno. Baya ma varen orin dorarí ino van ma vara ráke vanta kayo ano fi áa

mana vanta ano fi ída séin aní uren ákona simikhen mifo Yisas Karaisin má inká bein ma furin pintena avían mantakhein Afóe Tiyarafenu vá anon mai ákona simikhen mino.

²Minó mumunan ayofi afá aváeyan manon ten má manafiní uven mi ma vompon uvaman Karesiá ma vain monó kayofin ma vaona nanin bantan amen mino.

³Tifóe Tiyarafenu vá Bafan Yisas Karaisini sarisari vá ará kusin má ano vá tiretin má bano. ⁴Yisas Karaisi anon teti Sifóe Tiyarafenui anunu ánain dakhafen mi saréa ma vain namu avúavá pinta setin tiya ono van e fúkaren mino. ⁵Máan tukhein nará Tiyarafenu avisá ena ena yaní ó tifano. Pura ino.

Kama Vaya Mana Anan Ban Mino

⁶Yisas Karaisini yoran táké uaren ma Tiyarafenu ano siretin kamaen tarisari uren arákaya ma veni vanasií ukharé eona kéká ano ma aine véin me oyan amire ma enará ukhein monó baya ánain ma yakhafiya ona van mi séi sinúdiyá uno. ⁷Ída ena kama vaya van mifo manáa kéká anon tiretin maman kufa uádaren mi Yisas Karaisini kama vayan do vaéádiyán mino.

⁸Máan tian mifo fefá ma siamékuya inikhá inona kama vaya vá ma ída manaf ukhan nain monó baya ma setí ankan pinte safu áa inaru fáke enisori ano fi ma me siamin nain mano vá ira khiyan ma uman baren berai siyan purin barufin ná típá o afeyorano. ⁹Tetí ankan pefái siamikharéi saréa evarané ákona iyá uno. Pefá ma inire afová ukhá inona monó baya vá ma ída manaf ukhan nain baya ma me siamin nain banta ano vá ira

khiyan uman baren ma verai siyan purin barufin ná típá o afeyorano.

¹⁰JBanasi amusin uantano vara ma vaya siya raumpo Tiyarafenu mi amusin uantiyá uno. Banasi amusin uantano van ma iyanté maé mai séi ída Yisas Karaisini yoran banta uno.

Yisas Karaisin Pinté Erikhein Bayan Pori Siyan Mino

¹¹kMumunan tiyofi sifá tiváeyan noe, afovasá ono. Mai ma aya uren ma evaránen aviran baya ma siretin tiamikheruna mai ída mana vanta finté erikhen mino. ¹²Mai vaya ída mana vanta finte varékun inká mana vanta ano ída afova simen ukhen mifo Yisas Karaisi anon aú páke vaya simikhen mino.

¹³lPefá ma Yutan kayoi avúavá ánain ma ákonaé dakhafiyáké maé Tiyarafenui vanasi vá monó bá namuroí uré minó aruan kípano van iyákuya afová ukhare ono. ¹⁴mTéi Yutan kayoi avúavá ánain ákonaé dakhafiyá paséi sinafu siráoni avúavá ánain ma yakhafimpin te sivun kéká esantakharé uno.

¹⁵nMáan tukhé umpo sinóen amúpim ma vákun mi mai ma Tiyarafenu ano ma aní ein damúí vei sarisarifó téin tararen aní urá baréi e vantaí é uno. ¹⁶Bantaí uvékun ena anan nanin bantafin be Anini kama vaya siamino van béin ten aníen mino. Aní ma urá maé mai vayai ana sisimino van ída manáa kayorá mo inaé uno. ¹⁷Inká téi ída vákun ma vaya varen orin bantaí ukharé ein banta kayo onano siré ída ainé Yerusaremí ódé umpo Arebiá barafái o varé maé mai ráké evarané Damaskasí oré uno.

¹⁸oVákun kanú manáu orana orivíká Pitan onano van Yerusaremí ódé ben má un bákun fiftini (15) yamú oren mino.

§1:4 Kar 2:20 ^h1:7 Apo 15:1, 24 ⁱ1:8 1Ko 16:22 ^j1:10 1Te 2:4

^k1:11 Mat 16:17 ^l1:13 Apo 8:3 ^m1:14 Apo 22:3

ⁿ1:15 Ais 49:1; Kar 2:7 ^o1:18 Apo 9:26-27

¹⁹Yerusaremí ma o váké maé baya ma varen orin banta kéká pintena ída mana oné umpo Bafan afá Yemisin manan oné uno. ²⁰Máan tukheruna van mi saréa ma uvaman amiyaruna veya mai Ti-yarafenu avorá ída kampun tiyá uno. ²¹^pMáan turé mai oyampáké Siriá bá Sirisiá barafá bá oré uno. ²²Oré umpo Yisasini vanasi ma Yudiá barafin ma vain kayo ano ída sen toman afová ukharen mino. ²³Máan tukharen mifo vanasi ano ma máa siyain baya anan inikharen mino. “Mai ma setin tiriyáken ma inká tetí ma mumunan iyaruna yaná ma máden namu ono van iyaré ein banta ano saréa mairá mumunan iyáken mai ma fefá namu ono van iyaré ein mumunan nan mi sian banasi amiyán mino” sin baya ma iniren maen ²⁴mai van Ti-yarafenu aví daní iyan mino.

Ena Aposeri Kayo Ano Ma Porin Má Ará Mana finí Ein Baya Ino

2^qFotini (14) orana orivíkái Ban-abasin nú Taitasin nú bá Yerusaremí evarané ódé uno. ²Tiyarafenu anon téin aní uren maifá orino síkái Yerusaremí ma oré o váké maé ena nanin bantafin ma yoriyá eruna veya kayo mai monó ánon banta kéká anan tiamiyaré uno. Taréa ma yoriyaruna yoran má peyante yoran má ano fara savifá o afeyoran nain nan mi vetí ankan iniren ará manafiní ino van mi máan té uno. ³Inká Taitasi maen Kiriki anan bantan báken téin má bákan mifo véin au khavino van betí ankan ída sen mino.

⁴^rÍda máa sen mifo Yisas Karaisi ano ma man bayai karavusi fintena ma setin tivikein avúavá ma aní ukhein baya ma átaru uvé tiyá tiferunafin manáa kampun mumunan bain banta kéká ano e féken tifuriyaren mi mai karavusifin

tetin evaránen tivían kaono van mino. ⁵Máan tonon van en mifo mai fara va vetin titó máa ída afokhan ame rauno. Kama vayai fura yaná ano siretin má para vano van muno.

⁶Kokhon nanin banta ano Yerusaremí monó ánon bantafí ma ukhein kéká san kákan bí manten nen ten inikhén mifo séi ma inikheruna mai ída kákan daná ino. Mai fara vara seyo, aví bain má ída aví bain má ano Ti-yarafenu avorá manafí anan ukhen mino. Mai van mi monó ánon banta kéká ano senti vayará ída manáa mo asotúen mino. ⁷^sÍda manáa veya mo asotú ukhen mifo Ti-yarafenu ano ma Yutan kayofin kama veya siamin doran ma Pitan ameiní en ena anan nanin bantafin ma kama veya siamin doran téin timikhén mino sen afová ukhen mino. ⁸Mai fara vara seyo, Ti-yarafenu ano ma Pitan má bákan ma Yutan kayofin doriyá einí anan en mi sen má báká ena anan nanin bantafin doriyá uno. ⁹Yemisi, Pita, Yoni néne van ma vanasi ano monó ákona uanttan banta kéká ino ma siyain kéká anon mai ma Ti-yarafenu ano séin tarisari uren ma ma yoran timikhein ódaren mi Ban-abasi rasan nan kana ino siren e sivían betimpin kaen mino. Máan turen mi verasan ákonaen tisimiyáken tirékan ena anampin doresirá inká teti Yutan kayofin dorano sen tisimen mino. ¹⁰^tMáa siren mana veya ma sisimein mai ona ma ída van nanin banta aya ino van mi sen mifo séi mai yorarí fe iyákéi ákonaé doranté uno siré timusin é uno.

Pori Ma Pitani Namu Avúavá Maman Dákó Ein Baya Ino

¹¹Pita ma Antiokí erí maéi véi ma namu avúavá bariyain nan ben avorá asé uno. ¹²^uBéi ma esé o unaven maen

ena anan nanin banta ano ma monópin bain má kama avúavá en manafin kumamen dunan niyaren mino. Máan tiyaren mifo ínaimpáké Yemisini kéká ma oríkan maen au khavin avúavá ánain ma yakhafiyain kayo van péden betin má ída manafin kumamen dunan nen mino. ¹³Máan títan inká Yisasintá ma mumunan iyain manáa Yutan kayo vá ano yere mai kampun avúavá barákan mai avúavá ano Banabasin má dere e avíádan maifin oren mino.

¹⁴Máan tiyáken betí ankan ída kama vaya ánain puntáden dakhafiyái téi ódaréi ena kéká avorá Pitan tiamé uno. “Éi Yutan anan banta anon ena anan banta ano ma Yutan kayoi avúavá ánain dakhaféinií iyákeya ena anan banta ma vainíi ukha ompo fará ena anan kayo van Yutan kayoi avúavá ánain dakhafino van duvun iya fono.”

Yisasintá Ma Mumunan Iyain Nanin Banta Van Ma Funtákein Kéká Ino Sein Baya Ino

¹⁵Máa siré tiamé uno. “Erasan Yutan anampin mi afoká ukhé umpo ume van ne ma siyain anampin ída afoká ukhé tiféuno. ¹⁶ᵐMosesini man baya ánain ma yakhafintá Tiyarafenu avorá ída funtákeruna nanin bantaíi ó tifanté umpo Yisas Karaisintá ma mumunan inain nanin banta ano anan Tiyarafenu avorá puntáken banten mino. Yisas Karaisintá ma mumunan iyá tiferuna mai aa sáké anan Tiyarafenu ano setin nan puntákein nanin banta e sinten mino. Mai fara vara seyo, mana nanin banta ano ída kanaíen minó man baya ánain ma yakhafin naintá Tiyarafenu ano funtákein nanin banta ino sinten mino.

¹⁷“Yisas Karaisintá ma mumunan ó tífanuna mai ano anan Tiyarafenu avorá puntákeruna nanin banta vanté tifé

umpo seti Yutan kayo vá deren ena anan nanin banta an dé umeí iyá tiféuno. Yisas Karaisi anó ayaen ume ákona uanté iyan nafino. Ída uron mino. ¹⁸Mai ma séi ankaman barákukhá onunan man baya ma evarané uvaranté maé mai séi man baya yurafurein bantan bá uno senté uno. ¹⁹Mai fara vara seyo, man baya ánain ma vákurékun mai ano furino sin nain nan pasé mai ánain ída vákuronté umpo Tiyarafenu vái súpá ukhé banté uno. ²⁰ᵐMáan tukhen nan mi Karaisi má téi fe fúkéi séi seyan na va raumpo Yisas Karaisi anon tempin ban mino. Tiyarafenu Anin mano ma séi nan moéken anunu uaren ma sen nan e fúkein mumunantái vá uno. ²¹Tiyarafenui sarisari ída maman paen danasí uré do ékano van muno. Mai fara vara seyo, Mosesini man baya ano ma Tiyarafenu avorá tetin maman puntákein nanin bantaí ma intin maen mai Yisas Karaisi fasavin puren mino.”

Man Baya Ma Yakhafin Avúavá Bá Mumunan In Avúavá Bá Baya Ino

3 Karesiá nanin banta ano ma óen iya vaona oe, Yisas Karaisin ma yaa unkamádantá arukhá ein tiamékuya siretiyantá mai fefái siretin ma oneiní ukha ompo saréa iye anó tirtíi ineine asuse uantiyan nafino. ²Téi siretimpin mana vaya máan ina onté uno. Tirtíi ankan ma Kantá Aunan bareona mai man baya ánain ma yakhafintasá bare rafono. Áa kama vaya ma iniren mairá ma mumunan in tasá bare rafono. ³Kantá Aunani ákonarái araíe mumunan ukhare ompo fará óen uareyá tirtíi ákonará mantákheyá Tiyarafenu ano kama vanta e sinten mino siya rafono. ⁴Mai ma ara ara uman kayo ma siretimpin afoká iya ma verai siyáke ma variyá eona mai náiná anarasá

mantareyá taréa fasavifá mai mumunan karúdanto rafono. ⁵Tiyarafenu ano ma siretin Kantá Aunan amíden ma enará ukhein avúavá ma siretimpin aní iyain mai Mosesini man baya ánain ma yakhafiyaona rasafino. Ída ino. Karaisini vaya ma inire mumunan iyaonará ino.

^{6x}Abaraamun ná onano. Beni mumunantái Tiyarafenu ano funtákein banta e sikhhan mino. *Esé 15:6*

⁷Máan tukhein nan mi Tiyarafenu á ma mumunan iyain kayo van Abaraamun akhafana ino se afová ono van muno.

^{8y}Ena anan nanin banta ano kama vayará mumunan intin betin nan puntákein nanin banta e sen aranten pasen mi Tiyarafenu ano afová ukhen kama vayafó pefái Abaraamun iyáanten bei Vompon dókifin máa sikharen mino. “Éin pintéi uaré ma varafin ma vain nanin banta minó avábá uantanté uno.” *Esé 12:3*

⁹Máa sikhein pasen mi ventá ma mumunan inain kéká ano yeren mai ma Abaraamu mumunan uren barein avábá baranten mino.

¹⁰Máan tinten mifo man baya ánain ma setí ankan bákuronuna anon Tiyarafenu avorá puntákein nanin bantaí onté uno ma sen inin nain kayo amaninái Tiyarafenui aran naná banten mino. Mai fara vara seyo, Tiyarafenui vompon dóki ano máa sikhhen mino. “Tiyarafenui vompon dókifin ma minó man baya vain ánain ma ída vákurin nain nanin banta amaninái veni aran naná banten mino.”

Diu 27:26

^{11z}Máan tukhein nan mi man baya ánain ma yakhafin nain nanin banta ano Tiyarafenu avorá ída funtákein kayon banten mino sé afokái afová ó tifanté uno. Mai fara vara seyo, Tiyarafenui vompon dóki ano máa sikhhen mino. “Mu-

munan ma inain nanin banta van mi Tiyarafenu ano funtákein nanin banta e sirantin ayun para vanten mino.” *Aba 2:4*
^{12a}Man baya ánain ma yakhafin maen mai mumunan má ída manaí ukhen mino. Mai van mi Tiyarafenui vompon dókifin máa sikhhen mino. “Ayun ma fara van orian ban aunan ma varano van inain mano vá minó man baya ánain ná bákurino.” *Riv 18:5*

¹³Máan tinten mifo man baya ano setin uman timiyaréin mi Yisas Karaisi ano setin evaránen tivirano van daa unkamádantá e fúkan mi mai van Tiyarafenui vompon dóki ano máa sikhhen mino. “Daa unkamádantá ma furin nain nanin banta amaninái Tiyarafenui aran naná banten mino.” *Diu 21:23*

¹⁴Tiyarafenu ano ma Abaraamun iyáantákaré ein mai avu ena anan nanin banta ano Yisas Karaisin pintéi uaren evaránen aviranten mino. Máan tukhein nan mi mumunantá anan mai ma iyátintan baré ein Kantá Aunan baranté tiféuno.

Man Baya Vá Tiyarafenui Iyáantan Baya Fáke Vá Ino

¹⁵Mumunan tiyofi sifá tiváeyan noe, seti ma ma varará bá tiferuna fákena vaya siamékuya inin nono. Mana vanta ano ma ve ina yanasinta yaíden ma ve akhafana iyáantádú uren ma vompon uvamádantin baré inain mai ída ena vanta ano yo varen nafi inká asótúen nafi inten mino. ^{16b}Tiyarafenu ano Abaraamun má be anin mái iyáantákaren mino. Mai van mi Tiyarafenui vompon dókifin ída kokhon iyampon nan “e akhafanafin” ne sikharen mifo “e akhápin” ne ma sikaré ein mai Yisas Karaisin nan mi sikharen mino. ^{17c}Ma ma siyaruna vayai ana máan mi ukhen mino. Tiyarafenu ano Abaraamun má

^x3:6 Rom 4:3, 16; Yem 2:23 ^y3:8 Rom 4:3, 16; Esé 18:18; 22:18

^z3:11 Kar 2:16 ^a3:12 Rom 8:3 ^b3:16 Esé 12:7 ^c3:17 Eks 12:40

ma kasen manafin ban baya siran ma fo antareti ifo teti (430) orana orivin maen ínaimpákéi man baya afoká ukhein pasen mai man baya ano mai ma ará manafinien ma inká iyáanten ukharé ein baya ída yo avékaan akhempá kauken mino. ^{18 d}Mai fara vara seyo, Tiyarafenu ano vei sarisari fói Abaraamun iyáantákaren mino. Máan tukhein nan mi man baya finté ma uaré minó daná bariyákon maen mai ma iyáanteini aran ída afoká inten mino.

^{19 e}Máan tinten mifo mai fará man baya amen nafino. Tiyarafenu ano fefái iyáantáken mi ume aní ino van man baya amikharéin mai ma Tiyarafenu ano iyáantan baré ein iyampon ma afokáin mairái me kanaíen mino. Tiyarafenu ano man baya enisori kayorá dákan inká enisori kayo ano aúban banta Mosesin amíkan mi setin timikharen mino. ²⁰Kankanan banta ano ma ará manafiní ono van maen aúbaná bantan dosiren ará manafiní é iyan mifo Tiyarafenu veyáká anan báken beya anon Abaraamun iyáantákaren mino.

Man Baya Maen Mai Setisi Yafisin Tifóe Ino

^{21 f}Máan tukharen mifo mai ma Tiyarafenu ano fefá iyáantan baré ein masá man baya ano namuroí ukhen nafino. Ída uron mino. Man baya ano ma auyen aunan ma simiyantí tiferá mai ánain ná dakhafiyá Tiyarafenu avorá puntáké bá tifano. ²²Máan tó tifanté umpo Tiyarafenui vompon dóki ano máa sikhén mino. Ume anon minó nanin banta karavusií uádá bá tifé umpo mai ma Tiyarafenu ano ma iyáantan ma vain danasinta ma vará tifanuna aa ma vain

mai Yisas Karaisintá ma mumunan in mano ino.

^{23 g}Mumunan in ma ída yákó ukhan maen man baya ano setin karavusií uádá eriyaré ékun mi Karaisintá ma mumunan intin ma man bayai karafusi finte ma útútintan aa Tiyarafenu ano maman dákkó en mino. ^{24 h}Man baya ano yafisin tifóeni ukhen tetin afova simiyan tiviren eriyaren Yisas Karaisin tái me khaen mino. Máan tukhein nan mi Karaisintá ma mumunan é tifékun maen Tiyarafenu ano setin nan puntákein nanin banta e sinten mino. ²⁵Máan tukhein nan mi mumunan inka yákó ukhein teti ída evarané mai yafisin tifóeni aránaópá banté tiféuno.

Yisas Karaisin Pintéi Tiyarafenu Akhafanaí Ukhé Tiféuno

^{26 i}Máan tukhein nan mi Yisas Karaisintá ma mumunan eona anon Tiyarafenu akhafanaí ukha ono. ^{27 j}Para vara seyo, monó non ma vareona anon Yisas Karaisin má túpá uveya véin maman ayá au anamun ma einíi ukha ono. ^{28 k}Taréa ída Yutan banta van ena anan banta van ída miyan ban doran banta van para van banta van inká ída afon ban anasi van ukhen mifo minó ano Yisas Karaisimpin o asotú uveya manan ba ono. ^{29 l}Yisas Karaisini kéká ma vanteya mai siretí ankan Abaraamun akhafanan baona minó daná ma Tiyarafenu ano ma véin iyáantákaré ein mai siretin ninaíi inten mino.

Mumunan Nanin Banta Ano Ma Tiyarafenu Ina Yanasinta Varan Nain Baya Ino

4 Tenti vaya máan mi ukhen mino. Iyampon kéká ma arará bantin ma

^d3:18 Rom 4:14 ^e3:19 Apo 7:38; Rom 5:20 ^f3:21 Rom 8:2-4

^g3:23 Kar 4:3 ^h3:24 Rom 10:4 ⁱ3:26 Yon 1:12 ^j3:27 Rom 6:3

^k3:28 Rom 10:12 ^l3:29 Rom 4:13

vetí afóe ano ma ve ina yanasinta me amiren púká intin maen mai iyampon kéká ano miyan ída van doran banta kayo ída esantanten mifo vetin má manáí ukharen ma e anoní uven mi minó betí afóen nina yansinta varanten mino. ²Betí ankan betíí yafisin banta kéká oo yaiyen oriyantín ma vetí afóe ano ma siran nain orana máa ma orivintín mi vetiyantá dafisinten mino.

³^mYisas Karaisi ma ída erikhá maé tetin má dere máan manan é ma vara ráke man baya kayoi miyan ída van doran nanin bantan baré tiféuno. ⁴ⁿMáan tukharé é tifékun mi veni yamú puntáden afoká iyain má Tiyarafenu ano ve Anin tiantan anasi arápin eravíkan béin kauádan maen mai man baya aránaópá baren mino. ⁵Báken mai man bayai miyan ída van doran bantaí ma ukháé tiferuna evaránen tivíden maman Tiyarafenu akhafanaíen mino. ⁶^oTiretí ankan inka Tiyarafenu akhafanaí uven nan mai van mi ve Anini Aunan tiantan tiretimpin eriven mai Aunan manon “Abba,[†] Tifóe oe,” sen ariyan mino. ⁷Máan tukhein nan mi siretí ankan ída evaráne miyan ída van doran nanin bantaí in nompó inka Tiyarafenu akhafanaíí ukha ona ve ma iyáantan bain danasinta varan nono.

Pori Ma Karesiá Nanin Banta Van Ma Inikhein Baya Ino

⁸Pefá ma siretí ankan Tiyarafenu ma ída afová ukhe mae kampun ayarafenu kayoi miyan ída van doran banta kékái vare ono. ⁹Máan tukhare ompo saréa inka Tiyarafenu afová e onó tente rafu áa Tiyarafenu ano siretín pefái afová ukhen né tente rafuno. Máan ma ukhaya mai fará evaráne ma varará ma ída

ákona vain man baya kayoi miyan ída van doran nanin bantaí iya rafono. ¹⁰^pTiretí ankan mai ma kákan damú ma afoká é iyain nafi biyon nafi aú damu safi inká orana fi vákuriya mae Tiyarafenu ano siretín nan anunu ino van avébe yafisé iya ono. ¹¹Máan tiya ompo senti yoran ma savifá o afeyoran nain nan mi siretíí avúava san tikhokho fiyan mino.

¹²Mumunan tiyofi sífá tiváeyan noe, séin má manáí ono van mi ákonaé tiretín tiamiyá uno. Mai fara vara seyo, séi seyantá man baya ampiré tiretín má manáí uvékuya séin ída namu usinte ono. ¹³Tiretí ankan ná ovare me ineno. Téi sí mantéi Yisas Karaisini kama vaya esé arái é tiameruna ino. ¹⁴Téin tu ano ída ákona ukhen mai anon tiretí ankan uman amiya ompo séin ída afonkarí ureya oyan timinton Yisas Karaisín nafi áa Tiyarafenui enisori fi ma avíde kama yafisirí eonái séin e ono. ¹⁵Tetimpin ma simusin baré ein taréa mai intefasá ban nafino. Mai yamú kayofín tiretí amusin iyákeya minó daná time ompo kanaíen bainti siretí auu vá inan bían timinonaren mino. ¹⁶Ma fura vaya ma siretí ankan tiamiyaruna anó téin man tiretíí namuroí iyan nafino.

¹⁷Mai kampun banta kayo ano siretín o avíádantiya vetin ánain bákurano van mi ákona yorarí iyan mifo siretín aya ono vara ino. Ída ino. Tenti aa iyádantiya vetin ayain ineine ana ono van mino. ¹⁸Ena nanin banta ma kama ure o avíádesin ma siretín ánain bákurin doran tasá ákona inin kaono. Téi ma ída vaku yere vá mai ma variyaonaí ana vá ono. ¹⁹Te sikhafana oe, anasi ano ma inamunan iniyan ma aureiníí iyá uno. Mai fara vara seyo, Yisas Karaisi ano siretín aúpin dákó ino van muno. ²⁰Taréa séi

[†]4:6 Aramaiki veya finté *Abba* e ma siyain mai Tifóe oen tiyan mino.

^m4:3 Kor 2:20 ⁿ4:4 Yon 1:14; Rom 1:3 ^o4:6 Rom 8:15-17

^p4:10 Rom 14:5; Kor 2:16

ída siretí ankan má bá umpo siretin má bano van mi inikhé uno. Tiretin má baré kama vaya anan tiamen nunaren mino. Tiretin inté uresá aya onte rafunon tiré taréa amino ukhé uno.

Akhan Nú Saran Núká Ma O Siaren Tikhein Baya Ino

²¹Man baya aránaópa ma vano van iyaona nanin banta ano sisimeno. Beni vaya ana ano náí yanasará tikhen nafino. ²²ᵀTiyarafenui vompon dóki ano máa sikhen mino. Abaraamun anin mai kankanan mi varen mino. Miyan ída van doran nanin mano mana khain maen inká aví nanin mano mana khain ukharen mino. ²³ᵀMai ma miyan ída van doran nanin mano ma khaein iyampon maen mai vanasii avúavá kái khaen mifo aví nanin mano ma khaein mai Tiyarafenu ano ma iyántákaré ein mino.

²⁴Tiyarafenu ano ma kan dádá ará manafiní eini aman manon mi maí kan nanin ban mino. Akhan maen Saináí anui aman manon mi aní ukhan mai anurái vanasi ano esé araíen man bayai miyan ída van doran nanin bantaí ukhan mino. ²⁵Máan tukhá ein nan mi Arabiá barafá ma Saináí anuyon bain má Yerusaremí bá manaí ukhan Akhan mai an mi yakhen pasen ben má be akhafana vá anon miyan ída van doran nanin bantaí ukhen mi maifin ban mino. ²⁶ᵀMáan tukhen mifo inarufá ma fara vain Yerusaremí maen mai aví nanin Saran an mi yakhan béi setin tinóe ino. ²⁷Para vara seyo Tiyarafenui vompon dókifin máa sikhen mino. “Aaí ma ukheya iyampon ída khaiyaona nanin mano vá amusin ono. Éi iyampon ma ída khaen nan au ída aí ukhein nanin arasá kama ino. Oovarare amusin iya vá í dano.

Para vara seyo, aa nanin ma varé ein mano iyampon ma kokhon ná kain baré ein nanin kayo esantaren béi kokhon iyampon kainten mino.” *Ais 54:1*

²⁸ᵀMumunan tiyofi sifá tiváeyan noe, siretí ankan Aisakin an deya iyáantan iyamporinta ono. ²⁹ᵀIyáantantá ma afoká ukharé ein iyampon Aisakin ma miyan ída van doran nanin akhá Ismaeri ano ma máká maáká einí en Kantá Aunantá ma afoká ukheruna kéká man baya ánain ma yakhafino van iyain kayo ano uman timinten mino.

³⁰Máan tinten mifo Tiyarafenui vompon dóki ano náiesá tikhen nafino. Mai máan mi sikhen mino. “Miyan ída van doran nanin má be akhá bá tiantan orino. Miyan ída van doran nanin akhá ano ída vá aví nanin akháí ona yaíden barano.” *Esé 21:9-10*

³¹Máan tukhein nan mi mumunan tiyofi sifá tiváeyan noe, setí ankan miyan ída van doran nanin akhá ída vá tifé umpo aví nanin akhafanan bá tiféuno.

Yisas Karaisi Anon Tetin Kama Uren Kusin Timirá Bá Tifé Uno

5 Yisas Karaisi ano inká man bayai karavusi finte útúden tetin maman kusintá kaí bá tifé umpo mantaan ákona uveya vá ará kuse vano. Ída vá evaráneya man bayai miyan ída van doran nanin bantaí uvesin ná damuádan-tiya vano.

²Ineno. Téi Pori anon ma vaya siretí ankan tiamiyá uno. Au khavin avúavá ma fara fákare vante mae mai Yisas Karaisini yoran mano ída uron mi siretin ayainten mino. ³E au ma ifáe nan ma khaviyain kayon evaráné tiamenté uno. Máa ma iyante mae mai minó man baya

^{94:22} Esé 16:15; 21:2 ^{ᵀ4:23} Rom 9:7-9 ^{ᵀ4:26} Ibu 12:22; Rev 21:2, 10

^{ᵀ4:28} Esé 15:4-5; Rom 9:7 ^{ᵀ4:29} Yon 8:35

ánain ná avové ure yakhafono. ⁴Mai fara vara seyo, man baya ánain ma yakhafin mano ma Tiyarafenu avorá puntákein nanin bantaí ma inteýa mai Karaisin pinta-siretin do síkarantiya Tiyarafenu sarisarifin ída van nono.

⁵Máan tin nampo setí ankan punta-keín bí barano van ma inikheruna kéká ano Kantá Aunani ákonará mumunan ukhé mai van mi ave ukhé bá tiféuno.

⁶Mai fara vara seyo, Yisas Karaisintá ma mumunan iyá tiferuna mai anon au ma khavin má ída ma au khavin má maman paen danasí ukhen mifo Tiyarafenurá ma mumunan uren ma ena nanin banta ma ará amin manon pura yanasí ukhen mino.

⁷Tiretí ankan kama e oriyare ompo iye anó tiretí aa iyádayá pura yaná ma yakhafiyá eona me ifáe rafono. ⁸Mai ma saréa yakhafiyaona ineine mai ída Tiyarafenu finté erikhein mino. ⁹^wMáan tukhen mifo siretin aúbaná mana namu vanta váken mi sító máa yisi ano ma ainen beretifin orera einí iyan mino. ¹⁰^xBafan mano siretin evaránen avíadantiya séi ma mumunan iyararuna yanasintará mumunan onono sé inikhé uno. Mai ma siretí ineine máden asuse uren ma uman amiyain banta kéká Tiyarafenu ano yaíden uman aminten mino.

¹¹Mumunan tiyofi sífá tiváeyan noe, banta ano vá au khavino ma siyákun mai fará betí ankan téin tirirí iyan ban nafino. Téin ma sirirí iyan bain manon aní iyáken mi Yisas Karaisini ma yaa unkamádantá purein mano ma vanasi evaránen avikein baya siamiyan bano van mino. Mai avúavá anon betí ankan aran naná amé iyan mino. ¹²Au khavin

avúava san ma siretin uman amiyain mai kayo ano vetí au vasá kavino.⁸

¹³^yMumunan tiyofi sífá tiváeyan noe, Tiyarafenu anon tiretin maman kama uren mi kuse vano van anunu ukhen mifo ída vá evaráne ume avúavápin oriyaya avábá posá ben moéken ayain maran ná iya vano. ¹⁴^zMai fara vara seyo, minó man baya ano mana man bayafin manan bákan mai ano máan mi sikhen mino. “Eyan nan ma anunu iyaonaíe vá ena van anunu ono.” *Riv 19:18* ¹⁵Máan tin nampo ída ma ará amin maran into ma aruve asive ana ma inteýa mai sireti yantái namuin maran inompo yaffan ná ákona ono.

Kantá Aunani Ákonará Ma Van Baya Ino

¹⁶Máan tukhein nan mi Kantá Aunani ákonarasá auyen aunan mamare vá ume avúavái anunu ánain ída yakhafono van mi inin amiyá uno. ¹⁷^aPara vara seyo, ume avúavá bá Kantá Aunan má ano ven maman bararasí in maran iyáken maen aruve asive iyain pase mai ma varano sinona yaná ída kanaíe varan nono. ¹⁸Máan tin nampo Kantá Aunan mano ma aviren orinti mae mai ída evaráne man bayai aránaópá ban nono.

¹⁹^bTiretin ará ma mantanti ma ume avúavá ánain ma yakhafesin maen tiretí vampin ma yanasintan afoká intin ena nanin banta ano mai avúavá kasaen onanten mino. Pamúku avúavá bá pain avúavá bá namu avúavasí ono van ma ará manta avúavá bá ²⁰inká kampun ayarafenurá ma monó tin avúavá bá uvá-takhan avúavá bá namuroí in avúavá bá arankantin ma asivin avúavá bá ará namu uantan avúavá bá ena ina yana san anunuin avúavá bá eyan nan mana

§5:12 Betí avankan masá do vían karúdano. Béi aran nan uaren tikhein baya ino.

^v5:6 1Ko 7:19; Kar 6:15 ^w5:9 1Ko 5:6 ^x5:10 2Ko 11:15; Kar 1:7

^y5:13 1Pi 2:16 ^z5:14 Rom 13:9 ^a5:17 Rom 7:15-23 ^b5:19 1Ko 6:9-10

inin avúavá bá bayafó aruvúden aúban daimin avúavá bá ²¹kamaen bain banta kayo ma ará namu uantan avúavá bá ákona non naren ma óen uaren báden non avúavá bá ino. Máan avúava sinta vá ma varé in nain nanin banta ano ída uron mi Tiyarafenui yafisin pintena yanasinta varantéí mai ma fefá tiamiyá erunaí é tiamé uno.

²²Máan tukhen mifo Kantá Aunan mano ma setinti saunantá ma yafíben maen mayan aran mi imádanten mino. Ena van anunuin má amusin en kusen ban má bempáké báken ena avábá in má kamaen puntáden non avúavá bá ²³kay-one en ban má inká ei avúaváká dafisin má ino. Ída ena man baya ano mai kama avúava sinta ánain ma vákuriyain aasá iyaranten mino.

²⁴^cYisas Karaisini kékasí ma ukhein kayo ano fefái vetíi ume avúavá daa un-kamádantá aruan púken mino. ²⁵Taréa ma Kantá Aunan mano ma setimpin ma vantirá mai minó tetin tufin ma Kantá Aunan mano ma yoriyain ánain mana vá dahafó tifano. ²⁶^dTetí ankan ída vá te síví daní erá aruvín afoká ino van ena ará antarerá inká ena ará namu ó tifano.

Intéa Ayun Ná Doká Inte Fo Mai Yanái Yuyasin Nono

6^eMumuman tiyofi sífá tiváeyan noe, siretí ankan pinté ma mana ano ma umefin eraven ankamitiya mae vá ákona e ma monó tiyaona kéká ano vá bempáké oriveya ayaesin ná bei avúavá puntarano. Siretin má dere mai akhenókafin erave ankamin nampo yaffian ná ákona ono. ^{2f}Tiretí ankan afá aváen ayain maran ma inteya mai Yisas Karaisini man bayan mo kanaí inono. ³Ena ano ma umampin bantiya ma eyan inian

kákan bantaí ure ma ída ayainteya mai eyan mi mákasiya ono.

⁴Tiretí ankan intéa avúavasá barano vará inte fo mai yaíde afová ure vá barano. Mai fara vara seyo, éi ma ei yoran ma ída yaiminteya mai éi amusin manan inompo enai avúavá ída yaíde afová inono. ^{5g}Mai fara vara seyo, mana mana anon bei uman máduú inten mino.

^{6h}Tiyarafenui vaya ma afova amintin bariyan nain mai arú kékasá anona ayaen ná miyan amino.

⁷ⁱTiretí ankan ída vá Tiyarafenuin máká maáká ono. Tireti ma máan inin baranteya mai siretiyan mi kampun tiantan nono. Éi ma fafasikharé inona yanayun tákena mai yaná dunan manan unafin nono.

⁸Mana ano ma ume avúavá póké ma ve augin danayun ma fafaseiní ma iyaren maen purin manan una finten mifo Aunan ma amusin uantiyaré in-ain manon Aunan pintena ayun ma fara van aunan mi o una finten mino. ⁹Máan tukhen mifo kama avúavá ma in nan ída vá tivesara ó tifano. Mai fara vara seyo, veni yamusí ma intí kama amusin mi unafó tifanté uno. ¹⁰Máan tukhein nan mi vanasi ma kama avúavá uantan afokhan ma vantí maé minó nanin banta vá kama iyáké mumunan nanin banta moéké kama ó tifano.

Porini Kípan Baya Ino

¹¹Onano ma kákan bompon kayon te siyampóké uvaman tiretin amé uno.

¹²Banasi ano vetin kákan bí amino van mi siretí ankan au khavono van augin kuráden baya siyan ban mino. Tetí ankan nan Yisas Karaisini yaa un-kamádantái mumunan iyan mino siren betin arin nain nan mi feriyain mino.

¹³Au khavino van ma yuvun iyain kéká

ano ída fura sen minó man baya ánain dakhafiyán mifo siretí ankan duvun intiya au kharesin mairá betí kákan bí barano van mino.

¹⁴Téi ída ena yaná aví daní onté umpo Bafan Yisas Karaisi ma yaa unkamádantá púkein mai ven aví anan daní onté uno. Tenti sinunu ma ma varafin bákan ma inká ma varai anunu ma sempin baré ein mai fefái Yisas Karaisini yaa unkamádantá arukhen mino. ^{15j}Tetí ankan tu khakhe rafu áa ídá kakhe rafu mai ída kákan daná ino. Tiyarafenu ano ma setin maman auyení urá bá tiferuna mai

anan pura yaná ban mino. ¹⁶Ma ineine ma fákaren ban nain nanin banta vá Tiyarafenu ano arunan uren ná ará kusiantantín ná beni auyen nanin bantái ino. ^{**}

^{17k}Tare ráké ma oronuna mai ída vá á ékun ná ma yanasintará ena ano uman timiyan bano. Mai fara vara seyo, sen turá ma namon tifun kayo ma vain manon aníen Yisasín nina inon ten mi sen nan tikhen mino.

¹⁸Mumunan tiyofi sífá tiváeyan noe, setisi Bafan Yisas Karaisini sarisari ano vá tiretin má bano. Pura ino.

^{**}6:16 Kiriki vaya finté mai Tiyarafenui Auyen Isareri kéka san mi sikhen mino.

^j6:15 Kar 5:6; 2Ko 5:17 ^k6:17 2Ko 4:10

**PORI MA EFESASÍ NANIN
BANTA UVAMAN
AMEIN BOMPON MINO**

(Efesasi)

**Efesasi Vompon Ma Uvanteí
Pákenai Afova Vaya Ino**

**Ma vompon ma
uvantein banta ino.**

Baya varen orin banta Pori ino.

Uvarein orana ino.

AD sikisti-tu (62) fin mi Korosí nanin bantai vompon má Firimonini vompon má manafin kauran baren orein mino.

**Ma vompon ma
uvantein baru ino.**

Romú kákan barurá karavusí uran báken karavusi namun pintéi uvanten mino.

**Ma vompon ma uvaman
amikhein kéká ino.**

Efesasi ma monó nanin banta varé eimpin mifo mai vompon mano anan Esiá barafin ma varé ein monó namun kayofimpá deren eúkukhen mino.

**Nái ana vará ma
vompon uvanten nafino.**

Ena anan nanin banta finté ma monó tiyain nana ma Esiá barafin bain Yutan kayo ano ma oyan amen nan mino. Yutan kayo vá ena anan kéká bápín ma ákona kafi varé ein ma Tiyarafenu ano

Karaisin tiantan ma yoruman barákuren ma míkampin mana mumunan kaen ma inká Karaisimpin ma maman mana kékasién ma ukhein nan mi ma ma minópá uvaman amikhein bompompin tian amá ukhen mino. Ma vomponi kankan saptafin mi monó tin avúavá pákena ineine amen mi inká Tiyarafenui aruvín dana san tikhan ma minó ano anunu iyain vesi va san tian amá ukhen mino. (Sapta 6:10-18 fin ná onano.)

Porini Susu Vaya Ino

1¹Yisas Karaisini kama vaya varen orin bantaí ino van ma Tiyarafenu ano vei anunurá ma aní ukhein banta séi Pori anon ma vompon uvaré uno. Efesasi ma Tiyarafenui kantá nanin banta váken Yisas Karaisintá ma mumunan ukheona kayon uvaman amé uno.

²Teti Sifóe Tiyarafenu vá inká tetisi Bafan Yisas Karaisin má anon tiretin tarisari uren ará kusin aminten mino.

**Yisas Karaisin Táké Ma Kantasí
Ukhein Avu Varan Baya Ino**

³^mTetisi Bafan Yisas Karaisin Afóen Tiyarafenu avisá daní ó tifano. Béi anoi setin tivábá uren mi inaru fákena kama yanasinta setin timikhan mai anoi setin tú iyampon tiya iyan mino. ⁴ⁿMai fara vara seyo, Tiyarafenu ano ma vara ída uvanten pefái setin aní uren Yisasín má maman túpá ukharen mino. Para va ino. Béi setin nan anunu uren mi mai avúavá mádan baren ben avorá kantasí ukhein nanin banta ano setin nan ída aau manten mino sinten mino. ⁵^oTiyarafenu ano Yisasín pinté uaren tetí ankan e sivían be akhasí ono van inikhen mi véin kákan amusín uanten mino. ⁶Tiyarafenu ano ma setin tarisari urá ma ve Anin má túpá ukhé tiferuna vará ben aví daní ó

¹1:1 Apo 18:19-21; 19:1 ^m1:3 Efe 2:6

ⁿ1:4 Yon 15:16 ^o1:5 Yon 1:12

tifano. ⁷P^TTiyarafenu ano Yisas Karaisin pinté uaren mi setin moéken tarisari uren beni narefó ume finté setin evará-nen tivíken mino. ⁸Tiyarafenu ano vei kama ineine vá tarisari vá tetimpin bannaen mino. ⁹Q^PPefá ma Tiyarafenu ano ma Yisas Karaisintái ma yaná baranté uno siren ma inian kain ma aúpá bá ein mai saréan bariyáken mi setimpin tian amá iyan mino. ¹⁰r^MMai veni ineine máan mi ukhen mino. Be ma aní ukhein damú ma afoká intin maen minó ma vara ráke yanasinta vá inaruráke yanasinta vá o éke e éke uan manafin átaru urantín maen Yisas Karaisini yafisin aránaópá anan banten mino.

¹¹s^YYisas Karaisin má ma súpá ukhé tiferuna van mi Tiyarafenu ano setin nan bei vanasi ino sen aní ukhen mino. Máan tukhantíi Tiyarafenu ano ma fefá iyátintákaré ein danasinta vará tifanté uno. ¹²Tiyarafenu ano ma máan tein mai seti Yutan nanin banta ano ma Yisas Karaisimpin naren ma ákona inin ma ave ukhé tiferuna kéká ano Tiyarafenu aví daní iyan kákan bí amino van mino. ¹³Tireti ena anan nanin banta ano Yisasini fura vaya vá kama vaya vá inire mumunan e ono. Máan ma eona anon tiretin aya uran mi Tiyarafenu ano seti Yutan kayo ma einfen tiretin avían Yisasin má túpá en mino. Máan turen mi vei vanasi ma ameno van iyáantan baré ein Kantá Aunan ma siretin amein manon beni vanasi ino sen aní ukhen mino. ¹⁴t^TTeti ankan ma Tiyarafenu ano iyátintan bain danasinta ma ínaimpá baranunai fura sen Kantá Aunampó tetimpin aní ukhen mino. Mai vará tetí ankan kakhakein Tiyarafenu aví daní ó tifano.

Efesasi Nanin Banta Ayaino Van Ma Pori Amúkein Baya Ino

¹⁵Bafan Yisasintá ma ákona e mumunan iyáke monó nanin banta ma minó pimpá ma vain ma avábá iyaona vaya vá iné uno. ¹⁶Mai van mi séi Tiyarafenu vaípa ena ena susu siantiyáké ákona é timúkuantiyá uno. ¹⁷u^MMáan tiyá inká tetisi Bafan Yisas Karaisin Afóe ma moéken kakhakhein Tiyarafenu vaípa tiretíi mumunampin kama afova amintín Tiyarafenurá ma mumunan in avúavá kama e afová ono van timúkuantiyá uno. ¹⁸Máan tiyá inká tiretíi inin ona yiantantiya kama yanasinta ma ameno van dan bain afová ureya mai yanasinta varanté uno sire mairá ákona kaono van mai van deren timúkiyá uno. Mai fara vara seyo, kokhon danasinta ma vei vanasi iyáantan baréin ma amikhein afová ono van muno. ¹⁹⁻²⁰vw^MMáan tukháí mai ma minó daná esantaren dan uron bain ákona vaintá ma mumunan iyá tiferuna kéká ano afová ó tifano van mi simúkiyá uno. Mai ákona maen mai ma Yisas Karaisi ma furin pintena evaránen avían mantaren kákan bí amiren ma ve ayan kurompá ma yan inarufá bain má manaf ukhein ákona ino. ²¹x^MMáan tukhein nan mi Yisas Karaisi anon namu aunan kayo ma moékan ákona vain kayorá dafíken mino. Máan tukhan mi ven aví bá ákona vá anon ánon banta kayo aví bá ákona vá esantakhen mino. Máan tukhein béi ída saréa ana yafisinten mifo ínaimpá deren dafisinten mino. ²²y^TTiyarafenu ano minó danáká ma yafisin ákona Yisas Karaisin amikhen mino. Mai monó nanin banta ano mai fintena ayain barano van

P¹:7 Efe 2:7; Kor 1:14 Q¹:9 Rom 16:25 r¹:10 Kor 1:16, 20

s¹:11 Rom 8:28-29 t¹:14 2Ko 1:22 u¹:17 Kor 1:9

v¹:19-20 Kor 1:11; Íbo 110:1; 2Ko 13:4; Kor 2:12

w¹:19-20 Íbo 110:1; 2Ko 13:4; Kor 2:12 x¹:21 Kor 1:16; 2:10 y¹:22 Íbo 8:6

mi mai ákona amikhen mino. ^{23z}Monó nanin banta ma vain mai Yisasin aun ban mino. Máan tukhan mi minó akhempá ma vain danasintafin béi kanai suron ukhen mino.

**Tiyarafenu Ano Ma Furin Pintena
Yisas Karaisi Má Ma Evaránen
Tivían Mantein Baya Ino**

2^aYisas Karaisintá ma fefá ída mumunan ukheya mae Tiyarafenu oo átakharé ureya namu avúavá bariyáke fasen purin nanin banta an mi yakhare ono. ^{2b}Máan ma iyaona anon afokhampin ma namu aunani ánon banta kayo ano ma Ban Anoni oo yaiyení iya va ono. Tiyarafenu oo ma átakharé iyain nanin banta aúpin mai namu aunan manon dafíken doriyan mino. ^{3c}Máan tiyan mifo Yisas Karaisintá ma fefá ída mumunan ukhé tifé maé teti minó ano yeren mai avúavá bariyaré tiféuno. Tetí ankan dere ume avúavá pinté e afoká ukhá é tifékun Tiyarafenui aran naná ano ma minó ena anan nanin bantafin ma erikhá ein mano setimpin má deren erikharen mino.

^{4d}Máan tinten mifo mai ma arunaná bíkakhein Tiyarafenu ano setin nan moékantá anunu uren ⁵tetí ankan ma véin oo átakharé eruna anoi furin nanin banta an dakhá é tifékun mi Yisas Karaisin ma avían mantein manon tetin auyen aunan timen mino. Mai Tiyarafenu anon bei sarisarifó tetin tiya uren evaránen tivíken mino. ^{6e}Tiyarafenu ma furin pintena Yisas Karaisin má orun tivían mantaren maen inarufá ma vain danasintará dafisin nono sen iyátintáken mino. ⁷Yisas Karaisin pintéi uaren Tiyarafenu ano

setin tarisari ukhein taréa fi ínaimpa safi mai minó nanin banta anon mai ma minó daná esantakhein danasinta ma aní ukhein onanten mino.

⁸Mai fara vara seyo, Yisasintá ma mumunan eona anarái Tiyarafenu ano vei sarisari fóké tiretin aya uren evaránen avíken mino. Mai sireti ma kama avúavá bariyaona vara máan ten naifo Tiyarafenu ano vei anunurái faran aya uren evaránen avíken mino. ^{9f}Tiretí ankan ma kama avúavá manteona vara Tiyarafenu ano aya uren evaránen avíken naifo mana ano ída vá be amo sino. ^{10g}Mai fara vara seyo, Tiyarafenu ano Yisas Karaisin pinté uaren mi setin kama uren uvamáda bá tiféuno. Mai vará téti nan ma kama avúavá barano van ma fefá iniádan baré ein ná bará tifano.

**Yisas Karaisin Má Ma Mana
Vukhafái In Baya Ino**

¹¹Tiretí ankan ída Yutan kayo ompo ena anan bantafin mi afoká ukha ompo afovasá ono. Máan tukhein nan mi Yutan kayo ano siretin nan ída au kakhein kayo ino siren betí ma yan bukhafa máará kakhein nan mi au khákan iyan mifo aúpin ída funtáken mino. ^{12h}Máan tukhen mifo maí damú tiretí ankan ída Yisasini ádé bare ompo ovare vá me ineno. Isareri nanin banta van ma Tiyarafenu ano vei vanasi e sen avíkeimpin tiretin má maifin ída váke Tiyarafenu ano ma vetin iyáantákeimpin ída siretin nina van mino. Mai fara va ino. Tiretí ankan ma ma varafin báke ompo Tiyarafenu ída afová eya inká beni kama yanasinta van ída ákona e ave ukhare ono. ¹³ⁱMáan tukha ompo Yisasi ma siretin nan e furen ma vei nare vanaein

¹1:23 Rom 12:5; Efe 4:10, 15; Kor 1:18

²3:3 ³2:3 Kor 3:6 ⁴2:4 Rom 6:11-13

¹1:9 ²2:10 Tai 2:14

²2:12 Rom 9:4; Kor 1:21 ¹2:13 Kor 1:20

²2:1 Kor 1:21; 2:13 ²2:2 Kor 3:7; Tai

²2:6 Kor 2:12 ¹2:9 1Ko 1:29-31; 2Ti

¹2:13 Kor 1:20

manon tiretin e avían beni ádé kaen mino.

¹⁴^jMai fara vara seyo Yisas Karaisi anon tetí Yutan kayo vá inká tireti ena anan kéká bá ma ará kusen manafin ban avúavá timen mino. Mai ma erasampin ma ven ará namu uantan maran iyákun ma mai ano erasan aúbaná ma kákan on kakhá ein mi yo máden mai on evaránen antíkaren erasan maman manafinén mino. ¹⁵^kYutan kayoi man bayafin kokhon bayan baré íkan mi Yisasini furin manon mai vaya kayo yo maman karúdaren Yutan kayo vá ena anan kéká bá e avían beyantá túpá uren mi maman mana auyen ananén mino. Míkanan ma ará kusen manafin ban avúavá ameno van mi véi máan ten mino. ¹⁶^lBéi ma yaa unkamádantá purein manon míkanan anan maman manafiní uran mi vékanan Tiyarafenu vá aronaíen mino. Mai van mi míkan mano ída evaránen ben ará namu uantan maran inten mino. ¹⁷^mYisas Karaisi ano ma ma varafin eriven tireti ena anan kéká ma Tiyarafenui ádé ída váke nentá ma vaona vá inká tetí Yutan kayo ma Tiyarafenu ádé bá tiferuna vá ano ma kusen bani kama vayan tisimen mino. ¹⁸Mai fara vara seyo, Yisasin pintéi uaré teti Yutan kayo vá tireti ena anan kéká bá ano kasaé Tiyarafenu avorá ódó tífantékun mai ma varé tiferuna Kantá Aunan manon mai aa aní inten mino.

Tiyarafenui Kantá Namuni Vaya Ino

¹⁹ⁿMáan tukhayan tiretí ena anan kayo ano saréa ída soya nanin banta ma vaonaí ukha ompo siretin má deren Tiyarafenui vanasi vákeya veni kékasí ukha ono. ²⁰^oMáan tukháí setí ankan

Yisasin amái vákun mi inká beni kama vaya ma varen orin banta kayo vá sakhanampa vanta kéká bá anon namádaní ukhan inká Yisas Karaisi anon beyantá mai namuni Bafaní ukhen mino. ²¹^pMai setí ankan ma mumunan iyá tiferuna anoi maman manafiní uvéi Bafani kantasí ukhein monó namun ma uvariyá tiféuno. ²²^qMáan tukhayan tireti ena anan kéká bá ano yere Yisasimpin o asótú uven nan mi siretin ma maman Tiyarafenui Kantá Aunan ma van namuní iya ono.

Pori Ena Anan Kayofin Monó Tiamin Banta Ino

3 ^rTiretí ena anan nanin banta aya ono van mi séi Pori ano Yisas Karaisini karavusifin bá uno. ²^sBákun mi siretí ankan ena anan nanin banta ma siamíden tarisari ino van ma Tiyarafenu ano ma simikhein doran inka afová ukha rono. ³^tMai sarisari ma aúpá baréin ma Tiyarafenu ano séin aní ódaré maé ma fefá afova vompon tiretin uvaman amikharé erunan taréa afoká en mino. ⁴Máan tukhein mi mai ma uvaman amikharé eruna vompon ma yankafinteyan Yisasi ma yoriyaré éi pákena ma afová ukheruna mai afová inono. ⁵Pefá Tiyarafenu ano mai aúpá ineine ída vanasifin anín ontaren mifo saréan Kantá Aunan tákéi sakhanampa vanta kayo vá inká baya ma varen orin banta kéká bápín mi afokáin onen mino.

⁶^uMáan tukhan Tiyarafenui aúpá ineine máan mi ukhen mino. Tireti ena anan nanin banta ano ma mumunan iyaona kéká bá inká Yutan kayo ano ma mumunan ukhein kayo vá ano maman manaí uveyan Yisasin má túpá eonai

^j2:14 1Ko 12:13 ^k2:15 Kor 2:14 ^l2:16 Sek 9:10; Kor 1:20, 22

^m2:17 Ais 57:19 ⁿ2:19 Efe 3:6 ^o2:20 1Ko 3:11 ^p2:21 1Ko 3:16

^q2:22 1Pi 2:5 ^r3:1 Fir 1:7, 13 ^s3:2 Kor 1:25 ^t3:3 Efe 1:9-10; Kor 1:26

^u3:6 Efe 2:13, 16-19

véin pinté uarei Yutan kayo ma iyáantan baré ein danasinta yaídeya varan nono. ⁷vTiyarafenu ano séin tarisari uren kama usintáden ákona simikhái veni yoran bantaí ukhé beni kama vaya ma siamin dorarí iyá uno.

⁸wTiyarafenui kama nanin banta an téi ída yakhékun mi Tiyarafenu ano séin tarisari uren mi Yisasín ída kanaíen dosiren kama yanasinta setin timikheí pákena van ma ena anan nanin banta siamin doran téin timikhen mino. ⁹Máan tukhan mi minó daná ma uvantein Tiyarafenu ano séin nan bei aúpá ineine ma esé aráí in tá baré ein maman dáko ino van mi séin aní uren tiviken mino. ¹⁰Máan tukhan mi véi ma ena anan má Yutan kayo vá ma maman manafín inain manon bei kama ineine vá afova vá ma ayompin bákan ma ákona ví bá ma vain aunan kayofin afoká inten mino. ¹¹Pefá ma vara ma ída uvanten maen béi Bafan Yisas Karaisin pinté uaren mai yaná barano van mi iniádákaren baren mino.

¹²xTetí ankan ma véintá mumunan é tiferuna anon béimpin o asótú uvé tifékun mi mai anon Tiyarafenu vaípá ma orin ona yirá tiféi véin avorá ída feranton oriyá tiféuno. ¹³Máan tukháí séi ma kama vaya siamiyarunará ma uman timiyain nan tiretí ena anan nanin banta ano ída anomé iniyáke amusin mana ono van mi ákona é tiamiyá uno.

Pori Ma Efesasi Kéká Ákona Uantano Van Amúkein Baya Ino

¹⁴Mai anarái séi siron kanan durafúde tiretin nan te Sifóe vaípá timúkiyá uno. ¹⁵Mai fara vara seyo, ma vara ráke yanasinta vá inká inaruráke yanasintará ma ánoní ukhein benafo veyáká anan ban mino. ¹⁶Máan tukhan béimpin

moéken avábá bakái veni Kantá Aunan mano siretin ákona amino van mi séi simúkiyá uno. ¹⁷yInká Yisas Karaisintá ma mumunan esin maen tiretimpin béi vanten mino. Máan tuvinti Tiyarafenui kama varafin ma amun dan aravuvin mantan ákona einí ono van mi simúkiyá uno. ¹⁸Tiretí ankan má minó Tiyarafenui mumunan nanin banta vá ano Yisas Karaisini ída kípán avábá ma kákaní in inká ayasí in dan ódin ma námen aravin ukhein ma afová in ákona varano van mi simúkiyá uno. ¹⁹Yisas Karaisini avábá maen moéken kákan mi vantiya ída kanaíeya minó afová in-ompo mai finté manáa kokhon afová ono van muno. Máan tesin maen Tiyarafenui aunan má ákona vá ano siretimpin bíkakhen bano van mi simúkiyá uno.

²⁰Tiyarafenui ákona ano ma setimpin doriyá ma setí ankan ina ono van ma iniyá tiferuna yanasintai ákona ano moéken esantakhen mino. ²¹Máan tukhein nará minó mumunan nanin banta ano Yisas Karaisin táké uaren ná ena ena yamú Tiyarafenui kákan bí amen oriyan ná bano. Pura ino.

Yisas Karaisi Má Ma Mana Vukhafaí in Baya Ino

4^zTiyarafenu anon tiretin arakhen mifo mai van inian kákaní ono van mi Bafani yorarí ma iyarunará ma fákaan karavusií ukhein banta anon tiretin duvun iyá uno. ²aEna ena yamú kuse váke vá bempákesá nono. Tiretí avábá posá beni uman ayain maran ná ono. ³bTiretí ákona ure vá Kantá Aunan má o súpá uveya ará kusen ban avúaváposá tiretiyan damono. ⁴Para vara seyo, mana vukhafa vá mana Aunan máí vákan inká ínaimpáke yanáká ma ákona inin kauren ma avein mai

manan bakan mi siretin arakhen mino. ⁵⁻⁶^cMana Bafan má mana mumunan má mana non baran má inká tetin Tifóe mana Tiyarafenu vá anan ban mi minó tetimpin doriyáken minó esantakhen mino.

⁷^dMáan tukhen pasen mi Yisas Karaisin pinté uaren minó nanin banta avábá uren mana mana amusin daná amirú amirú ukhen mino. ⁸Máan tukhein nan mi Tiyarafenui vompon dóki ano máa sikhen mino.

“Béi ma inarufá ódiyáken maen bei vanasi ma karavusií ukhá ein iyanen ben oyampá oriyán maen mana yaná amusin amirú en mino.

Íbo 68:18

⁹^eMai ma véi yan ódé uno ma sein bayai ana máan mi ukhen mino. Ma ma seti varuna varafin béi veyan mamán bararasí uren erakharen mi evará-nen ódikhen mino. ¹⁰Mai ma veyan mamán bararasí uren erakhá ein mano anan minó danápin béini yafisin mano víkano van ayompin ma vain danasinta esantaren dan uron ódikhen mino. ¹¹^fBéi anon monó nanin banta amusin amen mi manáa avían aposeriíen inká manáa avían sakhanampa vantaíen inká manáa avían monó nanin bantará dafisiníen mi inká manáa avían monó baya ma siamin bantaíen mi inká manáa avían monó afova ma amin bantaí urú en mi ukhen mino. ¹²Máan tukhan mi vetíi yoran ma vain mai Tiyarafenui vanasi ayaintin beni yoran doriyáken monó nanin banta ano ma Karaisin au vukhafái ma ukhein mai ákonaen báken kamaen bano van mino. ¹³^gMáan té oriyá tifé ma setisi mumunan má afova vá ma o éke e éke uan Tiyarafenu Anintá kauré ma sirá manafiní uré tifé ma Bafan oman tapé tiyá inká monó tin avúavápin ma mantaan

ákona uvé maé Yisas Karaisi ma kama avúava sinta ma varyiá einí ó tifanté uno.

¹⁴Máan tuvé maé ída evaráné arará iyampon kayo an davé kampun banta kékái vava van puran tiyan mantino siré e mumunan uan more mere ó tifanté uno. Mai fara vara seyo, manáa kékái ano kampun baya fóké dákói fura vava ma seiní iyáken tetin máka siyan mino. ¹⁵^hMáka sinten mifo seti monó nanin banta ano vá tetisi ánon ma Yisas Karaisi váká ma ven au an ma yakhé tifer-una kékái ano vá beni avúavá moéké bariyákesá pura vava vá avábá basá pákaan ákona ó tifano. ¹⁶Máan tukhé tifékun mi véi anon minó bukhafa mamán manará asótú uran kamaen báken bei yorarí urú iyáken mi ena vukhafa aya íkan inoriyan mairái minó bukhafa ano kama ukhen avábápin inoriyan mino.

Kakhan Avúaváká Ma Vain Iyamporinta An Ma Yakhen Ban Baya Ino

¹⁷ⁱMáan tukhein nan mi Bafani ákonará tiretin ma vava siamiyá uno. Monó ma ída inin nanin bantai avúaváká ída vá nono. Mai fara vara seyo, vetíi inin asuse uron mi ukhen mino. ¹⁸Betíi inin maen títipa an mi yakhan pasen Tiyarafenui avúavápin nenta suron mi van mino. Mai fara va ino. Betíi inin mano nenta suron bakan aú ano ákona ukhen mino. ¹⁹Máan tukhan pasen betíi ineine finte kama inin orivin maen moéken namu avúavápin oferan namu ineine kayo anan bíkakkan pasen kasaen ara ara avúavasí é iyan mino.

²⁰Máan té iyan mifo siretí ankan mai aa sákesa Yisas Karaisin afová ukhe va ono. Ída ino. ²¹Yisasin pinten mai fura

^c4:5-6 1Ko 12:6 ^d4:7 Rom 12:3, 6 ^e4:9 Yon 3:13 ^f4:11 1Ko 12:28
^g4:13 Kor 1:28 ^h4:15 Kor 1:18; 2:19 ⁱ4:17 Rom 1:21; 1Pi 1:14

vaya inirei véin afová eono. ²²jPefá tiretí ankan má deren mai ma kampun tin avúavá bá inká ará mantan ma namu avúavá barampin má bare ompo saréa mai avúavasá oyan ameno. Mai fara vara seyo, mai avúavá anon kampun tireya vanasii ineine máde asuse uantiyare ono. ²³kMáan ma iyá eona vará monó avúavápin tiretíi ineine vasá mamanan auyení ono. ²⁴lTiretí ankan auyen nanin bantaí ukha ompo auyen avúava sá aní ono. Mai fara vara seyo, Tiyarafenu ano mamanan beyan an mi yara vaompo funtákein nanin bantaí ukheya kantasí ukhe fura yaná ana vá barano.

²⁵mMai vará kampun tin avúavá ifa ureya vá pura sikhein baya ana vá ben tiamin maran ono. Mai fara vara seyo, setí mana vukhafa finte nan bá tiféuno. ²⁶nrTiretí ankan umeí inampo ída vá áesin arankan avúavá ano siretintá dafisino. *Íbo 4:4*

Ída vá aran nan iya vasin ná áau eraven orun perano. ²⁷Mai fara vara seyo, aran nan ma in avúavá anon Ban Anoni ona yiantan nono.

²⁸Umoyan ma iyá inona kéká ano mai avúavá ifá ure vá tiretí ayampó pura se kama yorarí ureya kokhon daná máde vá o ma afasí ukhein nanin banta siretí aúkake sá aya ono. ²⁹oTiretí ankan oorá dáfíke ída vá namu vaya kayo seno. Ena nanin banta ma aya oren baya kayo ana siyasin ná mai vaya ma inin nain kayo aya ino.

³⁰pTiyarafenu ano siretin evaránen miyaní uren maen bei Kantá Aunampó tiretin aníen be ina e sikhen mifo ída vá tiretíi avúavá ano Kantá Aunan arunaná amino.

³¹qMáan tinona van mi ena asiren ma ará namu uantan avúavá bá aranan in má baé naé tin má oyampá baya sin má inká namu avúava sinta vá ampeno van tiyá uno. ³²rAmpire vá tiretí ankan ben kama uren ará amin maran iyákeya vá Tiyarafenu ano ma Yisas Karaisin pinté uaren ma siretíi ume ampianteiní eya vá enai ume ampiantano.

Kakhakheintá Ma Van Baya Ino

5^sTiretí ankan ma minó danasí inte mae mai Tiyarafenui avúavá ánain ná bákurono. Mai fara vara seyo, siretí béin akhafanan ban nan tiretí nan anunu ukhen mino. ²tYisas Karaisi ma siretin nan anunu uren ma vei aufó ákonte uran Tiyarafenu avorá aunka uveri an dákan ma amusin uaren tiretíi ume ampianteiní e vá ena ma anunuin avúavá áesin ná tiretimpin bíkakhanti vá bano.

³Máan tukhanti ída vá pamúku avúava safi ena ina yaná ma aranan nafi ena namu avúava sinta fi vá barano. Mai fara vara seyo, Tiyarafenui vanasifin máan avúavá ma variyain kayoi afokhan ída van mino. ⁴Tiretí ankan Tiyarafenu vá tusu siantan nampo ída vá namu vaya fi aniana vaya fi inká namu vaya fo safi vá taró teno. ⁵uPara vara seyo, siretí ankan afovasá ono. Pamúku avúava safi inká ída funtákein avúava sinta fi ena ina yaná ma aran nan nafi ma variyain mai kampun ayarafenu kayoi monó tiantiyain pasen máan nanin banta ano ída kanaíen Yisas Karaisin má Tiyarafenu vái yafisimpin orinten mino. ⁶vKampun banta kayoi vaya

j4:22 Rom 8:13; Kor 3:9 k4:23 Rom 12:2 l4:24 Esé 1:26; Kor 3:10

m4:25 Sek 8:16; Kor 3:8-9 n4:26 Yem 1:19-20 o4:29 Kor 4:6

p4:30 Ais 63:10; Efe 1:13-14; 1Te 5:19 q4:31 Kor 3:8

r4:32 Mat 6:14; 18:22-35; Kor 3:12-13 s5:1 Mat 5:48

t5:2 Eks 29:18; Ibu 10:10 u5:5 1Ko 6:9-10; Kor 3:5 v5:6 Rom 1:18; Kor 2:4, 8

inire vákurin nampo yafían ná ákona oro. Mai fara vara seyo, namu avúavá ma variyá inain nanin banta amanináí Tiyarafenui aran naná afoká inten mino. ⁷Máan tukhantí mai ma vanasí ano ma namu avúavá baran naimpin ída vá o fébe varano.

⁸^wMai fara vara seyo, fefá títípaflin baré en nan mi saréa Bafan mano avían kakhantá kauken mifo kakhán avúavá kasá bano. ⁹Mai fara vara seyo, mai khakhan ma siretimpin bain manon kama avúavá bá puntákein avúavá bá inká pura sin avúavá báí maman dáko é iyan mino.

¹⁰Máan tukhein nará Bafan mano ma amusín oren ukhein avúavasá dosireya afová oro. ¹¹Namu avúavá ma variyain nanin banta vá ída vá avunté ono. Mai avúava sinta ano ída kama aran imádé iyan mino. Máan tukhein nará mai avúava sinta vará antan nono. ¹²Mai fara vara seyo, ume nanin banta ano ma aúpáké bariyain avúavá ma yáko tian amáin nan tiyave inten mino. ¹³^xMáan tiyan mifo oon mano ma vetimpin panu sin maen namu avúava sinta maman afoká é iyan mino. ¹⁴^yPara vara seyo oon mano ma kamaen panu sin maen minó daná maman dáko é iyan mino. Mai van mi máa sikhen mino.

“Aun ma vakheona kéka soe, mantano. Púkanona finté orun mantésin ná Yisas Karaisi ano kakhaantano.”

Kantá Aunani Ákonará Ma Van Baya Ino

¹⁵^zMáan turanti siretí ma vanonafin dafían ná ákona ukhe vano. Kama ineine ma vákan bain nanin banta an ná dakheya ída vá aniana ma ukhein nanin

banta an dano. ¹⁶Taréa namu yamúí va ompo yafían ákona ukheya ena ena kama avúavá ana vá barano. ¹⁷Mai van ída vá aniana iya váke Bafan mano intéa yanasá barano van anunu ukhen nafi mai yanasá afová ono. ¹⁸^aMai namu avúavá ano siretíí van máden asuse inten mifo ída vá óen non nare óen iya vano. Áesin ná Kantá Aunan mano vá tiretimpin bíkakhantí vá bano. ¹⁹^bBanti vá Í Bompon pintena í bá ena í kayo vá inká Kantá Aunan mano ma inimpin báuantan nain í kayo vá ben tiamin maran iya vá tiretíí aúkáké Bafantá í dano. ²⁰^cMáan tiya mae minó danasinta vará tetisi Bafan Yisas Karaisin avikasá ena ena yamúí tiretin Afóe Tiyarafenuin ná tusu siantano.

Ábasu Ano Ma Kamaen Ban Avúavá Baya Ino

²¹^dTiretí ankan Karaisin aránaópá báke vá ena nanin banta vá oo yayiin maran ná ono. ²²^eBafani aránaópá ma vaonái eya siretí anasi kayo ano siretí avafuná aránaópasá bano. ²³^fMai fara vara seyo, Yisas Karaisi ma monó nanin banta ánon báken ma ve au fóké aya uren ma evaránen avíkeinén mi vanta anon be anái ánon ban mino. ²⁴Monó nanin banta ano ma Yisas Karaisini aránaópá bainí eya vá tiretí anasi kayo ano vá avafunái aránaópasá bano.

²⁵^gInká avafuná ano vá Yisas Karaisi ma monó nanin banta van ma anunu uren aya ono van ma vei aunan ampikheiníe vá tiretí anáona vará anunu ono. ²⁶^hBanasi maman kantasí ono van mi Yisas Karaisi anon non má Tiyarafenui vayafó báí vei vanasi sesé uran mi ven avorá kamaen kantasí ukhen

^w5:8 Yon 12:36; Efe 2:13; Kor 1:13; 1Pi 2:9 ^x5:13 Yon 3:20-21

^y5:14 Ais 26:19; Rom 13:11 ^z5:15 Kor 4:5 ^a5:18 Ruk 21:34

^b5:19 Kor 3:16 ^c5:20 Kor 3:17 ^d5:21 1Pi 5:5 ^e5:22 Kor 3:18; 1Pi 3:1

^f5:23 1Ko 11:3; Efe 1:22 ^g5:25 Kor 3:19; 1Pi 3:7 ^h5:26 Tai 3:5

mino. ²⁷iBéi ma máan tein mai ve avorá maman avusese en kama urantin pain nafi sonton nafi ída vantín bei vanasi ano ída aau vantín kantasí ana ukhen bano van mino. ²⁸Máan mana en ná avafuná ano ma vetíí au van ma anunu iyainfen ná betíí anáona vará anunu ino. Mai fara vara seyo, avafu ano ma ve ana san ma anunu inten mai fura sen beyan nan mi anunu iyan mino. ²⁹Yisas Karaisi ma ve au an dakhnan ma monó nanin banta van anunu iyainfen mana vanta ano ída vei au van oman kaumpan é iyan mifo kama uren mi yafisé iyan mino. ³⁰Máan tukháí setí ankan Yisas Karaisini au vukhafan bá tiféuno.

³¹jTiyarafenui vompon dóki ano máa sikhen mino. “Mai van mi vanta ano ve anóe afóen me ampiren be aná bá o súpá en mana vukhafái é iyan mino.” *Esé 2:24* ³²kMai vava anon moéken kákani suron ukhen mifo Yisas Karaisi ma monó nanin banta vá maman mana vukhafái ukheí pákena vayan tiádan ban mino. ³³Máan tukhein nan mi siretin evaráné tiamé uno. Mana mana vanta ano ma eyan nan ma anunu iyaonaí eya vá e aná anunu ono. Inká anasi ano vá be avafuni aránaópá báke ná ben oo yaiyino.

Anóe Afóen Má Iyamporinta Vái Vaya Ino

6 ¹Iyamporinta oe, Bafan mái súpá ukha ompo anóe afóni oo vá daiyono. Mai fara vara seyo, máan ma inteya mai kamaen puntákein avúavá baran nono. ²Tiyarafenui siyan mikan man baya kayo finte ma esé iyántan ma vain man baya ano máan mi sikhen mino. “Tiretí anóe afóeni aránaópasá bákeya vetin oo vá daiyono.” ³Mai ma iyántan baya ano máan mi sikhen mino. “Tiretí

anóe afóen aránaópá báke ma vetin oo yaiyinte mai kama e ma varará ayáká ban nono.” *Diu 5:16*

⁴mInká tiretí afóe yan noe, ída vá iyampon kayo ma aran amin avúavá bariyákeya vetin kama uantádeya vá Bafani kama avúava sinta vá afova ameno.

Miyan Ída Van Doran Banta Kayo Vá Ayafa Kéká Báí Vaya Ino

⁵nMiyan ída van doran nanin banta oe, Yisas Karaisini oo yaiyono van ma iyaonaí eyá tiretíí ayafa aránaópá bákeya vetin ma sin nain dorarisá ono. ⁶Tiretíí ayafa kayo ano ma siretin áde ban nain damú ana ída vá betin amusin ameno van ákona yoraráí ono. Ída ino. Yisas Karaisini miyan ída van doran nanin banta ma vanteya aúkáke sá Tiyarafenui anunu vákuro. ⁷Bafan mano amusin ino van muno sire vá amusin iyákeya aúkáke sá minó doran dorano. ⁸oMáan tukhein nan mi miyan ída van doran nanin banta fu inká miyan ban doran banta fu mai ovaresá me iné tifano. Tetí ma kama yoraráí ukhá onunarái siyan Bafan mano miyan timirú inten mino.

⁹pInká tireti ayafa vanta kayo oe, siretíí miyan ída van doran nanin banta kayo ída vá akhokho amiyákeya vetin kama uresin ná bano. Ovare vá me ineno. Betí má tiretíí mái Kákan mai inarufái váken béi ída mana van mana anunu é iyan mino.

Tiyarafenui Aruvin Danasinta Fákena Vaya Ino

¹⁰Tesi kípan baya ino. Bafani kákan ákona vasá mantaan ákona ono. ¹¹qTiyarafenui minó aruvin buí daná

^{15:27} 2Ko 11:2; Kor 1:22 ^{15:31} Mat 19:5 ^{15:32} Rev 19:7 ^{16:1} Kor 3:20

^{m6:4} Íbo 78:4; Pro 22:6; Kor 3:21 ^{n6:5} Kor 3:22-23; Tai 2:9-10; 1Pi 2:18 ^{o6:8} 2Ko 5:10; Kor 3:24-25 ^{p6:9} Rom 2:11; Kor 4:1 ^{q6:11} Rom 13:12; 2Ko 10:4

ma ureyan kasae mantaan ákona uve mae Ban Anoni máka simpin esantan nono. ¹²rMai fara vara seyo, varará nanin banta vá ída siruviyá tifé umpo namu aunani ánon banta kayo vá ma varará ma yafíkein namu aunan kayo vá inká títipa avúavá bá ayompin ma namu avúavá bariyain aunan kayo vái siruviyá tiféuno.

¹³Máan tukhein nan Tiyarafenui minó aruvin buí daná urákareya namu yamú ma erintiya kasae mantakhare vá inká aruvin ma kípavinti yere mantaan ákona ukhe vano. ¹⁴sMantaan ma ákona ono ma sinteya fura veya ana ma simpo sá amú ananí eya vá Tiyarafenui funtákein avúavápó kápa ona ma uan ákorá iyareinisá ono. ¹⁵tInká Tiyarafenui kama veya finté ma eriyain kusin baya fosá arantan anamun an dareya fura se útare vá bano. ¹⁶Mai aruvin danasinta ma variyákeya inká mumunan ná pákaan ákona uresin ná mai ano sanko an davintin ná Ban Anoni ira khiyain uve kayo ano e khútino. ¹⁷uMáan tiyantiya vá inká Tiyarafenu ma siretin evaránen avíkein inin mano vá kápa kamamó ma einí uvintiya vá inká Tiyarafenui veya fosá maman Kantá Aunani vaenatíí ure vá pákaan ákona ono. ¹⁸vKantá Aunani ákona rasá ena ena yamú amúkiyáke vá

ákona e Tiyarafenu tiamesin ná tiretin aya ino. Ena ena yamusá minó akhempá ma vain monó nanin banta van iniya vá amúkuantano.

¹⁹wMáan tiyákeya Tiyarafenui kama veya ma vain mai ena anan nanin banta ina vá dere ifo vá amúkusintiya sirá beni aúpá ineine ída feran kamaesá tian amá uan ameno. ²⁰xMai fara vara seyo, séi Tiyarafenui oo vantan bákéi mai veya ma siyaruna anarái siyan tirantantá seni anan kukhen mifo amúkusintiya sirá ída feranton kasaé beni veya sian amá ono.

Pori Ma Kípiyan Amusin Baya Sein Mino.

²¹yTikikasi maen téin tinunu ukhein tifá tiváen báken tiyaen Bafani ákona yorarí iyain bantin téi ma variyaruna fáké baya sian amá intiya inin nono. ²²Mai van mi siretin ákona uantan baya siamiyáken inká teti ma varuna fáke yere siamino van mi véin tiantékun tireti vaonafá orinten mino.

²³Mumunan tiyofi sífá tiváeyan noe, seti Sífoe Tiyarafenu vá Bafan Yisas Karaisin má anon tiretin nan anunu uren ará kusiantáden mumunan ákona uantanten mino. ²⁴Mai ma setisi Bafan Yisas Karaisin nan ma aúkáké anunu iyain kayofin ná Tiyarafenui sarisari ano vano.

^r6:12 1Pi 5:8-9 ^s6:14 Ais 11:5; 59:17; 1Te 5:8 ^t6:15 Rom 10:15 ^u6:17 Ibu 4:12
^v6:18 Ruk 18:1; Kor 4:2; 1Te 5:17 ^w6:19 Kor 4:3-4; 2Te 3:1
^x6:20 2Ko 5:20; Frm 9 ^y6:21 Apo 20:4; Kor 4:7-8; 2Ti 4:12

**PORI MA FIRIPAÍ NANIN
BANTA UVAMAN
AMEIN BOMPON MINO**

(Firipai)

**Firipai Vompon Ma Uvanteí
Pákenai Afova Vaya Ino**

**Ma vompon ma
uvantein banta ino.**

Baya varen orin banta Pori ino.

Uvarein orana ino.

AD sikisti-uvani (61) ráké sikisti-tari (63) fin mi ma vompon uvanten minon ten kokhon afova vanta kayo ano inikhen mino. Mai maen Korosí nanin bantai vompon má Firimonini vompon masá uvanten nafi áa ída fi sen iniyano mino.

**Ma vompon ma
uvantein baru ino.**

Romú barurá karavusií uran báken karavusi namun pintéi uvanten mino.

**Ma vompon ma uvaman
amikhein kéká ino.**

Pori ma kan dádasí en ma monó dorarién eúkiyain pimpá ma Firipai nanin banta o avían monópin kauká ein kékái amikhen mino. (Aposeri 16:12-40 fin ná onano.)

**Nái ana vará ma
vompon uvanten nafino.**

Firipai nanin banta maen baya inin kéká báken inká ena kéká ará amin

kayo vákan pasen Pori vetin nan moéken anunu iyáken betin má túpá uven Yisasini kama vaya siamein tusu siantano van mi uvanten mino (2 Korin 8:1-5 fin má Firipai 1:5 fin masá onano). Maifin ma varé ein kéká maen mai nararé davaráe ma saríiyá ein nanin Ridian má Firipaíke karavusi namuntá ma yafikein banta vá be aná akhá bá ino. Maifin Ruku masá baren nafi sen iniyano mino. Pori veyan ma karavusifin bain nan ída inen mifo vei amusin má anunu vá inká Karaisini yoran ma moékentá doriyain má bei vaya ana vái ma vompopin tian amá ukhen mino. Firipai nanin banta ano ve ma afova amikhá ein baya me ampiren tavi yaná eyakhafin nain nan mi ma vompon uvaren mino. Mai van mi véin tusu siantiyá uno.

Porini Amusin Baya Ino

1 ²Minó Tiyarafenui vanasi vá ánoní ma ukhein kéká bá inká monó doran banta kayo vá ma Firipai barurá báken Yisas Karaisintá monó tiyain kéká baípái ma vompon uvamadékun oren mino. Yisas Karasini yoran bantá kanan téi Porin má Timotin má anon ma vompon uvaré uno.

²Teti Sifóe Tiyarafenu vá inká Bafan Yisas Karaisin má ano vá tarisari vá kusin má tiretin amino.

**Firipai Ma Monó Nanin Banta
Vain Nan Ma Pori Susu
Amúkiri Ein Baya Ino**

³Tiretin nan ma ineine eruna yamú tetisi Tiyarafenu vaipá tusu sé iyá uno.

⁴Téi ma simúkeruna yamú mai simusin mái siretin aya ino van timúkuanté iyá uno. ⁵Mai fara vara uno. Esé ma ineron táké ma se má túpá ukhen ná ma Yisasini kama vaya siamé eruna avúavá ma saréa fara fákaan ákona ukhaona van muno.

^{6a}Máan tukhein nan mi Tiyarafenu ano siretin afová ukhen mi siretimpin bei kama yoran arái ukhein doren oriyaré intin ma Yisas Karaisi ma ovaránen erin nain damúí mo kípanten mino.

⁷Tiretí ankan nan te súkákéi kama inin manan tiyá uno. Mai fara vara seyo, séi ma karavusifin nafi varufa safi ma vákuya siretin má deren Tiyarafenui sarisari variyáke véi ma simikhein doran tiyae yoriyare ono. Máan tiya inká beni fura sikhein kama veya ma namuroí uantiya mae yo yureya mai vayará ákona uantiyare ono. ⁸Yisas Karaisini arunaná pókéi siretin nan moéké tinunu iyá uno. Tiretin oman onano van kákantái ineine iyákun Tiyarafenu ano afová ukhen mino. ⁹Téi ma simúkiyaruna mai siretíí avábá in maran mano moéken bíkaaren avaniyantiya funtákein avúavá afová iyasin kama ineine ano e inoren mo kákaní ino van muno. ^{10b}Mai fara vara seyo, siretí ankan kákan daná óde afová ureya ída mana ume vantiya avusese e funtáke oriyasin Yisas Karaisi ma ovaránen erin nain damú o afoká ino van mi inikhé uno. ¹¹Yisas Karaisi anon minó damú puntákein avúavá tiretin aúpin ákona uantiyantín mai avúavá ano siretíí kama avúavái nan aran irantin maen mai ano Tiyarafenun kákan bí aminten mino.

**Porin Ma Fákaan Karavusíí In
Avúavá Anon Kama Vaya
Ma Siamin Aa Uvisen Mino**

¹²Mumunan tiyofi sífá tiváeyan noe, siretí ankan afovasá ono. Mará ma sen timaniná afoká iyain mai yanasinta anon tiya iyan Tiyarafenui kama veya ano minópá orera iyan mino. ^{13c}Mai fara vara seyo, Yisas Karaisini yorarí ma iyaruna van mi karavusíí ukhékun ma varuráké nanin banta vá kin amápin ma

yafisin kéká bá ano afová ukhen mino. ¹⁴Téi ma karavusifin baruna anon mumunan nanin banta ákona uantan ída feranton Tiyarafenui veya kasaen banasi siamiyan mino.

¹⁵Pura sen manáa kéká ano séi ma yoriyaré eruna yoran maman daní ono van iyan mifo ena kayo ano funtáden kama ineinefóí Yisas Karaisini veya máan banasi siamiyan mino. ¹⁶Betí ankan téin nan anunu iyáken mi kama veya siamiyan mino. Mai fara vara seyo, Tiyarafenu anon téin nan aní uran báken mi kama vayará ákonaen daffken mino sen afová ukhen mino. ¹⁷Manáa kéká ano ída funtákein inin onan máí Yisas Karasini veya vanasi siamiyan mino. Betí ankan ída ena van iniyáken ma vetiyan kákan bí bariyain mai avúavá anon téi ma karavusifin baruna mai moéken uman timiyan mino. ¹⁸Betí ankan ída funtákein ineine fosá Yisas Karaisini veya vanasi siamiyan nafi áa funtákein ineine fosá tiamiyan nafi mai van timusin iyaruna mai fara simusin manan é oriyá banté uno. ^{19d}Mai fara vara seyo, siretí ankan ma sen nan amúkusintiyaona van mi Yisas Karaisini Kantá Aunan mano siya iyan mi mai anon tentí uman mo seso sisintanten mino.

**Pori Ma Yisas Karaisini Vayará
Mantakharé Ein Baya Ino**

²⁰Mai fara vara seyo, séi ma inikheruna ída siyave van onté umpo fefá ma iyá erunaí é Yisas Karaisini veya kasaé tiamé oriyá banté uno. Téi ma mumunan ukheruna mai furonte rafu áa fará bante rafu mai anon Yisas Karaisin kákan bí aminten mino. ^{21e}Mai fara vara seyo, séi ma fara saunan bantí maé Yisas Karaisin ninan baréi furékun

^a1:6 1Ko 1:8 ^b1:10 1Te 5:23 ^c1:13 Apo 28:30 ^d1:19 2Ko 1:11
^e1:21 Kar 2:20

maen mai moéken kama uron inten mino. ²²Máan tinten mifo séi ma fara váken maen Yisas Karaisini vayará ma mumunan inain manon aran imáden inká anon buáden mifo maí kanan pintena intéa anó esantakhen nafi mai séi ída afová ukhé uno. ²³Tesi inin mano kauptaní iyan mifo maíkan daná ma me ampiren Yisas Karaisi má ma o van mi kama uron ukhen mino. ²⁴Máan tukhen mifo séi ma ída furin para váké ma siretin ayain mi kama ukhen mino. ²⁵Tenti ákona inin ma vain mai séin ma ída furin para váké maé tiretí ankani mumunampin amusin amiyáku mai afová uresin tiretíi mumunan mano mo ákona ino van muno. ²⁶Ákona ukhá esí ma séi ovaráné tireti vaonafá eréku mae mai ma séin pinté uaren ma Yisas Karasi ano variyain avúava san kasae siretí ankan amusin iyáke véin aví maman daní inono.

Tiyarafenui Vanasií Ma Ukhen Ban Baya Ino

²⁷§Máan tin nompo séin timaniná ma afoká inain dana san ída vá iniyákeya siretíi fura ineine vá Yisas Karaisini kama vayará ana vá kaúde inaruráke nanin banta an ná dakhe vano. Máan tukharé esí ma séi eré e onante rafu áa fará inente rafu mai manafin mi inin onan kaúde mantaan ákona ukheyan Kama Vayará mumunan ino van mi vanasi siamiyaren mino sé afová onté uno. ²⁸Tiretíi namuro ano inte aafákesá tiretí amaniná uman kaono van inten nafi mai van ída vá perano. Mai avúavá anon betin aní intin mi afová iyáken Tiyarafenu ano setin tiren asuse inten mino siyantín beyantá tiretin aya in-

ten mino. ²⁹hMai fara vara seyo, Yisas Karaisintá ma mumunan in afova ana va amikhen naino. Ída ino. Ben avíká ma uman baran mái amikhen mino. ³⁰Teti minó anon manafí ukhen uman bariyá tiféuno. Pefá ma séi variyaré eruna uman tiretí ontareya saréa mai uman aúbaná para vákuya afová iya ono.

Yisas Karaisin An Den Ma Ará Bararasí Uren Ban Baya Ino

2 Yisas Karaisin nina yaná pinte ídá mana ákona mantare fono. Inká beni avábá pinte ídá ará kusin mantare fono. Inká Kantá Aunan má ída ará manafiní ukhare rafono. Inká aúkáke sá ena nanin banta kama ure yafisiyare fono. ²Máan ma iyaré inte mae ará manafin ure vá ben anunuin maran iyáke inká inin onan manafin kaúde vaya sian damuare vá téin timusin in dorarisá ono.

³íÍda vá eyan nan inireya ena oman kaumpan ono. Ará barará desin erafuvinti vá ena nanin banta vará moéke ineno. ⁴JTiretí ina yanasinta ma yafisisona van mana ída vá iyákeya ena ina yanasinta vá dere vá dafiantano.

Yisas Karaisi Ma Veyan Maman Bararasí Ukhein Baya Ino

⁵Yisas Karaisi ma variyaré ein mai avúavá ana vá tiretimpin bano.

⁶kPefá béi Tiyarafenu vá manafí ukharen mifo

ma varafin ma erein damúí mai ma manafí ukaré ein me ampen mino.

⁷lBeyan maman bararasí uren ída miyan ban doran banta an daven inká barará banta ma noin avúavákáí sen noren mino.

⁸mInká Tiyarafenui vaya iniren bei au maman bararasí uren

^f1:23 2Ko 5:8 [§]1:27 Efe 4:1; 1Te 2:12 ^h1:29 Apo 16:19-40

ⁱ2:3 Kar 5:26 ^j2:4 1Ko 10:24 ^k2:6 Yon 1:1-2; 17:5

^l2:7 Yon 1:14; 2Ko 8:9 ^m2:8 Ibu 5:8; 12:2

umoyan banta ano ma yaa unkamádantá ma furein an den mino.

⁹ ⁿMai van mi Tiyarafenu ano véin man dan uron bain barurá kaúden minó ena aví kayo esantakhein bí amikhen mino.

¹⁰ ^oAmikhein mai inarufá ma vain kayo vá inká barará ma vain kayo vá ma vara aránaópá ma vain kayo vasá Yisasin bí ká ana vá aron durafúden monó tiantano.

¹¹ ^pMáan tintin minó ano Yisas Karaisin nan ma Bafan mino sinain manon Tifóe Tiyarafenu avíi yaní inten mino.

Tiyarafenui Vanasi Ano Ma Ofu An Den Moéken Kakhaantan Baya Ino

¹² Téi ma sinunu ukheruna sirona kéka soe, séi ma siretin má báku mae séi ma seruna vaya ánain ena ena yamú kama e yakhafiyaré en ná saréa siretin má ída vá umpo ákona e vá mai ma siamiyaré eruna vaya ánain ná dakhafono. Tiyarafenu ano ma siretin evaránen avíkein nará purase veni aránaópá bákeya ven nan periya vá beni yoran posá banasi aní ono. ¹³ Mai fara vara seyo, Tiyarafenu anon tiretimpin doriyáken beyan ma amusin amé iyain mai ákona vá anunu vái siretin amiyan mino.

¹⁴ Minó dorarí ma inonafin ída vá ena oyampá baya seya inká asive asive iya vano. ¹⁵ ^qMáan tesin ná ída vá tiretin oyampá baya sen kakhirun arino. Puntákein nanin banta váke vá ma varará ma kampun avúavá ana ma varen oriyan bain kékápin ná Tiyarafenu akhafana an dakhe vá betin aúbaná ofu kayo ano ma kiyán bainisá ono. ¹⁶ Aun bain baya

ma fákaan ákona ukharé esí maé Yisas Karaisi ma ovaránen erin nain damúí séi ma yoriyaré eruna yoran ída fa savifá o afeyoren mino siré timusin onté uno. ¹⁷ Timusin onté umpo se saunan mano Tiyarafenuvá ma íkun uan amin non ma vanaein an ma yanten maen tireti ma yoriyaona mai moéken ákona uantanten mino. Tiretin naro siré ma fúkaré maé tiretin má manafin timusin ono van muno. ¹⁸ ^rMáan tukhanti siretin má dere vá mai van amusin esi sá ten má timusin ono.

Firipaí Nanin Banta Ayaino Van Ma Pori Ano Timotin Tiantan Nain Baya Ino

¹⁹ Bafan Yisas Karaisi ma anunu inain nan mi ainé Timotin tiantékun tireti ma monó dorarí iyaona o ódaren intesá é doriya fo mai me sisimintí timusin onté uno. ²⁰ Timoti ma einí ukhein banta ída ena sen má báken tiretin ayaen dorano van inikhen mino. ²¹ ^sPara vara seyo, ena kéká ano vetiyan ma ayain doran nan manan iniren Yisas Karaisi ma amikhein doran nan ída iniyan mino. ²² Máan tiyan mifo Timoti ma ákon-aen doriyain doran tireti afová ukhen nan mi ve anin mano ma ve afóe má túpá uven doriyainien mi séin tiyaen Tiyarafenui kama vaya vanasi siamiyan mino. ²³ Mará ma séin timaniná intéa yanasá afoká inten nafi mai ma afová uré maé ída ayáká báké béin tiantékun tireti vaonafá orinten mino. ²⁴ Máan tukháí séi ma Bafantá inin kaiyaruna véi ma aai intí ída ayáká báké teyantái siretin o onanté uno.

**Pori Ma Epafroditusin Tiantantin
Firipaí Nanin Banta Vaípa
Orino Van Ein Baya Ino**

²⁵ M^uáan tukhá umpo saréa Epafroditusin tiantékun tiretí baonafá orino van mi séi inikhé uno. Béi funtákein tifá tiváen báken mi séi ma o afasí eruna yaná tiya é iyan mino. Inká béi siretíí vaya varen orin bantan báken monó baya simpin ma séi uman barékun maen ída feranton tiya é iyan mino. ²⁶ Béin nan aí iyan ban mino se ma sireti ineona van mi véi anomé iniyáken tiretin o onano van iyáká mai van mi véin tiantano van iyá uno. ²⁷ Béi aí mamaren pura sen purinté ein mifo Tiyarafenu ano verasan nan arunan uren mi séin nan moékan arun naná baranae siren mi véin ayain asefaen mino.

²⁸ Mai van mi véin tiantékun tireti vaonafá orino van mi séi moéké tinunu ukhé uno. Mai fara vara seyo, séi ma afová ukheruna sireti ma véin oniyáke kákan amusin esí maé téi siretin nan ída sirunan uré kokhon ineine onté uno. ²⁹ Béi ma orinti mae amusin iyáke vá monó avúavá posá kama ureya e avían kaúde mae máan banta kama uresin ná bano. ³⁰ Mai fara vara seyo, siretí nentá báke ída kanafe siya oren ukhen nan mi véi ída ve au van ininton téin tiyaen Yisas Karaisini yorarí iyaren mi furin avídoren mino.

**Yisas Karaisin Ma Afová Uren
Moékan Miyan Baran Baya Ino**

3 Mumunan tiyofi sífá tiváeyan noe, náí avúavasá afoká inten nafi Bafan mano vá amusin amino. Tiretíí mumunan ákona uantano van mi ída sivesara inan ena ena siamiyá bá uno.

² Mai ma afá iyan kayo an daven ma namu avúavá baren nóken au ma khavinona kéká anon para van oriyan ban aunan baran nono ma siyain kéká sará daffian ákona ono. ³ ^u Mai fara vara seyo, Tiyarafenurá ma Kantá Aunampin monó tiyá tiferuna kéká anon pura sé tu khakhé tíféuno. Mai ma Yisas Karaisi ma setin nan púaren e mantakheintái setisi ákona inin kaúké umpo varará nanin bantai avúaváka saino. Ída ino.

⁴ ^v Dan bukhafará ma variyaruna yanasinta ano sétin tiyaen baré inti mai ma yan bukhafará dáko iyan ma amusin iyain kéká esantaré kama ukhéi vanunaren mino. ⁵ ^w Mai fara vara seyo, séi Bensamenini anan pinté dákoíi ukhé Isareri anan banta uron mi vá uno. Téin ma se sinóe ano kauran ma yan manápá ifo afápá kanú manaú damú orivíkan maen tu khakharen mino. Máan tukháí Farasisi kékái man baya afova suron ukhéi mai ánain dakhafé iyá uno. ⁶ ^x Pefá Yisasintá ma mumunan iyain kéká ariyáke uman amiyaré umpo mai ma séi yoriyaruna sivútivá ma vanasi ano yaíden afová inten maen mai séi ída mana man baya yurafuriyá uno.

⁷ ^y Mai ma yan bukhafará bariyá eruna yanasinta van kákan daná ino siyaré umpo Yisas Karaisi ma fúaren e mantakhein ma oniyáke mai ma variyaré eruna yanasinta van ída veni ana vain daná inon té iniyá uno. ⁸ Tesi Bafan Yisas Karaisi ma mantaré ein avúavá ma afová ékun kákan danasí íkan inká tetí ma variyaréeruna yanasinta anon mo faen danasí en mino. Mai fara vara seyo, mai ma mantaré ein daná anon tiya iyain bara ráke vantai avúava maman pasavi yanasí uré maé Yisas Karaisin mái súpá onté uno. ⁹ ^z Máan turé ma ven má manafin túpá uvé maé béintá

mumunan uvé puntákein bantan banté umpo seyantá ma man baya yakhafin mano va funtákein banta vante rauno. Ída ino. Mai fara vara seyo, Karaisintá ma mumunan é tifékun mi Tiyaarafenu ano funtákein nanin banta e sinten mino. ¹⁰aYisas Karaisi ma fúkaréin orun avían mantakhein ákona ma afová uré béi ma varyiyá ein uman kayo varyaré maé béi ma fureiní ono van muno. ¹¹Mai fara vara seyo, mai ma véi fúkaren e manteiní ana ono van muno.

Ákona En Tava Uren Ma Esantaren O Miyan Baran Baya Ino

¹²bTéi fefasa ven avúavá mamaré puntákera siya raumpo mai ma Yisas Karaisi ano ma iyátintákein pákaan ákona ono van mi ma yorará iyá uno. ¹³Mumunan tiyofi sifá tiváeyan noe, mai ma siamiyaruna yanasinta ída mantéi mai van mi feyante avúavá me soyan amiré nái yanasá ínaimpá barante rafu mai yana san mi kakháké doriyá uno. ¹⁴cInaru fáke miyan barano van ma Tiyaarafenu ano Yisas Karaisin pinté uaren ma setin tariyain nan mi mai miyan o varano van ákonaé tava iyá uno.

¹⁵dMonópin ma vá tiferuna nanin banta ano mai yanasinta van mi kakhábó tifanté umpo manáa yana san ma ída sirá manafiní é tifékun maen Tiyaarafenu ano aní usintanten mino. ¹⁶Máan tukhen mifo mai ma fefá ma fákakhá é tiferuna avúavasá pákaan ákona ó tifano.

¹⁷eMumunan tiyofi sifá tiváeyan noe, mai ma séin tínain bákuriyain kékái avúavasá afová ureya senti sivútivá basá maman manái oro. ¹⁸Mai fara vara seyo, mai van mi fefá kokhon dádá tiaméku iniyá en ná taréa yere kokhon

kékái avúavá anon Yisas Karaisini yaa unkamádan nan namuroí uantiyái sínu finté tiretin tiamiyá uno. ¹⁹fMa vara ráke anunu ma vain mai vetíi ayarafenui vákan mai yanasinta van mana iniyan ída ayave inton kasaen namu avúavá bariyain mai kéká ano ínaimpáké umampin oferanten mino. ²⁰gMáan tinten mifo Bafan Yisas Karaisi ma vain baru mai inarufái váká tetin má dere inaru fáke nanin bantan báké béi ma setin e siviran nain nan mi ave ukhé tiféuno. ²¹hMai ma minó daná esantan nain ákona fóké anan tetin turá ma váken uman timiyain bukhafa yo vaéan bei kakhakhein bukhafa an danten mino.

4 ⁱMáan tukhein nará mumunan tiyofi sifá tiváeyan noe, Bafantasá túpá uan ákona uron ono. Mai fara seyo séi ma siretimpin doriyá erunai nan aran mi vanái siretin onano van moéké tinunu iyá uno.

Porini Kípan Afova Vaya Ino

²Tinunu iyá umpo Yuodia má Sintiki masá ineno. Tiré kanan Bafan ninan baompo ída vá anan uantan maran iyáke manafin ná bano. ³jTen má ma manafin doriyaona ano maí kan nanin aya ono van mi siamiyá uno. Mai fara vara seyo, vékan má anon tiyaen Tiyaarafenui Kama Vaya siamiyáken Karemenin má mai ma siyaen doriyain kéká bá túpá uven ákona yorará iyan mino. Máan tiyákan betin aví ano Aunan Baran Bompon Dókiyin ban mino.

⁴Minó damú Bafampin amusin iya vano van mi evaránáé tiamiyá umpo amusin ono. ⁵kMinó avúavá ma varyiyaona áesin ná banasi ano oniyáken

^a3:10 Rom 6:3-5; 8:17 ^b3:12 1Ti 6:12, 19 ^c3:14 1Ko 9:24

^d3:15 1Ko 2:6 ^e3:17 1Ko 4:16 ^f3:19 Rom 16:18 ^g3:20 Efe 2:6, 19

^h3:21 1Ko 15:28, 42-53 ⁱ4:1 1Te 2:19-20 ^j4:3 Ruk 10:20

^k4:5 Ibu 10:25; Yem 5:8-9

kusen ban avúavái variyan mino sen afová ino. Bafan inka ádé anantá erinten mifo afovasá ono.

⁶^lMinó dana san ída vá kokhon ineine iyáke Tiyarafenu ma mantein danasará tusu siyáke siretí ma o afasí inona yanasará béi vaipá amúkimpó inan teno. ⁷^mMáan ma inte mae setisi ineine ano ma ída kanafen afová oren daná mai Tiyarafenui kusin manon Yisas Karaisimpin tetisi sú bá inin má maman túpá urantí bá tifanté uno.

⁸Mumunan tiyofi sífá tiváeyan noe, sipá kípán baya siameno van muno. Mai ma fura sikhein avúavá bá inká ena ma avábá in má puntákein avúavá bá inká avusese ukhein avúavá bá kama uron ma ukhein avúavá bá inká ena ma esesí in má ma vain mairasá minó ei inin onan kaono. Kamaen ma funtákan nain danasinta vará maman kákan danasí ureya mai yanasará ineine ono. ⁹ⁿMai ma siretí ankan téin tonen ná bariyáké inká inen ná tiameruna yanasinta ma afova vareona vá maman avúavápin ná kaúan one one vá ono. Máan ma esin maen ará ma kusiantan Tiyarafenu ano siretin má banten mino.

**Firipaí Nanin Bantai
Amusin Danasinta Van Ma
Pori Susu Siantein Baya Ino**

¹⁰Téi afová ukhéku siretí ankan evaráne séin tiya ono van iyan ná Bafan nan kákan timusin uantiyá umpo séin ma siya ono van iyaona afokhan ída vákayai ída siya iya ono. ¹¹Manáa yana san o afasí ukhesa ma vaya siya rauno. Ída ino. Ten timaniná ma afoká é iyain daná afova ukhéi simusin má bariyaréi siyá uno. ¹²Ona van damu safi áa ona ída vantin para van damusá afoká é iyan nafi inká dunan mano

simúkuntantirá bante rafu áa sirafan ná bante rafu mai máan damú kayo ma afoká é iyain afova suron ukhéi simusin má anan bá é iyá uno. ¹³^oMai fara vara seyo, Yisas Karaisi ma simé iyain ákona fói mai yanasinta kanaí é baré iyá uno.

¹⁴Máan té iyá umpo siretí ankan ma séin tiyaen ná ma mai umampin ma ofereruna mai kama uron mi e ono. ¹⁵^pTéi ma arái é Tiyarafenui Kama Vaya siretin tiamidé ma Masedoniá bara me ampiré oréku mae siretí afová ukhen nan ída ena nanin banta ano siyaen mifo sireti Firipaí nanin banta anon anan monípó tiyaona ino. ¹⁶Inká kákan baru Tesaroniká dere ma váku mae kokhon dádá tiya ono van kokhon danasinta khaenan oriyaren mino. ¹⁷Téi siretin pintena mana yaná barano vara siya raumpo sireti ma kama avúavá bariyaonará Tiyarafenu ano miyan amino van mi siamiyá uno. ¹⁸Mai ma sen pinte mantaré eona yanasinta esantare kokhon amusin mi Epafroditusintá kaen nan baren erí oné uno. Mai avúavá anon íkun uan amin ma kama aunka ódíkan Tiyaranfenu ano amusin einí en mino. ¹⁹Mai ma séin kamaen dafisiyain Tiyarafenu anon Yisas Karaisin pinté uaren mi sireti ma o afasí inona yanasinta mai ma vei kakhampin bíkakhein pinte aminten mino.

²⁰Teti Sífoe Tiyarafenu avisá ena ena yamú maman daní ó tifano. Mai fura ino.

**Pori Ma Vaya Kípiyan
Amusin Baya Sein Mino**

²¹Yisas Karaisintá ma mumunan nanin banta ma maifá baonafin mi sesi susu vaya kaékun oren mino. Inká ten má ma mumunan tifá tiváeyan ma vain mano vetíi amusin baya kain tireti vaonafá oren mino. ²²Yisasintá ma

^l4:6 Mat 6:25-34; Kor 4:2 ^m4:7 Ais 26:3; Yon 14:27; Kor 3:15

ⁿ4:9 Rom 16:20 ^o4:13 2Ko 12:10 ^p4:15 2Ko 11:9

mumunan iyain nanin banta ano vetíi amusin bayan kain oriyan inká Romú kamanimpin ma yoriyain monó kéká bá anon moéken betíi amusin baya kain tireti vaonafá oren mino.

²³ Bafan Yisas Karaisini sarisari ano vá tiretíi aunan má bano. Mai fura ino.

**PORI MA KOROSÍ NANIN
BANTA UVAMAN
AMEIN BOMPON MINO**

(Korosi)

**Korosi Vompon Ma Uvanteí
Pákenai Afova Vaya Ino**

**Ma vompon ma
uvantein banta ino.**

Baya varen orin banta Pori ino.

Uvarein orana ino.

AD sikisti-tu (62) fin mi Efesasí nanin banta vái vompon má Firimonini vompon má uváden mi manafin dan baren oren mino.

**Ma vompon ma
uvantein baru ino.**

Romú barurá karavusíí uran báken karavusi namun pintéi uvanten mino.

**Ma vompon ma uvaman
amikhein kéká ino.**

Esiá barafin bain baru Korosaé ma vain monó nanin banta ma Efesasíke monó doran banta kéká ano ma o avían mantakhein kayofin nen ten iniyan mino. Korosaé barurá Pori ída oman monó dorarí ukhen ne sen onten mino.

**Nái ana vará ma
vompon uvanten nafino.**

Korosí barurá Pori ída orikharen pasen avábá bá aronái in má bompon mi uvamádan orikhen mino. Kampun sakanampa vanta kéká ano ma Yu-

tan kayoi feyante avúavá bá inká Kiriki kékái avúavá bá ma maman manafiní iyain kéká amaan baya siamiyáken inká Tiyarafenu ano intesá uren ná ma vara uvaren ná inká Tiyarafenun má ará manafiní e váke vá inká ákona e vá amúkono ma siyain mano Karaisini ovaránen erin maman títosí iyain nan mi sian amá ukhen mino. Máan ma ein manon Yisasi iyé ban nafi mai ven nan tian amá iyáken inká ena anampin ma fura kama vayan varen orin banta uno sen Pori veyan nan tian amá ukhen mino.

Porini Susu Vaya Ino

1 Yisas Karaisini vayan varen orin bantaí ino siren ma Tiyarafenu ano vei anunurá ma aní ukhein banta séi Porin má inká teti sífá tiváe Timotin má anon ma vompon uvaman, ²Korosí barurá ma vákeya ma Tiyarafenurá monó tiyaona nanin bantan ameruna seti Sífoé Tiyarafenui sarisari vá ará kusin má ano siretin má banten mino.

**Porini Amúkin Má Inká Tiyarafenun
Ma Susu Siantan Má Baya Ino**

³Ena ena yamú ma siretin nan tímúkiyá maé tetisi Bafan Yisas Karaisin Afóe Tiyarafenui susu sianté iyá uno. ⁴Mai fara vara seyo, Yisas Karaisintá ma mumunan iyákeya ma Tiyarafenui vanasi ma avábá uantiyaona van mi seti ankan iniré uno. ⁵Mai fara va máan tiya vaono. Tiyarafenu ano ma kama yaná inarufá iyántádan ma vain mai fura vayan iniyákeya mairái Yisas Karaisintá mumunan iyai veni vanasi ará amiya ono. ⁶Tiretí ankan ma ineona mai kama vayan ano inka minó akhempá orera iyan maen inká mai ma siretin ará baéda ma Tiyarafenui fura yaná bá ume nanin banta ma sarisari in má ma afová eonái

en mi minó akhen páke nanin banta ará baédan mi mumunan iyan mino.

^{7s}Teti ma sinunu iyaruna sífá tiváe Epafrafi ano ma ma kama vaya siamein mai véi maen Karaisintá mumunan iyain doran bantan báken tetin má manafin doriyain mi van tetin too varen mai yorarién mino. ⁸Ena nanin banta van ma anunuin avúavá ma Kantá Aunan mano siretin amikha ma mai avúavá ma ena kéká aní iyaona van mi véi setin tisimen mino.

^{9t}Máan tukhein nan mi siretí ankani vaya ma ineruna yamú kákéi siretí ankan aya urantiya moékentá béin afová iyasín Kantá Aunan kama ineine vá afova vá amino van Tiyarafenu timúkuan amiyá tiféuno. ¹⁰Máan tiyá tíféku mae siretí ankan mano Bafani vanasi ano ma funtákeín aasá ma oriyainí esin mai van tiretin moéken anunu ino van muno. Máan intin tiretini ara ara yorani nan aran kamaen afoká inten mino. Máan esin Tiyarafenui afova ano mo kákaní inten mino.

^{11u}Máan tiyantín Tiyarafenu ano vei moékan ákonafó tiretí ankan ákona amintiya mantaan ákona uve ara ara uman bare oriya mae mai uman kayo ma kípan nain damu san bempáké báké ave in nono. Máan tukhare maeya amusin mái ^{12v}Afóen tusu siantan nono. Mai ma Tiyarafenui kakhantá báken ma kantasí ukhein nanin banta ma ameno van Tiyarafenu ano ma iyáantan bain danasinta van mai siretin mái varan nono sikhen mino. ^{13w}Mai fara vara seyo, fefá kákan títípa aránaói varé é tifékun mi véi mai finte o siviren meren mi mai ma véi moéken anunu ukhein iyamponi yafisin aúpin kaí bá tiféuno. ^{14x}Máan turen Ti-

yarafenu ano veni narefói ume fintena setin miyaní uren evaránen tivíden ume ampisintáken mino.

Yisas Karaisini Kákan Bí Pákena Ma Pori Sikhein Baya Ino

^{15y}Teti ankan ída kanaí é Tiyarafenu oná tifanté umpo ven Anin Yisasi ano anan ben má manaí ukhen maen beni esé iyampon báken béi anan Tiyarafenu ano ma uvantein danasintará o ánoní ukhen mino. ¹⁶Mai fara vara seyo, Tiyarafenu ano Karaisin pintéi uaren mi inarufá ma vain danasinta vá inká ma varará ma vain danasinta vá uvanten mino. Mai ma yáko bain danasinta vá aúpá ma vain danasinta vá ara ara ákona vain enisori kayo vá inká ákona Aunan kayo vá ákona yaná kayo vá ma ma varará bain mai ven ninaen tiren uvádákan mi véi yafíken mino. ^{17z}Minó daná ída afoká ukhan maen béi fefá baréin pasen mai yanasinta ano véintái o súpá ukhen mino.

^{18a}Máan tukhein nan mi véin mumunan nanin bantai ánon bákan mai nanin banta ano ventá o súpá uven mana vukhafaí ukhen mino. Béi anon purin pinté an uanten orun mantaven minó danáká o ánoní uven mai yanasintará dafíken mino. ^{19b}Mai fara vara seyo, Tiyarafenu ano Yisasimpin bano van amusin uaren mi véimpin e víkakhén mino. ^{20c}Bíkavin inarufá ma vain danasinta vá barará ma vain má ano Yisasín má manafin kasén bano van mi véin tiantan daa unkamádantá dorun puren mino. Púbin beni nare ma vanaein manon ben ma namuroí uantiyá é tiferuna kéká bá manafin kasén ban avúavá maman dákó en mino.

^s1:7 Kor 4:12; Frm 23 ^t1:9 Efe 1:16-17 ^u1:11 Efe 1:19; 3:16

^v1:12 Efe 1:11, 18 ^w1:13 Ruk 22:53; Efe 2:2 ^x1:14 Efe 1:7

^y1:15 Yon 1:18; 2Ko 4:4 ^z1:17 Yon 1:1; 8:58

^a1:18 Apo 26:23; Efe 1:22-23; Rev 1:5 ^b1:19 Kor 2:9 ^c1:20 Efe 1:10

²¹dPefá Tiyarafenu ádé ída vákei siretí ineinefin béin namuroí uantiyákeya namu ineine iyaya namu avúavasí iyare ono. ²²eMáan tiyare ompo Yisas Karaisi ma yaa unkamádantá e furein manon mai ma Tiyarafenu vá ma namuroí iyá eona maman manafin kasen ban avúavá dákó en mino. Béi ma máan tein manon tiretí ankan maman kantasí uren mi aviren Tiyarafenu avorá morantiya o mantan nono. ²³Máan tukhein nará mantaan ákona uve vá pura yanákasá mumunan iya vano. Máan tiyaré esin mana yaná ano e yarifaádantiya mai ma inire ma mumunan iyá eona kama veya me ampinona van muno. Minó akhempá ena kéká ano kama veya siamiyákan mai yorarí ino van Tiyarafenu anon téi Porin aní ukhen mino.

Pori Ma Monó Nanin Bantai Yorarí Iyain Baya Ino

²⁴Tiretí ankan ma aya iyáké uman bariyaruna van timusin mi iyá uno. Para vara seyo, Yisas Karaisin aui monó nanin banta vákan mi vetin naro siren ma Yisasi uman baren mo áin ma fara vain uman aya uan kípantó uno. ²⁵fTiyarafenu anon téin aní uren tivían kaí monó nanin bantai yoran banta váké aya iyá uno. Máan turen mi sireti ena anan nanin bantafin minó beni veya máa sian dákó ino siren mai yoran timikhén mino. ²⁶gTiyarafenu ano fefái ma veya aúpá kain ban eriyán baren mifo saréan kantasí ukhein nanin banta avorái véi sian dákó en mino. ²⁷Para vara seyo, Tiyarafenu ano vei anunurái mai ma aúpá kain baré ein bayan bei vanasi avorá tian dákó uran mi mai veya ano ena anan nanin banta ma mumunan iyain kayo

aya iyan mino. Mai aúpá baya maen Yisasi ano siretimpin bantiya ventá mumunan iyá esin e aviren morantiya vei kakhampin o vasin kama yanasinta amintiya varan nono.

²⁸Máan tukhein nan mi seti ma ore-runa akhempá Karaisini kama vayan minó nanin bantan tiamiyá uno. Tiyarafenu ano ma simein ineine vá afova vá ánain dakhaféi ákona vayafó tiamiyá uno. Mai fara vauno funtákein nanin banta máa ana aviré Tiyarafenun mo ameno van muno. ²⁹hMáan tukhein nan mi Yisas Karaisi ano ma simiyain ákona fói kákan dorarí iyá uno.

Yisas Karaisin Pin Ma Minó Kama Yanasinta Vá Kama Afova Vá Bain Baya Ino

2 Siretin má Raodisiá barurá bá ma mumunan nanin banta vain má inká téin ma ída sontein kéká bá ma aya ono van ma ákona yorarí iyaruna van afová ono van mi séi inikhé uno. ²Téi ma mai yorarí iyaruna ana maen mai siretí ankan ará ákona uantékuya Tiyarafenui vanasi ará amire manafin kase vano van muno. Máan téku kama ineine varesin mai ano siretí ankani mumunan ákona uantantiya Tiyarafenui aúpá baya afová ono van muno. Mai aúpá bayai ana Yisas Karaisi ino. ³iMoní kain namun ma moní bíkakhén bain an mi yen ara ara afova vá aúpá ineine vá ano Yisas Karaisimpin bíkakhén ban mino.

⁴jManáa vanta ano ase vayafó tiretí ankan mákáden aviran nan mi ma veya siamiyá uno. ⁵kPara vara seyo, séi ída siretí ankan má bá umpo se sú bá ineine vá ano siretin má ban mino. Tireti ma funtáke váke ma Yisas Karaisintá ákonae

^d1:21 Rom 5:10; Efe 2:12 ^e1:22 Rom 5:10; Efe 5:27 ^f1:25 Efe 3:2, 7-8

^g1:26 Rom 16:25-26; Efe 3:5, 9 ^h1:29 Efe 3:7, 20; Fir 4:13

ⁱ2:3 1Ko 1:24, 30 ^j2:4 Rom 16:18 ^k2:5 1Ko 5:3

mumunan iyaona vava ma iniré timusin é uno.

**Yisasin Má Tupá Uven Ma Kusin
Má Para Van Oriyan Ban
Aunan Má Baran Baya Ino**

⁶Yisas Karaisin inka maman ei Bafaní ukha ompo ventá o súpá uve vá béin oo yaiya vano. ⁷¹Daa ana ano ma varafin arú dan aravuvin ma mantaan ákona uven anu orun darifaren ma ampameiní eya va Yisasintá o súpá uan ákona uve vá mai ma siamé tiferuna vava kayorá ákona e mumunan iyáke vá Tiyarafenun moéke susu siantano.

⁸Manáa vanta kéká ano eriven maen kampun baya vá beni ana ída vain baya vápó me mákadantiya vetin dakhafin nompo yaffian ná ákona ono. Máan banta kayo ano vetí anafu aráoni ineine vá namu aunan kayo ma ayompin báken ma ma vara yafíkein kéká báí ineine ánain manan dakhafiyain mifo Karaisini ineine ánain ída yakhafiyain mino.

⁹^mMai fara vara seyo, Yisas Karaisi ma varará bukhafa mamaren ma setin tan davin maen Tiyarafenui Aunan mano véimpin e víken mino. ¹⁰ⁿE víkavin namu aunan kayoi ákona yanasintará béi o ánoní ukhein pase véimpin ma o asótú uvesin maen Tiyarafenui Aunan mano véin pinté uaren tretimpin e víkanten mino.

¹¹^oTiretí ankan ma ventá o súpá eona anon puraseya au ma khaveiní ukha ono. Mai maen dante vukhafarasa ifo aú bukhafará ino. Yisas Karaisi ano ve avúavápói ume vukhafa yo síkaan karú-dara va ompo varará banta ano va máan tura va vaono. Ída ino. ¹²^pMai ma monó non pereona anon Yisas Karaisin má ma masí einí ukhareyan inká mai ma Ti-

yarafenu ano ma Yisasin Karaisin orun avían mantein ákonará ma mumunan eona anon Karaisin má evaráne orun mantakha ono.

¹³^qNamu avúavápin pefá bákeyai feyante anunu ánain bákuriyan nan mai avúavá ano siretin aruan púkaren mifo Tiyarafenu anon tiretin avían Yisas Karaisintá túpá uren mi furin pintena evaránen avían manten mino. Máan turen mi setisi ume yo arútinten mino. ¹⁴^rMan baya ano setin kótisintáden maen tetinti ume maman dákó urái man baya aránaópá baré é tifékun mi Tiyarafenu ano mai ma kó tisintiyá ein baya minó do maman karúdaren man bayai ákona máden asuse uren Yisas Karaisini yaa unkamádantá mo khauren aríkan kípakhen mino. ¹⁵Máan ma ein manon namu aunan kayoi ákona maman bararasí uren kípaanten mino. Yisas Karaisini yaa unkamádantá ma Tiyarafenu ano vei ákona aní ein manon betin maman bara finí uren mi vanasi avorá ayave amikhen mino.

**Tiretí Ma Yisas Karaisin
Má Púkeona Vaya Ino**

¹⁶^sMáan tukhein nan mi siretí ankan ída vá áesin ná tinafu siráoni man bayafin ma yunan má non má ma nan na fi áa avíkan damú kayo ma ída yafisin nara fi áa auyen biyon ma me khain damú ma amusin in nara fi áa Sabati yamusara fi ma are ukhan nain póké mana vanta ano siretin daimino. ¹⁷^tPara vara seyo, mai man baya kayo ano ínaimpá ma yákó inain daná amamanon mi varé íkan Yisas Karaisi anon pura sen mai yaná ban mino. ¹⁸Barará bantai ineine ánain ma yakhafiyain banta kéká ída vá áesin ná tiretí ineine máden asuse

¹2:7 Efe 3:17 ^m2:9 Yon 1:14, 16 ⁿ2:10 Efe 1:21-22 ^o2:11 Rom 2:29

^p2:12 Rom 6:4 ^q2:13 Efe 2:1, 4-5 ^r2:14 Efe 2:14-16; 1Pi 2:24

^s2:16 Rom 14:1-13 ^t2:17 Ibu 8:5

uren ná kama miyan baran aa yasirano. Inká tetí ankan kain onté umpo enisori kayo rasá monó tiyaya mumunan ono ma sin nain banta kéká ída vá áesin ná turetí ineine máden asuse ino. Máan banta kayo ano vetiyan manan minó afova manté uno siren be aví daní é iyan mino. ¹⁹ ^uMáan té iyan mifo setisi ánon Yisas Karaisi ma vain má ída o asótú ukhen mino. Para vara seyo, setí ankan béimpin mi o asotú uvé tifékun mi vei minó bukhafafin béi yunan amiran maen ákona varé iyan mino. Tiyarafenu fin-tena anan ákona mamaréi mumunampin inoré iyá tiféuno.

²⁰ ^vTiretí ankan pefái Yisas Karaisin má púare orun mantaven nan mi véi ano siretin maman auyení ukhen mifo fara é tiré ma vara ráke vantai man baya ano ma máa sikhein ánain bákuriyá ba rafono. ²¹ “Ída vá maifó dorarí ono, ída vá nano, ída vá aruvono ma sikhein man baya kayo van mi siyá uno.” ²² ^wMáan man baya kayo ma vain mai varará bantai ineinen báken mai vayafó ma yorarí ure nan maen ainen o kípé iyan mino. ²³ Mai man baya kayo ano ará mantarantiya ákona e monó tiyáke kama ineine vá afova vái monópin bare sire maeya e amo sire yunan auriya moéke monó tiyáke mumunan inono. Máan tin noppo mai man baya ánain ma yakhafin mano ída umefin ma orin aasá iyaranten mino.

Kantasí Ma Ukhen Ban Man Baya Ino

3 ^xTiyarafenu ano Yisas Karaisin má inka orun avían mantara va ompo inaru fáke yanasintará ana vá kakhábe orono. Para vara seyo, mai varurái Yisasi ano vei kin karáká Tiyarafenui ayan kurompá kumanten mino. ² ^yInaru fáke

yana san mana vá ineine iyáke ída vá ma vara ráke yanasintará inin kaono. ³ Mai fara vara seyo, Yisasin mái siretí ankan púben nan ben mái siretí aunan mano Tiyarafenufin aúpá ban mino. ⁴ Yisasi maen tiretí ankani aunan mi vain Tiyarafenui ákona kakhán má ma e unen dákó inain damúi siretin má dere yákó inono.

Tiretí Aúpin Ma Vain Namu Avúavasá Aruan Purono

⁵ ^zMáan tukhein nará ma vara ráke avúavá ma siretí ankan aúpin bain ná aruan purono. Kampun ayarafenu rá ma monó té iyaona mai famúku avúavá safi fain avúavá safi ará manta avúavá safi namu avúavá safi inká ena ina yana san ma aranan avúavá safin ban mino. ⁶ Mai fara vara seyo, Tiyarafenui aran naná ano mai avúavá ma variyain nanin banta amaniná erinten mino. ⁷ Pefá tiretin má deren mai ma namu avúavá bariyain kéká bá avunté uveya mai avúavá bariyare ono. ⁸ ^aMáan tiya ompo mai ma aranan uren ma ena ará namu uantáden ma oyampá baya sin avúavá bá inká namu vaya ma sin avúavá bá ina vá taréa ifasá tifano. ⁹ ^bTiretí ankan ída vá kampun bayafó monó nanin banta van e sian more mere ono. Mai fara vara seyo, fefái mai avúava sinta me ampikha rono. ¹⁰ ^cPeyante avúavá inka me ampireya auyení ukha rono. Tiyarafenu ano siretí ankan maman auyení uren ena ena yamú kama afova kayon amiyákayai véin má manaí ukha rono. ¹¹ ^dMáan tukháí auyení ma ukhé tiferuna nanin banta ano manaí ukhé tiféuno. Maifin ída Kriki vanta fi Yutan banta fi au khakhein nafi ída au khakhein nafi

^u2:19 Efe 2:21; 4:16 ^v2:20 Kar 4:3, 9; 1Ti 4:3 ^w2:22 Mat 15:9

^x3:1 Mak 12:36; 16:19; Efe 1:20 ^y3:2 Mat 6:33

^z3:5 Rom 6:6, 11; Efe 4:19; 5:3-6 ^a3:8 Efe 4:25-29; 5:4 ^b3:9 Efe 4:22, 25

^c3:10 Efe 4:24 ^d3:11 Kar 3:28

áa ena vava siyain nafi áa ena vara fáke vanta fi áa miyan ída van doran banta fi inká para van banta fi van mino. Mai fara vara seyo, Yisasi veyáká anan báken minó nanin bantafin ban mino.

Ena Ma Avábá In Baya Ino

^{12e}Tiyarafenu ano sireti maman kantasí uren tesina e siren anunu ukhen mino. Máan tukhein nará ma avúava sinta vá bararo. Ena nanin banta van arunan uantáde kama iyáke vá inká ará bararasí ureya vempáké kama e kuse vá bano. ^{13f}Bempáké manafin bákeya vá ben ma ará namu uantan maran ma ukhá inona vasá tirun noe sin maran iyáke vá inká tiretin ma namu uantákáin naini ume vá ampiantano. Bafan mano ma siretí ume ampiantákeiní eya vá ena nanin bantai ume ampiantano. ^{14g}Máan tiyáke mae ena nanin banta vá avábá ono. Para vara seyo, ena ma avábá in manon ara ara avúavá esantakhen mai anon minó nanin banta o fáke e fáke uádan manafin ban mino. ^{15h}Yisasin pinté ma eriyain ará kusin ná áesin tiretin auká dafisino. Tiyarafenu ano ma siretin araren ma ará kusin amira ma mana vukhafái ukhaona vará ena ena yamusá tusu siantano.

¹⁶ⁱYisas Karaisini vava vá áesin tiretí ankampin moéken báken ná mai ano siretin kama ineine amintiya vá ben ayain maran iyáke afova amin maran ná ono. Máan tiyákeya siretí ankan aúkáke sá Tiyarafenuun tusu siantiya vá í bompon pintena í bá monó í bá inká Aunan mano ma amiyain í basá dano. ^{17j}Máan tiyáke ara ara yorariin po safi áa vavafo safi ma varanona mai Bafan

Yisasin avíkasá barano. Máan tiyaya ven avíkasá Tiyarafenuun tusu siantano.

Monópin Ma Vain Nanin Bantai Man Baya Ino

^{18k}Anasi kéka soe, siretí avafuná aránaopasá baro. Mai avúavái Bafan avorá puntáken mino. ^{19l}Inká banta kéka soe, siretí aná ona vara anunu iyákeya ída vá betí ankan ará namu uantano.

^{20m}Iyamporinta oe, anóe afóe ma sin nain baya ánain ná dakhaforo. Para vara seyo, mai avúavá anon Bafan amusin amé iyan mino.

²¹ⁿTireti afóeyan noe, ída vá iyamporinta arápiní esin ná anan maran ino. Máan tesin maen kaumpan uren kama avúavá ampinten mino.

^{22o}Tireti miyan ída van doran banta kayo oe, funtáde vá ei ayafa ano ma sin nain baya ánain mana vá dakhafono. Ída vá timo sino van muno sireya véin avorá ana kama yorari iyákeya Bafan nan periya vá dorari ono. ²³Intéa yoran ná dorante fo mai Bafani yoran mi yoriyá umpo ída varará bantai yoran doriyá uno seya ovare me iniyáke amusin masá dorano. ²⁴Tiretí ankan afovasá ono. Bafan mano fefái siretí miyan útaren iyáantan ban mino. Mai ma yoriyaona yoran kayoi ayafa maen mai Bafan Yisasi ino. ^{25p}Máan tukhein nan mi mana vanta ano ma aauí uranten maen mai miyan beyan mi varanten mifo aronará ma áuantiyain avúavá ída Bafampin ban mino.

4^qTireti ayafa kéka soe, siretí miyan ída van doran banta kayo rasá kama yafisirí ono. Para vara seyo, siretí ankan afová ukhe nan tiretí Kákan inarufái van mino.

^e3:12 1Pi 2:9 ^f3:13 Efe 4:2, 32 ^g3:14 Rom 13:8-10

^h3:15 1Ko 12:27; Efe 4:4; Fir 4:7 ⁱ3:16 Efe 5:19 ^j3:17 1Ko 10:31; Efe 5:20

^k3:18 Efe 5:22 ^l3:19 Efe 5:25 ^m3:20 Efe 6:1 ⁿ3:21 Efe 6:4

^o3:22 Efe 6:5-8 ^p3:25 Rom 2:11 ^q4:1 Efe 6:9

Amúkí Pákena Van Ma Sikhein Baya Ino

^{2r}Tiretí ankan ma amúkono van inten mae yafian ákona ukhe vá tusu siyáke vá amúkono. ^{3s}Amú ma khiyáke setin nan ída vá áun nono. Amúkuan Ti-yarafenu amesin ná aái usintantirá mai ma kama vaya ma aúpá baini ana sian dákó ono. Mai ma aúpá bain baya mai Yisas Karaisin báká mai vaya ma sian dákó eruna van mi karavusí urá bá uno. ⁴Téi nan puntáden kama vaya sian dákó ino van muno sireya vá Ti-yarafenu amúkuan ameno. ^{5t}Ída ma monópin bain nanin banta aúban ma nókeya kama inin má ana vá noya vetin ayaesin ná Yisasintá mumunan ino. ^{6u}Ena ena yamú ma vaya sinonafin ase vain kama vaya ana siyá esin ma ena kéká ano ma éin má bayafí inti mae anona funtákein baya siamin nono.

Pori Ma Kípan Baya Sein Mino

^{7v}Téi ma yoriyaruna fákena vaya Tikikasi anon tiaminten mino. Béi maen tetin tifá tiváen báken Bafanin ákona yoran bantan ban mi setin má manafin doriyan mino. ^{8w}Máan tiyain mi vái siretin ará ákona uantiyan inká teti intesá é barafu mai vaya kayo vá dere siamino van mi véin tiantékun oren mino. ^{9x}Tiretin pinte vanta Onesimasi maen mumunan tifá tiváen bain Tikikusin má tiantékun oren maen intéa yanasá dákó iyan nafi mai vaya mo siamintiya afová inono.

^{10y}Aristakusi ma sen má karavusifin bain banta ano vei amusin baya yákan inká Banabasin afóna Maki yere amusin baya siáden mino. Makin ma sireti

vaonafá orintin ma kama ure aviran nona vaya fefái siretin tiamikhé uno. ¹¹Yisasin nan ma Yastasin ne siyain banta ano yere amusin baya sen mino. Yutan kayo finté mai kéká ano anan ten má báken doriyá timusin iyá Ti-yarafenu yafisin nan tian dákó iyá tiféuno.

^{12z}Tiretíi varu ráke vanta Epafarasi maen Yisas Karaisini yoran bantan báken béi yeren amusin baya yan oren mino. Ti-yarafenu ano siretin aya intiya mantaan ákona uveya veni anunu afová ure maifin karakhe vano van mi véi ena ena yamú amúkuantiyan ban mino. ¹³Beni yoran afová ukhé paséi ma vaya sian dákó iyá uno. Tiretin má Raodisiá baru ráke kéká bá inká Ieraporisi varu ráke kéká bá aya ono van mi ákona yorarií iyan mino.

¹⁴Ayofan banta ma minó ano simusin iyá tiferuna vanta Rukun má inká Demasin má ano yere amusin baya yan oren mino. ¹⁵Tenti simusin baya vá Raodisiá baru rákena mumunan tiyofi sífá tiváeyan má inká Nimfan má ben amá ma o átaru uven monó tiyain mumunan kéká basá tiameno.

¹⁶Tiretí ankan ma ma vompon dankádeya ma inirante mae Raodisiáke nanin banta amesin ná betíyan dere yankáden iniyanti vá inká betin ma amenuna vompon ná tireti yere yankáde ineno.

^{17a}Máan tiyáke vá inká Akipusin tiamesin ná Bafan mano ma amikhein doran ná dafian ákona uven ná dóan kípano.

^{18b}Téi Pori ano seyantái ma vompon uvaman tiretí ankan amé uno. Téi karavusifin pa vákéi ma vompon uvaré umpo vá téin nará inisintaro.

^r4:2 Efe 6:18; Fir 4:6 ^s4:3 Rom 15:30; Efe 6:19 ^t4:5 Efe 5:15-16

^u4:6 Efe 4:29; 1Pi 3:15 ^v4:7 Efe 6:21 ^w4:8 Efe 6:22 ^x4:9 Frm 10-12

^y4:10 Apo 12:12; 13:13; 15:37-39; 2Ti 4:11 ^z4:12 Kor 1:7; Frm 23-24

^a4:17 Frm 2 ^b4:18 1Ko 16:21

Tiyarafenui sarisari ano siretin má
banten mino.

**PORI MA ESÉ ARAÍEN
TESARONIKÁ NANIN
BANTA MA UVAMAN
AMEIN BOMPON MINO**

(1 Tesaronika)

**Tesaronikai Esé Bompon Ma
Uvanteí Pákenai Afova Vaya Ino**

**Ma vompon ma
uvantein banta ino.**

Baya varen orin banta Pori ino.

Uvarein orana ino.

AD fifti-uvani (51) fin nafi áa fifti-tu (52) fin nafin uvanten mino. Mai maen Pori ma kan dádasí en ma monó doraríen eúkein pimpá ino.

**Ma vompon ma
uvantein baru ino.**

Koriní barurá ma mana orana ifo afápá mana un kádan biyontá ma váken mino. (Aposeri 18:11 fin ná onano).

**Ma vompon ma uvaman
amikhein kéká ino.**

Kan dádasí en ma Pori monó doraríen eúkiyáken Tesaroniká orin ma Kiriki nanin banta ano ará baéden ma monó tiyá ein kékái uvaman amikhen mino. (Aposeri 17:1-9).

**Nái ana vará ma
vompon uvanten nafino.**

Pori iníkan Tesaroniká nanin banta ano Yisasini kama vaya mo oyan amiyaimpin betin ayaen ákona uantano

siren Timotin tiantan orikharen ma Masedoniá bara fáké ma ovaránen Koriní eriven ma amusin baya me siamin ma iniren mai van mi esé bompon uvaren mino. Inká 1 Tesaronaika vá 2 Tesaronaika va san máan mi sen iniyan mino. Ma vara kípan akhempá ma yákó inain danasinta vá inká Yisasin ma ovaránen erin nain ma san ma Kiriki kayoi vompon mano ma sikhá ein mi sian amá ukhen mino.

**Pori Ma Tesaroniká Nanin Banta
Amusin Uantein Baya Ino**

1 ^cTéi Porin má Sairasin nú Timotin nú báí ma vompon uvaman Tesaroniká kákan barurá ma monó nanin banta váke ma Sifóe Tiyarafenu vá Bafan Yisas Karaisini máí kékasí ma ukhaonan uvaman amé uno.

Tiyarafenui sarisari vá ará kusin má ano siretin masá bano.

**Tesaroniká Nanin Bantai Yoran Nan
Ma Pori Amusin Uantein Baya Ino**

²Ena ena yamú tiretí ankan nan ovaré me iniyáke Tiyarafenu susu sianté timúkuan amiyá tiféuno. ³^dMáan tiyáké tiretí ankan ma Yisasintá mumunan iyáke ma yoriyaona vá ena nanin banta ará amire ma ayae yoriyáke ma inká tetisi Bafan Yisas Karaisin nan ovaránen erinten mino siren ma ákona inin kauráke ma kama yorarí iyaona van mi ovaré me iniré teti Sifóe Tiyarafenu timúkimpó tiamiyá tiféuno.

⁴Mumunan tiyofi sifá tiváeyan noe, Tiyarafenu ano siretin nan anunu uren be ina e sen aní ukhá tetí ankan afová ukhé uno. ⁵^eMai fara vara seyo, Yisasini Kama Vaya ma varé eré tiferuna mai vayafó ana va siamé tife raumpo Kantá Aunani ákona fóké bá ino. Mai vaya van tetí ankan puran tinon té afová ukhé

uno. Inká teti ma siretí ankan má bákuya setin tivútivá inka sonten nan mai ano yere maman purá ukhen mino. ^{6f}Mai ma Tiyarafenui kama vava ma vareona mai kokhon uman mái vare ompo Kantá Aunan manon ákona amíkaya veni amusin mái vare ono. Mai anon tetin tivútivá bá Bafani avúavá bá mamanan manaí eono. ⁷Máan ma eona anon Masedoniá barafa safi inká Akaiá barafa safi ma váken Yisas Karaisintá mumunan iyain nanin bantan aní uante ono. ⁸Mai siretí ankan ma Bafani vava sian dákó eona anon ída Masedoniá bá Akaiá bara vápin mana ufen ma aseín an den oren mifo minó akhempái oreraen mino. Mai fara vara seyo, inte akhempasá oriya rafu mai sireti ma Tiyarafenuirá mumunan iyaona vava anan tiyá iniyá tiferuna ída evaráné betin tiamiyá bá tifanté uno. ⁹Mai fara vara seyo, vetí ankan baípa ma oréku ma séin kama ureya sivireona avúava san betiyantá tian dákó iyáken mai ma varará ayarafenu kayo ma me ampire ará baéde fura sen para van oriyan ban Tiyarafenuirá ma mumunan iyaona vava vá dere siyá iné uno. ¹⁰Tiyarafenu ano ma ve Anin Yisasin ma furin pintena orun avían mantakhein ma inaru fáké ovaránen erin nain nan ma ave ukhaona van deren tiyá iné uno. Tiyarafenu ano ma ma vara kípan nain damú ma vei aran naná ma vanasi amaniná kain nain pintena Yisasi ano siya é iyan mino.

**Pori Ma Tesaroniká Barafá
Monó Dorarí Ein Baya Ino**

2 Mumunan tiyofi sífá tiváeyan noe, seti ma siretí ankan má o váké doriyá eruna yoran ída fara savifá o afeyóka siretiyantá afová ukha ono. ^{2g}Tireti vaonafá ínainpáké oronté maé

Firipaí barurá orékun ma mai ráke nanin banta ano ma setin tiren tisen iyaré ein baya siretí ankan afová ukha ono. Tiretí ankan Tiyarafenui Kama Vava siamiyákon ara ara aa fáké uman eriyaren mifo Tiyarafenu ano ákona simiyáká ída feranton kasaé beni vava siamiyaré uno. ³Máan tukhanti afovasá ono. Namu ineinefó tiretin ída mákádé kampun baya kayo siamiyá uno.

^{4h}Mai fara vara seyo, Tiyarafenu anon tetin nan bei Kama Vava fura sen banasi siaminten ne siren mai yoran timikhái yoriyá tiféuno. Béin tetisi ineine yaimiyain mi vái véin amusin ameno van doriyá umpo ma varará nanin banta va amusin ameno vara yoriyá tife rauno. Ída ino. ⁵Tiretí ankan afová ukhená Tiyarafenu avorá pura vayan tiamiyá uno. Tiretin kampun tirékuya setisi vayará anunu uareya manáa yaná timeno vara siretin kampun tiantiya rauno. Ída ino. ⁶Tiretí ankan nafo áa ena kéká ano fi ída kákan bí timeno van mai yoran doriyá tiféuno. ⁷Yisas Karaisini aposeri^{††} kékái váké tireti vaonafá manáa yanasinta varano van kasaé inanten nunaren mifo anóe ano ma arará iyampon nan kuveín an déi siretí ankantá kamaé dafisé uno. ⁸Tiretí ankan nan moeké tinunu uré paséi Tiyarafenui Kama Vava ana va siame raumpo setisi minó danasinta vái amé tiféuno.

⁹ⁱMumunan tiyofi sífá tiváeyan noe, setí ankan ma manáa yana san ékun ma siyain uman ída varano van mi inuran má bayan má miyan baran dorarí iyá uno. Máan tiyái Tiyarafenui Kama Vava ma siretin tiamé iyaruna van ídá ovaré me iné iya rafono. ¹⁰Tiretí ankan má Tiyarafenu vá ano afová ukhen ná pura sen puntáken ma kantasí ukhein

^{††}2:7 Aposeri maen Tiyarafenui vava varen orin banta ino.

avúavápói mumunan ma iyaona nanin banta avorá doré iyá tiféuno. ^{11j}Para vara seyo, siretí ankan purase afová ukhen ná afóe ano ma ve akhafanará kama yafisirí iyainí éi sireti mana manará kamaé dafisé iyá tiféuno. ¹²Kama vaya fókéi siretin ará ákona uantádeí Tiyarafenu avorasá kama e vasin onano siré tiamé iyá tiféuno. Beni khakhan ákona mamareya vei yafisin aúpin ben má ba oriya vano van ariyan mino.

**Pori Ma Tesaroniká Nanin
Bantai Mumunan Nan Ma
Susu Siantein Baya Ino**

^{13k}Inká beni vaya ma siretin tiaméku mae ma vara ráke vantai vaya va siyan naifo Tiyarafenui Vaya inon tireyan kama e iniyanái ena ena véin tusu sian tiyá tiféuno. Mai vaya ma kama e inireya mumunan eona kékápin mi ákonaen doriyan mino.

^{14l}Máan tiyan mifo mumunan tiyofi sífá tiváeyan noe, Yudiá barafá ma Tiyarafenui vanasi ano Yisas Karaisintá mumunan ein nan ma Yutan kéká ano uman amiyaré einí ukhein uman manan tiretí kéká ano amikhen mino.

^{15m}Manáa Yutan kéká anoi vetíi sakanampa vanta kayo vá Bafan Yisasín má aruan púkaren mi saréa setin má dere sirono van mi yakhafiyán mino. Máan tiyáken minó nanin bantan namuroí uantiyákan Tiyarafenu ano ída amusín iyan mino. ¹⁶Mai fara va ino. Tiyarafenu ano ena anan nanin banta evaránen aviran nain nan péden beni Kama Vaya ma siamiyaruna aa iyariyan mino. Máan ma iyain avúavá anon betíi ume mamán mími doní iyáin mi Tiyarafenui aran naná ano vetin amaniná inainpáké dákó en mino.

**Timoti Ma Tesaroniká Doriyain Nan
Ma Pori O Onano Van Ein Baya Ino**

¹⁷Máan tukhen mifo mumunan tiyofi sífá tiváeyan noe, siretimpin ma vain Yutan kayo finté manáa ano setin tirono van íká mai anarái sító máará tiretin me ampírákéi ovaráné e onano van túkáké kákan ineine iyáké aa van dosiyá tiféuno. ¹⁸Mai fara vara seyo, setí ankan tiretin o onano siré teyantá ara ara aa van dosiyákun mifo Ban Anon mano setisi aa iyaré iyan mino. ¹⁹ⁿMáan té iyan mifo Bafan Yisasi ma erin nain damú náinasá baré intí béin mo aní é tifékun ná tetisi yoran nan amusín uren miyan timinten nafino. Ída ifo siretíi vaona Bafan Yisasi ma ovaránen erin nain damú ma ven avorá o mantakhesí ma siretin oniyáké anan kákan timusín onté uno. ²⁰Tiretí ankan nan kama kéká inon tiyákayan kákan timusín timiya ono.

**Pori Ma Tesaroniká Orino Van
Timotin Tiantein Baya Ino**

3^oMáan tukháí siretin nan ma ída oniyaruna van ma ineine é oriyaruna ano inin tiriyaimpin mi Atensí barurá bano van iné uno. ^{2p}Máan tukhéi setin tifá tiváe Timoti ma Tiyarafenui yoran banta váken ma Karaisini Kama Vaya siamiyain banta anan tianteruna mai setisi varu varen tiretin o oniyáken ayainti mumunampin ákona ukhe van nono. ^{3q}Béi anon ayainti mai ma afoká in nain uman kayofin mantaan ákona in nono. Máan uman kayo anon monó nanin banta simaniná afoká inté iya afová ukha rono. ⁴Tiretí ankan má ma o váké maé mai uman mano setin timaniná dákó inten ne sé tiamikharé ékun

j2:11 Apo 20:31 k2:13 2Te 2:13 l2:14 Apo 17:5

m2:15 Apo 9:23, 29; 13:45, 50; 14:2, 5, 19 n2:19 Fir 2:15-16; 4:1; 2Te 1:4

o3:1 Apo 17:15 p3:2 Apo 16:1-3 q3:3 2Ti 3:12

mi mai uman mano fura sen dáko íkaya siretí ankan afováe ono.

⁵Mai fara vara seyo, mai van in-ékun tufá ída kama iyaimpin mi siretí ankan inté eyá mumunan ukhe fono siré afová ono van Timotin tiantékun oren mino. Mákasin banta ano akhenóka in-tiya siretíí mumunan me ampesin tetisi yoran mano fa savifá o afeyoran nain nan mi sikhokho van iyá uno.

Timoti Ma Seti Nan Amusin Baya Sein Baya Ino

⁶^rOrikharen taréa uron mi Timoti ovaránen me sisimen tiretíí mumunan nan para ákona ukhan ena ma avábá in avúavá moéken bariyan mino síká iné uno. Tetí ankan ma fefá tiretin o on-taréeruna van ma ovare me iniyákeya setin nan moéke amusin pinté tonano van iya ono. Máan tiyan náí setin má dere simusin pinté tiretin o onano van ineine iyá uno. ⁷^sMáan tухáí mumunan tiyofi sífá tiváeyan noe, siretí ankan ma ákona mumunan iyaona vava ma iné tiferuna anon kákan uman ma variyaré eruna maman mumunan ákona usinten mino. ⁸Tiretí ankan ma Bafantá ákona mumunan para ukheona vava ma inékun mai anon tetin evaránen ákona usinten mino.

⁹Tiretí ankan ma mumunan iyaona van mi Tiyarafenu avorá kákan timusin iyá umpo mai inté uresá tiretin nan béin tusu siantante rafuno. ¹⁰Tiyarafenu ano aaf usintantí tiretí ankan baonafá orivé manáa yaná ma mumunan iyáke me áuntanona aya ono siré ena ena inuran má bayan má timúkiyá tiféuno.

Pori Ma Tesaroniká Orin Aa Van Dosein Baya Ino

¹¹^tMáan tiyá tifé umpo setin Tifóe Tiyarafenu vá Bafan Yisasin má ano vá aaf usintantí tiretí ankan baonafá ainé orono. ¹²Tetí ankan ma siretin avábá iyarunaíen Bafan mano siretin avu inti vá ben moéken avábá in maran iyáke ena nanin banta yere avábá ono. ¹³Máan tesin ná Karaisi ano siretí ankan ará ákona uantantiya ída fain má aau vá baré inti funtákein nanin bantaí ukhare Bafan Yisasi ma vei kantasi ukhein kéká bá erin nain damusá teti Sifóe Tiyarafenu avorasá o mantano.

Tiyarafenu Ma Amusin Ukhein Avúavaká Ma Van Baya Ino

4 Mumunan tiyofi sífá tiváeyan noe, Tiyarafenu ma amusin in nain avúavaká bano van mi Bafan Yisasin aviká tiretí ankan aní ukhé uno. Máan tukhare saréa mai avúavá bariyan ná moéke varano van mi ákonaé tiamiyá tiféuno. ²Mai fara vara seyo, Bafan Yisasin ákonará pefái vava siaméku afová ukha rono.

³^uTiyarafenu ano siretin nan kantasi ukhe vano van mi inikhen mifo famúkuí ma in avúava sinta vará perano. ⁴^vInká kantasi ukhein avúavá póké ma siretíí aurá daffan ákona ureya vasin maen ena nanin banta ano amo siyantí van nono. ⁵Mai ma monó ída inin nanin banta ano ma asuse avúavapin báken Tiyarafenu vá beni avúavá bá ída afová ukhen ma vain an ída yakheya vano van mino.

⁶Máan avúavá póké ída vá mákade monó afá aváeyan aná ona vare nono. Para vara seyo, máan avúavá ume ma variyain kékái Tiyarafenu ano uman aminten ne sé pefái ákonaé tiamé tiféku

afová ukha rono. ⁷wPara vara seyo, Tiyarafenu ano setin nan namu avúavápin bano vara sarakhen naifo mai kantasí ukhen bano van mino. ⁸xMáan tukhan maen mai vaya ma yurafuriyain kéká ano varará bantai man baya ída yurafuriyan mifo Kantá Aunan ma amikhein Tiyarafenui oyan amiyan mino.

Pori Ano Ma Tesaroniká Nanin Bantai Ará Ákona Ein Baya Ino

⁹yMáan tiyan mifo ena ma avábá in avúavá páke Tiyarafenui vanasi aní ono vara ma vompon uvaman amiya rauno. Ída ino. Para vara seyo, Tiyarafenu ano fefái ven avábá in maran ma in avúavá aní íkaya afová ukhen ná uno. ¹⁰Máan tukheyai sireti ano Masedoniá barafá ma vain mumunan nanin banta kama ure avábá iya ompo mai avúavá moéke varano van mi ákonaé tiamiyá tiféuno. ¹¹zMáan tiyáke kama khumanin ma o yosin nará pefá ma siamikhá erunaí eya siretí ina yanasintará inin kaúdákeya au ma ayain doran ná ákona e yorano. ¹²Máan tesin maen afokhampin ma vain nanin banta ano sireti ma vaona avúava san amo siyanti váke mae ída moni san o afasí iyá uno sire ena vaípa inantin nono.

Bafan Ma Ovaránen Erináí Pákena Vaya Ino

¹³Mumunan tiyofi sífá tiváeyan noe, mumunan uven ma fúká ein kéká ano ínainpáké intesá inten nafi mai sireti afová ukha ono. Máan tukheya mai ma afokhampin báken ma Yisasini ovaránen erin nan ma ída avé ukhen bain kéká an deya moékan arunanápin ída vano van muno. ¹⁴aMai fara vara seyo, Yisasi ma fúkaren masí pinté orun mantakheintái setí ankan mumunan ukhé

tiféuno. Máan tukhéi véi ma ovaránen erin nain damú mai ma mumunan uven púká ein kéká Tiyarafenu ano evaránen avían mantarantin Yisasin má erinten minon té mumunan iyá tiféuno.

¹⁵bBafan pintéi ma vaya fura sen erikhá tiamiyá uno. Bafan ma erin nain damú ma ma ayun para vá tiferuna kéká ano mai ma mumunan uven púká ein kéká ída me ampiré teti nare oró tifanté uno. ¹⁶Mai fara vara seyo, Bafan mano veyantá inaru fáké eriyán ákonará baya sintin maen ánon enisori ano kákaníen ovarantin Tiyarafenui ufen mano asinten mino. Máan tintin mumunan uven ma fúkáin nain kayo nare anon masí pinté orun mantanten mino. ¹⁷Mantavintí mai ma ayun para vá ó tifanuna kéká bá ano maman manafiní uvé ayompin Bafan o oniyáké ben má típá o vá tifanté uno. ¹⁸Máan tukhein nará ma vaya kayo fóké mumunan ákona uantan maran ná ono.

Yisasi Ma Ovaránen Erin Nain Nan Ma Útain Baya

5 Mumunan tiyofi sífá tiváeyan noe, mai yanasinta ma afoká in nain damú bá áau vá pákena ída kanaí é ma vompompin uvaman amenté uno. ²cMai fara vara seyo, Bafan ma erin nain damú mai ída ma afová íkan umoyan banta ano ma inuran erein an mí yanté iya siretí ankan afova suron ukha rono. ³dBanasi ano ma siyáken inka kama yamú afoká ein kamaé bátifanté uno ma siyain má anan anasí ano ma inamun nan iniyáken ai san auriyain an dakhein uman betin aminten mino. Máan ma intin maen betí ankani karan orin aa ída vanten mino.

^w4:7 Ibu 12:14; 1Pi 1:15-16 ^x4:8 Ruk 10:16; 2Ko 1:22 ^y4:9 Yon 13:34

^z4:11 Efe 4:28 ^a4:14 Rom 14:9; 1Ko 15:3-4, 12 ^b4:15 1Ko 15:51-52

^c5:2 Mat 24:42-43; 2Pi 3:10; Rev 3:3 ^d5:3 Mat 24:39; Ruk 21:34-35

⁴Máan tinten mifo mumunan tiyofi sífá tiváeyan noe, siretí ankan ída anukheimpin ma vainí ukháesin ma umoyan banta an den Bafan ma erintiya ída anúdin nono. ⁵^eMai fara vara seyo, siretí ankan panu vá kakhán avúavá bá ma non kéká ono. Tetí ankan duntein avúavápin na váké anukheimpin na nó tife rauno. Ída ino. ⁶Máan tukhé tife umpo ída vá manáa kéká an davé tuun bariyá báké tuu sapé tikherá dafíké bá tifano. ⁷Mai fara vara seyo, auun ma varano van ein kéká ano inuran mi varé iyan mino. Inká óen non ma nan kéká ano inuran mi naren óen é iyan mino. ⁸^fMáan tiyain mifo kakhán aúpin ma vá tiferuna nanin banta ano setisi sivútivá dafíbesá mumunan avúavá bá ena kéká ma ará amin avúavá bá man tanko an ná dá tifano. Tiyarafenu ano ma sivirano van ma sikhein nará ákona inin kaúde maman kápa kamamó an daré uré tifékun ná bano. ⁹Mai fara vara seyo, Tiyarafenu ano vei aran daná tetin timaniná kaono vara anunu ukhen naino. Ída ino. Tetisi Bafan Yisas Karaisin pinté uaré tetin tiya uré tivirano van mi inikhen mino. ¹⁰^gTetí ankan púkaré tife rafu áa ayun para varé tife rafu mai véi ma erin nain damú ben má o vano van mi setin nan e fúken mino. ¹¹Máan tukhein nará mai ma variyaona avúavasí eya Tiyarafenurá ma mumunan in avúavá ben ákona uantan maran ná ono.

Pori Ma Sipá Ákona Uantan Baya Sein Mino

¹²Mumunan tiyofi sífá tiváeyan noe, mai ma Bafani yorarí iyáken ma siretintá dafikein kéká aránaópasá bano. Betí ankan manon tiretin aúbaná

ákona yorarí iyáken ída namu avúavá barano van ákonaen baya siamiyan mino. ¹³Máan tiyan mifo vetin aránaópasá báke veti ma yoriyain nará aúkáké moéke avábá ono. Máan tiyáke vetin masá manafin ará kuse vano.

¹⁴^hMumunan tiyofi sífá tiváeyan noe, mai ma vetí yoran mo ampiren avesara iyain kéká ákona e vaya siamesin ída avesara ino van mi siamiyá uno. Akhokho van ma iyain kékái mumunan ákona uantiya inká ma vara ráke avúavá ano ma ineine máden asuse iyain kékáká kama e vá dafiseno. Máan tiyáke minó nanin banta vá ará manafiní ureya vem-páké bano van mi siamiyá uno.

¹⁵ⁱMáan tiya mae namu avúavá ma uantan nain kéká anona ída vá namu avúavá uantiyáke vetin má inká ena kéká bá kama avúavasí in maran mana vá ono.

¹⁶^jMáan tiyáke minó damú amusin mana vá iya vano. ¹⁷Inká amúkin avúavá ída vá me ampeno. ¹⁸^kUman nafi kama yana safi ma siretin amaniná afoká inti mae vá minó damú tusu ana vá teno. Mai fara vara seyo, siretí ankan Yisas Karaisini kékasí ukhen nan mi Tiyarafenu ano mai yanasinta varano van anunu ukhen mino.

¹⁹^lKantá Aunan ma yoriyain aa ída vá iyarano. ²⁰Kantá Aunan manon inin amiyan mi sakanampa veya siyan mifo ída vá inian paen danasí ono. ²¹^mMai ma siamin nain baya kama e yaíde afová ure vá puntákein baya máa vá pákano. ²²Minó namu avúava sinta vará perano.

Pori Ma Sipá Amusin Uantan Baya Sein Mino

²³ⁿArá ma kusiantan Tiyarafenu ano vá minó avúavasí ma inonafin ná ma-

^e5:5 Rom 13:12 ^f5:8 Ais 59:17; Efe 6:14, 17 ^g5:10 Rom 14:8-9; 1Te 4:14

^h5:14 2Te 3:6, 11 ⁱ5:15 Rom 12:17; 1Pi 3:9 ^j5:16 Fir 4:4

^k5:18 Efe 5:20 ^l5:19 Efe 4:30 ^m5:21 1Yn 4:1 ⁿ5:23 2Te 3:3

man kantasí uantano. Inká tiretíi aunan má aú iyampon má minó bukhafa vá ano avusese ukhanti oriya vare vá tetisi Bafan Yisas Karaisi ma ovaránen erin nain damu sá o afoká ono. ²⁴Mai ma siretin arakhein Tiya rafenu ano véi ma sirein baya ánain pura sen bákuriyain bantin pasen mai ma sirein daná baranten mino.

²⁵°Mumunan tiyofi sífá tiváeyan noe, setin nará amú kusintano.

²⁶Tiyarafenurá ma monó tiyain nanin banta ano ma avábá iyain avúavá kasá ben avábá in maran ono.‡‡

²⁷Minó mumunan tiyofi sífá tiváeyampin ma vompon dankafesin inino van mi Bafan aviká ákonaé tiamiyá uno.

²⁸Máan tukhantin tetisi Bafan Yisas Karaisini sarisari ano vá tiretin má bano.

‡‡5:26 Kiriki vaya fintéi *Tiyarafenurá ma monó tiyain nanin banta ano ma kantasí ukhein amónan maran iyain nan tikhen mino.*

°5:25 Kor 4:3; 2Te 3:1

**PORI MA KAN DÁDASIÉN
TESARONIKÁ NANIN
BANTA UVAMAN
AMEIN BOMPON MINO**

(2 Tesaronika)

**Kan Dádasí En Ma Tesaronikai
Vompon Ma Uvanteí
Pákenai Afova Vaya Ino**

**Ma vompon ma
uvantein banta ino.**

Bayá varen orin banta Pori ino.

Uvarein orana ino.

AD fifti-tu (52) fin mi uvaren mino. Esé ma uvarein bompon dan orivin maen manáa viyontá báken mi uvaren mino.

**Ma vompon ma
uvantein baru ino.**

Koriní barurá ma mana orana ifo afápá mana un kádan biyontá ma váken mino (Aposeri 18:11 fin ná onano).

**Ma vompon ma uvaman
amikhein kéká ino.**

Tesaroniká barurá ma monó tiyain nanin banta ino.

**Nái ana vará ma
vompon uvanten nafino.**

Esé aráí in bompon ma uváden maen mai oyampáké Pori iníkan Yisasini ma ovaránen erin nain baya ano vanasii ineine máden asuse iyaimpin mi evaránen

ma vompon uváden mi maí damú ma yákó inain baya sian amá ukhen mino.

1 Téi Pori má Sairasin nú Timotin nú bá anon Tesaroniká kákan barurá ma mumunan nanin banta váke setin Tifóe Tiyarafenu vá Bafan Yisas Karaisini kékasí ma ukhaonafin mi ma vompon uvaman amé uno. ²Tifóe Tiyarafenu má Bafan Yisas Karaisin má pinté ma eriyain tarisari vá ará kusin má ano vá tiretin má bano.

**Porini Susu Siantan
Má Amúkin Má Baya Ino**

³Mumunan tiyofi sifá tiváeyan noe, funtákein avúavá baréi siretin nan Tiyarafenu susu sianté iyá uno. Mai fara vara seyo, siretí ankani mumunan mano mo ákonaen kákani iyákayan ben moéken ará amin maran iya ono. ⁴Ara ara uman bariyáke ma mai uman kayo van ída ininto ma ákona e mumunan iya ma yorarí iyaona van mi minó akhempá ma Tiyarafenu má mumunan iyain kékápin ma orivé maé tiretí ankan nan amo sé iyá uno.

**Bafan Yisasi Ma Erin Nain Damú Ma
Banasii Avúavá Daimin Nain Baya Ino**

⁵Máan tiyá umpo mai ma variyaona uman manon aníen mi Tiyarafenu ano funtáden daimiyan pasen mi siretin e avían bei yafisimpin kainten mino. ⁶Tiretin ma uman amiyain anonafá Tiyarafenu ano vetin dáiden uman aminten mino. ⁷Máan tinten mifo setisi Bafan Yisasi ma vei ákona enisori kayo vá ma inaru fáké ira anamuná bá ma erin nain damúí mai ma uman bariyá ótitanuna kéká tivíkan timinten mino. ⁸Mai ma erin nain damúí Tiyarafenu ma ída afová en ma inká Bafan Yisasini kama vaya ma oyan amiyáin nain

^p1:2 Rom 1:7 ^q1:4 2Ko 7:4; 1Te 2:19
^t1:8 Ais 66:15

^r1:6 Rom 12:19 ^s1:7 1Te 3:13

kéká uman aminten mino. ^{9u}Baya ma ída iniyáin nain nanin banta ano ída kípan namu uron ukhein uman mamaren Bafan má beni kakhakhein ákona vái ádé ída vanten mino. ^{10v}Bei ma ovaránen erin nain damúí mai yanasinta afoká inten mino. Máan ma intin maen kantasí ukháin nain nanin banta ano véin amo siyan aví daní iyantiya siretin má deren maifin ban nono. Mai fara vara seyo, seti ma ontaré ma siameruna vayarái mumunan ukhare ono.

Pori Ma Amúkein Baya Ino

^{11w}Máan tukhein nan mi siretí ankan Tiyarafenu ano sesi funtákein nanin banta e siren béi ma araren avíká einíen bei ákonafó tiretí ankani kama ineine vá kama avúavá bá ma mumunan mano afoká uádiyain kanaí ino van mi ena ena simúkuan béin amiya uno. ¹²Minó nanin banta ano siretíi kama avúava san Bafan aví daní intin maen inká béi ano siretin aví daní ino van mi simúkiyá uno. Tetisi Tiyarafenu vá Bafan Yisas Karaisin má sarisari ano siretin má báken mai yanasinta maman dákó inten mino.

Bafani Erin Ádé Iyantín Ma Aní Daná Dakó Inain Baya Ino

2 Mumunan tiyofi sífá tiváeyan noe, setisi Bafan Yisas Karaisi ma erintí ma ven má manafin bá tífanuna vaya siaméku inin nono. ²Manáa vanta ano ma oriven Bafani yamú inka erikhen mino ma sin nain baya van ída vá anú duman duman ono. Máa siren ma setí ankan nan mai vompon uvamádan erikhen mino sen ma inká sakhanampa vaya sen ma intiya mai vaya ída vá ineno. ^{3x}Máan ma sin nain baya kayo ano ída vá tiretin kufa uádano. Mai fara

vara seyo, Yisasi ma ída erikhantin maen kokhon nanin banta ano Tiyarafenu vá aruviyantín maen mai ma man baya ma átakharé iyáin nain banta maman dákó inten mino. Mai vantan Tiyarafenu ano kákan uman aminten mino. ^{4y}Mai vanta ano ve aví daní uren maen Tiyarafenu ma araren monó tiyain oyampá baya siren beni kákan monó namumpin un kumamen téi Tiyarafenu umpo sen tiví daní ono sinten mino.

⁵Téi ma siretí ankan má báké maé mai vaya fefa suron mi siamikhá umpo ídá ovare me iniya rafono. ⁶Intéa yaná anó béin pákaran ná baren nafi mai saréa inka afová iya ono. Mai fara vara seyo, veni yamú ma erintin mi yákó inten mino.

⁷Man baya ma átakharéin ákona ano aúpá báken pefái yoriyái fura sé tiamiyá uno. Máan tukhen mifo mai ma iyáká inain banta ma yo avían kaúdantin mi mai yaná dákó inten mino. ^{8z}Mai ma man baya átakharé iyá inain banta ano ma e unen afoká édavuvintin mi ínaimpáké ma Bafan Yisasi erinten mino. Eriven maen bei ákona vayafó mai vanta man barasí uren khakhan ákona fókéi mai vantai ákona yo varanten mino. ^{9a}Man baya ma átakharéin banta ma erin nain mai Ban Anoni ákona fói yoriyan mino. Máan tiyan pasen enará ukhein avúavá bá inká aní daná bá maman afoká inten mifo mai kampun danasinta ino. ¹⁰Tiyarafenui aran nanápin ma vain nanin banta kayo mai vanta ano ara ara mákasimpó betin máden kufa uádante mino. Mai fara vara seyo, fura vaya ano vetin ayaintin mumunan ino van iyan mifo mai van beti ída anunu ukhen mino. ¹¹Máan tukhantin pasen Tiyarafenu ano ákona

^u1:9 Ais 2:10 ^v1:10 Kor 3:4 ^w1:11 Kor 1:9; 1Te 1:2-3

^x2:3 1Ti 4:1; 1Yn 2:18; 4:3 ^y2:4 Isi 28:2; Dan 11:36

^z2:8 Ais 11:4; Rev 19:15 ^a2:9 Rev 13:11-13

mákasin tiantantin mai kéká máká-dantin mai kampun bayará pura ino sinten mino. ¹²Máan tintin maen mai ma Tiyarafenui fura yanáká ma ída mumunan inton ma namu avúava san ma anunu ukharéin nain kékái Tiyarafenu ano ínaimpá daíden uman aminten mino.

Mumunan Nanin Banta Ano Ma Mantaan Ákona In Baya Ino

¹³^bMáan tukhein nan mi mumunan tiyofi sífá tiváeyan noe, Bafan mano ma anunu uren avábá uantiyain monó nanin banta van mi ena ena yamú Tiyarafenu vaípa tusu siantiyá tiféuno. Mai fara vara seyo, setin ma evaránen tivíkein daná afová ino siren mi esé araiíntá Tiyarafenu ano siretin aní ukharé in mi Kantá Aunani funtákein doran mano sireti maman avusese en mino. Máan turen mi mai ma fura yanáká mumunan iyaonarái evaránen aviren mino. ¹⁴Mai kama veya ma siamé tiferunarái setisi Bafan Yisas Karaisini kakhan aúpin bano van béi siretin arakhen mino.

¹⁵Máan tukhein nará mumunan tiyofi sífá tiváeyan noe, mai ma vompon po safi áa soo fo safi ma siamiyáké afova ameruna veya vá pákaan ákona uveya mairasá mantano.

¹⁶Tetisi Bafan Yisas Karaisin má Tifóe Tiyarafenu vá ano setin tivábá uren mi vei sarisari fóké para van oriyan ban ará ákona vá inká kamaen báken ma avein avúavá bá timen mino. ¹⁷Béi ano vá tiretin ma minó kama avúavá bariyaona vá inká kama veya kayo ma siyaonafin masá ákona uantano.

Porin Amúkuantano Van Ma Inaúkein Baya Ino

3 Mumunan tiyofi sífá tiváeyan noe, ma sípá bayan té uno. Mai ma Bafani kama veya ma siretí ankan inire ma mai aránaópá baona veya minó akhempá tiamé orera ékun banasi ano iniren mai veya aránaópá bano van mumpo vá amúkusintano. ²Amúkesin ná namu vanta kayo ano ma setin uman timiyain pinte vá Tiyarafenu ano siya ino. Mai fara vara seyo, minó ano ída Bafantá mumuman ukhen mino. ³Máan tukhen mifo Bafan mano ma sirein baya ánain pura sen bákuriyain mi vantin tiretin ákona amiren dafíkantin Ban Anon mano siretin ída uman aminten mino. ⁴Mai ma siretin nan barano van ma siamé tiferuna yanasinta kama e variyan nan Bafan mano setin ineine simí afová ukheruna ínaimpá deren mai avúavá pákaresin banten mino. ⁵Áesin ná Bafan mano siretin ayainti vá Tiyarafenu ano ma vanasi avábá iyain má inká Yisas Karaisi ma mantaan ákona uven uman barein má afová ure vá mai ma einí ono.

Ída Ma Avesara In Baya Ino

⁶^dMumunan tiyofi sífá tiváe oe, setisi Bafan Yisas Karaisin avíkái ma man baya siamé uno. Mai ma siamikhé tiferuna veya ánain ma ída yakhafiyán ma avesaraen noin kéká áde ída vá orono. ⁷^eMai fara vara seyo, siretin má ma váké maé tetí ankan ída sivesara iyákuya fefái afová ukha ompo setinti sivítivá ánain mana vá bákurono. ⁸Ída mana yunan para variyá umpo miyaní uré anan bariyá uno. Máan tiyái siretin ída uman ameno van pasé inuran má baya má ákona yorarí uré mai yanasinta variyá

^b2:13 Efe 1:4; 2Te 1:3 ^c3:4 2Ko 7:16; Kar 5:10 ^d3:6 Rom 16:17

^e3:7 Fir 3:17 ^f3:8 1Te 2:9

uno. ⁹gTetí ankan kasaé dunan inan-tiré nanunaren mifo mai avúavá ódareya mai ánain bákurono van mi siretin aní é uno. ¹⁰Para vara seyo, siretí ankan má ma váké maé ma man bayan tiamikhá uno. “Mana vanta ano ma avesara uren ída yoranten maen mai vanta ano ída vá dunan nano.”

¹¹hMáa sé tiamikharéi inékun tiretin aúbanté manáa ano avesaraen nóken ena kékái yoran aa iyáden avesera amiyan ne sen me sisimí iniyá tiféuno. ¹²iMáa sé iniréi Bafan Yisas Karaisin avíká máan nanin banta van manará báken dunan dóden nano van mi ma man baya siamiyá uno. ¹³jMáan tiyan-tiya mumunan tiyofi sífá tiváeyan noe, puntákein avúavasí in nan ída vá avesara ono.

¹⁴Ma vompopin ma siamé tiferuna vaya ánain ma ída yakhafin nain nanin banta vá ída o munesin ná betíi avúava san ayave van ino. ¹⁵kÍda vá béin namuro an de vá afá aváen ma man baya siameinisá ono.

Porini Amusin Baya Ino

¹⁶Ara ara uman mano siretin amaniná erinten mifo áesin ná ará kusin benafo Bafan mano ena ena ará kusin amiren ná tiretin má bano.

¹⁷Téi Pori anon te siyampókéi ma kípan baya uvádéi sesi aní daná mairá kaé uno. Minó bompon kayorá máan manan ukhé uno.

¹⁸Tetisi Bafan Yisas Karaisini sarisari ano siretin má banti vá bano.

**PORI MA ESÉ ARAÍEN
TIMOTIN UVAMAN
AMEIN BOMPON MINO**

(1 Timoti)

**Timotini Esé Bompon Ma Uvanteí
Pákenai Afova Vaya Ino**

Ma ma kanú manaú bompon ma uvaman monó doran banta amikhein mai 1Timotin má 2 Timotin má inká Taitusin ma san ma sian amá ukhein baya maen AD sikisti-fo (64) ráké sikisti-seveni (67) ráké ma aúban mi uvanten mino.

Oo siádan baya vá o ukí páké ma erikhein baya vá ano siyáken AD sikisti-fo (64) fin ma Sisa Nero ano ma monó nanin banta ariyá eimpin pasa Porin aren naifo ída ino. Karavusi finte utúantan maen evaránen bei yoran mo aráf uren ma varu kayofin naren eúken mino. Kiriti vá Masedonia vá Akaiá barafin ma vain baru Nikoporisi vá Troasi vá Miretusi vá inká Korini vá Efesasí bá ino. Inká Speini varafá inan orikhen ne sen iniyan mino. Monó doraríen noren enóbíkan evaránen karavusi fáken mo khauren maen kó tiantáden AD sikisti-seveni (67) fin aruan puren mino. Béi ma monó doraríen nóken mi esé ma Timotin uvaman amikhein bompon má inká Taitusin ma uvaman amikhein bompon má uvanten mino. Inká kó tiantáden purino ma sirákan mi kan dádasí en uvaman Timotin amen mino.

**Ma vompon ma
uvantein banta ino.**

Baya varen orin banta Pori ino.

Uvarein orana ino.

AD sikisti-tari (63) ráké sikisti-sikisi (66) ráké ma aúban mino. Mai maen Porin ma karavusi fintena utúantan ma evaránen bei yoran mo yorein pimpá ino.

**Ma vompon ma
uvantein baru ino.**

Masedoniá inon ten iniyan mino.

**Ma vompon ma uvaman
amikhein banta ino.**

Timoti maen Porini eyo iyampon báken kama arona varen ma Pori má Efesasí o monó doran bantaí ein pumara ino. Ínaimpáké Pori ma Masedoniá barafá oríkan maen béi monó dorarí onovan Efesasí para varen mino.

**Nái ana vará ma
vompon uvanten nafino.**

Timoti maen pumaran bákan mi mantaan ákona uven monó dorarí ino van ará ákona amin baya siamiyáken kama ineine amikhen mino.

Pori Ma Susu Sein Baya Ino

1 Tetin tiya uren ma evaránen tivíkein Tiyarafenu vá inká tetin ovaránen e sivrante ne siré ma ave ukheruna vanta Yisas Karaisin má ano ma aní uren aposeri yoran timikhein banta séi Pori anon ma vompon uvaré uno.

²¹Monó avúavápin ma se sanin uronan dakhein banta Timoti vaípái ma vompon uvamadé uno. Teti Sifóe Tiyarafenu vá tetisi Bafan Yisas Karaisin mái sarisari vá arunaná bá ará kusin má ano vá en má bano.

¹1:2 Apo 16:1-3; Tai 1:4

Kampun Monó Baya Sin Kayoi Aaman Vaya Ino

³Téi ma Masedoniá orono van iyáké maé éin nan Efesasi bákeya vá mai ma kampun bayafó ma vanasi afova amiyain kéká timesin ída máan tino van mi éin me ayópá é uno. ^{4m}Mai ma vetí anafu aráoni avúavá ma mamádáken ma ara ara kampun baya kayo e sen oriyan bain mano ída kanaíen betin ayaintin Tiyarafenurá mumunan uren betin ma aya ono van iyain daná afová inten mino. Máan tinten mifo mai ano vetí ineine anan máden asuse urantin maen aruve asivein avúavá anan baranten mifo ída vá áesin mai avúavá barano. ⁵Mai van mi Yisasin ánain ma vákuriyain kékápin ná ena ma moéken avábá in avúavasá bano. Betí ankan aú ma avusese intin ma kama yaná bá namu yaná bá ma yaíden afová in ineine ma vantin inká pura mumunan má ma vantin mi ena ma moéken avábá in avúavá afoká inten mino.

⁶Máan tinten mifo manáa kampun afova ma amin kéká ano mai avúava sinta inka me ampiren beni ana ída vain baya sen orera iyan mino. ⁷Betí ankan nan man baya afová ukhein kéká ino sen banasi ano afová ino van mi inikhen mino. Máan tiyan mifo mai ma kana siyá uno siren ma vanasi siamiyain bayai ana ída uron mi afová ukhen mino.

⁸ⁿTetí ankan ma afová ukhé tiferuna vanasi ano ma Tiyarafenui man baya ánain ma funtáden bákurin manon man baya kama ukhen mino. ⁹Máan tukhen mifo funtákein avúavá ma variyain nanin banta ina va man baya uvanten naino. Ída ino. Man baya ma yurafuriyáken ma Tiyarafenui vaya átakharé iyain kéká bá ume avúavá ma variyain kayo vá inká Tiyarafenui kantasí ukhein

danasinta ma oyan amin kéká bá ino. Inká béin nan ma afon karí iyain kéká bá be anóe afóen má ena nanin banta vá ma aruan puriyain kéká bá ino. ¹⁰Inká pamúkuí ma iyain kayo vá banta ano fi áa anasi ano fi ma vaéden beraran pamúkuí iyain kéká bá inká banta ano ma arona vanta avíden sarí iyain kayo vá ino. Inká kampun baya sin kéká bá ena nanin banta iyáantáden ma ída avúavápin kaé iyain kayo vá inan man baya van mino. Banasi ano ma mai avúava sinta vá minó ara ara namu avúava sinta vá ma variyain manon Tiyarafenu ano ma fura sikhein avúaváká bano van ma setin afova simikhein baya ánain ída yakhafiyain mino. ¹¹Mai ma setí ankan afova simikhein mai Tiyarafenui fanu sikhein kama vaya ino. Tiyarafenu ano séin nan mai kama vaya vá banasi siameno sikhen mino.

Tiyarafenui Sarisari Van Ma Pori Susu Sikhein Baya Ino

^{12o}Tetisi Bafan Yisas Karaisi ano séin nan kanaíen beni yorará inten mino siren mi séin aní uráken ma ákona simiyain nan mi véin tusu siantiyá uno. ^{13p}Ppéfá kama anan iyá uno siré maé oyampá baya siyáké ben ánain ma vákuriyá ein kéká dakhádé ariyaré uno. Máan tiyaré umpo Bafan mano ma séin nan arunan uren tivirein mai fara va ino, séi ída véin afová é mumunan ukharé ékun mino. ¹⁴Bafan Tiyarafenu ano séin moéken tarisari uren mi Yisas Karaisimpin ma vain mumunan má avábá bá maman téin túpin bíkasinten mino.

^{15q}Ume nanin banta aya uré avirano van mi Yisas Karaisi ma varafin erikhá mai fura vayan tiamé umpo vá minó ano véintasá mumunan ono. Namu avúavá baran kéká esantaré téi moéké ume

vanta uron mi vá uno. ¹⁶Máan tukhékun mifo Yisas Karaisi ano ída ainen téin uman timen mifo mai ma moéken uemeí iyain nanin banta aní intin onano van mi Tiyarafenu ano séi nan moéken arunan uren tiviren mino. Máan turantin béintá ma mumunan inain nanin banta ano fara van oriyán ban aunan baranten mino. ¹⁷Máan tukhanti vá mai ma fara van oriyán ban Tiyarafenu avisá daní iyáke kákan bí ameno. Para vara seyo veyáká anan Tiyarafenu váken inká ída furinton para van oriyán ban Kin bákan mana nanin banta ano véin ída kanaíen oné iyan mino. Pura ino.

Pori Ma Timotin Nan Mantaan Ná Ákona Ono Sein Baya Ino

¹⁸Te sanin Timoti oe, fefá ma sakanampa vava siádan ma varé ein nan mi ma vava kayo ákonaé timiyá uno. Ásin ná ma vava kayo ano éin ákona uantanti vá Bafani yorampin báke namu yaná bá ákona e aruvono. ¹⁹Yisas Karaisintá ákona mumunan kaúde vá minó damú puntákein ineine ana vá barano. Mai fara vara seyo, manáa nanin banta ano mai avúavá me ampiren ída funtákein avúavá mo varan maen betíi mumunan mano sipi ma oriyaren onámanáká mo kuvanten barákein an dakhen mino. ²⁰Imeneusin nú Areksanda nú ano máan avúavái varyaré íká míkan nan mano afova máden Tiyarafenu ída oyampá bava sino van mi míkan avían Ban Anon ayampin kaé uno.

Monó Tin Avúavá Pákena Vava Ino

2 Máan tukhein nan mi mai ma siretin tiamikheruna vayará ma kákaní ukhein bayan tiamenté uno. Tiyarafenu amúkuan amesin ná minó nanin

banta aya uren evaránen aviriyanti vá inká tusu amúkiri basá ono van mi ákonaé tiamiyá uno. ²Mai avúaváká teya vá kin kéká bá inká dafisin kéká bá amúkuan amiyasirá kamaé tirá kusin má manafin bá tiferá Tiyarafenu ano ma anunu ukhein avúavá ana vákuriyará banasi avorá kantasí ukhé bá tifano. ³Mai avúavá anon kama ukhen mi setin ma Siya Uren Tivikhein Tiyarafenu amusin amé iyan mino. ⁴Mai fara va ino, minó ano ída kípán aunan mamaren pura yaná afová ino van mi véi inikhen mino. ⁵Mai fara vara seyo, Tiyarafenu veyáká anan bákan inká aúbaná banta mana anan báken mi Tiyarafenu vá banasi vá ma manafin kasen ban bava e sian more mere iyain nan mi siyá uno. Mai vanta mai Yisas Karaisi ino. ⁶Tiyarafenu ano ma siádan baré ein damú ma afoká in maen mi minó nanin banta miyaní uren avirano van Yisasin tiantan e furen mino. ⁷Tiyarafenu ano vei vava vanasi siamiyáken mumunan ma in avúavá pákena vá pura sikhein bava vá baren ena anan nanin bantafin mo siamino van mi séin aní urá baré ma fura vayan tiamiyá uno.

⁸Máan tukhantiya mumunan kéká ano ma manafin átaru inonafin aruve asive in má ará uman daantan avúavá bá ampire vá ayan daní ureya Tiyarafenu aví daní iyáke vá amúkono.

Kama Avúavá Ano Ma Anasi Arintai Auí Daná An Dan Baya Ino

⁹Máan tiyanti mae anasi arinta ano kama ukhein buí daná uren bantai inin namu ina siren ná au ma ída yákó in buí daná ana vá ino. Máan tiyáken ída vá ánon do kama uren kori fóké uvaran dana safi inká ankaroro fi áa moékan miyantá ma vain danasinta fi vá ino.

¹1:20 1Ko 5:5; 2Ti 4:14-15 ²2:6 Rom 3:29-30; Kar 1:4

³2:7 Apo 9:15; Kar 2:7-8; 2Ti 1:11 ⁴2:9 1Pi 3:3-5

¹⁰vMáan tinten mifo Tiyarafenu anain mi vákuriyá uno ma siyain nanin arinta ano kama avúavá ana varantin ná mai avúavá ano vá betíi kama vuí daná an dano.

¹¹Anasi arinta ano fúkekhen bempáké báken ná monó doran banta kayoi vaya iniren ná mai aránaópá bano. ¹²wAnasi arinta ano vempáké báken ída vá bantará ánoní ená inká ída monó baya sino. ¹³xMai fara vara seyo, Tiyarafenu ano Adamun naren uváden ínainpákéi Ivin uvaren mino. ¹⁴yMáan turan Ban Anon mano ma mákandan maen anasi ano naren umeí ein mifo Adamu ano vaino. Ída ino. ¹⁵Máan tukhen mifo anasi kayo ano ma aí pinté iyampon kaiyáken ma au vararasí uren mumunan iyáken avábá in avúavá bariyan ma kantasí ukhen ban avúavá ana ma variyan bantin mi Tiyarafenu ano aya uren evaránen aviranten mino.

Monó Doran Kayoi Vaya Ino

3^zMonoká ma yafisin dorarí ono van ma anunu iyaona mai yan bain doran mi vákayan mai yorarí ono van iyan ná ma fura vayan tiamé uno. ²aMai ma monóká dafiseno van iyain bantai avúavá ano funtákan tin ná ena nanin banta ano ída kanaíen béin oyampá baya sino. Inká be aná bá ana vá puntáden báken^f ná beyantasá kama avúavá ma vain ná maman one one ino. Inká puntákein ineine vá bantin kama vanta ino siyantín ná ena kéká ano ma ven amápin erintín ná betín kama iyáken Tiyarafenui afova vaya vá banasi siamino. ³Béi ída vá óen non nen ná inká ída vá aruve

asive inton bempáké báken moni san ída vá anunu ino. ⁴Bei kéká kamaen dafisin banta vantín ná inká ben akhafana ano kamaen baya iniren ben aránaó ana vá bano. ⁵Mai fara vara seyo, anasi iyampontá ma ída kamaen dafisin nain banta ano inté uren ná Tiyarafenui vanasirá dafisinten nafino.

⁶Auyen mumunan keká ída vá ainen monóká dafisin doran amino. Para vara seyo, véin ma amiran nain doran nan au khákan intín maen mairáí Ban Anon mano véin mamádan tin ainen eraven ankaminten mino. ⁷bInká afokhampin ma vain kéká ano ma véin nan kama yoraríi iyan mino ma sintín béi ída kanaíen Ban Anoni vase unampin o áduven ayave van inten mino.

Monó Doran Banta Kéká Ano Ma Varan Nain Avúavá Ino

⁸Inká monó namumpin ma yoran banta kéká ano yere máan mana en kama avúavá ana vá barano. Ída vá kam-pun baya e sian more mere en ná inká ída vá óen non nen ná inká moníká inin kaen iyantín ná béin nan kama vanta ino sino. ⁹Betí ankan kama yaná bá namu yaná bá ma yaíden afová in ineine fun-táden ná pura mumunan pákaan ákona uren ná bano. ¹⁰Monó namumpin tító doran kayo nare amesín doriyantiya kamaen ná doranten nafi mai ódare vá ínainpáké monó namumpin ma yafisin doran ameno.

¹¹cBetín aná ona ano máan mana en ná kama nanin kéká ino siyantín ná mai nanin kéká ano ena nanin banta ída vá oyampá baya sino. Beti yantasá kama

^f3:2 Manáa afova vanta kayo ano mai van máa sikhen mino. *Mana nanin máa vá barano.* Ena afova vanta kayo ano mai van máa sikhen mino. *Ída vá anasi máde ifá urú urú en nono.* 3:12; Taitasi 1:6 fin dere vá onano.

v2:10 1Ti 5:10 w2:12 1Ko 14:34 x2:13 Esé 2:7, 21-22; 1Ko 11:8-9

y2:14 2Ko 11:3; Kar 3:1-6 z3:1 Apo 20:28 a3:2 Tai 1:6-9 b3:7 2Ko 8:21

c3:11 Tai 2:3

avúavá ma vain maman one one iyáken minó danákasá ákonaen dafisino.

¹²Monó namumpin ma yoran amiran nain banta ano ve aná bá ana funtáden báken ná⁸⁸ be akhafana vá bei kéká bá kamaen ná dafisino. ¹³Mai ma kamaen doran nain kékái vanasi ano amo siyantín Yisas Karaisintá ma mumunan in avúavá ano moéken kákaní inten mino.

Titisi Fura Mumunan In Baya Ino

¹⁴Éi vaonafá orono van ukhé umpo ída ma ainé oréku maeya ma yanasinta varano van mi ma vompon uvaman amé uno. ¹⁵Téi ma ída ainé oréku maeya mumunan kékasá ma vompon pinte ódare vá afova ameno. Mai kéká anon ákona namádan kayo an daven mi fara van oriyan ban Tiyarafenui fura vaya fákaan ákona uráken doranten mino.

¹⁶^dTiyarafenu ano Yisasini kama vaya afová inon tiren mi aúpá bá ein manan dákó ukhein pasen mana ano ída kanaíen mai vaya van ina inten mino.

Yisas Karaisi ano varará banta an daven afoká ukhan

Kantá Aunan mano véin nan puntákein banta e siren maman dákó uran enisori kayo ano ódaren banasi siamíkan barará nanin banta ano véintá mumunan uvin

Tiyarafenu ano véin aviren inarufá óden mino.

Kampun Monó Baya Sin Kékái Vaya Ino

4 Máan ten mifo ma vara kípan akhempá ma oriyantín maen manáa kéká ano mai ma esé aráíntá ma Ti-

yarafenurá mumunan iyá ein me ifá uren kampun aunani vaya ánain dakhafinten mino sen Kantá Aunan mano mai fákena sian amá ukhen mino. ²Mai ma kampun ten monó banta kéká uno ma siyain kéká anon mai afova aminten mifo vetíi kama yaná bá namu yaná bá ma yaíden afová in ineine asusen ukhen mino.

³^eMáan tukhan mi ábasuí ma in avúavá bá inká mai ma fura sikhein baya ma afová ukhen mumunan iyain kéká ano susu siantáden nano van ma Tiyarafenu ano uvamádan bain dunan kayo vá are uanté iyan mino. ⁴Para vara seyo, Tiyarafenu ano ma uvantein danasinta mai kama anan ukhen mifo ída vá manáa mo ifá iyáké túkákesá béin tusu siantiyá timusin pintesá mai yanasinta vará tifano. ⁵Mai fara vara seyo, Tiyarafenui vaya ano máa sikhen mino. Ábasu ma vampin má ara ara yunan ma nan avúavá bápín pefái Tiyarafenu ano maman kantasí ukhen mifo amúkimposá tusu siyákeya varano.

Yisas Karaisini Kama Yoran Bantaí Ma In Baya Ino

⁶Ma vaya kayo ma mumunan kéká tiaminte mae mai Yisas Karaisini kama yoran bantaí uveyan mai ma fura mumunan má inká kama vaya vá ma inire ma mantaan ákona eona vayan tian dákó inono. ⁷^fKampun banta kayo ano ma siamin nain baya kayo van pédeya nentasá bano. Mai fara vara seyo, mai vaya kayo ano ída ayainten mifo ída vá asive asive iya vákeya kantasí ukhen ban avúavá ma varan nará ena ena ákona e yoseno. ⁸Mai fara vara seyo, manáa nanin banta ano máa sikhen mino: “Dan

§§3:12 Manáa afova vanta kayo ano mai van máa sikhen mino. *Mana nanin máa vá barano.* Ena afova vanta kayo ano mai van máa sikhen mino. *Ída vá anasi máde ifá urú urú en nono.* 3:2; Taitasi 1:6 fin ná dere onano.

^d3:16 Mak 16:19; Yon 1:14; Kor 1:23 ^e4:3 Esé 9:3; Rom 14:6; 1Ko 10:30-31

^f4:7 1Ti 1:4

bukhafará ma ákona varan mai veni nena sanáan ban mifo monó avúava san ma ákona varan mai moéken kákan danái van mino. Mai fara vara seyo, saréa ma vá tífanuna vá inká ínaimpá ma vá tífanuna vái miyan pefái Tiyarafenu ano iyátintan ban mino.”⁹ Ma fura vayan tiyan mifo minó ano mai rasá mumunan ono.¹⁰ ^gMai ma fara van oriyan ban Tiyarafenu ano ma minó nanin banta vá inká béintá ma mumunan iyain kayo vá ma aya uren avíkein-tái setisi inin kauráké moékan uman o yosiyáké ákona yorarí iyá tiféuno. Mai fara vara seyo, fura yanáká banasi ano mumunan ino van muno.

¹¹Ma vaya vá minó nanin banta siamíde afova amesin ná mai ánain dakhafino.¹² ^hÍda vá áesin ná mana ano éin nan pumara ino siren ná éi ma siaminona vaya oyan amino. Mumunan kéká ma afova amiyáke ma yanasinta vá aní ono. Éi ma ne vare inonafin má inká mumunampin ma kantásí ukhen ban má inká ena ma avábá in má ino.¹³ Tiyarafenui vompon dóki finte yankafesin iniyantiya vá mumunan kéká ákona uantiyáke vanasi afova amiyasirá téi oreno.

¹⁴Mai ma sakhanampa vaya ma inikhein Yisasini mumunan nanin bantai ánon banta kayo ano ma ayan ánontá kauren avu uantákaré ein amusin ída vá kaumpan ono.¹⁵ Éin ma amikhein dorantasá ei minó inin onan kaure yoriyákeya inká Tiyarafenu ano ma anunu ukhein avúavá ana variya sin ná minó nanin banta ano onano.¹⁶ Ei avúavá bá inká Tiyarafenui vaya ma siamiyaonará basá dafiseno. Puntákein avúaváká ma mantaan ákona uvesin maen mai ma siamesin inin nain kéká bá

inká éin má Tiyarafenu ano aya uren aviranten mino.

Timoti Ma Ena Nanin Banta Avábá Uantan Baya Ino

5 Anon banta ída vá asin baya siyákeya e afóen má ma vempáké baya siyaonaisá ono. E afá aváeyan ma kama iyaonaí eya vá ena fumara vanta kama ano.² Anon nanin kékasá e anóen ma kama einí iyáke vá inká e ayofin ma kama iyaonaí eya vá puntákein avuává posá ena nanin arinta kama ono.

³Manáa yana san ma o afasí iyain baré nanin kayo ma vantiyá vetin ná aya ono.⁴ Máan tin nompo mai varé nanin mano ma iyampon kaintin ná baré inten nafi áa ve anavasin ná baré inten nafi mai esé daná betí amápin ná monó avúavá baren ná betíi anóe afóentá anona yafisino. Para vara seyo mai avúavá anon Tiyarafenu amusin amé iyan mino.⁵ Máan té iyan mifo fura sen ma veni kéká ma ída vain baré nanin mano vei ákona inin Tiyarafenu rákau-ráken mi aya ino van ena ena vayan má inuran má amúkiyan bá é iyan mino.⁶ Máan té iyan mifo yan bukhafará ma amusin dosiyain baré nanin mano monó avúavápin purein an mi yakhen mino.*

⁷Máan tiyáke ma afova vaya vá ákona e monó nanin banta vá dere siamiresin ná mai ma varé nanin kayorá ma yafisnonará mana ano ída vá oyampá baya sino.⁸ Máan tinten mifo ve anóe afóen nafi áa ve anafu aráon nafi ma ída kamaen dafisin nain kéká ano vetíi mumunan pefái me ampikhen mino. Máan kéká ano afokhampin ma vain nanin banta esantaren namu uron mi ukhen mino.

*5:6 Pori ma ma vaya sikhein mai máan nanin kayorá ída yafiseno van mi sikhen mino.

⁹Mai ma aya ono van ukhanona varé nanin ná mai sikisti (60) orana esantakhein báken ná inká pefá be avafun má ákonaen baré ein nanin ná bano. ¹⁰Mai varé nanin mano fefá be akhafanará kama yafisirí iyaren nafi áa ena kéká ano ma ven amápin erin maen betin kama iyaren nafi áa ena monó nanin bantafin ará barará dáken doriyaren nafi áa umampin bain kéká aya iyaren nafi áa minó damú kama avúavá barano van útakhen bákan ná banasi ano véin nan kama nanin mi van mino siyaré ein nanin ná bano.

¹¹Auyen nanin kéká ma varesí ukhan tiya ída vá aya ono van ono. Mai fara vara seyo, vetí ankan ma evaránen banta varano van ma anunu inten maen Karaisin ma mumunan in avúavá me ampiren banta o varanten mino. ¹²Máan ma inain avúavá anon betí ma fefá tian damú dákaré inain baya yurafúden uman baranten mino. ¹³^jMáan tiyan maen avesara uren nóken banasi amá e feren khuyen iyáken baya e sian more mere iyan maen ena nanin banta ano ma yan bain dana san ankayan tiren ída seren baya sé iyan mino. ¹⁴^kMáan tukhein nan mi auyen baré kayo ano evaránen banta mamaren báken iyampón kaiyan mápin dafisino van mi siamiyá uno. Máan ma intin mi vetí ankani namuro kayo ano ída kanafen oyampá baya sinten mino. ¹⁵Mai fara vara seyo, manáa kéká ano mumunan inka me ampiren Ban Anon ánain dakhafiyái ma veya siyá uno.

¹⁶Máan tukhein nan mi mana mumunan nanini kékápin ma varé nanin kayo ma vantin mai nanin mano vá mai kékáká dafisiyáken ída vá monó nanin banta uman amiyan bano. Máan tintin ná monó nanin banta ano vá mai ma

ve antun ída van ma ída kanafen ayain danasinta yoseren ukhein baré nanin kayorasá dafisino.

Monó Ánon Banta Kayorá Ma Kama En Dafisin Baya Ino

¹⁷Monó doran banta kayo ano ákon-aen ná ben ma amikhein doran dorariyáken ná Tiyarafenui vaya vanasi siamiyan afova amiyan tiya vá betí miyan mun ékaan tano. ¹⁸^lMai fara vara seyo, Tiyarafenui vompon dóki ano máa sikhen mino. “Burumákaó ano ma uviti aran dasamiyáken niyantiya ída vá oorá damono.” *Diu 25:4*

Inká Tiyarafenui vompon dókifin deren máa sikhen mino. “Mai ma yoran nain kéká ano miyan ná barano.” *Ruk 10:7*

¹⁹^mKankanán mano fi kanú manaú ano fi ma ída afová en ontan nain danáká ma monó doran banta kayo au finté ma intiya mai vaya ída vá ineno. ²⁰ⁿUmeí ma uran nain kékasá banasi avorá asesin ná ena nanin banta ano máan avúava baran nan perano.

²¹Tiyarafenui vá Yisas Karaisin má inká kantasí ma ukhein enisori kayo vá avorái ma veya siamé umpo ída vá aronará o khábe e khábe iya vá puntáde yorano.

²²Ída vá ámun uare monóká dafisin banta aní ureya aviádesin dorano. Manáa kéká ano ma umeí ínainpin ída vá éin má oriveya umeí iyáke funtákein avúavá ana vá barano.

²³Ena ena aí baré iya ompo ída vá non uró ana niyákeya ará ma ayain ná manáa uvaini non masá nano.

²⁴Manáa kéká ano ume avúavasí iyan maen mai kayo van Tiyarafenui kópin oriven uman baranten mino sen minó ano afová ukhen mifo manáa kékái ume mai ída afová esin baré intin ínain-

^j5:13 2Te 3:11 ^k5:14 1Ko 7:9 ^l5:18 Mat 10:10; 1Ko 9:9

^m5:19 2Ko 13:1 ⁿ5:20 Efe 5:11

pákéi maman dákó inten mino. ²⁵Máan mana en mi mai ma kama avúavá ma variyain kéká banasi ano afová ukhen mifo inká mai ma aupáké ma kama avúavá bariyain kéká ída afová esin baré intin inaimpákéi maman dákó inten mino.

Doran Banta Ano Ma Vei Ayafa Aránaó Ban Baya Ino

6^oMonó nanin banta ano ma ída miyan baran dorarí ma iyanten ná betí ayafa vanta aránaópá bantin ná banasi ano Tiyarafenu aví bá inká teti ma siamiyaruna vava vá ída oyampá baya sino. ^{2p}Monópin ma van nain bantai yorarí ma iyan nain kéká ano ída vá te sífá tiváe ino siren ná avesarain avúavá barano. Máan tin nompo, ena mumunan kékái aya iyá uno sireya ída vá avesara iyáke ákona e vá dorano. Timoti oe, fura sikhein baya vanasi afova amiyáke vá ákona e siamesin ná mai ánain dakhafino.

Moni San Ma Anunu In Maen Mai Namu Avúavái Ana Ino

^{3q}Kampun afova ma amin kéká ano ma ma siamiyaruna vava van kampun baya e sinten mifo ma maen tetisi Bafan Yisas Karaisini vayan báken monó avúavá ma ákona uantan bayan ban mino. ⁴Mai ma ena avúaváká ma afova amiyain kéká ano kákan bí barano van manan iyan mifo mana yaná ída afová ukhen mino. Betí ineine ano fura sen asuse ukhan pasen betí vava van manan pura siyá uno siren ena nanin banta maman bararasí iyan mino. Máan tiyáken aruve asivein baya vá kampun baya ma e uvaman more mere in má inká ena ano ma namu avúavasí iyain nan namu in-

eine uantiyan ban avúavá anan baré iyan mino. ^{5r}Máan avúavá ma variyain nanin bantai ineine ano fura sen namu uron ukhan pasen ena ena kampun baya anan tiyáken uman maman dákó é iyan mino. Máan tiyáken monó aa fákéi kokhon danasinta varanté unon ten iné iyan mino.

^{6s}Máa siyan mifo Tiyarafenui vava ma iniré mai ánain bákuriyá tiferuna anon tetisi monó tin avúavá e inoren kákaní iyan mino. ^{7t}Mai fara seyo ma varafin ma afoká é tiferuna yamú ída mana yaná baré erikhé tiferuna inká puronté maé ída mana yaná baré oró tifanté uno. ⁸Máan tukhein nará dunan má tuí daná bá ma yékun bantí maé mai van kana vá uno vá tétifano. ⁹Máan tukhen mifo kokhon danasinta varano van ma iyain kéká anon akhenókafin eraven ankamin mi namu ineine vá namu avúavá bá ena ina yaná ma aranan má ano máden asuse uran uman baré iyan mino. ^{10u}Mai fara vara seyo, moni san ma anunu in maen mai namu avúava kayoi arú ino. Moni san ma anunu ein kéká ano mumunan avúavá me ampiren maen arun naná o yosé iyan mino.

Mumunan Avúavápin Ma Ákona Ukhen Ban Baya Ino

^{11v}Máan tiyan mifo Timoti oe, Tiyarafenui vanta ompo mai avúava san péde nentá báke vá mai ma kamaen puntáke in avúavá ana vá bákurono. Máan tiyáke ei monó avúavápin Tiyarafenu amusin ame vá bentá mumunan má avábá ma in má bempáké ma kusen ban avúavá bá inká ara ara uman erintin ma mantaan ákona ukhen ma van masá pákaan ákona uráke vá bano. ^{12w}Máan turáke mumunan avúava sará kama aru-

^o6:1 Efe 6:5 ^p6:2 Frm 16 ^q6:3 Kar 1:6-9 ^r6:5 2Ti 3:8; 4:4; Tai 1:14

^s6:6 Fir 4:11-12; 1Ti 4:8; Ibu 13:5 ^t6:7 Yop 1:21 ^u6:10 Efe 5:5

^v6:11 2Ti 2:22 ^w6:12 1Ko 9:25-26; 2Ti 4:7

virí ono. Mai ma vanasi avorá ma siyákeya inka Tiyarafenurá mumunan é uno siren nan ma fara van oriyan ban aunan ma amiren arakhein ná pákaan ákona ure vano. ¹³ ^xMinó danasinta ma aun amikhein Tiyarafenun avorá bá inká mai ma Pontius Pairotin avorá ma funtákein kó ma sein banta Yisas Karaisin avorá báí éin ákonaé tiamiyá uno. ¹⁴ Mai ma Tiyarafenu ano sein baya ánain mana yakhafiyáke vá banasi avorá puntáke vasin ná tetisi Bafan Yisas Karaisi ovará-nen erino. ¹⁵ ^yMa ma minó ákona van ma avábá bíkakhein Tiyarafenu vá kin kayoi Kin má bafan kayoi Bafan má ano ma aní ukhein damú ma afoká intin mi inaru fáke Yisas Karaisin maman dákó inten mino. ¹⁶ Beyakái ída furinton moéken kakhakheintá para vákan maen mana ano ída véin ádé oré iyan mino. Mana vanta ano béin ída ontein bantin ída kanaíen onanten mifo béin maman daní esin ná beni ákona ano fara van oriyan bano. Pura ino.

**Kokhon Ona Van Kéká Ano Ma
Kama Avúavá Baran Baya Ino**

¹⁷ ^zMai ma kokhon danasinta ma varará dan bákan ma vetíi moníká ma ákona inin kaiyain kéká mai ainen mi kípanten mifo vetin tiamesin ná ída vá

au khakan ino. Mai ma o afasí é tiferuna yanasinta ma moéken timiyá ma simusin dosiyá tiferuna Tiyarafenu anon para van oriyan báé iyan mifo véintasá ákona inin kaono. ¹⁸ Betin tiamesin ná betíi monípóké kama yorarisá ino. Máan tiyáken ná amusin pinté mai ma manáa yana san ma o afasí in nain kéká aya iyáken intéa yanasá Tiyarafenu ano amikhen nafi mai ena nanin banta aya ono vará ena ena útakhen bano. ¹⁹ ^aMai avúavá ma varan nain manon betíi kama yanasinta inarufá kainten mino. Mai anon ákona namádan ma yafereiní uádákaren mi fura sikhein aunan ínainpáké o varanten mino.

**Pori Ma Timotin Nan Tiyarafenui
Yorantá Kama En Dafisino
Van Tiamein Baya Ino**

²⁰ Timoti oe, Tiyarafenu ano ma eni avúavá ódaren amikhan nain dorantasá daffan ákona ono. Namu avúavá oyan amire vá mai ma kampun baya sen noin kayo vará perano. ²¹ ^bManáa kéká ano kamaen mumunan iyá íkan mai kampun baya kayo ano e yarifaádan betíi mumunan me ampiren orikhen mino.

Tiyarafenui sarisari ano vá tiretin má bano.

^x6:13 Yon 18:36-37 ^y6:15 Rev 17:14 ^z6:17 Ruk 12:20-21

^a6:19 Mat 6:20 ^b6:21 1Ti 1:6; 2Ti 2:18

**PORI MA KAN DÁDASÍEN
TIMOTIN UVAMAN
AMEIN BOMPON MINO**

(2 Timoti)

**Kan Dádasíen Ma Timotin Uvanteí
Pákenai Afova Vaya Ino**

**Ma vompon ma
uvantein banta ino.**

Baya varen orin banta Pori ino. Ma maen bei sipá kípán baya ma uvantein mino.

Uvarein orana ino.

AD sikisti-seveni (67) fin ma Porin evaránen karavusi fáken Romú moráken arono van iyan mino.

**Ma vompon ma
uvantein baru ino.**

Romú ino.

**Ma vompon ma uvaman
amikhein banta ino.**

Porini eyo iyampon báken kama arona varen ma Efesásí o van monó doran bantaí ukhein pumara Timotin mino.

**Nái ana vará ma
vompon uvanten nafino.**

Pori ma vei furin ádesí ukhan ma sipá intan bompon uvaman Timotin amein mino. Ma vompompin Timotin ayaen ákona uantan baya vá inká manáa yoran má ma varan nain ma san mo sian asotú

iyáken inká Romú barufá Timoti nan oren béin o onano van ina ukhen mino.

Pori Ma Amusin Baya Sein Mino

1 Téi Pori mai Yisas Karaisini vaya varen orin banta anon ma vompon uvaré uno. Mai ma Yisas Karaisintá mumunan in nain nanin banta ma Tiyarafenu ano iyáantan bain aunan nan mi vanasi mo siamino van Tiyarafenu ano vei anunu finté téin tisinten mino. ²Te sanin an ma yakhein banta Timotin mi ma vompon uvaman amé uno.

Teti sífoe Tiyarafenu vá tetisi Bafan Yisas Karaisin mái sarisari vá arunaná bá ará kusin má ano vá éimpin bano.

**Pori Ma Timoti Ákona
Uantein Baya Ino**

³Timoti oe, éin nan Tiyarafenun tusu siantiyáké mai ma se sináuyan mano funtákein ineine vá monó tiantiyá einíi iyá uno. Tiyarafenurá ma inuran má bayan má timúkiyáké maé éin nan ena ena simúkuantiyá uno. ⁴Éin evaráné onano van mi iyá uno. Para vara seyo, éi ma arunaná bariyan ná ma me afa ukháeruna van mi ovaré me iniyaruna éin ma onanuna yamúí kákan timusin onté uno. ⁵Téi afová ukhéku éi fura seya Bafantá ákona e mumunan iya ono. Para vara seyo, e anóe Yunisin má e aráo Roisin má ma mumunan iyá ein mumunan mái va onon té iniyá uno. ⁶Máan túkhen náí éin ánantá ma siyan kaudéku ma Tiyarafenui amusin mantaona van mi ákona e yoresin ira an den barúten kano van mi siamiyá uno. ⁷Mai fara vara seyo, setin nan akhokho van iyan bano vara Tiyarafenu ano ma saunan timikhen naino. Ída ino. Tetin ákona simirantin ena nanin banta avábá iyáken

^c1:2 Apo 16:1; 1Ti 1:2 ^d1:3 Apo 23:1
⁸1:7 Rom 8:15

^e1:5 Apo 16:1 ^f1:6 1Ti 4:14

inká tetisi sivútiváká dafían ákona ino van mi inin timikhen mino.

⁸Máan tukhen mifo Bafani vaya ma vanasi siamin nan ída vá ayave van iyákeya séi ma karavusifin baruna mai Karaisini yoran nan mi vá umpo mai van dere ída vá ayave van ono. Téin má uman o yosiyáke veni kama vaya vanasi siamin nompo Tiyarafenu ma amikhein ákona vasá útakhe vano. ⁹^hTiyarafenu anon tetin nan kantasí ukhen bano van mi setin tivíden aní urá bá tifé umpo setinti sinunura saino. Ída ino. Pefá ma vara ída afoká ukhan maen bei tarisari vá kama avuavasí ma in má Yisas Karaisin pinté uaren tetin aní ono van mi vaya sian damuádan baren mino. ¹⁰ⁱBaré íkan mi setin tiyain banta Yisas Karaisi ano furini ákona finte e sivíden bei Kama Vaya finté uaren mi fara van oriyan ban aunan ma varan aai aníen mino. ¹¹^jMáan turen bei Kama Vaya ma vanasi siamin banta váke vá aposeri yorará iyáke vanasi afova amin banta vá bano siren Tiyarafenu ano séin aníen mino. ¹²Mai van mi séi karavusí ukhé ma umampin bá umpo mai van ída siyave iyá uno. Para vara seyo, séi ma mumunan iyaruna Vanta afová ukhékun mai ma véi simikhein kama vayará dafíken ten má bantí oriyaré béi ma ovaránen erin nain damúí mo afoká onté uno.

¹³Banasi ma funtákein baya siamin avúavá ma sen pinte afova mantanona vá pákaan ákona ukhe Yisas Karaisintá ma mumunan ukhesin ávabá banti ma vanona vará ovare me ineno. ¹⁴^kTiyarafenu ano ma éin Kama Vaya amikhein ná mai ma erasampin bain Kantá Aunan mano ayainti vá kama e yafiseno.

¹⁵Éi afová ukhen nan Esiá bara fáké ma erikháen monó nanin banta vá inká

Fíkerusin má Emokenesin má deren téin me ampikhen mino.

¹⁶Téi karavusifin bákun ída ayave usintan nan Onesiforusin má minó bei kéká bá ano séin e soniyáken me ákona usintiyán mifo Bafan mano vá betin arunan uantano. ¹⁷Béi ma Romú barafá eriven maen ten nan mi minó akhempá dosen noren e soman dákó en mino. ¹⁸Karaisi ma ovaránen erin nain damusá Bafan mano véin nará arunan uantano. Para vara seyo, Efesasí barufin ma Onesiforusi ano ara ara aa fáké ma séin tiya ukhein mai éi afová ukha ono.

Yisas Karaisini Kama Aruvín Bantai Vaya Ino

2 Máan tukhein nan mi se sanin Timoti oe, Tiyarafenu ano ma Yisas Karaisin pinté uaren ma amikhein tarisari rasá ákona e mantano. ²Minó danasinta ma vanasi afova amiyá eruna mai fákena éi afová ukhen ná kokhon nanin banta avorái éin mai vaya siamikhe umpo mai ma fura sen dorano van iyain banta kéká tiamesin ná betí ankan má dere vá ena nanin banta kasaen afova amino.

³^lYisas Karaisini kama aruvín banta an deya vá tetí ankan ma variyaruna uman ná barano. ⁴Aruvín bantaí ma inte mai ída vá áesin ma varáke yanasinta ano éin damuan ákona ino. Para vara seyo, máan ma esin maen mai ma vei aruvín bantaí uraya vaona vanta ano ída amusin inten mino. ⁵^mMai ma fútin banta ano ma fútin avúavá pákena ída yakhafiyaren ma fa savifá íú tian afe uren ída mana yaná o vareiní in nampo vá Bafan mano ma sikhein avúavá kasá dorano. ⁶ⁿÁkonaen ma yunan dorará iyaré ein kéká anoi amusin iyáken esé araíen mai yunan naan oné iyan mino. ⁷Bafan mano ineine aminti mae afova varan nompo

^h1:9 Efe 2:8-9; Tai 3:5 ⁱ1:10 Ibu 2:14 ^j1:11 1Ti 2:7 ^k1:14 1Ti 6:20
^l2:3 2Ti 1:8 ^m2:5 2Ti 4:8 ⁿ2:6 1Ko 9:7

ma ma siamiyaruna yanasinta ákona e vá inian kaono.

⁸°Kin Devitini kéká pintéi Yisas Karaisi afoká ukharéin mi Tiyarafenu ano avían mantakhen mifo ída vá áun nono. Mai Tiyarafenui Kama Vayan bakái vanasi siamiyá uno. ⁹°Mai ma Kama Vaya siamiyaruna van mi karavusifin senípó anan damuádá umoyan banta an dakhé uman bariyá umpo Tiyarafenui vaya ana ída kanaíen damuádantin banten mino. ¹⁰°Ten timaniná uman eriyen mifo Tiyarafenu ma aní ukhein kéká aya ékun Yisas Karaisintá mumunan ukharen para van oriyen ban kakhampin orino van mi fara ákona ukhé uno.

¹¹°Ma ma sikhein baya ano mai furan tikhen mino.

Béi má ma furó tifanté

mai véi mái o vá tifanté uno. ¹²°Tetí

ankan ma umampin oró tifanté,

mai véi mái o yafisiní ó tifanté uno.

Béin ma oyan amé tifékun maen,

béi yere setin oyan timinten mino.

¹³°Yisasin ánain bákuró tifanté uno siré ma ída vákuré tifékun maen,

béi fara mai vayará daffan ákona ukhen banten mino.

Para vara seyo, véi ma iyáantádan nain daná ída yo varanten mino.

Tiyarafenu Ano Ma Aní Ukhein Doran Bantai Vaya Ino

¹⁴°Ma ma siamiyaruna yanasinta van banasi evaráne siamiyasin Tiyarafenu avorá ída vá baya van asive asive iyan bano. Máan avúavá ano ída kanaíen banasi ayaiyantín pasen Kama Vaya ma siamintin ineno van in nain kékái ineine máden asuse inten mino. ¹⁵°Ákona yorarí iyasín ná Tiyarafenu ano eni

yoran nan amusin iyan ná onano. Kama yoran banta ano ída vá ayave van iyáken Tiyarafenui fura vaya ana vaéan banasi amintin ná inino. ¹⁶°Namu avúava san péde nentá báke vá aniana vaya ma sin naimpin ída vá o ferano. Para vara seyo, mai avúava sinta ano namu uron ukhan mi Tiyarafenu ano ída amusin é iyan mino. ¹⁷°Mai avúavá anoí namu namon ma khen orera einí inten mifo Imeneusin nú Firetusín nú amaniná ma yáko ukhein ná onano. ¹⁸°Betí ankan mai fura sikhein baya me ampíren maen púkaré ein kéká san pefái e mantakhen mino sen kam-pun ten nóken manáa monó nanin bantai mumunan máden asuse iyan mino. ¹⁹°Máan tiyan mifo Tiyarafenui monó nanin banta anon ákona varará ma namádan daféan ákona einíi ukhan mai van Tiyarafenui vompompín máa sikhen mino. “Bafan mano mai ma ven nináf ukhein kéká afová ukhen mino.” *Nam 16:5* Inká enádá máa sikhen mino. “Bafan ninan bá uno ma siyain kéká ano vá namu avúavá oyan amino.”

²⁰°Kokhon ona ma yan bain kékái mápin ma yunan kuren nan danasinta ma vain mai kori vá siriva vá póké uvaran danasintan bákan inká daa vá karí póké bá ma uvaran danasinta van ukhen mino. Kákan doran ma vain damú anan kori vá siriva fóké bá ma uvaran danasintafó aruven baren é iyan mifo yaa vá karí bápó ma uvanteimpin mi kanti karúde iyan mino. ²¹°Máan té iyan mifo mai yanasinta ma sesé uan avuse einíen ma mana vanta ano vei fain avúavá do sesé uan karúdaren maen kori vá siriva vá póké ma uvanteiní uvintin Tiyarafenu ano vetin pókéi vei yorarí inten mino.

°2:8 Rom 1:3; 1Ko 15:4 °2:9 Efe 3:1, 13; Fir 1:12-14 °2:11 2Ko 4:11

°2:12 Mat 10:33 °2:13 Rom 3:3-4; Tai 1:2 °2:14 1Ti 6:4; Tai 3:9 °2:15 1Ti

4:6 °2:16 1Ti 4:7 °2:17 1Ti 1:20 °2:19 Ais 52:11; Yon 10:14; 1Ko 8:3

²²yAuyen pumara arintai namu avúava sará pédeya funtákein avúavá ma varano van anunu iyaona ana vá dakhafono. Mumunan in má avábá bá ará kusin avúavú bá ana variyákeya vá mai ma inin mano funtákan ma Bafantá monó tiyain kéká basá manafin amusin eya vano. ²³zMáan tiyáke mai ma arápiní in ma aruvín maman afoká é iyain baya kayo ma sin naimpin ída vá en má oriveya aya ono. ²⁴Bafani yoran nanin banta ano ída vá aruve asive in avúavápin oferiyáken ná inká béi ma ará namu uantan nain kéká kama ana iyáken ara ara nanin banta vá kama inin amino. ²⁵Mai ma Tiyarafenui fura sikhein baya ma oyan amiyain kékápin kusin avúaváposá afova amino. Manáa yamú Tiyarafenu ano máan kéká inin amintin maen ará baéden pura sikhein bayará mumunan inten mino sé ákona ineine iyá uno. ²⁶Mumunan uvintin ma kama ineine erin nain damúí mai ma Ban Anoni kádampin báken ben oo yayiyá ein pinté me yumíáden erinten mino.

Bara Khípan Akhempá Ma Namu Avúavá Afoká Inain Baya Ino

3^aTimoti oe, ma ma siamenuna vaya yere vá afová ono. Ma vara ma mo kípano van iyantin maen mai namu avúava suron mi afoká inten mino. ²Mai fara vara seyo, vanasi ano moníká inin kaúden beyan ma van nain nan manan iniyáken be amo siren au khakan inten mino. Máan tiyáken Tiyarafenu van tiren intiyan betíí anóe afóeni vaya átakharé uren betin ma susu siantan avúavá ída vantin maen inká Tiyarafenui kantasí ukhein danasinta van

inian paen danasí inten mino. ³Betimpin ída avábá in má ena nanin banta ma ume ampiantan avúavá bá ena nanin banta van kampun baya e sian more mere iyan betí aurá ída kamaen dafisinten mino. Máan tiyáken kama avúavápin ída amusin bantin maen ena nanin banta ma aí amin nain nan manan ininten mino. ⁴Betíí arona kayo avían namuro ayampin amiyau aau vain daná ino sen ída ovaren me ininten mino. Inká au khákan daná mamádantin édaviyantín maen bara rákena amusin in avúava san moéken anunu iyáken Tiyarafenu me oyan aminten mino. ⁵bBetíí ankan mai yan bukhafará anan monó té iyan mifo Tiyarafenu ma monó tiantan avúavápin ma ákona vain me oyan amé iyan mino. Máan avúaváká ma vain kéka sará péde nentasá bano.

⁶Máan kéká anon banasii mápin peren kuven iyáken aran nan avúavápó mai ma ída ákona vain nanin kayo ano ma umeí uren mai umampin bain kéká máka siyan mino. Máan tiyákan mai namu avúava sinta ano vetintá dafisiyan mino. ⁷Máan kéká ano ena ena yamú auyen avúaváká ma monó tin dakhafé iyan mifo mai ída uron mi fura yaná afová iyan mino. ⁸cMai afova ma amiyain kéká ano Mosesi ma fura vaya siamiyákan ma Yanesin nú Yambresin nú ano oyampá baya siyaré ein an mi yiyan mino. Betíí ineine ano asuse ukhan ída fura mumunan máí van pasen Tiyarafenu ano vetin oyan amen mino. ⁹Máan tein mifo ída ayáká báken mi Yanesin nú Yambresin nú amaniná ma afoká ein avúavá dákó intin ódaren betí ma variyá ein avúava san namun iyaré uno sen afová inten mino.

**Pori Ma Manáa Yoran
Timotin Amein Baya Ino**

¹⁰Máan tinten mifo Timoti oe, séi ma siamiyaruna vaya vá tivútivá bá inká téi ma varano van tiádékun bain má éi afová ukha ono. Inká intéa mumunan masá bákerá ena avábá iyá kama avúavá baré oriya rafu mai yeren afová ukha ono. ¹¹^dTéin ma uman timiyáká ma sí pinté erikheruna éi afová ukha ono. Inká téi ma Antioki safi Aikoniamu safi Ristará barura safi ma váké umampin oriyákun ma Bafan mano mai uman kayo finte siya iyá ein éi afová ukha ono. ¹²^eMai fura ino. Yisas Karaisintá mumunan iyáké kama avúavá ana variyá bano van muno ma sin nain kéká ano uman o yosinten mino. ¹³Máan tinten mifo namu vanta kéká bá dan bukhará ana ma kama ukhan ma vetin aúpin namu ukhein kéká bá anon kampun bayafó ena nanin banta siamen nóken betiyan deren mai kampun baya kayorá mumunan inten mino.

¹⁴Máan tinten mifo mai ma afova variyaona yanasinta mai fura yaná ifo fákaan ákona ukhe vá bano. Para vara seyo, éi afová en nan mai fura vaya khayon tiamiyaren mifo mai rasá ákona mumunan kaono. ¹⁵Éi ma e anoní iyanan maen Tiyarafenui kantasí ukhein Bompon Dóki finte nan Yisas Karaisintá ma ákona mumunan esin ma Tiyarafenu ano evaránen aviran nain afovan amikharen mino. ¹⁶^fTiyarafenui Aunan manon ma vara ráke vanta inin amíkan mi Tiyarafenui vompon dókifin minó baya uvamádan báken tetin tiya íkái kama yaná bá namu yaná bá afová iyá tiféuno. Mai vaya anon tetin maman puntáden puntákein avúavá ma varan afova simiyan mino. ¹⁷Tiyarafenu ano

mai aa sákéi minó damú ma kama yoran mana ma variyan ban avúavái maman ákona usintiyan mino.

4 Máan tukhein nan mi mai ma maná damusí intin ma vei yafisin manan dákó ono van iyáken ma eriven ayun para vain má púkein kéká bá ma yaimin nain Tiyarafenu vá Yisas Karaisin má avorái éin ákonaé tiamiyá uno. ²Kama yamu safi áa namu yamu safi mai Tiyarafenui vaya fara vá tiame oriya vano. Ei vanasí vempáke sá maman puntariyákeya namu avúavá baran nafo sireya ará ákona uantiya vá ákona e kama afova vaya siameno.

³^gMai fara vara seyo, maná damusí ma intin maen banasi ano funtákein baya ma siamiyasin ída ininten mino. Betíi anunu ánain mi yakhafen mai amusin en inin nain baya ma siamin nain kayo van mi yosinten mino. ⁴Betí ankan mai fura vaya me oyan amiren maen maní baya kayo ánain mi yakhafinten mino. ⁵Máan tinten mifo ara ara avúavá ma yákó iyantiya afová ukhe vá bano. Bafani yorantá ma aí o yosin nan ída vá periyáke vanasi ma o aviádesin Karaisi vaípá ma erin nará ineno. Máan tiyáke Tiyarafenu ma amikhan nain doran ná dóan pisenno.

**Pori Ma Kama Yorarí Uren Bei Miyan
Nan Ave Ukhein Baya Ino**

⁶^hTiyarafenuin ma susu siantan uvaini ma vanaein an dé pefái se saunan amikhé uno. Máan tukhékun tenti furin inka ádesí ukhen mino. ⁷ⁱTéi kama siruvirí uré téin ma simikhá ein doran dóan kíparéi Yisas Karaisini Kama Vaya ma siamin doran ákona uan pákaré bá uno. ⁸^jMáan tukhéi Bafan ma erin nain damúí funtákein avúavá póké me yaíden mi mai ma savaimpin o aní uvin ma amusin amiyaínfen mi siminten mino.

^d3:11 Apo 13:14-52; 14:5, 8-20 ^e3:12 Mat 16:24; Yon 15:20; Apo 14:22 ^f3:16 Rom 15:4 ^g4:3 1Ti 4:1 ^h4:6 Fir 2:17 ⁱ4:7 1Ti 6:12 ^j4:8 1Ko 9:24-25

Teya va siminten naifo mai ma funtákein avúavá bariyan ma veni erin nan ave ukhein kéká bá deren kama amusin aminten mino.

Pori Ma Timotin Nan Aine Vá Ereno Sein Baya Ino

⁹Aine vá aa van dosire se vaípa ereno. ¹⁰^kMai fara vara seyo, Demasi ano vara ráke yanasinta van anunu iyan pasen mi séin me ampiren Tesaroniká barufá orikan Karesensi mai Karesiá barufá oríkan inká Taitasi mai Darame-siá akhempá orin en mino. ¹¹Máan tuvin mi Ruku anan téin má ban mifo vá erinte mae Makin masá avire ereno. Para vara seyo, véin ten tiyaen dorarí ukhen mino. ¹²Tikikasin pefá tiantékun Efesasi barufá orikhen mino. ¹³^lÉi ma eriyáke vá Troasi barurá Karapusintá tesi yante afuin me yavamádékun ban mifo mai vá bompon dóki kayo vá inká mairá ma sipisipi aurá ma uvanteruna vompon dóki ma yékun bain masá bare ereno. ¹⁴^mAeni fóké ma manáa yaná uvaran banta Areksanda ano séin uman timiyain baré intin Bafan mano mai avúavákái anona véin uman aminten mino. ¹⁵Tetí ankan ma siamiyaruna vaya kayo van béi oyampá baya sé iyan mifo véin tasá daffan ákona ono.

¹⁶Esé araíen ma kó daimin banta avorá tiviren oriyan maen minó ano séin me ampikharen mifo mana ano ída séin má baren mino. Mai avúavasí ma ein Tiyarafenu ano vetíi ume ampiantano van mi inikhé uno. ¹⁷Máan tiyá umpo Tiyarafenui Kama Vaya siamintin minó ena anan nanin banta ano inino van mi Bafan mano séin má báken ákona simiren purin pintena siyaen mino. ¹⁸Namu avúavá sinta ano ma séin dakhafiyan pintena Bafan mano siya uren kamaen tiviren orintí bei inaru yafisimpin oronté uno. Minó damú Tiyarafenu avisá maman daní iyá bano. Mai fura ino.

Porini Kípan Baya Ino

¹⁹ⁿPirisiran má Akuíran má inka mai ma Onesiforusini kéká bápin ná tenti simusin baya yesin orino. ²⁰^oErastusi ano Koriní barurá e kharemí maé inká Trofimusin aí iyaimpin Miretusí barurá me afa é uno. ²¹Mará aine erivesin ná iyon in damú afoká ino. Yuburusin má Pudensin má Rinusin má Krodian má inká minó mumunan kéká bá anon amusin baya yan éi vaonafá oren mino. ²²Bafan mano siretin aunampin bantin ná beni sarisari ano siretin má bano.

^k4:10 Apo 15:37-39; 2Ko 8:23; Kor 4:14 ^l4:13 Apo 20:6

^m4:14 Ais 59:18; Rom 2:6 ⁿ4:19 Apo 18:2; 2Ti 1:16-17

^o4:20 Apo 19:22; 20:4; Rom 16:23

PORI MA TAITASIN UVAMAN AMEIN BOMPON MINO

(Taitasi)

Taitasi Vompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pori ino.

Uvarein orana ino.

AD sikisti-sikisi (66) fin mino. Mai maen Pori ma karavusi finte ma utúantan ma Romú baru me ampiren bei yoraríen nóken mino.

Ma vompon ma uvantein baru ino.

Masedonia safi Efesasi safi áa Nikoporisi safi sen amino iyan mino. (Taitasi 3:12 fin ná onano.)

Ma vompon ma uvaman amikhein banta ino.

Ena anan pinte vanta ma Porin arona váken ma ven ayaen monó doraríen noré ein banta Taitasin mino. Máan tiyaren maen Kirití musóká o váken monó dorarí iyan mi uvaman amikhen mino.

Nái ana vará ma vompon uvanten nafino.

Taitasi ma Kirití musóká monó dorarí iyáken ma uman dosiyain nan mi ará ákona uanten inká manáa yorani aa aní uanten ukhen mino.

Pori Ma Taitasin Uvaman Amein Baya Ino

1 Téi Pori Tiyarafenui miyan ída varan doran bantan báké Yisas Karaisini vava varen mo siamin banta uno. Béi anon téin tisintein mai ma veyan iyákein nanin bantai mumunan ayaé mo ákona uantékun Tiyarafenui fura sikhein baya vá avúavá bá afová uren béin ánain bákurinten mino. ²PMa fura sikhein baya ano mai ma Tiyarafenu ano fara van oriyan ban aunan amenté uno siren iyáantan bain nanin bantai mumunan má afova vá ákona uantanten mino. Pefá ída minó daná afoká ukhan mai ma fara van oriyan ban aunan timeno van tiádan baren mino. Tiyarafenu ano ída setí ankan kampun tisinté iyan mino. ³Pefá ma véi siádakaré ein damú pura sen afoká íkan mi vei Kama Vaya maman amasí urái mai Vaya setí ankan minó nanin bantafin tian amá iyá uno. Mai ma setin evaránen tivíkein mai Tiyarafenu ano séin aní uren beni yorarí ino van tisintái ma Vaya minó nanin banta siamiyá uno.

⁴qTaitasi oe, erasanti mumunan mano manái ukha, éi sen tanin an mi yakhen ná ma vompon éin uvaman amé uno. Tetin Tifóe Tiyarafenu vá tetin ma siya uren tiviran banta Yisas Karaisin mái sarisari vá ará kusin masá éimpin bano.

Taitasini Yoran Kirití Musóká Ban Mino

⁵Erasan ma ída yóan kípakheruna yoran dóan kípiyákeya séi ma siamerunái e vá minó kákan baru kayo fimpá Yisasini mumunan nanin bantai yoran banta kayo khaono van mai anarái éin Kirití Musóká me afaé uno. ⁶rMai yoran bantai avúavá ano vanasi avorá puntákantín be aná bá ana vá

puntáden bano.[†] Béin akhafana ano yere vá monópin mana váken be anóe afóeni vaya ída átakharé uren ma fon iyani avúavá ma ída variyantiya vá mai vá ódeya avirano. ⁷Tiyarafenu ina yanáká ma yafisin bantai avúavá ano vanasi avorá puntáken ná bano. Béi ída vá bei aví daní uren ena aví maman bararasien ná inká ainen aran ádé bain banta váken ná ída vá óen non naren ná aruvono van ino. Béi ída vá banasii ona kampun tiren baren ná inká moníká ana inin kaen ná ino. ⁸Máan tin nafo ena nanin banta ano ma véin amápin ma erintin ná avábasá ino. Béi minó kama avúava san mana vá anunu iyáken kama ineine ánain bákuriyan dafíken ná bano. Béi vei ineinerá dafíben ná puntáden kantasí ukhen bano. ⁹Mai ma fura vaya véin pefá tiamikhá ein ná pákaaren mantaan ákona ino. Mantaan ma ákona uven maen puntákein bayafó ákonaen banasi siamiyáken ná inká mai ma fura vaya ma namuroí iyain kayo vá puntarano.

Kirití Musóká Ma Namu Avúavá Bariyain Kékái Vaya Ino

¹⁰^sPara vara seyo, vaya ma átakharéin nanin banta kokhon mi Kirití musóká ban mino. Beni ana i vain baya ma sian pura yanasí uren banasí ma máka sen noin kéká kokhon mi van mino. Mai kéká pinté au khavin avúavákái Tiyarafenu ano evaránen aviranten mino ma siyain kéká anon moéken pura ma seiní iyan mino. ¹¹^tPura sikhein baya fókesá betíi aa iyádesin ná betí avaya fákano. Para vara seyo, vetí ankan banasii ona vá moní bá kampun tiriya

barano van ída ma siameren baya e sian more mere iyan banasii van máden asuse iyan mino. ¹²Kiriti kayo van kampun baya ana siyáken afá pon an den nóken avesara ana iyan ban kéká ino sen betíi sakanampa vanta kayo finté mana ano sian dákó ukharen mino. ¹³^uMa fura sen afoká ukhein avúavá baya ifo vá mai avúavápin ma oferiyain kéká auhin ná ákona e vaya siamiyasin ná mai ma fura sikhein avúavá ánain mana vá bákurino. ¹⁴^vYutan kayoi anafu aráoni maní bayará ma ákonaen tiamen nóken pura vaya ma yo ékiyain kékái vaya ída vá inino. ¹⁵Ará ma avusese ukhein kayo ina yanasinta minó avusese ukhen mifo ará ma fainí ukhan ída mumunan iyain kayo ina yanasinta ída avusese ukhen mino. Betíi ineine vá kama yaná bá namu yaná bá ma afováin asuse ukhen mino. ¹⁶^wBetí ankan oo máa fókéi Tiyarafenu van afová ukhé uno sé iyan mifo vetíi avúavá ano ída véin bákuriyan mino. Máan tiyáken betí ankan Tiyarafenu van ída anunun inian kaumpan uren baya átakharé iyain ída kanaíen mana kama avúavasí inten mino.

Pori Ma Taitasin Nan Puntákein Afova Vá Ameno Sein Baya Ino

2 Máan tukhen mifo Taitasi oe, in-téa vaya ákonaen puntákein ban nafi mai vá banasi siamesin ná afova uren dakhafino. ²Anon banta kayo afova amesin ná ída óen non nen asuse en nóken ná betíi ineinerá dafisino. Máan tiyáken inká kama vanta ino siyantín ena van anunu iyáken ná mai fura vayará mumunan ukhen ná mireníen uman eriyantín mantaan ákona ukhen

[†]**1:6** Manáa afova vanta kayo ano mai van máa sikhen mino. *Mana nanin máa vá barano.* Ena afova vanta kayo ano mai van máa sikhen mino. *Ída vá anasi máde ifá urú urú en nono.* 1 Timoti 3:2, 12 fin dere vá onano.

^s**1:10** 1Ti 4:7 ^t**1:11** 2Ti 3:5-6; 1Pi 5:2

^u**1:13** 2Ti 4:2

^v**1:14** 1Ti 4:7

^w**1:16** 1Yn 1:6; 2:4

ná bano. ^{3x}Mai ma anon banta kayo siameonaí ana e vá anon nanin kayo siamesin ná betíí avúavá bá inin onan má pura sen Tiyarafenurasá dantin bano. Máan tiyáke ída vá baya uvaman more mere en ena nanin banta aran amiyáken ída vá áintin óen non naren ma óen in anunu ano vetíí inintá dafisino. Mai ma kamaen puntákein avúavá ana vá ena nanin banta aní ino. ⁴Máan tiyáken ná auyen nanin kayo vá kama afova am-intin ná be avafu akhá avábá ino. ^{5y}Inká betíí ankani ineinerá daffben Tiyarafenu avorá puntáken ban ná mápin kamaen dafisiyáken kama avúavá ana variya ná betíí avafunái aránaópasá oriyán bano. Betíí ankan mai avúavasí ma intin maen minó nanin banta ano Tiyarafenui vará ída oyampá baya sinten mino.

⁶Máan mana e vá minó pumara vanta afova amire ayaesin ná betíí ineinerá daffan ákona ino. ^{7z}Minó danasí ma inonafin ná ei kama avúavasá aníesin ná mai fumara vanta ano ódaren ná mai ánain mana vá dakhafino. Inká Tiyarafenui vaya ma sian afova ma ameno van éi fúkekhahe vá ineine ure funtáde fura vaya ana vá tiameno. ^{8a}Éi ma funtákein baya ana ma siyasin maen maifin ída namu ukhantin banasí ano oman afoká inten mifo namuroí ma iyain kayo ano vetíí ma siyain baya van ayave uren ída setin toyampá baya sinten mino.

^{9b}Ída miyan baran doran banta afova amesin ná betíí yafisin banta aránaó báken betíí yoran bariyan ná doran nan ma siantantin ída vá evaránen anona vaya sino. ¹⁰Inká ída vá betíí yafisin banta kayo ina yanasinta umoyan barantin ná betin oman pura yoraríin kéká ino vá tino. Máan siyantín ná minó daná ma varan nain mano setin ma

Evaránen Tivíkein Tiyarafenui vaya ma ena nanin banta ano iniyáken kama vaya ino sinten mino.

¹¹Para vara seyo, Tiyarafenui sarisari ano ma vanasi ume fintena ma evaráne avíkein aa inka minó nanin bantafin dákó en mino. ^{12c}Tiyarafenun ma oyan amin avúavá bá inká ma vara ráke namu avúava san ma anunu uren mai ánain bákurin má ífá inon tiren mi mai sarisari ano saréa setin tisimiyan mino. Tiretíí ineinerá kama e yaffbe nóke ákona e mantakhe vá Tiyarafenu van peran kékasá bano sen tetin tisimiyan mino.

¹³Mai ma setisi kákan Yisas Karaisi ano ma Evaránen Tivíkein Tiyarafenu ma vei kakhampin ma afoká inain nan tetí inikhé timusin iyá ave ukhé tiféuno.

^{14d}Mai ma setin nare siren ma ve au fóké ma namu avúavá pintena ma miyaní uren ma setin evaránen tivíden tesé uan avusese uren ma ve inái ukhein mai nanin banta ano kama avúavá ana varano van mi iyan mino.

^{15e}Máan tukhein nan mi Taitasi oe, mai ma éin tiameruna vaya kayo vá ena ena yamú minó nanin banta siamiyáke vá baya ma átakharéin kéká sá ákonae funtarano. Mai ákona éimpin ban mifo ída vá áesin éi ma sinona vaya van mana nanin banta ano oyampá baya sino.

Pori Ma Vanasi Van Puntákein Avúavá Ana Vá Barano Sein Baya Ino

3^fBanasí evaráne siamesin ná kamanin má beni ánon banta kéká bá aránaópa sá báken betin oo yayiyian ná kama avúavá barano van utaaren ná bano. ²Inká ída vá ena oyampá baya siren aruve asive iyáken ná bempáke sá ará kusen bano. Betíí ankan puntáden

^x2:3 1Ti 3:11 ^y2:5 Efe 5:22 ^z2:7 1Ti 4:12 ^a2:8 1Pi 2:15 ^b2:9 1Ti 6:1

^c2:12 1Yn 2:16 ^d2:14 Eks 19:5; Ditu 7:6; Isi 37:23; Kar 1:4; 1Pi 2:9

^e2:15 1Ti 4:12 ^f3:1 Rom 13:1-7; 1Pi 2:13-14

báken ná ena nanin banta fura avúavá aní ino.

³gPefá tetin má dere vaya átakharé iyáké maka siré óen avúavápin timusin dosé nókun mai ano setin damuáda baré tiféuno. Maifin ma vá tifékun maen namu avúavá bá ume avúavá bá ano setimpin bíkakhá ena ina yana san tiran niyáké ben ará namu uantan maran niyáké uno. ⁴⁻⁵hMáan tiyaré tifé umpo setí ankan ma Evaránen Tivíkein Tiyarafenui anunu vá avábá bá ma afoká ein nan mi véi setin evaránen tivíken mifo seti ma funtákein avúavá bariyaré é tiferuna rasa ino. Ída ino. Bei arunanápoi setin evaránen tivíken mino. Tiyarafenu ano Kantá Aunan pói setin tesé uren evaránen maman auyení urá bá tiféuno. ⁶iTetin ma Evaránen Tivíkein Yisas Karaisin pintéi uaren Tiyarafenu ano vei Kantá Aunan ída fákan tetin timaniná banaen mino. ⁷Máan turanti mae Tiyarafenui sarisarirá tetin nan ída umeí ukhein mino siren para van oriyan ban aunan nan ma iyátintan bain ída aa iyarantí barano van ma ave ukharé eruna kasaé tetí ankan bará tifanté uno. ⁸Taitasi oe, ma ma éin tiameruna vaya vará pura sen puntákein baya ino vá teno. Mai vará éi ma vaya fara e siame oriya vasin ná Tiyarafenurá ma mumunan iyain kéká ano yafíben kama avúavá ana vá barano. Mai vaya ánain ma vákurin nain kéká mai vaya ano kama ayairí inten mino.

Porini Kípan Baya Ino

⁹jMáan tinten mifo mai ma ída kama ineine van ma asuse vaya kayo sen nóken ma vanasii ineine máden namu iyan ma inká be anafu aráon aví para

vano van ma séi ven ana ayavéno uno siriyan ma vetíi man bayará bákuriyan ma aruve asive en noin kéká áde ída vá orono. Mai fara vara seyo, mai vaya kayo maen asuse vaya kayon báken mai ano ída kanaíen éin aya inten mino. ¹⁰kManáa uman afoká inafa vá mai ma nóken betíi vayará ma ákona e nóken kampun baya kayo fóké ma ena monó kéká arápiníen ma noin kéká ma siamesin ída ininti inká evaráne enáda tiamesin ma ída ininti mai ída vá oo aí iya mairasá mo ífá ano. ¹¹Éi afová ukha ono. Máan bantai avúavá ano ída funtákan bei umefin bákan mai anon béin daimiyan mino.

¹²lInaimpáké ma Atemasin nafi Tikikasin nafi ma siantékun ma eni varu varen eni yoran aya ono van ma éi vaonará ma o unintiya éi aine vá aaf ureya Nikoporísí barurá ereno. Mai fara vara seyo, iyon aú ma afoká inaimpin mai varurái o vanté unon té inikhé uno. ¹³mAporosin nú man baya afova vanta Senasin nú ma mairá onóben ma intéa yanasará inten nafi mai éi ayampaí ure vá mai yanasinta ayaesin ná mamaren orino. ¹⁴nTetin má ma monó tiyain nanin banta ano kama avúavá ana ma varen oriyan bani ana ma afová uren maen mi yunan má ona vá ma ída van nain kéká kasaien aya iyáken ase senanin banta anan banten mino.

¹⁵Téin má ma minó mumunan nanin banta ma vain mano amusin baya siádákan éi vaípa oren mino. Taitasi oe, éi vá Kirití ma mumunan nanin banta váken tetin nan anunu iyain kékasá amusin baya siameno. Tiyarafenui sarisari ano vá tiretí ankan má bano.

g3:3 1Ko 6:9-11; Efe 2:1-2; 5:8 h3:4-5 2Ti 1:9; Ibu 10:22

i3:6 Apo 2:17-18 j3:9 2Ti 2:14, 16 k3:10 Mat 18:15-17

l3:12 Efe 6:21-22; Kor 4:7-8 m3:13 Apo 18:24; 1Ko 3:5-6 n3:14 Efe 4:28

PORI MA FIRIMONIN UVAMAN AMEIN BOMPON MINO

(Firimoni)

Firimoni Vompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pori ino.

Uvarein orana ino.

AD sikisti-tu (62) fin mi uvanten mino. Korosike vompon má Efesasike vompon má ma Tikikasi varen orein pimpá ino.

Ma vompon ma uvantein baru ino.

Romú ma karavusí ukhen maen karavusi namumpin mi uvanten mino.

Ma vompon ma uvaman amikhein banta ino.

Korosí baru ráke vanta Firimonin mino.

Nái ana vará ma vompon uvanten nafino.

Firimonin ina urantin miyan ída van doran banta Onesimasi ma Karaisimpin mumunan afá aváení ukheini ume ampiantano van mino. Ma vompon mano ume ampiantan má avábá in mái sian amá ukhen mino.

Pori Ma Amusin Baya Ino

1 Téi Pori ano ma Yisas Karaisini Kama Vaya ma siamiyarunarái kar-

avusifin báké erasan tifá Timotin mái ma vompon uvaman éi Firimoni ma verasanti mana yoran banta van ná ma moéké tinunu iyarunan amé uno.

²Inká tetin tiyofin Afian má tetisi mana yoran banta Akipusin má inká mumunan nanin banta ano ma en amápin átaru uven monó tiyain kayo vái ma vompon uvaman amé uno.

³Teti Sifóe Tiyarafenu vá Yisas Karaisin má ano vá tiretin tarisari uren ná ará kusin amino.

Pori Ma Tiyarafenun Tusu Sianten Amúkein Baya Ino

⁴Téi ma éin nan timúkuantiyá maé Tiyarafenun ena ena susu siantiyá uno.

⁵Mai fara vara seyo, ena kéká ano éi ma Yisas Karaisintá mumunan iyáke ma mumunan nanin banta van anunu ure ma aya iyaona van tisimí iniré uno.

⁶Éi ma mumunan iyaonaíen ma mumunan iyain kéká bá ma monó tesin maen mai ma monó tin avúavápin ma éi ákona iyaonaíen mai kayo ano ákona iyantiyan mai ma Tiyarafenu ano ma kama yanasinta setin timiyain afová inono. Mai avúavá áesin afóka intin ná Karaisi kákan bí barano van mi ákonaé timúkuantiyá uno. ⁷PÉi ma mumunan nanin banta anunu iyaona anon téin kákan timusin má tirá ákona usintan má timiyan mino. Mai fara vara seyo, éi sen tifá anon mumunan kékái ará kusiantiya nái ma vaya siyá uno.

Pori Ma Onesimasi Ano Aya Ino Van Ina Ein Baya Ino

⁸Mai van mi Karaisin avíká kasaé éin duvun ékuya kama avúavasí inon naren mifo ⁹se nan ma anunu iyaona van mi fara inaúan iniyá uno. Anon banta Pori ma Yisas Karaisini yorantá karavusifin

bain mano ma inauádein bompon ná barano.

¹⁰Ma karavusi namumpin ma séi monó tiyákun ma Onesimasi ará baeren mumunan bantaí ein manon ten tanin uró an dakhái ei kama avúavá béin aní esin onano van mi séi inaé uno. ¹¹Pefá Onesimasi[‡] ano ída kamaen ayainton karan orikharen mifo saréa erasan kama uron mi en tiya inten mino.

¹²Te súkákéi véin nan tinunu iyákéi e vaonafá evarané tiantékun oriyan mino.

¹³Banasi ma Kama Vaya siamiyarunará ma karavusií ukherunafin béin ayópá ékun eni varu varen téin tiya ino van inikharé uno. ¹⁴Inikhé umpo éi ma eyo sesirá béin ayópá ono van mi iyá uno. Ída éin duvun onté umpo ei anunurá tiya ono van mi inikhé uno. ¹⁵Éin má típá bano van mi sanáa afará éin me ampiren karan orikharen mifo mai van iniya vá evaráne avirano van mi inikhé uno. ¹⁶Béi ída miyan baran doran banta ana vanten mifo séin tiran nakhein tifá tiváení ukhen mino. Máan tukhein nan mi eni miyan ída van doran bantaíen maen inká eni mumunan afá aváení en intéfi véin nan moéke anunu inono sé inikhé uno.

¹⁷Éi ma sen nan téi má mana yorarí iyain banta ino ma se ininte vá mai séi ma orékuya ma sivábá inona máan uron ná eya véin avábá ure vá amusin

uantano. ¹⁸Inká éin uman amen ná en nina yaná umoyan baren ná ukharé in-ten nafi mai yanasinta anona evarané amenté uno. ¹⁹Téi Pori anon te siyam-póké ma vompon uvaré uno. Mai ma véi mantáin nain danasinta séi anon anona evarané amenté umpo éin ma ayaékuya Yisas Karaisintá ma mumunan ukheona yina maen éimpin para van mifo mai van ída inantenté uno.

²⁰Tifa soe, erasan Yisas Karaisin ninan bá umpo Bafan avikasá téi ma in-aerunaí esin ná tirá kusi sintano. ²¹Téi ma ma vompon uvádé inaeruna fákena éi moéke kama avúava suron mi varan nono sé iniya uno.

²²Téi ma iniyaruna mai Tiyarafenu ano siretí ankani amúkin eyo sintí maé tiritin má evarané o vanté umpo mana karafaran ná ten tina funtáádano.

Pori Ma Kípan Amusin Baya Sein Mino

²³Yisas Karaisini yorantá ma sen má karavusií ukhein banta Epafrasi anon ma vompompin éin amusin baya amen mino. ²⁴Ten má ma mana yorarí iyain banta kéká mai Maki má Aristarkusi má Demasi má Ruku má ano yeren amusin baya amen mino.

²⁵Bafan Yisas Karaisini sarisari ano vá eni aunampin ná bano.

[‡]1:11 Kiriki veya finté ma Onesimasin ne ma siyain mai *Kamaen Ayain Banta* e sikhen mino.

^q1:10 1Ko 4:15; Kor 4:9 ^r1:16 1Ti 6:2 ^s1:22 Fir 1:25; 2:24

^t1:23 Kor 1:7 ^u1:24 Kor 4:10-14

IBURU KEKÁ MA UVAMAN AMEIN BOMPON MINO

(Iburu)

Iburu Vompon Ma Uvanteí Pákenai Afova Vaya Ino

Ma vompon ma uvantein banta ino.

Ída mana ano afová ukhen mino. Ma vompon ma uvantein banta maen Timotin arona váken Tiyarafenui Feyante Vompon Dóki Kayo afová ukhein manon uvanten mino.

Uvarein orana ino.

Yutan kayo vá Romú kamanin mái aruvin ída arái ukhan AD sikisti-faipei (65) fin mi uvanten mino. Yutan kékái aruvin ma AD sikisti-sikisi (66) ráké septenti-tari (73) rá ma mo kipein aruvin ída arái ukhan inká Yerusaremí kákan baru vá dere ída aren taren ira saman kaúkan mi ma vompon uvanten mino.

Ma vompon ma uvantein baru ino.

Romú barurá ino sen iniyan mifo o siádan baya ano siyáken Itarí barafin ne sikhén mino. (Iburu 13:24 fin ná onano.)

Ma vompon ma uvaman amikhein kéká ino.

Yutan kéká pinté ma sanáa ano Yisasintá monó tiyan mumunan iyákan ma Iburu kéká ino siyan ma vompon uvaran banta ano afová ukhan ma mana akhempá baré ein kayon uvaman amikhén mino. Mai kayo van

Yerusaremí baren ne sen iniyan mifo manáa ano siyáken Areksandriá se sen Korini se sen Efesasi se sen inká Romu se sen iyan mino. Esé arái in táké Karaisintá mumunan nan betin aren asen iyákan mai ma arái in táké ma ákonaen eriyá ein avúavá me ampiren Yutan kayoi ara ara kampun afova ánain bákurirí iyaimpin mi ma vompon uvaman amen mino.

Nái ana vará ma vompon uvanten nafino.

Yutan anan pinté ma Yisasintá monó tiyan mumunan iyain kékái aní iyáken Yisasini ákona anon man baya vá sakhanampa kéká báí vava vá esantakhen ne sen aní iyáken mi sian amá ukhen mino.

Tiyarafenu Anin Mano Ma Enisori Kayo Esantakhein Baya Ino

1 Pefá Tiyarafenu ano kokhon dádái ara ara aa sáké uaren mi sakhanampa vanta kayo oo ráké tetin tinafu siráon baya siamikharen mino. ^{2v}Máan tukhan mifo ma vara kípan damú ádesí iyan mi ve Anin pinté uaren tétin tisimikhén mino. Tiyarafenu ano ve anin pinté uaren bara vá inaru vá inká minó danasinta vá uváden béin iyántákaren mi minó bei yanasinta mai iyampon amikhén mino. ^{3w}Máan tukhan mai iyampon mano Tiyarafenui kakhán aúpin mi váken minó béi ma variyain avúavá máan aní iyan mino. Bei ákona vava fókéi ma varafin ma vain danasinta ákona uanté iyan mino. Tetinti ume sesé uré avusese usintano van ma e fúaren mantaven mai oyampákéi ve afóen ayan kuompá ma vain Kin karáká inarufá un kumamen kákan bí baren mino. ^{4x}Máan ma ein avúavá anon aníen mi ve Anin manon

fintéi Kantá Aunan amusin amídú ukhen mino.

Yisasi Ma Uman Baren Purein Manon Ma Setin Evaránen Tivíkein Baya Ino

⁵Mai ma ínaimpá erin nain bara van ma siyá tiferunará enisori kayo ano ída yafisinten mino. ⁶Máan tinten mifo Tiyarafenui bompon dókifin máa sikhen mino.

“Inte anarasá banasi van iniya vákeya, inká pará banasirá dafisiyá ba fono.

⁷Manáarái véin maman enisori kayo aránaópá denan baré iyan, kákan bí bá kakhán má póké béin kamamosí uantádeya,

⁸minó daná ben aránaópá kae ono.” *Íbo 8:4-6*

Tiyarafenu ano minó daná maman ben aránaópá kaúdan beni yafisin akhempá mana yaná ano ída van mifo saréa ma oné tifékun maen mai yanasinta ano ven aránaópá ída van mino. ⁹eMáan tukhen mifo Yisasin ma maman enisori kayo aránaópá dan ma manáa rá baré íkan ma Tiyarafenu ano kákan bí bá kakhán má pó ma véin kini kamamosí uantákein mi oniyá tiféuno. Mai fara va ino. Tiyarafenui sarisari áupin mi Yisas Karaisi ano ma vara ráke nanin bantai ara ara uman baren púbin mino.

¹⁰Mai ma minó daná uváden maman dan ma kamaen doriyain Tiyarafenu ano funtákein avúavá baren mi kokhon nanin banta avíden béi ma kákan bí manteiníen betin amen mino. Yisasin ma uman bareintái Tiyarafenu ano vanasi aya uren evaránen avían kakhantá kaen mino. ¹¹fMáan tukhein nan mi Yisas Karaisin má inká mai ma maman kantásí uantákein kéká bá Afóe mai mana anan ban mino. Mai ana van mi Yisas

Karaisi ída ayave van inton kasaen te sun tifá kayo ino sen ariyan mino. ¹²Mai van mi Tiyarafenui vompon dókifin béi máa sikhen mino.

Te sun tifá tiváeyan avorá eni kákan bí tian dáko onté uno, monó nanin banta avorá í diyáké en aví daní onté uno.” *Íbo 22:22*

¹³Máa siren evaránen temí, Tiyarafenuí anan tesi inin kaonté uno,”

Ais 8:17

siren evaránen temí,

“Tiyarafenu ano ma simein iyampon kayo vá masi vá uno.” *Ais 8:18*

Yisasini Furin Mano Ma Ban Anoni Ákona Maman Bararasí Ukhein Baya Ino

¹⁴gTiyarafenu akhafana mai amasi vá nare vápói uvantein pasen Yisas Karaisi yere mai avúavápin mi yorun afoká uven mai vukhafa vái varen mino. Barará banta an daven ma véi furein manon purini ákona ma fákakhá ein Ban Anoni ákona maman bararasíen mino. ¹⁵Yisas Karaisi ma mai avúavásí ein manon mai ma furini akhokho ano ma vanasi yamuádan báken ma veni miyan ída varan doran nanin bantaí ma ukharé ein mi útúanten mino. ¹⁶Para vara seyo, enisori kayo aya ono vara véi eren naifo, Abaraamun anavasín aya ono van mi erikhá mai afová ukhé tiféuno. ¹⁷Máan ma ein manon tetin maman be aun afasí uren mi Tiyarafenu avorá tarisari vá puntákein monó ánon banta kékái ánon bantaí uven béin íkun uan amintin banasii ume ampiantanten mino. ¹⁸Akhenókain uman béi varen afová ukhein pasen mai uman ma varan nain kéká kasaen aya inten mino.

**Yisasi Ma Mosesin
Esantakhein Baya Ino**

3^hMáan tukhein nará kantasí ukheona sifá tiváeyan má tiyó má bá ano ma inarufá orono van iyaona kéká ano vá ineno. Tiyarafenui vaya varen orin banta Yisasi ma monó ánon banta kayoi ánon bantaí ukhen mino ma siyáeruna vará ineno. ²Mai fara vara seyo, Mosesi ma Tiyarafenu oo yaiyen puntáken beni vanasirá dafká ein an mi yen Karaisi ano mai ma véin aní uren tiantan erikhá ein Tiyarafenu oo yaiyen puntáden doren mino. ³Mana vanta ano ma kama ukhein namun uváden maen mai vanta anon kákan bí baré iyan mifo mai namun mano ída kákan bí baré iyan mino. Máan manan en mi Yisasi anon Mosesin esantaren kákan bí baren mino. ⁴Mai fara vara seyo, mana mana namun ma vain mai mana mana vanta anon uvanten mifo Tiyarafenu anon minó danasinta uvanten mino.

⁵ⁱMosesi ano Tiyarafenui yoran bantaí ukhen mi véin oo yaiyen puntáden beni vanasirá dafíken maen inká ínaimpáké ma Tiyarafenu ano fura vaya ma maman dákó inain avúavái aman manon an mi yakharen mino. ⁶Máan tiyaren mifo Tiyarafenu Anin Yisas Karaisi anon ben oo yaiyen puntáden báken ben amáká dafíken mino. Máan tukháí mai ma Karaisi ano e siviran nain nan ma simusin iyáké ákonaé ave ukhé tiferuna kéká ano ven amá an mi yakhé tiféuno.

**Ída Ma Ará Baeran Nain Kéká Ano
Ma Uman Baran Nain Nan
Ma Amaan Baya Sein Mino**

⁷Máan tukhein nan mi Kantá Aunan mano máa siyan mino, Taréa vá beni vaya ineno.

⁸^jMai ma kámá barafá ma vanasi ano Tiyarafenui vaya átakharé uren, béin akhenóka uan oniyá ein an deya ída vá tiretíí ará pákaan ákona ono.

⁹Tiretíí ankan anáuyan mai foti (40) oranarái enará ukhein daná aní ékun oniyáken mifo

séin akhenóka uan oniyaren mino.

¹⁰Máan tiyaimpin betin nan tiran nan uantádé máa sé uno,

‘Minó damú téi ma siameruna vaya me oyan amiren maen

ída sen too yayiyan mino.’

¹¹^kMáa siré tiran má ákona vayafó máa sé uno.

‘Betí ankan mai séi ma sivíkiyaruna varufin ída uron mi orinten mino.’”

Íbo 95:7-11

¹²Máa seruna ifo mumunan tiyofi sifá tiváeyan noe, máan tiyare mana ano aúkáké ída mumunan esin mai avúavá ano siretíí ankan aviren tavi aipá orintiya aunan bain Tiyarafenu me ampín nampo yaffan ná ákona ono. ¹³Máan tin nampo “Saréa”^q ana e ma sikhantiya ena ena yamu sá ben ákona uantatan maran iyasin ná ume avúavá ano siretíí ineine ída e yarifanti vá Tiyarafenu ída me oyan ameno. ¹⁴Mai fara vara seyo, mai ma esé aráíe mumunan é tiferunaí é ma Tiyarafenu rá ákona inin kauré ma oriyá maé mai Karaisin mái manafin dorá tifanté uno. ¹⁵Máan tonté tifé

3:13 “Taréa” e ma sikhein mai Í Bompon 95:7-8 fin ma máa sikhein mino. “Tiretíí ankan ída vá Isareri kéká ano ma Tiyarafenui vaya átakharé uren ma vetíí ará pákaan ákona iyá einisá ono.”

^h3:1 Nam 12:7; Ibu 4:14; 7:26 ⁱ3:5 Nam 12:7; Diu 18:15-19

^j3:8 Eks 17:7; Nam 20:2-5 ^k3:11 Nam 14:21-23

umpo ákona vaya ma sikhein ída vá áun ono.

“Taréa vá beni vaya ineno.

Tiretí ankan ída vá Isareri kéká ano ma Tiyarafenui vaya átakharé uren ma vetí ará pákaan ákona iyá einisá ono.” *Íbo 95:7-8*

¹⁶Intéa kéká anó Tiyarafenui vaya inikhen mifo mai vaya átakharé ukharen nafino. Mai ma Mosesi ano Isipiké iyanen erein kéka ino. ¹⁷Inká intéa kékasá Tiyarafenu ano foti (40) oranará aranan uantákaren nafino. Mai ma kámá barafá umei uren ma fúan kipein nanin banta ino. ¹⁸Inká Tiyarafenu ano intéa kéka sará ída senti sivíkan barufin o feran nono sen ákona vaya sein nafino. Mai ma veni vaya átakharé iyá ein kéka san mi sein mino. ¹⁹Máan tukhá in mi veti ma ída mumunan ein avúava san bei avíkan barufin ída orinten ne sikhái afová ukhé tiféuno.

Tiyarafenui Vanasi Ano Ma Avíkan Baran Nain Baya Ino

4 Tiyarafenu ano ma vei avíkan barufin orino van ma iyáantákein mai fara vain tiretin pinté manáa ano maifin ída orin nona van mumpo setí ankan daffian ná ákona ukhesá bátifano. ²Mai fara vara seyo, Tiyarafenu ano ma avíkan baru útaádan baini Kama Vaya ma vetí ankan tiamikharé einfen tetin má deren tisimikhen mifo Tiyarafenu ano ma siamein bayará ída mumunan íkan mi mai ano vetin ída ayaen mino. ³ⁿTiyarafenui vaya iniré ma mumunan iyá tiferuna kéká ano anan beni avíkan barufin oró tifanté umpo mai vayará ma ída mumunan inain kayo van máan mi sikhén mino.

“Téi sesi sirananá báí fura ódino siré té uno.

“Mai kéká ano ída uron mi senti avíkan barufin orinten mino.” *Íbo 95:11*

Máan tinten mifo esé ma ma vara uvareintái veni avíkan baru útaádan ban mino. ⁴Mai fara vara seyo, yan manápá ifo afápá kan un kádan damusan béi monó bompompin máa sikhén mino. “Tiyarafenu ano yoriyá ein nan dan manápá ifo afápá kan un kádan damusí íkan mi avíken mino.” *Esé 2:2*

⁵Inká esé ma seruna vompon anafin Tiyarafenu ano máa sikhén mino. “Mai kéká ano ída uron mi senti avíkan barurá orinten mino.” *Íbo 95:11*

⁶Tiyarafenui avíkan baru ma vain mai vanasi ano orin nain mifo fefá ma mai kama vaya siamin ma átakharé ein kéká ano mai varufin ída oren mino. ⁷Máan tiyaimpin Tiyarafenu ano vei avíkan barufin ma orin ená damú maman kaúden maí damusan taréa en tikhen mino. Pefá ma sikhareé ein baya máan Devitin oo ráké uaren máa sikhén mino.

“Taréa ma véin avaya ininteya, ída vá e ará pákaan ákona ono.” *Íbo 95:7-8*

⁸^oMai fara vara seyo, Yosua ano Isareri kéká iyanen Kenaní barafin mo khaúden avíkan amen baré intin Tiyarafenu ano ída ená damusan baya siádan té ein ten mino. ⁹Máan tukhan mi Tiyarafenui vanasi ano ma avíkan nain damú ma iyáantan bain mano fara ave ukhen ban mino. ¹⁰^pMai fara vara seyo, Tiyarafenui avíkan barufin ma ódin nain kéká ano véi ma yóan kípáren avíkein an den mai avíkan o varanten mino. ¹¹Máan tukhein nará mai avíkan barufin ma orin nará ákona ó tifano. Para vara seyo, fefá ma Isareri nanin banta ano ma Tiyarafenui vaya ma átakharé einí ma inain manon eraven ankaminten mino.

¹²^qMai fara vara seyo, Tiyarafenui vayafin mi ayun ma fara van ákona

¹3:16 Nam 14:1-35 ^m3:17 1Ko 10:10

^o4:8 Diu 31:7; Yos 22:4 ^p4:10 Ibu 4:4

ⁿ4:3 Ibu 3:11

^q4:12 Efe 6:17; Rev 1:16; 19:13-15

víkakhen mino. Mai vaya ano vaenati ma sefá tefá an bákan ma avané iyain esantaren moé kentá avan iyáken mai ano kasaen aú bá ayampa vá amasi vápin o feranten mino. Mai vaya anon aú bá ineine vá avúavá bá daiminten mino. ¹³Minó daná ma ma varará bain mano Tiyarafenu avorá ída uron mi aúpá ban mino. Minó ano ma monó té aví daní é iyá tiferuna vanta avorá minó daná ano amákái van mino. Máan tukhein nará minó daná ma varé aruvé iyá tiferuna vá Tiyarafenu avorá tian amá ó tifano.

Yisas Karaisi Ma Monó Ánon Banta Kayoi Ánon Bantaí Ukhein Baya Ino

¹⁴rMáan tukhein nan mi Tiyarafenu Anin Yisas Karaisi setisi monó ánon banta kékái ánon banta anon inarufá ódikhen mino. Mai ma véintá mumunan iyáké ma sian dákó iyá é tiferuna vaya vá pákaan ákona ó tifano. ¹⁵Mai monó ánon banta kékái ánon banta anon tetimpin ma ída ákona vain afová ukhen arunan usintiyán mino. Mai fara vara seyo, varará nanin banta ano ma variyá tiferuna uman bariyáken inká Ban Anoni mákasimpin orivin akhenóka uan onen mifo véi ída umefen mino. ¹⁶sMáan tukhein nará mai ma sarisari ma víkakhein kin kará ádé ída feran oriverá tiyaino van ma ékun ná arunan uren tarisari ino.

Yisasin Ma Ve Aufó Tiyarafenu Íkun Uan Amiren Ma Setin Evaránen Tivíkein Baya Ino

5 Banasii oo vantaí ukhen Tiyarafenu vá bayái ino van mi monó ánon banta kékái ánon bantaí maman uran ban mino. Banasi ano ma Tiyarafenu íkun uan amiyan inká tusu siantiyán

ono van ma varen orin maen betí ume ampiantano van béin Tiyarafenu íkun uan amé iyan mino. ²Béi ma varará bantantan bákan ben má dere ída ákona van mifo mai ma ineine asuse ukhein nanin banta ano ma savi aintá oriyán maen be-mpáké ará kusin pintéi vetí ankan manan puntariyan mino. ³¶Mai van mi vei ume vá banasii ume vá ampiantano van mi Tiyarafenu mo íkun uan amiyan mino. ⁴¶Máan tukhantin mana vanta ano ída vá beyantá kákan bí barano van monó ánon banta kékái ánon bantaí ino. Tiyarafenu ano ma Eronin aní uran baré einíen ná béi ana vá aní urantin mai yorarí ino.

⁵Máan tukhan Yisas Karaisi ano ída veyantá kákan bí barantó uno siren monó ánon banta kékái ánon bantaíen mifo Tiyarafenu anon máa siren béin mai yoran amen mino.

“Éi sen Tanin mono, saréa éin afóení é uno.”[§] *Íbo 2:7*

⁶vInká ena vompon anafin béin nan máa sikhen mino.

“Éi Merkisedekin an deya fara van oriyán ban monó ánon bantaí e ono.” *Íbo 110:4*

⁷wMa varará ma Yisasi yorun báken purin pintena aya ino van bei arunaná pinté kákan ifí diyáken Tiyarafenu ano aya ino van béintá ákona inin kaein nan mi veni amúkin inen mino. ⁸Yisasi maen Tiyarafenu Anin mifo vara ráke uman kayo ma variyáken mi oo yayin avúavá afová en mino. ⁹Mai aa sákéi Tiyarafenu ano véin maman monó doran banta kékái funtákein ánon bantaí uren mi kasaen minó dorarí inte ne sikhen mino. Máan tukhein béi anon mai ma ven oo yayin nain kéká evaránen avíden para van oriyán ban aunan am-

§5:5 Manáa vompon dókifin máa sikhen mino. *Taréa éin maman te sikhási é uno.*

†4:14 Ibu 3:1; 10:23 §4:16 Ibu 10:19 †5:3 Riv 9:7; 16:6 ¶5:4 Eks 28:1

v5:6 Ibu 6:20; 7:1 w5:7 Mat 26:36-46; Fir 2:6-8

inten mino. ¹⁰Máan tukhein nan mi Ti-yarafenu ano véin maman Merkisedékin an den monó ánon banta kékái ánon bantaíen mino.

Baya Inin Avúavá Ma Me Oyan Amiyái Pákena Aaman Baya Ino

¹¹Ma ma siamiyaruna mai kokhon bayan ban mifo ída kama e iniyanáí veni ana ída sian amá iyá uno. ¹²xTiretí ankan pefa suron mi monó nanin bantaí ukheya eriyare ompo ena nanin banta ma afova amiyán baren mi ena kéká ano siretin evaránen monó baya fákena afova amino van iniya ono. Tiretí ankan arará iyampon mano ma ída ákona yunan nakhen ma nan anu máa ana ma niyain an mi yakharono. ¹³Máan kéká ano arará iyampon ma nan anu nein an mi yiyan pasen puntákeín avúava sinta ída moéken afová ukhen mino. ¹⁴Puntákeín avúavá bá ída funtákeín avúavá bá ma oman afova suron uren ma funtákeín avúavá ana variyain kékái nan ákona yunan ban mino.

Arará Iyampon Ma Afova Amein An Ma Yan Avúavá Ma Me Ampin Baya Ino

6 Máan tukhen mifo ída vá mai ma esé araíntá ma Yisas Karaisini veya sisimí iné tiferuna avúaváká evaráné orive orive iyá bá tifano. Monó avúavá purasé afová uresá ume avúavá ma me soyan amiré erikhé tiferuna ída vá evaráné mo aruviyáké Tiyarafenurá ma ákona mumunan in nará inétifano. ²Monó non péantan nafi ayan ánontá kaúden avu uantan nafi fúaren ma orun mantan nafi inká Tiyarafenu ano ma ínaimpáké ma vanasii avúavá daimináí pákena van mana ída vá tiamiya vano. ³Máan tiya tifékun ná Tiyarafenu ano

ma anunu intí maerá moékan afova vará tifano.

⁴yPara vara seyo, mai ma Tiyarafenui fura veya vá kama yanasinta vá afová en ma Kantá Aunaní avúavá baren ma Tiyarafenui kama avúavá bain baya vá ⁵⁻⁶inká ínaimpáké ma ma vara kípan nain ákona vá ma afová ukhein kéká ano ma Tiyarafenuin me oyan amiren oriv-inten maen ída kanaíen ará baeranten mino. Mai fara va ino. Máan kéká anon Tiyarafenu Anin oyan amiyáken mi véin evaránen daa unkamádantá ariyáken banasi avorá béin ankayan tiren ayave amiyán ban mino.

⁷Banasi ano ma varafin danayun dókáin ma á eren bara afú daran ma orun ampamaren ma kama aran iré iyain mai Tiyarafenui avábái varé iyan mino. ⁸zMáan té iyan mifo mai yunan anafin ma namu naman má ayankun naman má ma e ampamaren ma yunan ana yarádantin maen mai yunan ana afóe ano mai vara van aufon ukhen mino siren ira saman kaurinten mino.

⁹Téi ma sinunu ukheruna sirona kéka soe, ma veya ma siyaruna van mai ída siretin nan tiyá unon té iniyá tiféuno. Tiyarafenu ano ma setin tiya uren tivíkeimpin ma kama yaná afoká inti ma varan nona rái inin onan kaúka ononté inikhé tiféuno. ¹⁰aMai fara vara seyo, Tiyarafenu ano funtáken ban mino. Mai ma veni ákona yorarí iya ma mumunan nanin banta avábá ureya ayaiya ma kama e yafisiya vaona van béi ída áun inten mino. ¹¹Ena ma ará amin avúavá ákona uan pákaráke oriyareya mai ma ákona inin onan kauráke ma ave iya vaona yaná purase o varano van mi setí ankan tinunu ukhé uno. ¹²Máan ma inteyan monó avúavápin ída avesara in nono. Máan tin nompó mai

^x5:12 1Ko 3:1-3 ^y6:4 Mat 10:22; Ibu 10:26-27; 1Yn 5:16

^z6:8 Esé 3:17-18; Mat 13:7, 22 ^a6:10 Ibu 10:32-34

ma Tiyarafenu ano iyáantan bain daná ma fura sen afoká intéi uno siren ma mai yanáká ákona mumunan kaúdáken kama avúavá ana varen oriyaren ma mai yaná o varein kéká an mi yan nono.

Tiyarafenu Ano Ma Iyáantan Danáká Ma Ákona Mumunan Kain Baya Ino

¹³Mana vanta ano ída Tiyarafenun esantakheimpin mi veyantá be avíkái ayan befió uren pura ódino siren mi Abaraamun máa sen iyáan ten mino.

¹⁴“Éin purasé moeké avu uantádé en ana akhá maman kokhoni suron uantanté uno. *Esé 22:17*

¹⁵Máa siran ará kusin má Abaraamu ave ukharen mai ma Tiyarafenu ano iyáan-táká ein daná baren mino.

¹⁶Mana vanta ano ma mana yaná ma ena kéká iyáantano van maen ben ma esantakhein banta avíkái ayan befiyó uren pura ódino siran mi mai ano fura sen ákona ukharéin mi ída ara ara vava vákan kasaen baré iyan mino. ¹⁷Máan avúaváká anan ten mi mai ma iyáan-tákáin nain kéká ano fura sé baranté uno siren ákona mumunan ino van mi Ti-yarafenu ano veyantá ayan befiyó uren pura ódino sikhein ída kanaíen do varan-ten mino. ¹⁸^bMáan tukhein nan mi Ti-yarafenu ano setin iyátintáden inká ayan befiyó uren pura ódino siran ban mino. Maíkan dana san ma Tiyarafenu ano kampun tiantáden ma yurafurimpin ída seso sikhen mino. Máan tukhein nará mai ma ven ópá aúmaneno van muno siré ma karan oronuna kéká ano kasaé mantaan ákona uvé maé mai ma iyátin-tan bain danáká ákona inin kaó tifanté uno.

¹⁹^cMai ma ave ukhé ma ákona inin onan kaiyá tiferuna anon sipii ankan ma un nompin kain orun pákaan ákona

ukhen bain an mi setin tuká ukhen mino. Mai anon tetin tiviren inarufá ma vain monó namumpin ma moéken kantasí ukhein karafaran ma iyákein davaráe esantaren maen Tiyarafenui kantasí ukhein karafarampin ódiyan mino. ²⁰Yisasi ano setin tiya ono van pe-fái maifin un báken Merkisedekin an den para van oriyán ban monó ánon banta kékái ánon bantaí ukhen mino.

Merkisedekini Vaya Ino

7^dMerkisedeki maen Saremí^{**} kákan barui kin báken inká moéken dan bain Tiyarafenui monó ánon banta ino. Máan tukharen maen Abaraamu ma kokhon kin kéká bá ma kákan aruvirí uren betin aruan kípáren ma evaránen barufá orono van eriyán ma Merkisedekin má ayanafá o fókán maen béin avu amen mino. ²Máan turan maen Abaraamu ano mai ma aruvúden baren erein danasinta siyan míkampintan daíden mana masiman Merkisedekin amen mino. Merkisedekin ne ma sikhein bíi ana maen mai funtákein avúavái kin nen ten mino. Inká Saremí kin ne ma sikheini ana maen mai ará kusian tiyáken kusin baren erin kin nen tikhen mino. ³Ti-yarafenui vompompin ben anoifon má anafu aráon má ma afoká ukheini ana vava ída váken inká ben ma khaein má be ma o furein mái ana vava yere ída van mino. Béi maen Tiyarafenu Anin an daven mi fara van oriyán ban monó ánon bantaí ukhen mino.

⁴Merkisedeki ma kákan bantaí ukharé ein ná ovare me ineno. Abaraamu maen Isarerí barafin aví bain bantan baren mifo mai ma aruvin pintena varen eriyá ein danasinta ma siyan míkampintan daíden ma mana masi-man Merkisedekin ma amikhein manon

^{**}7:1 Saremí e ma siyain mai Yerusalemí baru van mi sikhen mino.

^b6:18 Nam 23:19 ^c6:19 Riv 16:2-3 ^d7:1 Esé 14:17-20

kákan danasí ukhen mifo afovasá ono. ⁵Rivain anan banta finté ma monó banta kékasí ukhein nan Mosesini man baya ano máan mi sikharen mino. Minó ano siyan míkampintan daíden ná mana masiman betin amino sikharen maen betí afá aváeyan pinten nan e varyaren mifo mai Abaraamun anavasin manan baren mino. ⁶Máan tiyaren mifo Merkisedeki maen ída Rivain anan banta anon Abaraamun pintena mana masiman barein mino. Mamaren mi mai ma Tiyaarafenu ano fefá ma iyántan baré ein banta Abaraamun ánotá ayan kaúden avu amein mino. ⁷Máan tukhantín ída mana inain bantín maen avu amin ákona ma vain banta anoi mai ma avu varyain banta esantakhen mino.

⁸Purin nain monó ánon banta kéká anon Yutan kayo fintena mana masiman bariyaren mifo Merkisedeki ano mai kéká esantakhen mino. Mai fara va ino. Béin nan ma ayun para van ne ma sikhein mano ino. ⁹Inká ena ma vain mai Rivaini anan banta kéká ano ma mana masiman máden maen betíí anáu Abaraamun pinté uaren Merkisedekin amikharen minon té tifanté uno. ¹⁰Mai fara vara seyo, Rivai ma ída afoká ukhan maen be anáu Abaraamun pinten nan Merkisedeki ano mana masiman mantaren mino.

Yisasi Ma Merkisedekin An Dakhein Baya Ino

¹¹Rivain anan banta ano ma kanaíen Tiyaarafenui yoran mo kípáren ukhantín mai fará Tiyaarafenu ano Rivain nú Eronin núí kéká pintena ída siantanton ná Merkisedekin an dakhein banta siantantín erino van en nafino.

¹²Para vara seyo, ena kéká ma manan monó ánon bantaí iyáken maen mai

ayen man baya vá uvarano. ¹³Mai fara vara seyo, ma ma siamiyaruna vanta vá bei kéká bá maen mai ena anan pintena kékái váken mai ma onámaná karánará uadantá ma íkun uan amiyain doran pefá ída yókaren mino. ¹⁴^fMai van téí máan mi siyá uno. Tetisi Bafan maen mai Yutan anan pintéí afoká ukhan mai anan pinté ída monó ánon bantaí inten ne sen Mosesi ano sian amá ukharen mino.

¹⁵Merkisedekin an dakhein banta ma maman monó ánon bantaí urantín ma ena avúaváká doran nain nan ma Tiyaarafenui ayen man baya ano sikheí pákenan tian amá iyá tiferuna mai afová inono. ¹⁶Béi ma monó ánon bantaí ein mai Rivaini kéká ano ma varyiá ein avúavá kasa ifo mai ma fara van oriyan ban aunani ákonará ino. ¹⁷^gMáan tukhan mi Karaisin nan Í Bompon pin máa sikhén mino.

“Éi Merkisedekin an dakhe, fara van oriyan ban monó ánon bantaí e ono.” *Íbo 110:4*

¹⁸Peyante man bayará ma monó dorarí iyá ein mai ída ákona vákan mo namu ukheimpín do maman akhempá kaen mino. ¹⁹^hMai fara va ino. Man baya ano ída mana yaná maman kama íkan mi moéken kama ukhein danáká ma inin onan kaúden ave ukhein ban manon beni varu varen mino. Mai aa sákéi setin e sivian Tiyaarafenu ádé mo khaiyan mino.

²⁰Tiyaarafenu ano Karaisin nan mi ayan befíyó uren pura ódino siren mi fara van oriyan ban monó ánon bantaí inono sikhén mifo ena monó ánon banta kayo van ída máa sikhén mino. ²¹ⁱTiyaarafenu ano Yisasín manan máa sen tiamen mino.

^e7:5 Nam 18:21 ^f7:14 Ais 11:1; Mat 2:6; Rev 5:5 ^g7:17 Ibu 5:6

^h7:19 Ibu 10:22; Yem 4:8 ⁱ7:21 Ibu 5:6

“Bafan mano ayan befiyó uren pura ódino sikhein, bei vaya ída yurafurinten mino. Éi fara van oriyán ban monó ánon bantafái e ono.” *Íbo 110:4*

^{22j}Tiyarafenu ano ma ayan befiyó uren ma fura ódino sikhá ein nan mi mai ma manafin kasen ban avúavá Yisasi ano me yóan kanaí uren mi maman kama uáden mino.

²³Inká ena ma vain mai feyante avúavákái kokhon monó ánon banta kéká ano yoriyaren mino. Mana vanta ano ma monó doraríen oriyaren ma fúbin maen ena anon beni varu varyaren mino. ²⁴Máan tiyaren mifo Yisasi maen para van oriyán ban monó ánon bantan bantin mai yoran mano ída mo kípanten mino. ^{25k}Máan tukhein nan mi intéa kéká anó béin pinté uaren ná Tiyarafenu vaintá erinten nafí mai vetin aya uré evaránen avídantin para van oriyán bano van mi inikhen mino. Béin para van oriyán báken mi setisi ume ampisintano van Tiyarafenu tiamiyan ban mino.

²⁶Béimpin ída mana ume vákan kantasén avusese ukhen baréin mi ume nanin banta finte véin avían dan bain barurá kaúden inarufá kákan bí amiran báken ma siya iyain monó ánon banta ino. ^{27l}Béi ída ena monó ánon banta kékái ánon banta ano ma minó damú Tiyarafenu íkun uan amiyá ein an danten mino. Mai kéká ano vetí ume van naren íkun uan amiren mi ínaimpáké banasii ume van íkun uan amiyaren mino. Máan tiyaren mifo Yisasi maen manádái minó nanin bantai ume van íkun uan amen daa unkamádantá púken mino. ²⁸Bara ráke vantai ákona ída vákan mi Mosesini man baya ánain dakhafen monó ánon banta kékái ánon

bantaí iyaren mino. Máan tiyaréin ma man baya amiren maen mai oyampákéi Tiyarafenu ano ve Anintá ayan befiyó uren pura ódino siren mi véin nan puntaíkein avúavá baren oriyán bante ne sen aníen mino.

Karaisi Maen Auyen Avúaváká Ma Kasen Bani Monó Ánon Banta Ino

8 Ma ma senuna mai ana vaya ino. Tetisi monó ánon banta kékái ánon banta Yisasi ano inarufá kákan bí mamaren Tiyarafenu ayan kurompá kumanten mino. ²Máan tukhan maen mai ma fura sen kantasí ukhein monó namun ma varará banta ano ída uaran ma Bafan mano veyantá uvantein namumpin mi monó dorarí iyan mino.

³Banasi ano ma Tiyarafenu tusu siantan daná bá inká íkun uan amin daná bá ma varen moran maen mi monó ánon banta kékái ánon banta kayo fin-tena mana aní uran mi mai yanasinta varen mo Tiyarafenu íkun uan amiyaren mino. Máan tiyaren mifo setisi auyen monó ánon banta kékái ánon banta ano yere vá manáa yanasinta varen Tiyarafenu mo íkun uan amino. ⁴Béi ma varará bano sen baren ída kanaíen monó ánon bantaí ina inten mino. Mai fara vara seyo, Mosesini man baya ano ma sikhein ánain dakhafen pefái monó ánon banta kéká ano Tiyarafenu íkun uan amiyan mino. ^{5m}Mai ma fura sikhein monó namun ma inarufá baini aman mi ma varará ma vain monó namun bákan maifin mi yoriyan mino. Mai fara vara seyo, Tiyarafenu monó tiantan namun ma Mosesi uvarano van iyan maen Tiyarafenu ano ákonaen ma vayan tiamikharen mino. “Ma anuyontá ma aní eruna avúavá kasá teya minó daná uvarano.” *Eks 25:40*

⁶Máa sikharen mifo ma varará ma feyante man baya ánain dakhafen ma yoriyá ein kéká esantaren moéken kama ukhein doran mi setisi monó ánon banta amen mino. Para vara seyo, kama avúaváká ma Tiyarafenu vá kasen ban mi véi ano moéken kama ukhein danas-intafó iyátintan ban mino.

Auyen Kasen Ban Mano Ma Feyante Kasen Ban Esantakhein Baya Ino

⁷Para vara seyo, esé araíintá ma kasen ban avúavá ma vareimpin ída mana uman baré intin ída evaránen ena kasen ban avúavá kain nainten mino.

⁸Máan tin nainten mifo fefá ma manafin kasen ban avúavá ma mantaré ein pinta Tiyarafenu ano onákan banasi ano ume avúavá bariyaimpin mi máa sikhen mino.

“Bafan mano siyáken damú ma erintí, Isareri vá Yutan nanin banta vá ma auyen avúaváká ma manafin kasen ban amenté uno.

⁹Auyen kasen ban mano vetíí anáuyan má ma manafin kasen ban ma uvantá eruna vá ída manáí inten mino.

Inká mai ma vetin ayan pákaaré, ma Isipi vara finte yo aviré merékun maen

mai ma vetin má ma manafin kasé banna van ma siamikhá erunerá ída ákona inin kaeimpin mi vetin me soyan amé uno sen Bafan mano sen mino.

¹⁰Máan tukharé umpo ma maen auyen kasen ban mi

Isareri nanin banta vá taréa uvaranté unon ten Bafan mano sen mantino.

Tesi man baya kayo vetíí inimpin kaúdékun

betí ankan mai ana afová uvintí maé

inká betí ankan auká uvádékun mai ánain dakhafinten mino.

Téi vetíí Ayarafenu vákun betí ankan tenti vanasin banten mino.

¹¹Báken betíí arona fi

áa vetíí kéká safi ída afova amiyáken Bafan ná afová ono sen ída siaminten mino.

Mai fara vara seyo, aví ída vain kéká káké ma aví bain kékáká ma o khanaí ukhein

mai minó anon téin pefá afová inten mino.

¹²Para vara seyo, veti ma namu avúavá bariyá inain ampiantádé

ída evarané betíí ume van ineine onté uno. *Yer 31:31-34*

¹³Tiyarafenu ano ma auyen avúaváká ma manafin kasen ban nan ma siyanti mae mai feyante kasen bani ákona ano inka o khípiyan mi yo maman akhempá kaono van mantino.

Ma Vara Ráke Monó Namumpin Ma Feyante Avúaváká Monó Tiyá Ein Baya Ino

9⁰Esé araíintá kantasí ukhein davaráe namun mi ma varará uvádáken Tiyarafenu vá Isareri kéká bá manafin kasen ban avúavá bákan monó tiyaren mino. ²Mai yavaráe namumpin kankanan karafaran mi varen mino. Esé karafarampin on ma antúduan divin danka vá dunan kain kará bá bákan mai yaróí airo ananí ukhein bereti kain baren mino. Mai karafarampin nan mi Kantasí Ukhein Karafaran ne siyaren mino. ³Inká mai oyampá ena khara-faran davaráe fóké e auádan bákan mai karafaran nan mi Moéken Kantasí Ukhein Karafaran ne siyaren mino. ⁴Mai karafarampin maen aunka fauran ma íkun uan amin kará ma ko-

⁸8:6 Ibu 7:22 ⁹9:1 Eks 25:23–26:30 ⁹9:3 Eks 26:31-33

⁹9:4 Eks 16:33; 25:10-16; 30:1-6; Nam 17:8-11; Diu 10:3-5

rifó uvantein má inká daafó uváden ma korifó me iyákein bokhise vái kain baren mino. Mai vokhisefin manna e ma siyain bereti kayo ma kaúkein kori khave vá Aronini ayonta ráké ma ariké e fótein danka vá inká tiyan míkan man bayafin ma manafin kasen ban baya uvantein onámaná báí kain baren mino. ⁵rMai vokhise yarói vanasii ume ma ampian tiyain bákan serubimi e ma siyan ma Tiyarafenui kakhan má ma vain daná kankanan korifó uváden mai yaró kaíkan ayan tátá uren baren mino. Máan tukharen mifo saréa ída kanaí é mai yanasinta fáke sian amá ó tifanté uno.

⁶sMai yanasinta ma arakhóku uan kaúden maen monó banta ánon kéká ano esé ma vain karafarampin mi ena ena un peren kuven iyáken mai ma amikhá ein dorarí iyaren mino. ⁷uMáan tiyaren mifo monó ánon banta kékái ánon banta ano anan Moéken ma Kantasí Ukhein Karafarampin manádá anan ena ena oranafin ódiyaren mino. Ódiyáken maen bei ume vá inká banasi ano ma ída afová ukhen ma variyá ein ume vá arúantano van nare yáaren Tiyarafenuun mun ákonte uan amiyaren mino. ⁸uMai avúavá ma varará bain monó namumpin ma fara vantín maen banasi ano ída kanaíen Tiyarafenui Moéken Kantasí ukhein karafarampin ódinten ne sen Kantá Aunan mano setin aní ukhen mino.

⁹uMai monó namun nan ma siyain mai saréa ma afoká inain dana san mi aní ukharen mino. Mai ma monó ánon banta kéká ano ma susu siantan danasinta vá inká íkun uan amin danasinta vápó ma íkun uan amiyaré ein mano ída kanaíen monó nanin bantai ineine fintena sesé uantiyaren mino. ¹⁰uBetí ankan peyante avúavá ánain dakhafen dunan

má non mápó mai avúavá bariyantín dan bukhafa ana sesé en oriyantín mai ma siádan baré ein damú afoká ino van mi sikharen mino.

Yisas Karaisini Nare Ano Ma Funtákein Ákonte Ukhein Baya Ino

¹¹Máa sikharéin taréa Karaisi ano kama yaná kayo ma afoká eintá o monó ánon banta kékái ánon bantaí en mino. Máan tuven mai ma ma varará banta ayan mano ída uvaran ma inká ma varará ma uvamádan bain danasinta vá ma ída manaí ukhan ma moéken kama ukhein monó namun ma inarufá baimpin mi óden mino. ¹²Óden mifo memé bá kao vái nare fóké ákonte ono vara mai ma Moéken Kantasí Ukhein karafarampin óden naino. Ída ino. Karaisi ano ume fintena vanasi aya uren evaránen avirano van mi vei nare fóké manádá Tiyarafenuun íkun uan amen mino.

¹³vPeyan avúavápin meméi nare vá afon kaói nare vá inká arará kaoi kasí bá anon kanaíen man baya ma yurafurein nanin bantai yan bukhafa sesé iyaren mino. ¹⁴wMáan tiyaren mifo setisi ume sivútivá ano ma furin aasá tiviren ori-yaré in ma Tiyarafenuurá monó tiantano van ma Karaisi ano vei narefó ma setin tú tesé ukhein nará ovare me ineno. Mai fara vara seyo, Karaisi anon para van oriyan ban Kantá Aunani ákona fói ve au fóké tetisi ume van puntákein íkun uan Tiyarafenuun amen mino. ¹⁵Mai ana van mi Tiyarafenu ano ma arakhein nanin banta ano kasaen mai ma fara van oriyan ban aunan ma iyáatan bain barano van mi véi ano Tiyarafenu vá banasi vá aúbaná báken auyen avúavápin ma kasen ban aa uvíken mino. Para vara seyo, esékena kasen ban ma kain

^r9:5 Eks 25:18-22 ^s9:6 Nam 18:2-6 ^t9:7 Riv 16:2-34 ^u9:9 Ibu 10:1-2

^v9:13 Riv 16:15-16; Nam 19:9, 17-19; Ibu 10:4 ^w9:14 1Pi 1:18-19

baré ein mano umei miyan uman manan amiyaré íkan mi mai uman pinten nan útúantano van Karaisi e furen mino.

¹⁶Máan tukhantin mana vanta ano ma veina yanasintará bompon uvariyáken ma mana iyampon nan téi ma fúbékuya sesina yanasinta éi vá barano sikharen ma fura sen púbintin manan mai ma iyáan takháin nain iyampon mano venina yanasinta varanten mino. ¹⁷Mai fara vara seyo, mai ma vompon uváden iyáantein banta ano ma ída fúkantin maen mai ma iyáantan mano fara ave ukhen baré intin ma véi fúbintin mi mai ma iyáantein dasasinta varanten mino.

¹⁸Máan manan en mi esékena kasen bani avúavápin ma nare ma ída vantin maen mai ída ákona vantin mino.

¹⁹Mosesi ma Tiyarafenui man baya kayo maman banasi amiren maen arará kaoi nare vá meméi nare vá maman non má manafiníen mino. Máan turen isopi yaa ayan má inká sipisipi ayorá ma nararé kava fékein mápó maifin morun daaren mi Tiyarafenui vompon dóki vá banasi aufá bá péantákaren mino. ²⁰Máan turen maen betin máa sen tiamikharen mino. “Mai ma Tiyarafenu ano siretin má manafiní é kasé bano van ma sikharé ein mi ma narefó perékun mai anon maman pura yanasí en mino.” *Eks 24:6-8*

²¹^xMáan mana en mi mai ma yavaráfó ma uvantein monó namun má inká maifin ma vákan doriyain dasasintará bá ina nare feren mino. ²²^yMai van mi Mosesini man baya ano siyáken nare ano anan minó dasasinta sesé inten mifo mana yaná ma ída aruren narefó ákonte intin mai Tiyarafenu ano ída kanaíen ume ampiantante ne sikharen mino.

²³^zMáan tukhein nan mi varará ma vain davaráe namun má maifin ma vain dasasinta vá anon inarufá ma vain dasasintai aman mi vákan Tiyarafenui

man baya ma safúnai nare fóké sá ákonte ono sikhén mino. Máa sikhén mifo fura yanasinta ma inarufá bain mai safúnai nare esantakhein daná pói ákonte uren tesé uan avusesé ukhen mino.

²⁴Mai fara vara seyo, ma varará ma uvamádan baré ein dasasinta mai inarufá ma vain dasasintai aman mi varen mino. Máan tukhá ma varará ma vain monó namumpin na Karaisi óden naifo mai ma inarufá ma vain monó namumpin mi un báken teti ma variyá tiferuna uman pintena siya ino van Tiyarafenu avorá ákonaen duvuniyan mino.

²⁵Inká ena ena oranafin ma monó ánon banta kékái ánon banta ano ma Moéken Kantasí ukhein karafarampin ma safúnai narefó ákonte iyá ein an den ná be aufó ena ena Tiyarafenu íkun uan amiyan bano vará inarufá ódikhen nafino. Ída uron mino. ²⁶^aKokhon dádasá purono sen baré intin ma vara ma arái ein tákéi véi o furen eriyen ban nainten mifo ma vara ano me akhen diyan manádái umei ákona finte fura sen útú-intano van mi e fúaren bei narefó me ákonte ukhen mino.

²⁷Barará nanin banta ano ma manádái púkaren ínaimpáké kópin o mantan nain an mi yakhen mino. ²⁸Máan tukhan kokhon nanin bantai ume ampiantano van Karaisi ano manádái e fúaren bei narefó ákonte ukhen mino. Béi ma ovaránen erinten maen banasii ume evaráne ampiantiyá bano vara erinten naino. Ída ino. Mai ma véin ave ukháin nain kéká avirano van mi erinten mino.

Tafúnai Nare Ano Ma Ída Kanaí En Banasii Ume Arúantan Nain Baya Ino

10 Mosesini man baya maen mai ma ínaimpá ma kama yaná erin nain aman mi varen mifo Yisas Karaisi ano

ma fura sikhein daná ma varen erein naino. Ída ino. Para va máa siya rauno. Mai ma ena ena oranafin ma safúnai narefó ma ákonte uanten eriyá ein mano ída uron mi vanasi ano ma monó tiyá ein ayaiyaren mino. ²Pura siren ume arúanten baré intin mai ma íkun uan amin avúavá ída vanainten mino. Mai fara vara seyo, manádá ma íkun uan amin avúavá ano ma monó nanin bantai ume ma ena ena sesé urantin maen mai ída umeí ukhé uno sen afová inainten mino.

³Máan tiyaren mifo mai ma ena ena oranafin ma manádá ákonte iyaré ein mano mai ma umeí ukhá ein mi aní uantiyaren mino. ⁴^bMai fara vara seyo, mémé bá afon kao vái nare ano ída kanaíen ume arúantanten mino. ⁵Máan tukhan pasen Yisas Karaisi ma ma varará dorun báken máan mi sikharen mino.

“Íkun uan amin avúavá bá ákonte in avúava ba san éi ída anunun e ompo sen tui útaan kaútinte ono.

⁶Ume arun mino siren ma íkun uan amin má inká tafúna aruren ma íkun uan amin avúavá ba san

éi ída amusin ukha ono.

⁷Máan tiyaonafin mi séi siyáké, ‘Masi séi vakun, Bompon dókifin téin nan mi sikhén mino.

Tiyarafenu oe, éin oo yayié dorano van mi erikhé uno.” *Íbo 40:6-8*

⁸Esé araíen Yisas Karaisi máa semí, “Ara ara yanápo ma íkun uan amin nafi safúna ma aruren íkun uan amin nafi inká ume ampiantano siren ma íkun uan amin nafi mai Mosesini man baya ano sikhá ompo mai avúava sinta van éi ída anunu ure amusin e ono.” ⁹Máa siren temí, “Éin oo yayié dorano van mi eré uno.” Esé ma kasen ban man baya ma amikhá ein do mádé auyen avúaváká ma kasen ban man baya maman dákó ono

van mi máa sen mino. ¹⁰^cMai van mi minó damú para oriyán bano van Yisas Karaisi ano ve aufó Tiyarafenun manádá íkun uan amiren tetin maman kantasí urá bá tiféuno.

Yisas Karaisi Ano Minó Nanin Banta Van Manádái Tiyarafenun Íkun Uan Amikhen Mino

¹¹^dPeyante avúaváká ma kasen ban aránao ma váken monó ánon banta kayo ano ena ena yamú monó dorarí iyáken inká ume arumino van ena ena íkun uan amiyaren mifo mai ano ída kanaíen arumiyaren mino. ¹²Máan tiyaren mifo setisi Monó Anon Doran Banta ano ume ampisintano van kama avúavasíen minó damú kena manádá íkun uan Tiyarafenun amiren ben ayan kurompá kin karáká un kumanten mino. ¹³^eUn kumanten mi vei namuro kayo maman bararasí uren beni arantan kain karasí ino van ave ukhen mino. ¹⁴Mai fara vara seyo, ve aufó ma manádá íkun uan Tiyarafenun amein avúavá anon mai ma funtákein avúavá bariyain kéka maman kantasí iyan mino. ¹⁵Máan tukhan Kantá Aunan mano yere mai van tetimpin tian amá iyáken esé arafí in baya máa sikhén mino.

¹⁶^f“Tesi vanasi vá ma auyen avúaváká kasen ban maen

maí damúí yamuan kaonté uno sen Bafan mano sikhén mino.

Betí ankan aúká ma sesi man baya kaudé maé

inká betí ineinefin uvádékun

mai vaya ánain bákurinten mino.” *Yer 31:33*

¹⁷Máa siren evaránen temí,

“Betí ankan ma man baya átakharé uren ume avúavá ma variyá ein nan

ída ovaré me ineine onté uno.” *Yer 31:34*

^b10:4 Ibu 9:13 ^c10:10 Ibu 9:12 ^d10:11 Eks 29:38 ^e10:13 Íbo 110:1

^f10:16 Ibu 8:10

¹⁸Máan tukhein nan mi ume ma ampiantá dantin maen ída evaránen íkun uan amin avúavá banten mino.

Tiyarafenuñ Ádé Ma Orin Baya Ino

¹⁹^gMáan tukhein nan mi mumunan tiyofi sífá tiváeyan noe, Yisasini nare ano setin maman avusese ukhein pasé ída feran kasaé Moéken Kantasí ma Ukhein Karafarampin ódó tifanté uno. ²⁰^hMai ma yavaráe fóké ma are ukhá ein mi Yisas Karaisi ano vei furimpó auyen annan ma varan aa uvisiyáken do varen mino.

²¹Máan tukhan maen Tiyarafenui vanasirái setisi kákaní ukhein Monó Anon Banta anon dafíken mino. ²²ⁱMáan tukhanti erí tifé purasé túkáké bentá mumunan é Tiyarafenuñ ádesá oró tifano. Mai fara vara seyo, Yisas Karaisini nare anon tetinti namu ineine maman avusese uren ída fain bain nompóí minó bukhafa sesé ukhen mino.

²³Mai ma Tiyarafenu ano amenté uno síkhá ma ákona mumunan iyá tiferuna ída vá me ampé tifano. Para vara seyo, Tiyarafenu ano vei vaya ánain mi yakhafen mai ma iyáantan bá ein daná amé iyan mino. ²⁴Máan tukhein nará erí tifesá ará amin avúavápó ben aya ven aya iyáké kama avúavá ana vá bará tifano. ²⁵^jMáan tiyáké ída vá manáa kéká an desá manafin ma átaruin avúavá me ampé tifano. Beni erin inka ádesí ukhen mifo erí tifesá ben ma moéken ákona uantan maran ná ó tifano.

Ída Ma Tiyarafenu Anin Oyan Amin Baya Ino

²⁶^kMáan tukhen mifo fura síkhein baya ma afová ure ma evaráne umeí iya

vante mae mai ume ma ampiantano van ma íkun uan amin avúavá ena ída vanten mino. ²⁷^lMáan tinten mifo Tiyarafenui kó barufin ma o mantan má kákan ira ano ma veni namuro kayo saman kaurin nain má anan ave ó tifanté uno. ²⁸^mMana ano ma Mosesini man baya yurafúdan ma kan mano fi kanú manau ano safi ma ódaran maen ída avo uantan bákan esé anan aruan puriyaren mino. ²⁹ⁿMáan tukhantin intéa kéká anó Tiyarafenu Anin barafin daren ná arantampó dosasi iyáken ná auyen kasen ban man baya ma vei narefó ákonte ukhein maman painí iyáken ma inká tarisari amé iyain Aunan ma ankayan tiyá inten nafi mai kéká ano kákan uman uron mi varanten mino.

³⁰^oMai fara vara seyo, setí ankan afová ukhékun beyantá máa síkhen mino.

“Mai anonafá betin daídé uman amenté uno.”

“Mai yaná ma varano van iyain kéká evarané amenté uno.” *Diu 32:35*

Máa siren evaránen temí,

“Bafan mano veyantái vei vanasi yaiminten mino.” *Diu 32:36*

³¹Máan ume vá ma ayun para van oriyan ban Tiyarafenuñ ayampin ma orin maen mai namu ukhan kákan akhokho yanái van mino.

Mumunan Avúavápin Ma Mantaan Ákona In Baya Ino

³²Mai ma esé arafintá ma Yisas Karaisini kama vaya inire afova vareona van ída vá áun nono. Moékentá uman bariyáke ma ákonaen mantakhá eona vará ovare me ineno. ³³Manáa yamú tirití ankan avían banasi avorá

^g10:19 Ibu 4:16 ^h10:20 Mat 27:51 ⁱ10:22 Riv 8:30; Isi 36:25; Efe 5:26

^j10:25 Ibu 3:13 ^k10:26 Ibu 6:4-8 ^l10:27 Ais 26:11

^m10:28 Diu 17:6; 19:15 ⁿ10:29 Mat 12:30-32; 1Ko 11:27-29

^o10:30 Íbo 135:14

mo khaúden maen aruren uman ami-yaren mino. Inká ená damú tiretí ankan mano ena kéká ma uman bariya mae oy-ampá mantaveya aya iya ono. ³⁴P Máan tiyan nan ma siretin páken karavusií mo ura mae maifin ma vain kéká bá kama iya mae inká tiretin nina yanasinta ma vara maeya sentisi kama ukhein danasinta inarufái yan bane se afová ukhe fase amusin manan iyare ono.

³⁵Máan tiya ompo mai ma Tiyyarafenurá ma ákona inin dáke ma mumunan iyaona avúavá ída vá me ampiyákeya mai ma kákan miyan ma ave ukhein nará ovare me ineno. ³⁶Mantaan ákona ukhe ma Tiyyarafenui anunu ánain ma yakhafiyare maeya mai ma iyáantákein amusin baran nono. ³⁷Mai fara vara seyo, Tiyyarafenui Vompon dókifin máa sikhen mino.

“Ída ayáká ban mi mai ma Ereno Sikhein Banta ainen erinten mino.

³⁸Máan tinten mifo funtákein banta ma váken maen tentá anan mumunan iyan banten mino.

Inká ten ma oyan timikhá inain kéká ída simusin uantanté uno.” *Aba 2:3-4*

³⁹Máan tinten mifo mai ma Tiyyarafenun oyan amiren ma ainen eraven ankamé iyain kéká an ída yakhé tifé umpo ákona mumunan má ma van oriyan ma o ayain baré iyain kékái vá tiféuno.

Ákona Mumunan Má Ma Varé Ein Kékái Yaya Ino

11 ¹Inte avúava sará mamunan ne siyan nafino. Mai ma ída onté tiferuna yana san ma afoká intéi uno siré purasé ákona inin kaiyá tiferuna van mi mumunan ne siyan mino. ²Pefá ma varé ein nanin banta ano ákona mumunan

iyákan mai van mi Tiyyarafenu ano kana ino siren amusin ukharen mino.

³^rMa varará ma saréa afoká ukhá ma oniyá tiferuna yanasinta maen mai suufó ma ída oniyá tiferuna yanasintan baré íkan mi Tiyyarafenu ano ma seintái mai yanasinta afoká ukhen ne sé afová iyái mumunan iyá tiféuno.

Ebori Inoki Noa Nénei Mumunan In Baya Ino

⁴^sEbori ano ákona mumunan má baren mi Kenin esantaren Tiyyarafenu ano amusin ein avúaváká íkun uan amen mino. Eborini íkun uan amin avúava san ma Tiyyarafenu ano amusin ein manon aníen béin nan puntákein banta e sen mino. Máan turen béi fefái fúken mifo véi ma mumunan ukhá ein avúavá ano saréa o sisimen eriyen mino.

⁵^tMumunan manon tíkan Inokin maen ída fúken ayun para van mi Tiyyarafenu ano véin aviren inarufá orivin béin nan dosivaen ifáen mino. Ínaimpáké béin aviren orintéin maen Tiyyarafenu ano véin nan amusin ukhein bantan baren mino. ⁶Máan tukhein nan mi ída ma mumunan inte ya ída kanaíe Tiyyarafenun amusin amin nono. Béi vaipá ma orono van inain kéká ano vá mumunana iyáken ná pura sen Tiyyarafenu váken mi ven nan ma anunu uren dosein kéká kama miyan amé iyan mino vá tino.

⁷^uNoa ano mumunan iyaren mi ída afoká ukhá ein daná afoká inten ne sen ma Tiyyarafenu ano afova vaya siamin maen ben oo yayien sipi uváden mi ve aná akhafana vá anafú basin nan má maifin ódivíkan non taven ída aren mino. Noa ma mumunan iyáken ma variyá ein avúavá ano ma ma vara ráke nanin bantai ume avúavá daídan ma vetin amaniná uman afoká

^p10:34 Mat 5:11-12; 6:20 ^q11:1 2Ko 5:7 ^r11:3 Esé 1:1; Íbo 33:6; Yon 1:3

^s11:4 Esé 4:3-10 ^t11:5 Esé 5:21-24 ^u11:7 Esé 6:13-7:1

ein manon Tiyarafenu avorá puntákein bantaí ukhen mino.

Abaraamun Nú Be Aná Saran Nú Mumunan In Baya Ino

⁸vTiyarafenu ano Abaraamun nan enafá bain bara éin amenté umpo ei varu vá me ampireya orono ma síkan béi mumunan iyáken mi ven oo yaiyen mai ma véi orin naipá ída afová ukhen para oren mino. ⁹wBéin ma Tiyarafenu ano iyáantan baré ein barafin ma oriven maen toya vanta an dakhen mumunan mái yavaráe namumpin baren mino. Inká Tiyarafenu ano ma iyáantan bantá kan Aisakin nú Yekopun nú ano yere máan manan en davaráe namumpin baren mino. ¹⁰Para va Abaraamu ano mai avúavá bariyaren naino. Mai ma veni akhen ída vain baru ma Tiyarafenu ano uvantein nan mi ákona inin kaúden ave ukharen mino.

¹¹xSaran nú Abaraamun nú ayokhuviní ukhan Sara a nanin baren mifo mai ma Tiyarafenu ano ma iyátintákein daná timinten ne siren míkanan ákon-aen mumunan iyan baren mi iyampon kaen mino. ¹²yMáan tukhein nan mi Abaraamu maen ayokhuviníen puroren ukhen ída iyampon kaoren mifo ven ana akhafana anon ayompin ma vain ofu kayo vá inká un non akhempá ma vain eyu kayo vá an den ída yankaforen ukhen mino.

¹³zMai kéká ano Tiyarafenu ma iyáantein danáká ákona inin kaúden oriyaren ída mana yaná baran o furen mifo mai ma iyáantan danasinta ano nentá bakan para ódaren amusin mana uanten mino. Máan ma iyan mi ena vara finté toya nanin banta anon ma varafin e varé

tiféuno sen inen mino. ¹⁴Máan baya ma siyain nanin banta ano mai vetíi varu anái ma uren ban nain bara van mi inin onan kaúkaren mino. ¹⁵Betíi ankan ma erikhá ein bara van máa sen baren mai ma erikháeipá kasaen evaránen orin nainten mino. ¹⁶Máan tin nainten mifo inarufá ma moéken kama ukhan ma mató baru vain nan mi vetíi inin onan kaúden oriyaren mino. Máan tiyáken mi Tiyarafenu nan ída ayave inton betíi Ayarafenu e sen ariyaren mino. Mai fara vara ino. Béi anon betíi kákan baru útaádan inarufá ban mino.

¹⁷aTiyarafenu ano ma Abaraamun akhenóka uan onan maen béimpin mumunan baré íkan mi Aisakin íkun uan béin ameno van en mino. Tiyarafenu ano ma Abaraamun iyáantan baré ein danasinta mantaren mi auanon táke iyampon Aisakin íkun uan ameno van en mino. ¹⁸Tiyarafenu ano véin iyáan tiyáken máa sikharen mino, “En anin Aisakin ará pintéi en ana akhá afoká inten mino.” *Esé 21:12*

¹⁹bTiyarafenu ano fúká ein kéká evaránen avían mantiyain bantin Aisaki ma fúbintin maen evaránen avían mantanten ne sen Abaraamu inikharen mi furin pinte ve akhá evaránen aviren mino.

Aisaki Yekopu Yosepi Nénei Mumunan In Baya Ino

²⁰cÍnaimpáké ma Tiyarafenu ano ma Yekopun nú Ison núi vampin ma man afokáin nain avúava san Aisaki fura sen iníden mumunan iyáken mi maíkan iyampon avu amen mino.

²¹dYekopu ma ayokhuviníen purono van iyáken ma varampin mana vakhen ban ma monó tiyan maen mumunan iyan

v11:8 Esé 12:1-5 w11:9 Esé 35:12 x11:11 Esé 18:11-14; 21:2; Rom 4:19

y11:12 Esé 15:5; 22:17 z11:13 Esé 23:4; 1Kr 29:15; Íbo 39:12; 1Pi 2:11

a11:17 Esé 22:1-14 b11:19 Rom 4:17 c11:20 Esé 27:27-29, 39-40

d11:21 Esé 47:31-48:20

mi Yosepin anin kanan avu amirú en mino.

^{22e}Inká Yosepi ma furono van iyáken maen mumunan iyan mi máa sen ákona vaya siamikharen mino. Isipíke ma Tiyarafenu ano Isareri nanin banta yo aviren orinti sen tiyampa kayo vasá bare orono.

Mosesini Mumunan In Baya Ino

^{23f}Mosesin anóe afóe ano mumunan iyáken mi véin ma kaúden kanú manaú biyontá béin aúpá aúmamádan baren mino. Tiyarafenu ano enará ukhein iyampon mi mÍkanan amikhan pasen kin mano inte avúavasá bariyan nafi mai van ída feren mino.

²⁴Mosesi ma e anoní iyáken béimpin mumunan bákan mi véin nan ída kin Feron araun anin ne sen arano van inikharen mino. ²⁵Umei amusin mano ma ainen mo kípé iyain pinté me ifá uren mi Tiyarafenui vanasi ano ma variyain uman barano van inikharen mino. ²⁶Béi ma inikhá ein mai Yisas Karaisin naro siren ma uman baran mi kama ukhen mifo Isipíkena kama yanasintará ma o ánoní inan ída inikharen mino. Mai fara va ino. Mai ma Tiyarafenu ano moékakhein miyan ma amin nain nan mi inin onan kaúkaren mino. ²⁷Mosesi ano mumunan mái váken kin nan ída feranton Isipí bara me ampiren oren mino. Oriyákan ara ara uman mano ayanafá afoká iyan mifo mai ma aúpá bain Tiyarafenuirái inin onan kaúdáken mi oren mino. ^{28g}Isareri kéká ano Avo uantan avúaváká dafiben ona yaará nare fédantin aruan ma furin enisori ano vetíi esé kena ain iyampon ída arino

van Mosesi ano mumunan iyáken betin ákonaen baya siamen mino.

Isareri Nanin Bantai Mumunan In Baya Ino

^{29h}Isareri nanin banta ano mumunan iyáken mi Nararé Non ne ma siyain un non aúbaná pe ukhein barará ma or-einíen ena ufá e kháden ódivin mi Isipi kéká ano vetin ánain dakhafen oriyaren minó ano non ufuren puren mino.

³⁰ⁱIsareri kéká ano mumunan iyáken mi yan manápá ifo afápá kan un kádan damú ma Yerikó baru eúkiyain má kafi ma uvantá ein mano un baráken eraven mino.

^{31j}Pamúku nanin Reapi ano mumunan ukharen mi mai ma vei varu ráke nanin banta ano ma Tiyarafenui vaya átakharé iyaren ma fureimpin béi ída furen mino. Mai fara va ino. Mai ma afurin bantá kan ma aronái uren avían aúmanantáká eintá ino.

^{32k}Máan tukharen mifo mai inte vaya kayó ena vantirá tiamentera funo. Mai ma Kidioni fi Baraki fi Samonsoni fi Yefta fi Deviti fi Samueri fi áa inká sakhana nampa vanta kayo fi ma mumunan iyá ein baya kayo mai van mifo ída afokhan bain ída siamenté uno. ^{33l}Mai vanta kayofin mi mumunan bákan ída ma kamaen dafisein kamanin kayo maman bararasí uren puntákein avúavá póké banasi aviren oriyaren mi mai ma Tiyarafenu ano iyáantan baré ein daná o varen mino. Mai kéká anon raioni kayo oorá páken mi ^{34m}mira ma varúten kiyá eimpin dusimiyáken inká baenatifó ma aruan purono van iyan maen aúpá karan noren mino. Betimpin ma ákona ída varé

^e11:22 Esé 50:24-25; Eks 13:19 ^f11:23 Eks 1:22; 2:2 ^g11:28 Eks 12:21-30

^h11:29 Eks 14:21-31 ⁱ11:30 Yos 6:12-21

^j11:31 Yos 2:1-21; 6:21-25; Yem 2:25

^k11:32 Ano 6:11-8:32; 4:6-5:31; 11:1-12:7; 13:2-16:31; 1Sa 16:1-1Ki 2:11; 1Sa 1:1-25:1 ^l11:33 Dan 6:1-27 ^m11:34 Dan 3:23-27

ein maí damú anan ákona mamaren namuro aren dakhafin karan orera iyaren mino. ³⁵ ⁿAnasi arinta ano vetíi kéká ma fúká ein pinte evaránen oniyaren mino. Oniyákan manáa kéká aruren betin amaniná ara ara uman kaiyan mifo Tiyaarafenurá mumunan iyáken mi furin nan peden ma véin me oyan amiren ma kamaen ban nan ída inen mino. Mai ma fúkaren ma ínaimpáké evaránen e man-taaren ma kamaen amusin pinté o van nain nan mi vetíi ákona inin kaiyaren mino. ³⁶ ^oManáa kéká máká maáká uren ayankun dafiyó pó ankáden au yo yavarava fiyan inká ena kéká seni anampó amempin kuren karavusi namumpin mo kaiyaren mino. ³⁷ ^pManáa kéká oná-manápó ankamádan puriyákan manáa sofó aúbán dana siyáken inká manáa vaenatifó tíka sáka in puren mino. Máan tiyákan manáa kéká ano sipisipi au fi memé au fi yo siren maen auí danasí uren arafan nóken kákan uman bariyaren mino. ³⁸ Máan tiyáken mai kéká ano vanta ída van kámá barafa safi anuyon pimpa safi yon aimpin nafi inká bara aimpin nafi aúmanen noren mino. Mai kéká ma variyá ein avúavá ano varará nanin bantai avúavá esantakhen mino.

³⁹ Mai ma siaméku ineona kéká ano mumunan eintái mai uman barákan Tiyaarafenu ano kanaíene sen mifo mai ma iyáantan baré ein danasinta fura sen ída manten mino. ⁴⁰ Mai fara vara seyo, mai ma vetin ameno siren ma iyáantan bain daná mai moéken kama yanái Tiyaarafenui ineinefin bain tetin má ma mai yoran dóan kíparékun maen manápasíen mi mai miyan timinten mino.

Yisasintá Ana Ma Inin Onan Kaúden Ban Ma Ventá Mumunan In Baya Ino

12 ^qMáan tukhan mai nanin bantai ákona mumunan mano ma setin aní ukhein manon iyaren eúkukhen mino. Máan tukhein nan mi namu avúava sinta ano ma setinti aasá iyariyan ma fákaan ákona inain mai ume yanasá karúdaré mai ma Tiyaarafenu ano yóde vá barano ma sikhein daná tiyampa é tava uresá o vará tifano. ² Yisasi ma setisi mumunan ana vain ná kakhábé tifékun ná tiviren orino. Béin arono siren ara ara uman ben amaniná kaúden ankayanten aufen akhare siyákan Tiyaarafenu oo yayien daa unkamádantá ayave furiríen mino. Máan ten mifo amusin danasinta vákan mai varano van mi máan turen Tiyaarafenui ayan kurompá kin karáká kumanten mino. ³ Ume nanin banta ano ma véin amaniná ída funtákein avúavasí ein nará ovare me inesin ná mai ano ída avesara aminti vá oyan ameno.

Tiyaarafenu Ano Ma Ve Akhafana Funtarano Van Uman Amein Baya Ino

⁴ Ume avúavá bá ma aruvimpin mana ano ída fureya ei nare vanakha ono.

⁵ ^rTe sikhafana ono ma sen ákona uantákaré ein baya áunta fono. Béi máa sikhen mino.

“Te sanin noe, Bafan mano ma man baya siamintiya mai éin mi funtariyan mifo ída vá inian namu uantáde vá tisiyá uno sire ará namu ono.

⁶ Mai fara vara seyo, Bafan mano ma anunu ukhein kékái man bayafó puntariyáken

ⁿ11:35 1Ki 17:17-24; 2Ki 4:25-37 ^o11:36 1Ki 22:26-27; Yer 20:2; 37:15; 38:6

^p11:37 2Kr 24:21 ^q12:1 1Ko 9:24-25 ^r12:5 Yop 5:17; Rev 3:19

inká te sikhafana e ma siyain kékái yafiyosí uren ankamé iyan mino. *Pro 3:11-12*

^{7s}Tiyarafenu ano ve akhasí urá bátifé umpo uman ma variyá tiferuna vará béi anon man bayafó tetin puntariyan ne vá té tifano. Iye anó man bayafó be akhafana ída funtare ne siyá inikhe fono. ⁸Tiyarafenu ano ve akhafana funtaré iyan mifo onesin ma siretin aúban ma mai avúavá ída vantí vá mai afova sá ono. Tiretí ankan ída ven akhafana ompo aasá iyampon mi vaonon tikhen mino. ⁹Bararáke sífóeyan mano ma setin puntará maé betíi vaya iné iyá tifé umpo inté urerá inaru fáke Sífóen oo yayié ben aránaópá oriyará para vá tifante rafuno.

¹⁰Tetin tífóeyan mano ma inin ma kama ukhein avúavá máan tanáa oranará tetin puntaré iyan mifo setisi kama avúava san mi Tiyarafenu ano funtaré iyain mino. Mai fara vara ino. Bei kantasí ukhein avúavá barano van mino. ^{11t}Puntáden ban man baya ma siamiyantiya ída amusin inompo uman manan baran nono. Máan tukharen maen mai avúavá ma afová ukhein kéká anon ínaimpáké kama yunan ma yuyaseiníen kama khumanin o yosé iyan mino.

^{12u}Máan tukhein nará mai ma avíkiyain ayan puríkiya vá inká mai ma antu antu iyain arantantasá mantaan ákona ono. ^{13v}E arantan ma orin nain aa vá aní ure kama uresin ná ai ayan ma namu ukhein kéká ano ma en dakhafinten maen ída e yupóen ankaminten mifo evaránen kama inten mino.

Tiyarafenui Vaya Ma Átakharé Iyai Páke Ma Sikhein Baya Ino

¹⁴Banasi vá ma ará kusen ban má inká avusese en kantasí ukhen ma van avúavá basá ákona e varano. Para vara seyo, ída ma kantasí ukhein kéká ano ída kanaíen Bafan onanten mino. ¹⁵Tiretí ankan pinté mana ano íta yaa aran ma imá deiní esin manáa ano eraven ankamen Tiyarafenui sarisari ída varanafo yafian ná ákona ono. ^{16w}Mana ano famúku avúavá iyá intin pefá ma Iso ano Tiyarafenu oyan amiren ma vei esé iyampon bí ma sító dunantá ma amiyan bareiní inafo yafian ná ákona oro. ^{17x}Máan turákaren ínaimpáké mai avu evaránen barano van en mifo ída kanaíen mino. Mireníen aran íta uan amiyákan ífí den mifo evaránen ma sirun noe siren ma mai avu varampin ída kanaíen mino.

Inarufá Bain Yerusaremi Ádé Inká Ore Ono Ma Sein Baya Ino

^{18y}Mai ma Sainá anu yompin kákan ira khiyákan títípa ukhan ma kákan uva uaren baékon uniyán ma Tiyarafenu ano Isareri kéká ma vei man baya ameintá ída orikha rono. ^{19z}Mai fara vara seyo, ufen mano kákantá asin maen Tiyarafenu ano vetin má baya síkan akhokho van uaren ben nan tesin ída setin má baya sino sen mino. ²⁰Máa síkan Tiyarafenu ano vetin tiantan e afá-nen manáa nentá oriyákan temí, “Mana safúna ano ma anuyon me aruvinti vá onámanápó ankamesin ná purino.” *Eks 19:12-13*

²¹Mai avúavá ano Mosesin akhokho amíkan béi máa semí, “Téin tivinantan den tikhokho fiyá uno.” *Diu 9:19*

^s12:7 Diu 8:5 ^t12:11 Yem 3:17-18 ^u12:12 Ais 35:3 ^v12:13 Pro 4:26

^w12:16 Esé 25:29-34 ^x12:17 Esé 27:30-40

^y12:18 Eks 19:16-20; Diu 4:11-12 ^z12:19 Eks 20:18-21; Diu 5:22-27

²²Máa síkan maen Saioní anu yontá ma ayun para vain Tiyarafenui auyen Yerusaremí baru ma inarufá baintá inka ere ono. Kokhon tausení enisori kayo ano ma kéká ukhen amusin iyaimpin mi e va ono. ²³Tiyarafenui eséke iyampón kayo ma inarufá aví uvantá ein kékái átarufin mi ere ono. Mai ma minó nanin bantai avúavá ma yaimin nain Tiyarafenu vá inká banasi ma evará-nen avíden ma maman kama uádiyain Aunan kayo vá ²⁴ainká Tiyarafenu vá barará nanin banta vá aúban ma váken auyen kasen bani man baya ma maman ákona uantan banta Yisasin má baípái ere ono. Eborini nare ano ma fefá be- rai siyan ma anona vá uman ameno ma seiníen beni nare ano ída máa sin- ten mifo moékan tarisari uren ma ume arúantan nare vaípái ere ono.

Tiyarafenui Vaya Ma Ída Átakharé In Baya Ino

²⁵^bTiyarafenu ano ma siretin tiamiyain baya vá inireya mai ánain bákurono. Mai fara vara seyo, fefá ma ma vara ráke vanta Mosesi ano ma vaya varen oríkan ma Isareri nanin banta ano átakharé uren maen uman barein mino. Máan tein mifo inaru fáké ma vaya siyain banta avaya ma ída iné tifanté mai inté ukhein uman ná bará tifante rafuno. ²⁶Tiyarafenu ano ma Saináí anu yontá ma vaya síkan maen bara vái khayaen mifo saréa ma sian damuádan ma vain mai máan mi sikhen mino. “Enádá ma vaya sékun maen minan ayon má bara vái antu antu inten mino.” *Aka 2:6*

²⁷Máan ma sikhein mai minan ayontáke yanasinta vá ma varáke yanasinta vá ano kípanten mifo inaruráke yanasinta ano fara vanten mino.

²⁸Máan tin nain nan mi mai ma ída na- muin baru ma variyá tiferá Tiyarafenu van pédé béin tusu siantádé amusin amerá bentá ana monó té tifano. ²⁹^cMai fara vara seyo, Tiyarafenu maen afá iran báken minó danái kaan kaurinten mino. *Diu 4:24*

Kípan Baya Ino

13 Ena vá ma ará amin maran in avúava sá para fákaresin bano. ²^dEna fáke vanta ma aviren mápin mo khaúden kama uantan avúavá ída vá áun nono. Mai fara vara seyo, fefá ma mai avúavá ma variyá ein kéká ano ída afová inton enisori kayo aya ukharen mino. ³Karavusifin ma vain kékasará ineine iyáke vá beti ma variyain uman bariya vá inká manáa ano ma ena kéká uman amiyanti mae mai ma variyain uman ná ayaeya varano.

⁴^eÁbasuí impin áesin ná puntákanti vá míkanan mano ven oo yaiyin maran iya vá ben nan anunu in maran ono. Ena nanin banta vá ma kiyáfo maran en inká ena ana safi avafun nafi ma varen asuse en noin kéká Tiyarafenu ano yaíden kó tiantanten mino.

⁵^fMoni san ma anunuin avúava sará periyáke vá mai ma yákeona máa vará kanaí ukhé uno seno. Mai fara vara seyo, Tiyarafenu ano máa sikhen mino, “Ída uron mi éin me ampíré nentá oré inká

ída uron mi éin táunonté uno.” *Diu 31:6*,
8

⁶Máa sikhein nan mi setí ankan ída feran kasaé máa sen té uno.

“Bafan mano séin tiyain bantan bantí mai van ída feranté uno.

Barará banta ano sen timaniná náisá in- téi vae.” *Íbo 118:6*

^a12:24 Esé 4:10; Ibu 8:6 ^b12:25 Ibu 2:1-3; 10:26-29 ^c12:29 Diu 9:3

^d13:2 Esé 18:1-8; 19:1-3; Rom 12:13 ^e13:4 Efe 5:5 ^f13:5 Yos 1:5

Yisas Karaisini Avúavá Ano Fefa Safi Saréa Fi Áa Ena Ena Yamu Safi Mai Manái Anan Ukhen Banten Mino

⁷ḠEi yafisin banta kayo ano ma Ti-yarafenui vaya sikhá ein nará ovare me ineno. Betin pinté ma kama avúavá erikhein nará iniyáke vá beti ma iyainí e vá Bafantá mumunan ono.

⁸Yisas Karaisini avúavá ano fefa safi saréa fi áa ena ena yamu safi mai manái anan ukhen banten mino. ⁹hMáan tukhanti ída vá áesin ná ara ara kampun afova ma amin mano siretíí ineine má-den asuse ino. Ti-yarafenui enará ukhein tarisari anon tiretíí monó tin avúavá ákona uanté iyan mifo yunantá ma are ukhein man baya finté ída erikhein mino. Máan tukhan mai ánain ma vákurein kéká ída aya ukharen mino.

¹⁰Monó ánon banta kayo ano ída kanaíen arata yaró ma kaiyain dunan nanten mino. ¹¹iUme ampiantano siren maen monó ánon banta kayoi ánon banta anon tafúna kayoi nare varen mi Moéken ma Kantasí Ukhein Kara-farampin ódiyaren mifo mai safúna kayo au varufái ira saman kauriyaren mino. ¹²jMáan tiyaréin mi inká Yisasin má dere vanasi maman kantasí ono siren kákan barui yafu ona akhempá bei nare vanaen mino. ¹³kMáan tukhein nan mi erí baru akhempá aravuvé mai ma véi ayave vareiní é bará tifano. ¹⁴lMai fara vara seyo, ma vara maen mai ída setisi mató baru ifo inarufá ma kákan baru váken ída erikhein nan mi yosiyá tiféno.

¹⁵mYisasini siyain tasá tetisi monó tin avúavápó ena ena Ti-yarafenun íkun uan amiyá beni kakhakhen puntákein bí tian

dákó ó tifano. ¹⁶nManáa yana san ma o afasí iyain kéká ma kama uren ma e ina yaná ma avarí in avúavá ída vá áun nono. Para vara seyo, mai avúavá anon Ti-yarafenun moéken amusin amé iyan mino.

Kípan Baya Ino

¹⁷oTiretíí monó tin avúaváká ma yafíkein ayafa kayo ano ma siamin nain-isá oro. Tiretíí aú bukhafa ma maman puntáantan doran mi vetíí yoran bákan inká mai yorari ma iyáin nain mai vetíí anon Ti-yarafenun tiaminten mino. Betin oo yayiesin ná ída arunaná bá doren ná amusin masá dorano. Mai fara vara seyo, ída ma amusin pinté doriyá inti mae ída uron mi siretin aya inten mino.

¹⁸pTetisi ineine kama ukhá inká ena ena yamú kama avúavá ana varano van iniyá umpo Ti-yarafenun amúkuan amesin ná tetin tiya ino. ¹⁹Téin nan amúku sintesin ná ainen aái intirá tiretíí ankan baonafá orono.

²⁰⁻²¹qMáan tukhein nará mai ma kusin amin Ti-yarafenu ano ma setisi Bafan Yisasin ma masí pinte orun avían mantein mano vá mai ma veni anunu ánain dakhafono van ma iyaona vá ákona uantano. Béin ma amusin ameren avúavasá Yisas Karaisini ákona finté uaren ná tiretimpin dákó ino. Yisas Karaisi maen sipisipirá dafisin bantan báken bei nare vanaren auyen kasen ban man bayan ákonte ukhen mifo ena ena vá béin aví daní iyáke vá kákan bí ameno. Pura ino.

²²Mumunan tiyofi sífá tiváeyan noe, ma ma asíka vompon ma uvaman ameruna finte vá kama e inire afová ono.

§13:7 1Ko 4:16 h13:9 Rom 14:17 i13:11 Riv 16:27 j13:12 Yon 19:17

k13:13 Ibu 12:2 l13:14 Ibu 11:10, 16; 12:22 m13:15 Íbo 50:14, 23

n13:16 Fir 4:18 o13:17 1Te 5:12 p13:18 Apo 24:16; 2Ko 1:12

q13:20-21 Yer 32:40; Isi 37:26; 1Pi 2:25

²³Tetí ankan tifá tiváe Timotin inka karavusi fintena útúantan bain ainen ma erintí maé avíaré tiretin o onano van oronté uno.

²⁴Tiretí ankani yafisin kéká bá munan nanin banta kayo vasá tenti ará

kusin baya siameno. Itarí ma vain monó nanin banta ano ará kusin baya siádan tiretí ankan baonafá oren mino.

²⁵Tiyarafenui sarisari ano vá tiretin má bano.

YEMISI MA UVANTEIN BOMPON MINO

(Yemisi)

Yemisi Vompon Ma Uvanteí Pákenai Afova Vaya Ino

Ma vompon ma uvantein banta ino.

Yisasin afá ma Yerusaremí barurá báken ma mumunan kayoi ánon bantaí ukhá ein banta Yemisi ino.

Uvarein orana ino.

AD foti-faipi (45) ráké foti-naini (49) ráké mai aúban mino. AD foti-naini (49) fin Kanisori átaru fákakhan mino. Maí damú ma ákonaen tikharé ein baya kayo ída ma vompompin uvanten mino.

Ma vompon ma uvantein baru ino.

Yerusaremí kákan barurá inon ten iniyán mino.

Ma vompon ma uvaman amikhein kéká ino.

Yutan monó nanin banta ano ma Parestainí bara me ampiren ma karan orera ukhá ein kékái amikhen mino.

Nái ana vará ma vompon uvanten nafino.

Esé arái in bompon ma uvanteimpin Yutan monó nanin banta ano Tiyarafenui man baya ánain puntáden bákurino van ákona uantiyan inká

uman erintin ma mantaan ákona inain bayan afova amikhen mino. Yisasi ma anuyontá monó baya siameinien mi Yemisi ano monó tin avúavá ma ara ara aa ma vain mi monó nanin banta siamikhen mino. Máan ma in manon monó tin avúavápin mumunan mano kama yoran afoká iyan ne sen aní ukhen mifo mumunan manon kantasí ukhé uno ma sin mano ída ino.

Yemisini Amusin Baya Ino

1^rTiyarafenu vá Bafan Yisas Karaisin mái ída miyan baran doran banta séi Yemisi anon ma vompon uvaré uno. Mai ma siyan mikan mifo sirantan kan orun kádan (12) anan kéká ma Yutan barafin bain pinté ma ena varafá meren mana mana ukhein pimpái ma vompon uvamádekun oreraen mino.

Akhenókain Mano Ma Mumunan Maman Ákona Iyain Baya Ino

²Mumunan tiyofi sífá tiváeyan noe, uman mano ma siretin amaniná ma yákó intiya mai van amusin mana in daná ino vá te afová ono. ³Mai fara vara seyo, siretí ankani mumunan ma akhenóka uan onan nain manon tiretíi mumunan moéken ákona uantantiya mantaan ákona in nono. ⁴Máan tukhen mifo áin ná mai avúavá ano orun potino. Para vara seyo, máan avúavá ano ma fara oriyán báken mi siretíi mumunan pura sen ákona uantantiyan akhenókafin ída erave ankamin nono.

Amúkin Avúava San Ma Siamein Baya Ino

⁵Tiyarafenu ano ma varano sikhein daná ma afová ono van ma in nain mano vá mai ma uman nan ída ininton amusin iyáken amiyain Tiyarafenu in-

^r1:1 Mat 13:55; Apo 15:13; Kar 1:19; 1Pi 1:1 ^s1:2 Rom 5:3-5 ^t1:3 1Pi 1:7

^u1:5 Pro 2:3-6

aesin ná amino. ⁶ Máan tukhen mifo véin ma ina ono sinteya vá mai véi simintéi ina iyá uno siyákeya vá ina ono. Para vara seyo, kokhon ineine ma iyain kéká ano mai ma uva ano ma non karantó ein an mi yiyan mino. ⁷ Máan avúaváká ma van nain nanin banta ano ída vá Bafan mano mana yaná timintéi uno siren ineine ino. ⁸ Máan kékái ineine ano mo asuse ukhantin pasen beti ma varan nain dansinta ano non ma karantó en onóbe enóbe ein an manan danten mino.

Ona Ída Van Kéká Bá Kokhon Ona Van Kéká Báí Vaya Ino

⁹ Mumunan kéká ano ma minó dana san o afasí ma iyanten ná amusin ino. Para vara seyo, Tiyarafenu ano máan kékái kákan bí amiyan mino. ¹⁰ ^vInká mai ma minó dansinta ma kain bain kéká ano amusin ná ino. Para vara seyo, Tiyarafenu ano máan kékái oman bararasí urantin mi katafin ma vain paravan mano ma mo khafureiní inten mino. ¹¹ Para vara seyo, áau édaven ma ákonaen á kan maen mai ma kamaen kiyaré ein paravan mano ma ainen mo kafuré iyain an mi yen mai ma kokhon ona ma kain bain kéká ano vetí ina yanasinta vá ainen o aiyoranten mino.

Minó Kama Yanasinta Ma Eriyain Mai Tiyarafenu Pinté Ana Ino

¹² Mai ma akhenóka iyákan ma maifin mantaan ákonaé iyain kékái Tiyarafenu ano avábá uanté iyan mino. Para vara seyo, maifin ma mantaan ákona ukharé inain manon mai ma Tiyarafenu^rá ma anunu ukhein kéká ma aunan bain kamamó iyáantan ma vain baranten mino. ¹³ Inká akhenókafin ma orivinona ano ída vá tiyákeya Tiyarafenu anon téin akhenóka uan oniyán mino seno. Mai

fara vara seyo, Tiyarafenu ano namu avúavá barano van mana ano ída véin akhenóka uan ontein bantin béi ano ída kanaíen banasí akhenóka inten mino. ¹⁴ Máan té iyan mifo setin tirá mantá ma siran niyaruna yaná anoi akhenóka in avúavá maman dákó iyá tiféuno. ¹⁵ Mai ma akhenóka in avúavá ano ma éimpin afoká uven e yarifaáda ma umefi iyaona anon purin maman dákó é iyan mino.

¹⁶ Máan tukhein nan mi mumunan tiyofi sífá tiváeyan noe, ída vá áesin kampun baya fóké tiritin do aviren tavifá orino. ¹⁷ Ayompin báken kano van ma oon kayo uvamádan ma vain dansinta Afóe Tiyarafenu vaípákéi kama yanasinta ano eriyákan béi ída aman mano ma onóbe enóbe einí é iyan mino. ¹⁸ ^wBei fura vaya fókéi setin maman be akhafanaí uren minó dansinta ma uvan-tein amaninái setin esesí urá bá tiféuno.

Baya Iniren Ma Mai Ánain Dakhafen Doran Baya Ino

¹⁹ Mumunan tiyofi sífá tiváeyan noe, minó baya ma sin nain kama e inireya ída vá aine vaya siyáke vá aranan ono. ²⁰ ^xPara vara seyo, aranan ma in avúavá ano ída kanaíeya Tiyarafenu ma anunu ukhein avúavá maman dákó inono.

²¹ ^yMáan tukhein nan mi namu avúava sinta ma siretin aúpin ma van nará pédeya Tiyarafenu ano ma vei vaya siretin aúpin doádan bain ná kama ureya mai ánain dakha fono. Para vara seyo, mai ákona anon kanaíen tiritin aya uren purin pintena evaránen aviranten mino.

²² ^zMáan ma ukhein nan ovare vá me ineno. Mai vaya kayo ánain dakhafano van mi siamiyan mifo iniya ana vano va raino. Ída ma mai vaya kayo ánain dakhafinteya mai eyantái óen banta an daveya eyan mi máka siya va ono.

²³Para vara seyo, vaya ana inire ma ída mai ánain dakhafinte mae mai kamufin ma siretíí auná onein an diya ono. ²⁴Tiretiyan ódareya ma oren nan maen manádái áuné iyan mino. ²⁵^aMáan tukhen mifo mai ma ume finte ma Tiyarafenui funtákein man baya ano ma útúantaya ma vaona ma oman afova suron ureya ma mai ánain dakhafiyáke ma inká mai ma ineona vaya ma ída áun esin maen mai van Tiyarafenu ano avu uantanten mino.

²⁶^bMonó nanin banta uno sire ma siretí ankan amafintá ma ída yafisinte mae mai siretiyantái óen banta an dav-eya eyan máká maáká esin mi siretíí monó tin mo asuse en beni nan aran ída vanten mino. ²⁷Teti Sifóe Tiyarafenun avorá ma fura sen monó nanin bantaí ukhé bano ma sinte vá aso iyamporinta vá inká baré nanin kayo vá ano ma umampin bantiya vá betin aya iyákeya ída vá áesin ná ma varákena yanasinta ano setin máden asuse ino.

Aronará Ana Ma Kama Iyai Pákena Van Ma Sikhein Baya Ino

2^cMumunan tiyofi sífá tiváeyan noe, manáa kayo van mana anunu ureya ma ena kéká oyan amiyáke mae mai inte ana vará teyá tetisi kakhakhein Bafan Yisas Karaisintái mumunan ukhé uno siya rafono.

²Tiretíí átarufin ma mana vanta ano kama ukhein auí daná bá kákan miyantá bain ankaroro vá uren erintin ma inká ena vanta ano yáka ráka ukhein auí daná ma uren erinti ma ³kokhon ona vain banta van tiamesin kama karáká kumamintiya ma inká ona ída vain banta van ma mesapá o mantakheya vanó tinte

fo áa varará kumanenó tiyanteya fo mai ⁴siretí ankan mi yaimin bantíi uveyan tiretíí namu ineine fóké banasi yaimiya ono.

⁵^dMumunan tiyofi sífá tiváeyan noe, ma vaya vá ineno. Ma varafin ma ona ída vain nanin banta van mi mumunampin moéken kákaní inten ne sikhen mino. Mai kéká anon mai ma Tiyarafenu anunu iyain kéká ma iyáantan bain dafisimpin orintéin aní ukhen mino. ⁶Máan tukha ompo siretí anon mai ma ona ída van kéká ayave amiya ono. Kokhon ona ma vain kéká anon tiretin nina yaná máden asuse uren avían kópin kaiyan mifo mai van ídá afová intoyá kama iyá ba rafono. ⁷Mai ma Tiyarafenu ano ma Yisas Karaisini kama ví ma maman tiretin amaniná ma kaein banta mai vetí ankan manon oyampá baya sein mino.

⁸^eMai fura ino. “Eyan nan ma anunu iyaonái e vá ena van anunu ono” *Riv 19:18* sikhein man baya ma Tiyarafenui vompon dókifin bain ánain ma fura se vákurinte maen pura yanasí inono. ⁹^fMáan tukhen mifo mai ma ona vain kékái vaya ánain mana ma yakhafinte mae mai man bayan durafúde umeí eono.

¹⁰^gPara vara seyo, iye anó minó man baya yakhafiyáken ná mai fintena mana man baya yurafurinten nafi mai Tiyarafenui minó man bayan durafuren mino. ¹¹^hPara vara seyo, mai Tiyarafenu ano anan temi, “Ída vá pamúku avúavasi ono.” *Eks 20:14*

Inká ena máa sikhemí, “Ída vá banta aruan purono.” *Eks 20:13*

Máa sikhanti ma sireti ma ída famúku avúavási iyáke ma vanta aruan purinte mae mai man bayai yurafure ono.

^a1:25 Rom 8:2; Yem 2:12 ^b1:26 Íbo 141:3 ^c2:1 Apo 10:34; Yem 2:9

^d2:5 1Ko 1:26-28 ^e2:8 Mat 19:19; Kar 5:14 ^f2:9 Diu 1:17

^g2:10 Riv 19:37; Nam 20:7-12, 24; Mat 5:19 ^h2:11 Rom 13:9; Diu 5:17-18

¹²i Máan tukhantiya vava ma sin nona fi áa náí avúavasá barante fo mai ovare vá me ineno. Mai ma avábá bain man baya ano ma ume fintena utúantaya ma vaona anoi kó tiantanten mino. ¹³j Mai fara vara seyo, ena nanin banta van ma ída arunan uantiyaré esin maen Tiyarafenu ano éin ída arunan uantanten mino. Máan tinten mifo ena van ma arunan uantiyaré esin maen mi Tiyarafenui arunaná ano vei kó pintena siretin ampiantanten mino.

**Mumunan Mano Ma Kama Avúavá
Ída Maman Dákó Inten Maen
Mai Mumunan Púken Mino**

¹⁴ Mumunan tiyofi sífá tiváeyan noe, siretíí avúavá ano ma ída kama ukhantiya mai náí ana vará teyá tetí ankan mumunan ukhé tiféuno siya rafono. Máan mumunan mano ída kanaíen mana nanin banta aya urantin Tiyarafenu ano aviranten mino. ¹⁵k Afá aváe ano fi áa ayofi ano fi ma yunan má aúí daná ba san ma iyantiya ma ¹⁶mana yaná ída aminton ma inka ino múmúká bákeya kama e yunan niyasin ná Tiyarafenu ano avábá uantano ma sin nona ano mana kama yanasá maman dákó inte fono.

¹⁷ Máan tukhanti afovasá ono. Mumunan iyáken ma kama yorará in avúavá ma ída vantin maen maí mumunan mano mo faen danasí en purein an mi yakhen mino.

¹⁸l Manáa ano kokhon ineine uren máa sé iyan mino. “Manáa kéká ano kama mumunan má bakan maen inká ena kayo ano kama yorará in avúavá bá ban mino,” siya ompo séi siretin tia-menté uno. Tiretíí kama yorará in avúavá ma ída vantí maé tiretíí mumunan ída

onanté umpo sesi kama yorantái sesi mumunan aní ékuya onan nono.

¹⁹ Mana Ayarafenu anan ban minó tireya siretí ankan mumunan iya rafono. Mai fura ino. Namu aunan kayo vá ano yeren mumunan iyáken avinantampin ban mino. ²⁰ Tireti óen banta kayo oe! Kama yorará in ma ída vain mumunan mano ma mo namuen asuse ukhein mai inte yamusá afová inte rafono.

²¹m Teti sinafu Abaraamu ma ve anin Aisakin ma on kará nará uadantá ma Tiyarafenu íkun uan amein avúava san ma Bafan avorá puntákein bantae ma sikhá ein nan ídá ovaré me iniya rafono. ²²n Tiretí ankan afovasá ono. Beni mumunan má kama yorará in má ano manafiní uven doran mi veni mumunan mano mo fura yanasí en mino. ²³o Máan tukhan mi Tiyarafenui vompon dókifin ma varé ein bayai mo khanaíen mino. Mai vava ano máa sikharen mino. “Abaraamu ano Tiyarafenu rá mumunan uran mi véin maman puntákein banta e siran,” *Esé 15:6*

banasi ano yere véin nan Tiyarafenui kama arona e sen ariyaren mino. ²⁴ Máan tukhein nará afová ono. Mumunan mana ma in mano va Tiyarafenu avorá tetin maman puntákein nanin bantaí iyan naifo setisi kama yoran má ano yeren máan té iyan mino.

²⁵p Pamúku nanin Reapin má dere anon maí avúavá tetin aní ukhen mino. Afurin banta kéká ma avían aúpá kaúdákaren ma sianta ena aí páké uaren ma evaránen orein avúavá anoi Tiyarafenu avorá puntákein naniníen mino. ²⁶ Kama yorará in mumunan ma ída vantin maen maí mumunan mano furein an mi yakhen mino.

ⁱ2:12 Kar 6:2; Yem 1:25; 1Pi 2:16 ^j2:13 Mat 5:7; 18:32-35

^k2:15 1Yn 3:17 ^l2:18 Kar 5:6 ^m2:21 Esé 22:9-12 ⁿ2:22 Ibu 11:17-18

^o2:23 2Kr 20:7; Ais 41:8 ^p2:25 Yos 2:1-21; Ibu 11:31

Oorá Ma Yafisin Baya Ino

3 Mumunan tiyofi sífá tiváeyan noe, monópin ma vanasi afova amin nanin bantaí ono van kokhon mano ída vá ono. Mai fara vara seyo, vanasi ma yaimin damú ma afoká intin maen mai ma afova amin nanin bantaí ukharé in-ain kékái Tiyarafenu ano umantá daim-inten mino.

²Tetí minó ano kokhon dádái namu avúavápin eravé tinkamé iyá tifé umpo intéa kéká anó oorá dafisinten nafi mai kayo anon monó avúavápin anoní ukhen pasen be aurá kamaen dafisinten mino. ³Osin maen kákan tafúna ifo sító aenifó ma véin oofen damurákei kasae o amáe e amáe iyasin eni anunu ánain dakhafinten mino. ⁴Inká sipirá dere vá afová ono. Mai maen kákan daná bantin inká kákan uva iyáken o mamáde e mamáde iyantin mifo sító danka ano ma o mamáde e mamáde ma inaintá anan orinten mino. ⁵Máan manan en mi amafin mano yere sító danái van mifo kasaen kákan dana maman namu uádan-ten mino. Inká títóká karé uvin nain ira ano kasaen kákan aafan kanten mino. ⁶Amafin ma vain mai máan mana en mi ira ma khiyain an dakhen pasintin namu vava kayo ma amafintá báken maen kasaen tiretí kumanin máden asuse uren tiretí ma kama e vaona mai ira anamuná ano ma e khen orera einén kákan uman o maman aminten mino. Para vara seyo, mai ma uman baren berai siyan purin barufin ma ume nanin banta máden asuse iyain ira ma eriyain mai Ban Anon pintéi eriyain mino.

⁷Banasi ano kasae ara ara osafáe fi nun kayo fi safúna kayo fi inká noyana kayo fi máde ayuní inono. ⁸Máan tin nompo mana ano ída kanafen amafin ayuní inten mino. Maifin mi namu vava

kayo víkakhen maen mai ano vanta ma aruan puriyain uvá an mi yakhen mino. ⁹Máan tukhan mi mai simafin mano manáa yamú tetisi Bafan Tifóen aví daní iyáken maen inká manáa yamú mai ma Tiyarafenu ano ma ve avúaváká ten ma uvamádan bain nanin banta vá asiren ankayan té iyan mino. ¹⁰Kama vava kayo vá namu vava kayo vá ano mana oofentéi khuviyan mino. Máan tiyain nan mi mumunan tiyofi sífá tiváeyan noe, máan avúavá ma variyain mai ída funtáken mino. ¹¹Non mantein pinté ma vimpun édé iyain mai kama non má íta non masá manafin édé iyan nafino. ¹²Inká kanaíeyá fíki yaa ana fintena orifi aran kúdeyá inká uvaini anan tákena fíki aran kúдите fono. Ida ino. Máan tukhantiya un non ma mantan nain pinta ída kanaíeyá auyen non dafin nono.

Kankánan Afova Van Ma Sikhein Baya Ino

¹³Máan tukhein nan mi kama ineine vanti ma Tiyarafenui avúavá ma afová ukhanteya mai kama avúaváká basin ná tiretin pinté kama avúavá ano non ma vanaein an dano. Kama avúavá ma variyan nonará ma ída au khákan inte mae mai fura seya kama ineine vain kékasí in nono. ¹⁴Máan tin nompo eyan nan mana in avúavá bá inká ena ará namu uantan má ma siretimpin bantiya mae mai fura sen namu uron ukhen mino. Máan tukhen mifo mai van ída vá tiretiyan amo se vá tetin túpin kama ineine vá uno sireya fura vava me oyan ameno. ¹⁵Mai ma veyan nan mana in avúavá bá inká ena nanin banta ma inian namu uantan má ano Ban Anon pintéi eriyain mifo ída Tiyarafenu finté eriyain mino. ¹⁶Para vara seyo, veyan nan mana ma in avúavá bá inká ena nanin banta ma inian namu uantan

má ma vaimpin ma onesin maen namu avúavá ana variyantín minó daná ano mo asuse anan inten mino.

¹⁷Máan tinten mifo mai ma inaru fáké erikhein afova ma mantein kéká ano ma esé arafen baran nain avúavú máan mi ukhen mino. Avusese ukhen ban má ará kusin avúavápó ma ena anunu in má minó damú ma vempáké kusen ban má ino. Inká ena nanin banta vá ma manafin ban avúavá bá inká ena van arunan uantiyáken kama avúavá ana variyan ma van má mino. Inká aronará ana ída kama iyan ban avúavá baren ma fura sen afoká in nain baya ana ma sin má ino. ¹⁸^sMai ma ará kusin avúavá ma maman kaiyain kéká ano ma ará kusin danayun ma yóden maen puntákein avúava sintan duyasanten mino.

Tiyarafenu Ádé Ma Orin Baya Ino

4 ^tNái yaná anó tiretin aúbaná aruve asive in avúavá maman kaiyan nafino. Namu avúava san ma aran nan daná anó maman aruvin banta kéká an daren ná tiretin aúpin aruviyan nafino. ²Tiretí ankan ma anunu iyaona yaná barano van maeya mai ma yan bain kéká aruan pureya inká oyampá baya seya inká aruve asive eya iya ompo mai yaná ída variya ono. Para vara seyo, amúkimpó ída Tiyarafenu vaípa inantiya rono. ³Inká Tiyarafenu vaípa ma inanten nan maen ída amé iyan mino. Mai fara va ino. Tiretí avúavá ano namu ukhan pasen mi amintiya yan bukhafa ma amusin amintá do maman karúdanona van mino.

⁴^uTiretí ankan pamúku nanin banta an den non kéká ompo ma vara rákena avúavá ma aroná in avúavá ano ma Tiyarafenui namuro vain mai siretí ankan ídá afová ukhe rafono. Ma vara

rákena avúavápin amusin doseno van ma inikhanteya mai ída kanaíeya Tiyarafenui arona vanonái siretin evarané tiamiyá uno. ⁵Tetin nan Tiyarafenuí ákona inin kaúden bano van ma vei Kantá Aunan túpin kain bain nan ma Tiyarafenui vompon dóki ano sikhein nan mai siretí ankan ná inin ná bariya rafono. ⁶^vTetin nan mantaan ákona uven namu yana san ma anunu in avúavá bá aruvin non tiren mi Tiyarafenu ano moékan tarisari simiyan mai van mi Tiyarafenui vompon dóki ano máa sikhen mino.

“Au khákan ma iyain kéká Tiyarafenu ano namuroí iyan mifo veyan ma maman bararasí iyain kékái sarisari amiyan mino.” *Pro 3:34*

⁷^wMáan tukhen mifo Tiyarafenu avorá eyan maman bararasí ureya váke vá Ban Anoní avúavá oyan amesin ná tiretin me ampiren orino. ⁸^xTireti ma Tiyarafenu ádé ma oresin maen Tiyarafenu ano siretin ádé erinten mino. Tiretí ume kéká ompo ayan tesé e vá inká baya sireya ída varan kéká ompo aúpin ná avové ure sesé ono. ⁹Ída funtákein avúavá ma vare ona vará ífí diyákeya moékan arunaná bariyáke ída vá intireya amusin iya vá bempáké arunanápin ná bano. ¹⁰^yBafan avorá ará bararasí ureya váke ma veni ákonará ana vano van ma esin maen béi ano siretin maman daní uren kákan bí aminten mino.

Ena Nanin Banta Ma Yaimí Pákena Vaya Ino

¹¹Mumunan tiyofi sífá tiváeyan noe, ída vá ben namu vaya sin maran ono. Ená oyampá baya sinte fo áa yaiminte fo mai ano man bayan oyampá baya sireya yaimin nono. Man baya ma

yaiminteya mai man bayará ída yafisiya ompo véin mi yaimin nono.^{12z}Man baya ma uvantein Tiyarafenumpin mi ákona vantin tetin daiminten mino. Beyafin mi vanasi ma evaránen aya uren aviran ákona vá aruren asuse in ákona vá ban mifo siretimpin intéa ákoná bákayá ben daimin maran iyá ba rafono.

Inurantena Yanasan Ma Ve Amo Sí Pákena Vaya Ino

^{13a}Máan tiyan mifo afova sá ono. Manáa kéká ano siyáken maen “Taréa fi áa inuran nafi e manté mana kákan barufá orivé maé mairá mana oranará báké manáa yoran kauré maé kokhon aman moní uvaranté uno,” siyan mino.^{14b}Inuran ma afoká in nain dasasinta siretí ankan ída uron mi afová ukha ono. Para vara seyo, sireti ma vaona ano non ayo ano ma sító máará afoká uaren ma ainen mo aiyoré iyain an mi yakharono.¹⁵Tiretí ankan máan ná teno. “Bafan mano ma setin nan mai avúavá barano ma sintí mai ída furin para váké mai avúavá baranté tiféuno.”¹⁶Mai ma varano van ma iyaona yanas-intará ma e amo siya varé esin maen mai ano namu avúavá anan mamádan-tiya umeí in nono.^{17c}Tiretí ankan afova sá ono. Mai avúavái varanté uno seya afová ure ma ída varante mae mai umeí in nono.

Kokhon Ona Ma Yan Bain Kayo Ano Ma Uman Baran Nain Baya Ino

5 Kokhon ona ma yenan bain nanin banta ano ma vaya vá ineno. Akhokhofarí ukhein uman kayo ma eriyain nará ifí diyáke aí pinte sá kákan berai seno.^{2d}Tireti ma kama yanasinta yenan bain mano mo avóken tonton

arukhan inká kama vuí dasasinta antan danú ano nakhen mino.³Tireti ma yenan bain kori vá siriva vá ano mo namuen karokharoní ukhen mino. Ma vara ma kípan nain damúí mai ma kama yanasinta ma kaiyá inona anon tiretíí avúavá daíden maen ira ano ma kheiní inten mino.^{4e}Para vara seyo, mai ma siretí ankani yorarí iyákaya ma ída kama e miyaní into ma manáa moní do maman kaiyá eona ano siretíí mai avúavá inka siamíkan minó ákona ma vain Bafan mano inikhen mino.

^{5f}Ena ena yamú tiretí ankan kama namumpin bákeya kama yunan kayo ana niyáke kama inorarí ukhaona inka arinti furin nono.⁶Mai ma kama kéká báken ma siretin ída aroren ukhein kayo yaíde mae aruan purono sireya aren nan puriyaren mino.

Ará Kusin Má Báken Ma Uman Baran Baya Ino

^{7g}Mumunan tiyofi sifá tiváeyan noe, afová ukha ono. Dunan doran kéká ano vara finté danayun orun ampamaren karavintí duyaseno van ma a san ave é iyain an deya vá ará kusin má bempáké báke vá Bafani erin ave ono.^{8h}Tiretí ankan ará kusin má bákeya mantaan ákona ukhe vá bano. Para vara seyo, Bafani erin inka ádé ukhen mino.

⁹Mumunan tiyofi sifá tiváeyan noe, Tiyarafenu ano siretíí avúavá daíden uman amin nafo ída vá eraran aveantumpin baya sin maran iya vano. Mai fara vara seyo, mai avúavá ma yaíden uman amin banta ano inka ereno van iyáken onará mantakhen mino.

¹⁰Mumunan tiyofi sifá tiváeyan noe, afovasá ono. Mai ma Bafan aviká ma kama avúavá bariyáken uman o yosi-

^z4:12 Rom 2:1; 14:4 ^a4:13 Ruk 12:18-20 ^b4:14 Íbo 39:5, 11; Pro 27:1

^c4:17 Ruk 12:47 ^d5:2 Mat 6:19 ^e5:4 Diu 24:14-15 ^f5:5 Ruk 16:25

^g5:7 Diu 11:14; Yer 5:24 ^h5:8 Rom 13:11-12; 1Pi 4:7

yaré ein sakhanampa vanta kayo anon tetin aní ukhen mino. ¹¹ⁱMai ma kákan umampin o fékein kékái kákan bí amiyá tiféuno. Mai ma Yopun amaniná afoká in ma varein avúavá ano ma Bafani ineine ma kanaí ein manon tetin aní ukhen mino. Para vara seyo, Bafampin mi moéken avábá in má arunaná bá bíkakhen mino.

¹²^jMáan tukhen mifo mumunan tiyofi sífá tiváeyan noe, ída uron ná inaru fi vará fi áa manáa yanasinta fi aví tireya vá pura ódino sire ayan befiyó ono. Para vá eyo seya ída inó se iya vá mairá ída uman barano.

Mumunan Nanin Bantai Amúkimpin Ma Ákona Vain Baya Ino

¹³Tiretin pinté ma uman baren oriyan ban nain mano vá Tiyyarafenun amúkuan amino. Inká amusin ma iyan nain mano vá Bafan anédó diyáken ben aví daní ino.

¹⁴^kTiretin pinté ma aí iyantin ban nain mano vá monó doran banta kayo arantin ná Bafan avíká mai kéká ánontá uveri vanaren amúkuantano. ¹⁵^lMumunan má ma amúkuantan nain manon betin aí daná kípaaantá dantin mi Bafan mano evaránen betin kama uantanten mino.

Inká mai kéká ano ma umeí ukharé intin maen Tiyyarafenu ano vetíi ume ampiantanten mino.

¹⁶Máan tukhein nará tirtíi ume van sirun noe sin maran ná iyáke vá ben amúkuantan maran esin ná Tiyyarafenu ano aya ino. Puntákein nanin banta ano ma amúkiyaimpin mi moékan ákona van mino. ¹⁷^mTetin an dakhein bantan Iraiya varen mi á ída yano van ákonaen amúkin mi kanú manaú orana ifo afápá mana un kádan biyontá ída á den mino. ¹⁸ⁿMáan tukharéin maen inká evaránen á dano van ma amúkin ma á eran maen dunan má káta vá ano evaránen orun póten mino.

Mumunan Ma Me Ampikharé Ein Ma Ayaintin Ma Evaránen Mumunan In Baya Ino

¹⁹^oMumunan tiyofi sífá tiváeyan noe, siretin aúbanáké ma manáa kéká ano Tiyyarafenui fura sikhein baya ma me oyan amiren orikharé intin ma ovaránen aviádanti ma erinti mae ²⁰^pmai vá afová ono. Mai ma o aviáden nan ma erein banta anon mai ume vantai furin pinta aya uren nan mi Tiyyarafenu ano mai vantai ume kayo ampianten mino.

ⁱ5:11 Eks 34:6; Yop 1:21-22; 2:10; Íbo 103:8 ^j5:12 Mat 5:34-37

^k5:14 Mak 6:13 ^l5:15 Mat 17:18-20 ^m5:17 1Ki 17:1; 18:1

ⁿ5:18 1Ki 18:42-45 ^o5:19 Kar 6:1 ^p5:20 Pro 10:12; 1Pi 4:8

PITA MA ESÉ ARAÍEN UVANTEIN BOMPON MINO

(1 Pita)

Pita Ma Esé Bompon Uvanteí Pákenai Afova Vaya Ino

Ma vompon ma uvantein banta ino.

Pita anon Sirivanusin nan ma Sairasine sen ariyain banta ma veni vompon uvaran doran bantaí ukhá ein mi siamin uvanten mino.

Uvarein orana ino.

AD sikisti-fo (64) fin mino.

Ma vompon ma uvantein baru ino.

Ovaeran bayafó ma Babironi e siyain baru Romú ino. (1 Pita 5:13 fin ná onano.)

Ma vompon ma uvaman amikhein kéká ino.

Esiá bara van ma saréa Teki e siyain barafin ma vain monó namun kayofin kokhon Yutan kayo vákan inká ena anan pinté ma monó tiyain kéká bá dere vákan mai kayon uvaman amikhen mino.

Nái ana vará ma vompon uvanten nafino.

Monó nanin banta ano ída uman baranté uno sen inikharé ein uman kayo variyaimpin mi ma vayafó betin ákona uantáken mino. Inká baru yafisin kayo

vá antuntá ma varú barú ukhein kéká bá ano ará manafinien bano van mi aní iyáken ará ákona uantan baya siamikhen mino.

Pita Ma Amusin Baya Sein Mino

1 Yisas Karaisini vaya varen orin banta mai séi Pita anon ma vompon uvaré uno. Mai ma Pontusí barafa safi Kareisia safi Kapadosiá barafa safi inká Esiá barafin nafi Bitiniá barafin nafi ma Tiyarafenu ano aní ukhein nanin banta ano ma meren mana mana ukhein kékápin mi ma vompon uvamádékun oren mino. ² Tifóe Tiyarafenu ano fefái siretin aní uraya varé en nan mi Kantá Aunan mano siretin maman kantasien mino. Mai ma siretin maman kantasí ukhein ana maen mai máan mi ukhen mino. Yisas Karaisini vaya inire ma mai ánain dakhafe nan ma inká beni nare ano sirtíi ume sesé uanteintá ino.

Máan tukhantin Tiyarafenui avábá bá ará kusin má ano moéken tiretin masá bano.

Para Van Oriyan Ban Aunan Ma Sive Ukhein Nará Tiyarafenu Aví Daní Tifano

³ Tetisi Bafan Yisas Karaisin Afóe Ayarafenu avisá daní ono. Mai fara vara seyo, setinti monó tin avúavápin maman auyení ino van mi Tiyarafenu ano Yisas Karaisin pinté uaren ída kípan arunaná tetin timikhen mino. Máan tukháí Yisas Karaisi ma fúaren evaránen e mantakhein nan mi ákona inin kauré ave iyá tiféuno. ⁴ Mai ma ída miyantá bain amusin Tiyarafenu ano ve akhafana amikhen mino. Mai ma siretin amikhein amusin ma inarufá kaúantan bain mano ída avóken inká o afeyoren en inten mino. ⁵ Tiyarafenu rá ma munan iyaona van mi vei moékan ákona

⁹1:2 Rom 8:29; 2Te 2:13 [†]1:4 Kor 1:12 [§]1:5 Yon 10:28; 17:11

fóké turetintá daffikantiya oriya varé esin ume fintena siretin aya uren evaránen aviranten mino. Ma vara ma mo kípan nain damúi mai ma evaránen aviran nain maman dáko urantin minó anon onanten mino. ⁶“Mai vará minó ano fura se amusin ono. Asíkarái kokhon uman kayofin oferan nompo mai oyampáké amusin ban mino.

⁷“Tiretí ankan kaná ákona e mantakheya fo mai siretí mumunan akhenóka uan onano van mi mai uman kayo erinten mino. Irafín ma kori iyó uan oniyain an den mi siretí mumunan akhenóka uan onanten mifo Ti yarafenu avorá mai siretí mumunan mano kori esantaren moéken kákan danái van mino. Máan tukhantín ákona akhenóka kayofín ma siretí mantaan ákona ukharé esin maen Yisas Karaisi ma ma varará afoká inain damúi siretin nan amusin uren kákan bí aminten mino.

⁸“Tiretí ankan béin ída yáko oné iya ompo véin nan para anunu é iya ono. Inká béin ída ontéya mumunan iyáke mae moéke amusin é iya ompo mai moékentasá amusin ono. ⁹Para vara seyo, véintá ma ákona mumunan kaiya ona van ma amin nain miyan mai Ti yarafenu ano ma ume fintena siretin evaránen aviran nain mino.

¹⁰“Mai ma Ti yarafenu ano ume fintena vanasí sarisari uren evaránen avirano van ma sikhéin nan mi sakhanampa vanta kayo ano moeké afová ono van iyaren mino. Mai avúavasí ma inain ana mai vetí ankan ída afová ukhen kokhon ineine iyáken mi fara sakhanampa vaya siyaren mino. ¹¹“Karaisi ma uman o yosen púaren ma ínainpáké e mantén kákan bí baranaí pákena van ma veni Kantá Aunan mano fe o útúben

tiamiyain nan betí ankan amino ukharen mino. Mai yaná inte yamusá afoká intéin ná iye anó mai uman barantéin ná tiyan nafi siren kokhon ineine iyaren mino.

¹²“Betí ankan ma vá ein damu san mai yanasinta ída afoká inten ne sikharen mifo kokhon orana ma esantavintín mi siretí ma vanona yamu san mi afoká inten nen tikharen mino. Máa sikharéin mi inaru fáké ma siantan erein Kantá Aunaní ákona vá ma vaya sen noin kéká anoi saréa mai Kama Vaya siamiyan mino. Mai ma afokáin nain avúavá ano mo kama uron ukhan mi enisori kayo ano yere amusin iyáken mai yaná afoká intín onano van iyaren mino.

Kantasí Ukhen Ma Van Avúavá Pákéna Vaya Ino

¹³Máan tukhantí Yisas Karaisi ma ovaránen erin nain damú ma varanona sarisari vará ákona inin kauráke vá tiretí aurá kama e yafiseno.

¹⁴“Ti yarafenu akhafana ompo veni vaya vá ineno. Mai ma Ti yarafenun ída afová ukhe ma ída funtákein avúavá bariyá eona ano siretin damuádan nafo ída vá mai avúavá evaráne yakhafono van anunu ono. ¹⁵Máan tukha ompo saréa ma Ti yarafenu ano siretin maman be akhafanaí ono van ma aní uren kantasí ura vaona rasá kantasí ukhein avúavá ana vá barano. ¹⁶“Mai fara vara seyo, Ti yarafenui vompompín máa sikhén mino. “Téi kantasí ukhé umpo siretí ankan masá kantasí ono.” *Riv 11:44-45; 19:2; 20:7*

¹⁷“Máa sikhén mifo afovasá ono. Mai ma inarufá bain Tifóe oe sire ma amúkuan amiyaona ano ma vanasi yaimin nain damú mai ída arona ino sin avúaváká daiminten mino. Tiretí ankan ma variyaré eona avúaváká ten mi yaí-

[†]1:6 Yem 1:2; 1Pi 5:10 [‡]1:7 Pro 17:3; Sek 13:9; Mar 3:3; Yem 1:3 [¶]1:8 Yon 20:29; 2Ko 5:7 ^{¶¶}1:10 Mat 13:16-17 [×]1:11 Íbo 22; Ais 53; Ruk 24:26-27
^{¶¶}1:14 Rom 12:2; Efe 2:3; 4:17-18 ^{¶¶}1:16 Mat 5:48 ^{¶¶}1:17 Rom 2:11; Rev 2:23

den miyan aminten mino. Máan tukhanti ma varará ma vákeya ena vara fáké ma e vain an dakhe vá Tiyarafenu aránaópá ma van avúavá ana vá barano. ¹⁸Mai fara vara seyo, siretí anáuyani avúavá ánain ma vákuriyaona ano ída kanafen ayairí ukhan mi mai fintena siretin aya uré avirano van Tiyarafenu ano Yisasin pinté uaren tiretin miyaní ukhen mino. Mai miyan mai kori vá siriva fóké basa miyaní ukhen naino. Ída ino. ¹⁹^bTiyarafenun anin Yisas Karaisi ída mana ume vákan ma afun ída vain sipisipi an dakhein ni aunan bain nare fóké miyaní uraya vaono. ²⁰^cPefá ma vara ída afoká ukhan maen mai avúavá barano van mi Tiyarafenu ano véin aní uran baré íkan damú ma afoká iyain má ume fintena siretin aya ino van béin tiantan ma varará eren mino. ²¹^dTiretí ankan Yisas Karaisimpinté uarei Tiyarafenurá mumunan iya ono. Inká Tiyarafenu ano ma furin pintena Yisas Karaisin orun avían mantaren kakhan ákona amikhein manon tiretí mumunan moéken ákona uantiyain mino.

Afá Aváeyan Ma Aúkáké Avábá In Avúavá Baya Ino

²²^eTiretí ankan ma fura sikhein Kama Vaya inire ma mai ánain bákureona van mi siretí ume yo sesé uraya va ompo saréa vá mana nanin banta akhafana an dakheya fura se ven avábá in maran ná ono. Máan tiyáke ena nanin banta yere fura seya aú kákesá avábá ono.

²³Mai fara vara seyo, siretí ankan monó tin avúavápin evaráne auyení ukha ono. Ma vara ráke anóe afóe ano ma amikhein aunan mai sireti ma furesin maen kípan ten mifo auyen aunan betin pintesa erikhen naino. Ída ino. Mai au-

nan Tiyarafenui fara van oriyan ban baya fintéi erikhein mai ída kípan para van oriyan banten mino. ²⁴Para vara seyo Sakhanampa vanta ano máa sikhen mino,

“Banasi ano ainen ma kafuriyain kata an mi yakhen mino.

Betíi kama vukhafa ano katafin bain kama faravan mano ma ainen mo khanoení iyan mino.

Kata ma kafuriyain má beni faravan mano kano uaren un pafasen eravé iyan mino.

²⁵Máan té iyan mifo Bafani vaya ano fara van oriyan banten mino.” *Ais 40:6-8*

Mai vaya maen Tiyarafenui Kama Vaya ma fefá tiamíka inikhá eona ino.

2^fMáan tukhen mifo minó namu avúavá bá kampun ma siantan avúavá bá ifasá ono. Ída vá kama avúavá anan bariyá bá uno seno. Baya ana ma siren ída varan avúava safi ena ma namu inin mamantan nafi ena ina yaná ma kampun tiren baran avúava safi vá oyan ameno. ²Arará iyampon mano ma nan anu máa niyáken e inoriyain an deya vá monó avúavápin e inoresin ná Tiyarafenu ano siretin aya uaren evaránen avirano. ³^gTiretí ankan taréa Bafani kama avúavá inka afová e ono.

Ákona Onámanáká Ma Má Uvaran Baya Ino

⁴Yisas Karaisi ano Tiyarafenui monó namuntá ákona namádaní ukháin mi vanasi ano namu ukhen ne siren do éken mino. Máan turan Tiyarafenu avorá kama ukhen baréin béin aní ukhen mifo ve vain tasá ereno.

⁵^hTiyarafenu ano siretimpó deren man bei ákona namádaní uaren mi ven

^b1:19 Apo 20:28; Ibu 9:12-14 ^c1:20 Efe 1:4; 2Ti 1:9-10

^d1:21 Yon 14:6; Rom 5:1-2 ^e1:22 Yon 13:34; Rom 12:10

^f2:1 Efe 4:22; Yem 1:21 ^g2:3 Íbo 34:8 ^h2:5 Efe 2:21-22; Rev 1:6

ma monó tiantan namun uvariyan mino. Yisas Karaisi ma varein avúavákái Ti-yarafenu ano siretin maman kantasí ukhein monó doran banta kékásí uren mi véi ma íkun uan amiyaona van amusin iyan mino. ⁶ⁱMai fara vara seyo, Ti-yarafenui vompon dókifin tian amá ukhen mino.

“Onano. Yerusaremí^{††} barurá mana oná-maná aní uré

maman ákona namádan an daré dafédékun bain

béintá ma mumunan in nain kéká ano ída ayave van inten mino.” *Ais 28:16*

⁷Mai ma veni vaya iniren oyan amiyain kéká ina va van naifo mumunan ma iyaona kékái kama yanái van mino.

“Má uvaran banta kayo ano ma yo ma-man karúdein onámaná ano maman má dádaimpin mana ákona oná-manasí ukhen mino.” *Íbo 118:22*

⁸Inká Ti-yarafenui vompon dóki ano evaránen máa sikhén mino,

“Banasi arantantá duádan ma eyúpó en ankamé iyain onámanái véi van mino.

Inká mai ma vanasi ano eraven ankamé iyain onámaná ino.” *Ais 8:14*

Betí ankan ma Ti-yarafenui vaya ída in-intin mi mai avúavá afoká inten ne sikháin mai avúavá afokáen mino.

⁹^jMáan ten mifo siretí ankan mai ma einisa ukha va ono. Ída ino. Para vara seyo, Ti-yarafenu ma kin bain manon tiretí ankan aní urayan beni monó doran bantaí uveyan tireti má inká beni kantasí ukhein nanin banta vá ano ven ninaí ukha ono. Máan tukhantin Ti-yarafenu ano ma yuntein avúavá pinta avían bei kakhakhein avúavápin ma kaúdákantiya kasae veni kama avúavá ena nanin banta aní inono.

¹⁰^k“Pefá tiretí ankan banasi va vare va ono.

Taréa siretí ankan Ti-yarafenui vanasin ba ono.

Pefá tiretí ankan Ti-yarafenui arunaná ída mantare

saréa veni arunaná inka vare ono.”

¹¹^lTéi ma sinunu ukheruna sirona kéká soe, siretí ankan ena vara fákéi e van ná namu avúava sinta ano ma siretíí au anunu vá aruviyain nan mi nentá bano van ákonaé tiamiyá uno.

¹²^mAfokhampin ma vain nanin bantafin ma váke yaffan ákona ukheya vá bano. Tiretí ankan ma Ti-yarafenu aví danín avúavá bariyanona van ída kama iyan ne siyaren maen Ti-yarafenu ma vanasii avúavá me yaimin nain damúí siretin nan kama avúavái variyaren ne siren mumunan iyáken Ti-yarafenu aví daní inten mino.

Banasirá Ma Yafíkein Kékái Aránaopá Ma Van Baya Ino

¹³ⁿKin manon minó danáká dafíkein bákan béi ma siamin nain baya kayoi aránaopá ana vano van mi Bafan mano inikhen mino. ¹⁴Máan tukhan kin mano vei yoran banta kéká aní uran ban mifo mai kayo aránaopá dere vá bano. Mai fara vara seyo, mai ma namu avúavá baran nain kéká uman amiyáken kama avúavá ma varan nain kéká maman daní ino van mi vetin tiantan erikhen mino.

¹⁵^oPara vara seyo, siretí ankan ma kama avúavá baran nona ano mai ma oy-ampá baya sin nain kékái oorá iyarano van mi Ti-yarafenu ano anunu ukhen mino. ¹⁶Tiretí ankan miyan ída van doran banta kéká saono. Ída ino. Tiretin inka útúantaya va ompo ída vá inka útú-intá bá uno sire namu avúavá bariyáke

^{††}2:6 Yerusaremie ma siyain baya mai Saioni sen tian mino.

ⁱ2:6 Efe 2:20 ^j2:9 Diu 7:6; 14:2; Ais 9:2; Apo 26:18; Efe 5:8 ^k2:10 Ose 2:23

^l2:11 Kar 5:17, 24 ^m2:12 Mat 5:16 ⁿ2:13 Tai 3:1 ^o2:15 1Pi 3:16

vá Tiyarafenui yoran banta kékasí ukhe yoriya vano. ¹⁷PEna nanin banta aráopá ma van avúavá aní iyákeya vá monópín ma vain kékasá avábá ono. Tiyarafenu van periya vá kini aránaópa sá bano.

Miyan Ída Van Doran Bantai Vaya Ino

¹⁸qMiyan ída van doran banta kéká ma vanteya siretíí ayafa aránaópa sá bano. Ída vá mai ma kama avúavá aní iyáken doran amin nain kékái yoran mana varano van ono. Mai ma yoran barano van duvun in nain kékái vaya yere vá ineno. ¹⁹Mai fara vara seyo, siretí ankan kamá iya fo áa namú iya fo mai kama ineinen iyákeya manáí ukhein avúaváká anan míkani yoran bariyan nan mi Tiyarafenu ano amusin iyan mino. ²⁰rTiretíí namu avúaváká ma uman bariyare ída mana miyan o varan nompo kama e váke ma funtákein avúavá bariya ma uman bariyaré esin mi Tiyarafenu ano siretin nan amusin inten mino.

²¹sMai uman barano van mi Tiyarafenu ano siretin arakhen mino. Para vara seyo Yisas Karaisi ma siretí ankan nan uman mantein manon tiretin aní ukhen mifo véin ánain ná dakhafono.

²²“Béi ída umeí iyáken

manáa kéká ída mákáken mino.” Ais 53:9

²³tBéin ma asiyákan anona ída asikharen mino. Inká béin ma uman amiyákan anona ída uman amikharen mino. Mai ma funtákein avúaváká kó tiantan banta Tiyarafenu ayampin mi vei uman kaen mino. ²⁴uTetin nan ume avúavá me ampiren puntákein avúaváká bano van mi veyantá tetisi ume maman be aurá kaúden baren daa unkamádantá un puren mino. Béin ma

arein afun kayo anon tiretin ayofen mino. ²⁵vPara vara seyo siretí ankan aiyókein sipisipi an deya kufa ukhare ompo saréa evaráneya sipisipirá ma yafisin banta an den ma siretíí aúká dafisin banta vaípái orikha ono.

Ábasuí Ma Ukhein Nanin Banta Ano Ma Vetíí Avúaváká Dafisin Baya Ino

3^wAnasi kayo oe, máan mana e vá tiretí aváná ano ma Tiyarafenui Kama Vaya ída iniyanti mae beti ma sin nain baya aránaópasá bano. Tiretí ankan ída vaya sin nompo Tiyarafenu van ma fédeya funtákein avúavá ana ma varanona anon betin aní inten mino. ²Mai ma funtákein avúavá ma varano nan óden mi vetíí ará baeranten mino.

³xTiretíí ánon do ma ara ara yamirí in nafi inká kori fóké ma uvaran danas-intafó ma aúí in nafi áa kama ukhein aúí daná póké ma yan bukhafará aúíin mano funtákein avúavá ída yákó é iyan mifo mai van ída vá kokhon ineine ono. ⁴Mai ma Tiyarafenu avorá moéken kama uron ukhan ma vempáké ban avúavá ano ma aú pinté eriyen ma ída ainen mo kipé iyain avúava sará ineno. ⁵Para vara seyo, máan avúavá pókéi fefá ma kantasí ukhá ein nanin kayo ano aúí uran moéken kama uron iyaren mino. Betí ankan Tiyarafenurá ákona inin kaúden betíí avafuná aránaópa báken baya iniyaren mino. ⁶ySara ma ve avafu Abaraa-muni vaya iniren ma sesi ayafa oe ma siyaré ein an ná dano. Tiretí avafun ná ano ma siretin namu uantan nain avúava san ma ída ferana funtákein avúavá ana ma varanteya mai Saran araumasin an mi vaono.

p2:17 Rom 12:10 q2:18 Efe 6:5 r2:20 1Pi 3:14, 17

s2:21 Mat 16:24; Yon 13:15

t2:23 Ais 53:7; 1Pi 3:9 u2:24 Ais 53:5-6; Rom 6:11 v2:25 Isi 34:5-6; Mat 9:36;

Yon 10:14; Ibu 13:20-21 w3:1 Efe 5:22 x3:3 1Ti 2:9 y3:6 Esé 18:12

^{7z}Máan manae vá aváná ano siretí anáona kákan bí amireya vetin má ma manafin kamaen ban avúavasá aní ono. Betíí au ano siretin an den ída ákona ukhen mifo Tiyarafenu ano siretin má manafí uren uváden auyen aunan bain amusin mi amikhen mino. Tiretíí anáona yafiseren aa fáké ma ída kama ureya yafisesin maen Tiyarafenu ano siretíí amúkin ída ininten mino.

Monó Nanin Banta Ano Ma Vetíí Avúaváká Dafisin Baya Ino

⁸Kípan baya ma siamenuna mai máan mi ukhen mino. Minó ano vá mana inintá bákeya arunaná bíkakhantiya vá tiretíí aú bá inin má bararasí ureya ven avábá in maran ná ono. ⁹Namu avúavasí ma uantiyanti ída vá anona namu avúavasí uantano. Banasi ano ma ída funtákein baya sen asinti ída vá betíí ankan anona aseno van iyákeya avábasá aní ono. Para vara seyo, mai avúavá barano van mi Tiyarafenu ano inikhen maen máan ma inonarái siretin avábá uantanten mino. ¹⁰Mai fara vara seyo, Tiyarafenui vompon dókifin máa sikhen mino.

“Para van oriyan ban aunan má kama yamú kayo va san iye anó anunu in-ten nafi

mai kayoi amafin mano ma namu vaya sintá dafisen ná

inká oo ano ma kampun baya kayo sintá dafisen ná ino.

¹¹Mai kéká ano namu avúavá ampiren kama avúavá ana vá barano.

Ena kéká bá ma ará kuse manafin ban nará ákona e yorano.

¹²Para vara seyo, funtákein avúavá ma variyain kékái Bafan mano yafíken betíí amúkin nan á kaséden iniyan mifo mai ma namu avúavá bariyain kékái

Bafan mano oyan amiyan mino.” *Íbo 34:12-16*

Tiyarafenu Oo Yaiyintá Ma Uman Baran Baya Ino

¹³Tiretíí ankan ma kama avúavá barano van esin maen iye anó umó danten nafino. ^{14a}Máan tukhen mifo kama avúaváká ma uman baresin maen Tiyarafenu ano mairái miyan aminten mifo “ída vá akhokho van iyáke ída vá kokhon ineine ono.” *Ais 8:12-13*

¹⁵Ída vá kokhon ineine iyáke siretíí vampin ná Karaisin maman tiretíí Bafaní ure vá béintá monó teno. Inká monó avúavápin ma ákona inin kaúkeona van ma ina inti siaminona vaya vá ena ena útakhe vá bano. ^{16b}Máan tin nompo ovare me ineine ureya vá bempáké ará amin aa fákesá tiameno. Máan tesin maen tiretíí ankan Karaisin ninan basin pasen mai ma namu vaya sen asiyaré ein kéká ano kama avúavá ma variyaona van ódaren ayave van inten mino. ¹⁷Tiyarafenu oo yaiyen ma kama avúaváká uman baran manon namu avúaváká ma uman baran esantakhen mino.

¹⁸Mai fara vara seyo Yisas Karaisi ma setisi umerá manádá para van oriyan ban purirí ma ein mai véi yeren máan uman o yosikhen mino. Béi ída mana uméí iyaren mifo setin tiviren Tiyarafenui varufin orono van mi ume nanin banta van dan bukhafafin uman o yosen púbíkan mi Kantá Aunan manon aunan amin evaránen e manten mino.

¹⁹Mai aunan pinté uaren mi mai ma aúí uran ma karavusi uádan baré ein aunan kayofin mo monó baya siamen mino. ^{20c}Mai ma Noan tiamin ma voti uvariýákan ma Tiyarafenui vaya átakharé iyan ma Tiyarafenu ano vem-páké báken ave ukhá ein kéká ino. Kákan á daaren ma non taven banasi

ariyan maen mai finten dan manápá ifo afápá kanú manaú un kádan nanin bantant máan Tiyarafenu ano ayaen mino. ²¹Mai ma non taven banasi arein manon non ma féantan aní ukhen mino. Yisas Karaisi ma fúaren e mantaein ákona ano ma siretin aya ukhein manon monó non ma féantan avúavá aní ukhen mino. Monó non ma féantan mai au fáke va fain do sesé in naifo inin ma sesé uren aviren Tiyarafenu ádé orin avúavá ino. ²²Taréa Yisas Karaisi inarufá oren kakán bí o mamaren Tiyarafenui ádé kumantan maen minó enisori kayo vá minó daná ma varan ákona vá ara ara ákona kayo vá ano véin aránaópái van mino.

Tiyarafenui Avúavá Bá Ma Van Baya Ino

4^dMáan tukhein nan mi Yisas Karaisi ma aí o yosikhanti siretí ankan mái máan uman o yosin nompo mai ma véi varyaré ein avúavá basá útaare vá bano. Mai fara vara seyo, Yisas Karaisin avíká ma uman barantó uno ma sireya inikhante mae umeí ma iyaona vá ampeno. ²Máan ma inteyan umeí ma in anunu khayó ída e yakháan more mere eya non nompo Tiyarafenui yoran mana varano van moéke anunu in nono. ³Para vara seyo mai ma afokhampin bain kéká ano ma aruven baren iyáken amusin dosiyan ma aurá ída yafisin avúavá bakan ma famúku avúavasí ono van anunu iyaré ein avúavái fefá bariyare ono. Betí ankan ma ara ara omasí iyáken óen non naren óen iyan ma inká ída funtákein omasí iyáken ma kampun ayarafenu kayorá ma namu avúavá póké monó tiyá ein mai feyante avúava sinta ifo vá ampeno.

⁴Mai ma fefá manápá noré eona kéká bá ma ída evaránen oriveya vetin má

namu avúava sinta varyaona van mi siretin oyampá baya sen asiyan mino. ⁵^fMáa siyan mifo fúkein kéká bá mai ma ída furin nan para vaona kéká bá anon Tiyarafenu avorá o mantavesin minó nanin bantant daiminten mifo afovasá ono. ⁶Para vara seyo mai van mi fúkein kékápin dere Tiyarafenui Kama Vaya Yisas Karaisi siamikharen mino. Mai kéká ano fura sen dan bukharáí uman baren púken mifo vetí ankan inaimpáké Tiyarafenu ma einén aunampin ída furin para vanten mino.

Tiyarafenu Ano Ma Amusin Amikhein Dorantá Ma Kamaen Dafisin Baya Ino

⁷^gMa vara ma kípan nain damú inka ádesí iyan mifo siretí avúavápin daffan ákona ukheya funtákein avúavá ana varya vá amúkiya vano. ⁸^hMoéken ma kákaní ukhein daná ma vain mai ven avábá uantan maran eya vá oriya vano. Para vara seyo, avábá in avúavá anon ara ara ume kayo yaran ten mino. ⁹ⁱInte kheká anó tiretin má dunan niyáken bano van inten nafi mai amusin pintesá mai kéká aviádesin siretin má bano.

¹⁰^jEna nanin banta aya ono van ma Tiyarafenu ano mana mana amusin amirú ukhein dorantá kama e yafíbesin ná Tiyarafenui sarisari ano siretimpin bíkaaren banasifin orino. ¹¹Tiyarafenui oo vantaí ono van ma arakhanti mai véi ma siretin pinté uaren baya seinisá ono. Inká ena nanin banta aya ono van ma Tiyarafenu ano arakhanti mae mai ma véi amin nain ákona fókesá mai yoran barano. Máan ma esin mi Yisas Karaisi ma mantein avúava san Tiyarafenu aví ara ara avúavá póké daní inten mino. Minó kakhan má ákona vá ben ninan bain ayáká para oriyan banten mino. Mai fura ino.

^d4:1 Rom 6:2, 7 ^e4:3 Efe 2:2-3 ^f4:5 Apo 10:42 ^g4:7 Rom 13:11-12

^h4:8 1Pi 1:22 ⁱ4:9 Ibu 13:2 ^j4:10 Rom 12:6-8

Monó Nanin Bantaí Uven Ma Uman Baran Nain Baya Ino

¹²Téi ma sinunu ukheruna sirona kéka soe, akhenóka yanasinta ano ma siretin aúfin ira ma akheiní iyantiya mai van ída vá enará ukhein danái afoká iyá uno sire akhokho van ono. ¹³^kMáan akhenóka kayo anon Yisas Karaisi ma varein uman má manaí ukhá intiya ínainpáké ma vei kakhán má ma ovaránen eriven amusin in nain damú títetí ankan moéke véin má amusin in nono.

¹⁴^lYisas Karaisin ánain ma yakhafiyasin ma aren asen iyantiya mai siretí ankan amusin mana vá ono. Mai fara vara seyo, Tiyarafenui kakhakhein Aunan manon tiretin má banten mino.

¹⁵Mai ma vanta aruan puré iyainta safi umoyan inta safi aau varanta safi áa enai yoran máden asuse inta safi ma uman baren berai sin nara siya rauno. Ída ino. ¹⁶Yisasin ánain ma yakhafin nonará ma uman baran nona van mi siamiyá umpo ída vá ayave van ono. Tiretin nan ma Karaisini vava ánain bákuriyain nanin banta e ma sen ariyain nará amusin iya Tiyarafenu avisá daní ono. ¹⁷Mai fara vara seyo, vanasi ma yaimin nain damú inka afoká ein Tiyarafenu ano ve akhafana finté naren arái uren daiminten mino. Monó nanin bantafin naren daiminten mifo mai ma Tiyarafenui Kama Vayará ma ída mumunan iyáin nain kéká anon moékan uman baranten mino. ¹⁸Tiyarafenui vompon dókifin máa sikhen mino,

“Puntákein nanin banta ano uman ma mamarantin ínainpáké Tiyarafenu ano aya uren aviranten mifo mai ma Tiyarafenu oo átakharéiyá in nain kéká bá ume nanin banta vá ano ma umampin orintin maen Ti-

yarafenu ano ída uron mi ayainten mino.” *Pro 11:31*

¹⁹Máan tukhanti Tiyarafenui anunu ánain dakhafiya ma uman bariyáke vá puntákein avúavá ana vare oriyáke vá mai ma siretin uvantein Tiyarafenui sá ákona inin kaono. Mai fara vara seyo, véi ma sirein daná ída ífá é iyan mifo minói varé iyan mino.

Monó Doran Kayo Vá Pumara Kayo Vái Vaya Ino

5 Mai ma siretimpin ma vain monó doran banta kayo ma vava siamenté uno. Téi má deren monó nanin bantai yafisin báké Yisas Karaisi ma mantein uman nan banasi siyamiyaruna véi ma ovaránen erin nain damú téi má deren beni amusimpin orékun kákan bí timinten mino. Monó nanin bantará ma yafisin baruna van mi ákona é ina iyá uno. ²^mTiyarafenu ano siretin mai yoran amikhen mifo sipisipi kayorá ma yafisiyain banta an de vá beni vanasirá dafiseno. Mai yorarí iyáke miyan barano vara siya rauno. Ída ino. Tiyarafenui vanasirá dafisin anunu vantiya amusin má beni yoran para varano van mi siamiyá uno. ³ⁿÍda vá betintá ayafaf in dorarí iyákeya siretí yoran pókesá betin kama avúavá aní ono. ⁴Máan tiyaré esin ma sipisipirá dafisin banta kékái Ayafa ma erinti ma veni amusimpin oresin maen kákan bí amiren ayáká para van oriyán ban miyan mi siretin aminten mino.

⁵^oTiretí pumara kéka soe, monó nanin bantará ma yafisin banta kéká ano ma siamin nain baya inire vá mai ánain bákurono. Inká monó nanin banta oe, eyan maman bararasí ure vá ben ayain maran ono. Mai fara vara seyo, Ti-

^k4:13 Apo 5:41; Yem 1:2; 1Pi 1:6-7 ^l4:14 1Pi 2:20 ^m5:2 Yon 21:15-17; Apo 20:28 ⁿ5:3 2Ko 1:24; Fir 3:17; Tai 2:7 ^o5:5 Efe 5:21; Yem 4:6

yarafenui vompon dókifin máa sikhen mino.

“Mai ma au khákan iyain kékái Ti-yarafenu ano oyan amé iyan mifo ará ma varará kaúden bain kékái sarisari uanté iyan mino.” *Pro 3:34*

⁶PMáan ma sikhanti ará bararasí ure vá Ti-yarafenui moékan ákona aránaópá basin ma veni kama yamú ma afoká intin tiretin maman daní ino. ⁷QTiretin amaniná ma afoká é iyain uman pinte mai Ti-yarafenui anon ayaé iyan mifo minó uman béin ná ameno.

⁸RTiretíí namuro mai Van Anon mi váken be ma onan nain arono van raioni an daven báden non mifo véin nará dafían ákona ono. ⁹STiretíí mumunantá ákona ukheya vá béintá dafíke mantaan ákona vá ono. Mai fara vara seyo, siretí an den ma minó akhempá ma mumunan afá aváeyan má ayó má bá ma vain mano sireti ma variyaonaí ukhein uman mi varé iyan mino.

¹⁰Tiyarafenu ano Yisas Karaisin pinté uaren mi vei sarisarifó tiretin o avían

bei ída kípan kakhantá kauken mino. Manáará ma uman o yosiresin mi véi anon tiretin oyampá mantaven evaránen ákona amiranti mantaan ákona ukheya van nono. ¹¹Minó ákona mai ven ninan bain para oriyan banten mino. Mai fura ino.

Pita Ma Vei Vaya Mo Akhení Iyáken Amusin Baya Sein Mino

¹²Ten má ákonaen monó dorarí iyain tifá tiváe ino sé ma inikheruna vanta Sairasi máí siya iká asíka vompon tiretin uvaman amé uno. Inte uman ná tiretin amaniná afoká é iyan nafi mai Ti-yarafenui sarisari ano siretin má bakái ákona uantano van ma vompon uvaré uno. ¹³URomú^{††} barafin ma vain mumunan nanin banta ano vetíi amusin baya kain tiretí ankan baonafá orin inká te sanin an ma yákein banta Makin má deren bei amusin baya kain oren mino. ¹⁴Monó avúavá pókesá ben avábá in maran ono.^{¶¶} Mai ma Yisas Karaisini vanasi vaonafin ná ará kusin banti vano.

^{††}5:13 Romue ma sikhein mai Kiriki vaya finté Babironia en tikhen mino.

^{¶¶}5:14 Kiriki vaya fintéi Ti-yarafenui ma monó tiyain nanin banta ano ma kantasi ukhein amónan maran in póké ma avábá aní iyain nan tikhen mino.

^P5:6 Mat 23:12; Ruk 14:11; Yem 4:10 [¶]5:7 Mat 6:25-30 [†]5:8 1Te 5:6

[¶]5:9 Efe 6:11-13; Yem 4:7 [†]5:12 Apo 12:2, 25; 13:13; 15:22, 37-40

[¶]5:13 Apo 12:2; 2Ti 4:11

PITA MA KAN DÁDASÍEN UVANTEIN BOMPON MINO

(2 Pita)

Pita Ma Kan Dádasíen Bompon Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Pita ino.

Uvarein orana ino.

Pitan aruan purin ádesí iyákan AD sikisti-faiپی (65) fin nafi áa sikisti-sikisi (66) fin nafin uvanten mino.

Ma vompon ma uvantein baru ino.

Romú barurá ino.

Ma vompon ma uvaman amikhein kéká ino.

Mai ma esé uvantein bompompin ma sikhein barafin ma vain monó namun kayofin mino.

Nái ana vará ma vompon uvanten nafino.

Kampun doran banta kayo ano ma nóken Yisasin nan ída Tiyarafenu Anin báken inká ída ovaránen erinten ne ma siyain nan mi vanasi ano yafíben bano van áká ukhen mino.

Pita Ma Amusin Baya Sein Mino

1 Téi Saimon Pita ma Yisas Karaisini aposerí ukhé beni ída miyan ban

dorará iyaruna vanta anon ma vompon uvaré uno.

Yisas Karaisi ma setisi Tiyarafenu vá Tiyain Banta vá báken ma setin maman Tiyarafenu avorá puntákein nanin bantaí urá bátiféku ma setin má manafe funtákein mumunan iyaona kéká baonafái ma vompon uvamádekun oren mino.

²Yisas Karaisi ma setisi Bafan má Tiyarafenu vá bain ma afová ono van esin maen mai Tiyarafenu ano vá bei sarisari vá ará kusin má pókesá tiritin avu uantano.

Tiyarafenui Afova Vayafin Ma Kákaní In Baya Ino

³Yisasin ma oné afová é tifékun maen beni moékakhein ákona ano mai ma funtákein avúaváká ma vano van iyá tiferuna yanasinta siminten mino. Bei khakhan má kama avúavá bá barano van mi setin tarakhen mino. ⁴Bei kákan bí bá kama ukhein avúavá bá pinté uaren móeken ma kama ukhein avúavasí usintano van mi setin iyátintan baren mino. Mai ma namu avúavasí in tinunu ano ma setin eúkuádá bá tiferuna finte me ampiren beni kama avúava sinta variyan ben an dakhen bano van mi iyátintáken mino.

⁵Máan tukhanti mai ma iyántan bain danasinta ma varano vará ayampaí ureya vá tirití avúavápin maman kaono. Máan ma esin mi siretíi munampin kama avúavá asotú uanten inká kama avúavápin Tiyarafenu van ma anunu in afova asotú uantanten mino. ⁶Inká mai afovafin e aurá ma kamaen dafisin avúavá asotú uanten maen umampin ma mantaan ákona in avúavápo aurá ma yafisimpin asotú uantanten mino. Inká umampin ma mantaan ákona uven ma Tiyarafenui avúavá ánain bákurin má asotú uantanten mino.

⁷Inká Tiyarafenui avúavá ánain ma vákurimpin afá aváen nan ma anunu in avúavá asotú uanten maen inká afá aváe ma anuimpin minó nanin banta van ma anunu in avúavá bá asotú uantanten mino. ⁸Mai avúava sinta ma moéke varesin maen mai anon tetisi Bafan Yisas Karaisin ma afová inonafin moéken aran iranten mino. ⁹Máan tinten mifo mai avúavá ma ída afova varyain kékái auu yufúkein an dakhán ída kamaen oniyán mino. Ume avúavá pinte ma Tiyarafenu ano yo sesé uren avúkein mai me áuntén mino.

¹⁰Máan tukhein nará mumunan tiyofi sifá tiváeyan noe, siretí ankan ákona e yoresin ná tiretin nan pura sen Tiyarafenu ano ma araren bei naí ukhein kékápin ban mino sen ná afová ino. Mai fara vara seyo máan ma inteya ída kanaíeya erave ankamin nono. ¹¹Máan ma esin mi Tiyarafenu ano setin Tiyain Bafan Yisas Karaisini fara van oriyán ban dafisin barufin ma orin ona yiantanten mino.

Monó Dóki Finte Vaya Ma Avovéen Inin Baya Ino

¹²Tiretí ankan pefái fura sikhein avúavá afová ureya mantaan ákona ukhe ompo me áuninona van pasé para e siamé oriyá bano van mi inikhé uno. ¹³Téi ma ída furin ma ma vukhafa vá para vanté maé mai vaya kayo fara siretin e siamé oriyá bano van mi inikhé uno. ¹⁴^wMáan tiyá umpo setisi Bafan Yisas Karaisi ano séi ma ma varará bannuna yamú inka aní íká afová ukheruna ída ayáká bákéi furonté uno. ¹⁵Máan tukhein nan mi séi ákona yorará ékuya mai yanasinta afová ukhare ínaimpáké ma fúbéku mae mai yanasinta van para ineine eya oriya vano van muno.

¹⁶^xMai fara vara seyo, setisi Bafan Yisas Karaisini ákona vá beni ovaránen erí pákena vaya kayo ma siyaruna mai ída vantai inintá tiyá umpo seti suu fóké ma fura sé beni ákona onteruna van mi siyá tiféuno. ¹⁷^yPara vara seyo seti Sifóe Tiyarafenu ano ma inaru fáké ákona oovaraádan eriyán maen máa sikharen, “Ma sen sanin téi moeké tinunu ukheruna iyampon mi vakái, véin nan moeké timusin uantiyá uno.” Máa ma sein manon moékan ákona ma vain Tiyarafenu pinte kákan bí bá kakhán ákona vá baren mino. ¹⁸Kantásí ukhein anu yontá ma véin má un bákéi setiyantá mai vaya inékun inaru fáké oovaraádan eren mino.

¹⁹Mai van mi sakhanampa vanta kékái vaya kayo ano sian amá ukháí afová ukhé tifé umpo vetí ankan ma uvamádan bain baya kayo vasá avové ureya ineno. Mai fara vara seyo, vetíi vaya ano yunteimpin ma kakhaan teiníi iyantiya oriya varé esin mi ínaimpáké ma Yisas Karaisi afoká inain damú beni moékan kakhán manon aúpin kakhaan tantén mino. ²⁰Ma furán tiyá umpo sakhanampa vanta kayo ano sakhanampa vayái ono vara vetíi inin pinté Tiyarafenui vompon dókifin o véden tíádan ban naino. Ída ino. ²¹^zMai fara vara seyo, Kantá Aunan manon ákona amiyákan Tiyarafenu ano vetin pinté uaren baya sikhén mino.

Kampun Afova Amiran Ma Uman Afoká É Iyai Pákena Vaya Ino

(Yuti 4-13)

2^aMáan tukhén mifo fefá ma Isareri kékápin kampun sakhanampa vanta kayo varé einíen mi siretimpin kampun arú kayo ano afoká inten mino. Mai kéká anon Tiyarafenu ma sikhein baya yo vaéden maen betíi ineinefó

ena nanin banta aúpáké afova aminten mino. Máan tiyáken betin ma miyaní uren ma minó dafisiyain Bafan me oyan aminten mino. Máan ma inain manon betí amaniná ainen uman o maman kain-ten mino. ²Máan ma iyantin kokhon nanin banta ano vetíí namu avúavá ánain dakhafiyáken Karaisini fura vaya ma maman paen danasí uren maen ayave amin aváuvá banasí avorá maman dákó inten mino. ³Máan tiyáken betíí ineinerá kampun baya fóké pura ma seiní uren tiretíí moniká dafiseno van inten mino. Máan inten mifo Tiyarafenu ano ma vetin kó tiantáden uman ameno sikhá ein damú pefái aní ukháin inka eriyain betí ankan uman baranten mino.

⁴^bMai fara vara seyo, enisori kéká ano ma umeí uran maen Tiyarafenu ano vetin ída avo uanten mifo sítípa ukhein don aimpin kain orun báken mi vetin ma kó tiantan nain damu san ave ukhen mino. ⁵^cInká pefá Noani yamú dere Tiyarafenu ano ume nanin banta ída avo uanten mifo Noan má dan manápá ifo afápá kan un kádan bei kéká bá máa anan avo uantein mino. Tiyarafenu ano ma funtákein avúavá póké ma vanasi yaimináí pákena vayan Noa ano siamiyaren mino. Mai oyampákéi Tiyarafenu ano á dan eraáken non taven maen beni vaya ma átakharé iyá ein kéká ufurin puren mino. ⁶^dÍnaimpákéi Sodomu vá Komora vái kákan baru kayo ira saman kaúden kasí o éke e éke uren ma vara rákena yo fútian karúdein mino. Ume nanin banta amaniná ma ínaimpáké kain nain mai avúavái vetí ankan amaniná aní ukhen mino. ⁷^eMáan ten mifo maí damú ana Roti funtákein banta váken ume avúava san aí pefe iyan berai siyaré íkan Sodomú barurá ma afoká ein uman pintena Tiyarafenu ano véin aya uren

aviren mino. ⁸Mai véi funtákein bantai váken pasen namu avúava sinta ma ena ena yamú afoká iyákan ma onen inen iyan maen kákantá berai siyaren mino.

⁹Máan tukhantiya afovasá ono. Bafan mano afová ukhein mi máan uman pinta ven ánain ma yakhafiyáin nain kéká kasaen aya uren aviranten mifo mai ma ume avúavá bariyáin nain kékái uman amen oriyantin daimin nain damú afoká inten mino. ¹⁰^fBafan mano mai ma vetíí anunu ánain dakhafen namu avúava sinta variyáken Tiyarafenui vaya átakharé iyáin nain kékái moékakhein uman aminten mino. Máan nanin banta ano au khákan iyáken ída ma ena van inin avúavá bá bákan mi kasaen inarufá ma kantasí ukhen khakhan má bain aunan kayo van ída feranton betin nan tiren inté iyan mino. ¹¹^gMáan té iyan mifo mai ma kampun afova amé iyain kéká ma esantakhan ákona vá bain enisori kayo vá dere ano ída máa sen kantasí ukhen kakhan má báken ma Bafan avóra bain aunan kayo maman bararasí uren tiren intikhein mino.

¹²^hMai ma kampun afova amiyain kéká ano ída ma ineine vain uraran má afá tafúna kayo vá ano ma arin daná baimpin ma amúkuven orein an mi yiyan mino. Mai kéká ano akhokho amin ákona ma sító máará afová ukhein nan mi siren intiyain betin má deren aruan kípanten mino. ¹³Betí ankan ma namu avúavá bariyaré inain tákena mai namu miyan manan baranten mino. Betí ankan dákó ma namu avúavasí in nan mi moéken anunu iyáken tiretin kákan ayave maman amé iyan mino. Mai kéká ano ma siretin má manafin dunan niyai páké ma siretin máká maaká iyain manon mai omá máden asuse uren mi ayave amiyain mino. ¹⁴Betí

^b2:4 Yut 6 ^c2:5 Esé 6–8; 2Pi 3:6 ^d2:6 Esé 19:24; Yut 7 ^e2:7 Esé 19:1-16
^f2:10 Yut 7-8, 16 ^g2:11 Yut 9 ^h2:12 Yut 10

ankan ira yoren nóken auu fóké ma fara oniyaintá ina famúku avúavasí iyan mifo mai avúavá ano ída ayoé iyan mino. Betí ankan kama yanasinta fóké íú an daren ída ma mumunan ákona ukhein kéká mamádan umefin eraven ankamiyan mino. Máan tiyáken beyan nan mana iniren ma ída ena van inin avúavá ákonaen bariyain mai kéká ano moékan uman baren namu uron inten mino. ¹⁵ⁱBetí ankan puntákein avúavá me ifá uren mai ma Beorin anin Bara-mun an dé namu avúavái miyen barano van mi anunu iyaren mino. ¹⁶^jBaramu ma namu avúavá bariyaréin maen banta ano ma vaya seiníen bei yonkin mano véin asiran mi mai ma óen banta ano ma variyain avúavá ma variyá ein me am-pen mino.

¹⁷^kMai kéká ano ainen mo káné iyain non an den inká uva ano ma e avéken mo asuse iyain konan an dakhen mi veti ma sirein danasinta ída funtáden baré iyan mino. Mai kayoi nan kákantá tí-tí-paen ma kumayusí ukhein baru útaan kaúantan ban mino. ¹⁸Betí ankan ída mana yanasí inái páké be amo ana siren au khaiyan banten mino. Pamúku avúava san maman kama yaná an daren maen moéken anunu iyáken mai avúavá pinté ma asare me ampiren eriyain kéká mamádantin evaránen eraven ankam-inten mino. ¹⁹Betí ankan ten kama e kuse van nono sinten mifo umei miyan ída van doran bantan báken betí moéken namu uron en asuse ukhen mino. Mai fara vara seyo, mana vanta ano ma ántin mana yaná ano véintá dafisinti mae mai yanái miyan ída van doran bantaíi inten mino. ²⁰^lInká banasi ano ma namu avúavá me ampiren setisi Bafan Yisas Karaisin ánain dakhafiyare

ma evaráne ume avúavái miyan ída van doran bantaí ma inten maen mai fefá ma namu avúavá bariyaré ein esantaren namu avúava suron mi varanten mino. ²¹^mKantasí ukhein man baya ma veti ankan amikhein ma ódaren me oyan amiyain mai funtákein avúaváká ma van aa ída afová en baré intin kama uron mi inainten mino. ²²Mai kayo van mi minó nanin banta ano sikharéin mi fura sen afoká en mino. “Iyan mano mun biá-daren evaránen nanten mino.” *Pro 26:11* Inká “Non peádan pon mano evaránen ápópín o vaven típon ananten mino”.

Bafani Yamú Inka Eriyan Mino

3 Téi ma sinunu ukheruna sirona kéká soe, siretí ankan evaráné tiaméku mai ma siameruna vaya van ovare me inesin mai ano kama ineine amino van mi kan dádasíe ma vompon uvamádékun tireti vaonafá oren mino. ²ⁿKantasí ukhein sakhanampa vanta kayo ano ma fefá tikharé in ma inká tetin Tiyain Bafan mano ma aposeri kéká pinté uaren ma ákona vaya siamikheini ana vaya ovare me afová ono van mi siyá uno.

³^oEsé arái in daná ma siretí ankan evaráné tiamenuna mai ma vara ma mo kípan akhempá pura vaya van ma siren intin kéká ano siren intiyáken betíi anunu ánain dakhafen namu avúavá barano van inten mino. ⁴^pMai kéká ano máan mi sen anona vaya sinten mino, “Yisasi ma ovaráné ereno van ma sikhá ein mai intesí eriyain nafino. Ma vara ma afoká ein táké mai vaya anan o sen eriyain mifo minó daná ano vaintá anan para van mino.”

⁵^qTiyarafenui vayará ma ayon afoká uádaren ma inká non pinté bara afoká uren non póké eúkuádan bain ma san

^l2:15 Nam 22:7; Yut 11; Rev 2:14 ^j2:16 Nam 22:28-35 ^k2:17 Yut 12-13

^l2:20 Mat 12:45 ^m2:21 Ruk 12:47-48 ⁿ3:2 Yut 17 ^o3:3 1Ti 4:1; Yut 18

^p3:4 Mat 24:48 ^q3:5 Esé 1:6-9

betí ankan áúden ída ovaren me iniyan mino. ⁶rMáan turákaren mai nompói ma vara máden namu uren asuse ein mino. ⁷Inká Tiyarafenu ano evaránen ákona vaya sikhen mino. Banasii avúavá ma yaimin nain damú inaru vá bara vá ira saman kauriyáken Tiyarafenui vaya ma átakharé iyain nanin bantan uman aminten mino.

⁸sMáa sikhen mifo séi ma sinunu ukheruna sirona kéka soe, ída vá áun nono. Bafan avorá mana tauseni (1,000) orana ano maná damú an mi yakhan inká maná damú ano mana tauseni (1,000) orana an mi yakhen mino. ⁹tManáa nanin banta ano ma iyainien Bafan mano sirein dana san ída vempáké doré iyan mino. Ída ino. Tiretin nan mi iniren máan tiyan mino. Mana ano ída uman barano van mi inikhen mifo ará baerano van béi ayáká para ave ukhen mino. ¹⁰uMáan tukhen mifo Bafan ma erin nain damú ída afová esin umoyan banta an mi yanten mino. Erintin maen inaru ano akhokhofarién uu aruaren mo kípiyantín maifin ma varé inain danasinta ira ano khaan kaurintin maen inká bara vá maifin ma vain danasinta vá dere ira khaan kaurinten mino.

¹¹Minó danasinta ma eúkukhein mai ira ano khaan kaurinten mifo kantasí ukhe vá puntákein avúavá ana variyan ban nanin banta vá bano. ¹²Máan ma iyákeya mai ma Tiyarafenu ano afá ira fóké ma minó danasinta saman kaurin nain damu san aine ereno sire vá ineine iya vano. ¹³vMáan tin nampo mai ma ayuen bara vá inaru vá ma iyátintan

bákan ma funtákein nanin bantai varu ma vain nan mi ave ukhé tiféuno.

¹⁴Máan tukhein nará téi ma sinunu ukheruna sirona kéka soe, mai yanasinta ma afoká inain nan ma ave ukhanteya mai minó danápin ma funtáke vanona avúavasá bariya vá Tiyarafenu vá kuse vano.

¹⁵wBanasí ano ída o afeyorano van mi Bafan mano ave ukhen mifo afovásá ono. Mai van mi seti ma sinunu ukheruna sífá tiváe Pori ano Tiyarafenu ma amein afova fókéi siretin bompon amikharen mino. ¹⁶Béi ma uvantein bompon kayofin ma onesin maen máan danasinta kayo van manan tikhen mino. Béi ma uvantein bompon kayo ma onante manáa uman dakhanti maen inin ma ída kama ukhein kéká anon mai vaya vaéden ena yanáká tíadiyan mino. Ena vompon dóki kayofin dere máan avúavá anan bariyákan mai ano uman manan o maman afoká iyan mino.

Pita Ma Kípan Baya Sein Mino

¹⁷xTéi ma sinunu ukheruna sirona kéka soe, siretin pe o útúbé amaan baya siaméku afová ukharé esin maen namu nanin bantai avúava sinta ano sirtíi inin ída máden asuse intiya ákona e ma mumunan iyaona ída me ampeno van muno. ¹⁸Máan tin nampo setin ma Siyain Bafan Yisas Karaisin ma anunu ukhein tarisari vá afova vasá e inorano.

Béimpin ná minó kakhan má aví ma yaní in avúavá bá ano saréa váken ná para van oriyan bano. Mai fura ino.

^r3:6 Esé 7:11; 2Pi 2:5 ^s3:8 Íbo 90:4 ^t3:9 Aba 2:3; 1Ti 2:4 ^u3:10 Mat 24:29, 35; Ruk 12:39; 1Te 5:2 ^v3:13 Ais 65:17; 66:22; Rev 21:1, 27
^w3:15 Rom 2:4 ^x3:17 Mak 13:33; 1Ko 10:12

YONI MA ESÉ ARAÍEN UVANTEIN BOMPON MINO

(1 Yoni)

Yoni Ma Esé Bompon Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Yoni vei furi ádesí ukhan ma uvarein minon ten manáa afova vanta kéká iniyan mifo ída mana vanta ano fura sen afová ukhen mino.

Uvarein orana ino.

AD nainti (90) ráké mana antareti (100) ráké mai aúban mino.

Ma vompon ma uvantein baru ino.

Esiá barafin ma un non akhempá áau orun perápá ma vain baru Efesasí ino.

Ma vompon ma uvaman amikhein kéká ino.

Efesasí ma vain monó namun má Esiá barafin ma vain monó namun kayo vá inká minó akhen pá ma vain monó namun kayofin mái uvamádan oreraen mino.

Nái ana vará ma vompon uvanten nafino.

Minó akhempá ma monó tiyain kéká ano ma Yisasintá mumunan iyan ma kamaen ban avúavá ma varan nain má

inká pefá ma Yisas Karaisini kama vaya siamikhá ein ma san mi sian amá ukhen mino. Ma vara ráke avúavá bá inká kam-pun monó doran banta kéká bá avúavá ba san mi ma vompon ma yankafin nain kayo afova amikhen mino. Inká ena avábá uantan ma kákaní ukhein nan tian amá iyáken mi Tiyarafenu ano ma setin avábá usintiyain oniyáké maé mai vará ben aya ven aya vá onon tikhen mino.

Ayun Ma Fara Van Oriyan Ban Baya Ino

1 ^yMinó danasinta ma ída afoká ukhan ma varé ein mano setin má baya siyáká beni Vaya iniyáké oné tiféuno. Béi Yisas Karaisin báken Ayun Ma Fara Van Aunan mi varé íká béin oniyáké aruvé tiféuno. ^{2z}Pefá mai Aunan manon be Afóen má manafin baré íkan béin mamán dáko urá purasé onteruna van mi ayun para van aunan mi véi van mino sé tiretin tiamiyá uno. ³Tetí ankan ma fura sé ódaré inikhé tiferuna yana san mi eresí manafin átaru uvé monó teno van tiretin tiamiyá uno. Manafin ma átaru uvé monó té tifanuna mai ve Afóen má be Anin Yisas Karaisintá báí monó tiantá tifanté uno.

^{4a}Tetí ankampin moéken timusin bíkano van mi ma vompon uvaman amiyá tiféuno.

Tiyarafenui Kakhantá Ma Van Baya Ino

^{5b}Ma vaya vá tiretin nan tiameno siren ma véi sisimikhá ein bayan tiretin tiamiyá uno. Tiyarafenu mai kaxhan mi vákan béimpin ída sítípa van mino. ^{6c}Máan tukhantíi setí ankan ma manafin átaru uvé Tiyarafenu vá monó tiyá uno siré ma yuntein avúavápin para vá tifanté maé mai kampun mi siré ída

fura sikhein avúaváká nó tiféuno. ⁷Máan tiyá tifé umpo Karaisin an dé ma Ti-yarafenui kakhakhein avúavápin ma vá tifanté maé mai véin táí manafin átaru uvé monó tiyá tiféuno. Máan tiyá tifékun maen be Anin Yisasini nare ano setinti ume yo sesé usinté iyan mino.

⁸^dTetí ankampin ída ume van mino ma sé tifanté mai setiyan mi máká máaka iyá tifékun pura sikhein avúavá ano setimpin ída van mino. ⁹Máan tukhen mifo setisi ume ma sian amá uan béin amé tifékun maen béi ma sikhein ánain dakhafen mi setinti ume yo sesé usintáden puntákein avúaváká kainten mino. ¹⁰Tetimpin ída ume van mino ma sé tifanté mai Ti-yarafenu van mi kampun banta ino siyá tifékun mai avúavá anon beni veya van tetin túpin ída van ne sen aní iyan mino.

Yisas Karasin Ma Fura Sen Afová In Baya Ino

2^eTéi ma sinunu ukheruna iyampor-inta oe, siretí ankan ída umeí ono van mi ma vompon uvaman amiyá uno. Mana ano ma umeí inteja mai mana vanta váken mi setisi ume ampisintano van Ti-yarafenu tiamiyán ban mino. Béi Yisas Karaisi Ti-yarafenu avorá puntákein bantan ban mino. ²^fBéi anon tetisi ume van be au fóké ákonte ukhen mino. Máan turen tetisi ume ana ída yo sesé ukhen mifo minó barafá ma vain nanin bantai ume vái yo sesé ukhen mino.

³Máan tukhen mifo inté uresá beni nan bá uno sé afová ótifante rafuno. Beni man baya khayó ánain ma vákuró tifanté mai anon beni nan bá uno sé afová ó tifanté uno. ⁴Mana vanta ano

ma séi Ti-yarafenu afová ukhé uno siren ma veni man baya ánain ma ída vákurinten maen mai véi kampun bantan bakan pura veya ano veimpin ída van mino. ⁵ḡMáan tukhen mifo fura sen ma Ti-yarafenu van anunu ukhein kéká anon beni veya ánain dakhafiyán mino. Máan ma onté tiféi mai véin masá o súpá ukhe rafu áa ída fi sé afová ó tifanté uno. ⁶Ti-yarafenu vá manafin bá uno ma sin nain kéká ano vá Yisas Karaisi ma varé ein avúavá kasá bano.

Auyen Man Baya Ino

⁷^hTéi ma sinunu ukheruna sirona kéká soe, ma auyen man baya va siretin uvaman amiya rauno. Ída ino. Mai fara vara seyo, ena vá ma avábá in maran ná ono ma sikhein man baya ma arafintá amikhaya o ine eriyá eona fákena vompon mi uvaman amé uno. ⁸ⁱMáan té umpo mai ma fura sikhein avúaváká ma Yisasín má tiretin má baonarái ven avábá in maran ná ono ma sen peyante man baya ano sikharé ein mai anon tiretimpin auyení ukhen mino. Mai fara vara seyo, sítípa ano inka e kípiyan mi fura oon mano yáko uven kakhaan tiyan mino.

⁹^jMana vanta ano ma siyáken, “Téi kakhán aúpin bá uno,” ma siren monópin bain afá aváeyan ma safi ayofin ná ba safi ma ará uman daan tiyantén mai véi sítípa fin para van mino. ¹⁰^kIye anó ena monó nanin banta van anunu inten nafi mai véi kakhán aúpin mi váken betin ída mamádantín eyúpóen ankaminten mino. ¹¹^lMáan tintén mifo mana ano ma monópin bain afá aváeyan nafi ayofin nafi ma ará namu uantanten mai sítípa yaná

^d1:8 Íbo 32:5; Pro 28:13 ^e2:1 Ibu 7:25-26

^f2:2 Yon 1:29; Kor 1:20; 1Yn 4:10 ^g2:5 Yon 14:21, 23

^h2:7 Yon 13:34; 2Yn 5-6 ⁱ2:8 Yon 1:9; Rom 13:12 ^j2:9 1Yn 4:20

^k2:10 Rom 14:13 ^l2:11 Yon 12:35

ano véin auu yufúkuádan kufan ukhen mino.

¹²Téi ma sinunu ukheruna iyampon kayo oe,

Yisasi ma varein avúavá anoi siretí ume arúantáká mai van mi ma vompon uvaman amiyá uno.

¹³Monó bayafin ma karakheona nanin banta oe, esé aráfen ma minó danasinta afoká ein bantan Yisas Karaisin báká tirtí ankan béin afova suron ukhen náí ma vompon uvaman amiyá uno.

Auyen nanin banta oe,

Ban Anon má aruvúde véin maman bararasí ureya ven esantakhen náí ma vompon uvaman amiyá uno.

Téi ma sinunu ukheruna iyampon kayo oe, inarufá ma vain Afóen pefái afová ukhen ná ma vompon uvaman amiyá uno.

¹⁴Monó bayafin ma karakheona nanin banta oe,

esé aráfen ma minó danasinta afoká ein bantan Yisas Karaisin bákái siretí ankan béin afova suron ukháen náí ma vompon uvaman amé uno.

Auyen nanin banta oe,

Tiyarafenui vava maman ákona ure aúpin denan baréi

Ban Anon maman bararasí ureya véin esantakháen náí ma vompon uvaman amé uno.

Bararáke Avúava San Ma Ída Anunu In Baya Ino

¹⁵^mMa vara vá maifin ma vain danasinta vá ída vá anunu ono. Mai fara vara seyo, ma vara ráke avúava san ma anunu iyanteya mai Afóen nan ma anunuin ída éimpin bain mi aní iya ono. ¹⁶ⁿMai fara vara seyo, ma vara ráke avúavá anon ará mantaya ena ina yana san anunu iyákeya

au khákan in avúavá maman afoká uádé iya ono. Mai avúava sinta ano ída Sifóen pinté erikhen mifo ma vara finte yanasintan afoká iyan mino. ¹⁷^oMa vara vá maifin ma vain danasinta vá ano inka mo kípiyan mifo Tiyarafenu ma anunu ukhein avúavá ma varan nona kéká anon ayun para va oriya van nono.

Yisas Karaisini Namuro Kayo Van Ma Amaan Tikhein Baya Ino

¹⁸^pTéi ma sinunu ukheruna iyampon kayo oe, ma vara ma kípan damú inka afokáen mino. Pefá ma siretí ankan inen nan ma Yisas Karaisini namuro erinten ne ma siyaré ein mai inka kokhoná afoká ukhen mino. Mai yaná ma oniyá tifesá ma vara ma kípan damú inka afokáen mino sé tifano. ¹⁹^qMai vanta kéká ano setin má baren mifo vetí ankan ída setin tinan báken mi monó pinté me ampiren orikhen mino. Mai ma setin me ampinyain avúavá anon enina ída vá uno sen aní iyan mino. ²⁰^rMáan tiyan mifo siretí ankan ída vetin an dakhaono. Mai fara vara seyo, Kantá Aunan mano siretimpin bákayai fura ma sikhein baya afova suron ukha ono. ²¹Máan tukhen náí siretí ankan nan pura vava ída afová ukhen mino va sé iniresa ma vompon uvaman amiya rauno. Ída ino. Tiyarafenui fura vava kayo vá kampun baya kayo vá ano ída manafiní ukhá pasé mai vava afová ono van mi ma vompon uvaman amiyá uno. ²²^sIyé kákan kampun banta van nafino. Mai ma Yisasin nan Tiyarafenu ano vei vanasi evaránen avirano van ma aní ukhá ein banta va ino ma siyain kéká anon Yisas Karaisini namuro van mino. Mai fara vara seyo, máan kéká anon be Afóen má be Anin má ída afová ukhé uno siren namurói

uanté iyan mino. ²³Mana vanta ano ma ve Anin nan ída afová ukhé uno ma sinten mai véimpin ída ve Afóe vanten mifo iye anó be Anin nan tian páman inten nafi mai véimpin mi ve Afóe vanten mino.

Kantá Aunan Mano Ma Afova Amiyain Baya Ino

²⁴Máan tukhein nan mi mai ma esé araíe ma inikharé eona vava vá pákaan ákona ono. Máan ma inteyan be Anin má be Afóen mápin o súpá ukheya van nono.

²⁵Máan ten ma setin má manafin bantí maéi mai ma Yisas Karaisi ano ma ayun ma fara van oriyan ban aunan ma iyát-intákaré ein mai simusin má bará tifanté uno.

²⁶Mai ma siretí ankan kampun tiré e avían namu avúavápin kaono van ma iyain mai kéká afová ureya ferano van mi ma vompon uvaman amé uno.

²⁷^uTiretí ankan inka Kantá Aunan manten nan tiretimpin bákayai ena ano fura vava siretin ída afova amino van mi iniya ono. Mai fara vara seyo, Kantá Aunan mano siretin minó afova amiran mai fura vayan ban mino. Mai ma Kantá Aunan mano siamein baya ánain para vákure oriya vá inká Yisas Karaisin masá túpá ukhe vá oriya vano.

Tireti Tiyaarafenu Akhafanan Ba Ono

²⁸Téi ma sinunu ukheruna iyampon kayo oe, saréa vá Yisas Karaisin má manafin túpá ukheya mumunan iyaré esin ná béi ma ovaránen erin nain damú ída ayave van ina mantaan ákona ono. ²⁹^vTiarafeñui funtákein avúavá ma afová ukhante mae mai ma funtákein avúavá ma variyain kayo van afová eya ven akhafana inon tin nono.

Tiarafeñui Akhafana An Dakhen Ma Van Baya Ino

3^wTiarafeñui ano vei anunu moéken tetimpin banaráken te sikhafana oe sen tariyá mai fura sé ben akhafanan bá tifeuno! Máan tukhé tife umpo varará nanin banta ano Tiarafeñui ída afová ukhen pasen mi ven akhafana ma vá tiferuna mai ída afová ukhen mino. ²^xTéi ma sinunu ukheruna sirona kéká soe, inka setí ankan Tiarafeñui akhafanaí ukhé tifeuno. Yisas Karaisi ma erin nain damú inté ukhein bukhafa vasá bá tifante rafu mai ída afová ukhé tife umpo véi ma erin nain damú fura sé ben an davé tifekun mi mai ma vaintá béi fara vantí oná tifanté uno. ³Mai van ma mumunan in nain kéká anon Yisas Karaisi ma avusese ukhein an den avusese ukhen banten mino.

⁴Umeí ma iyain nanin banta anon Tiarafeñui man baya yurafuriyan mino. Mai fara vara seyo, ume avúavá ma variyain mai Tiarafeñui man bayan durafuriyan mino. ⁵^yYisas Karaisimpin ída ume vákan mi setisi ume yo arúntano van béi erikhayai siretí ankan afová ukha ono. ⁶Máan tukhantin béin má ma van nain nanin banta ano ída umeí iyan banten mino. Inká ume avúavá ma varen oriyan bain kayo ano véin ída afová en onten mino.

⁷Téi ma sinunu ukheruna iyampon kayo oe, ída vá áesin manáa kéká ano siretin mákáden tavifá aviren orino. Yisas Karaisi funtákein bantan bakan ben an ma yákein nanin banta anon puntákein avúavá ana varé iyan mino. ⁸^zMáan tiyan mifo vanasi ano ma fara umeíen oriyan banten mai ma araíintá umeí ukhein bantan Ban Anon bakan

^t2:23 Yon 5:23; 1Yn 4:15; 5:1 ^u2:27 Yon 16:13 ^v2:29 1Yn 3:10

^w3:1 Yon 1:12-13; 16:3 ^x3:2 2Ko 3:18

^y3:5 Yon 1:29; 1Pi 2:22-24; 1Yn 2:2 ^z3:8 Yon 8:44

mi veni kékái vá uno sen aní iyan mino. Máan tiyan mifo Ban Anoni yoran ma varé ein morun asuse ono van mi Tiyarafenu Anin mano eren mino. ^{9a}Tiyarafenui kékápin ma afoká ukhein nanin banta ano veni avúavá báí váken ída umefen oriyan bá é iyan mino. Tiyarafenu pintéi afoká ukhen pasen betí ankan ída umefen oriyan banten mino. ¹⁰Máan tukhanti inte kékasá Tiyarafenu ina van ná inká inte kékasá Ban Anon nina van nafi mai saréan afová ó tifanté uno. Tiyarafenui man baya ánain ma ída vákuren ma inká afá aváen nan ma ída anunu iyain kéká mai ída Tiyarafenu akhafana ino.

Ena Vá Ma Avabá In Maran In Baya Ino

^{11b}Esé arafintá ma inikharé é tiferuna vaya mai ena vasá avabá in maran onon tikharen mino. ^{12c}Keni ma Ban Anoni kékasí uven ma ve afá aruan purein an ída vá dá tifano. Mai fará béin aruan puren nafino. Mai fara va ino. Keni namu avúavá bariyan maen be afá ano fun-tákein avúavá bariyaréin pasen mi máan ten mino. ^{13d}Máan tukhein nará mumunan tiyofi sifá tiváeyan noe, varará nanin banta ano ma siretin namu uantantiya mai van ída vá anú duman duman ono.

^{14e}Mumunan tiyofi sifá tiváeyan ma avabá ó tifanté mairái furin pinté esanté para ma ayun ban oriyan ban aunampin oré uno sé afová ó tifanté uno. Máan ó tifanté umpo avabá in avúavá ma ída vain kéká ano fara fúken ban mino. ^{15f}Mana vanta ano ma monó nanin banta ma namuroí uanté iyain mai vetin mi aruan puriyan mino. Banta ma aruan puriyain kékápin mi ayun ma fara van aunan ída váka siretí ankan afová

ukha ono. ^{16g}Yisas Karaisi ma ve aunan tetin timikhein mai fura avábái vá tetí ankan afová ukhé tiféuno. Máan ma ukhein nará teti siyofi sifá tiváen naro siré tetisi saunan má dere vá ampiadá tifano. ^{17h}Máan tukhen mifo mana vanta ano ma kokhon danasinta kaúdáken ma amusin iyantin ma ve afá aváe ano manáa yana san ma o afasí ukhantin ma ída aya inten mai inté uren ná Tiyarafenui avábá ano mai vantafin banten nafino.

¹⁸ⁱTéi ma sinunu ukheruna iyampon kayo oe, setí ankan ída vá bayafó ana ena avabá iyá uno sé tiban numpo sivú-tivá pókesá pura sé aní ó tifano. ¹⁹Pura sikhein avúavá ánain mi vákuriyan mino sen tetisi sivú-tivá anon aní intíi afová iyáké ída feranton kasaé Bafan avorá o mantá tifanté uno. ²⁰Máan tiyákun maen tetin tú bá inin má ano ma ume nanin banta ono sen tisimiyantí maé ída feran kasaé ben avorá o mantanté uno. Mai fara vara seyo, Tiyarafenu ano setin tú bá inin má esantakhen pasen pefái minó afová ukhen mino.

^{21j}Téi ma sinunu ukheruna sírona kéká soe, setin tú bá inin má ano sisi-men ma ída umeí ukha ono ma sin nain manon ákona simintí ída feran kasaé Tiyarafenu avorá o mantá tifanté uno. ²²Mantakhé oo yayiyáké béi ma amusin ukhein danasinta anan bariyá tifékun pasen mi inan ma senuna yaná kasaen timinten mino. ^{23k}Béi ma sikheiní esá ben anin Yisas Karaisin aviká mumunan iyá ena nanin banta vasá avabá in maran ó tifano. Máan ma in avúavái veni man baya van mino. ^{24l}Tiyarafenui man baya ánain ma vákuriyain kayo anon béin má manafin bakan inká béi vetin má ban mino. Kantá Aunan ma setin timikhein

^a3:9 1Yn 5:18 ^b3:11 Yon 13:34 ^c3:12 Esé 4:8 ^d3:13 Yon 5:18-19

^e3:14 Yon 5:24 ^f3:15 Rev 21:8 ^g3:16 Yon 13:1; Kar 1:4 ^h3:17 Diu 15:7

ⁱ3:18 Yem 2:15-16 ^j3:21 Ibu 4:16 ^k3:23 Yon 6:29; 13:34 ^l3:24 1Yn 4:13

manon aní íkái Tiyarafenu ano setin má ban mino sé afová ukhé tiféuno.

Kampun Sakhanampa Vanta Kayoi Vaya Ma Yaíden Afová In Baya Ino

4^mTéi ma sinunu ukheruna sirona kéka soe, Kantá Aunan manon ákona simiyá baya siyá uno ma siyain kéká mai Tiyarafenu fintesá mai aunan erikhan ná tiyan nafino van daíde afová ure vá munun ono. Mai fara vara seyo, kokhon kampun sakhanampa vanta kayo ano ma varará orera ukhen mino. ²ⁿYisas Karaisin nan ma sian amá iyáken barará bantaí uven mi afoká ukhan mino ma sin nain sakhanampa vanta van mi Tiyarafenui Aunan mái van mino seya afová in nono. ³^oMáan tin nompo Yisas Karaisin nan ma ída máan baya sin nain banta mai véi ída Tiyarafenu vaípáké erikhen mino. Máan banta van mi Yisas Karaisin ma namuroí uantan aunan má ma varará afoká inten ne sen pefá tiami inikharé en nan mai vanta inka e van mino.

⁴^pMáan tukhen mifo séi ma sinunu ukheruna iyampon kayo oe, siretí ankan Tiyarafenu inan bákeya mai ma kampun sakhanampa vanta kéká bá ma aruviyá eona inka vetin esantakha ono. Mai fara vara seyo, siretí ankampin ma vain Aunan manon ma varafin ma vain aunan esantaren kákaní ukhen mino. ⁵^qMai ma Tiyarafenui fura vayan tiamiyá uno ma siyain nanin banta mai ma vara rákena kékái váken ma vara rákena afova fói vanasi siamíkan iniren mai vaya ánain bákuriyan mino. ⁶Máan tiyan mifo setí ankan Tiyarafenu inan báken mi véin ma afová ukhein kéká anon tetinti vaya iniyán mino. Inká Tiyarafenu ina ma ída vanten mai seti ma siamenuna vaya

ída ininten mino. Máan ma in nain avúavákái ma fura Aunan mái van mino sé inká ma kampun aunan mái van mino sé uré afová ó tifanté uno.

Ena Vá Ma Avábá In Maran In Baya Ino

⁷Téi ma sinunu ukheruna sirona kéka soe, ena vá ma anunu in maran in avúavá mai Tiyarafenu finté erikhein mifo erí máan avúavá ana vá baré oriyá bá tifano. Ena van ma anunu in nain mano mai véi Tiyarafenu fintéi afoká ukhen inka véin afová ukhen mino. ⁸Máan tukhen mifo mana ano ma ena van ída anunu inten mai véi ída Tiyarafenu afová inten mino. Mai fara vara seyo, anunu ma in avúavái anan Tiyarafenu van mino.

⁹^rTiyarafenu ano ma setin nan anunu ukhein mi aníen be Anin mana iyampon uró tiantan ma varará eren mino. Béin pinté uaren ayun ma fara van oriyán ban aunan barano van mi máan ten mino. ¹⁰^sTeti ankan ma Tiyarafenu van tinunu iyá tiferuna vara siya raumpo mai ma véi ano seti nan anunu iyan ma ve Anini furimpó ma setisi ume ampisintákein nan mi siyá uno.

¹¹Téi ma sinunu ukheruna sirona kéka soe, Tiyarafenu ano ma setí ankan nan máan anunu ma iyantisá máan mana erá ena van anunu in maran ná ó tifano. ¹²^tMana ano ída Tiyarafenu onté iyan mifo setí ankan ma ven anunu in maran ma é tifékun maen mi Tiyarafenu ano setin má e váken tetin pinté uaren ena ma anunuin avábá maman kákaní inten mino.

¹³^uTiyarafenu ano setin má báken tetin nan beni avúavá ánain bákurino van mi vei Kantá Aunan tetin timikhá

^m4:1 Mat 7:15; 1Te 5:21; 1Yn 2:18; 2Yn 7 ⁿ4:2 1Ko 12:3 ^o4:3 1Yn 2:18

^p4:4 Mat 12:29; 1Yn 5:4-5 ^q4:5 Yon 8:47; 15:19 ^r4:9 Yon 3:16

^s4:10 Rom 5:8-10; 1Yn 2:2 ^t4:12 Yon 1:18 ^u4:13 2Ko 1:22; 1Yn 3:24

mai afová ukhé tiféuno. ¹⁴Barará nanin banta aya uren evaránen avirano van ma ve Afóe ano ve Anin tiantan ma erakhá ein mai seti suufó ontaréi sian amá iyá uno. ¹⁵Yisas Karaisin nan ma Tiyarafenu Anin mino ma siren tian dáko inain nanin banta vái Tiyarafenu ano manafin bantin mai kayo ano veni avúavá ánain bákurinten mino. ¹⁶Tiyarafenu ano ma setin nan moéken anunu ukhein mai afová ukhé tiféi véimpin ákona inin kaiyá tiféuno.

Avábá in avúavá anan Tiyarafenufin bákan mi avábá aúpin ma vain kéká anon Tiyarafenufin bákan inká betimpin béi van mino. ¹⁷Tiyarafenui avúavá ánain ma vákuriyá tiferuna anon ena ma avábá uantan avúavápin moéké ákona iyá tiféuno. Máan tukhein nan mi vanasi ma yaimin nain damú ida feran kasaé ben avorá o mantá tifanté uno. Mai fara vara seyo, ma varará ma váké maé Yisas Karaisini avúavá ánain mi vákuriyá tiféuno.

¹⁸Máan anunu ma in manon ida feran bantin inká puntákein avúaváká ma anunun in manon minó peran avúavá do maman karúdanten mino. Mai ma yaimin nain damu san ma iniré tikhokho van é tifékun maen mai anon anfen tetimpin beni anunu ano ida ákona ukhen nen tinten mino. ¹⁹Tiyarafenu ma esé araiintá tetí ankan nan anunu ukhein nan mi setí ankan ena vá anunu in maran iyá tiféuno. ²⁰Mana vanta ano ma ve ayofi afá aváen nan ma ida anunu iyáken ma Tiyarafenu van tinunu iyá uno ma sinten maen mai véi kampun banta ino. Mai fara vara seyo, setí ankan ma oniyá tiferuna siyofi sífá tiváen ma ida sununu ó tifanté mai ma ida oniyá tiferuna Tiyarafenu inté uresá tinunu ó tifante rafuno. ²¹Tiyarafenu ano ma

man bayan timikhen mino. Tiyarafenu nan ma anunu inain mano vei ayofi afá aváeyan masá anunu ino.

Tiyarafenu Anintá Ma Mumunaní Pákena Vaya Ino

5^wMinó ano ma Yisasin nan Tiyarafenu ano vei vanasi evaránen avirano van ma aní ukharé ein banta ino sen mumunan inten maen mai vetí ankan Tiyarafenu akhafana ino. Inká minó ano ma Tiyarafenu van anunu inten mai ven akhafana vá inan anunu inten mino. ²Tiyarafenu van ma sinunu ó tifanté mai veni man baya ánain mi yakhafiya ben akhafana vá inan tinunu iyáké afová iyá tiféuno. ³^xTiyarafenu van ma anunu in nan ma siyain mai veni man baya ánain ma funtáden bákurin avúava san mi siyákan mai ida uman dakhen mino. ⁴Mai fara vara seyo, Tiyarafenu akhafana ano ma Yisas Karaisintá mumunan intin maen betin ákona amintin ma vara ráke namu avúavá maman bararasí uren mantaan ákona inten mino. ⁵Yisas Karaisin nan ma Tiyarafenu Anin mino siren mumunan ein kéká anon bara ráke avúavá bá ma aruviyaré ein maman bararasí uren mantaan ákona iyan mino.

⁶^yYisas Karaisi ma monó non perein má daa unkamádantá ma vei nare vanaein má anon Tiyarafenu Anin muno sen anfen mifo non máa fo saino. Ida ino. Non má nare vá póké ino. Máan tukhan mi Kantá Aunan mano yere ma siyain mai fura vayan bákan tetin tisimiyan mino. ⁷Kanú manaú daná anon Yisasin nan puran tino sen aní ukhen mino. ⁸^zMai yaná ma vain mai Aunan ban non ban nare van ukhen mino. ⁹^aTetí ankan ma vara ráke vantai vayará mumunan iyá tifé umpo Tiyarafenui vaya

^v4:21 Mak 12:29-31 ^w5:1 1Yn 4:15 ^x5:3 Yon 14:15, 23-24

^y5:6 Yon 1:29-34 ^z5:8 Yon 15:26 ^a5:9 Yon 5:32-37

ano moéken kákaní ukhen mino. Para vara seyo, Tiyaarafenu ano ve Anin nan mi sian amá uran ban mino. ^{10b}Mai vaya van mi Tiyaarafenu Anintá ma mumunan iyain kayo ano mai furan tikhen ne sen afová iyan mino. Mai fara vara seyo, ída ma mumunan iyain kayo ano Tiyaarafenu van kampun banta inon tiyáken ben Anini vaya ma sian amá iyain nan ída mumunan iyan mino.

¹¹Máan tiyan mi Tiyaarafenu ano mai van tian amá ukhen mino. Be Anini avúavá ánain ma vákuriyá tiferuna kékái ayun ma fara van oriyab ban aunan Tiyaarafenu ano simikhen mino. ^{12c}Máan tukhan maen iye anó Tiyaarafenu Anin maman aúpin dan ban nafi mai véi fara van aunan manten mifo Tiyaarafenu Anin ma ída mantein mano mai aunan ída manten mino.

Yoni Ma Kípan Bayafó Tian Ákona Ukhein Baya Ino

^{13d}Tiyaarafenu Anintá ma mumunan ukheona kayo ano ayun para van aunan manté uno sire afová ono van mi ma vompon uvaman amé uno. ^{14e}Tetí ankan ma ákonaé mumunan iyáké ma veni anunurá mana yana san inantékun maen béi setinti vaya ininten mino. ¹⁵Inká béi inikhái inan tiyá uno ma siré afová iyáké ma inantenuna yaná mai véi kanafen timinten mino sé afová ukhéi inanté tifanté uno.

^{16f}Tiretin pinté mana ano ma onesin e ayofi fi afá aváe fi ma furimpin ída ororen ukhein umeí ma iyanti vá amúkuantesin ná Tiyaarafenu ano véin aunan ná amino. Inká purimpin ma aviren oré iyain ume vée iyan mifo mai ume ma variyain kéká amúkuantano vara siya rauno. Ída ino. ¹⁷Minó namu avúavá ma vain mai ume ifo manáa ume kayo ano ída furimpin aviren oré iyan mino.

^{18g}Tetí ankan afová ukhé tifékun Tiyaarafenui kékási ma ukhein kayo ano ída umeí ana en oré iyan mino. Mai fara vara seyo, Tiyaarafenu Anin manon betin pákaan ákona uren dafíkan mi Ban Anon mano ída kanafen betí au aruvé iyan mino. ¹⁹Tetí ankan Tiyaarafenu akhafanan bá afová ukhé tifékun mi ma vara ma eúkukhein mai Ban Anoni ákona aránaópái vákan beni inintái minó daná bariyan mino. ²⁰Tetí ankan nan pura sikhein Tiyaarafenu afová ino van mi ve Anin mano setin morun afova simikhá afová iyá tiféuno. Máan tukháí setí ankan ma ven Anin Yisas Karaisimpin baruna van mi Tiyaarafenu fin bá tifere siyá uno. Beyáká anan pura sikhein Tiyaarafenu váken ayun ma fara van oriyab ban aunan mi van mino.

²¹Téi ma sinunu ukheruna iyampon kayo oe, kampun ayarafenu kayo ano Tiyaarafenui varu varen tiretí aúpin kumanin nafo yaffan ná ákona ono.

^b5:10 Yon 5:36-40 ^c5:12 Yon 3:36 ^d5:13 Yon 20:31

^e5:14 Yon 14:13-14; 1Yn 3:21-22 ^f5:16 Mat 12:31 ^g5:18 1Yn 3:9

YONI MA KAN DÁDASIÉN UVANTEIN BOMPON MINO

(2 Yoni)

Yoni Ma Kan Dádasíen Bompon Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Yoni vei furin ádesí ukhan ma uvarein mino.

Uvarein orana ino.

AD nainti (90) ráké mana antareti (100) ráké mai aúban mino.

Ma vompon ma uvantein baru ino.

Efesasí barurá ino.

Ma vompon ma uvaman amikhein kéká ino.

Monó nanin má be avafu akhafana va safi áa monó namun má maifin ma monó tiyain nanin banta va safin amiken mino.

Nái ana vará ma vompon uvanten nafino.

Mana antumpin nafi áa monó nanin bantafin nafin uvaman kaúden mi avábá in avúavá bá ana vá bano sen mi inká kampun monó banta kayo van dafíke vá bano sen tiamikhen mino.

Amusin Baya Ma Sein Baya Ino

1 Téi Yisasinintá ma mumunan iyain bantai monó doran bantan báké

Tiyarafenu ma veina e siren aní ukhein nanin má be akhafana vá báká ma séi sinunu ukheruna kéká baonafái ma vompon uvaman amé uno. Ída seyáká ano ana siretin nan purasé tinunu iyá umpo Tiyarafenui fura sikhein avúavá ánain ma vákuriyain kéká bá ano yeren anunu ukhen mino.^{§§} ²Tetin túpin ma fura sikhein avúavá bain nan mi siretin nan tinunu iyaruna mai ano fara oriyan banten mino.

³Pura vaya vá avábá en tarisari in avúavá bá ma vain banta mai seti Sifóe Tiyarafenu vá be Anin Yisas Karaisin pinté basá arunaná bá ará kusun má ano setin túpin bano.

Pura Vayará Bano Van Ma Ákona Uantein Baya Ino

^{4h}Tifóe ma seiníen ma e akhafana ano fura sikhein avúaváká nóká ma oniyaruna anon kákan timusin timiyan mino.

⁵ⁱMáan tukháí mai ma moéké tinunu ukheruna nanin noe, ída auyen man baya uvaman amiyá umpo fefá ma arafintá inikharé tiferuna mai man bayan bákái ena nanin banta vá avábá in maran ono van tiamiyá uno. ⁶Tetí ankan ma Tiyarafenui man baya ánain ma vákuriyá tiferuna van mi avába se siyan mino. Pefá arafintá ma iné tifékun mai man baya anon ena vasá anunuin maran ono sikharen mino.

^{7j}Banasi mákáden ma aviren tavi aípá orin kéká ano inka ma varará orera ukhen mino. Betí ankan manon Yisas Karaisin nan banta vukhafa vá ma varará

§§1:1 Anasi vá be akhafana vase ma sikhein mai monó namun má banasi va san mi sikhene sen kokhon afova vanta kayo ano iniyan mino.

erikhen ne siren ída mumunan é iyan mifo máan kéká anon banasi mákáden aviren namu aasá oriyáken mi Karaisin namuroí iyan mino. ⁸Máan tukhen mifo mai ma varano van ákona e yoriyá eona yaná pa savifá dóan afein nampo yafían ákona ukhare vá tiretí miyan puntáde varano. ⁹Mai fara vara seyo, Yisas Karaisini vaya ma ída funtáden banasi afova aminton ma vetí inin ánain dakhafen ma vanasi siaminten maen mai véi ída Tiyarafenu vá túpá ukhen mino. Máan tukhen mifo Yisas Karaisini vaya ma funtáden banasi afova amen nonten mai ve Anin má be Afóen mái véi súpá ukhen mino. ¹⁰Mana vanta ano ma ída funtákein aa sáké Yisas Karaisini vaya varen erinti vá ída vá e amá o avían

kaúde véin avábá uantano. ¹¹Mai ma véin o avían kaúden kama in nain banta ano véi ma namu yorarí iyain mi aya inten mino.

Kípan Baya Ino

¹²Téimpin kokhon baya vá tiretin tiamento van inikhé umpo fa savifá ída vompon uvaré afe iyá bano van muno. Máan tono van inikhé umpo áde anantá tiretin o onano van iyaruna séi ma oréku soniyasí ma siretin má baya sékun mai anon timusin ma iyá é tiferuna mo fura yanasí inten mino.

¹³Mai ma Tiyarafenu ano aní ukhein ayofin akhafana* anon betí amusin baya yan tireti vaonafá oren mino.

*1:13 Tiyarafenu ano aní ukhein ayofin akhafana e ma sikhein mai ena varufá ma mumunan nanin banta vain nan mi sikhen mino.

YONI MA KANÚ MANAUSÍEN UVANTEIN BOMPON MINO

(3 Yoni)

Yoni Ma Kanú Manausíen Bompon Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Yoni vei furin ádesí ukhan ma uvarein mino.

Uvarein orana ino.

AD nainti (90) ráké mana antareti (100) ráké mai aúban mino.

Ma vompon ma uvantein baru ino.

Efesasí barurá ino.

Ma vompon ma uvaman amikhein kéká ino.

Romú kéká ano Khaiusin bí kokhon banta aví daran ban mino. Auyen avúavá ma uvantein bompompin (Niu Testamenti) ma Khaiusin bí bain mai Koriní barurá ban (Romu 16:23, 1 Korini 1:14) Masedoniá barafá ban (Aposeri 19:29) inká Debí barurá ban ukhen mino. (Aposeri 20:4, 5) 3 Yoni vompompin ma vain banta ída mai vanta kayo vá manaí ukhen mifo manaí ukhein bí bain banta inon ten afova vanta kayo inikhen mino.

Nái ana vará ma vompon uvanten nafino.

Khiausini mumunan má monó nanin banta ma ven amá orin ma avábá uantiyá ein ma san mi susu sian ten mino. Diotrefesin ne sin banta ano monó ayain banta kayo namuroí uantiyan mi Khaiusi mantaan ákona ino van Yoni ano vaya siamen mino.

Yonini Amusin Baya Ino

1^kTéi Yisasintá ma mumunan iyain nanin bantai yoran bantan báké éi sesi kama sirona uron mi Khaiusi van ná éin nan purasé tinunu iyákéi ma vompon uvaman amé uno.

²Téi ma sinunu ukheruna sirona oe, éin aú iyampon mano kama ukhái eni yante vukhafa vá ano yere ákona ukhantiya amusin iyáke minó daná kama e varano van mi simúkuantiyá uno. ³Éi inte avúavá kasá bákeyá pura vaya ánain dakhafiyáfo mai manáa sífá tiváeyan mano séin me sisimí iniréi kákan timusin é uno. ⁴Te sikhafana ano ma fura sikhein baya ánain ma vákuriyain baya ma séi iniyáké mai ena yanáká ma simusin iyaruna simusin esantaréi moeké timusin uantiyá uno.

Bafani Yoran Banta Kayorá Ma Kamaen Dafisí Pákena Ma Ákona En Tein Baya Ino

⁵Téi ma sinunu ukheruna sirona oe, mireníe ena fáké monó doran banta kéká ano ma esanten oriya ma e amápin avían kaúde yafisiyaona avúavá mai Tiyarafenui kama yoraríi iya ono. ⁶^mÉi ma vetin avábá ure kama avúavá aní iyaona vaya van mará ma vain monó nanin banta siamíkan inen mino. Betí ankan ma éin me ampíren orono van iyantiya vá Tiyarafenu ano ma amusin ukhan nain aa sákesá manáa yanasinta aya esin ná mamaren orino. ⁷ⁿMai fara vara seyo, vetí ankan Bafani yoraríi en

^k1:1 Apo 19:29; Rom 16:23 ¹1:3 2Yn 4 ^m1:6 Tai 3:13 ⁿ1:7 1Ko 9:11-12

nóken pasen afokhampin ma vain nanin banta finte ída mana ayain daná baré iyan mino. ⁸Mai vará máan banta kéká kama avúavá aní erá mai kéká aya iyáke inká manafíní uverá Tiyarafenui fura avúavá tian banasi amé tifano.

⁹Monó nanin bantafin ma afova vompon uvamadékun orikhan mifo mai ma veyan ánon bantai ono van iyain banta Diotrefesi ano ída mana yanasí inten mino. ¹⁰Téi ma oronté béi ma setin nan namu yorará iyan mino sen ma soyampá baya siren namu vaya kayo siyain nan éin mo siamenté uno. Ena fáke monó doran banta kéká ma ída ve amápin o avían kaúden ída kama iyáken inká betin ída aya ino van ma monó nanin banta siamiyain nan deren tiamenté uno. Máan banta kéká ma aya iyain nanin banta mai monó namun pinte véi ano yo sianté iyan mino.

¹¹oTéi ma sinunu ukheruna sirona oe, ída vá máan avúavá ena nanin banta aní iyáke kama avúavá ánain mana vá dakhafono. Kama avúavá ma varé iyain

kayo ano aníen Tiyarafenui vanasi uno sé iyan mifo namu avúavá ma variyain kayo ano mai Tiyarafenu ída afová ukhé uno sen aní é iyan mino. ¹²Máan té iyan mifo minó ano Demetriusini kama avúavá bá inká béi ma fura vaya siamiyain mái sian dákó iyan mino. Tetí ankan má dere ma veni kama avúava san tian dákó iyaruna mai siretí ankan afová ukhen náí fura vayan tiyá uno.

Ma Sipá Ma Kípan Baya Kayo Ino

¹³PTéimpin kokhon baya kayon báí éin tiameno van inikhé umpo ída vompompin uvaman amenté uno. ¹⁴Mai fara vara seyo, seyantá tiretin o oniyáku sen má baya seno van mi inikhé uno.

¹⁵Tiyarafenui ará kusin mano éin masá bano.

Mará ma vain arona kayo ano vetíi amusin baya siádan éi vaonafá oren mino. Tenti simusin baya yere maifá ma vain tirona kayo vá mana mana arariya siameno.

YUTI MA UVANTEIN BOMPON MINO

(Yuti)

**Yuti Vompon Ma Uvanteí
Pákenai Afova Vaya Ino**

**Ma vompon ma
uvantein banta ino.**

Yisasin nú Yemisin nú afá Yuti ano ino.

Uvarein orana ino.

AD sikisti-faipi (65) fin nafi áa sikisti-sikisi (66) fin nafin uvanten mino. Yerusaremí baru ma AD seventi (70) fin ira saman kaurein ída afoká ukhan mino.

**Ma vompon ma
uvantein baru ino.**

Mai ma Kantasí Ukhein Bara e ma siyain bara Parestainí inon ten iniyan mino.

**Ma vompon ma uvaman
amikhein kéká ino.**

Mana monó namun nafi áa kokhon monó namun kayofin nafi ma Yutan kéká ano mumunan iyain mi amikhen mino. Parestainí barafá bá Asiriá barafá bá inká Pesiá barafá bá ma vain mumunan kékápin ma Yuti monó dorarién noré eipái uvaman amikhen minon ten iniyan mino.

**Nái ana vará ma
vompon uvanten nafino.**

Mai ma famúku avúavá bá monó ano ma sikhein baya ma maman tavi aipá

kaiyan ma kampun bayafó banasi afova amiyain kayo van perano van mi amaan baya siádan ban mino.

Yuti Ma Amusin Baya Sein Mino

1 ^qTéi Yuti Yisas Karaisini miyan ída van doran banta ma Yemisin afá baruna anon ma vompon uvaré uno.

Tifóe Tiyarafenui avábápin basin ma Yisas Karaisi yafikanti vano van ma arakhein nanin bantafin mi ma vompon uvamadékun oren mino.

²Tiyarafenui arunaná bá ará kusin má avábá in avúavá bá ano vá tiretimpin moéken bano.

**Kampun Afova Ma Amiyáin Nain
Kéká Ma Uman Baran Nain Baya Ino**

(2 Pita 2:1-18)

³Téi ma sinunu ukheruna sirona kéká soe, Tiyarafenu ano ma setin tiya uren evaránen tivíkeí pákena van mi vompompin uvádé tiameno van inikharé umpo mai ma fura vaya ma namuroí uantiyain kékáká dafiseno van mi uimpin ma vompon uvaman amé uno. Pura vayará ma mumunan in avúavá ano minó damú para oriyan bano van mi Tiyarafenu ano manádái vei kantasí ukhein nanin banta amikhantin ída kanaíen mana vanta ano yo arúden ena vaya khainten mino. ⁴Máan tukhan mi Tiyarafenu oo ma ída yayiyain kéká ano aúpáké inka siretin aúbaná o féken namu avúavá kasae varano van mi Tiyarafenu ano ume ampiantiyain mino sen tiretin tiamiyan mino. Máan banta kayo van mi setisi mana Ayafa ma vain Bafan Yisas Karaisini vaya namuroí inten ne sen mi inká mai kayon Tiyarafenu ano yaíden uman aminten ne sen sakhanaampa vanta kayo ano fefái siádan baren mino.

⁵Isarerí nanin banta ma Bafan mano Isipí kena aya uren iyanen oriyákan mai

^q1:1 Mat 13:55 ^r1:4 Kar 2:4; 2Pi 2:1

^s1:5 Eks 12:51; Nam 14:29-30

ma véintá ída mumunan ein kéká ma arukhá ein tiretí ankan afová ukhen náí evaráné tiamékuya afova suron ono van muno. ⁶tInká Tiyarafenu ano ma enisori kayo yoran amiran ma veni vaya átakharé uren ma vetin amein doran me ampikhein nan afová ono van muno. Tiyarafenu ano vetin ayanan kuren títípa ukhein barufin karavusií uran báken banasi ma yaimin nain damu san mi ave ukhen mino. ⁷uInká máan mana en Sodomú baru vá Komorá baru vá maí kan baru ádé ma varé ein baru kayofin má ma famúku avúavá bá ída funtákein avúava sinta vá ano mo kákani suron ukhá ein tiretí ankan afová ono van muno. Mai varu kayo ma ira saman kau-rein manon namu avúavá ma variyáin nain nanin banta ma ínaimpáké para van oriyan ban ira fóké ma vetin taman kaurin nain mi aní ukhen mino. ⁸Máan mana en mai ma nóken kain ódarákéi ma avúavá kasaé bariyá uno siyain kéká anon pamúku avúavá bariyáken baya inin avúavá me oyan amiren kakhan má ma vain enisori kayoi ákona van dere siren intiyan mino. [†]9vMáan té iyan mifo Ban Anon mano ma Mosesin au varano van ma aví bain enisori Maikorin má aruve aruve iyan maen béin ída oyampá baya sen mifo Tiyarafenu ano ana vá éin daíden uman aminon tein mino. ¹⁰wMáan tein mifo ma vanta kayo van ma siyaruna mai vetí ankan manon ída afová ukhein danasinta van oyampá baya siren betíi anunurá namu avúava sinta variyan mino. Máan ma iyain manon iyan má pon mái aasá oriýáken mi uman o maman be amaniná

kaiyan mino. ¹¹xMáan kéká san mi sirun nan uantiyá uno. Mai fara vara seyo, Keni ano ma ve afá Eborin aruan purein an mi yen noin moékan uman mi varanten mino. Betí ankan Baramun an mi yen moni saro siren ara ara avúavá baranten mino. Inká Kora ma Tiyarafenu oyampá baya siyaréin ma arein an den mi vetíi namu avúava san aruan kípanten mino.

¹²yMonó nanin banta vá ma avábá aní iyáke manafin dunan táde nano nafin máan kéká anon eriven asuse avúavá bariyáken ída ayave van inton beyan ma nan nain nan manan inten mino. Mai kayo anon tókонтен konan mano ma o átaru uvin ma uva ano yo fútian asuse uran ma ída á danton meren asuse ein an den mi mai ma iyáantan nain danasinta ída fura sen avúavápin maman kainten mino. Máan kékái ída ma aran iré iyain daa ana ma arú bá do yaruádan báken kano einíi iyain evaránen purinten mino. ¹³Betí ankan ma namu avúava sinta variyain manon un nompin ma uvaen karantó uaren ma fain evaránen eriyen ma kákantá avaya seiníi iyan mifo ída ayave van é iyan mino. Inká me khoe khoe en ma noin ofu kayo an mi yakhen pasen kumayusí uaren ma sítípa ukheimpin tipá oriyan mino.

¹⁴zAdamun táké ma o khaen eriyen ma yan manápá ifo afápá kan un kádan banta Inoki ma afoká iyáken mai nanin banta van máa mi sen sakhanampa vaya siádan baren mino. “Onano, Bafan mano vei ída yankaforen tauseni enisori vái eriyen mino. ¹⁵Mai ma Tiyarafenu me oyan amiren béin oyampá baya siyáken ara ara namu avúava sinta ma

[†]1:8 Afova vanta kéká ano mai enisori kayo van namu ukhein kayo inon tikhen mino.

^t1:6 2Pi 2:4 ^u1:7 Esé 19:1-25; 2Pi 2:6, 10

^v1:9 Dan 10:13, 21; 12:1; Sek 3:2; 2Pi 2:11; Rev 12:7 ^w1:10 2Pi 2:12

^x1:11 Esé 4:7-8; Nam 16:1-35; 2Pi 2:15; 1Yn 3:12 ^y1:12 2Pi 2:13, 17

^z1:14 Esé 5:18, 21-24

variya ein nanin bantan me yaíden betíí namu avúava sinta maman dákó uren uman aminten mino.”¹⁶ Mai nanin banta ano aveantumpin baya vá inká oy-ampá baya vá tiren maen kasaen betíí anunurá namu avúavá sinta varé iyan mino. Máan tiyan maen beti ma variyain dasasinta van betiyan amo siren maen ena nanin banta van kampun ten kama avúavái variya ono siren beti vaípakena kokhon dasasinta inantiren baré iyan mino.

Mumunampin Ákona Ukhen Bano Van Ma Arakhein Baya Ino

¹⁷Máan té iyan mifo séi ma sinunu ukheruna sirona kéka soe, setisi Bafan Yisas Karaisini aposeri kéká ano ma siamikhá ein baya vará ovare me ineno.¹⁸ ^aMa vara kípán damú ádesí ma iyantin betíí namu anunu ánain mana yakhafiyáken Tiyarafenui avúava san ma siren intin kéká afoká intene síka inikhare ono.¹⁹ Máa sikharé íkan mai vanta kayo ano saréa afoká ukhen mi siretin maman aúban daimiyan mino. Máan kékápin Tiyarafenui Aunan ída vákan mi vetíí yan bukhafa ánain dakhafen mai avúavá bariyan mino.

²⁰ ^bMáan tiyan mifo séi ma sinunu ukheruna sirona kéka soe, kantasí ma ukhein mumunan tasá mantaan ákona

ukhe inká Kantá Aunan mano ma amin nain inintá ana vá amúkono.²¹ Máan tiyáke setisi Bafan Yisas Karaisi ano ma vei arunaná pinté uaren ma ayun para van oriyan ban aunan ma varen me amin nain nan ma ave ukheya Tiyarafenui avábápin ná bano.²² Máan tiyanti mai ma mumunan ída ákana ukhan ma kokhon ineine iyan kéka sará arunan uantano.²³ ^cMáan tiyáke mai ma yaimin nain damú ma ira ano khanain kékasá aya ure avirano. Kokhon nanin banta ano fara vain betin nan arunan ure ayain nompo vetíí ume avúavá ano ma siretimpin erin nará dafían ákona ono.

Amúkimpó Ma Tiyarafenui Aví Daní Ein Baya Ino

²⁴Tiyarafenu anon tiretin nan er-aven ankamin nafo siren dafían ákona ukhanti varé esin maen béi anan ume avúavá do sesé uantáden aviren orinti kakhakhein barufin amusin pinté o van nompo véin avisá daní ono.²⁵ ^dBeya anan tetisi Bafan Yisas Karaisin pinté uaren Tiyain Tiyarafenu van mifo véin avisá daní ono. Minó kakhan má kini ákona vá béimpin bákan inká minó danáká ma yafisin ákona kayo vá báken minó danáká pefá dafíkaren taréa vain ínaimpáké dere fara oriyan banten mino. Pura ino.

^a1:18 2Pi 3:3 ^b1:20 Kor 2:7 ^c1:23 Sek 3:2; Rev 3:4

^d1:25 Rom 16:27; 2Pi 3:18

AÚPÁ BARÉIN BAYA MA SIAN DÁKÓ UKHEIN BOMPON MINO

(Revaresen)

Aúpá Baré ein Baya Ma Sian Dákó Ukhein Bompon Ma Uvanteí Pákenai Afova Vaya Ino

Ma vompon ma uvantein banta ino.

Baya varen orin banta Yonin ma Patmosi Musóká do siantan karan o váken mi uvaren mino.

Uvarein orana ino.

AD sikisti-eiti (68) ráké seventi (70) ráké mai aúban mino. Romúke kin Nero ma vanasi aruan puriyá ein pimpái uvanten mifo AD seventi (70) fin Yerusaremí baru ídá ira saman kaúkan nafi áa AD nainti (90) ráké nainti-faipi (95) rá ma Kini Domisiani ano ma vanasi uman amen aruan puriyáin ma veni kin doran mo khípein orana kayo fin mino. (AD eiti (80) ráké nainti-sikisi (96) ráké mai aúban mino.)

Ma vompon ma uvantein baru ino.

Esiá barafin áau orun perapá Eisiní un nompin bain musó Patmosí ino.

Ma vompon ma uvaman amikhein kéká ino.

Mai ma yan manápá ifo afápá kan un kádan monó namun kayo ma Esiá barafin bákan aví tikhein kayo vá inká minó akhempá ma Yisasintá monó ten oriyán ban nain nanin banta vá ino.

Nái ana vará ma vompon uvanten nafino.

Enará ukhein danasinta van ma sakhanampaí uádan aúpá baré ein ma sian amá ukhein bompon ma Yisasi ano Yonin amein nan mino. Esé Araíin Bompopin (Esé Araíin Bompon 1-11) ma vain banasi ano ma umeí uren Tiyarafenu me ampiren orein bayan tian amá ukhen mino. Ma vompon mano mai ma umeí uren Tiyarafenu me ampiren nentá orikharen ma aú baéden ará manafiní in doran ma Yisas Karaisi ano maman dákó ukhein mi sian amá ukhen mino.

Aúpáke Yanasinta ma Maman Dákó Ukhein Mai:

Esiá barafin ma vain monó namun kayofin Romu kamanin mano uman amiyan ma inká baru finté uman amiyan ma iyain nan mi amaan baya sikhen mino (1:1–3:22). Inká Tiyarafenui Sipi sipi Arará ano ma savore sópe an dakhein mai:

1. Tiyarafenu ano ma ma vara yaimin nain (4:1–19:10)

2. Namu avúavá ma maman bararasí inain (19:11–20:15)

3. Auyen bara vá inaru vá ma erin nain mai auyen Yerusaremí ino (21:1–22:5).

Mo khípan baya maen Karaisi ma vanasifin tiádan bain mino (22:6-21).

Esé Araí In Baya Ino

1 ^ePefá ma aúpá baré ein danasinta ma e unen dákó ono van iyan maen Yisas Karaisi ano vei yoran banta kayo aní ino van Tiyarafenu ano mai yaná béin amen mino. Máan turan mai yaná maman dákó ino van mana enisori siantan bei yoran banta Yoni váipá oren mino. ²Mo aní in ma ódaren maen

Tiyarafenui vaya vá Yisas Karaisini avúavá bá puntáden tiamen mino. ^{3f}Ma sakanampa vaya ma yankáan monó nanin banta amin nain kéká bá inká mai vaya iniren ma mai ánain dakhafin nain kayo vá Tiyarafenu ano avábá aminten mino. Para vara seyo, mai yanasinta ma yáko inain damú inka ádesí iyan mino.

Dan Manápá Ifo Afápá Kan Un Kádan Monó Namumpin Ma Mumunan Nanin Banta Van Ma Yoni Amusin Baya Siantein Mino

⁴gTéi Yoni anon dan manápá ifo afápá kan un kádan monó namun kayo ma Esiá barafin ban ma maifin mumunan nanin banta vaípái mai vompon uvamádekun oren mino.

Mai ma fefá baren taréa van ma inká ínainpá dere ma fara van nain má inká dan manápá ifo afápá kan un kádan Aunan kéká ano ma Tiyarafenui kin kará aufá bain má sarisari vá kusin má ano vá tiretin má bano. ^{5h}Inká Tiyarafenui vaya ma funtáden tian dáko en ma inká purin pinté an uanten orun mantaven ma ma vara ráke kin kayoi ánon bantaí ma ukhein banta Yisas Karaisini sarisari vá kusin má ano yere vá tiretin má bano.

Mai ma setin avábá uren ma vei narefó ma umei karavusi fintena útúntein banta avisá daní ó tifano. ⁶ⁱBe Afóe Ayarafenui monó doran bantaí uven Tiyarafenu vá barará nanin banta vá aúban báken dorarí ino van mi véi ano setin tivian bei yafisin aúpin kaúken mino. Mai vará béin moéke kákan bí amesin ná beni yafisin doran mano fara van oriyan bano. Pura.

^{7j}Onano. Konan daró béi erintin maen

minó auu ano oniyantin inká mai ma véin ayorampin ma vankampó antáká ein kéká bá ano yere oniyantin maen ma varai minó akhen pákena nanin banta ano véin nan ifí danten mino.

Pura ino.

^{8k}Bafan Tiyarafenu ano máa sikhén mino. “Téi maé Araíin má Kípan mái vá uno. ^zMai ma fefá baré taréa vá ma inká ínainpá dere ma fara vá ma Moékan Ákona vá Banuna uno.”

Yonin Auu Vaédan Ma Yisasin Onein Baya Ino

⁹Téi Yoni siretin afá aváe uno. Yisasin oo yayié Tiyarafenui yafisin aúpin tiretin má mana yoran bantan báke tirá kusin pinté ara ara uman bariyá tiféuno. Tiyarafenui vaya vá Yisasini vaya vá ma sian dáko eruna van mi Patmosi musóká tiviren mo karavusií urá baré uno.

¹⁰Bafani yamú afoká uví bentá monó tiyá ékun toyampáké mana oova ano ufen ma aseinién máa semí, ¹¹“Ma ma oneona yanasinta vompon dókifin uváde vá dan manápá ifo afápá kan un kádan monó namun kayofin ma mumunan nanin banta vaimpin ná dan orino. Mai monó namun kayo maen Efesasií Simeiná Pekamamií Taiatairai Sadisií inká Firaderfia vá Raodisia vá ino.

¹²Mai ma soyampáké ma vaya siyain onano siré dovaébé onékun maen dan manápá ifo afápá kan un kádan oon uruan dankará intánuran baren mino. ^{13l}Máan tukhan mai ma oon uruan intánukhein danká kayo aúbaná mana Vanta Anin ma einí ukhein mano arantantá aravukhein ayá buí daná uren inká

^z1:8 Kiriki vaya finté Arfa vá Omekha va se ma siyain mai Araíin má Kípan má unon tiyan mino. Revaresen 21:6; 22:13 fin dere vá onano.

^f1:3 Rev 22:7, 10 ^g1:4 Eks 3:14-15; Rev 3:1; 4:5 ^h1:5 Íbo 89:27; Kor 1:18

ⁱ1:6 1Pi 2:9; Rev 5:10; 20:6 ^j1:7 Dan 7:13; Sek 12:10; Mat 24:30; Yon 19:34-37;

1Te 4:17 ^k1:8 Rev 21:6; 22:13 ^l1:13 Dan 7:13; 10:5

akhoní in ma korifó uvanteimpó akhoní uren baren mino. ^{14m}Béin ánon do ano efan ankará íkan inká auufenté ira ma anamuná einí iyaren mino. ¹⁵Máan tiyan maen béin arantan mano aeni ma irafin iyó uran ma karo kharo einí iyákan inká beni veya ano non iya ma káosiyan avaya seiní iyan mino. ¹⁶ⁿMáan tiyan maen inká dán manápá ifo afápá kan un kádan ofu ve ayan kurompá pákakhhan inká mÍkan akhempá an ukhein baenati ano ven oo fenté e unen mino. Máan tiyan maen ben auná pinté áau ano ma moékentá panu seiní iyaren mino.

^{17o}Máan tukharéi ma mo oné ben arantampin o sinkamé purin an davékun maen ayan kuron pákena yámampó ten timaniná kaúden máa semí, “Téi maé Araí in má Kípan má umpo ída vá akhokho van ono. ¹⁸Téi maé para van oriyán ban mi varéi fúkaré umpo saréa ayun para vá oriyá banté uno. Máan tukhéi furin má beni aron ída van masípin ma ira khiyain tákena khi vá pákakhé uno.

¹⁹“Máan tukheruna van mi mai ma saréa yáko inain danasinta vá inká ínainpá ma yáko inain danasinta vá ma oniyaona vá bompon dókifin uvarano.

²⁰Mai ma yan manápá ifo afápá kan un kádan ofu ma siyan kurompá páké ma inká yan manápá ifo afápá kan un kádan oon kayo vá ma uruan korifó uvantein dankará ma intánuran bákan ma oneonai ana veya mai máan mi ukhen mino. Dan manápá ifo afápá kan un kádan ofu maen mai ma yan manápá ifo afápá kan un kádan monó namun kayo ma vain pintena enisori kékái van mino. Inká dan manápá ifo afápá kan un kádan oon ma uruan dankará intánuran bain maen mai ma yan manápá ifo afápá kan

un kádan monó namun kayo ma vain mino.

Efesasi Monó Namumpin Ma Mumunan Nanin Banta Vaípái Ma Vompon Uvamádan Orein Baya Ino

2^p“Efesasi baru ráke monó namumpin ma mumunan nanin banta vákan ma vetintá daffkein enisori vaípasá ma vompon uvamádan ná orino siren máa sen mino.

Mai ma yan manápá ifo afápá kan un kádan ofu fákaren ma inká dan manápá ifo afápá kan un kádan oon kayo ma uruan korifó uvantein dankará intá nukheintá ma noin banta ano máa mi sen mino. ^{2q}Tiretí ankan ma ákona yorarí iya ma mantaan ákona uve uman bariya ma kama avúavasí iyaona van téi afová ukhé uno. Afová ukhé kuya namu vanta kayoi avúava san avesara iyáke veya varen orin kéká uno ma siyain kayoi avúavá bá baya vá daíde onen nan mai ma siyá ein mai kampun bayan tiyaren mino. ³Téin tivisare sireya ída avesarain uman bariyáke ákona yorarí e ono.

⁴Máan te ompo esé ma arafintá ma séin nan anunu iyáke ma ena kéká ará amiyá eona avúavá mo ampire ná mai van mi siretin tirá namuanté uno. ^{5r}Mai ma esé arafintá ma variyá eona avúavá ma me ampireya o vaona vá onano. Ará baéde vá pe ma variyá eona avúavasá barano. Ída ma ará baeresí maé mai ma siretí ankani oon uruan intánin danka ma vain do khanenté uno.

⁶Máan tonté umpo mana avúavái siretí ankampin kama ukhen mino. Mai avúavá maen Nikorasini kéká

^m1:14 Isi 43:2; Dan 7:9; 10:6; Rev 2:18; 19:12

ⁿ1:16 Ibu 4:12; Rev 2:12; 19:15 ^o1:17 Ais 44:6; 48:12; Rev 2:8; 22:13

^p2:1 Rev 1:16 ^q2:2 1Yn 4:1 ^r2:5 Rev 3:3

ano ma varyain danasinta van ma afon karí iyaona mai sen má deren tifon kakhen mino.

⁷s“Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino.[¶] Intéa anó mai uman kayo esantanten nafi mai vantan tiantékun mi Tiyarafenui varu fintena aunan bain daa aran kúduren nanten mino.

Simená Monó Namun Ma Uvamádan Orein Baya Ino

⁸“Simená baru ráke monó namumpin ma mumunan nanin banta vákan ma vetintá dafikein enisori vaípasá ma vompon uvamádan ná orino siren máa sen mino.

Mai ma Esé Araíin má Kípan má báken ma fúaren orun mantakhein banta ano máa mi sen mino.

⁹tAfová ukhékuya ona ída váka e arunanápin ba ompo mumunan in avúavápin tiretí ankan moékakha ono. Mai ma Yutan kéká uno siren ma kampun baya e sian more mere iyan ma siretin oyampá baya siyain kayo maen ída fura Yutan kayo ifo Ban Anoni monó namun kayon báká betí ankani kampun baya afová ukhé uno. ¹⁰uMai ma uman erinti varanona van ída vá akhokho van iya vano. Tiretin pinte manáa akhenóka uan onano van Ban Anon mano avían karavusifin kaúduantin maen tiyan míkan damúpin tiretin aruren ara ara uman amiyáken purin arirí inten mifo mumunan ná pákaan ákona ure varé esirá aunan bain kini kamamó uantano.

¹¹v“Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino. Intéa anó mai uman kayo esantanten nafi mai vantan evaránen ma furin mano ída fákanten mino.

Perkamumí Monó Namun Ma Uvamádan Orein Baya Ino

¹²“Perkamumí baru ráke monó namumpin ma mumunan nanin banta vákan ma vetintá dafikein enisori vaípasá ma vompon uvamádan ná orino siren máa sen mino.

Mai ma sefá tefá avan iyain bae-nati ma fákakhein banta ano máa mi sen mantino. ¹³Ban Anon mano ma vei kin kará kain bain barufin mi van ná afová ukhé umpo sen tiviká pura seya mantaan ákona ukha ono. Téintá mumunan iyáken ma sen tiví tian dákó iyá ein banta Antipasin ma Ban Anoní kéká ano siretí varu fintena ma aruan púda mae mai umantá ída mumunan me ampe ono.

¹⁴w“Máan tiya ompo siretí ankampin manáa sirá uman para van mino. Mai ma Barami ano ma Barakin afova amin ma Isareri nanin banta yuvun íkan ma kampun ayarafenurá íkun uran dunan kayo niyan ma inká pamúkuí iyá einí ukhein banta kayo ano siretin aúbaná para van mino. ¹⁵Máan manan eya Nikorasini ineine ma vanasi siamiyáken ma mai ume avúavá ánain dakhafiyain kéká deren áen nan tiretin aúban para

[¶]2:7 Átaren ma van nain mano inino ma siyain mai vayai ana afová inovan mi siyan mino. Revaresen 2:11, 17, 29; 3:6, 13, 22; 13:9 vá dere onano.

[¶]2:7 Esé 2:9; Rev 22:2, 19 ^t2:9 2Ko 11:14-15; Rev 3:9

^u2:10 2Ti 4:8; Yem 1:12 ^v2:11 Rev 20:14; 21:8

^w2:14 Nam 22:1–25:2; 31:16; 2Pi 2:15

van mino. ¹⁶ Máan tukhein nan mi ará baerano. Ída ma ará baeresí maé tireti vaonafá ainé erivé mai ma sefá tefá an bain baenati ano ma soo fenté e unakheimpó mai kayo vá tiruvonté uno.

¹⁷ x“Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino. Intéa anó mai uman kayo esantanten nafi mai vantán aúpá ma vain manna manáa amiyá maé inká efanten onámanáká ma vei auyen bí uvantan nain amékun maen mai ma varan nain mano veyáká anan afová inten mino.

Taiatirá Monó Namun Ma Uvamádan Orein Baya Ino

¹⁸ y“Taiatirá baru ráke monó namumpin ma mumunan nanin banta vákan ma vetintá dafikein enisori váipasá ma vompon uvamádan ná orino siren máa sen mino.

Mai ma Tiyarafenu Anin auufenté ma ira kheiní iyan ma inká aeni ma iyó uran ma karo kharo einí ma arantan táké iyain banta ano máa mi sen mino. ¹⁹ Ena kéká ará amin nafi mumunan ma iyaon nafi inká ará kusin pinté ma ara ara yorará iya ma mantaan ákona uve ma uman bariyaona mai fefái afová ukhé uno. Mai ma esé bariyá eona avúavá kayo ma esantare variya onan oniyá uno.

²⁰ zMáan tiya ompo mai ma siretí ankan aúban ma mana Yeseberin ne sin nanin ma váken beyan nan téi sakhanampa nanin muno siren ma senti yoran nanin banta iyanen pamúku avúavápin oriyán ma

inká kampun ayarafenuntá íkun uran dunan niyain nan mi siretin tirá namu uantiyá uno. ²¹ Manáa afokhan amiré bei namu avúavá ampiren ará baerano siyákun mifo mai vaya ída iniyan mino. ²² Máan tiyain nan mi mai nanin kákan aí daná amirékun maen barampin bakhen berai siyantí inká mai ma ven má ma namu avúavá bariyá inain kéká ano ma ída ará baerantí maé betin má deren mai uman amenté uno. ²³ aTéi ano mai nanin akhafana aruan púdékun maen mairái minó monó namun kayo ano afováen téin nan mi ineinefin má aúbá daíden oné iyan ne sinten mino. Maa siyantí maé tireti ma variyá inona avúavákái sé daidé miyan amídú onté uno. ²⁴ Máan tonté umpo Taiatirá barurá ma vaona nanin bantan ma vaya siamé uno. Mai nanini vaya ánain ma ída yakhafen ma inká Ban Anoni aúpá baya ma ída afova variyaona kéká amaniná ída uron mi ara ara uman kaonté uno. ²⁵ bMai ma fákakheona avúavá máa vá ákona uan pákare váesirá téi ovaráné ereno.

²⁶ c“Intéa kéká anó esé araíin táké ten too yaiyen doriyáken ná mantaan ákona uven ara ara uman esanten mo akhení urantén nafi mai kayon ákona amékun ara ara varafin ma vain nanin bantará dafisinten mino.

²⁷ ‘Aenifó uvantein ayonta fákaren banasirá dafisiyáken maen bara khave ma ankaman duyufeiní vanasi inten mino.’

Mai ma se Sifóen pinte ma varerunaí ukhein ákona anan betin má

^x2:17 Eks 16:4, 14-15, 33-34; Ais 62:2; Yon 6:48-50 ^y2:18 Rev 1:14-15

^z2:20 1Ki 16:31; 2Ki 9:22 ^a2:23 Íbo 7:9; Yer 17:10; Rev 20:12-13

^b2:25 Rev 3:11 ^c2:26 Íbo 2:8-9

baranten mino. ^{28d}Máan turé maé kukharó ma afoká é iyain ofu vá dere mai kayo amenté uno. ²⁹Ma ma Aunan mano siádan ma monó namun kayo fimpá orera iyain baya kayo vá átaren ma van nain mano inino.

Sadisí Monó Namun Ma Uvamádan Ma Orein Baya Ino

3^eSadisí baru ráke monó namumpin ma mumunan nanin banta vákan ma vetintá dafíkein enisori váipasá ma vompon uvamádan ná orino siren máa sen mino.

Mai ma Tiyarafenui yan manápá ifo afápá kan un kádan Aunan má inká dan manápá ifo afápá kan un kádan ofu kayo vá ma fákakhein banta ano máa mi sen mino. Éi ma vare aruve iyaona yanasinta afová ukhékuya siyáke setimpin taunan báká bá uno siya ompo fura seya fúkarono. ²Auu mábe onano. Mai ma sító máa mumunan ma fara váken ma ádé anantá kípano van iyaimposá ákona uan mantano. Mai fara vara seyo, siretí avúavá ano Tiyarafenu avorá nenta suron mi van mino. ^{3f}Máan tukhein nará mai ma esé inire ma mumunan ukhá eona vaya oo yaiye vá ará baerano. Ída ma ará baeresí maé umoyan banta ano ma ereiní ékuya mai ma ere-nuna yamú ída afová inono.

^{4g}Máan tin nompo Sadisí barufin maen manáa nanin banta ano vetí auí danáká ída ume avúavápó paini ukhein mai kayo ano efanten buí daná uren téin má nonten mino. Mai fara vara seyo, vetí avúavá ano fun-

tákaré intin mino. ^{5h}Inká intéa kéká anó mai uman esantaren ná erinten nafi mai kéká bá deren efanten buí daná uantanté uno. Máan turé maé aunan bain bompompin ma vetin aví bain ída arumonté umpo Tifóen má beni enisori kayo vá avorá tesiná ino sé tian amá onté uno. ⁶Ma ma Aunan mano siádan monó namun kayo fimpá orera iyain baya kayo vá átaren ma van nain mano inino.

Firaderfiá Monó Namun Ma Uvamádan Orein Baya Ino

⁷ⁱ“Firaderfiá baru ráke monó namumpin ma mumunan nanin banta vákan ma vetintá dafíkein enisori váipasá ma vompon uvamádan ná orino siren máa sen mino.

Mai ma Devitini ki fákakhen pura sen kantasí ukhein banta ano máa mi sen mino. Intéa yanasá béi ano yivé iyan nafi mai ída mana ano kanaí e mungkin nono. Inká be ma munkuran nain daná ída kanaí e mana ano yivin nono. ^{8j}Ei ma variyaona yaná máa afová ukhé uno. Onano en avorá ona yiantanon tirékun bain mana ano ída kanaíen munkinten mino. Éimpin manáa ákona váká afová ukhé umpo senti vaya fara fákarákeya ída sen tiví aúmane ono. ^{9k}Afovasá ono. Mai ma kampun banta kayo ano nóken ma ída Yutan kéká báken mifo kampun bayafó Yutan kéká pintena uno siren ma Ban Anoni kéká bain mai kayo aviré en arantampin me kaúdékun aron durafúden tiyáken Yisasi ano siretí ankan nan moéken anunu ukhein kéka se sinten mino.

^d2:28 Rev 22:16 ^e3:1 Rev 1:4, 16

^f3:3 Mat 24:43-44; 1Te 5:2; Rev 2:5; 16:15 ^g3:4 Yut 23

^h3:5 Eks 32:32-33; Mat 10:32; Ruk 12:8 ⁱ3:7 Ais 22:22 ^j3:8 1Ko 16:9

^k3:9 Ais 45:14; 49:23; 60:14; Rev 2:9

¹⁰l^a“Mai ma sen too yaiye uman bariyáke ma senti man baya fákaan ákona ure varé eona anonafá maé Tiyarafenu ano ma ma varará nanin banta akhenóka uan onan nain damú tiretin aya onté uno.

¹¹“Ainé ovaráné erenté umpo mai ma fákaren nan bain avúavasá pákaan ákona ukharé esin mana vanta ano ída eni kin kamamó do varano. ¹²m^aAruvin ma uviní uran nain mi avían Tiyarafenui monó namuni namádaní urékun mai kéká ano ída uron mi evaránanten mino. Máan turé betin amaniná tesi Tiyarafenu aví bá béin pinté ma auyen Yerusaremí baru ma inaru fáké eran nain aví bá uvaranté uno. Inká betin amaniná tesi auyen bí bá uvaranté uno. ¹³Ma ma Aunan mano siádan monó namun kayo fimpá orera iyain baya kayo vá átaren ma van nain kayo ano inino.

Raodisiá Monó Namun Ma Uvamádan Orein Baya Ino

¹⁴“Raodisiá baru ráke monó namumpin ma mumunan nanin banta vákan ma vetintá daffkein enisori váipasá ma vompon uvamádan ná orino siren máa sen mino.

Mai ma Tiyarafenu ano ma uvan tein danáká ma fura siren daffken ma véin ánain ákonaen dakhafiyen ma funtákein avúavá ana fura sen baran banta van ma Pura Vaya ana sin banta e sen ma ariyain banta ano máa mi sen mantino. ¹⁵n^aAfová ukhekuya éi ída iyon eya inká ída múmu suron ukha ompo séi ma inikheruna mai finté mana ma inonái ono van mi iniyá uno. ¹⁶Máan

tukhá éi maen tanáará iyon uron ona se múmu suron ona sikhona van mi se soo fenté éin do vían karúdané uno. ¹⁷o^aKokhon ona va moní bá dékun báká mana yana san ída o afasí ukhé uno siya ompo éin ma auu yufúkukha avápa váke ma minó dana san iyanan ma ena kéká ano arunan uantiyain nan ída afová iya ono. ¹⁸p^eÉin afova amékuya mai séin pintena irará iyó uran kori ma fanu siyain miyaní ureyá mairá teya séi minó danápin kanáf ukhé uno siyáke inká efanten buí daná bá miyaní ureya avápá ma vaona iyáde ída ayave van ono. Inká uveri yere miyaní ure auufen pédesin kama intiya auu mábe onano. ¹⁹q^tTéi ma sinunu é iyaruna kéká maen aré asé uréi anteré iyá umpo vaya inire ará baerano.

²⁰r^oOnano, masi onará e mantakhé ankamiyá umpo mana ano séinti vaya ma iniren ma ona yivin nain mái un kumamé dunan nékun inká béi sen má nanten mino.

²¹Téi ma aruvin uviní urékun ma se Sifóe ano e siviádá ma veni kin karáká o kumaneruna an déi aruvin ma uviní uran nain banta o avíádékun tenti kin karáká ten má e kuman inten mino. ²²Ma ma Aunan mano siyádan monó namun kayo fimpá orera iyain baya kayo vá átaren ma van nain mano inino.”

Inarufá Ma Monó Tiyain Baya Ino

4^sMáan turé mun onékun inarufá mana ona yiádan bakan pefá ma ufen an den ma vaya sikhá ein oo ano máa semí, “Mará édesí ma yaná ma entavuvintin dákó inain daná aniéku

^l3:10 Ruk 21:19; 2Ti 2:12 ^m3:12 Ais 62:2; 65:15; Rev 14:1; 21:2

ⁿ3:15 Rom 12:11 ^o3:17 Ruk 12:21; 1Ko 4:8 ^p3:18 Ais 55:1

^q3:19 1Ko 11:32; Ibu 12:6; Rev 2:5 ^r3:20 Yon 14:23 ^s4:1 Rev 1:1, 10

onano.” ^{2t}Máa siyain má Kantá Aunan mano séimpin bíkaví maé inarufá mun oniyaruna vá mana kin kará bákán mairá mana ano kumantaren mino. ^{3u}Kumantan maen mai vanta au fáké yaspa onámaná bá inká nararé onámaná kanerianí bá káké ma fanu seiní iyan mino. Máan tiyákan mana afayonan mano mai kin kará mamáden eúkukhen maen danaren onámaná ano ma fanu seiní iyaren mino. ^{4v}Tuenti-fo (24) kará kayo ano mai kin kará manan aúban kaúden eúkukhan mai kará kayorá tuenti-fo (24) ánon enisori kayo ano efanten buí daná bá korifó uvantein kamamó bá ánontá uren kumantaren mino. ^{5w}Mai ma kin kará bain pinté aafa kankaré tiyan afayuí iyákan mai kin kará aufá maen dan manápá ifo afápá kan un kádan oon uruan korifó uvantein dankará intánuran kiyaren mino. Mai maen Tiyarafenui yan manápá ifo afápá kan un kádan Aunan kayo ino. ^{6x}Mai kin kará aufá kamu an dakhein un non bákán maifin ída mana yaná ban maen avusese uron ukharen mino.

Mai kin karáí sefá tefá akhen pákena safúnaren daná ma kaya iyan aunan bain kami kami ano vákan maen betíí oyampá bukhafa vá inká aufá bukhafa vápin auu kayo ano eúkukharen mino. ⁷Mai ma safúnaren danasinta maen máan mi ukhen mino. Esé ma an uanten ma vain mai raioni ma einí ukhan maen inká mairá ma vain mano afon burimakau ma einí in maen inká kanú manausí ma ukhein mano vanta auná ma einí ukhan maen inká típá ma vain mano ámaren noin tumpán an dakhen mino. ^{8y}Mai ma kaya iyain daná kayo maen dan manápá ifo afápá mana un kádan aayan barú barú ukhan maen minó

bukhafafin auu kayo ano eúkukhan inká aayan aránaópá dere varen mino. Mai yaná kayo ano ena ena vayan má inuran má ída avíkan máa siyan ban mino:

“Minó Ákona Vá Bain

Bafan Tiyarafenu maen

kantasi ukhen ne, kantasi ukhen ne,

pefá baré ein taréa fara van

ínaimpá erinten mino.”

^{9-10z}Tafúnaren daná kayo ano mai ma kin karáká kumanten ma ayun para van oriyan bain manon amusin uanten ben aví daní iyaren mino. Máan tiyan maen tuenti-fo (24) ánon enisori kayo ano varará erafúben matimen mai ma ayun para van oriyan bain manon monosí uantiyan inká betíí korifó uvantein kamamó do yavanúan kin kará arantampin kaiyáken máa siyan mino.

¹¹“Bafan noe, éi maen tetisi Tiyarafenu báke mae

eya anan dan uró banan minó ano éin manan amusin uanten éin aví ana vá daní iyáken eni ákona aránao ana vá bano.

Mai fara vara seyo, éi anon minó danasinta uvariýáke

inká ei anunurái mai yanasinta sen nan dákó ukhen taréa mai yanasinta van mino.”

Sipisipi Arará Bá Bompon

Dóki Vái Vaya Ino.

5 ^aMáan tiyáká onékun mai ma kin karáká kumanteini ayan kuron pákena yámampin mana vompon dóki fákakhan mai vompontá maen tefá tefá akhentá bompon uvantan dan manápá ifo afápá kan un kádan pintan dampán ákona uran baren mino. ²Máan tukhá onékun mana ákona enisori ano oovararen máa semí, “Iye anó kanaíen

^t4:2 Ais 6:1 ^u4:3 Isi 1:28 ^v4:4 Rev 3:18

^w4:5 Isi 1:13; Sek 4:2; Rev 1:4; 8:5; 11:19; 16:18 ^x4:6 Isi 1:5-10, 22; 10:14

^y4:8 Ais 6:2, 3; Isi 1:18; 10:12 ^z4:9-10 Rev 19:4 ^a5:1 Ais 29:11; Isi 2:9-10

ma vompontá ma yamparen ákona uran bain do kavótiren kavasinten nafino.”³ Maa sen mifo inaru fáke safi vara ráke safi inká bara aú pinte safi ída mana ano mai vompon kaváden dankafin nainíen mino.⁴ Ída mana ano mai vompon kanafen kaváden dankafin nainí ukheimpin téi váduriyá ifí dé uno.⁵ ^bIfí diyarunafin mai-tuenti-fo (24) ánon enisori kayo finté mana ano máa semí, “Ída ifí diyáke onano. Yutan ano anan pinte vanta Devitin akhá ano ma raionií uven ma aruvin uvini uren ma Devitini kin kará barein banta anon kanaíen mai ma yan manápá ifo afápá kan un kádan anamuntá ma fúkin damparan bain kasaen kavótiren dankafinten mino.”

⁶ ^cMaa sirá téi onékun Sipisipi Arará ma aruan púkaré ein mano aúbaná mantakhan mai ma safúnaren daná kayo ma kamí kamí bain má ánon enisori kéká bá ano véin maman aúban den manten eúkukhan mino. Béin ánompin kaoui viri an dakhein dan manápá ifo afápá kan un kádan bákan inká dan manápá ifo afápá kan un kádan auu vákan ma ukhein mai Tiyarafenu ano ma yan manápá ifo afápá kan un kádan Aunan ma siantan ma varará orera iyain mino.⁷ Mai Sipisipi Arará ano oriven mai ma kin karáká kumantein bantai ayan kuompáke yáman pintena mai vompon o varen mino.⁸ ^dMai vompon dóki mamaran maen mai ma kamí kamí tafúnaren daná kayo ma kaya iyain má tuenti-fo (24) ánon enisori kéká bá ano mai Sipisipi Arará arantampin mátimen mino. Mátimen mana mana ano kíta fákarú en inká kori fóké uvantein dókifin ma aunka fauran bain dere fákakhan mino. Mai Tiyarafenui vanasi ano ma amúkiyain dóki kayo ino.

⁹ ^eMai kéká ano auyen í máa sen den mino.

“Éi anan kanaíeya mai vompon mádeya mairá ma yampakhein púkin do khavótire mai vompon kavasin nono.

Mai fara vara seyo, éin aruan púdayai ei narefókéi vanasi miyaní uan Tiyarafenui ame ono.

Minó anan pinte vá ara ara vava ma siyain má inká banasi ma minó barafá bain kayo vá ino.

¹⁰ ^fMáan ture éi anon mai nanin banta maman Tiyarafenui monó doran bantaí uren nan mi Tiyarafenu vá barará nanin banta vá aúban báken beni yorará iyan

inká barará nanin bantará dafisinten mino.”

Arará Sipisipi Aví Ma Yaní Ein Baya Ino

¹¹ ^gMáan turé evaráne mo oniyáké inékun ída yankaforen enisori kayo ano veni kin kará mamáden iyen eúkuven í diyákan kamí kamí tafúnaren daná ma kaya iyain má ánon enisori kayo vá ban mino.¹² Avádóden máa sen í den mino.

“Mai ma aruan púkaré ein Sipisipi Arará kantasí ukhen mino.

Tiyarafenu ano véin nan mi kanaíen kantasí ukhein ákona vá kokhon ona vá inká afova vá ákona vá inká kákan bí bá kakhán má avu vá baranten ne sikhen mino!”

¹³ Maa siyá inékun inaru fáke safi vara ráke safi vara aú pinte safi inká un nompin nafi ma vain tafúna kayo ano yere máa sen í den mino.

“Avu vá kákan bí bá kakhán má ákona vá

kin karáká ma kumantein nina vá

^b5:5 Esé 49:9; Ais 11:1, 10; Rev 22:16 ^c5:6 Sek 4:10; Yon 1:36; Rev 13:8

^d5:8 Íbo 141:2; Rev 8:3-4 ^e5:9 Íbo 33:3; 40:3; 96:1; 98:1

^f5:10 Eks 19:6; Ais 61:6; Rev 1:6; 20:6 ^g5:11 Dan 7:10; Ibu 12:22

inká sipisipi arará ina vá para van oriyan bano.”

¹⁴Máa sen í diyain má mai ma kamí kamí tafúnaren daná kayo ano fura ino síkan inká tuenti-fo (24) ánon enisori kayo ano aron durafúden Tiyarafenu vá sipisipi arará bá aví danfen mino.

**Dan Manápá Ifo Afápá Mana
Un Kádan Anamun Máa Ma
Yampan Baré ein Ma Sipisipi
Arará Ano Kavótein Baya Ino**

6^hKakháké ontékun Sipisipi Arará ano mai ma yan manápá ifo afápá kan un kádan pintan ma yamuan ákona uran baré ein pintena mana fúkin do karáto faan karúdiyain má inékun aafa ma kankaré teiní iyain má tafúnaren daná kayo ma kamí kamí baré ein pinté mana ano siyáken, “Ereno,” sen mino. ²ⁱMáa síká mun onékun maen mana efanten osin e mantavin mai osin amaniná ma kumantá ein banta ano uve vá isana vá pákaxhan kin kamamó béin amen mino. Máan turan mai vanta ano vanasi vá mo aruvúdé betin maman barasí uré ereno van oren mino.

³Orivin maen sipisipi arará ano ena ana máden púkin do kavótiyain má inékun tafúnaren daná kayo finté ena ano siyáken “Ereno,” sen mino. ⁴Máa siyain má ena nararé osin e unen eríkan mai osin amaniná ma kumantaré ein banta mana kákan baenati maman amiren barará nanin banta finte ma kusen ban avúvavá do mádantin ma ven aruan purin maran in ákona amen mino.

⁵Sipisipi arará ano kanú manaú dádasí en ena ana máden púkin do kavótiyain má inékun maen tafúnaren daná kayo finté kanú manaú ma ukhein mano siyáken “Ereno,” síká mo oniyaruna vá mana sókonten osin mano sufá e man-

tavin mai osin amaniná ma kumantá ein mano kan kanan uman daimin tikheri fákakharen mino. ⁶Máan tukhan mai ma safúnaren daná kayo ma kamí kamí bain áubanáké mana oo ano siyáken, “Orive ei yorarí esin ná banasi ano arafan nan ino. Máan tiyan ná maná damú ma yóden miyan baran nain mano vá mana sátó kurafin ma uviti miyaní inafi áa kanú manaú tátó kurafin ma uviti an dakhein daná bari ma miyaní inafi vá barano. Máan tin nompo ída vá orifi yaa vá uvaini ana vá namu uantesin ná para vano.”

⁷Máa siran maen sipisipi arará ano kamí kamí dádasí en ena ana máden púkin do kavótiyain má inékun maen tafúnaren daná kayo finté kamí kamisí ma ukhein mano siyáken “Ereno,” sen mino. ^{8j}Máa sirá mo onékun mana aufáke yanaren uvin ayoran mana ukhein osin eren mino. Mai osin amaniná ma kumantaré ein banta aví Purin ne sikhhan maen inká Banta Masi se sin mano véin bákuren noren mino. Nókan maen kamí kamí pintan banasi yaíde vá baenatifo safi anampo safi namu aí kayofo safi inká afá tafúna kayofo safi vá mana masiman aruan kípano siren mai ákona míkanan amen mino.

⁹Máan turan maen sipisipi arará ano yan manápá dádasí en ena ana máden púkin do kavótiyain má onékun Tiyarafenui vaya ma sian dáko eintafan ma aruan púká ein kayoi aú iyampon kayo ano arata aránaópá baren mino. ¹⁰Báken mai kéká ano oovararen máa semí, “Dan báke ma fura se kantasí ukhe ona Bafan noe, intéa yamusá barará nanin banta ano ma setin tirukhá ein anonafá betin daídeya uman aminte fono. ^{11k}Máa siyain má mai kéká

^h6:1 Rev 4:6; 5:1 ⁱ6:2 Sek 1:8; 6:1-6

^j6:8 Yer 15:1-3; Isi 5:12, 17; 14:21

^k6:11 Rev 7:9, 13; 19:14

efanten buí daná kayo amiren tiamemí, “Tanáará ave ukhe avíkiyasín ná arona yoran nanin banta ma fara vain kayo yere aruan púdantisá máan tono.”

¹²lMáa sirá kakháké ontanan sipisipi arará ano yan manápá ifo afápá mana un kádan dádasí en ma ena ana máden púkin do kavótiyain má kákantá bara kaya íkan áau ano maman tókonten iyain má biyon mano maman nare an den nararesíen mino. ¹³mMáan tiyain má ayon pinte ofu kayo ano kákan uvaen ma fiki yaa ana sori in ma aran kakhufeiníen barará eraven mino. ¹⁴nMáan tiyain má ayon mano vompon dóki ana ma yádaeiníen orin maen inká anuyon kayo vá un nompin ma musó kayo ma varé ein má ano afeyoren mino.

¹⁵oMáan tíkan bara rákena kin kayo fi yafisin banta kayo fi aruvin banta kayoi ánon banta fi ona kokhon dákein kéka safi áa kákan ákona vain kayo fi inká miyan ída van doran nanin banta vá para van nanin banta kayo vá ano karan don aimpin má inká on ain ma anuyompin bain kayo fimpá o aúmanen mino. ¹⁶pMáan tuven mai kayo ano oovararen temí, “Minan anuyon noe, mesan ma on don baona oe, o ankábore setin e man darádesí mai ma sipisipi arará ano ma kin karáká kumantein ayafen ída oné tifékun beni aran naná ano setimpin ída erino. ¹⁷qMai fara vara seyo, veni aran naná ma erinten ne siká ein damúí yákó ukhen mifo iye anó kanaíen mantanten nafino.”

**Tiyarafenu Vei Vanasirá Ma
Yafibintin Ma Uman Mano Vetin
Amaniná Ída Afoká Inain Baya Ino**

7 ^rMáan turá onékun kamí kamí enisori ano ma varai kamí kamí

akhen ma vaintá mantakhen mai enisori kayo ano varará ída uvaen orino van kamí kamí uva fákakharen mino. Pákakhan mai uva ano ída uvaen oren barará ma vain daa anara safi inká un nompin nafi mo kayaen mino. ²Máan tukhá onékun áau e uní páké mana enisori ano Aunan ma vain Tiyarafenu ina ma fúkimpó damparen damuan ákona ukhein ana fákaaren eren mino. Eriyáken mai ma kamí kamí enisori ma ma vara namuin ákona amikhein kéká oovararen máa sen tiamen mino. ³s“Ída vá bara fi un non nafi inká daa ana ma vain maman namu ukhesirá Tiyarafenui yoran nanin banta ayafentá beni aní daná damparé tiféku vá ono.”

⁴tMáa sirá inékun Tiyarafenui aní daná ma yampakharé ein mai Isareri kéká pinte mana antareti ifo foti fo sausení (144,000) nanin bantan aní ukharen mino.

⁵Yutan anan pinte maen tiyan míkan mifo sirantan kan orun kádan tausení (12,000) ino.

Rubenin anan pinte maen tiyan míkan mifo sirantan kan orun kádan tausení (12,000) ino.

Katin anan pinte maen tiyan míkan mifo sirantan kan orun kádan tausení (12,000) ino.

⁶Asani anan pinte maen tiyan míkan mifo sirantan kan orun kádan tausení (12,000) ino.

Naptarini anan pinte maen tiyan míkan mifo sirantan kan orun kádan tausení (12,000) ino.

Manasenin anan pinte maen tiyan míkan mifo sirantan kan orun kádan tausení (12,000) ino.

¹6:12 Mat 24:29; Apo 2:20; Rev 8:12; 11:13; 16:18 ^m6:13 Ais 34:4 ⁿ6:14 Rev

16:20 ^o6:15 Ais 2:10, 19, 21 ^p6:16 Ruk 23:30 ^q6:17 Yoe 2:11; Mar 3:2

^r7:1 Yer 49:36; Dan 7:2 ^s7:3 Isi 9:4, 6; Rev 9:4 ^t7:4 Rev 14:1, 3

⁷ Simionini anan pinte maen tiyan mÍkan mifo sirantan kan orun kádan tauseni (12,000) ino.

Rivaini anan pinte maen tiyan mÍkan mifo sirantan kan orun kádan tauseni (12,000) ino.

Isakani anan pinte maen tiyan mÍkan mifo sirantan kan orun kádan tauseni (12,000) ino.

⁸ Yeburunini anan pinte maen tiyan mÍkan mifo sirantan kan orun kádan tauseni (12,000) ino.

Yosepini anan pinte maen tiyan mÍkan mifo sirantan kan orun kádan tauseni (12,000) ino.

Bensamenini anan pinte maen tiyan mÍkan mifo sirantan kan orun kádan tauseni (12,000) ino. Mai máa anan nanin bantafin mi Tiyarafenui aní daná ayafentá kaúken mino.

Kokhon Nanin Banta Ano Ma Sipisipi Arará Aví Ma Yaní Iyain Baya Ino

⁹ Máan turá mo onékun ída yankaforen nanin banta ma minó akhempá báken ara ara vaya siyain kayo ma minó barafin bain má minó anan nanin banta vá ano Sipisipi Arará ma kin karáká kumantein aufá mantakharen mino. Mai nanin banta ano efanten buí daná ana uriyan kefo ana fákarú ukharen mino. ¹⁰ uMai nanin banta ano avádóden oovararen máa siyaremí,

“Banta ma evaránen aviran mai setisi Tiyarafenu

ma kin karáká kumantein má inká Sipisipi Arará bá ina ino.”

¹¹ Minó enisori kayo ano kin kará bá tuenti-fo (24) ánon enisori kayo vá inká mai ma kamí kamí tafúnaren daná kayo vá maman aúban kaúden manten eúkkukhen mai enisori kayo ano kin kará

aufá ánon bara finí uren matimen Tiyarafenu aví daní iyáken ¹² vMáa semí, “Pura ino.

Aví daní in avúavá bá kakhan má kama ineine vá tusu siantan má béin kákan bí amin má

moékan ákona vá mai setisi Tiyarafenu inan bantin ayun para van oriyan banten mino.

Mai fura ino.”

Tiyarafenu Ano Ma Sipisipi Arará Narefó Ma Uman Pinté Ódein Kayoi Auí Daná Ma Sesé Uantein Baya Ino

¹³ Máa siyákan mana ánon enisori ano séin inaen temí, “Ma ma efanten buí daná uren bain kayo mai inté ukhein kéka sá báken ná inte fákesá e van nafino.”

¹⁴ wMáa síká béin tiaméú, “Kákan banta oe, éi anan afová ukha ono,” sékun béi semí, “Mai ma kákan uman pinté e unen erein kékái váken Sipisipi Ararái narefó betíi auí daná tesé uran mi maman efanten ukhen mino.

¹⁵ Máan tukhein nan mi mai kayo anon Tiyarafenui kin kará aufá báken beni monó namumpin inuran má bayan má dorarí iyan mino. Máan tiyain mai ma kin karáká kumantein mano vei kákan davaráfó betin dáantáden dafisinten mino.

¹⁶ xMai kayo ída uron mi enádá arafan puren

inká non nan aien inten mino.

Mai ma kákan aá ma akhiyan imúkan ariyan noré ein mi

yáantanten mino.

¹⁷ yMai fara vara seyo, Sipisipi Arará ma kin kará aufá mantakhein mano sipisipirá dafisin bantaí uven aunan amin non baípa aviren orintin mai non niyantín Tiyarafenu ano vetíi

u7:10 Rev 5:6-7 v7:12 Rev 5:12 w7:14 Dan 12:1; Mat 24:21

x7:16 Ais 49:10 y7:17 Íbo 23:2; Ais 25:8; Rev 21:4

ánu ma auu fenté eriyá ein minó do arúantanten mino.”

**Sipisipi Arará Ano Yan Manápá
Ifo Afápá Kan Un Kádani
(7th) En Púkimpó Damparan
Baré Ein Dóki Kavóten Mino**

8 Dan manápá ifo afápá kan un kádani en ana ma fúkimpó damparan baré ein ma Sipisipi Arará ano yo kavótiyain má teti (30) minitirá inarufá baya fúkekhen oreraen mino. ²Máan tiyain má onékun dan manápá ifo afápá kan un kádan enisori kayo ano Tiyarafenu aufá mantakháin mana mana en ufen amirú en mino.

³Máan tiyákan kama aunka iyain pauran ma íkun uan amin dóki ma korifó uvantein ena enisori ano mamaren mai ma onámaná karánará urantá e manten mino. Mumunan nanin bantai amúkin má manafiní uren íkun uan amino van kokhon kama aunka ma iyain pauran mai enisori ano mamaren kori fóké ma uvantein arata ma kin kará aufá baintá oren mino.

⁴Mai fauran má mumunan nanin bantai amúkin má ma manafini uren íkun uan amein mano mai enisori ayan pinté Tiyarafenu vaintá óden mino. ⁵aMáan turen mai enisori ano mai ma kori fóké uvantein dókifin arata rákena ira o váan kaúden ma varará karúdan eriyain má aafa kankaré tiyáken aafayuí íkan kákaníen bara khayaen mino.

Ufen Ma Asiyain Baya Ino

⁶Máan tiyain má mai ma yan manápá ifo afápá kan un kádan enisori kéká ano ma ufen pákakhá ein aseno siren maman ama san en oreraen mino.

⁷bEsé ma varé ein enisori ano ma vei ufen asiyain má nare vá ira vá inká kómópa amú bá ano manafiní uven barará eren mino. Máan tiyain má minó daná ma kanú manaú pintan masiman uran baré eimpinté mana masiman ira ano vara vá daa vá kaaren káta vá dere khen kauren mino.

⁸Máan turákan kaní ma ukhá ein enisori ano vei ufen asiyain má kákan ira anamuná ano anuyon an davin maman un nompin karúdan aravuyen kanú manaú masiman pintena mana masiman mano maman narefen mino. ⁹Máan tiyain má un nompin ma kanú manaú pintan ma ara ara uraran ma varé ein mai mana masiman mano furen orera en mino. Máan tiyan maen inká sipi kayo ma kanú manaú pintan baré eimpinté mana masiman mano namuen mino.

¹⁰Máan tiyákan kanú manausí ma ukhá ein enisori ano vei ufen asiyain má kákan ofu ano inaru fáké tosi on ma keiníen kákan non kayo vá tító non kayo vá ma vain daró eraven mino. ¹¹cMai ofu aví Íta ino. Ítan báken kanú manaú masiman pintena mana masiman maman íta nonfen mino. Máan turan mai non ma nein nanin banta ano furen mino.

¹²dMáan turákan kamí kamisí ma ukhá ein enisori ano vei ufen asiyain má kanú manaú pintan ma áau vá biyon má ofu kayo vá ma masiman uádan baré ein pintena mana masiman ankádú íkan mai akhen páke mo sítípaen dunen mino. Máan tíkan kanú manaú masiman pintena vayani mana masiman títípa íkan inká inuran má dere máan manaen mino.

¹³eMáan turá mun onékun mana sumpan mano ámaren ayompin entaviyan avádódén asiyan máa semí,

^a8:3 Eks 30:1-3; Rev 5:8 ^a8:5 Eks 19:16-19; Riv 16:12; Rev 11:19; 16:18

^b8:7 Eks 9:23-26; Isi 38:22; Yoe 2:30 ^c8:11 Yer 9:15

^d8:12 Isi 32:7; Rev 6:12-13 ^e8:13 Rev 9:12; 11:14

“Barará nanin banta oe, uman eriyen mifo yafike vá bano. Mai fara vara seyo, kanú manaú enisori ano ma fákakhein ufen ma asintin ma yákó inain nan mi aaká iyá uno.”

**Dan Manápasí En Asein Ufen
Mano Ma Esé Araíin Akhokho
Maman Afoká Ein Baya Ino**

9^fMáan turan dan manápasíen ma erein enisori ano vei ufen asiyaín má onékun mai ma inaru fáké un kararen barará eravukharé ein ofu mai ma aron ída van masí káke khi amen mino. ^{2g}Mai khi ma mamaren aron ída van masí ona yiviyain má mai masí pinté kákan ira ma sádan íkun ódein an daaren aá ma khi-yaré eintá mun iyábin títipaen mino.

³Mai íkun pinté panon kayo ano e unaren barará eravíkan iyavan kayo ano ma untaré iyainí ukhein ákona amen mino. ^{4h}Amiren mai fanon kayo siamemí, ‘Káta yana safi yunan ana fi inká daa ana fi ída vá arin nompo Ti-yarafenui aní daná ma ída ayafentá mantan nain nanin banta vá arono. ⁵Banasi ma aruan purin ákona ída vetin amen mifo iyavan mano ma vanta untádan ai san auré iyainí ukhein ákona máa anan dan manápá biyontá amen mino. ⁶ⁱMai yanasinta ma afoká intin maen banasi ano furin nan dosinten mifo ída kanafen onanten mino. Betí ankan purintó uno siren ineine inten mifo furin mano karan orinten mino.

^{7j}Osin kayo ma aruvimpin orino van aú uanteiní uren ánontá korifó uvantein kini kamamó uantádan mai fanon kayo vanta aunasi ukharen mino. ^{8k}Betí ankan ánon do ano anasi arinta ánon do ma eraveiní ukhan inka aveantun mano raioni aveantun an dakharen mino. ^{9l}Mai yaná kayo maen aenifó

uvantein tanko aurá uran betin aayan mano karisi kayo ma osin mano yarifen aruvimpin oriyan ma uu areiníen mino. ¹⁰Betí ankan ame vákan iyavan mano ma untareiní iyan maen dan manápá biyontá ma vanasi untaran ákona amen mino. ¹¹Mai kékái kin maen aron ída van masí pinta enisori ban mino. Ben aví ma Iburu veya finté Abadoni e sin inká Kiriki veya finté Aporioni e ma siyaín mai Minó Daná ma Máden Asuse in Banta en tikhen mino.

¹²Esé ma erein uman inka esanten mifo ena kankan uman ma eriyain nará dafiseno.

**Dan Manápá Ifo Afápá Mana
Un Kádaní En Asein Ufen
Mano Ma Esé Araíin Akhokho
Maman Afoká Ein Baya Ino**

¹³Máan turan dan manápá ifo afápá mana un kádaní ma ukhá ein enisori ma varé ein mano vei ufen asiyaín má Ti-yarafenui avorá ma kori fóké uvantein arata akhentá ma kamí kamí biri ma vain pinté baya siyá iné uno. ¹⁴Mai veya ano ufen ma fákakhá ein enisori van temí, “Kamí kamí enisori ma Yufretisí non akhempá ma yamuádan bain ná útúantano.” ¹⁵Máa sikhán mai ma kamí kamí enisori van ma mai oranafin mai viyontá maí damú mai áau rasá kanú manaú pintaan ma yaín mádan bain nanin banta fin-tena vá mana kéká arino van ma síkan ma útaaren baré ein kéká san inka ifo vá oriveya máan tono sen tiamen mino. ¹⁶Mai ma aruvin banta kayo ma osintá kumantaré ein mai kan antareti mirioni (200,000,000) bákan tisimiyá iné uno.

¹⁷Téin ma suu vaédá onékun maen osin kayo amaniná banta kéká kumantaren mino. Mai vanta kékái aruvin buí daná káké nararéin kun inaru

^f9:1 Rev 20:1 ^g9:2 Esé 19:28; Eks 10:12-15; Yoe 2:2, 10 ^h9:4 Rev 7:3

ⁱ9:6 Yop 3:21; Yer 8:3 ^j9:7 Yoe 2:4 ^k9:8 Yoe 1:6 ^l9:9 Yoe 2:5

an dan inká anafuren uaren sarafa onámaná an dakharen mino. Inká osin kayo ánon mano raioni kayo ánon an davin ira anamuná bá íkun má ira kharo iyain sarafa onámaná bá ano vetin oo fenté e khuyen orera iyaren mino. ¹⁸Mai osin kayo oo fenté ma ira anamuná bá íkun má inká ira kharo iyain sarafa onámaná bá ma e khuyen orera iyaré ein mai aran naná anon kanú manaú pintan ma varará nanin banta yaimádan baré ein pintena mana kéká arin puren mino. ¹⁹Mai osin kayoi ákona ma vain mai oofen má amefin mái van mino. Mai fara vara seyo, vetin ame ano osafáe ánon an dakan mi vanasi ma arin ákona ano amefin deren ban mino.

²⁰Mai ma kanú manaú uman mano ma ída aruan purein kéká ano vetíi ume avúavá pinté ída ará baeren erin nainíen mino. Mai kayo anon namu aunan má inká kori vá siriva vá onámaná bá bronsi vá daa vá ma máden ayan póké uvádan báken ída onen ída veya sen inká ída khayaen iyaren mino. Máan tiyákan mai kampun ayarafenu kayorái monó tiyaren mino. ²¹Máan tiyan báken mai ma vanta aruan puriyá ein nafi uvátakhanisá iyaren nafi inká pamúku avúavasá iyaren nafi umoyanisá iyaren nafi mai yanasinta finté ída ará baeran nainíen mino.

Mana Enisori Vá Titó Bompon Dóki Ana Vái Vaya Ino

10 Máan turá mairá mun oniyaruna vá ena ákona enisori ano inaru fáké eriyákan konan mano véin eúkuvin afayonan mano ánonotá davenakhan mino. Béin auná ano áau ma fanu seiní iyákan ben arantan mano ira ma uruádan keiní iyaren mino. ²Mai enisori ano ayan kuron pákena yaran-

tan un non daró kaen inká ayan ópáke yarantan barará kaen uren mantakhen ayampin mana sató bompon dóki kaváden pákakharen mino. ³Pákakhen mai enisori ano raioni ma vádeiní iyain má dan manápá ifo afápá kan un kádan dádá aafa khankaré tiyan baya sen mino.

⁴Mai ma aafa khankaré tiyan baya sein maman bompompin uvarano van iyaruna vá inaru fáké mana oova ano máa semí, “Mai veya áin ná inimpin mana vantiya ída vá bompompin uvarano.”

⁵Máa síkan mai ma un non daró bá barará bá arantan daren mantakharé ein enisori ano ayan kuron pákena yáman orun maman inaru fasíen mino.

⁶Máan turen mai ma ayun para van oriyan bain Ti yarafenu ano ma inaru vá bara vá uváden maifin ma vain danasinta uváden ma inká un non uváden maifin ma vain danasinta ma uvantein manon avíká ayan befiyó uren temí, “Ti yarafenu ano ída ave iyan banten mino. ⁷Máan tinten mifo ena enisori ano ma vei ufen asin nain damúí Ti yarafenui aúpá ineine ma vei sakhampái in doran banta kayo oo ráke uaren ma síkhá ein mo kanáf inten mino.”

⁸Máa siren inaru fáké evaránen mai oova ano semí, “Ore vá un non daró bá barará bá ma mantakhein enisori ayampin ma kavákein bompon dóki ana vá o varano.”

⁹Máa síká mai enisori vaípa orivé títo bompon dóki ana simino van mo inantékun béi semí, “Máde nano. Nesin maen oorá bonkampun anu an den ase inten mifo nankúdesin ma arápin aravinten mi morun kákantá íta inten mino.”

¹⁰Máa síká mai enisori ayan pintena síto bompon dóki ana o máde nékun bonkampun anu an den ase en mifo

^m9:20 Íbo 115:4-7; 135:15-18; Dan 5:23; Rev 16:9, 11 ⁿ10:4 Dan 12:4, 9

^o10:5 Diu 32:40; Dan 12:7 ^p10:7 Amo 3:7 ^q10:9 Isi 2:8-3:3

nankúdekun ma sirápin araven maen morun kákantá itaen mino. ¹¹Máan tiyákan béi semí, “Ma yanasinta ano minó nanin bantafin má minó bara kayofin má ara ara veya ma siyain nanin bantafin má inká kin kayofin máí afoká inten mifo sakhanampa veya vá evaráne mai kéká tiameno.”

Kankan Daná Ano Ma Sian Amá Ukhein Baya Ino

11 ¹Máa siren mana avamáan onan danka maman timiren temí, “Oriveya vá Tiyarafenui monó namun má arata vá mo avamáan oniyáke vá maifin ma monó tiyain nanin banta yere vá dankafono. ²Máan tin nampo akhempá ma uvaren eúkukhein dafu aúpin ída vá avamáan onano. Mai fara vara seyo, ena anan nanin banta amikhein afokhan mi vantin mai nanin banta anon mai ma Yerusaremí baru ma kantasí ukheimpin foti-tu (42) viyontá onóbe enóbe iyáken dasan dasan inten mino. ³Máan tiyantí tenti veya ma sian amá in bantá kan ákona amékun maen baré búí daná uren mana tauseni ifo tu antaret sikisti (1,260) yamúí sakhanampa veya sinten mino.”

⁴Mai sakhanampa vantá kan maen mai ma ma varará daffkein Bafan avorá ma mantakhein orifi yaa aná kan má oon uruan intánin danka kanan má ino. ⁵Mana vanta ano ma vetí ankan aruré uman ameno van ma intin maen betin oo fenté ma kuvin nain ira ano mai ma namuroí uantiyáin nain kéká kaan kaurinten mino. Mai aa sáké anan betin ma uman ameno van iyá inain kéká ano furinten mino. ⁶Betí ankampin ákona vantin pasen Tiyarafenui sakhanampa

veya ma siyáken kasaen inaru onará dasirádantin ída á danten mino. Máan tiyáken un non má non kayo vá maman nare noní ana iyáken inká betíí anunurá ara ara aa fáké barará nanin banta amaniná uman aminten mino.

⁷Wetí ankan ma sakhanampa veya sian kíparantin maen mai ma aron ída van masípin ma afá tafúna varéin nain mano e unen édavuvén maen békanan aruan purinten mino. ⁸Xkákan baru Sodomu vá inká Isipi vara va san ma namu avúavá bfkakhen ne ma siyain an mi Yerusaremí baru ano yakhen betíí Bafan Yisasin daa unkamádantá arein mino. Máan manan en mi mai varui kákan aasá békanan aruan kaintin banten mino. ⁹Máan turantin maen kanú manaú bayan má manápá áaurá báí míkanan bantin minó bara fáke nanin banta vá ara ara anan má inká ara ara veya ma siyain kayo vá ano e óden ída vá masí ono sinten mino. ¹⁰Mai sakhanampa vantá kanan manon ara ara uman barará nanin banta amaniná kaiyará intin pasen békan ma furein nan barará nanin banta ano amusin uren kama yanasinta ven amin maran inten mino.

¹¹YMáan ten oriyantin ma kanú manaú bayan má manápá áau vá ma esantantin maen aunan ma amin aunan mano Tiyarafenui finté maí kanan bantafin e ferantin maíkan banta ano evaránen orun mantantin maen mai ma oniyaré inain nanin banta ano akhokho van en orera inten mino. ¹²ZMáan tiyan inintin maen inaru fáké avádóden oovararen máa sinten mino. “Mafá édano,” sintin maen békani namuro kayo ano kakháken ontantin konan

¹11:1 Isi 40:3; Sek 2:1-2 ⁵11:2 Ruk 21:24; Rev 13:5 ⁴11:4 Sek 4:3, 11-14

^u11:5 2Sa 22:9; Íbo 97:3 ^v11:6 Eks 7:17-20; 1Sa 4:8; 1Ki 17:1

^w11:7 Dan 7:21; Rev 12:17; 13:7; 17:8 ^x11:8 Ruk 13:34

^y11:11 Isi 37:5, 10 ^z11:12 2Ki 2:11

mano míkanaan aviren inarufá ódinten mino.

^{13a}Mai áaurá anan kákantá bara khaya intin mai varui mana akhen pákena minó daná baráken asuse intin dan manápá ifo afápá kan un kádan tauseni (7,000) nanin bantan aruan pur-inten mino. Máan tintin ma ída furin para varé inain kéká ano akhokho van uaren inarufá ma vain Tiyarafenu aví daní inten mino.

^{14b}Kaní ma in uman mano inka esanten[§] mifo kanú manausí ma in uman mano inka e un inten mino.

**Dan Manápá Ifo Afápá Kana Un
Kádaní Ma Ukhein Ufen Ma Asein
Manon Kanú Manausí Ma
In Uman Baren Eren Mino.**

^{15c}Máa sirákan mai ma yan manápá ifo afápá kan un kádaní ma ukharé ein enisori ano ma vei ufen asiyain má inarufin avádóden oovaren temí, “Ma varará ma yafisin mai Bafan mano ma vei vanasi evaránen avirano van ma aní uran baré ein nináf inka ein béi anon mai nanin bantará dafisen oriyan banten mino.”

¹⁶Máa siyákan mai ma Tiyarafenu aurfá ma tuenti-fo (24) ánon enisori kéká ma kin karáká kumantein kayo ano ánon bara finí uren mátimen bein monó tiantiyán ¹⁷temí, “Minó Ákona Vá Baona Bafan Tiyarafenu oe, éi fefá bare ma saréa fara vaona van mi setí ankan éin tusu sianté uno. Mai fara vara seyo, inka kákan ákona mamareya

ei yafisin aúpin inka kin dorarí in arafí ukha ono. ^{18d}Minó bara fáke nanin banta ano éin aranan uantiyan mifo saréa inka eni aran naná eren mino.

Púkaré ein nanin bantai avúavá ma yaimiyáke ma ei yoran banta kéká miyan aminona yamú inka afoká en mino.

Ei sakhánampa vanta kéká bá inká ei kantasí ma ukhein nanin banta vá miyan amin nono.

Mai ma aví bain má inká aví ma ída vain má anon éin nan peré iyain mino.

Ma varará ma váken minó daná máden asuse iyá ein kéká éi anon aruan kípan nono.”

^{19e}Máa siran inarufá Tiyarafenu monó namun ona yiran béi ma ará manafiní uren kasen ban man baya ma kain bain bokhise kasaen minó ano onen mino. Onákan mai finté afayuí iyáken aafa kankaré tin kákantá bara khaya iyain má kákan á dan kómópá amú eren mino.

**Mana Nanin Má
Drakoni** Vái Vaya Ino**

12 Mana kákantá enará ukhein daná inarurá afoká íká oniyaruna vá mana nanin mano áau fóké auí uran biyon mano ven arantan aránaópá bakan tiyan míkan mifo sirantan kan orun kádan (12) ofu kayo fóké kin kamamosí ukharen mino. ^{2f}Mai nanin mano amúbasí ukharen iyampon kaono van inamun nan iniyáken bá den mino.

[§]11:14 Mai kaní ma in uman maen 9:13-21 fin tikhen mino.

**12:0 *Drakoni* e ma siyain mai kákan púpúku an dakhein osafáe ma ayan má bain mino. Banasi ano véin nan peré iyain mino.

^a11:13 Rev 6:12; 16:18 ^b11:14 Rev 9:12

^c11:15 Eks 15:18; Íbo 10:16; Dan 2:44; 7:14 ^d11:18 Íbo 110:5; 115:13; Rom 2:5;

Rev 20:11-13 ^e11:19 Ibu 9:4; Rev 8:5; 15:5; 16:21 ^f12:2 Mai 4:10

^{3g}Máan tiyain má inarurá ena avúavá afokáí oné uno. Mana kákan nararé drakoni ano yan manápá ifo afápá kan un kádan ánon bákan tiyan mikan biri e unakhan minó ánotá kin kamamó ukharen mino. ^{4h}Mai drakoni ano kanú manaú pintan ma ofu kayo yaimádan baré ein pintena mana masiman ame fóké do ankaman karúdan ma varará eraven mino. Mai ma inamun nan iniyaré ein nanin mano iyampon kaintí aruré kakhaseno van aufá mantakharen mino.

⁵ⁱMai nanin mano afon iyampon kaúdan ínaimpá mai iyampon mano aeni fóké uvantein ayonta fákaren minó bara fintena nanin bantará dafisin nain bákan mai drakoni ayan pintena yo yafen Tiyarafenui kin karáká mun kaen mino.

⁶Máan turákan mana tauseni ifo tu antareti vá sikisti (1,260) yamú o vantin dafiseno van ma Tiyarafenu ano kámá barafá útaan kaúantan baré eipá mai nanin mano karan oren mino. ^{7j}Máan turákan inarufá kákan aruvin afoká in Maikori ano vei enisori kayo vá kábin inká mai drakoni ano vei enisori kayo vá kábin uven kákan aruvirien mino.

⁸Mai aruvin manon drakonii kéká ma inarufá baré ein pintena Maikorini kéká ano aren taven mino. ^{9k}Mai drakoni van ma Ban Anon ne siyákan peyanté osafáe ma váken barará nanin banta mákasiyan baré ein má bei enisori kayo vái kharúdan ma varará eren mino.

^{10l}Máan turá inékun mana oova ano inaru fáké máa semí,

“Banasi ma evaránen avirano van ma aní ukharé ein banta ano inka vanasi evaránen avíden béimpin ákona vákan Tiyarafenui yafisimpin dafisen mino. Mai fara vara seyó, Ti-

yarafenu avorá ma inuran má bayan má ma seti siyofi sífá tiváeyan aufin kuráden baya siyáken betíí avúavá ma yaimiyaré ein banta inka yau-man karúdan ma varará eren mino.

¹¹Sipisipi Ararái nare vá pura vaya vá pói Maikorini kéká ano mai ma aufin kuráden baya siyaré ein banta maman bararasí uren betíí furin nan ída feren mino. ^{12m}Máan tukhein nará inaru vá maifin ma vaona kayo vá ano amusin ná ono. Máan tukhen mifo vara vá un non ma soe, akhokho vará ono. Mai fara vara seyó, Ban Anon mano afová iyáken títo máarái yoranté uno siren kákan aran naná báí erakhen mino.”

¹³Mai drakoni ano onákan béin barará do siantiyaimpin mai ma afon iyampon kaein nanin dakhafen mino.

¹⁴ⁿDakhádan oriyan maen kákan tumpán aayan amiren tiantan mai ma kanú manaú orana ifo yan manápá ifo afápá mana un kádan biyontá (3-½ orana) ma kámá barafá o vantin ma ventá dafisino siren ma útaan kaúantan baré eipá ámaren oren mino.

¹⁵Máan tiyain má drakoni ano nompó mai nanin ufurono van oo safédan mai finté kákan non taven mino. ¹⁶Máan tíkan maen bara ano mai nanin ayaen oo safédan drakoni oo fenté ma khuvein non mano varafin orun peren mino. ^{17o}Máan tíkan drakoni ano mai nanin nan kákan arananá baren mino. Arananá máden mai nanin akhafana ma Tiyarafenui man baya ánain bákuriyan ben oo yayiyáken inká Yisasini kama vaya ma sian dáko iyain kéká bá aruvin araíen mino.

⁸12:3 Dan 7:7 ^h12:4 Dan 8:10 ⁱ12:5 Íbo 2:9; Ais 7:14; 66:7; Rev 19:15

^j12:7 Yut 9 ^k12:9 Esé 3:1, 14; Ruk 10:18; 22:31; Rev 20:2 ^l12:10 Yop 1:9-11;

Sek 3:1 ^m12:12 Ais 44:23; 49:13 ⁿ12:14 Dan 7:25; 12:7 ^o12:17 Rev 11:7

Bea ino. (Rev 13.2)

Repeti ino. (Rev 13.2)

Afá Tafúna Ma Un Non Pinté E Unen Édein Baya Ino

¹⁸Máan turen un non akhempá o mantakhen ave en mino.

13^PMáan tukhá ma oniyaruna vá mana afá tafúna ano un non pinté e unen éden mino. Mai safúna maen dan manápá ifo afápá kan un kádan ánon bákan inká tiyan mikan biri e unakheintá tiyan mikan kin kamamó uran bákan ánon kayorá Tiyarafenu ma ankayan tikhein bí kayo uvantaren mino. ²^QMai safúna ano repeti^{††} an dakharen mifo ven arantan mano bea^{‡‡} arantan an dakhán inka oo ano raioni^{¶¶} oo ma einíi ukharen mino. Máan tukhan mai drakoni ano vei ákona vá kin kará bá dafisin ákona vá amen mino.

³^rMai safúna ma onékun maen béin ánon kayo fintena mana ánon aruran bákan ída kanafen unírí ukharen mino. Máan tukharen mifo mai namon ma evaránen uniyain má barará nanin banta ano sakha iyáken mai afá tafúna oo yaiyen béin ánain bákuren mino. ⁴Drakoni ano ma afá tafúna mai ákona amikhein nan banasi ano amusin iyáken béintá monó tiyan inká mai safúna vá dere monó tiantiyán amusin en temí,

“Iye anó béin an dakhe fono. Iye anó kanaíeya véin má aruvinte fono.”

⁵^sMáa siren mai safúna áíkan Tiyarafenu oyampá baya siyáken ma fotitu (42) viyontá ma vei anunurá minó avúavá baran nain ákona amen mino. ⁶Máan turákan béi Tiyarafenu oyampá baya siyáken ben aví bá inká ben má ma inarufá bain nanin banta vá ankayan ten mino. ⁷^UMáan tiyákan Tiyarafenui kantasí ukhein nanin banta ma aren tavin ákona mai safúna amen mino. Amiren minó anan nanin banta vá banasi vá ara ara vaya siyáken ma minó barafá bain nanin bantará ma yafisin ákona vá dere amen mino. ⁸^uAmirantin maen mai ma ma vara ída uvantén ma aun baran bompompín ma aví ída uvantaréin nain nanin banta ma váin nain mano mai safúnará monó tinten mino. Mai vompon maen mai ma vanasi ano aruan purein Sipisipi Arará ina ino.

⁹Átaren ma van nain mano vá inino. ¹⁰^vKaravusifin orino ma sikhá in nain kéká ano karavusíí intin inká baenati fóké aruan purino ma sikhá inain kéká baenati fóí aruan purinten mino. Máan ma intiya kantasí ma ukhan nona nanin banta ano ída vá akhokho van iyákeya mumunan ná pákaan ákona ono.

^{††}**13:2** *Repeti* e ma siyain mai kákan pusi an dakhein tafúna ino. Mai ano kasaen banta aruren kakha sinten mino.

^{‡‡}**13:2** *Bea* e ma siyain mai iyan an dakhein kákan tafúna ino. Béin ayan arantan kákan bákan ayafó báta uron ukhein mino. Mai ano kasaen banta aruren kakha sinten mino.

^{¶¶}**13:2** *Raioni* e ma siyain mai kákan ayo ana fusi an dakhein tafúna ino. Béin aveantun an báta ukhan kasaen minó daná kakhasé iyan mino. Banasi ano mai van kákantá peré iyan mino.

^P**13:1** Rev 12:3; 17:3, 7-12 ^Q**13:2** Dan 7:4-6 ^r**13:3** Rev 17:8

^s**13:5** Dan 7:8, 25; 11:36; Rev 11:2 ^U**13:7** Rev 11:7

^u**13:8** Íbo 69:28; Rev 17:8; 20:12, 15; 21:27 ^v**13:10** Yer 15:2; 43:11; Rev 14:12

Afá Tafuna Ano Ma Vara Finté E Unein Baya Ino

¹¹Máa sirá ma onékun bara finté ena afá tafúna e unen édákan ánon pinté Sipisipi Ararái virí kan ma e uneiní ukhan mifo veni veya ano drakoni ma veya seinfen mino. ¹²Mai safúna ano esé ma non pinté erikhá ein tafúnai ákona mamaren maen minó nanin banta yuvun íkan mai ma arukháin ma namon unein tafúnará monó ten mino. ¹³^wMáan tiyáken moéken enará ukhein aní danasinta uvaren dararen iyan ira van dere síkan inaru fáké minó nanin banta avorá barará eriyen onen mino. ¹⁴Enará ukhein aní danasinta ma uvaren dararen in ákona Tiyarafenu ano amiran maen mai ma esé e unein tafúna avíká barará nanin banta mákáden tikan mai ma vaenatifó aruran ma fúkaren evará-nen e mantein tafúnai aman manon uvaren mino. ¹⁵Máan turan mai ma uvamá dein tafúna aman manon ma aunan amintin baya sinti ma véintá ída monó tin nain nanin banta ma aruan purin nain ákona Tiyarafenu ano amen mino. ¹⁶^xAmiran minó aví bain má ída aví bain má inká ona vain má ída ona vain má inká miyan ída van doran banta vá para ma van banta vá ano mana aní daná ayan kuompáke yámanta safi ayafenta safi kaino van duvun en mino. ¹⁷Mai aní dana ma ída van nain kéká ano ída kanaíen ena finte miyaníen nafi inká sarii safi en inten mino. Mai aní daná maen esé ma e unein tafúna aví vákan mai nampá ano ven avíi aní ukhen mino.

¹⁸Máan tukhein nan mi kama ineine vá afova vá ma van nain kéká ano vá mai afá tafúnai nampá daíden beni ana veya afová ino. Mai fara vara seyo, mai

nampá maen mana vanta inan bákan mai nampa maen kanú manaú sikhisi (666) ino.

Sipisipi Arará Bá Mana Antareti Ifo Foti Fo Tauseni (144,000) Nanin Banta Vái Vaya Ino

14 Máa sirá onékun Sipisipi Arará ano Saioní anuyontá mantakhan mana antareti ifo foti fo sauseni (144,000) nanin banta ma ven aví bá be Afóen aví bá ma ayafentá uvantein kéká ano véin má baren mino. ²^yMáan tukhá inékun inaru fáké non iya ma káusiyen avaya seiní iyan inká aafa ma kákantá kankaré teiníen mino. Mai ma kita asin banta kayo ano ma manafin asiyan avaya ereiníi iyá iné uno. ³^zMai kayo ano kin kará aufá mantakhen kamí kamí tafúnaren daná ma aunan bain má tuenti-fo (24) ánon enisori kayo vá avorá mana auyen í diyaren mino. Mai íi ana ída ena kéká ano afová en mifo mai ma mana antareti ifo foti fo suseni (144,000) nanin banta ma ma vara ráke miyaní uren avíkaré ein kayo ano anan afová en mino. ⁴Mai kéká ano ída anasi arinta vá bariyáken maen pura sen avusese ukhen mi Sipisipi Arará ma oreípá bákuren noren mino. Barará nanin banta fintena esé ma kharaein dunan ma Tiyarafenu vá Sipisipi Arará bá ma íkun uan amein an dakhein kéká ino. ⁵Mai kayo oo fenté ida mana kampun baya sikhein bákan pura sen betíi aau ída van kéká ino.

Kanú Manaú Enisorii Vaya Ino

⁶Máa sirá onékun mana enisori ano ayompin ámaren entaviyáken ma varará ma minó akhempá mana mana anan nanin banta ma váken ara ara veya siyaimpin kama veya ma fara van oriyan

^w13:13 1Ki 18:24-39; Mat 24:24; Rev 19:20 ^x13:16 Rev 14:9-11; 16:2; 20:4
^y14:2 Rev 1:15; 19:6 ^z14:3 Ais 42:10; Rev 5:9; 7:4

bain tian dákóen mino. ⁷Mai enisori ano oovararen temí, “Tiyarafenu van periyáke véin mana vá kákan bí ameno. Mai fara vara seyo, véi ma vanasi yaimin nain damú inka yákó en mifo mai ma inaru vá bara vá un non má tító non kayo vá ma uvarein Tiyarafenurá ana vá monó teno.”

^{8a}Máa siran inká kaní ma ukhá ein enisori ano ayompin mai ánain eriyáken oovararen temí, “Aví ma varé ein baru Babironi inka varáken asuse en mino. Mai fara va ino. Mai kákan baruí famúku avúavá anon banasi e yarifádan beni avúavá bariyáken óen non ma neini iyaré in mi Tiyarafenui aran naná anon máan ten mino.”

^{9b}Máa sirákan kanú manausí ma ukhá ein enisori ano mai ma esé erein enisori kanan ánain eriyáken avádóden oovararen temí, “Inte nanin banta anó afá tafúna vá beni aman manontá bá monó tiyáken ná beni aní daná ayafenta safi ayanta safi mantaré inten nafi ^{10c}mai kéká anon Tiyarafenui aran naná ma vain kápifin ma ída ena non má ópé ukhan íta iyain mi nanten mino. Narantin maen Sipisipi Arará bá inká kantasí ma ukhein enisori kayo avorá báí mai kéká sarafa onámaná ma ira khiyain póké akhiyantín berai siyan banten mino. ^{11d}Máan tiyantín mai ma akhiyan nain íkun mano édaviyan para van oriyan banten mino. Mai fara vara seyo, safúna vá beni aman manontá bá ma monó tiantiyáken ma ven aví ma mantaréin nain kéká anon ena ena vayan má inuran má ída kusen avíken banten mino.” ^{12e}Mai ma kantasí ukhein Tiyarafenui man baya vákuriyáken Yisasintá mumunan iyan ma ara ara uman

bariyain nanin banta vá ará kusin masá mantaan ákona ino.

¹³Máa sirá inékun mana oova ano inaru fáké temí, “Ma vaya vompompin uvarano. ‘Tare ráké ma Bafan avíká purin nain mano vá amusin ino.’”

Mai van Aunan mano furan tino siren máa semí, “Mai kéká ano ma uman pinté doriyá ein nan avíkan baranten mino. Mai fara vara seyo, vetí ankan ma kama avúavá bariyaré ein manon betin ánain bákurinten mino.”

Ma Vara Ráke Nanin Banta Ma E Avían Átaru Inain Baya Ino

^{14f}Máa sirá mo oniyaruna vá mana efanten konan bákan mai yaró mana vanta aninten mano kumantaren mino. Ben ánontá korifó uvantein kin kamamó bákan inká davénakhan an iyain tópe ven ayampin baren mino.

¹⁵Máan tiyain má ena enisori ano kákan monó namun pinté e khuven eriyáken mai ma konan daró kumantaré ein banta oovararen tiamemí, “Davénakhein tópe eina mamare yunan duyaseno. Mai fara vara seyo, varará inka yunan karakhan mai yunan ma yuyasin damú inka afoká en mino.” ¹⁶Máa síkan mai ma konan daró kumantaré ein banta ano vei yavénakhein tópe mamaren ma vara amaniná karúdan mai ma karakhá ein dunan duyasen mino.

¹⁷Máan turan inká ena enisori ano inarufá ma vain kákan monó namun pinté e khuven eriyákan ben ayampin má dere yavénakhen an iyain tópe varen mino. ^{18g}Inká mai oyampáké ma vara ma ira saman kaurin ákona ma amikhein enisori ano arata ma váipáké e unen eriyáken mai ma an ukhan davé-

^a14:8 Ais 21:9; Yer 51:7-8; Rev 17:2; 18:2, 3 ^b14:9 Rev 13:12-17 ^c14:10 Esé 19:24; Íbo 75:8; Ais 51:17, 22; Yer 25:15-16; Isi 38:22; Rev 16:19; 20:10

^d14:11 Ais 34:10 ^e14:12 Rev 13:10 ^f14:14 Dan 7:13 ^g14:18 Yoe 3:13

nakhein tópe ma fákakhá ein enisori oovararen tiamemí, “Ei sópe mamareya vá barará ma uvaini anan táké aran intaré ein mai inka afu khakhen mifo vá tíkano.”¹⁹ Máa síkan mai enisori ano vei yavénakhein tópe maman barará karú-daren afu ma khakharé ein uvaini aran máa tíkaan Tiyarafenui aran naná ano ma uvaini aran dasamiyaimpin karú-dan oren mino.²⁰^hMáan turen kákan baru akhempá mai uvaini yasamiyan mai finté nare non mano kanú manaú antareti (300) kiromitará oriyákan mai nare ano orun manen dan manápá fitirá óden mino.⁸⁸ Mai ma orun manen édein mai osin oorá ma aeni kuvé iyainí ukheintái mun kanaíen mino.

Mosesin Má Sipisipi Arará Báí Í Ino

15 Máan turá inarufá onékun maen kákantá enará ukhein daná afoká en mino. Mai yaná maen dan manápá ifo afápá kan un kádan enisori kayo ano yan manápá ifo afápá kan un kádan aí daná bá uman má pákakharen mino. Mai maen Tiyarafenui sipá kípan aran naná ma amin nain mino.² Máan tukhá onékun mana kamu an dakhein un non má ira vá ano manafiní ukhan mino. Máan tukhan mai ma afá tafúna vá ben aman manon má ma aruvúden esantakhá ein kéká ano mai akhempá mantakhen Tiyarafenu ano ma amein kita kayo asiyaren mino.³ⁱAsiyáken Tiyarafenui yoran banta Mosesin má Sipisipi Arará báí í máa sen den mino. “Minó Ákona Vá Baona Bafan Tiyarafenu oe, kákantá enará ukhein danasinta éi manan dákó é iya ono. Ara ara nanin bantai kin mi van nan

éin avúavá anon pura sen puntáken mino.

⁴^jBafan noe, iye anó éin nan ída feranton kákan bí aminten nafino.

Para vara seyo, eyaká anan kantasí ukha ono.

Ara ara vara fáke nanin banta ano e átaru uven

éintá anan monó tiantanten mino.

Mai fara vara seyo, eni funtákein avúavá inka maman dákó en mino.”

Dan Manápá Ifo Afápá Kan Un Kádan Dókifin Ma Aí Daná Bá Uman Má Ma Vái Pákena Vaya Ino

⁵^kMáan turá oniyaruna vá inarufá ma Tiyarafenui kákan monó namun bákan ma yavaráefó e auádan ma kantasí ukharé ein karafarani ona yiven mino.

⁶ Mai ma yan manápá ifo afápá kan un kádan enisori kayo ma Tiyarafenui aran naná bain dóki kayo ma fákakhá ein kéká ano mai kákan monó namunté e khuyen eren mino. Betí ankan ayá efan-ten buí dana en inká kori fóké ma uvan-tein daná ákorá kuven ukharen mino.

⁷ Máan turen ma e khuyen eriyain má mai ma kamí kamí tafúnaren daná ma aunan bain kayo finté mana ano mai ma yan manápá ifo afápá kan un kádan dóki ma korifó uvanteimpin ma ayun para van oriyan ban Tiyarafenui aran naná ma varé ein mamariyan mai enisori kéká mana amirú en mino.⁸^lMáan turákan Tiyarafenui kakhan má ákona vái íkun mano mai kákan monó namumpin bíken mino. Mana ano ída kanaíen mai namumpin ódikhantin ma yan manápá ifo afápá kan un kádan enisori ano ma uman má aí daná bá bain dóki kayo ma vanasi

⁸⁸**14:20** Kiriki vaya finté osin oorá ma aeni kuvé iyaintái mun kanaí ukhen ne ma sikhein mai yan manápá fiti vá manaí ukhen mino.

^h**14:20** Ais 63:3; Rev 19:15 ⁱ**15:3** Eks 15:1; Íbo 139:14; 145:17 ^j**15:4** Íbo 86:9; Yer 10:6-7 ^k**15:5** Eks 38:21 ^l**15:8** 1Ki 8:10-11; 2Kr 5:13-14; Ais 6:4

amaniná banaan kíparrantin mi ínaim-páké un peranten mino.

**Tiyarafenui Yan Manápá Ifo
Afápá Kan Un Kádan Aran
Daná Banain Nain Baya Ino**

16 Maa sirá inékun mai monó namunté mana oova ano mai máa enisori siamemí, “Aravuveya mai ma yan manápá ifo afápá kan un kádan dóki ma fákakheonafin ma Tiyarafenui aran naná bain bara amaniná bana ono.”

^{2m}Maa síkan eséke enisori ano vei yóki varen mo vara amaniná bana íkan mai ma afá tafúnai aní daná mamaren ma ven aman manontá monó tiyá ein kayo aurá moéken namu ukhein namon kayo inisen ken mino.

³ⁿMáan tiyain ma kaní ma ukhá ein enisori ano vei yóki varen mo un non ané bana iyain má un non mano furin bantai nare ma einí íkan minó dasasinta ma maifin baré ein mano fúan kípén mino.

⁴Máan tuvin maen kanú manausí ma ukhá ein enisori ano vei yóki varen mo kákan non kayo vá inká tító non kayo vápin banaran maen mamannarefen mino. ⁵Máan turá inékun mai ma minó non kayorá dafiká ein enisori ano máa semí, “Mai ma fefá bare ma saréa fara vaona oe, éi Kantasí Ukhaona ono. Mai fara vara seyo funtákein avúavákái vanasi yaídeya ma uman amiya ono. ⁶Mai fara vara seyo, mai nanin banta anon eni kantasí ukhein kéká bá sakanampa vanta kayo vá aruan púdan betí nare ano varafin eravukharé iyan mai anonafái vetí nare amen nan niyan mino.” ^{7o}Maa sirá inékun arata vain táké mana vaya ano máa semí, “Minó Ákona Vá Baona Bafan Ti-

yarafenu oe, eni vanasi yaimin avúavá maen pura sen puntáken mino.”

⁸Maa sirákan áau ano kákaníen banasi aá akhano van kamí kamisí ma ukharé ein enisori ano vei yóki varen mo áaufin banaren ákona amen mino. ^{9p}Máan turákan kákan aá ken banasi akhiyaimpin Tiyarafenui ano ma mai uman kayo amein nan ben oyampá baya siren ída ará baeren béin aví daníen mino.

^{10q}Máan tiyákan dan manápasí ma ukharé ein enisori ano vei yóki varen mo afá tafúnai kin karáká banarákan beni yafisin aúpin manadá kákan títipaen kumayusí iyain má beni kéká ano aveantuntá inkékípiyáken kákantá berai sen mino. ¹¹Máan tiyáken betí namon mano ma aí iyain nan manan inarufá ma vain Ayarafenuin oyampá baya sen mifo mai ma namu avúavá bariyaré ein nan ída sirun noe siren ará baeren mino.

^{12r}Máan tiyákan dan manápá ifo afápá mana unkádaní ma ukhá ein enisori ano vei yóki varen mo Yufretisi e ma siyain nompin banaran mai non kánen mino. Áau e uní pákena kin kékái aafí uantantin kasaen betí aruvin banta kayo iyanen áau orun perápá orino van mi máan ten mino. ¹³Máan turá onékun tokhá an dakhein namu aunan kanú manáu ano drakoni vá afá tafúna vá inká kampun sakanampa vanta vá oo fenté e khuven eren mino. ^{14s}Mai aunan kayo maen Ban Anoni enará ukhein daná kayo ma mamán dáko in kékái varen mino. Mai kéká ano minó barafá ma vain kin kayo siamintin mai ma Minó Ákona Vá Bain Tiyarafenui yamú ma yáko intin ma ven má aruvin nain dasasinta útaan manafin átaru ino van mi oreraen mino.

^m16:2 Eks 9:10; Rev 13:12-17 ⁿ16:3 Eks 7:17-21

^o16:7 Íbo 19:9; Rev 15:3 ^p16:9 Rev 9:20-21

^q16:10 Eks 10:22; Ais 8:21-22 ^r16:12 Ais 11:15 ^s16:14 Rev 19:19

¹⁵t“Afovasá ono. Téi maé umoyan banta an davé uimpin mi erenté umpo intéa kéká anó betúí ona uren ban ná auu sapé tikhá inten nafi mai kéká ano vanasi avorá ída avápa oren maen inká ayave van en inten mino.”

¹⁶uMáan turen minó kin kayo o avire e avire uren Iburu vaya finté Amákedoni e ma siyain barurá átaru en mino.

¹⁷Máan tiyákan dan manápá ifo afápá kan unkádaní ma ukhá ein enisori ano vei yóki varen mo uvafin bana iyain má kákan monó namumpin ma kin kará bain pinté mana kákan oova ano máa semí, “Inka kípen mino.” ¹⁸vMáa siyain má pefá ída iyá einíen afayuíen aafa kankaré tiyain má ma vara moékentá kayaen mino. ¹⁹wMáan tiyain má mai ma kákan baru Babironi e sin ma varé ein mano kanú manaú pintan kauren orera íkan minó akhempá ma kákan baru kayo varé ein dere vá kauren oreraen mino. Máan tiyákan Tiyarafenu ano Babironí baru ma váken umeí iyá ein nan o varen me iniren mai ma vei aran naná uvaini ma kápifin bíkakhá ein amen mino. ²⁰xMáan tíkan un nompin ma musó kayo varé ein o afeyoran inká anu yon kayo ma varé ein man avafen mino. ²¹yMáan tiyan maen inaru fáké kómópa amú kayo eren mino. Beni uman maen fifti (50) kirokaremi vákan mai ano vanasi yasamiyan kákan uman amiyaimpin Tiyarafenu oyampá baya sen oreraen mino.

Kákan Pamúku Nanini Vaya Ino

17 ²Mai ma yan manápá ifo afápá kan un kádan enisori kayo ano ma yan manápá ifo afápá kan un ká-

dan dóki kayo ma fákakhein pinté mana enisori ano séi varunará eriven temí, “Téin má ere sirá non kayo yaró ma kákan pamúku nanin mano ma kumantein ma uman amin nain aní ékuya onano. ²aMa vara ráke kin kayo ano mai nanin má pamúku avúavá bariyákan inká mai nanini namu avúavá ano varará nanin banta maman óen uádan mí óen non ma naren óen einí iyan mino.

³bMáa siren mai enisori ano sen tau- nan do maman kámá barafá kaí onékun dan manápá ifo afápá kan un kádan ánon bákan tiyan míkan biri e un- akhein nararé tafúna ané mana nanin mano kumantaren mino. Tiyarafenu ma oyampá baya sikhein baya kayo mai ma kumantein tafúna au fimpá uvantaren mino. ⁴cMai nanin mano ara ara nararé pó uvantein buí daná uren bákan ben au fáké kori vá ara ara onámaná kaké ma kanen kanen einí iyaren mino. Kori fóké uvantein kápi véi fákakhan maifin beni namu avúavá bá pamúku avúavái fúta yanasinta vá ano víkakharen mino. ⁵Máan tukhan mai nanin ayafentá ovaeran bayafó ben aví máa sen uvantaren mino. “Kákan baru Babironi maen ma varará ma famúku nanin kayo ma váken púta avúavá bariyain kéká anóe ino.” ⁶dMai nanin mano Yisasini vaya ma sian dákó iyaré ein mumunan nanin bantai nare narákan mai nare ano véin óen uádan báká ódé takha é uno. ⁷eMáan tékun mai enisori ano sisimemí, “Éi fará takha iya fono. Mai nanini aúpá daná bá dan manápá ifo afápá kan un kádan ánon bákan ma siyan míkan biri e unakhein tafúnai vaya vái ana éin tiamenté uno. ⁸fMai

^t16:15 Mat 24:43-44; Rev 3:3 ^u16:16 Sek 12:11 ^v16:18 Rev 4:5; 8:5

^w16:19 Rev 14:10 ^x16:20 Rev 6:14 ^y16:21 Eks 9:23-24; Rev 11:19

^z17:1 Yer 51:12-13 ^a17:2 Ais 23:17; Yer 51:7; Rev 14:8 ^b17:3 Rev 13:1

^c17:4 Yer 51:7; Rev 18:16 ^d17:6 Rev 18:24; 19:2 ^e17:7 Rev 13:1

^f17:8 Dan 12:1; Rev 11:7; 13:7

ma one ona safúna ano fefá baren mi saréa ída vain ínainpáké ma aron ída van masí pinté ma e unaaren ída kípan uman baranten mino. Ma vara ma araíen uvarein táké ma aunan baran dókifin ma aví ída uvantaré inain kayo anon mai ma fúkaré ein tafúna ma aron ída van masí pinté orun baránen ma édan nain nan anú duren takhaen orera inten mino.

⁹“Kama ineine ma van nain manon ma yayai ana veya afová inten mino. Mai ma yan manápá ifo afápá kan un kádan ánon ma vain mai yan manápá ifo afápá kan un kádan anu yon mi vákan mai varufin mai nanin mano yafíken mino.

¹⁰Daffíken maen dan manápá ifo afápá kan un kádan kin kayoi varu vá deren manten mino. Mai kin kayo finté dan manápá kin kéká ano eraven ankamin mana kin mano saréa fara van mino. Inká ínainpáké ena kin ma afoká in nain mano ída ayáká dafisinten mino.

¹¹Mai ma fefá afá tafúna varen ma saréa ída vain mai yan manápá ifo afápá kanú manaú un kádaní ma ukhá ein kin mino. Beni avúavá ano yan manápá ifo afápá kan un kádan kin kayoi avúavá báí manaí ukhein ben má deren uman baren purinten mino. ¹²“Mai ma siyan míkan biri ma e unakha oneona mai siyan míkan kin mano ma ída yafisin ákona mantein mi one ono. Ínainpáké ma kin karáká kumanin ákona ma mai kin kayo amirantin maen afá tafúna vá manafiní uven asíka afará doranten mino. ¹³Mai kin kayo ano mana inintái yoriyan pasen betíi ákona vá dafisin ákona vái mai afá tafúna aminten mino.

¹⁴Mai kéká ano Sipisipi Arará bá aruvinten mifo véi maen bafan kayoi Bafan báken kin kayoi Kin mi vain pasen betin aruren maman bararasí inten mino. Mai ma veyantá araren aní uran báken ma

ven oo yayiyaré ein kéká anon béin má banten mino.”

¹⁵Máa siren mai enisori ano sisimemí, “Mai ma famúku nanin mano kumanta oneona non maen minó akhempá ma váken ara ara veya siyain nanin banta kayoi aní ukhen mino. ¹⁶^hMai ma siyan míkan biri ma oneona vá afá tafúna vá ano mai famúku nanin oman kaumpan uren maen beni auí daná dákaan karúdarantin avápa vantin ben au vukhafa kankafen naren ira saman kaurinten mino. ¹⁷Mai fara vara seyo, mai avúaváká ten dorano van mi Ti-yarafenu ano mai ineine vetin aúká pe khain ban mino. Máan tukhantín pasen mai kin kayo ano sen inen uren betíi yafisin ákona mai safúna amintin maen mai yorarí inten mino. Máa ma inain manon Tiyarafenu ma síkhá ein baya mo kanaí inten mino. ¹⁸Mai ma oneona nanin maen mai ma kákan baru váken ma vara rákena kin kayorá ma yafíkein mino.”

Babironí Baru Ma Eraven Ankamein Baya Ino

18 Máan turáká oniyaruna vá ena enisori ano inaru fáké kákan ákona vá eriyákan béin au fáke khakhan mano ma vara fanu siáden mino. ²¹Mai enisori ano avádóden oovararen temí, “Kákan baru ma Babironí varé ein inka eraven ankamen mino. Maifin namu aunan kayo vá pútaen aunka ukhein danasinta ma niyain tumpán kayo vái varuí uvíkan akhokho farí ukhein tafúna kayoi masísí en mino. ³Mai fara vara seyo, varará nanin banta ano véin má ma famúkuí iyain avúavá anon óen non ma naren óen einí iyan mino. Inká bara ráke kin kayo vá dere anon mai nanin má pamúkuí iyákan ara ara yaná ma miyaní

⁸17:12 Dan 7:7, 24 ^h17:16 Rev 18:8

ⁱ18:2 Ais 13:21; 34:11-14; Yer 50:39; Rev 14:8

iyain kéká anon beni namu avúavákái kokhon danasinta máden ona van nanin bantaíen mino.”

^{4j}Máa sirá inékun ena vaya ano inaru fáké oovararen temí, “Tenti vanasi ma vaona oe, veni ume avúavá manafin bariyare véi ma varan nain uman ayae varan nampo mai finté me ampire kharan ereno. ^{5k}Mai fara vara seyo, veni ume kayo ano víken inarufá ódíkan Tiyarafenu ano mai nanini namu avúavá daídé uman ameno van inikhen mino. ^{6l}Ei vanasi ma uman amiyaré ein avúavá kasá asotú ure anona véin uman ameno. Bei kápifin ma ákona non opé uren amiyaré ein nará anona ena kápi vasá uvaman kova ure ameno. ^{7m}Béi kokhon ona vákan amusin iyáken kamaé bá uno siren ena nanin banta uman amiyaren mifo ovare me iniyáke vá anona véin uman ameno. Mai nanin mano vei inimpin beyan amo sen máa semi, ‘Téi kuinin mi váké kuinini karáká kumanté uno. Téi ída varé nanin baruna ída kanaí é tirunaná bariyá banté uno.’ ⁸ⁿMáan ma siyá ein nan mi furin má arunan ná bá arafan má ano maná damú anan béin maman bararasí inten mino. Mai fara vara seyo, minó ákona ma vain Bafan Tiyarafenu anon beni avúavá daíden ira saman kaurinten mino.

^{9o}“Máan intin ma vara ráke yafisin kayo ano ma mai nanin má pamúku avúavasí iyáken beni kama yanasintafin ma amusin iyá ein kéká ano véin ma ira saman kauriyain íkun ma oniyáken ben nan arunan uren ífí daantanten mino. ¹⁰Mai nanin ma ira khen kaurintin ma aí dosen berai sin nain nan mai ma véi má amusin iyá ein kéká ano akhokho van nentá e mantakhen máa sen bá danten

mino: ‘Sirun noe, kákan baru ma varé ein Babironi inká namu uron en mino. Tiyarafenu ano veni avúavá daíden mana áaurá anan uman amen mino.’

^{11p}“Ma varará ma váken ona miyaní uriyan sarí iyaré ein kayo ano vetin nina yanasinta ma miyaní in kéká ída vantin pasen mai nanin nan arunan uren ífí daantanten mino. ^{12q}Mai kékái ona maen kori vá siriva vá kama onámaná kayo ma kanen kanen iyain má kama ankaroro kayo vá efanten davaráe kayo vá ino. Inká nararé davaráe kayo vá sirikha yavaráe vá kama auna iyain daa kayo vá ara ara yanasinta ma erofanti aveantumpó ma uvantein kayo vá ino. Inká kákan miyan tákena yaafó ma uvantein danasinta kayo vá bronsi vá aeni vá mampori vái mai nanin mano miyaní iyaren mino. ¹³Miyaní in ona kayo ma mai kéká ano ma kain baré ein maen sinamoni vá bin má irafin kaúdan ma íkun uaren kama aunka in pauran má ino. Inká ara ara masamen ma kama aunka iyain má aufá peran uveri ma kama ukhein má uvaini vá orifi anu vá kama faravá bá uviti vá ino. Inká burumakaó bá sipisipi vá osin má osin mano ma yarifiyain kari vá inká miyan ída van doran banta kayo vá banasi vá deren mai nanin mano miyaní uren sarí iyaren mino.

¹⁴“Mai ona ma miyaní uren sarí iyaré ein kéká ano máa sinten mino, ‘Ase yunan kayo ma naráke ma ena vá nano van iyaré eona mai inka o afeyoren mino. Inká kákan miyan táke yanasinta ma maman kaúdáke amufí nafí iyaré eona inka sipá orein ída kanaíe mai yanasinta ovaráne varan nono.’

^j18:4 Ais 48:20; Yer 50:8; 51:6, 45; 2Ko 6:17 ^k18:5 Esé 18:20-21; Yer 51:9

^l18:6 Íbo 137:8; Yer 50:15, 29; 2Te 1:6 ^m18:7 Ais 47:7-9 ⁿ18:8 Rev 17:16

^o18:9 Isi 26:17; 27:30-35 ^p18:11 Isi 27:36 ^q18:12 Isi 27:12-13, 22

¹⁵r“Ona ma varen mai nanimpin me sarí uren moní bariyaré ein kayo ano nentá e mantakhen mai nanin mano ma uman bariyan berai siyain nan akhokho van uren ífi daan tiyan máa sinten mino. ¹⁶s“Kákan baru Babironi oe, sirunke ono. Éi maen anasi ano ma kama ukhein auí daná uren ma kori vá ara ara onámaná kayo vá ano ma kanen kanen iyain má kama ankaroro kayo vá ma mai yaró uran ma afi sikhian bainíi ukhare ono. ¹⁷t“Máan turákáen nan mana áaurái mai yanasinta ano mo namuen mino.’

“Máan tiyantín maen sipi afóeyan má sipii kapteni kayo vá maifin ma ona varen nóken sarí iyaré ein kéká bá inká sipi kayofin ma yoriyain kéká bá ano nentá e mantanten mino. ¹⁸uE mantaven onantín ma mai varu ira khen kauriyan ma íkun édavintín maen ífi diyain máa sinten mino. ‘Ma varará ena kákan baru máan tukhein baren nafino. Ída ino.’ ¹⁹Mai kéká ano kayó pákaan ánompin kaúden kákan arunaná máden ífi diyáken máa sinten mino. ‘Kákan baru Babironi oe, sirun ke ono. Mai nanin nina yanasinta ano ma kákan sipi afóeyan aya íkan ona vain kékási iyaré ein mai manádái o afeyoren mino.’

²⁰v“‘Inaru oe, véi ma furein nará amusin ono. Mumunan nanin banta vá baya varen orin banta kéká bá sakhnampa vanta kayo vá ano amusin ná ono. Tíretí ankan ma uman amiyaré ein anonafái Tiyarafenu ano veni avúavá daíden uman amen mino.’”

²¹wMáa sirákan mana ákona enisori ano kákan onámaná ma uviti yasamiyain an dakhein mamaren un nompin karúdan araviyákan oovararen temí, “Ma

onámaná ma karúdekun aravein an den mi Tiyarafenu ano kákan baru Babironi maman karúdantín tipá o afeyoranten mino. ²²xMai ma kita fi okhakhán nafi ufen nafi ma asiren í diyaré ein kayo avaya ída enádá inin nono. Ara ara yoran bákan ma mai yorantá afova mantéin mano ma yoriyaré ein kayo ano ída vantín inká uviti yasamiyan ma avaya siyaré ein má dere ída inin nono. ²³yOon mano éin ída evaránen kakhaantanten mino. Anasi ma iman amin banta vá mai nanin má ano ma amusin iyaré ein baya ída uron mi enádá éin pintena inintén mino. Eni ona ma miyaní iyaré ein mai kákan banta kékái váken kampun avúavá póké banasi yo iyanen tavi aípá oriyaré intín pasen mai avúavá afoká intén mino. ²⁴zBéi anon Tiyarafenui kantasí ukhein nanin banta vá sakhnampa vanta kéká bá inká minó akhempá ma vain nanin banta vá aruan puriyaré in mi oman páman en mino.”

Babironi Varu Ma Ira Khavin Inarufá Amusin Í Dein Baya Ino

19 Máan turá iniyaruna vá inaru fáké kokhon nanin banta ano oovararen temí,

“Bafan avisá daní ono.

Evaránen ma siviran má kákan bí bá minó ákona vá Tiyarafenu inan bákan béin pintéi afoká ukhen mino.

^{2a}Mai fara vara seyo, fura sen ma funtákein avúavá póké anan Tiyarafenu ano vanasii avúavá daimé iyan mino.

Ma varará ma kákan pamúku nanin báken ma vei namu avúavá póké banasi máden asuse uren Tiyarafenui

^r18:15 Isi 27:31, 36 ^s18:16 Rev 17:4 ^t18:17 Ais 23:14; Isi 27:27-29

^u18:18 Isi 27:32 ^v18:20 Diu 32:43; Ais 44:23; Yer 51:48

^w18:21 Yer 51:63-64; Isi 26:21 ^x18:22 Ais 24:8; Isi 26:13

^y18:23 Yer 7:34; 16:9; 25:10 ^z18:24 Yer 51:49; Rev 17:6

^a19:2 Diu 32:43; Rev 6:10

yoran nanin banta ma aruan puriyá eipái anona yaíden uman amen mino.”

³Máa siren evaránen oovarariyan temí, “Tiyarafenui avisá daní ono.

Mai varu ma ira khen kauriyain pinta tena íkun mano fara ódiyan banten mino.”

⁴Máa siyákan tuenti-fo (24) ánon enisori kayo vá inká tafúnaren daná ma kamí kamí báken kaya iyain kéká bá ano Tiyarafenu ma vei kin karáká kumantein avorá matimen oovararen temí, “Pura ino. Bafan avisá daní ono.”

⁵Máa siran mai ma kin kará bain pinté mana vaya ano máa semí, “Beni yoran banta kéká ma aví bain má inká aví ída vain má ma vákeya ven nan periyaona kéká ano vá Tiyarafenun aví daní ono.”

⁶Máa sirá inékun kokhon nanin banta ano oovararen baya siyain mano non iya ma káusiyán avaya seiníen inká aafa ma kankaré teiníen iyan temí, “Bafan avisá daní ono.

Mai fara vara seyo, setisi Bafan Tiyarafenu ma Minó Ákona vain manon kiníen mino.

⁷“Erí tifé í diyá timusin é béin kákan bí ameno.

Mai fara vara seyo, Sipisipi Arará ma anasi iman amin damú inka afoká ukhan

mai ma véin baran nain nanin mano veyan útaren ave ukhen mino.

⁸Efanten davaráe ma kamaen panu sikhán ma ída mana fain dampakhein mi uren bano siren amikharen mino.”

(Efanten davaráe maen mai ma Tiyarafenui kantasí ukhein nanin banta

ano ma funtákein avúavá bariyá ein mi aní ukhen mino.)

⁹^dMáa siran mairá enisori ano sisimemí, “Ma vaya vompompín uvarano. ‘Mai ma Sipisipi Ararái anasi varan omáká ma o kumamen dunan nano van ma arakhein kéká ano vá amusin ino.’” Máa siren evaránen temí, “Ma maen Tiyarafenui fura sikhein baya kayo ino.”

¹⁰^eMáa siká béin monó tiantano van arantampín o mátimékun mifo véi semí, “Ída vá máan tono. Éin má Yisasini vaya ma sian dáko iyain afá aváeyan má ayofiná bá an dakheruna vantán bá umpo Tiyarafenun mana vá monó tiantano. Mai fara vara seyo, Yisasi ma fura vaya sikhein manon banasi ákona amíkan sakhanampa vaya sé iyan mino.”

Efanten Osin Ané Ma Kumantein Bantai Vaya Ino

¹¹^fMáa sirá mo onékun inaru ona yiviyain má mana efanten osin mantakhan mai ané mana vanta kumantaren mino. Mai vanta van mi Tiyarafenui Vaya Ánain Puntáden Dakhafiyan inká Pura Vaya Ana Sin Banta e sen aré iyan mino. Béi maen puntákein avúavápói vanasi yaíden bei namuro vá mo aruvé iyan mino. ¹²^gMai vanta auu fenté ira anafun ma édaveiní iyákan ben ánontá kokhoná kin kamamó baren mino. Ben ayafentá mana ví uvantan maen ída ena ano afová ukhan beyaká anan afová ukharen mino. ¹³^hNarefin dakharé ein buí danái véi uren bákan ben aví ma vain mai Tiyarafenui Vaya ino. ¹⁴Inaru fáke aruvin banta kayo ano efanten buí daná ana uriyan efanten osin kayo ané kumamen béin ánain bákuren oren

^b19:6 Rev 14:2 ^c19:7 Ais 61:10; Rev 21:2 ^d19:9 Mat 22:2

^e19:10 Apo 10:25-26; Rev 22:8-9 ^f19:11 Íbo 96:13; Ais 11:4; Rev 1:5; 6:2

^g19:12 Dan 10:6; Rev 1:14; 2:17 ^h19:13 Ais 63:1-3; Yon 1:1, 14

mino. ¹⁵ⁱMai ma esé oriyaré ein banta oo fenté barará nanin banta ma aruan purin nain baenati ano sefá tefá an ukhan e unen erakharen mino. Béi anon aeni ayonta fákaren banasirá ákona yafisirí iyáken Minó Ákona vain Tiyarafenui aran naná ma vaimpin dantin aravúbintin uvaini ma yasameiní inten mino. ¹⁶^jBen arúkantá bá ayá davaráera bá máa sen bompon uvantaren mino. Kin kayoi Kin má bafan kayoi Bafan má ino.

¹⁷^kMáa sikhá ma onékun mana enisori ano áaufin mantaven ayompin ma ámaren noin nun kayo oovararen tiamemí, “Tiyarafenui kákan dunan ma samádan bain tasá e átaru ono. ¹⁸Átaru uveya kin kayo vá aruvin banta kayoi yafisin banta kéká bá ákona aruvin banta kayo vá inká osin kayo vá mai osin ané ma kumantá ein kayo vá miyan ída van doran banta vá para ma vain kéká bá inká tító bá kákan banta kayo vái au vukhafa nano.”

¹⁹Máa sirá onékun mai ma efan-ten osin ané ma kumantein banta vá beni aruvin banta kayo vá aruvono siren afá tafúna vá bara ráke kin kayo vá ano vetíi aruvin banta kayo avían átaru en mino. ²⁰^lMáan tiyaréin maen mai afá tafúna fákiyáken inká kampun sakhanampa vanta kéká ano ma ven aviká enará ukhein daná uvaren dararen iyaréin kayo vá dere fáken mino. Mai avúavá pókéi mákádan banasi ano veni aní daná mamaren béin aman manontá monó tiyaré íkan míkanaan para ayun kaya iyan páken sarafa onámaná ano ma ira khiyaimpin mo kharúden mino.

²¹Máan turen maen mai ma efan-ten osin ané kumantaré ein banta oo fenté ma e unen erikhá ein baenati anon afá tafúnai

aruvin banta kéká aruan púdan tumpán kayo ano vetin au vukhafa nen mino.

Mana Tauseni (1,000) Orana Aúpin Ma Yakó Inain Baya Ino

20^mMáan turá onékun mana enisori ano inaru fáké eriyáken aron ída van masí kákana khi vá kákan seni anan má pákakharen mino. ²ⁿBan Anon nan ma drakoni e siyáken peyante kákan osafáe e siyaré ein mai mana tauseni (1,000) oranará bano van seni anampó damuan kaen mino. ³Máan turen mana tauseni (1,000) oranará báken ída evará-nen banasi mákasino van mai enisori ano aron ída van masípin béin karú-dan aravuvín mai masí ona munkuan ákonaen mino. Mai máa orana ma esan-tavintin maen tanáa afarái útúantá-dantin banten mino.

⁴^oMáan turá onékun kin kará kayo vákan mairá ma kumantá ein kéká maen banasii avúavá ma yaimin ákona amen mino. Máan tiyákan Yisasini fura vaya vá Tiyarafenui kama vaya vá ma sian dákó ein nan ma anuran tíkakhá ein kayo vá ina oné uno. Inká afá tafúnara safi veni aman manonta safi ma ída monó tian tiyáken beni aní daná ma ayafenta safi ayanta safi ma ída mantaré ein kéká bá dere oné uno. Mai kayo ano evaránen aunan mamaren mana tauseni (1,000) oranará Yisas Karaisin má dafis-iní ukhen baren mino. ⁵Púkaren ma ída esé orun mantan nain kéká ano mana tauseni (1,000) oranarái masípin para vanten mino. ⁶^pPúkaren ma esé aráien orun mantampin mai Tiyarafenui kantasí ukhein nanin banta anon orun mantanten mifo amusin ná ino. Mai fara vara seyo, ínainpáké ma kan dádasí en evará-nen purin ákona ano ída kanaíen betin

ⁱ19:15 Íbo 2:9; Rev 1:16; 14:20 ^j19:16 Rev 17:14 ^k19:17 Isi 39:17-20

^l19:20 Rev 13:12-17; 20:10 ^m20:1 Rev 9:1 ⁿ20:2 Esé 3:1; Rev 12:9

^o20:4 Dan 7:9, 22, 27; 1Ko 6:2; Rev 13:17 ^p20:6 Rev 1:6

maman bararasí inten mino. máan tinten mifo mai kéká ano Tiyarafenu vá Yisas Karaisin mái yoran bantaí uven Karaisin má mana tausení (1,000) oranará dafisiní ukhen banten mino.

Tiyarafenu Ano Ma Ban Anon Maman Bararasí Ein Baya Ino

⁷Mana tausení (1,000) orana ma oriv-intin maen Ban Anon ma karavusí ukhá ein útúantanten mino. ⁸⁹Karavusi ma útúantántanin Kokin má Makokin mái kéká ma minó barafá bain mo mákádén aruvino van avían manafin átaru inten mino. Mai kéká maen un non akhen páke eyu an den ída yankaforen mi vanten mino. ⁹⁹Máan turá onékun mai kéká ano minó akhen páké eriaren Tiyarafenui vanasi vá béi ma anunu iyá ein kákan baru vá me iyaren eúken mino. Máan tíkan mifo inaru fáké ira ano á ma yeiníen eraaren mai kéká morun ken kauren mino. ¹⁰⁹Máan turan mai ma vanasi mákasiyaré ein Ban Anon páken sarafa onámaná káké ma ira khiyaimpin ma afá tafúna vá kampun sakhanampa vanta vá ma mo kharúdakháeimpin mo karúden mino. Maifin mi vetí ankan bantin inuran má bayan má ira akhen oriyantin berai siyan banten mino.

Púká Ein Kékái Avúavá Ma Sípá Daimin Nain Baya Ino

¹¹Máan turá oniyaruna vá mana kákan efanten kin kará bákan mai yaró mana vanta kumantaren mino. Mai vanta au fáké ma fanu siyain nan ma vara vá inaru vá ano féden karan orin mifo vetí aúmanin baru ída varen mino. ¹²⁹Máan tiyáká onékun mai ma aví bain

má aví ída vain má ma fúká ein kéká ano Tiyarafenui kin kará avorá o mantavin bompon dóki kayo kavasen oriyan Aunan Baran Dóki yere khavasen mino. Kaváden púkaré ein kéká ano ma fara váken bariyaré ein avúavá mai vompon dókifin uvamádan baré in betí ma variyá ein avúaváká tiyan daimen mino. ¹³⁹Un nompin ma fúká ein kéká ampiádan erin maen inká masípin ma masí ukhá ein kéká bá ina ampiádan ere ere uvin betí ankan ma variyaré ein avúaváká ten daimen mino. ¹⁴Máan turen puren ma noré ein baru maman karúdan kákan ira khiyain masípin oren mino. Mai ma kákan ira khiyain masí ma vain mai kan dádasí en ma furin mino. ¹⁵Máan tukhan maen mai ma Aunan Baran Bompon dókifin ma aví ída varé ein kayon kákan ira khiyain masípin karúdan oren mino.

Inaru Fáke Yerusaremi Van Ma Sikhein Baya Ino

21 ^vMáan turá auyen inaru vá auyen bara vá oné uno. Mai fara vara seyo, feyante inaru vá bara vá e khípan maen inká un non má dere khípen mino. ²⁹Máan tuví onékun maen auyen Yerusaremi ma kantasí ukhein mano Tiyarafenu vaípaké inaru me ampiren auyen nanin ma imádan be avafu vaípa orein an den ma varará eren mino. ³⁹Máan tiyá inékun mai ma kin kará bain pinté mana oova ano máa semí, “Tiyarafenui varu ano saréa vei vanasifin orun bain betin má béi vanten mino. Mai kéká ano veni vanasí intin béi ano vetí Ayarafenuí inten mino. ⁴⁹Máan tuven maen betin auufente minó ánu yo arú-dantin purin nafi arunana safi ífidan nafi

⁹20:8 Isi 38:2, 9, 15-16 ⁹20:9 2Ki 1:10 ⁹20:10 Íbo 11:6; Rev 19:20; 21:8

⁹20:12 Dan 7:9-10; Mat 25:31-46; Apo 17:31; 2Ko 5:10; Rev 13:8

⁹20:13 Rom 2:6; 1Pi 1:17; Rev 2:23; 22:12 ⁹21:1 Ais 65:17; 2Pi 3:13

⁹21:2 Ais 52:1; 61:10; Ibu 11:16; 12:22; Rev 3:12 ⁹21:3 Riv 26:11-12; Isi 37:27;

Sek 2:10; 2Ko 6:16 ⁹21:4 Ais 35:10; 65:19; Rev 7:17

ái dana safi ída vanten mino. Mai fara vara seyo, feyante avúavá ano ma uman amiyá ein mano inka e khípen mino.”

^{5z}Mai ma kin karáká kumantá ein mano máa semí, “Minó danasinta man auyení iyá uno.” Siren temí, “Ma vaya maen pura sen puntákein baya ifo vompon dókifin ná uvarano.”

^{6a}Máa siren evaránen temí, “Mai inka khípen mino. Téi maé Araíin má Kípan má uno. Non nan ma aiyaín kayo mai ída miyan bantíi aunan baran non ma eraviyaín pintena sékun para nanten mino.

^{7b}Intéa nanin banta anó ara ara uman esantanten nafi mai kéká anon mai ma útaan kaékun bain danasinta mamaren ten tikhafanaí intíi séi vetíi Ayarafenuí onté uno. ^{8c}Máan tinten mifo mai yanasinta van ma féden téin oyan timin nain kéká bá ída ma mumunan in kéká bá minó daná ma máden asuse in kéká bá banta ma aruan purin kéká bá pamúku avúavá ma varan kéká bá uvátakhan ma in kéká bá ayampó uvaran danáká ma monó tin kéká bá kampun baya ma sin kéká báí varun mai ma sarafá onámaná káké ma ira khiyaín ban mino. Mai kan dádasí en ma furin nain mino.”

⁹Mai ma yan manápá ifo afápá kan un kádan enisori kayo ano ma Tiyarafenuí kípan aran naná ma víkhakhein dóki kayo ma fákakhá ein pinté mana ano eriven temí, “Ten má eresirá mai ma Sipisipi Arará ma varan nain nanin aní ékuyá onano.”

^{10d}Máa siren mai enisori ano séin taunan do maman kákantá dan bain anuyontá mo khaúden kantasí ukhein baru auyen Yerusaremi ma Tiyarafenu vaípáké ma inaru me ampíren eriyaín aníen mino. ^{11e}Tiyarafenuí kakhán

mano mai varufin bíkavin mai khakhan mano kákan miyantá ma vain yaspa onámaná káké ma kanen kanen einí iyaren mino. ^{12f}Mai varui kafi yan bákan tiyan míkan mifo sirantan kan orun kádan (12) ona van mai ona kayorá mana mana enisori ano yafídú ukharen mino. Máan tukhan mai ona kayorá tiyan míkan mifo sirantan kan orun kádan (12) anan banta ma Isareri kékápin bain aví uvantaren mino. ¹³Mai ona kayo ma varé ein maen áau ma e unípá kanú manaú ona vákan inká notifá kanú manaú bákan sautifá kanú manaú bákan inká áau ma orun perápá kanú manaú baren mino. ¹⁴Tiyan míkan mifo sirantan kan orun kádan (12) onámaná daróí mai varui kafi uvantaren mino. Máan tukhan maen Sipisipi Araráí sirantan kan orun kádan (12) eyo iyampon kayo avíi mana mana onámanáká uvádú ukharen mino.

^{15g}Mai ma sen má baya sein enisori ano mai varu vá kafi vá inká ona kayo vá ma avamáan onan danka kori fóké uvantein pákakharen mino. ¹⁶Mai varu avamáden onákan kamí kamí akhen ban maen beni ayá bá asíka vá ano kan tauseni ifo kan antareti (2,200) kiro mitan baren mino. ¹⁷Mai varui kafi ma amákó uren uvantá ein ma avamáan onein mai sikisti faif (65) mita ino. Banta ano ma avamáan oniyain avúavákái sen enisori ano avamáan onen mino. ^{18h}Mai varui kafi maen yaspa onámaná póké uvaren inká mai varufin ma vain danasinta korifó uvaren urákan mai ráké kamu an dakharen mino. ¹⁹Mai ma sirantan kan orun kádan (12) onámaná daró ma mai varui kafi uvádan bákan ma kákan miyantá bain onámaná kayofó ma auí

^z21:5 2Ko 5:17 ^a21:6 Ais 55:1; Yer 2:13; Yon 7:37; Rev 1:8, 17; 22:17

^b21:7 2Sa 7:14; 1Kr 17:13; Íbo 89:26-27 ^c21:8 Mat 25:41; Rev 20:15; 22:15

^d21:10 Isi 40:2 ^e21:11 Ais 60:1-2, 19 ^f21:12 Isi 48:30-35

^g21:15 Isi 40:3; Rev 11:1 ^h21:18 Ais 54:11-12

ukharé ein mai máan mi ukhen mino. Esé arái in bafan ma yaféká ein mai yaspa e ma siyain onámaná bákán mairá kaní ma ukhá ein safaia vákan inká kanú manausí ma ukhá ein akhéti vákan inká kamí kamisí ma ukhá ein mai emarari ino. ²⁰Inká dan manápasí ma ukhá ein sadonikisi vákan inká dan manápá ifo afápá mana un kádaní ma ukhá ein kaneriani vákan inká dan manápá ifo afápá kan un kádaní ma ukhá ein krisoraiti vákan inká dan manápá ifo afápá kanú manau un kádaní ma ukhá ein mai beriri ino. Inká dan manápá ifo afápá kamí kamí un kádaní ma ukhá ein topasi vákan inká tiyan míkaní ma ukhá ein krisopresi vákan inká tiyan míkan mifo sirantan mana orun kádaní (11th) ma ukhá ein yasinti vákan inka siyan míkan mifo sirantan kan orun kádaní (12th) ma ukhá ein ametisiti vákan ukharen mino.

²¹Mai ma sirantan kan orun kádan (12) ona ma varé ein mai kákan miyantá ma vain ankaroro fói mana mana ona uvádú ukhan inká mai varui kákan aa maen kori fóké anan uvantan kamu an dakharen mino.

²²Mai varufin ída kákan monó namun bá oné uno. Mai fara va ino. Minó Ákona ma vain Bafan Tiyarafenu vá Sipisipi Arará bá anon mai varui kákan monó namun ban mino. ²³ⁱMai varufin áau vá biyon má ano ída kakhaan té iyan mino. Mai fara va ino. Tiyarafenui kakhan manon panu sian tiyan mi Sipisipi Arará anon oon uruanté iyan mino. ²⁴^jAra ara vara fáke nanin banta ano mai kakhan aúpin nontin maen bara ráke yafisin kayo ano maifin eriven betí kákan bí aminten mino. ²⁵^kMai varufin ída yunin bákán pasen mi inúpasí ma

íkan ída ona munké iyan mino. ²⁶Minó bara fáke nanin banta ano kama yanasinta vá kákan bí bá baren mai varufin ódinten mino. ²⁷^lMai varufin maen ída mana namu avúavá bá ayampó uvaran danáká ma monó tin avúavá bá ayave avúavá ma variyá ein kéká bá kampun ma siyá ein kéká bá ano ódinten mino. Máan tinten mifo Sipisipi Ararái aunan baran bompompin ma aví uvantan nain kéká ano anan ódinten mino.

Aunan Ma Amiyain Noni Vaya Ino

22^mMáan tiyákan mai enisori ano Tiyarafenu vá Sipisipi Arará báí kin kará pinté ma avusese ukhen aunan amiyain non mano ma kamu an dakhen oriyain aníen mino. ²ⁿMai non mano varu aúbaná ma kákan aa vaimpin eraviyákan tefátefá akhentá maen mana aunan amin daa ampanten mai ano sirantan kan orun kádan (12) dádái mana oranafin aran iré iyan mino. Mana mana viyontái aran iriyan mai yaa ana fókéi ayofan danasí uren barará nanin banta ayofé iyan mino.

³Aufon ma in avúavá mai varufin ída vanten mino. Mai fara va ino. Tiyarafenu vá Sipisipi Arará báí kin kará mai varufin bantin pasen beni yoran nanin banta ano véintá anan monó tinten mino. ⁴^oMáan tiyáken mai kéká ano ven auná oniyantin maen be aví mai nanin banta ayafentá uvaranten mino. ⁵^pMáan turantin mai varufin ída yunin bantin oon má áau vá ano ída kakhaantanten mino. Mai fara va ino. Bafan Tiyarafenu ano kakhaan tiyantín mai nanin banta ano kiní ukhen ayun para van oriyan banten mino.

ⁱ21:23 Ais 60:19-20; Rev 22:5 ^j21:24 Ais 60:3, 5 ^k21:25 Ais 60:11

^l21:27 Ais 52:1; Isi 44:9; 1Ko 6:9-10 ^m22:1 Isi 47:1

ⁿ22:2 Esé 2:9; Isi 47:12; Yoe 3:18; Sek 14:8 ^o22:4 Mat 5:8; Rev 3:12

^p22:5 Dan 7:18, 27; Rev 5:10; 20:6; 21:23, 25

⁶qMáa siren mai enisori ano sisimemí, “Ma vaya funtákein mi váká banasi ano iniren pura ino sino van muno. Ínainpá dáko inain danasinta van ma Bafan Tiyarafenu ano vei sakhanampa vanta kayo siamíká ein bayan bei enisori siantan éin morun tiamiyan mino.”

Yisasi Ma Erin Nain Baya Ino

⁷r“Afovasá ono. Ainé téi erenté uno. Ma vompompin ma uvantein sakhanampa vaya ma iniren bákuriyá ein kékasá amusin ino.”

⁸sTéi Yoni anon mai yanasinta oniyáké mai vaya iné uno. Mai vaya iniré maé mai enisori arantampin o mátimé béintá monó teno van é uno. ⁹Máan tékun mifo véi semí, “Ída vá máan tonono. Téi maé éin má sakhanampa vanta kayo ma afá aváeyan bain má inká ma vompon pinte vaya oo yaiyen ma mai vaya vákuriyain kéká báí mana yoran bantan bá umpo Tiyarafenu aví ana vá daní iyáke ventá ana vá monó teno.”*

¹⁰Máa siren tisimemí, “Ma sakhanampa vaya ma vompompin uvareona mai ída vá damuan ákona ono. Mai fara vara seyo, yamú inka ádesí ukhen mino. ¹¹tMáan tukhein nará namu avúavá ma inain ásin na mai avúavá baren oriyan bano. Pain avúavá ma inain ásin ná mai avúavá baren oriyan bano. Inká puntákein avúavá ma varan nain ásin ná mai avúavá baren oriyan bano. Inka kantasí

ukhen ban avúavá ma varan nain ásin ná kantasí ukhen ban oriyan bano.”

¹²u“Afovasá ono. Téi ainé erenté uno. Téi ma erenuna mai miyan máí marmare erivé maé mai ma varará nanin banta ano ma variyá inain avúavákái siyá miyan amídú onté uno. ¹³vTéi maé Arfa vá Omekha vá báké Araíin má Kípan má uno.

¹⁴w“Bei auí daná ma sesé uren bain kayo vá amusin ino. Mai kéká san mi kana ino sintin mi aunan baran daa aran niyáken kákan barui ona finté ódinten mino. ¹⁵Mai varu akhempá mai iyan kayo an den ma uvátakhan iyá ein kéká bá pamúku nanin banta vá banta aruan purin kéká bá ayampó ma uvaran danáká ma monosí iyá ein kéká bá inká kampun baya ma e sian more mere iyá ein kayo vái vanten mino.

¹⁶x“Téi Yisasi anon ma vaya siamino van tesi enisori siantékun mi mumunan nanin banta vaipá oren mino. Téi maé Devitini Ampamin Anan† bákéi séi anon beni kin kará baranté uno. Inká téi mae Ákurá Ma Fanu Siyain Ofu uno.”

¹⁷yKantá Aunan má Tiyarafenu vanasi‡ vá ano siyáken, “Ereno.” Máa siyantín ma vaya ma inin nain mano vá ereno sino. Máa siyantín ma non nan ai nain mano vá eriven nano. Non ma nano van in nain ásin eriven ná aunan bain non ma Tiyarafenu ano fara amusin amiyain ná nano. ¹⁸zMa vompon dókifin ma sakhanampa vaya vain ma inin nain kéká amaniná ma

*22:9 Rev 19:9 fin ná onano.

†22:16 Devitini Ampamin Ana uno ma siyain baya mai Yisasi fefá bakan ínainpái Deviti afoká ukhan mino.

‡22:17 Tiyarafenui vanasi van ma siyain mai Kiriki vaya finté banta ma iman amikhein arinta van mi siyan mino. Mai vanta maen Yisasi ino.

q22:6 Rev 1:1 r22:7 Rev 1:3 s22:8 Rev 19:10 t22:11 Dan 12:10 u22:12 Ais 40:10; Yer 17:10; Rev 2:23 v22:13 Ais 44:6; Rev 1:8, 17; 21:6 w22:14 Esé 2:9; 3:22 x22:16 Nam 24:17; Ais 11:1, 10; Rom 1:3; Rev 2:28; 5:5 y22:17 Ais 55:1; Rev 21:6 z22:18 Diu 4:2; 12:32

ákona vayafó amaan té uno. Mana vanta ano ma ena vaya maman ma ma vompontá asotú intin maen ma vompompin ma Tiyarafenui aran nana san ma sikhein Tiyarafenu ano maman mai vanta amaniná kainten mino.
¹⁹Inká mana vanta ano ma ma vompon pintena mana vaya yo varantin maen aunan amin daa aran ma véin iyáantan bain Tiyarafenu ano yo mádantin maen

mai ma kantasí ukhein baru van ma ma vompon dóki ano sikheimpin ída ódinten mino.

^{20a}Ma vaya kayo ma sian dákó ein banta ano máa semí, “Eyo, séi ainé er-enté uno.”

Pura ino. Bafan Yisasi ereno.

²¹Bafan Yisas Karaisini sarisari ano vá Tiyarafenui vanasi vá bano.[¶]

[¶]22:21 Manáa Kiriki vompon akhempá ma vaya asotú ukhen mino: *Pura ino.*

^a22:20 Mat 24:30-31; 1Ko 16:22